

MESYUARAT KEDUA, PENGGAL KELIMA
PARLIMEN KEEMPAT BELAS
2022

**18 JULAI HINGGA 4 OGOS 2022
SOALAN NO. 1 HINGGA 557**

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : YB DATO' SRI ABDUL AZEEZ BIN
ABDUL RAHIM [BALING]**

SOALAN:

Minta **PERDANA MENTERI** menyatakan sejauh manakah agihan bantuan banjir telah disalurkan kepada mangsa banjir Monsun Timur Laut (MTL) 2021/2022 dan apakah cabaran yang dihadapi oleh Kerajaan dalam usaha melaksanakan agihan bantuan tersebut.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Sehingga 25 Julai 2022, Kerajaan Persekutuan melalui Agensi Pengurusan Bencana Negara (NADMA) telah melaksanakan pemberian bantuan banjir yang terdiri daripada Bantuan Wang Ihsan (BWI), Bantuan Barang Keperluan Asas (BBKA) dan Bantuan Pembaikan Rumah (BPR) dengan kos maksimum sehingga RM5,000 dengan jumlah keseluruhan sebanyak RM887,860,500 kepada mangsa banjir Monsun Timur Laut (MTL) 2021/2022.
2. Bagi Bantuan Wang Ihsan (BWI) sebanyak RM1,000 dan Bantuan Kematian sebanyak RM10,000 yang disalurkan kepada mangsa banjir melalui Pejabat-Pejabat Setiausaha Kerajaan Negeri dan Pejabat-Pejabat Pembangunan Negeri di negeri-negeri berkenaan, Kerajaan telah memberi bantuan sebanyak RM259,480,000 kepada 248,814 Ketua Isi Rumah (KIR) yang layak.
3. Bagi Bantuan Barang Keperluan Asas (BBKA) yang disalurkan kepada mangsa banjir melalui Pejabat-Pejabat Pembangunan Negeri di negeri-negeri berkenaan, Kerajaan telah memberi bantuan sebanyak RM487,172,500 kepada 193,437 Ketua Isi Rumah (KIR) yang layak.
4. Manakala, bagi Bantuan Pembaikan Rumah (BPR) dengan kos maksimum RM5,000 yang disalurkan kepada mangsa banjir melalui Pejabat-Pejabat Pembangunan Negeri di negeri-negeri berkenaan, Kerajaan telah memberi bantuan sebanyak RM141,208,000 kepada 31,402 Ketua Isi Rumah (KIR) yang layak.

5. Bagi bantuan BWI dan BBKA, di antara cabaran yang dihadapi oleh Kerajaan dalam proses pemberian bantuan adalah:
 - (i) Mengenal pasti mangsa yang layak mendapat keseluruhan atau sebahagian bantuan;
 - (ii) Permohonan bertindih daripada Ketua Isi Rumah (KIR) yang sama;
 - (iii) Permohonan daripada mereka yang tidak layak; dan
 - (iv) Maklumat permohonan yang tidak lengkap dan tidak tepat.
6. Manakala, bagi Bantuan Pembangunan Rumah pula, di antara cabaran yang dihadapi oleh Kerajaan adalah:
 - (i) Peningkatan kos bahan binaan;
 - (ii) Kos baikpulih melebihi kos siling yang ditetapkan;
 - (iii) Isu pemilikan tanah bagi pelaksanaan pembinaan baru; dan
 - (iv) Kerja baikpulih telah dilaksanakan awal oleh pemilik rumah. Justifikasi perlu dibuat terhadap kos bersesuaian yang perlu ditanggung oleh Kerajaan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BERTULIS

**DARIPADA : DATO' SRI ABDUL AZEEZ BIN ABDUL RAHIM
[BALING]**

SOALAN

Dato' Sri Abdul Azeez bin Abdul Rahim [Baling] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sejauh manakah perancangan Kerajaan dalam memastikan program bantuan tambahan rakyat B40 yang digariskan di bawah Majlis Tindakan Sara Hidup Negara (NACCOL) mencapai sasaran yang telah ditetapkan.

JAWAPAN

Tuan Yang di-Pertua,

Untuk maluman Yang Berhormat, perancangan dalam memastikan program bantuan tambahan di bawah Majlis tindakan Kos Sara Hidup Negara (NACCOL) adalah seperti berikut:

RM1.1 bilion diperuntukkan kepada subsidi ayam dan telur. Melalui cerapan data harga mingguan Kerajaan mendapati kesan positif kerana harga sebenarnya berada di bawah harga kawalan RM9.40/kg bagi Semenanjung Malaysia. Harga purata nasional mingguan sehingga 31 Julai 2022 adalah RM8.02/kg bagi ayam bersih standard di semenanjung. Tindakan Kerajaan untuk memberi subsidi ayam ini menunjukkan kesungguhan kerajaan untuk membantu rakyat kerana ini pertama kali subsidi ayam diberikan bagi memastikan bekalan ayam pulih.

Kerajaan juga dijangka membelanjakan subsidi minyak masak polibeg 1 kg sehingga RM4 bilion pada tahun ini. Jumlah ini naik secara mendadak berbanding keperluan pada tahun 2020 dan 2021. Untuk makluman, pada tahun 2020, Kerajaan telah membelanjakan RM500 juta dan pada tahun 2021 sebanyak RM2.1 bilion. Peningkatan pada tahun 2021 adalah kerana kerajaan memulakan subsidi minyak masak botol bermula pada Ogos 2021 untuk mengurangkan bebanan rakyat semasa Perintah Kawalan Pergerakan (PKP).

Memandangkan jumlah subsidi yang ditanggung kerajaan adalah amat besar, kerajaan mula melihat pendekatan alternatif bagi menangani isu kenaikan harga barang yang tidak melibatkan pemberian subsidi. Pada 1 Ogos 2022, Mesyuarat Pasukan Khas Jihad Menangani Inflasi telah memutuskan bahawa mekanisme penetapan harga siling minyak masak botol tidak bersubsidi ditentukan secara bulanan untuk seluruh Malaysia mengikut harga purata minyak sawit mentah (CPO) bagi satu tan metrik di pasaran dunia pada bulan sebelumnya. Harga siling minyak sawit botol untuk Sabah, Sarawak dan Labuan ditetapkan pada paras sama seperti di Semenanjung dan berkuatkuasa pada 8 Ogos 2022 ini. Harga siling minyak masak tidak bersubsidi kemasan botol adalah seperti berikut:

- (a) 1kg iaitu RM7.70;

NO SOALAN : 2

- (b) 2kg iaitu RM14.70;
- (c) 3kg iaitu RM 21.70; dan
- (d) 5kg iaitu RM 34.70.

Untuk makluman Yang Berhormat, Kerajaan juga memperkenalkan Program Jualan Keluarga Malaysia (PJKM) yang merupakan inisiatif Kerajaan dalam membantu meringankan beban rakyat terutamanya golongan berpendapatan rendah dengan membekalkan barang keperluan harian pada harga yang lebih rendah sehingga 20% daripada harga pasaran semasa setempat.

Program ini mendapat sambutan yang amat baik bukan sahaja daripada rakyat tetapi juga di kalangan Ahli Parlimen. Kesemua 222 kawasan Parlimen terlibat tanpa mengira status kawasan Parlimen tersebut. Justeru, kerajaan sedang memperinci pelaksanaan PJKM untuk diperhebat dan diperluaskan kepada lebih 600 kawasan Dewan Undangan Negeri (DUN).

Sekian terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' SRI ABDUL AZEEZ BIN ABDUL
RAHIM [BALING]**

SOALAN

DATO' SRI ABDUL AZEEZ BIN ABDUL RAHIM [BALING] minta **MENTERI PERTANIAN DAN INDUSTRI MAKANAN** menyatakan usaha Kementerian untuk meningkatkan bilangan pengusaha ayam dan lembu secara komersial di negara kita bagi mengurangkan kadar kebergantungan terhadap import kedua-dua sumber makanan utama ini dan juga sebagai langkah jangka pendek mengatasi isu kekurangan bekalan makanan.

JAWAPAN

Tuan Yang di-Pertua,

Untuk makluman Ahli Yang Berhormat, pelbagai inisiatif diperkenalkan oleh Kementerian Pertanian dan Industri Makanan (MAFI) untuk meningkatkan bilangan pengusaha ayam dan lembu secara komersial di negara dan mengurangkan kebergantungan kepada sumber import. Sehingga tahun 2020, jumlah bilangan penternak ayam sebanyak 1,260 orang manakala penternak lembu (pedaging dan tenusu) sebanyak 478 orang.

Bagi merancakkan industri dengan meningkatkan jumlah penternak, MAFI melalui Agrobank menyediakan Dana Pembiayaan Agromakanan Keluarga Malaysia (DPAKM) di bawah Agrobank melibatkan peruntukan sebanyak RM800 juta bagi menjamin kesinambungan aktiviti pengeluaran makanan. Daripada jumlah tersebut, sebanyak RM300 juta diperuntukan bagi pembiayaan ternakan ayam dan RM200 juta bagi ternakan ruminan (lembu dan kambing). Had maksimum pembiayaan ditetapkan sehingga RM5 juta manakala, had maksimum pembiayaan bagi usahawan mikro, usahawan mikro baharu dan usahawan muda adalah sehingga RM500,000.

Program pembangunan lain yang sedang dijalankan termasuklah Program Peningkatan Ruminan, Program Rezeki Ternak Ruminan dan Unggas, pembangunan kandang di Taman Kekal Pengeluaran Ruminan (TKPR) dan pengoperasian Ladang Satelit Naional (LSN).

Sekian, terima kasih.

NO SOALAN :4

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI PANGLIMA ABDUL AZEEZ
BIN ABDUL RAHIM [BALING]

SOALAN

DATUK SERI PANGLIMA ABDUL AZEEZ BIN ABDUL RAHIM [BALING] minta **MENTERI KEWANGAN** menyatakan berapa penerima manfaat Skim Jaminan Kredit Perumahan yang diumum Kerajaan dalam Bajet 2022, dan apakah bentuk promosi yang dilaksanakan Kerajaan untuk meningkatkan kesedaran rakyat Malaysia tentang kewujudan skim ini.

JAWAPAN

Tuan Yang di-Pertua,

Semasa pembentangan Bajet 2008 pada 7 September 2007, Kerajaan telah mengumumkan skim jaminan kepada institusi kewangan untuk membolehkan orang awam yang berkemampuan tetapi tidak mempunyai bukti atau dokumen pendapatan secara rasmi (penyata gaji) atau memperoleh pendapatan secara tidak tetap untuk mendapatkan pinjaman perumahan daripada institusi kewangan terpilih dengan pembiayaan sehingga 100%. Ini berbeza dengan pinjaman perumahan biasa yang ditawarkan oleh bank yang pada amnya memerlukan peminjam berpendapatan tetap.

Dalam hal ini, Syarikat Jaminan Kredit Perumahan (SJKP) telah diberi mandat untuk menyediakan skim jaminan kredit pinjaman perumahan bagi mengatasi masalah golongan tersebut.

Untuk makluman, sepanjang pelaksanaan skim sejak diperkenalkan pada tahun 2008 sehingga 31 Mei 2022, sebanyak 13,038 permohonan jaminan berjumlah RM1.5 billion telah diluluskan.

Tuan Yang di-Pertua,

Bajet 2022 menyaksikan Kerajaan akan meneruskan skim ini melalui penyediaan jaminan sehingga RM2 bilion ringgit yang dijangka akan memanfaatkan seramai sekurang-kurangnya 6,000 isi rumah sasar termasuk golongan muda, pekerja gig dan usahawan mikro bagi membolehkan mereka memiliki kediaman sendiri. Selain itu, skim ini turut telah ditambahbaik di mana had jaminan pembiayaan telah dinaikkan ke RM400 ribu dan turut merangkumi yuran guaman dan yuran penilaian hartanah.

Statistik semasa menunjukkan bahawa selepas pembentangan Bajet 2022 (Data dari 1 Januari 2022 sehingga 31 Mei 2022) sebanyak 1,312 permohonan pembiayaan berjumlah RM225.61 juta telah diluluskan oleh SJKP.

NO SOALAN :4

Bagi meningkatkan kesedaran kepada golongan sasar berhubung kewujudan skim ini, beberapa inisiatif telah diambil untuk mempromosikan program ini seperti berikut:

- i. Promosi bersama di antara SJKP dan Kementerian Perumahan dan Kerajaan Tempatan (KPKT) di bawah program I-Biaya;
- ii. Penglibatan SJKP di bawah program Jelajah Aspirasi Keluarga Malaysia yang meliputi setiap negeri termasuk Sabah dan Sarawak;
- iii. Promosi skim melalui media massa dan elektronik serta papan iklan dari semasa ke semasa; dan
- iv. Kerjasama erat dengan pihak pihak berkepentingan seperti institusi institusi kewangan, pihak pemaju bagi tujuan promosi bersama dan kelulusan permohonan pembelian di bawah Skim Jaminan Kredit Perumahan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : DATO' SRI ABDUL AZEEZ BIN ABDUL RAHIM [BALING]

TARIKH : JULAI-OGOS 2022

SOALAN

DATO' SRI ABDUL AZEEZ BIN ABDUL RAHIM [BALING] minta **MENTERI PENGANGKUTAN** menyatakan adakah Kerajaan bercadang untuk mewujudkan transaksi secara tanpa tunai (cashless) seperti menggunakan Kad Debit di stesen-stesen Light Rail Transit (LRT), Mass Rapid Transit (MRT, dan Monorail di negara kita bagi memudahkan urusan dan menjamin keselamatan para pengguna.

JAWAPAN

Tuan Yang Di Pertua,

1. Selaras dengan matlamat kerajaan untuk menjadikan pengangkutan awam sebagai mod pengangkutan utama pilihan rakyat, pelbagai inisiatif telah dan sedang dirancang untuk dilaksanakan bagi meningkatkan lagi bilangan penumpang. Antara inisiatif yang sedang dirancang khususnya di kawasan Lembah Klang adalah sistem pembelian tiket tanpa tunai (*cashless*) di stesen-stesen perkhidmatan rel dalam bandar termasuk bagi perkhidmatan MRT, LRT dan Monorail.
2. MRT Corp telah menyiapkan projek berdasarkan kepada spesifikasi projek yang telah diluluskan oleh kerajaan melalui kelulusan Railway Scheme. Bank Card Payment System/ *cashless transaction* adalah salah satu skop yang disiapkan dan telah diserahkan kepada pengendali MRT iaitu Rapid Rail. Pelaksanaan *cashless system* (*Bank Card Payment System*) tersebut adalah ditentukan oleh pihak Rapid Rail.
3. Inisiatif Sistem Pembayaran Tanpa Tunai Integrasi (ICPS) bagi kesemua sistem pengangkutan awam di Lembah Klang akan dilaksanakan di bawah inisiatif Kementerian Kewangan melalui *divestment* saham MOF Incorporated dalam syarikat Transit Acquirer Sdn. Bhd. sebuah syarikat MOF Incorporated.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS (2022)**

PERTANYAAN : BUKAN LISAN

**DARIPADA : YB ABDUL LATIF BIN ABDUL RAHMAN
[KUALA KRAI]**

SOALAN

Minta **PERDANA MENTERI** menyatakan berapa jumlah kanak-kanak yang berumur bawah 18 tahun yang berkahwin dan berapa jumlah yang bercerai mengikut agama, bangsa dan negeri serta apakah langkah yang diambil oleh pihak Kementerian untuk mengurangkan jumlah perceraian ini.

JAWAPAN

**YB SENATOR DATUK HAJI IDRIS HAJI AHMAD
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Berdasarkan statistik permohonan kebenaran nikah bawah umur yang didaftarkan di mahkamah-mahkamah Syariah seluruh negara yang dijana melalui Sistem e-Syariah, bilangan kes permohonan adalah sebanyak 2,342 bagi tempoh 2018-2021. Statistik berkenaan seperti berikut:

Negeri	2018	2019	2020	2021	Jumlah
Johor	54	47	29	40	170
Kedah	79	25	38	50	192
Kelantan	134	101	112	112	459
Melaka	13	27	6	5	51
Negeri Sembilan	18	19	11	4	52
Pahang	71	52	57	41	221
Perak	44	55	51	38	188

NO SOALAN : 6

Perlis	8	6	8	17	39
Pulau Pinang	14	9	3	6	32
Sabah	99	83	51	20	253
Sarawak	100	122	41	0	263
Selangor	43	62	36	25	166
Terengganu	62	63	42	44	211
Wilayah Persekutuan	19	10	10	6	45
Jumlah	758	681	495	408	2,342

Nota:

*Data ini dijana melalui sistem SKMS bagi tahun 2018 hingga 2021

*Data bagi negeri Sarawak hanyalah sehingga bulan Jun 2020 (JKSN Sarawak menggunakan sistem iSyariah bermula 06/07/2020)

2. Manakala jumlah kes permohonan perceraian bagi pemohon bawah umur 18 tahun yang diluluskan oleh mahkamah Syariah adalah sebanyak 1,093 bagi tempoh 2018-2021. Statistik berkenaan adalah seperti berikut:

Negeri	2018	2019	2020	2021	Jumlah
Johor	30	24	31	15	100
Kedah	17	16	10	12	55
Kelantan	91	61	58	65	275
Melaka	9	5	8	4	26
Negeri Sembilan	23	32	23	8	86
Pahang	16	26	28	23	93
Perak	16	23	32	25	96
Perlis	11	11	12	14	48
Pulau Pinang	4	9	9	6	28
Sabah	19	15	16	14	64
Sarawak	22	12	7	--	41
Selangor	28	26	17	6	77
Terengganu	26	13	17	12	68
Wilayah Persekutuan	11	8	11	6	36
Jumlah	323	281	279	210	1093

Nota:

*Data ini dijana melalui sistem SKMS bagi tahun 2018 hingga 2021

*Data bagi negeri Sarawak hanyalah sehingga bulan Jun 2020 (JKSN Sarawak menggunakan sistem iSyariah bermula 06/07/2020)

3. Antara langkah-langkah yang diambil bagi mengatasi isu perceraian pasangan berumur bawah 18 tahun di kalangan orang Islam adalah dengan mengadakan program-program pengukuhan institusi keluarga. Program yang dijalankan melalui bentuk kursus, seminar dan webinar akan memberi penekanan kepada tanggungjawab dan hak pasangan

NO SOALAN : 6

dalam perkahwinan, cara berkomunikasi yang berkesan, cara menguruskan konflik rumah tangga dan program kesedaran hukum dan undang-undang berkaitan perkahwinan.

4. Untuk makluman Ahli Yang Berhormat, Jabatan Pendaftaran Negara (JPN) mendaftarkan perkahwinan dan perceraian bagi pasangan bukan beragama Islam selaras dengan peruntukan di bawah Akta Membaharui Undang-Undang (Perkahwinan dan Perceraian) 1976 [Akta 164].
5. Akta ini tidak terpakai bagi seseorang anak Negeri (*native*) Sabah, Sarawak atau Orang Asli Semenanjung Malaysia yang perkahwinan dan perceraianya tertakluk kepada Undang-Undang Adat Anak Negeri atau Adat Orang Asli melainkan jika mereka memilih untuk berkahwin di bawah Akta ini. Manakala bagi perkahwinan orang Islam ianya ditadbir oleh pihak berkuasa hal ehwal agama negeri masing-masing.
6. Berdasarkan Seksyen 12, Akta Umur Dewasa 1971 menerangkan bahawa umur belum dewasa bagi semua lelaki dan perempuan ialah dan adalah terhad kepada lapan belas tahun dan tiap-tiap lelaki dan perempuan yang mencapai umur itu ialah berumur dewasa di Malaysia.
7. Berdasarkan peruntukan Seksyen 10, Akta 164 membenarkan perkahwinan seorang perempuan yang telah genap umur 16 tahun tetapi di bawah 18 tahun dengan lesen yang diberi oleh Ketua Menteri di bawah Subseksyen 21(2) menyatakan berikut:

“Ketua Menteri boleh menurut budi bicaranya, memberi suatu lesen di bawah seksyen ini membenarkan pengupacaraan sesuatu perkahwinan walaupun pihak perempuan yang hendak berkahwin itu berumur di bawah lapan belas tahun, tetapi bagaimanapun tidak boleh memberi lesen itu sebelum perempuan itu berumur genap enam belas tahun”.

8. Namun syarat yang ketat juga telah dikenakan terhadap perempuan bukan Islam berumur genap 16 tahun tetapi belum mencapai 18 tahun untuk mendaftarkan perkahwinan mereka di bawah Akta 164. Bagi lelaki

NO SOALAN : 6

yang berumur di bawah 18 tahun adalah tidak dibenarkan untuk mendaftar di bawah Akta ini.

9. Urusan Prosiding Perceraian adalah di bawah bidang kuasa Mahkamah Tinggi Malaysia. JPN hanya bertanggungjawab mengemaskini suatu rekod perkahwinan di dalam sistem JPN melalui sesuatu dikri perceraian atau pembatalan perkahwinan bagi pasangan bukan beragama Islam setelah diputuskan oleh Mahkamah Tinggi Malaysia.

10. Walau bagaimanapun, JPN akan mengadakan sesi prosiding tribunal jika salah seorang dari pasangan tersebut enggan bercerai. Prosiding tribunal tersebut akan dilaksanakan dalam tempoh enam (6) bulan sebelum sesuatu perakuan dikeluarkan.

11. Berdasarkan rekod JPN dari tahun 2018 hingga sekarang, terdapat sebanyak **446** perkahwinan kanak-kanak yang bukan beragama Islam (di bawah umur 18 tahun) telah direkodkan. Bagi tempoh yang sama hanya 9% atau sebanyak **39** penceraian telah direkodkan.

Statistik

a) **Bilangan kanak-kanak yang bukan beragama Islam (di bawah umur bawah 18 tahun) yang telah berkahwin dari tahun 2018 hingga sekarang adalah seperti berikut:**

TAHUN DAFTAR	2018		2019		2020		2021		2022		JUMLAH		
	UMUR/ PASANGAN	L	P	L	P	L	P	L	P	L	P	L	P
16 TAHUN	0	49	0	31	0	19	0	8	0	4	0	111	
17 TAHUN	0	121	0	99	0	60	0	33	0	22	0	335	
JUMLAH	0	170	0	130	0	79	0	41	0	26	0	446	

b) **Bilangan kanak-kanak yang bukan beragama Islam (di bawah umur bawah 18 tahun) yang telah berkahwin dan yang telah bercerai mengikut negeri dari tahun 2018 hingga sekarang adalah seperti berikut:**

NO SOALAN : 6

TAHUN DAFTAR	2018		2019		2020		2021		2022		JUMLAH	
	NEGERI DAFTAR	KAHW IN	CER AI	KAHW IN								
JOHOR	32	9	24	3	15	0	6	0	6	1	83	13
KEDAH	2	0	10	0	1	0	2	0	2	0	17	0
KELANTAN	0	0	1	0	0	0	1	0	0	0	2	0
MELAKA	6	1	3	0	3	0	2	0	0	0	14	1
NSEMBILAN	8	3	4	0	8	0	2	0	3	0	25	3
PAHANG	6	1	4	0	1	0	1	0	1	0	13	1
PPINANG	11	2	7	1	4	0	2	0	1	0	25	3
PERAK	15	3	8	1	8	0	4	0	1	0	36	4
PERLIS	2	1	0	0	0	0	0	0	0	0	2	1
SELANGOR	12	2	6	2	12	0	6	1	1	0	37	5
TGANU	0	0	0	0	0	0	0	0	0	0	0	0
SABAH	10	0	2	1	3	0	1	0	1	0	17	1
SARAWAK	56	0	52	1	17	0	9	0	10	0	144	1
KLUMPUK	6	1	8	1	5	0	1	0	0	0	20	2
LABUAN	0	0	1	0	0	0	0	0	0	1	0	0
PUTRAJAYA	4	2	0	0	2	0	4	2	0	0	10	4
JUMLAH	170	25	130	10	79	0	41	3	26	1	446	39

c) Bilangan kanak-kanak yang bukan beragama Islam (di bawah umur bawah 18 tahun) yang telah berkahwin dan yang telah bercerai mengikut agama dari tahun 2018 hingga sekarang adalah seperti berikut:

TAHUN DAFTAR	2018		2019		2020		2021		2022		JUMLAH	
	AGAMA	KAHWIN	CERAI	KAHWIN								
BUDDHA	87	23	68	9	48	0	25	1	14	1	242	34
HINDU	20	2	7	0	7	0	5	2	1	0	40	4
KRISTIAN	58	0	51	1	23	0	11	0	8	0	151	1
BAHAI	1	0	0	0	0	0	0	0	1	0	2	0
TAO	0	0	1	0	0	0	0	0	0	0	1	0
LAIN-LAIN	4	0	3	0	1	0	0	0	2	0	10	0
JUMLAH	170	25	130	10	79	0	41	3	26	1	446	39

NO SOALAN : 6

d) Bilangan kanak-kanak yang bukan beragama Islam (di bawah umur bawah 18 tahun) yang telah berkahwin dan yang telah bercerai mengikut bangsa dari tahun 2018 hingga sekarang adalah seperti berikut:

TAHUN DAFTAR	2018		2019		2020		2021		2022		JUMLAH	
KETURUNAN	KAHWIN	CERAI										
CINA	91	22	68	9	52	0	26	1	15	0	252	32
INDIA	20	2	7	0	8	0	5	2	1	0	41	4
ETNIK SABAH	7	0	2	0	3	0	1	0	0	0	13	0
ETNIK SARAWAK	42	0	47	1	13	0	7	0	8	0	117	1
ORG ASLI SEMENANJUNG	5	0	2	0	1	0	1	0	1	0	10	0
LAIN-LAIN	5	1	4	0	2	0	1	0	1	1	13	2
JUMLAH	170	25	130	10	79	0	41	3	26	1	446	39

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN ABDUL LATIFF BIN
ABDUL RAHMAN [KUALA KRAI]**

SOALAN

TUAN ABDUL LATIFF BIN ABDUL RAHMAN [KUALA KRAI] minta **MENTERI PELANCONGAN, SENI DAN BUDAYA** menyatakan apakah usaha-usaha Kementerian dalam memartabatkan warisan tidak ketara negara bagi memastikan ia kekal terpelihara pada masa yang sama boleh menjadi produk untuk penjanaan ekonomi untuk rakyat setempat dan negara.

JAWAPAN

Tuan Yang di-Pertua,

1. Untuk makluman, usaha pemeliharaan dan pemuliharaan khazanah seni, budaya dan warisan negara, sama ada ketara atau tidak ketara adalah merangkumi aspek penyelidikan, pendokumentasian, pewartaan dan promosi. Sebagai tambahan, aspek promosi ini turut merangkumi inisiatif seperti:

- (i) penganjuran bengkel bagi mengetengah dan memperkenalkan warisan negara kepada segenap lapisan masyarakat;
- (ii) kerjasama strategik dengan penggiat industri seperti permainan tradisional dan gastronomi; dan
- (iii) penganjuran program berbentuk persempahan, pameran, karnival dan demonstrasi.

SOALAN NO : 07

2. Usaha-usaha ini membantu dalam mengangkat aset-aset warisan seni budaya yang bersesuaian untuk diiktiraf bukan sahaja di peringkat kebangsaan, malah juga antarabangsa selaras dengan Dasar Kebudayaan Negara (DAKEN 2021) yang diterajui oleh Kementerian Pelancongan, Seni dan Budaya (MOTAC).
3. Berhubung Warisan Tidak Ketara (WTK), sehingga kini terdapat sejumlah 529 WTK telah diwartakan di bawah Akta Warisan Kebangsaan 2005 [Akta 645]. Ini berjaya dilakukan, antaranya hasil daripada kesedaran masyarakat yang membantu dalam penyelidikan dan inventori bagi tujuan perlindungan.
4. Di peringkat antarabangsa pula, sebanyak enam (6) elemen WTK dari Malaysia telah mendapat pengiktirafan UNESCO berdasarkan prinsip-prinsip 2003 *Convention for the Safeguarding of the Intangible Cultural Heritage of Humanity*. WTK tersebut adalah Mak Yong, Dondang Sayang, Silat, Upacara Wangkang yang diangkat bersama Negara China, Pantun yang diangkat bersama dengan Indonesia dan Songket. MOTAC akan terus mengenal pasti elemen-elemen WTK negara yang boleh diketengah dan disenaraikan di masa hadapan.
5. Menyentuh tentang UNESCO, baru-baru ini Malaysia menerusi MOTAC telah melakar satu lagi catatan sejarah yang amat membanggakan di peringkat antarabangsa apabila julung kalinya terpilih menduduki kerusi *UNESCO Intergovernmental Committee for the Safeguarding of the Intangible Cultural Heritage* (IGC ICH) untuk sesi 2022-2026.
6. Malaysia menang bertanding dalam kumpulan negara Asia Pasifik dengan meraih 110 undi daripada 132 undi keseluruhan, iaitu 83 peratus daripada jumlah undi. Ini merupakan satu pencapaian yang amat membanggakan kerana kepakaran serta keupayaan Malaysia diiktiraf dan diyakini untuk turut sama menentukan hala tuju perlindungan WTK dunia melalui jawatankuasa di peringkat UNESCO tersebut.
7. Pewartaan serta pengiktirafan WTK bukan sahaja memberi manfaat dari segi usaha dan pelan perlindungan warisan tersebut, tetapi ia juga

SOALAN NO : 07

memberi tumpuan (*visibility*) terhadap sesuatu WTK itu yang seterusnya boleh diambil peluang untuk menjana pendapatan.

8. Sebagai contoh, pengiktirafan UNESCO terhadap Silat membawa kepada pendedahan dan pengetahuan masyarakat dunia kepada seni mempertahankan diri tersebut. Ini seterusnya boleh menarik minat untuk para peminat seni mempertahankan diri dari seluruh dunia untuk mengetahui lebih lanjut mengenainya. Maka, ia boleh membuka ruang kepada pengamal seni silat di Malaysia untuk mengamalkan sesuatu yang diminati mereka tetapi pada masa yang sama dapat menjana pendapatan daripadanya seperti persembahan, penganjuran kejohanan atau pertandingan, pembikinan dokumentari mahupun filem, serta pembukaan kelas bagi mempelajarinya. Malah, terdapat sekumpulan anak muda dari Malaysia yang menetap di Paris mempunyai persatuan dan kelas silat di sana, yang mana penuntutnya adalah dari kalangan bukan warganegara Malaysia.
9. Ini membuktikan bahawa pengiktirafan WTK bukanlah sekadar pada nama sahaja tetapi boleh diambil peluang untuk dijadikan sebagai sumber untuk menjana ekonomi.

Sekian, terima kasih.

NO SOALAN :8

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN ABDUL LATIFF BIN ABDUL
RAHMAN [KUALA KRAI]

SOALAN

TUAN ABDUL LATIFF BIN ABDUL RAHMAN [KUALA KRAI] minta **MENTERI KEWANGAN** menyatakan berapa jumlah wang ihsan yang telah diberikan kepada Kerajaan Kelantan pada tahun 2020, 2021 dan 2022.

JAWAPAN

Tuan Yang di-Pertua,

Bagi pengeluaran petroleum di Semenanjung Malaysia, tiada Bayaran Tunai dibuat oleh PETRONAS kepada negeri-negeri kerana kedudukan medan pengeluaran yang beroperasi adalah di luar wilayah negeri termasuk negeri Kelantan.

Namun demikian, Kerajaan Persekutuan menyediakan bayaran dalam bentuk Wang Ehsan kepada negeri-negeri terdekat dengan kawasan pengeluaran termasuk negeri Kelantan yang mana dana Wang Ehsan tersebut digunakan bagi melaksanakan projek dan program untuk manfaat rakyat di negeri berkenaan.

Amaun Wang Ehsan yang disalurkan kepada negeri Kelantan adalah tertakluk kepada harga petroleum dunia semasa dan kuantiti pengeluaran pada satu-satu masa.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN ABDUL LATIFF BIN ABDUL RAHMAN
(KUALA KRAI)**

SOALAN

PR-1452-T06413

TUAN ABDUL LATIFF BIN ABDUL RAHMAN (KUALA KRAI) minta **MENTERI PERTANIAN DAN INDUSTRI MAKANAN** menyatakan apakah terdapat inisiatif khas bagi menggalakkan penyertaan golongan belia dalam sektor pertanian dan penternakan dan berapa jumlah golongan belia yang terlibat mengikut pecahan negeri bagi menyokong Pelan Tindakan Dasar Sekuriti Makanan 2021 - 2025.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa berusaha untuk menggalakkan dan membantu penglibatan golongan muda dalam sektor pertanian dan industri agromakanan negara. Penyertaan golongan muda adalah penting untuk mentransformasikan dan memacu sektor pertanian dengan pemodenan, teknologi dan inovasi selaras dengan matlamat MAFI melalui Dasar Agromakanan Negara (DAN) 2.0.

MAFI telah memperkenalkan Program Agropreneur Muda (PAM) pada tahun 2016 sebagai usaha membantu menggalakkan dan meningkatkan penglibatan golongan muda dalam sektor pertanian dan industri agromakanan menerusi pengaplikasian pemodenan, teknologi dan inovasi serta perkongsian model amalan amalan terbaik. Secara umumnya, program ini menawarkan perkhidmatan dan bantuan seperti berikut:

- i. Geran Agropreneur Muda (GAM) berbentuk barangang sehingga RM20,000 bagi setiap usahawan;
- ii. bantuan modal melalui Pakej Pembiayaan Khas Agrobank dan TEKUN Nasional sehingga RM500,000 bagi projek pengembangan; dan
- iii. kursus jangka pendek dan khidmat nashiat teknikal dan kewangan melalui jabatan/agensi berkaitan di bawah Kementerian.

Bermula daripada 1 Januari 2016 hingga 30 Jun 2022, Program Agropreneur Muda (PAM) telah memanfaatkan seramai 8,138 orang agropreneur muda seluruh negara dengan nilai kelulusan berjumlah RM 166.27 juta. Daripada jumlah tersebut, seramai 165 orang agropreneur muda seluruh negara telah mendapat kelulusan bantuan pembiayaan berjumlah RM 23.13 juta. Bagi bantuan Geran Agropreneur Muda (GAM),

SOALAN NO: 9

seramai 7,973 orang agropreneur muda seluruh negara telah menerima kelulusan berjumlah RM 143.14 juta seperti berikut:

BILANGAN KELULUSAN GERAN AGRORPENEUR MUDA						
No.	Negeri	Tanaman	Perikanan	Ternakan	Industri Asas Tani	Jumlah
1.	JOHOR	246	33	68	149	496
2.	SELANGOR	352	64	109	429	954
3.	PERLIS	87	12	47	141	287
4.	PAHANG	267	80	141	98	586
5.	KEDAH	297	77	148	316	838
6.	KELANTAN	207	53	155	216	631
7.	MELAKA	147	20	31	126	324
8.	N.SEMBILAN	191	34	54	134	413
9.	PERAK	434	71	545	315	1,365
10.	TERENGGANU	232	69	76	214	591
11.	P. PINANG	87	11	35	125	258
12.	W. PERSEKUTUAN	13	9	6	58	86
13.	SABAH	326	30	80	186	622
14.	SARAWAK	202	82	56	182	522
15.	JUMLAH (A)	3,088	645	1,551	2,689	7,973

MAFI akan mengambil langkah yang pragmatik dan berterusan dalam memperhebatkan PAM terutamanya menerusi penerokaan peluang-peluang kerjasama baharu dengan pihak yang berkaitan bagi menarik dan mengekalkan penglibatan golongan muda dalam sektor pertanian dan agromakanan. Kesinambungan penglibatan golongan ini adalah penting dalam memastikan keseimbangan ekonomi dan sosial seterusnya menjamin sekuriti sektor pertanian dan agromakanan negara.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

SOALAN

Minta **PERDANA MENTERI** menyatakan usaha Kerajaan dalam membendung kegiatan khurafat yang semakin berleluasa dan disebarluaskan menerusi media sosial seperti upacara di Gunung Jerai dan lain-lain dan berapa kes yang telah disiasat dan disabitkan kes mengikut negeri sepanjang 2020 hingga 2022.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Bagi membendung kegiatan khurafat yang semakin berleluasa dan disebarluaskan menerusi media sosial, JAKIM sentiasa menyelaras tindakan melalui jawatankuasa sedia ada dengan Jabatan Agama Islam Negeri serta agensi berkaitan. Antaranya Jawatankuasa Pemandu Menangani Ancaman Akidah Peringkat Kebangsaan (JAPAS) yang turut melibatkan pihak Suruhanjaya Komunikasi dan Multimedia Malaysia (SKMM) sebagai ahli. Antara fungsi utama jawatankuasa ini adalah sebagai platform penyelarasaran dan perkongsian maklumat antara agensi di peringkat persekutuan dan pihak berkuasa agama negeri. Ia juga berperanan memandu pihak berkuasa agama merangka tindakan

bagi menangani perkara-perkara yang mengancam akidah umat Islam sama ada secara fizikal atau secara maya.

2. Tindakan pencegahan dan penguatkuasaan terhadap amalan khurafat adalah dibawah bidang kuasa Pihak Berkuasa Agama Islam Negeri-Negeri. Operasi penguatkuasaan dan pemantauan oleh Penguatkuasa Agama Islam Negeri di tempat-tempat yang dikenal pasti berlaku aktiviti pemujaan dan amalan khurafat sentiasa dilaksanakan berpandukan laporan awam dan risikan.
3. Untuk makluman, Bahagian Penguatkuasaan Agama Jabatan Hal Ehwal Agama Islam Kedah (JHEAIK) telah melakukan beberapa siri operasi pemantauan pada tahun 2020 hingga 2021, iaitu pada 9 September 2020, 3 Oktober 2020, 19 Januari 2020 dan 11 Januari 2021, namun tiada sebarang tangkapan dibuat. Hanya kesan-kesan perbuatan khurafat ditemui di tempat kejadian. Mufti Kedah, Sahibus Samahah Dato' Paduka Sheikh Fadzil bin Haji Awang telah membuat tinjauan pemantauan di Gunung Jerai pada 18 Jun 2022 dan telah memberi kenyataan bahawa aktiviti pemujaan atau ritual di situ sudah berkurangan sejak musibah kejadian kepala air yang berlaku pada 18 Ogos 2021.
4. Untuk makluman Yang Berhormat juga, sebanyak 7 kes berkaitan pemujaan salah telah didakwa di Mahkamah Syariah pada tahun 2021.

Sekian, terima kasih.

SOALAN NO: 11

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : DATO' ABDULLAH SANI BIN ABDUL
HAMID [KAPAR]**

SOALAN

YB DATO' ABDULLAH SANI BIN ABDUL [KAPAR] Minta **MENTERI PERUMAHAN DAN KERAJAAN TEMPATAN** menyatakan komitmen dalam memastikan tiada lagi projek perumahan terbengkalai terutamanya di kawasan Kapar kerana projek perumahan terbengkalai ini menjadi sarang jenayah narkotik dan sarang pembiakan penyakit.

JAWAPAN

Tuan Yang di-Pertua,

Untuk makluman Ahli Yang Berhormat juga, Kementerian Perumahan dan Kerajaan Tempatan (KPKT) amat komited dalam menyelesaikan isu projek-projek terbengkalai untuk meringankan bebanan para pembeli. Kementerian telah menu buhkan Mesyuarat *War Room* khusus untuk menangani isu projek terbengkalai. Mesyuarat ini akan melihat kaedah penyelesaian segera untuk mengembalikan hak perumahan kepada pembeli yang terkesan.

KPKT bertindak sebagai pemudah cara atau *mediator* bagi membantu Jabatan Insolvensi Malaysia dan pelikuidasi swasta serta kontraktor penyelamat untuk berhubung dengan Pihak Berkuasa Tempatan (PBT), agensi teknikal serta pihak pembiaya (institusi kewangan) bagi membantu memulihkan projek perumahan terbengkalai.

KPKT juga turut mengambil tindakan menyenarai hitam pemaju-pemaju yang menyebabkan projek perumahan terbengkalai, yang terlibat dengan projek sakit, yang gagal membayar kompaun, yang “ingkar award” Tribunal Tuntutan Pembeli Rumah dan pemaju-pemaju perumahan tanpa lesen. Apabila disenarai hitam, pemaju dan ahli lembaga pengarah syarikat terbabit tidak boleh memohon Lesen Pemaju Perumahan dan Permit Iklan dan Jualan. Senarai pemaju-pemaju yang disenarai hitam turut dipaparkan dalam laman sesawang KPKT untuk pembeli dan *stakeholders* yang lain rujuk apabila berhasrat untuk membeli rumah.

Pada masa yang sama, KPKT juga mengambil langkah-langkah pencegahan untuk mengelakkan projek daripada menjadi projek terbengkalai. Antara langkah-langkah yang diambil ialah:

SOALAN NO: 11

- i. mengadakan lawatan pemantauan projek secara berkala; dan
- ii. menjalankan tapisan yang bersesuaian semasa pemberian lesen pemajuan.

Untuk makluman Ahli Yang Berhormat, terdapat sebanyak 48 buah projek terbengkalai di negeri Selangor merangkumi 14,749 unit rumah dan melibatkan seramai 7,994 orang pembeli. Terdapat empat (4) buah projek terbengkalai di kawasan Parlimen Kapar seperti berikut:

Daerah	Parlimen	Projek	Pemaju	Jumlah Unit	Unit Dijual	Unit Tidak Dijual
Klang	P.109 Kapar	The Boss, Klang	Hotwer Development Sdn. Bhd. (digulung)	377	360	17
Klang	P.109 Kapar	Taman Desa Kencana, Klang	Suasana Ehsan (M) Sdn. Bhd. (digulung)	37	32	5
Kapar	P.109 Kapar	Taman Meru Makmur, Klang	Vorpac Sdn. Bhd.	30	23	7
Kapar	P.109 Kapar	Taman Meru Makmur, Klang	Mekarkota (M) Sdn. Bhd.	100	98	2
Jumlah				544	513	31

Kementerian sentiasa konsisten dan terus komited untuk memulihkan projek perumahan rakyat oleh pihak swasta yang telah terbengkalai. Namun, perkara ini hanya akan dapat diselesaikan dengan kerjasama daripada kerajaan negeri, PBT dan pihak-pihak lain yang berkaitan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB DATO' ABDULLAH SANI BIN ABDUL HAMID (KAPAR)

SOALAN

DATO' ABDULLAH SANI BIN ABDUL HAMID [KAPAR] minta **MENTERI KANAN KERJA RAYA** menyatakan komitmen dalam memastikan semua projek baik pulih jalan raya di kawasan Kapar dilaksana sepenuhnya sepetimana yang telah diputus dan diluluskan oleh Dewan ini.

JAWAPAN

Tuan Yang Di-Pertua,

Untuk makluman Ahli Yang Berhormat, **jumlah panjang Jalan Persekutuan di kawasan Parlimen Kapar iaitu Jalan Klang-Sabak Bernam laluan FT05, Jalan Pintas Selat Klang Utara (Persiaran Sultan Hishamuddin) laluan FT20 dan Jalan Masuk Kawasan Perindustrian Meru laluan FT3217 yang disenggara oleh syarikat konsesi adalah sepanjang 51.87 km.**

Pada tahun 2020, Kementerian ini telah memperuntukkan sebanyak **RM 6 juta bagi kerja-kerja penyenggaraan berkala yang melibatkan 3 bilangan kerja berkala pavemen dan 3 bilangan kerja berkala bukan pavemen yang telah disiapkan sepenuhnya pada tahun semasa.**

Manakala bagi tahun 2021, Kementerian ini telah memperuntukkan sebanyak **RM 11.4 juta bagi melaksanakan kerja-kerja penyenggaraan berkala yang melibatkan 12 bilangan kerja berkala pavemen dan 2 bilangan kerja berkala bukan pavemen yang telah disiapkan sepenuhnya pada tahun semasa.**

Untuk makluman Ahli Yang Berhormat juga, sehingga bulan Julai 2022 Kementerian ini telah memperuntukkan sebanyak **RM 7.65 juta bagi melaksanakan kerja-kerja penyenggaraan berkala yang melibatkan 8 bilangan kerja berkala pavemen dan 2 bilangan kerja berkala bukan pavemen. Pelaksanaan kerja telah pun bermula dan dijangka akan disiapkan sepenuhnya pada penghujung Julai 2022.**

Untuk makluman Ahli Yang Berhormat, Kementerian Kerja Raya melalui Jabatan Kerja Raya sentiasa komited dalam memastikan Jalan Persekutuan sentiasa dalam keadaan yang selamat dan selesa dengan menjalankan kerja-kerja penyenggaraan rutin sepanjang tahun dan

penyenggaraan berkala mengikut kelulusan dari semasa ke semasa sepanjang tahun.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN
DARIPADA : YB DATO' ABDULLAH SANI BIN ABDUL HAMID
(KAPAR)

SOALAN

DATO' ABDULLAH SANI BIN ABDUL HAMID (KAPAR) minta **MENTERI DALAM NEGERI** menyatakan apakah status pembinaan bangunan baru Ibu Pejabat Polis Daerah Klang Utara yang telah diluluskan oleh dewan ini.

JAWAPAN

Tuan Yang Di Pertua,

Cadangan projek pembangunan semula Ibu Pejabat Polis Daerah (IPD) Klang Utara telah diluluskan oleh Unit Perancang Ekonomi, Jabatan Perdana Menteri (UPE, JPM) untuk dilaksanakan di bawah *Rolling Plan Keempat* (RP4) Tahun 2019, Rancangan Malaysia Kesebelas (RMKe-11). Tarikh milik tapak telah diperoleh pada 21 Januari 2022 dan kerja-kerja pembinaan telah dimulakan. Projek dijangka siap pada 18 September 2025. Cawangan Kerja Keselamatan, Jabatan Kerja Raya (JKR) telah dipertanggungjawabkan untuk melaksanakan projek ini bagi pihak

SOALAN : 13

Kerajaan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DATO' ABDULLAH SANI BIN ABDUL HAMID [KAPAR]

SOALAN

DATO' ABDULLAH SANI BIN ABDUL HAMID minta **MENTERI KESIHATAN** menyatakan apakah status pembinaan Hospital Kapar yang telah diluluskan oleh Dewan ini.

JAWAPAN

Tuan Yang di-Pertua,

1. Kerajaan telah meluluskan projek pembinaan Hospital Kapar di bawah Rolling Plan 2, Rancangan Malaysia Ke-12 (RMKe-12) pada tahun 2022 dengan kos projek sebanyak RM900 juta. Pelantikan kontraktor dijangka akan dimuktamadkan pada bulan Ogos 2022. Kontraktor dijangka akan memulakan kerja di tapak selewat-lewatnya pada bulan September 2022 dan kerja-kerja pembinaan dijangka akan siap pada tahun 2026.
2. Kementerian Kesihatan Malaysia (KKM) akan sentiasa memantau projek ini dengan rapi bagi memastikan pembinaan dapat disiapkan dalam tempoh masa yang ditetapkan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' ABDULLAH SANI BIN ABDUL HAMID
[KAPAR]**

SOALAN

DATO' ABDULLAH SANI BIN ABDUL HAMID [KAPAR] minta **MENTERI KANAN PENDIDIKAN** menyatakan komitmen dalam menyelesaikan masalah kepadatan pelajar dalam bilik darjah di sekolah-sekolah dalam kawasan Kapar.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan kepada semua murid di seluruh negara.

Untuk makluman Ahli Yang Berhormat, masalah kepadatan murid sekolah di Parlimen Kapar adalah dalam perhatian KPM. Dalam hal ini, KPM mengambil langkah yang proaktif untuk mencari jalan penyelesaian yang terbaik melalui pembinaan sekolah baharu dan penambahan bilik darjah di sekolah sedia ada berdasarkan keperluan dan kesesuaian. KPM memohon peruntukan pembangunan dalam Rancangan Malaysia Lima Tahun (RMLT). Perkara ini tertakluk kepada pertimbangan dan kelulusan agensi pusat serta kedudukan semasa kewangan kerajaan.

Antara sekolah baharu yang telah diluluskan adalah Sekolah Kebangsaan Telok Kapas, Sungai Pinang, Klang, Selangor yang melibatkan pembinaan 30 bilik darjah dan kemudahan-kemudahan lain

SOALAN NO : 15

yang berkaitan. Projek ini diluluskan dalam Rancangan Malaysia Ke-11, *Rolling Plan 1* tahun 2016 dengan kos RM32 juta. Status projek adalah di peringkat prabina dan dijangka akan ditenderkan pada bulan November 2022.

Selain itu, dalam Rancangan Malaysia Ke-12 *Rolling Plan 1* tahun 2021, projek perolehan 12 ekar tanah bagi tapak pembinaan baharu SMK Meru 2, Klang, Selangor telah diluluskan dengan kos RM10 juta. Pada masa ini KPM sedang dalam proses kerja awalan serta penyediaan pelan pengambilan daripada JKR dan pihak berkuasa tempatan. Proses pengambilan dijangka selesai pada bulan Disember 2022 dan akan diikuti dengan permohonan pemberimilikan tapak sekolah tersebut.

Pada masa yang sama, permohonan untuk pembinaan bangunan tambahan di SMK Meru telah diluluskan dalam RMKe-12 RP2 Tahun 2022. Kelulusan ini merangkumi pembinaan 8 bilik darjah Program Pendidikan Khas Integrasi (PPKI) dan kemudahan lain. Projek ini adalah dalam fasa prabina dan dijangka untuk ditenderkan pada bulan Oktober 2022.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI HAJI AHMAD BIN
HAJI MASLAN [PONTIAN]**

SOALAN

DATUK SERI HAJI AHMAD BIN HAJI MASLAN [PONTIAN] minta **MENTERI PELANCONGAN, SENI DAN BUDAYA** menyatakan bantuan-bantuan untuk memajukan produk pelancongan dalam kawasan Parlimen Pontian seperti river cruise Sungai Benut, kehidupan nelayan, tanaman nanas, makanan tradisi Bugis, Banjar, Jawa serta kawasan Tampok Laut, Dataran Pontian Sea-side dan Pulau Pisang.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa membantu pemain-pemain industri pelancongan dan budaya tempatan. Pelbagai bantuan dan insentif kerajaan telah dilaksanakan oleh MOTAC, antaranya Skim Infrastruktur Pelancongan (SIP), Pembiayaan Pelancongan PENJANA, Galakan Cukai serta Pendaftaran Projek Pelancongan.
2. Untuk makluman, SIP diuruskan oleh Bank Pembangunan Malaysia Berhad (BPMB) yang menawarkan skop pembiayaan seperti berikut:
 - (i) Pembelian tanah, pembinaan bangunan, mesin dan pelbagai aset yang berkaitan dengan pelancongan;
 - (ii) Modal kerja bagi syarikat yang terlibat dalam industri pelancongan; dan
 - (iii) Kerja-kerja pengubahsuaian dan naik taraf yang berkaitan dengan industri pelancongan.
3. Jumlah pembiayaan yang ditawarkan oleh SIP adalah bermula daripada RM20 juta sehingga RM100 juta atau sehingga 80% daripada jumlah kos projek, yang mana lebih rendah. Tempoh permohonan bagi SIP bermula pada 1 Januari 2021 sehingga 31 Disember 2023.
4. Manakala Pembiayaan Pelancongan PENJANA adalah bertujuan untuk menyokong perusahaan kecil dan sederhana (PKS) di Malaysia dalam sektor pelancongan melalui usaha mengekalkan keupayaan mereka dan membantu mereka membuat penyesuaian dan terus berdaya saing selepas negara pulih dari pandemik. Penggiat industri pelancongan boleh menghubungi dan memohon pembiayaan ini dengan mana-mana 12 institusi kewangan yang menawarkan skim pembiayaan ini.

SOALAN NO : 16

5. Selain daripada kemudahan pembiayaan, MOTAC juga menyediakan insentif Galakan Cukai kepada syarikat pengendalian pelancongan bagi merancakkan kembali aktiviti pelancongan serta membantu syarikat untuk meneruskan kelangsungan dan meringankan beban ke atas perniagaan pasca pandemik. Insentif Galakan Cukai ini dilanjutkan untuk tempoh dua (2) tahun lagi iaitu bagi tahun taksiran 2021 sehingga tahun taksiran 2022.
6. MOTAC juga menjalinkan kerjasama dengan *Malaysia Investment Development Authority* (MIDA) bagi pengecualian cukai untuk pelaksanaan projek-projek pelancongan di Malaysia bagi mengiktiraf pelabur-pelabur dan pengusaha-pengusaha yang melabur dalam sektor pelancongan.
7. Sementara itu, MOTAC turut membantu pengusaha seni dan budaya tempatan untuk menghasilkan produk yang berkualiti yang boleh dijadikan sebagai simbol atau sinonim dengan sesuatu tempat. Ini boleh mengetengahkan produk seni tempatan dan boleh menjadi salah satu produk pelancongan, seterusnya dapat menjana pendapatan kepada pengusaha. Antaranya, menerusi Jabatan Warisan Negara (JWN), MOTAC pada 2009 telah mengangkat Botok-Botok Ikan, iaitu sejenis makanan tradisi masyarakat Bugis, dan diwartakan sebagai makanan warisan di bawah Akta Warisan Kebangsaan [Akta 645].
8. Usaha membantu pengusaha seni tempatan juga giat dilaksanakan oleh MOTAC melalui Kraftangan Malaysia. Antara bantuan yang diberikan adalah penyelidikan dan pembangunan, latihan dan bengkel untuk mengembangkan pemasaran secara digital serta pemusatan produk kraf untuk dijual sehingga ke pasaran antarabangsa. Sehingga kini, terdapat 10 usahawan kraf di Pontian yang berdaftar dengan Kraftangan Malaysia. Sehingga Jun 2022, hasil jualan kraf mereka pada tahun 2022 adalah melebihi RM195,000. Hasil kraf ini termasuklah dari industri tekstil iaitu batik, hasil rimba seperti kayu dan rotan, hasil logam seperti senjata dan aneka kraf yang lain seperti *acrylic* bagi lukisan batik dan kulit.

SOALAN NO : 16

9. Sementara itu, sejajar dengan pembukaan semula sempadan antarabangsa negara bermula 1 April 2022 yang lalu, Tourism Malaysia telah melaksanakan beberapa program pelancongan melibatkan kawasan Parlimen Pontian. Antaranya ialah "*Tanjung Piai Clean-up and Pulau Kukup Mangrove Tour 2022*". Program ini dilaksanakan dengan kerjasama pihak Perbadanan Taman Negara Johor, Majlis Perbandaran Pontian dan juga Pejabat Daerah Pontian pada 21 Mei 2022. Ia merupakan salah satu aktiviti promosi Tourism Malaysia untuk merancakkan semula pergerakan pelancong domestik dan menggalakkan aktiviti pelancongan secara terancang melalui pakej-pakej pelancongan tempatan yang memberi fokus kepada produk eko-pelancongan.
10. Penganjuran acara-acara pelancongan mampu untuk meningkatkan promosi "*Cuti-Cuti Malaysia*" di kalangan masyarakat Malaysia yang meminati '*nature & adventure*', di samping boleh mempromosikan pakej-pakej eko-pelancongan dengan memberi penekanan kepada produk alam semulajadi khususnya produk Eco-Tourism kluster '*Ramsar*'. Selain itu, ia juga boleh menjana kesan berganda (*multiplier effect*) kepada ekonomi penduduk setempat dan para pengusaha yang berada di sekitar daerah termasuk pengusaha Hotel dan Resort, Homestay, pemilik produk-produk tempatan dalam Industri Kecil dan Sederhana (IKS).

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : JAWAB BUKAN LISAN

**DARIPADA : DATUK SERI HAJI AHMAD BIN HAJI MASLAN
[PONTIAN]**

SOALAN :

Minta **PERDANA MENTERI** menyatakan bantuan dan program kepada pelajar Tahfiz untuk mengambil SPM/STPM/STAM serta mewujudkan seperti JTQA (Johor Tahfiz Quality Assurance) bagi memastikan lepasan Tahfiz mempunyai peluang masuk universiti dan menjadi profesional.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, Kerajaan melalui Kementerian Pendidikan Malaysia (KPM) telah melaksanakan Program Intervensi Murid Sekolah Tahfiz Swasta sejak tahun 2019. Program ini bertujuan membantu murid institusi pendidikan tahfiz swasta

mendapatkan akses daripada KPM bagi membolehkan mereka menduduki peperiksaan SPM. Program ini selaras dengan Seksyen 52, Akta Pendidikan 1996 yang memperuntukkan bantuan kepada Institusi Pendidikan Islam.

2. Program Intervensi Murid Sekolah Tahfiz Swasta KPM terbahagi kepada tiga model iaitu Model 1; Model SMK Bekok, Model 2; Model Rakan Strategik SMK dan Model 3; Model Tuisyen. Program ini menyediakan akses pendidikan kepada murid tahfiz swasta melalui Pengajaran dan Pembelajaran (PdP) enam mata pelajaran teras iaitu Bahasa Melayu, Bahasa Inggeris, Matematik, Sains, Sejarah dan Pendidikan Islam yang dibimbing oleh guru KPM.
3. Pada tahun 2021, sebanyak 64 buah sekolah tahfiz swasta daripada 8 buah negeri iaitu Johor, Pahang, Perak, Kuala Lumpur, Perlis, Sabah, Sarawak dan Melaka melibatkan 820 orang murid telah terlibat dengan program ini. Daripada jumlah tersebut, seramai 67 orang murid mengikuti model 1, 38 orang murid (model 2) dan 715 orang murid (model 3) dengan jumlah peruntukan keseluruhan bagi ketiga-tiga model yang disalurkan oleh KPM adalah sebanyak RM1,125,000.00.
4. Di negeri Johor, seramai 67 orang murid telah mengikuti model 1 iaitu dari SMK Bekok melibatkan 22 orang murid, SMK Benut (30) dan SMK Simpang Renggam (15). Pada tahun 2021, sebanyak 11 buah sekolah tahfiz swasta di negeri Johor telah mengikuti program ini melalui model 3 iaitu model tuisyen melibatkan seramai 228 murid dengan peruntukan bantuan kewangan daripada KPM sebanyak RM342,000.00.
5. KPM juga telah meluluskan pelaksanaan bantuan kewangan kepada institusi pendidikan Islam di Malaysia untuk membayai pembayaran yuran peperiksaan SPM dan bantuan pendidikan berkaitan. Bantuan ini bertujuan meringankan kos perbelanjaan keluarga murid kerana calon tersebut datang daripada latar belakang keluarga B40. Sekolah yang terlibat menerima bantuan tersebut ialah calon SPM dari Sekolah Menengah Agama Rakyat Tarbiyyatul Ajyal, Perak sebanyak RM8,850.00 dan calon SPM dari Maahad Tahfiz Miftahul Ulum, Kota

Kinabalu, Sabah sebanyak RM1,351.00 dengan bantuan keseluruhan sebanyak RM10,201.00.

6. Selain itu, subjek Tahfiz Al-Quran bagi peperiksaan Sijil Tinggi Pelajaran Malaysia (STPM) turut dilaksanakan oleh KPM pada tahun 2019 yang mensasarkan pelajar yang telah mengikuti Kurikulum Bersepadu Tahfiz (KBT). Usaha ini bertujuan membuka peluang kepada pelajar aliran tahfiz untuk melanjutkan pengajian ke institut pengajian tinggi, dalam dan luar negara.

7. Oleh itu, Kerajaan amat menggalakkan pengurusan institusi tahfiz dan pelajar tahfiz mensepadukan pengajian tahfiz dengan akademik, turath atau kemahiran bagi memastikan peluang menyambung pengajian ke peringkat yang lebih tinggi. Usaha ini juga telah dimasukkan dalam Pelan Tindakan Dasar Pendidikan Tahfiz Negara (DPTN) yang melibatkan kerjasama pelbagai agensi sama ada di bawah KPM, Kementerian Sumber Manusia (KSM), Kementerian Pembangunan Luar Bandar (KPLB) dan lain-lain.

8. Sehubungan itu, pelaksanaan Johor Tahfiz Quality Assurance (JTQA) oleh Pihak Berkuasa Agama Negeri Johor adalah selari dengan inisiatif dan perancangan yang sedang diusahakan di peringkat Persekutuan melalui DPTN. Penyelarasaran pengiktirafan ini akan terus diperkasakan melalui peranan Jawatankuasa Akreditasi Tahfiz (JAT) di bawah Jawatankuasa Penyelarasaran Pendidikan Islam Kebangsaan (dahulunya dikenali sebagai LEPAI).

9. Kerajaan akan terus bekerjasama dengan Pihak Berkuasa Agama Negeri serta agensi kerajaan yang berkaitan bagi memastikan institusi dan pelajar tahfiz tidak ketinggalan di dalam mengikuti pendidikan arus perdana di negara ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI HAJI AHMAD BIN HAJI
MASLAN [PONTIAN]

SOALAN

DATUK SERI HAJI AHMAD BIN HAJI MASLAN [PONTIAN] minta **MENTERI KEWANGAN** menyatakan strategi komunikasi ketika GST dan strategi penerangan jika GST diwujudkan kembali. Nyatakan sebab-sebab kegagalan GST dan kaedah untuk mengatasinya. Nyatakan 5 kebaikan GST dan 5 keburukan SST.

JAWAPAN

Tuan Yang di-Pertua,

Untuk makluman Ahli Yang Berhormat, semasa pelaksanaan GST, Kerajaan telah melaksanakan pelbagai usaha dan strategi komunikasi dalam memastikan pemahaman dan kesiapsiagaan peniaga berkaitan GST, antaranya:

1. Program kesedaran dan latihan GST untuk pihak awam dan pihak swasta.
2. Program *handholding* yang dijalankan oleh JKDM kepada syarikat-syarikat yang telah mendaftar GST yang lebih menjurus kepada sektor-sektor spesifik.
3. Kaunter informasi diwujudkan di seluruh negara di mana pegawai JKDM bersemuka secara terus dengan pelanggan yang hadir untuk mendapatkan khidmat nasihat.
4. Maklumat berkaitan GST dapat diakses dengan mudah oleh semua pihak secara capaian atas talian di mana mereka boleh melayari laman web Kementerian Kewangan (www.treasury.gov.my) dan laman web Jabatan Kastam (gst.customs.gov.my).
5. Pusat Panggilan Kastam (*call centre*) ditubuhkan oleh JKDM dan beroperasi di Kelana Jaya bagi memudahkan semua pihak mendapatkan maklumat yang tepat berkaitan GST.
6. Kempen-kempen mengenai GST kepada orang awam yang telah dilaksanakan melalui media cetak (majalah, surat khabar, *handbook*), elektronik (televisyen, radio), *out-of-home (banner)* serta secara online (media sosial, portal).
7. Program seperti Siri Jelajah Kempen GST yang dijalankan di seluruh negara (Semenanjung Malaysia termasuk Sabah dan Sarawak) supaya orang awam dapat memperolehi maklumat GST secara telus dan tepat.

Seperti Ahli Yang Berhormat sedia maklum, Cukai Barang dan Perkhidmatan atau ringkasnya GST merupakan salah satu model cukai kepenggunaan yang digunakan secara meluas di seluruh dunia, yang

digunakan oleh lebih 170 buah negara, merangkumi negara-negara maju dan membangun. Pelaksanaannya di Malaysia tidak gagal, tetapi telah dihentikan sebagai salah satu keputusan dasar Kerajaan di bawah pentadbiran Pakatan Harapan.

Kebaikan GST dapat dilihat dari pelbagai aspek. Dari aspek sistem percukaian, GST yang merupakan sistem percukaian pelbagai peringkat adalah sistem yang lebih cekap berbanding sistem cukai seperingkat seperti cukai jualan dan cukai perkhidmatan di bawah sistem cukai SST pada masa ini. Sistem GST memastikan bahawa jaringan cukai menjadi lebih menyeluruh di semua peringkat rantai perniagaan berbanding sistem SST yang hanya mengenakan cukai di suatu peringkat tertentu dalam rantai perniagaan. Ini memastikan bahawa beban cukai ditanggung dengan lebih adil oleh semua pihak dan mencegah pelarian cukai.

Pelaksanaan sistem cukai pelbagai peringkat seperti GST juga dapat mengurangkan *inherent weaknesses* yang ada pada sistem percukaian seperingkat, antaranya melibatkan fenomena *tax cascading* ataupun *tax on tax* yang mana sesuatu barang atau perkhidmatan dikenakan cukai ke atas cukai. Perkara ini akan mengakibatkan kerugian di pihak pengguna dan Kerajaan kerana pengguna terpaksa membayar harga barang dan perkhidmatan yang lebih tinggi, namun peningkatan harga tersebut bukanlah dalam bentuk hasil lebih tinggi yang boleh dikutip oleh pihak Kerajaan. Sebagai penyelesaiannya, sistem GST membolehkan tuntutan cukai input dibuat oleh peniaga, oleh itu memastikan elemen cukai tidak diserap sebagai kos perniagaan yang berisiko meningkatkan harga barang kepada pengguna akhir dan tidak dikenakan cukai berganda.

Dari aspek pengguna, sistem GST adalah lebih telus berbanding sistem cukai jualan dan cukai perkhidmatan kerana pengenaan GST akan dinyatakan dalam semua invois cukai untuk setiap peringkat dalam suatu rantai urusniaga. Ini berbeza dengan cukai jualan iaitu sebahagian amaun cukai adalah tersembunyi disebabkan cukai jualan hanya dikenakan di peringkat pengilang. Selain itu, GST juga berpotensi menjadi cukai yang lebih progresif untuk pengguna jika digandingkan

NO SOALAN :18

dengan pengenaan cukai pada kadar sifar untuk barang dan perkhidmatan asasi serta pemberian bantuan tunai untuk golongan berpendapatan rendah.

Dari aspek peniaga pula, sistem GST mengurangkan urusan pentadbiran cukai kerana mengurangkan pentadbiran dua jenis cukai kepada satu jenis cukai. GST juga bukan merupakan kos kepada perniagaan jika perniagaan tersebut berdaftar di bawah sistem GST kerana peniaga boleh menuntut kembali elemen GST yang terdapat dalam input perniagaan daripada Kerajaan melalui mekanisme tuntutan kredit cukai input. Malah, peniaga yang terlibat dalam urus niaga pengeksportan boleh menjadi lebih kompetitif kerana harga produk yang dieksport tidak dikenakan GST.

Untuk kerajaan dan ekonomi negara, GST berpotensi menjana hasil yang lebih tinggi kerana ia meliputi asas cukai yang lebih meluas berbanding cukai jualan dan cukai perkhidmatan. Hasil yang lebih tinggi bukan sahaja membolehkan Kerajaan berbelanja untuk tujuan pembangunan negara, malahan memungkinkan pelbagai bantuan disalurkan kepada rakyat yang memerlukan.

Kementerian Kewangan mengambil maklum bahawa terdapat aspek pelaksanaan GST sebelum ini yang dapat ditambahbaik. Antaranya mempercepatkan dan memudahkan proses tuntutan bayaran balik (*refund*) GST.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK SERI HAJI AHMAD BIN HAJI
MASLAN [PONTIAN]**

SOALAN

DATUK SERI HAJI AHMAD BIN HAJI MASLAN [PONTIAN] minta **MENTERI KANAN PENDIDIKAN** menyatakan langkah-langkah untuk memastikan pelajar lepasan SPM boleh melanjutkan ke pendidikan lebih tinggi. Nyatakan langkah-langkah untuk mengelakkan keciciran seperti kejadian baru-baru ini. Juga status permohonan sebuah Sekolah Berasrama Penuh (SBP) di Parlimen Pontian (SBP Agama Ibnu Khaldun).

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan calon peperiksaan Sijil Pelajaran Malaysia (SPM) mendapatkan sijil SPM bagi membolehkan mereka melanjutkan pengajian ke institusi pengajian tinggi. Antara pendekatan yang telah diambil bagi memastikan calon SPM menduduki peperiksaan adalah seperti berikut:

- i. menyediakan perkhidmatan bimbingan dan sokongan psikososial melalui pelbagai kaedah seperti program motivasi, infografik pendidikan dan video inspirasi untuk meningkatkan motivasi murid untuk terus hadir ke sekolah. Sesi konsultasi antara Guru Bimbingan dan Kaunseling bersama-sama dengan guru mata pelajaran dan guru kelas dilaksanakan untuk mengenal pasti murid yang tidak mengikuti sesi pembelajaran. Intervensi berfokus dijalankan agar murid kembali ke sekolah dan berminat untuk mengikuti

- pembelajaran;
- ii. mengadakan perbincangan di antara pihak sekolah dengan ibu bapa/penjaga murid untuk mengenal pasti sebab dan langkah-langkah yang boleh diambil bagi menangani isu murid yang kurang berminat untuk belajar. Kerjasama ini penting untuk memastikan ibu bapa/penjaga murid dapat menyokong pembelajaran anak-anak semasa di rumah dan sekolah;
 - iii. melaksanakan intervensi murid risiko cicir pengajaran dan pembelajaran di peringkat jabatan pendidikan negeri (JPN) dan pejabat pendidikan daerah (PPD). Intervensi ini melibatkan Sektor Pengurusan Pembelajaran, Sektor Pengurusan Sekolah dan Sektor Pembangunan Murid. Intervensi ini juga melibatkan *focal person*, pelibatan Ibu Bapa, Komuniti dan Swasta (PIBKS) pada peringkat daerah dan negeri melalui aktiviti *outreach*;
 - iv. menyediakan Garis Panduan Mengurus Murid Berisiko Cicir di sekolah sebagai rujukan JPN, PPD dan sekolah dalam mengendalikan isu murid cicir dengan sistematik, terancang dan berkesan. KPM telah membangunkan *Dashboard* Murid Berisiko Cicir bagi mengenal pasti murid berisiko cicir; dan
 - v. menyediakan Manual Pengurusan Pencegahan dan Intervensi Murid Cicir: Serlahkan Keunggulan Diri (SUDI 2.0). Manual ini digunakan sebagai panduan kepada pihak sekolah untuk merancang dan menyediakan intervensi yang bersesuaian supaya murid kekal bersekolah sehingga tamat Tingkatan 5.

Di sebalik usaha-usaha yang dilaksanakan oleh KPM bagi memastikan calon SPM hadir untuk menduduki peperiksaan, masih terdapat calon SPM yang tidak layak mendapat sijil. Bagi membantu calon tersebut, mereka boleh menduduki peperiksaan SPM Ulangan (SPMU) yang dilaksanakan pada setiap tahun. SPMU menawarkan tiga mata pelajaran, iaitu Bahasa Melayu, Sejarah dan Matematik. Untuk tahun ini, SPMU akan dilaksanakan pada bulan September.

SOALAN NO : 19

Selain daripada itu, calon juga boleh menduduki peperiksaan SPM sebagai calon persendirian pada tahun-tahun berikutnya. Keputusan ini boleh digabungkan dalam satu sijil peperiksaan melalui perkhidmatan *patching* sijil peperiksaan SPM. Calon yang telah memperoleh sijil SPM kali pertama mulai tahun 2009 layak untuk memohon perkhidmatan ini. Dengan cara ini, calon masih berpeluang untuk mendapatkan sijil SPM atau memperbaiki keputusan mereka.

Untuk makluman Ahli Yang Berhormat, terdapat tujuh buah Sekolah Berasrama Penuh (SBP) bawah KPM yang sedang beroperasi di negeri Johor. SBP tersebut adalah Sekolah Tun Fatimah, Sekolah Menengah Sains Batu Pahat, Sekolah Menengah Sains Muar, Sekolah Menengah Sains Johor, Sekolah Menengah Sains Sultan Iskandar, Sekolah Menengah Sains Sembrong dan Sekolah Menengah Sains Kota Tinggi.

Di samping itu, terdapat dua buah SBP, iaitu Sekolah Menengah Sains Segamat dan Sekolah Menengah Sains Pagoh kini dalam proses pembinaan. Berdasarkan rekod KPM, enrolmen murid di SBP seluruh negeri Johor masih belum mencapai kapasiti yang optimum dan SBP sedia ada mampu menampung permintaan murid di negeri tersebut. Oleh yang demikian, buat masa ini, KPM tidak mempunyai perancangan untuk membina SBP baharu di Pontian.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI HAJI AHMAD BIN HAJI MASLAN
[PONTIAN]**

SOALAN

DATUK SERI HAJI AHMAD BIN HAJI MASLAN [PONTIAN] minta **MENTERI ALAM SEKITAR DAN AIR** menyatakan status projek tebatan banjir dan kawalan hakisan di seluruh negara. Senaraikan mengikut tempat, negeri dan peruntukan yang terlibat serta perancangan masa ianya boleh disiapkan.

JAWAPAN

Tuan Yang Di-Pertua,

KASA melalui JPS amat komited dalam menangani isu-isu banjir dan kawalan hakisan sungai yang berlaku di seluruh Negara. Untuk makluman YB, sebanyak seratus (100) projek Rancangan Tebatan Banjir (RTB) dan Saliran Bandar telah diluluskan di bawah RMKe-12 dengan anggaran kos berjumlah RM10.25 billion

Manakala untuk hakisan pantai pula, terdapat lapan belas (18) projek yang telah diperuntukan oleh KASA berjumlah RM931 juta di bawah RMKe-11 dan RMKe-12.

Sekian, terima kasih

SOALAN NO: 20

1. Rancangan Tebatan Banjir (RTB)

BIL	NAMA PROJEK	NEGERI	KOS PROJEK DE	MULA	SIAP	STATUS SEMASA
1	LENCONGAN BANJIR BARAT TIMAH TASOH	Perlis	32,103,285.00	2012	2024	DLP
2	RANCANGAN TEBATAN BANJIR SUNGAI KEDAH/ANAK BUKIT	Kedah	641,351,400.00	2018	2024	Pembinaan
3	PEMULIHARAAN SERTA PENGINDAHAN KOLAM TAKUNGAN BANJIR SUNGAI DAMANSARA	Selangor	64,239,000.00	2017	2025	Perancangan / Rekabentuk
4	RTB SG PENDANG	Kedah	350,000,000.00	2015	2027	Pembinaan
5	RANCANGAN TEBATAN BANJIR LEMBAH BERTAM, CAMERON HIGHLAND, PAHANG	Pahang	114,600,000.00	2015	2023	Pembinaan
6	RANCANGAN TEBATAN BANJIR TELUK INTAN	Perak	71,000,000.00	2015	2023	Tutup Akaun
7	RANCANGAN TEBATAN BANJIR SUNGAI BATU PAHAT, JOHOR	Johor	48,500,000.00	2021	2026	Perancangan / Rekabentuk
8	RANCANGAN TEBATAN BANJIR LEMBANGAN SUNGAI MUAR FASA II	Johor	331,053,240.00	2016	2025	Pembinaan
9	RANCANGAN TEBATAN BANJIR SUNGAI PEMANDI, JOHOR	Johor	42,000,000.00	2020	2025	Perancangan / Rekabentuk

SOALAN NO: 20

10	RANCANGAN TEBATAN BANJIR BALING	Kedah	15,000,000.00	2017	2025	Perancangan / Rekabentuk
11	RANCANGAN TEBATAN BANJIR BANDAR CHANGLOON	Kedah	15,000,000.00	2,016	2,022	Tutup Akaun
12	RANCANGAN TEBATAN BANJIR BANDAR JITRA SELATAN	Kedah	45,000,000.00	2018	2025	Pembinaan
13	RANCANGAN TEBATAN BANJIR LEMBANGAN SUNGAI BONGKOK, KEDAH	Kedah	68,200,000.00	2020	2026	Perancangan / Rekabentuk
14	PEMBANGUNAN PELAN INDUK TEBATAN BANJIR SUNGAI PETANI, KEDAH.	Kedah	2,500,000.00	2,020	2022	Kajian
15	RANCANGAN TEBATAN BANJIR BANDAR BAHRU, DAERAH BANDAR BAHRU, KEDAH	Kedah	150,000,000.00	2021	2029	Perancangan / Rekabentuk
16	PEMBANGUNAN LEMBANGAN SUNGAI BERSEPADU SUNGAI KELANTAN FASA I	Kelantan	624,126,700.00	2018	2025	Pembinaan
17	PEMBANGUNAN LEMBANGAN BERSEPADU SUNGAI GOLOK (KESBAN) FASA 1	Kelantan	656,000,000.00	2018	2026	Pembinaan
18	PEMBANGUNAN PELAN INDUK RANCANGAN TEBATAN BANJIR LEMBANGAN SUNGAI MELOR, KELANTAN	Kelantan	4,300,000.00	2020	2025	Kajian

SOALAN NO: 20

19	PEMBANGUNAN PELAN INDUK RANCANGAN TEBATAN BANJIR LEMBANGAN SUNGAI BUAYA IKAT, KELANTAN	Kelantan	4,300,000.00	2020	2025	Kajian
20	PEMBANGUNAN LEMBANGAN SUNGAI BERSEPADU (PLSB) SUNGAI GOLOK FASA 2	Kelantan	879,000,000.00	2022	2028	Perancangan / Rekabentuk
21	RANCANGAN TEBATAN BANJIR ALOR GAJAH FASA I DAERAH ALOR GAJAH, MELAKA	Melaka	30,000,000.00	2017	2026	Iklan Tender
22	RANCANGAN TEBATAN BANJIR SUNGAI DUYONG	Melaka	163,800,000.00	2016	2026	Pembinaan
23	RANCANGAN TEBATAN BANJIR BANDAR MERLIMAU	Melaka	36,000,000.00	2016	2026	Iklan Tender
24	RANCANGAN TEBATAN BANJIR BANDAR JASIN	Melaka	60,000,000.00	2016	2026	Iklan Tender
25	RANCANGAN TEBATAN BANJIR SUNGAI MELAKA FASA 1	Melaka	40,000,000.00	2020	2027	Perancangan / Rekabentuk
26	PEMBANGUNAN PELAN INDUK TEBATAN BANJIR LEMBANGAN SUNGAI BARU MELAKA	Melaka	2,000,000.00	2020	2022	Kajian

SOALAN NO: 20

27	PROJEK MENAIKTARAF KOLAM TEBATAN BANJIR KRUBONG-DURIAN TUNGGAL SEBAGAI KOLAM DWI-FUNGSI UNTUK TEBATAN BANJIR DAN SUMBER AIR NEGERI MELAKA	Melaka	600,000,000.00	2021	2029	Iklan Tender - Reka & Bina
28	RANCANGAN TEBATAN BANJIR SUNGAI CHEMPEDAK, DAERAH JELEBU, NEGERI SEMBILAN	Negeri Sembilan	10,000,000.00	2020	2026	Perancangan / Rekabentuk
29	PEMBANGUNAN LEMBANGAN SUNGAI BERSEPADU SUNGAI LINGGI FASA 4, NEGERI SEMBILAN	Negeri Sembilan	70,000,000.00	2018	2024	Pembinaan
30	PEMBANGUNAN LEMBANGAN SUNGAI BERSEPADU SUNGAI PEDAS, DAERAH REMBAU, NEGERI SEMBILAN	Negeri Sembilan	25,850,000.00	2021	2027	Perancangan / Rekabentuk
31	RANCANGAN TEBATAN BANJIR SUNGAI RAYA, NEGERI SEMBILAN	Negeri Sembilan	21,800,000.00	2020	2027	Perancangan / Rekabentuk
32	RANCANGAN TEBATAN BANJIR BANDAR PEKAN, PEKAN, PAHANG - FASA II	Pahang	452,025,370.00	2013	2025	Pembinaan
33	PEMBANGUNAN LEMBANGAN SUNGAI BERSEPADU SUNGAI KUANTAN	Pahang	632,612,000.00	2016	2028	Pembinaan
34	PEMBANGUNAN LEMBANGAN SUNGAI BERSEPADU SG. SEMANTAN, DAERAH TEMERLOH, FASA 1, PAHANG	Pahang	50,000,000.00	2018	2025	Iklan Tender

SOALAN NO: 20

35	PEMBANGUNAN LEMBANGAN SUNGAI BERSEPADU (PLSB) SUNGAI JELAI, FASA 1, DAERAH LIPIS, PAHANG	Pahang	45,000,000.00	2018	2025	Perancangan / Rekabentuk
36	RANCANGAN TEBATAN BANJIR LEMBANGAN SUNGAI PINANG	Pulau Pinang	150,000,000.00	2017	2028	Perancangan / Rekabentuk
37	RANCANGAN TEBATAN BANJIR SUNGAI KECHIL, DAERAH SEBERANG PERAI SELATAN, PULAU PINANG	Pulau Pinang	16,500,000.00	2019	2026	Perancangan / Rekabentuk
38	RANCANGAN TEBATAN BANJIR (RTB) PONDOK UPEH / SUNGAI BURONG, PULAU PINANG	Pulau Pinang	10,000,000.00	2018	2026	Perancangan / Rekabentuk
39	RANCANGAN TEBATAN BANJIR (RTB) TELUK KUMBAR, DAERAH BARAT DAYA, PULAU PINANG	Pulau Pinang	10,000,000.00	2018	2023	DLP
40	RANCANGAN TEBATAN BANJIR TELUK BAHANG, DAERAH BARAT DAYA, PULAU PINANG	Pulau Pinang	8,000,000.00	2018	2026	Perancangan / Rekabentuk
41	RANCANGAN TEBATAN BANJIR SUNGAI DUA BESAR, PULAU PINANG	Pulau Pinang	45,000,000.00	2020	2027	Perancangan / Rekabentuk
42	KAJIAN KEBERKESANAN PENYELESAIAN BANJIR JANGKA PANJANG DI NEGERI PULAU PINANG TERMASUK DAERAH KULIM DAN BANDAR BAHRU DI NEGERI KEDAH	Pelbagai Negeri	10,000,000.00	2020	2024	Kajian

SOALAN NO: 20

43	RANCANGAN TEBATAN BANJIR TAMAN SIAKAP, DAERAH SEBERANG PERAI TENGAH, PULAU PINANG	Pulau Pinang	20,000,000.00	2021	2025	Perancangan / Rekabentuk
44	RANCANGAN TEBATAN BANJIR SUNGAI JEBONG	Perak	5,000,000.00	2019	2023	DLP
45	RANCANGAN TEBATAN BANJIR SUNGAI BERNAM	Perak	7,000,000.00	2017	2025	Perancangan / Rekabentuk
46	RANCANGAN TEBATAN BANJIR BAGAN DATUK, PERAK.	Perak	87,600,000.00	2019	2027	Perancangan / Rekabentuk
47	RANCANGAN TEBATAN BANJIR GERIK, HULU PERAK, PERAK	Perak	74,000,000.00	2019	2026	Perancangan / Rekabentuk
48	PROJEK RANCANGAN TEBATAN BANJIR LEMBANGAN SG BERUAS, PERAK	Perak	36,800,000.00	2019	2026	Perancangan / Rekabentuk
49	RANCANGAN TEBATAN BANJIR SUNGAI KINTA FASA 2, PERAK	Perak	108,000,000.00	2019	2028	Perancangan / Rekabentuk
50	PEMBANGUNAN PELAN INDUK RANCANGAN TEBATAN BANJIR (RTB) SUNGAI TROLAK, DAERAH MUALLIM, PERAK	Perak	600,000.00	2020	2022	Kajian
51	RANCANGAN TEBATAN BANJIR SUNGAI BULOH, SELANGOR	Selangor	50,000,000.00	2019	2025	Pembinaan

SOALAN NO: 20

52	RANCANGAN TEBATAN BANJIR SUNGAI LANGAT FASA 1, SELANGOR	Selangor	41,000,000.00	2017	2025	Perancangan / Rekabentuk
53	RANCANGAN TEBATAN BANJIR LEMBANGAN SUNGAI KUYOH	Pelbagai Negeri	300,000,000.00	2020	2025	Perancangan / Rekabentuk
54	PEMBANGUNAN LEMBANGAN SUNGAI BERSEPADU SUNGAI KEMAMAN, TERENGGANU	Terengganu	300,000,000.00	2020	2028	Iklan Tender
55	PROJEK TEBATAN BANJIR GUNTUNG LUAR, SETIU, TERENGGANU	Terengganu	5,000,000.00	2019	2023	Pembinaan
56	RTB KEMASIK	Terengganu	60,000,000.00	2019	2026	Pembinaan
57	PEMBANGUNAN PELAN INDUK TEBATAN BANJIR LEMBANGAN SUNGAI KERTIH, KEMAMAN, TERENGGANU.	Terengganu	2,000,000.00	2020	2022	Kajian
58	KAJIAN PELAN INDUK TEBATAN BANJIR LEMBANGAN SUNGAI TERENGGANU, TERENGGANU	Terengganu	3,500,000.00	2021	2025	Kajian
59	KAJIAN PELAN INDUK TEBATAN BANJIR LEMBANGAN SG. MARANG, TERENGGANU	Terengganu	2,500,000.00	2021	2025	Kajian
60	RANCANGAN TEBATAN BANJIR BUKIT PAYUNG, DAERAH MARANG, TERENGGANU	Terengganu	60,000,000.00	2021	2026	Perancangan / Rekabentuk

SOALAN NO: 20

61	PEMBANGUNAN LEMBANGAN SUNGAI BERSEPADU SUNGAI MOYOG, SABAH.	Sabah	297,960,000.00	2016	2026	Pembinaan
62	RTB SG. TAWAU, LEMBANGAN SG. TAWAU, TAWAU, SABAH (FASA 1A)	Sabah	50,000,000.00	2017	2025	Pembinaan
63	RTB SG. ANIP, LEMBANGAN SG. ANIP, SANDAKAN, SABAH	Sabah	40,000,000.00	2017	2025	Pembinaan
64	RTB SG. KETIAU, PUTATAN, SABAH	Sabah	10,000,000.00	2017	2025	Pembinaan
65	RTB SG. PANCURAN, LEMBANGAN SG. SEPAGAYA, LAHAD DATU, SABAH	Sabah	28,599,000.00	2017	2023	Pembinaan
66	RANCANGAN TEBATAN BANJIR SG. GURONG-GURONG, LEMBANGAN SG. GURONG-GURONG, PEKAN KOTA BELUD, KOTA BELUD, SABAH	Sabah	27,000,000.00	2016	2025	Pembinaan
67	RTB SG. RAMPAYAN, LEMBANGAN SG. MENGGATAL, KOTA KINABALU, SABAH	Sabah	36,000,000.00	2017	2025	Pembinaan
68	RTB SG. TEBONGON (KG. TEGULI), PUTATAN, SABAH	Sabah	25,000,000.00	2017	2025	Pembinaan
69	RANCANGAN TEBATAN BANJIR SG. KEDAMAIAH/SG. TEMPASUK/SG. ABAI & SG KAWANG-KAWANG, KOTA BELUD, SABAH	Sabah	50,000,000.00	2017	2025	Kajian

SOALAN NO: 20

70	RTB BANDAR SIERRA, LEMBANGAN SG. TELIPOK, KOTA KINABALU, SABAH	Sabah	20,000,000.00	2017	2025	Pembinaan
71	RTB SG. PADAS, LEMBANGAN SG. PADAS, SABAH	Sabah	50,000,000.00	2017	2027	Iklan Tender
72	KAJIAN PELAN INDUK TEBATAN BANJIR LEMBANGAN SUNGAI KUDAT, SABAH	Sabah	2,500,000.00	2021	2025	Kajian
73	RANCANGAN TEBATAN BANJIR PERSEKITARAN KAWASAN LIDO BANDARAYA KOTA KINABALU SABAH	Sabah	76,000,000.00	2016	2027	Iklan Tender
74	RANCANGAN TEBATAN BANJIR PELBAGAI NEGERI SABAH	Sabah	56,600,000.00	2015	2022	Perancangan / Rekabentuk
75	KAJIAN REKABENTUK TERPERINCI BAGI RANCANGAN TEBATAN BANJIR SUNGAI BANDAU, KOTA MARUDU, SABAH	Sabah	2,000,000.00	2020	2023	Kajian
76	RANCANGAN TEBATAN BANJIR SUNGAI DAMAI, BASIN 8, SABAH	Sabah	48,000,000.00	2020	2027	Perancangan / Rekabentuk
77	PEMBANGUNAN PELAN INDUK TEBATAN BANJIR LEMBANGAN SUNGAI MEMBAKUT, SABAH	Sabah	3,000,000.00	2020	2025	Kajian

SOALAN NO: 20

78	RANCANGAN TEBATAN BANJIR SIBU (FASA 3) LEMBANGAN BATANG RAJANG, SARAWAK	Sarawak	100,000,000.00	2018	2024	Pembinaan
79	RANCANGAN TEBATAN BANJIR BINTULU, LEMBANGAN SUNGAI KEMENA, SARAWAK	Sarawak	27,500,000.00	2016	2022	Tutup Akaun
80	RANCANGAN TEBATAN BANJIR KAWASAN PENEMPATAN SEMULA KAMPUNG BAKO, KUCHING, SARAWAK	Sarawak	3,000,000.00	2017	2022	DLP
81	RANCANGAN TEBATAN BANJIR KAMPUNG BERADEK SEMILANG, KUCHING SARAWAK	Sarawak	7,000,000.00	2018	2026	Perancangan / Rekabentuk
82	RANCANGAN TEBATAN BANJIR SUNGAI STAKAN, KUCHING	Sarawak	10,000,000.00	2019	2026	Pembinaan
83	RANCANGAN TEBATAN BANJIR SG MIRI, LEMBANGAN SUNGAI MIRI, SARAWAK	Sarawak	30,000,000.00	2019	2025	Iklan Tender
84	RANCANGAN TEBATAN BANJIR DAERAH LIMBANG DI LEMBANGAN SG. LIMBANG, BAHAGIAN LIMBANG	Sarawak	21,670,000.00	2016	2025	Perancangan / Rekabentuk
85	RTB KAMPUNG SEBEMBAN LEMBANGAN BATANG SADONG SARAWAK	Sarawak	2,750,000.00	2019	2022	DLP
86	KAJIAN PELAN INDUK TEBATAN BANJIR LEMBANGAN BATANG LUPAR, SARAWAK	Sarawak	5,000,000.00	2021	2025	Kajian

SOALAN NO: 20

87	KAJIAN PELAN INDUK TEBATAN BANJIR LEMBANGAN BATANG SAMARAHAN, SARAWAK	Sarawak	5,000,000.00	2021	2022	Kajian
88	KAJIAN PELAN INDUK TEBATAN BANJIR LEMBANGAN BATANG SARIBAS, SARAWAK	Sarawak	5,000,000.00	2021	2025	Kajian
89	RANCANGAN TEBATAN BANJIR SUNGAI BUNUS , WILAYAH PERSEKUTUAN KUALA LUMPUR	Wilayah Persekutuan	300,000,000.00	2013	2025	Pembinaan
90	RANCANGAN TEBATAN BANJIR UPPER SG. KLANG	Wilayah Persekutuan	22,000,000.00	2019	2025	Perancangan / Rekabentuk
91	MENAIKTARAF KOLAM TAKUNGAN BANJIR BATU DAN JINJANG SERTA LENCONGAN GOMBAK DAN KEROH KLFM-B	Wilayah Persekutuan	70,000,000.00	2022	2027	Perancangan / Rekabentuk
92	PENYEDIAAN PELAN INDUK DAN PETA HAZARD BANJIR BAGI LEMBANGAN SUNGAI PELBAGAI NEGERI	Pelbagai Negeri	22,600,000.00	2016	2025	Kajian
93	KERJA-KERJA PENGUKURAN HALUS DAN PERIZABAN SUNGAI PROJEK-PROJEK RANCANGAN TEBATAN BANJIR	Pelbagai Negeri	3,300,000.00	2021	2027	Perancangan / Rekabentuk
94	PROGRAM PENYEDIAAN PELAN INDUK DAN REKABENTUK TERPERINCI TEBATAN BANJIR LEMBANGAN SUNGAI	Pelbagai Negeri	20,468,230.00	2014	2025	Perunding HOS

SOALAN NO: 20

95	RANCANGAN TEBATAN BANJIR LEMBANGAN SUNGAI KESANG	Johor	126,684,000.00	2011	2025	Iklan Tender
96	MENAIKTARAF SISTEM SALIRAN BAGI MENGATASI MASALAH BANJIR KILAT DI KAWASAN MELAKA BANDARAYA BERSEJARAH FASA II	Melaka	95,768,000.00	2020	2023	Pembinaan
97	PROJEK TEBATAN BANJIR GONG KIAT, KUALA TERENGGANU	Terengganu	7,000,000.00	2017	2023	CMGD
98	PROJEK TEBATAN BANJIR KUALA TERENGGANU UTARA (UMT) DAN KAWASAN SEKITAR, TERENGGANU	Terengganu	10,000,000.00	2020	2025	Perancangan / Rekabentuk
99	PEMBANGUNAN LEMBANGAN SUNGAI BERSEPADU SUNGAI SARAWAK	Sarawak	191,000,000.00	2016	2025	Perancangan / Rekabentuk
100	PROJEK LEMBANGAN SG PERAK FASA 1	Perak	237,000,000.00	2016	2033	Perancangan
			10,255,260,225.00			

SOALAN NO: 20**2. Hakisan Pantai**

BIL	NAMA PROJEK	NEGERI	KOS PROJEK DE (RM)	MULA	SIAP	STATUS SEMASA
1	PROJEK MENCEGAH HAKISAN PANTAI DI TANJUNG PIAI, MUKIM SERKAT, PONTIAN JOHOR	Johor	32,500,000.00	2014	2022	Tutup Akaun
2	PROJEK PENGAWALAN HAKISAN PANTAI DI PANTAI SEKAKAP, MERSING, JOHOR	Johor	30,000,000.00	2022	2025	Perancangan / Rekabentuk
3	PROJEK PENGAWALAN HAKISAN PANTAI PASIR HITAM, MUKIM PADANG AYER HANGAT, DAERAH LANGKAWI, KEDAH	Kedah	17,000,000.00	2019	2024	Perancangan / Rekabentuk
4	PEMULIHARAAN PANTAI DI AIRPORT CITY SABAK, KOTA BHARU, KELANTAN	Kelantan	10,000,000.00	2021	2023	Perancangan / Rekabentuk
5	PROJEK PENGAWALAN HAKISAN PANTAI PENGKALAN BALAK, DAERAH ALOR GAJAH, NEGERI MELAKA	Melaka	30,000,000.00	2022	2025	Perancangan / Rekabentuk
6	PROJEK PENGAWALAN HAKISAN PANTAI DI PANTAI PUTERI, DAERAH MELAKA TENGAH, MELAKA	Melaka	30,000,000.00	2022	2025	Perancangan / Rekabentuk

SOALAN NO: 20

7	PROJEK PENGAWALAN HAKISAN PANTAI DI KG. TG. BATU, NENASI PEKAN PAHANG	Pahang	75,000,000.00	2018	2025	Perancangan / Rekabentuk
8	MEMBAIKPULIH DAN MENINGGI BAN PANTAI SUNGAI BELUKANG MUKIM RUNGKUP, DAERAH BAGAN DATUK, PERAK	Perak	8,000,000.00	2018	2023	Perancangan / Rekabentuk
9	PROJEK PEMULIHARAAN PANTAI MORIB	Selangor	60,500,000.00	2021	2025	Perancangan / Rekabentuk
10	PROJEK MENCEGAH HAKISAN PANTAI DI PANTAI TOK JEMBAL, KUALA TERENGGANU (FASA 2), TERENGGANU	Terengganu	97,815,985.00	2013	2023	Tutup Akaun
11	PROJEK PENGAWALAN HAKISAN PANTAI DI PANTAI KUALA NERUS, TERENGGANU	Terengganu	90,000,000.00	2018	2025	Perancangan / Rekabentuk
12	PROJEK MENAIKTARAF BAN PANTAI LAGUN SETIU, GONG BATU, SETIU, TERENGGANU	Terengganu	10,000,000.00	2016	2022	Tutup Akaun
13	PROJEK PENGAWALAN HAKISAN PANTAI DI KAMPUNG KUALA HILIR OYA, BAHAGIAN MUKAH SARAWAK	Sarawak	19,550,000.00	2017	2023	Pembinaan
14	PROJEK PENGAWALAN HAKISAN PANTAI DI KAMPUNG BATU 1, KUALA BARAM, MIRI, SARAWAK	Sarawak	25,000,000.00	2018	2024	Pembinaan
15	PROJEK PENGAWALAN HAKISAN PANTAI DI KG SEMARANG, PUSA, BETONG, SARAWAK	Sarawak	6,500,000.00	2018	2023	Perancangan / Rekabentuk

SOALAN NO: 20

16	PEMBINAAN STRUKTUR PERLINDUNGAN HAKISAN DI KG. MUARA TEBAS, KUCHING, SARAWAK	Sarawak	25,000,000.00	2018	2025	Perancangan / Rekabentuk
17	PROJEK PEMULIHARAAN HAKISAN PANTAI PELBAGAI NEGERI	Pelbagai Negeri	164,250,000.00	2016	2024	Pembinaan
18	PROJEK MENGATASI MASALAH FENOMENA AIR PASANG BESAR DAN HAKISAN PANTAI PELBAGAI NEGERI	Pelbagai Negeri	200,000,000.00	2019	2024	Perancangan / Rekabentuk
	JUMLAH KESELURUHAN (RM)			931,115,985.00		

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KE EMPAT BELAS**

PERTANYAAN : BUKAN LISAN

DARIPADA : TUAN AHMAD BIN HASSAN (PAPAR)

SOALAN

TUAN AHMAD BIN HASSAN (PAPAR) minta **MENTERI PERTANIAN DAN INDUSTRI MAKANAN** menyatakan usaha dan langkah Kerajaan bagi menambahkan pendapatan rakyat di Papar yang selama ini tertumpu di dalam sektor pertanian, perladangan dan perikanan serta strategi yang dirangka bagi memaksimumkan penggunaan tanah terbiar yang banyak di Sabah.

JAWAPAN

Tuan Yang di-Pertua,

Untuk makluman Ahli Yang Berhormat, antara usaha dan langkah Kerajaan bagi menambahkan pendapatan rakyat di Papar yang selama ini tertumpu di dalam sektor pertanian, perladangan dan perikanan serta strategi yang dirangka adalah memaksimumkan penggunaan tanah terbiar di Sabah. Kerajaan melalui Jabatan Pertanian Sabah telah mengambil pelbagai usaha dan langkah antaranya:

- i. Merancakkan lagi industri pertanian setempat disamping membantu mengurangkan beban kos pengusaha pertanian melalui pelaksanakan Program Bantuan Tanaman seperti tanaman Kelapa Pandan, Durian Musang King, Sayuran dan Nanas MD2. Pemohon yang layak akan diberi bantuan input-input pertanian seperti peralatan ladang, racun dan baja;

SOALAN NO: 21

- ii. Meneruskan program pemberian subsidi pembajakan sawah bagi penanaman padi bukit. Inisiatif ini dapat mengurangkan beban kos pengeluaran para petani dan menggalakkan pengeluaran hasil padi Daerah Papar dan Kerajaan Negeri Sabah;
- iii. Pelaksanaan program-program pembangunan tanaman padi seperti kempen penanaman dua kali setahun, menggalakkan penggunaan benih bermutu keluaran jabatan, program pemulihan tanah sawah terbiar dan program peningkatan hasil ke arah 10 mt/Hektar;
- iv. Melaksanakan program mempelbagaikan produk dan menambah nilai produk daripada hasil tanaman dan memperkasakan Usahawan Industri Asas Tani (IAT) sedia ada agar sumber ekonomi masyarakat setempat ditingkatkan;
- v. Mewujudkan Mini Taman Kekal Pengeluaran Makanan (TKPM) di Ulu Bongawan dengan menggunakan tanah Jabatan seluas 28 hektar yang akan disewakan kepada pengusaha komersial tanaman Nanas MD2;
- vi. Melaksanakan Program Pertanian Bandar bertujuan untuk membantu mengurangkan kos sara hidup penduduk bandar dan pinggir bandar yang terkesan akibat peningkatan kos sara hidup serta membantu dalam menjamin keselamatan makanan; dan
- vii. Menggiatkan program perkhidmatan pengembangan pertanian melalui Jabatan Pertanian Daerah Papar seperti ceramah, kursus singkat, latihan dan lawatan dilakukan secara berkala dan berjadual. Melalui program-program ini, maklumat terkini berkaitan teknologi dan informasi yang baharu dapat disalurkan kepada semua kumpulan sasar.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN AHMAD BIN HASSAN [PAPAR]

SOALAN

TUAN AHMAD BIN HASSAN [PAPAR] minta **MENTERI ALAM SEKITAR DAN AIR** menyatakan adakah Kementerian bercadang untuk menambah baik sistem perparitan yang tidak sempurna di Kampung Sabok, Kampung Lepasan dan Laut Kinarut yang menjadi punca berlakunya banjir kilat yang kerap.

JAWAPAN

Tuan Yang Di-Pertua,

1. Untuk makluman, kawasan banjir yang dinyatakan merupakan kawasan sistem perparitan di bawah Pihak Berkuasa Tempatan (PBT). Merujuk kepada keputusan Jemaah Menteri tahun 1996 telah menggariskan pembahagian tanggungjawab di antara Pihak Berkuasa Tempatan (PBT) dan juga JPS. Semua sistem saliran dalaman iaitu sistem saliran buatan adalah di bawah tanggungjawab PBT manakala sistem saliran semulajadi iaitu sungai dan anak sungai adalah di bawah JPS. Pengurusan banjir kilat memerlukan kerjasama bersepadu yang merangkumi sistem perparitan dan pengurusan sungai yang melibatkan pelbagai Jabatan dan Agensi.
2. Untuk makluman, perkampungan Sabok, Lepasan dan Laut Kinarut terletak di Lembangan Sungai Kinarut. Isu kejadian banjir yang berlaku adalah berkait rapat dengan perubahan iklim di mana kesan pemanasan global menyebabkan peningkatan intensiti taburan hujan.

SOALAN NO: 22

3. Perubahan iklim dan kejadian cuaca ekstrem menyebabkan keperluan perbandaran yang melibatkan penyenggaraan sistem perparitan perlu sentiasa dipantau dan dilaksanakan. Sistem saliran yang tidak sistematik, usang, pembangunan yang pesat di kawasan bandar dan pembukaan tanah di kawasan hulu serta pengurusan sampah merupakan antara isu yang menyebabkan sistem saliran sedia ada dan semulajadi tidak berupaya untuk menampung jumlah taburan hujan.

4. Sehubungan dengan itu, KASA melalui JPS telah mengambil inisiatif proaktif untuk membantu Kerajaan Negeri dan Pihak Berkuasa Tempatan (PBT) dengan meluluskan Kajian Pelan Induk Saliran Mesra Alam (PISMA) Putatan dan Kinarut dalam RMKe-12. Kos keseluruhan kajian adalah berjumlah RM4.8 juta dan skop kajian PISMA ini merangkumi kawasan di Kampung Sabok, Kampung Lepasan dan Laut Kinarut. Tempoh kajian adalah selama 15 bulan bermula 1 Mac 2022 dan dijangka siap pada Mei 2023.

5. Objektif kajian ini adalah untuk :

- i. Untuk merangka pelan induk jangka masa panjang dalam pengurusan air larian hujan untuk mengurangkan risiko banjir.
- ii. Untuk merangka pelan induk jangka masa panjang dalam pengurusan kualiti air larian hujan menggunakan Teknologi Tersedia Terbaik (BAT) atau Amalan Pengurusan Terbaik (BMPs) untuk mengurangkan kesan pencemaran pada air / badan air.
- iii. Untuk membangunkan Inventori Aset Sistem Saliran.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN AHMAD BIN HASSAN (PAPAR)

SOALAN

TUAN AHMAD BIN HASSAN (PAPAR) minta **MENTERI PEMBANGUNAN LUAR BANDAR** menyatakan jumlah jalan raya dan lampu jalan di Kampung Sabok, Kampung Lepasan dan sekitarnya yang akan dibina dan di selenggara serta mekanisme pemantau yang diguna pakai bagi memastikan kualiti pembinaan berada di tahap yang baik.

JAWAPAN

Untuk makluman Yang Berhormat, hasil semakan pihak Kementerian Pembangunan Luar Bandar mendapati terdapat tiga (3) unit lampu jalan kampung (LJK) telah dipasang di Kampung Lepasan dalam Program Pemasangan LJK negeri Sabah tahun 2019/2020, manakala tiada pemasangan dibuat di Kampung Sabok.

Sehubungan dengan itu bagi sebarang permohonan pemasangan LJK, permohonan hendaklah dikemukakan oleh Jawatankuasa Pembangunan dan Keselamatan Kampung (JPKK) kampung-kampung berkenaan kepada Pejabat Daerah untuk diselaraskan di peringkat daerah, sebelum senarai berkenaan dikemukakan kepada Kementerian untuk semakan dan kelulusan, tertakluk kepada Garis Panduan Pelaksanaan Projek Pemasangan LJK.

SOALAN NO : 23

Semua LJK yang telah dipasang oleh Kementerian akan diserahkan kepada Pihak Berkuasa Elektrik Negeri (PBEN) iaitu Sabah Electricity Sdn. Bhd. (SESB) di Sabah untuk dioperasi dan disenggara secara berterusan. Sebarang kerosakan semasa tempoh pengoperasian, penduduk kampung boleh terus mengemukakan aduan atau laporan kepada pihak SESB untuk tindakan.

Kementerian juga sentiasa menitikberatkan prestasi pemasangan dan kualiti pembinaan yang baik sebelum penyerahan dibuat kepada PBEN dengan melaksanakan pemantauan secara bulanan sepanjang tempoh pelaksanaan projek.

Untuk makluman Yang Berhormat juga, pada masa ini tiada projek jalan luar bandar (JALB) dilaksanakan di Kampung Sabok dan Kampung Lepasan serta kawasan sekitarnya. Sekiranya terdapat keperluan bagi membina jalan di kawasan tersebut, kerjasama Yang Berhormat adalah dipohon bagi mengemukakan permohonan tersebut kepada Unit Perancang Ekonomi Negeri (UPEN) Sabah untuk dimasukkan ke dalam Senarai Keutamaan Negeri sebelum diangkat kepada Unit Perancang Ekonomi, Jabatan Perdana Menteri (UPE, JPM) untuk kelulusan di bawah *Rolling Plan* berikutnya.

Jalan-jalan luar bandar yang telah siap dibina akan didaftarkan di bawah sistem MARRIS dan diserahkan kepada kerajaan negeri untuk tujuan penyelenggaraan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : TUAN AHMAD BIN HASSAN
[PAPAR]**

SOALAN

TUAN AHMAD BIN HASSAN minta **MENTERI KESIHATAN** menyatakan status terkini ‘Projek Sakit’ Hospital Papar dan bilakah jangkaan siap yang baharu.

JAWAPAN

Tuan Yang di-Pertua,

1. Sehingga 31 Mei 2022, kemajuan projek pembinaan Hospital Papar hanya mencapai 58.94% berbanding jadual sebanyak 100%. Kelewatan sebanyak 41.06% ini adalah bersamaan dengan 340 hari. Pada masa ini pihak kontraktor sedang berusaha menyiapkan kerja dalam tempoh berdenda mulai 7 Disember 2021 iaitu selepas tamat tempoh lanjutan masa.
2. Kementerian Kesihatan Malaysia (KKM) bersama Jabatan Kerja Raya (JKR) serta agensi-agensi Kerajaan yang lain sentiasa memantau kemajuan projek ini dengan rapi bagi membolehkan ia dapat disiapkan secepat mungkin. Berdasarkan kepada prestasi semasa, projek ini dijangka boleh disiapkan pada suku ketiga 2023.
3. Sekiranya kelewatan terus berlanjutan, KKM akan mengesyorkan kepada pihak JKR untuk mengambil tindakan yang bersesuaian selaras dengan Syarat-syarat Kontrak.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN AHMAD BIN HASSAN [PAPAR]

SOALAN

TUAN AHMAD BIN HASSAN [PAPAR] minta **MENTERI SUMBER MANUSIA** menyatakan **kos keseluruhan bagi menggajikan seorang pekerja asing** (visa, tiket kapal terbang, penginapan dan lain-lain) **berbanding menggajikan seorang pekerja tempatan** dan apakah **alasan yang diberikan oleh majikan** di Malaysia yang lebih **memilih menggunakan pekerja asing**.

JAWAPAN

Tuan Yang Di-Pertua,

Kos bagi menggajikan pekerja asing mempunyai kadar yang berbeza mengikut jenis sektor mengikut kadar levi bagi Semenanjung Malaysia, Pas Lawatan (Kerja Sementara), Proses dan Visa. Terdapat tujuh sektor yang disenaraikan yakni perkilangan, pembinaan, perkhidmatan, perladangan, pertanian, perlombongan dan pengkuarian serta pembantu rumah.

Bagi sektor perkilangan, pembinaan dan perkhidmatan kadar levi adalah berjumlah RM1,850.00 manakala bagi sektor perladangan, pertanian dan perlombongan & pengkuarian adalah berjumlah RM640.00. Seterusnya, kadar levi yang dicaj bagi pembantu rumah adalah sebanyak RM410.00. Sehubungan dengan itu, kadar jumlah yang sama bagi pas lawatan (kerja sementara) sebanyak RM60.00 manakala kadar jumlah proses adalah RM125.00. Namun begitu, kadar visa dan bon jaminan adalah berbeza mengikut setiap warganegara yang terdiri daripada variasi negara.

Justeru, levi bagi pekerja asing perlu ditanggung sepenuhnya oleh majikan mulai 1 Januari 2018 dan bermula pada 1 Oktober 2018, tempoh penggajian pekerja asing boleh dilanjutkan selepas tahun ke-10 selama tiga (3) tahun. Dalam memorandum persefahaman (MoU) antara Malaysia dengan negara

sumber majikan wajib menanggung semua kos dokumentasi selepas ketibaan di Malaysia termasuk kos levi, visa, pemeriksaan perubatan dan ujian Covid-19, jaminan insurans kesihatan, kos kuarantin dan tambang penerangan.

Pengambilan pekerja asing adalah penting bagi memenuhi keperluan tenaga kerja yang kurang diminati warga tempatan terutamanya pekerjaan-pekerjaan yang melibatkan 3Ds (Dangerous, Difficult & Dirty).

Walaupun kita melihat terdapat trend untuk mengurangkan pengambilan pekerja asing, tetapi sesetengah sektor sukar untuk terus beroperasi tanpa pekerja asing. Misalnya dalam sektor perladangan, pertanian dan pembinaan. Kita juga mengetahui bahawa dalam sektor itu, minat pekerja tempatan untuk berkecimpung juga rendah. Sebaliknya, kebanyakan pekerja adalah warga asing. Sekiranya kita mengambil keputusan tidak membenarkan pekerja asing di sektor terbabit, saya percaya sektor berkenaan akan menghadapi kerumitan yang amat tinggi.

Pada hakikatnya kita tidak boleh lari daripada proses mengambil pekerja asing. Jika dilihat dari segi itu, dakwaan bahawa majikan hanya gemar untuk mengambil pekerja asing adalah tidak tepat. Kos, untuk membawa pekerja asing ke Malaysia, tidak jauh beza jika dibandingkan dengan perbelanjaan menggunakan pekerja tempatan. Kos untuk menggaji pekerja asing adalah terlalu tinggi. Dalam pengambilan pekerja asing, majikan perlu membayar kos pengangkutan, levi, dan juga terpaksa menjalankan pemeriksaan perubatan. Kos perubatan bukan sekali tetapi setiap tahun apabila majikan hendak membaharui permit kerja.

Oleh yang demikian, jika diberi pilihan majikan memang akan memberi keutamaan mengambil pekerja tempatan berbanding pekerja asing. Selain itu, proses pengambilan pekerja asing bukannya mudah. Dalam pada itu juga, majikan yang mengambil tenaga kerja asing tidak boleh bersikap lepas tangan sebaliknya perlu mempunyai kaedah pengurusan pekerja yang lebih holistik bagi memastikan tidak timbul sebarang masalah membabitkan golongan itu di negara ini.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BERTULIS

**DARIPADA : TUAN AHMAD FADHLI BIN SHAARI
[PASIR MAS]**

SOALAN

Tuan Ahmad Fadhli bin Shaari [Pasir Mas] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan perancangan Kementerian di dalam memastikan harga ayam tidak melambung tinggi sehingga membebankan rakyat.

JAWAPAN

Tuan Yang di-Pertua,

Untuk makluman Yang Berhormat, Kerajaan mempermudah proses pembayaran tuntutan subsidi harga ayam dengan membenarkan bayaran pendahuluan tuntutan khususnya penternak kecil dan sederhana.

Kerajaan telah membuat keputusan menetapkan harga siling runcit ayam standard pada kadar RM9.40 sekilogram, bagi Semenanjung Malaysia bermula 1 Julai 2022. Manakala, harga ayam di ladang ditetapkan pada RM6.00/kg dan harga ayam di pihak pemborong pada RM8.10/kg. Penetapan harga pada kadar RM9.40 sekilogram adalah harga yang telah disubsidi iaitu rakyat akan membeli pada harga yang lebih mahal jika tindakan ini tidak diambil oleh Kerajaan.

Melalui cerapan data harga mingguan Kerajaan mendapati kesan positif kerana harga sebenarnya berada di bawah harga kawalan RM9.40/kg bagi Semenanjung Malaysia. Harga purata nasional mingguan sehingga 31 Julai 2022 adalah RM8.02/kg bagi ayam bersih standard di semenanjung. Tindakan Kerajaan untuk memberi subsidi ayam ini menunjukkan kesungguhan kerajaan untuk membantu rakyat kerana ini pertama kali subsidi ayam diberikan bagi memastikan bekalan ayam pulih. Sekian terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN AHMAD FADHLI BIN SHAARI
[PASIR MAS]**

SOALAN

Tuan Ahmad Fadhli bin Shaari [Pasir Mas] minta **MENTERI KOMUNIKASI DAN MULTIMEDIA** menyatakan punca kes kebocoran data peribadi seperti yang didedahkan baru-baru ini serta langkah segera pihak Kerajaan bagi memastikan ia tidak berulang.

JAWAPAN

Tuan Yang di-Pertua,

Kementerian Komunikasi dan Multimedia Malaysia (K-KOMM) melalui Jabatan Perlindungan Data Peribadi (JPDP) bertanggungjawab mengawal selia pemprosesan data peribadi dalam transaksi komersial berdasarkan bidang kuasa yang termaktub di bawah Akta Perlindungan Data Peribadi 2010 [Akta 709]. Bagi data yang melibatkan Kerajaan Persekutuan dan Kerajaan Negeri, Agensi Keselamatan Siber Negara (NACSA) di bawah Majlis Keselamatan Negara (MKN) adalah bertanggungjawab untuk mengawal selia data-data tersebut yang merupakan Infrastruktur Maklumat Kritikal Nasional (*critical national information infrastructure - CNII*) melalui Arahan MKN 26. Dalam hal ini, insiden kebocoran data yang berunsurkan jenayah akan dirujuk kepada NACSA dan Polis Diraja Malaysia (PDRM).

Sekiranya berlaku insiden kebocoran atau penjualan data peribadi, tindakan segera akan diambil untuk menyekat penyebaran data peribadi dari berleluasa. Sebagai contoh menurunkan laman web berkenaan serta merta dan menjalankan siasatan yang lebih terperinci secara bersepada dengan agensi-agensi yang berkaitan. Insiden kebocoran data yang berunsurkan jenayah akan dirujuk kepada NACSA dan Polis Diraja Malaysia (PDRM).

K-KOMM melalui JPDP juga telah membuat cadangan pindaan Akta 709. Perkara ini adalah di dalam tindakan Jabatan Peguam Negara. Antara perkara-perkara yang akan dipinda adalah termasuk:

- (i) Mewajibkan semua pengguna data melantik *Data Protection Officer*;
- (ii) Memperkenalkan *Data Breach Notification* yang mewajibkan semua pengguna data untuk melaporkan kebocoran data kepada Pesuruhjaya JPDP dalam tempoh 72 jam; dan
- (iii) Mewajibkan *Data Processor* untuk patuh kepada prinsip keselamatan di bawah Akta 709.

Merujuk kepada isu penjualan data oleh sebuah laman web, perkara tersebut masih dalam siasatan pihak yang berkenaan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KE EMPAT BELAS**

PERTANYAAN : BUKAN LISAN (BERTULIS)

**DARIPADA : TUAN AHMAD FADHLI BIN SHAARI
(PASIR MAS)**

SOALAN

TUAN AHMAD FADHLI BIN SHAARI (PASIR MAS) minta **MENTERI PERTANIAN DAN INDUSTRI MAKANAN** menyatakan punca kenaikan mendadak harga pelbagai jenis ikan dan langkah Kementerian dalam membendung senario tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa berusaha memastikan agar harga pelbagai jenis ikan adalah stabil dan berpatutan. Antara punca-punca kenaikan harga ikan adalah:

1. Peningkatan kos operasi dan kos input ternakan;
2. Penawaran yang rendah disebabkan tangkapan bermusim dan perubahan iklim;
3. Kualiti bekalan benih dan induk tempatan yang kurang konsisten;
4. Ruang pasaran yang terhad;
5. Penggunaan vesel binaan kayu yang tidak kondusif;
6. Kekurangan kru-kru dan kebergantungan kepada kru-kru asing;
7. Isu pemilikan tanah milik Kerajaan Negeri; dan
8. Peranan orang tengah dan peniaga.

Dalam hal ini, MAFI telah melaksanakan pelbagai program dan projek bagi menangani kenaikan harga ikan melalui beberapa program seperti berikut:

1. Pasar Nelayan;
2. Pusat Pengumpulan dan Pengedaran Ikan (CCDC);
3. Program Pemasaran Ikan oleh Persatuan Nelayan;
4. Program Ikan Segar Beku (QFISH);
5. Mewujudkan program stokpail ikan segar beku Qfish LKIM; dan
6. Melaksanakan Pelan Jihad Memerangani Orang Tengah (JMOT).

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN AHMAD FADHLI BIN SHAARI
[PASIR MAS]**

SOALAN :

Tuan Ahmad Fadhli bin Shaari [Pasir Mas] minta **MENTERI PERUSAHAAN PERLADANGAN DAN KOMODITI** menyatakan langkah Kementerian dalam memastikan penurunan drastik harga minyak sawit mentah (MSM) hampir 30 peratus pada Jun 2022 tidak menjaskan pengusaha sawit di Malaysia.

JAWAPAN

Tuan Yang Di-Pertua,

- Harga pasaran minyak sawit mentah (MSM) sentiasa berubah-ubah berdasarkan kepada faktor asas dan sentimen pasaran semasa.
- Harga minyak sawit telah mula menunjukkan trend peningkatan yang ketara bermula pada pertengahan tahun 2020 dan telah beberapa kali memecahkan rekod harga tertinggi dalam sejarah industri sawit negara pada Januari 2021 hingga Mei 2022.
- Namun begitu, trend kejatuhan harga MSM telah bermula pada Jun 2022 yang mana harganya telah jatuh sebanyak 11.2% kepada RM6,106.00 satu tan berbanding RM6,873.00 satu tan pada Mei 2022.
- Harga harian MSM terus merosot ke paras terendah RM4,765.50 satu tan pada 24 Jun 2022 atau telah menurun sebanyak 29.6% daripada paras tertinggi RM6,771.00 satu tan pada 3 Jun 2022. Kejatuhan harga MSM ini telah menyebabkan harga BTS turut merosot di pasaran.

- Bagi memastikan harga MSM kekal stabil pada masa hadapan dan tidak menjelaskan pengusaha sawit di Malaysia, Kementerian telah mengambil langkah-langkah strategik seperti berikut:
 1. Meningkatkan permintaan terhadap minyak sawit dan produk berasaskan sawit melalui pengukuhan pasaran sedia ada seperti di Pakistan, Turki, negara-negara ASEAN dan sebagainya dan penerokaan pasaran baharu seperti ke Benua Afrika, negara Timur Tengah dan Benua Amerika;
 2. Memperkuuh kerjasama strategik bersama Indonesia menerusi Majlis Negara-Negara Pengeluar Minyak Sawit (*Council of Palm Oil Producing Countries* atau CPOPC) bagi memantapkan lagi amalan persekitaran mampan, pengurusan bekalan, aktiviti promosi dan pembangunan pekebun-pekebun kecil. Selain itu, kerjasama ini membolehkan perancangan dan pelaksanaan pelbagai aktiviti untuk memperkuuhkan harga; dan
 3. Pelaksanaan secara mandatori Skim Pensijilan Minyak Sawit Mampan Malaysia (MSPO). Pensijilan ini memberi penekanan dalam mempraktikkan amalan pertanian baik (GAP), penjagaan keselamatan dan kesihatan pekerja, pematuhan undang-undang serta melindungi alam sekitar. Ia bagi memastikan minyak sawit terus berdaya saing dari segi tahap kualiti dan kelestarian dengan minyak sayuran lain dunia.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : YB TUAN AHMAD FAHMI BIN MOHAMED
FADZIL
[LEMBAH PANTAI]

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KEWANGAN** menyatakan adakah Kerajaan bercadang untuk menaikkan lagi kadar Bantuan Keluarga Malaysia (BKM) setelah diumumkan kenaikan pada bulan Jun 2022 yang lepas ekoran kenaikan harga barang dan kos sara hidup pada hari ini.

JAWAPAN

Tuan Yang di-Pertua,

Untuk makluman Yang Berhormat, **Bantuan Keluarga Malaysia (atau BKM)** merupakan inisiatif **bantuan tunai langsung** yang diumumkan di dalam Bajet 2022 bagi membantu mereka yang memerlukan untuk bangun semula dalam pasca-pandemik dan meringankan beban kos sara hidup. Setakat ini, **8.6 juta penerima BKM** telah diluluskan dengan isi rumah bakal menerima sehingga 2,600 ringgit sekeluarga pada tahun 2022. Seperti mana diumumkan YAB Perdana Menteri baru-baru ini, **BKM Fasa 2 telah ditambah baik dengan Bantuan Tunai Tambahan bernilai 630 juta ringgit, dengan jumlah peruntukan keseluruhan BKM sebanyak 8 bilion ringgit.** Ia juga membuktikan keprihatinan Kerajaan terhadap golongan yang memerlukan dan seterusnya memberi impak yang tinggi kepada rakyat serta merancakkan ekonomi melalui aktiviti perbelanjaan.

BKM merupakan bantuan tunai langsung tertinggi dalam sejarah. Sebagai perbandingan, kadar maksimum BKM adalah 2,600 ringgit berbanding Bantuan Rakyat 1 Malaysia (atau BR1M) sebanyak 1,200 ringgit dan Bantuan Sara Hidup (atau BSH) sebanyak 1,480 ringgit. Ini adalah peningkatan bantuan sebanyak 120 peratus sejak inisiatif bantuan tunai langsung mula diperkenalkan. Di samping itu, jumlah **penerima BKM adalah 8.6 juta berbanding BSH dengan 4.5 juta penerima sahaja.** Peningkatan ini adalah kerana **had kelayakan untuk menerima BKM telah dinaikkan daripada berpendapatan 4,000 ringgit ke bawah sebulan untuk BSH kepada 5,000 ringgit ke bawah sebulan untuk BKM.** Ini bermakna **lebih ramai Keluarga Malaysia layak** untuk menerima bantuan, termasuklah sebahagian M40 dan bukan terhad kepada golongan B40 sahaja seperti untuk inisiatif bantuan tunai langsung sebelum ini.

Lazimnya, BKM dikenali sebagai bantuan kepada golongan B40, namun hakikatnya BKM kini memanfaatkan hampir 12 juta individu, iaitu bersamaan dengan 60 peratus daripada rakyat dewasa di Malaysia.

NO SOALAN :30

Kementerian Kewangan akan terus memantau faktor-faktor luaran yang boleh memberi impak negatif kepada situasi ekonomi domestik. Pada masa yang sama, Kerajaan komited untuk melindungi isirumah daripada kesan penuh kenaikan harga komoditi dan makanan global. Dengan itu, Kerajaan akan menyemak secara berkala kesesuaian kadar subsidi dan bantuan kepada rakyat demi memastikan kos sara hidup rakyat terkawal.

Kerajaan juga sentiasa meneliti perkembangan ekonomi dan yakinlah bahawa dasar Kerajaan, baik dari segi bantuan langsung maupun yang tidak langsung seperti subsidi keperluan asas, adalah bertujuan memastikan kebajikan rakyat sentiasa terbela.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN AHMAD FAHMI B. MOHAMED
FADZIL (LEMBAH PANTAI)**

SOALAN

TUAN AHMAD FAHMI BIN MOHAMED FADZIL (LEMBAH PANTAI)
minta **MENTERI DALAM NEGERI** menyatakan bilangan mangsa scam
dari 2017 hingga kini mengikuti pecahan ikut umur, jantina dan kawasan
Parlimen.

JAWAPAN

Tuan Yang Di Pertua,

Bilangan jumlah kes *scam* yang dilaporkan di seluruh negara bagi tahun 2017 hingga Jun 2022 adalah sebanyak 89,798 kes melibatkan kerugian bernilai RM2,971,534,364.74. Pecahan mangsa yang paling tinggi dalam kes jenayah penipuan atas talian ini adalah terdiri daripada mangsa yang berusia dalam lingkungan umur 21 hingga 40 tahun iaitu sebanyak 54,774 orang, diikuti berumur 41 hingga 60 tahun seramai 23,890, umur bawah 20 tahun seramai 7,181 orang dan umur 61 ke atas seramai 3,953 orang. Jumlah kes mengikut jantina pula melibatkan mangsa lelaki seramai 45,040 orang dan mangsa perempuan 43,832 orang.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN AHMAD FAHMI BIN MOHAMED
FADZIL (LEMBAH PANTAI)**

SOALAN

TUAN AHMAD FAHMI BIN MOHAMED FADZIL (LEMBAH PANTAI)
minta **MENTERI DALAM NEGERI** menyatakan bilangan kanak-kanak (18 tahun dan ke bawah) di Pusat Tahanan Imigresen atau Depot Imigresen di semua negeri mengikut pecahan warganegara dari tahun 2020 sehingga kini.

JAWAPAN

Tuan Yang Di Pertua,

Untuk makluman Ahli Yang Berhormat, sepanjang tahun 2020 seramai 728 orang kanak-kanak berada di depot-depot imigresen meliputi 332 orang warganegara Myanmar, 192 orang warganegara Indonesia, 70 orang warganegara Filipina, 33 orang warganegara Vietnam, 29 orang warganegara Thailand dan 72 orang lain-lain warganegara.

Bagi tahun 2021 pula, seramai 1,923 orang kanak-kanak berada di depot-depot imigresen seluruh negara meliputi 657 orang warganegara Filipina, 498 orang warganegara Myanmar, 424 orang warganegara Indonesia, 60 orang warganegara Thailand, 47 orang warganegara Vietnam dan 237 orang lain-lain warganegara.

Manakala jumlah tahanan kanak-kanak di semua depot imigresen di seluruh negara sehingga 5 Julai 2022 adalah seramai 1,452 orang kanak-kanak. Jumlah kanak-kanak ini terdiri daripada 644 orang warganegara Myanmar, 384 orang warganegara Indonesia, 243 orang warganegara Filipina, 80 orang warganegara Thailand, 19 orang warganegara Vietnam dan lain-lain warganegara seramai 82 orang.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

SOALAN

Minta **MENTERI PENGAJIAN TINGGI** menyatakan jumlah graduan IPTA dan IPTS sejak 2018 yang berjaya peroleh pekerjaan, yang dalam pekerjaan tenaga tidak penuh (*underemployment*), yang menganggur dan tidak bekerja dan jumlah hutang pendidikan yang ditanggung graduan-graduan tersebut mengikut kategori-kategori di atas.

JAWAPAN

Tan Sri Yang di-Pertua,

Setiap tahun Kementerian Pengajian Tinggi (KPT) akan melaksanakan Kajian Pengesahan Graduan (SKPG) bagi mengetahui status pekerjaan terkini graduan. Pada tahun 2021, seramai 216,600 graduan (warganegara) di universiti awam (UA) dan Institut Pendidikan Tinggi Swasta (IPTS) telah memberikan respons dalam kajian ini.

Secara keseluruhannya, kadar kebolehpasaran graduan bagi UA dan IPTS adalah sebanyak 84.8% pada tahun 2021, iaitu meningkat 1.3 peratus berbanding 83.5% pada tahun 2020.

Daripada jumlah responden yang terlibat, seramai 130,634 graduan (60.3%) telah bekerja dengan pecahan seramai 90,033 graduan (69.8%) bekerja sebagai pekerja mahir, 34,673 graduan (26.9%) separuh mahir dan 4,349 graduan (3.4%) berkemahiran rendah. Baki 39,867 graduan (18.4%) sedang melanjutkan pengajian; 4,743 graduan (2.2%) sedang berusaha meningkatkan kemahiran; 8,370 graduan (3.9%) sedang menunggu penempatan pekerjaan; dan 32,986 graduan (15.2%) masih belum bekerja.

Data SKPG menunjukkan daripada 216,600 responden, seramai 115,324 ialah peminjam PTPTN dengan jumlah baki pinjaman keseluruhannya sebanyak RM1.35 bilion.

Dalam hal ini, KPT sentiasa komited untuk membantu para graduan agar dapat diserap oleh industri untuk bekerja sebaik sahaja mereka menamatkan pengajian. Antara inisiatif yang dilaksanakan termasuklah:

i. **Melaksanakan program *reskilling* dan *upskilling* PENJANA KPT-CAP**

Sepanjang inisiatif ini dilaksanakan sehingga Jun 2022, sejumlah 31,100 orang graduan menganggur telah berjaya ditempatkan di industri atau menjana pendapatan.

- ii. **Melaksanakan Program Intervensi Kebolehpasaran Graduan (GE)**
Daripada tahun 2020 hingga Jun 2022, sejumlah 2,196 graduan telah berjaya ditempatkan di industri.
- iii. **Melaksanakan padanan pekerjaan melalui Portal MyFUTUREJobs dengan kerjasama PERKESO**
Sehingga Jun 2022, seramai 171,698 graduan telah berjaya ditempatkan di industri melalui inisiatif yang dilaksanakan ini.
- iv. **Melaksanakan Program *MOHE@Intel Elite Internship***
Sehingga kini, seramai 338 orang pelajar telah menyertai program ini. 263 daripadanya telah diserap dan menerima penempatan pekerjaan di syarikat tersebut.
- v. **Memperkuuh agenda keusahawanan atau *Job Creator* di IPT menerusi Pelan Tindakan Keusahawanan IPT 2021 – 2025**
Sehingga Disember 2021, sejumlah 9,131 usahawan telah dilahirkan dalam kalangan graduan selepas mereka menamatkan pengajian.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN AHMAD FAHMI BIN MOHAMED FADZIL [LEMBAH PANTAI]

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KOMUNIKASI DAN MULTIMEDIA** menyatakan senarai semua kejadian pencerobohan, kecurian atau ketirisan data yang berlaku di Malaysia dari 2017 hingga ke hari ini serta status siasatan ataupun tindakan undang-undang yang telah diambil terhadap pesalah-pesalah tersebut.

JAWAPAN

Tuan Yang di-Pertua,

Pada 2017, terdapat sembilan kes yang telah di kompaun bagi pelanggaran peruntukan di bawah Akta 709 berjumlah RM155,000. Sebahagian besar kesalahan iaitu 77.8% adalah pelanggaran Seksyen 16, bagi kesalahan memproses data peribadi tanpa suatu perakuan pendaftaran.

Terdapat dua kes yang melibatkan pelanggaran seksyen 9 iaitu prinsip keselamatan, bagi kegagalan mengambil langkah praktikal untuk melindungi data peribadi yang diproses daripada hilang, salah guna, ubah suai, akses atau penzahiran tanpa kebenaran atau tidak sengaja atau kemusnahan. Sekiranya disabitkan, pengguna data boleh didenda tidak melebihi RM300,000 atau dipenjarakan selama tempoh tidak melebihi dua tahun atau kedua-duanya.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN
DARIPADA : TUAN AHMAD FAHMI BIN MOHAMED FADZIL [LEMBAH PANTAI]

SOALAN

TUAN AHMAD FAHMI BIN MOHAMED FADZIL [LEMBAH PANTAI]
minta **MENTERI KOMUNIKASI DAN MULTIMEDIA** menyatakan peratus capaian 3G, 4G, 5G serta internet jalur lebar mengikut bahagian Parlimen.

JAWAPAN

Tuan Yang di-Pertua,

Liputan 3G telah ditamatkan bermula tahun 2020, manakala liputan 4G di kawasan berpenduduk di seluruh negara setakat suku pertama 2022 adalah sebanyak 95.7%.

Untuk makluman Ahli Yang Berhormat juga, ketersediaan rangkaian 5G yang dibangunkan oleh Digital Nasional Berhad (DNB) telah dicapai secara berperingkat bermula pada Disember 2021 di Putrajaya, Cyberjaya dan Kuala Lumpur.

Peluasan 5G diteruskan dalam tahun 2022 dengan sasaran 36% liputan di kawasan berpenduduk dan melibatkan penyediaan kira-kira 4,000 tapak 5G. Kawasan yang terlibat adalah kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak. Peluasan ke tempat-tempat lain akan dilaksanakan pada tahun berikutnya, dengan sasaran utama 80% liputan di kawasan berpenduduk pada penghujung tahun 2024.

Sehingga 4 Julai 2022, sebanyak 1,506 tapak telah siap dibangunkan dan liputan 5G telah mencapai 27% kawasan berpenduduk di seluruh negara. Jumlah langganan perkhidmatan 5G juga dianggarkan telah mencecah 250,000 langganan.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT, MESYUARAT KEDUA PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK HAJI AHMAD JAZLAN BIN
YAAKUB [MACHANG]**

SOALAN

YB DATUK HAJI AHMAD JAZLAN BIN YAAKUB [MACHANG] minta **MENTERI PERUMAHAN DAN KERAJAAN TEMPATAN** menyatakan apakah tindakan yang telah dilaksanakan Kementerian bagi memastikan pengurusan sisa pepejal dan sampah domestik di negeri Kelantan lebih terancang dan efektif.

JAWAPAN

Tuan Yang di-Pertua,

Untuk makluman Ahli Yang Berhormat, buat masa ini, negeri Kelantan tidak menerima pakai Akta Pengurusan Sisa Pepejal dan Pembersihan Awam 2007 (Akta 672). Oleh yang demikian, perkhidmatan pengurusan sisa pepejal dan pembersihan awam di negeri Kelantan adalah tertakluk di bawah seliaan Pihak Berkuasa Tempatan (PBT) yang berkaitan.

Kerajaan Negeri Kelantan amat menumpukan usaha-usaha ke arah pengurusan sisa pepejal dan sampah domestik yang lebih terancang dan efisien. Melalui Kempen Kelantanku Bersih yang secara rasminya dilancarkan pada 25 April 2019, Kerajaan Negeri telah menunjukkan komitmen dalam memastikan tahap kebersihan di negeri Kelantan dapat dipertingkatkan.

Kerajaan Negeri juga telah memberi bantuan kewangan kepada PBT untuk membeli lori sampah dan jentera-jentera kebersihan yang lain pada tahun 2020 dan telah diteruskan pada tahun 2022. Kerajaan Negeri akan terus membantu dari semasa ke semasa untuk menambah jentera kebersihan di bawah Kempen Kelantanku Bersih. Melalui Kempen Kelantanku Bersih juga, Kerajaan Negeri Kelantan telah menyalurkan bantuan kewangan secara berterusan kepada PBT bagi tujuan penambahbaikan pengurusan kebersihan di kawasan masing-masing. Pada tahun 2021, Kerajaan Negeri telah memperuntukkan bantuan kewangan untuk pembelian tong sampah Roll on Roll Off (RORO) dan tong sampah kompaktor sebagai tambahan aset kebersihan di setiap PBT. Langkah ini juga diteruskan pada tahun 2022.

Selain itu, Kerajaan Negeri Kelantan juga telah melaksanakan penswastaan kutipan sisa pepejal. Pada tahun 2021, Kerajaan Negeri telah meluluskan sejumlah peruntukan untuk penswastaan kutipan sisa pepejal di sebahagian Zon A Majlis Perbandaran Kota Bharu – Bandar Raya Islam (MPKB-BRI). Berikut hasil yang positif daripada pelaksanaan penswastaan

kutipan sisa pepejal di MPKB-BRI, penswastaan telah diperluaskan kepada laluan-laluan utama di sekitar Majlis Daerah Ketereh – Perbandaran Islam, Majlis Daerah Pasir Puteh, Majlis Daerah Pasir Mas dan Majlis Daerah Machang pada tahun 2022.

Kerajaan Negeri juga telah memberi perhatian yang sewajarnya untuk menaik taraf tapak pelupusan sisa pepejal di sekitar negeri Kelantan. Usaha-usaha daripada Kerajaan Negeri akan diteruskan agar pengurusan sisa pepejal yang lebih efisien dengan merangka pelbagai strategi untuk meningkatkan tahap kebersihan di negeri Kelantan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK HAJI AHMAD JAZLAN BIN YAAKUB
[MACHANG]**

SOALAN

DATUK HAJI AHMAD JAZLAN BIN YAAKUB [MACHANG] minta **MENTERI ALAM SEKITAR DAN AIR** menyatakan apakah status perancangan projek Takungan Air Pinggiran Sungai (TAPS) di Kelantan yang pernah dicadangkan sebelum ini.

JAWAPAN

Tuan Yang Di-Pertua,

1. Untuk makluman Ahli Yang Berhormat, Kementerian telah mengemukakan permohonan bagi pembinaan Takungan Air Pinggiran Sungai (TAPS) Machang berkapasiti 500 juta liter sehari (JLH) di bawah *Rolling Plan* Ketiga Rancangan Malaysia ke-12 (RP3 RMKe-12) dengan anggaran kos projek bernilai RM650,000,000.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BERTULIS

**DARIPADA : DATO' HAJI AHMAD NAZLAN BIN IDRIS
[JERANTUT]**

SOALAN

Datuk Haji Ahmad Jazlan bin Yaakub [Machang] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah solusi yang telah berjaya dicapai dengan penubuhan Pasukan Khas Jihad Tangani Inflasi. Dan adakah pasukan yang ditubuhkan ini melibatkan sebarang pembayaran dana atau elaun.

JAWAPAN

Tuan Yang di-Pertua,

Kerajaan juga telah menubuhkan satu Pasukan Khas Jihad Tangani Inflasi yang diketuai oleh Menteri Komunikasi dan Multimedia dan diurus setia oleh Kementerian Perdagangan Dalam Negeri dan Hal Ehwal Pengguna (KPDNHEP) bagi memastikan Keluarga Malaysia tidak terkesan dengan serius akibat daripada kenaikan inflasi di seluruh dunia.

Berperanan melihat dan mencari kaedah terbaik untuk mengurangkan kesan kos sara hidup kepada rakyat Majlis Tindakan Sara Hidup Negara (NACCOL) memandang senario ini merupakan isu global.

Memandangkan jumlah subsidi yang ditanggung kerajaan adalah amat besar, kerajaan mula melihat pendekatan alternatif bagi menangani isu kenaikan harga barang yang tidak melibatkan pemberian subsidi. Pada 1 Ogos 2022, Mesyuarat Pasukan Khas Jihad Menangani Inflasi telah memutuskan bahawa mekanisme penetapan harga siling minyak masak botol tidak bersubsidi ditentukan secara bulanan untuk seluruh

Malaysia mengikut harga purata minyak sawit mentah (CPO) bagi satu tan metrik di pasaran dunia pada bulan sebelumnya. Harga siling minyak sawit botol untuk Sabah, Sarawak dan Labuan ditetapkan pada paras sama seperti di Semenanjung dan berkuatkuasa pada 8 Ogos 2022 ini. Harga siling minyak masak tidak bersubsidi kemasan botol adalah seperti berikut:

- (a) 1kg iaitu RM7.70;
- (b) 2kg iaitu RM14.70;
- (c) 3kg iaitu RM 21.70; dan
- (d) 5kg iaitu RM 34.70.

Kerajaan juga memperkenalkan Program Jualan Keluarga Malaysia (PJKM) yang merupakan inisiatif Kerajaan dalam membantu meringankan beban rakyat terutamanya golongan berpendapatan rendah dengan membekalkan barang keperluan harian pada harga yang lebih rendah sehingga 20% daripada harga pasaran semasa setempat. Program ini mendapat sambutan yang amat baik bukan sahaja daripada rakyat tetapi juga di kalangan Ahli Parlimen. Kesemua 222 kawasan Parlimen terlibat tanpa mengira status kawasan Parlimen tersebut. Justeru, kerajaan sedang memperinci pelaksanaan PJKM untuk diperhebat dan diperluaskan kepada lebih 600 kawasan Dewan Undangan Negeri (DUN).

Penubuhan Pasukan Khas Jihad Tangani Inflasi adalah untuk membantu Keluarga Malaysia menghadapi cabaran peningkatan kos sara hidup dan menyelesaikan isu-isu berkaitan inflasi khususnya mengawal kenaikan harga barang dengan lebih efisien dan berkesan. Tiada elaun diperuntukkan kepada ahli mesyuarat kerana mereka berkhidmat sepenuhnya demi negara; dan

Pasukan ini amat aktif dan telah bersidang sebanyak 8 kali semenjak penubuhannya pada 29 Jun 2022.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

DARIPADA : DATUK HAJI AHMAD JAZLAN BIN YAAKUB [MACHANG]

SOALAN

DATUK HAJI AHMAD JAZLAN BIN YAAKUB [MACHANG] minta **PERDANA MENTERI** menyatakan daripada 14,306 iaitu 45 peratus kuota haji Malaysia yang diluluskan oleh Arab Saudi, jelaskan pecahan jumlah jemaah haji mengikut kategori Muassasah, Paket dan Furada.

JAWAPAN :

**YB SENATOR DATUK HAJI IDRIS HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang Di-Pertua,

1. Untuk makluman Ahli Yang Berhormat, kesemua 14,306 visa haji tahun 2022 ini adalah kuota rasmi Malaysia dan tidak termasuk visa furada. Semua jemaah haji yang terpilih diberi pilihan untuk menunaikan haji samada secara Muassasah atau secara paket.
2. Bagi musim haji 1443 Hijrah, daripada 14,306 visa haji sejumlah 80 peratus adalah jemaah haji Muassasah yang dikendalikan oleh Tabung Haji dan baki 20 peratus adalah jemaah haji paket di bawah syarikat-syarikat agensi pelancongan swasta yang dilesenkan oleh Tabung Haji.

NO. SOALAN : 39

3. Visa furada bukan di bawah seliaan, pantauan dan kawalan Tabung Haji dan Menteri di Jabatan Perdana Menteri (Hal Ehwal Agama). Visa furada ini adalah pemberian terus daripada Kerajaan Arab Saudi kepada agensi dan individu yang dipilih dan tidak termasuk dalam kuota rasmi haji yang diberikan kepada negara Malaysia melalui Tabung Haji.

Sekian, terima kasih.

SOALAN NO : 40

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DATUK HAJI AHMAD JAZLAN BIN YAAKUB (MACHANG)

SOALAN

DATUK HAJI AHMAD JAZLAN BIN YAAKUB (MACHANG) minta **MENTERI PEMBANGUNAN LUAR BANDAR** menyatakan apakah keputusan kenaikan gaji pembantu Tadika KEMAS yang telah sekian lama dikaji, April lalu Kementerian mengatakan bahawa kertas kerja untuk menaikkan kadar gaji pembantu tadika dari RM500 mengikut kadar gaji minimum telah berada di fasa akhir dan bakal diumumkan dalam masa terdekat.

JAWAPAN

Untuk makluman Yang Berhormat, cadangan untuk menaikkan bayaran elauan saguhati kepada Pembantu Pemaju Masyarakat Sukarela (PPMS) daripada RM500 sebulan kepada RM800 sebulan, iaitu kenaikan sebanyak RM300 sebulan telah pun dikemukakan kepada Kementerian Kewangan pada 27 Jun 2022. Cadangan ini masih dalam kajian dan tindakan pihak Kementerian Kewangan. Apabila diputuskan kelak, Kementerian Pembangunan Luar Bandar akan mengumumkan keputusan tersebut.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA,
PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)
DARIPADA : DATO' HAJI AHMAD NAZLAN BIN
IDRIS [JERANTUT]

SOALAN

minta **MENTERI SAINS, TEKNOLOGI DAN INOVASI** menyatakan bentuk kerjasama yang dilaksanakan dengan Kementerian Pertanian dan Industri Makanan dan badan-badan yang berkaitan dalam usaha mencari solusi yang inovatif dan berkesan untuk jaminan makanan rakyat Malaysia memandangkan kebimbangan terputus bekalan daging segar serta kenaikan kos makanan yang semakin meruncing.

JAWAPAN

1. Dalam usaha mencari solusi yang inovatif dan berkesan untuk jaminan makanan rakyat Malaysia, Kementerian Sains, Teknologi dan Inovasi (MOSTI) sebagai Kementerian peneraju agenda STI negara, akan sentiasa mengutamakan penggunaan dan pengadaptasian teknologi seterusnya bekerjasama dengan pelbagai pihak termasuk Kementerian Pertanian dan Industri Makanan (MAFI).
2. Setakat kini, MOSTI sedang giat bekerjasama dengan pihak Kementerian Pertanian dan Industri Makanan (MAFI) untuk mencari penyelesaian yang inovatif berkaitan isu sekuriti makanan negara. Di peringkat permulaan, MOSTI telah mengenal pasti sebanyak 46 penyelesaian teknologi dan 27 daripada jumlah tersebut adalah tersedia untuk dilaksanakan segera (*roll-out*) dalam membantu menangani isu sekuriti makanan.

3. Senarai tersebut telah dibahagikan kepada beberapa kluster iaitu:

- (i) biji benih;
- (ii) biobaja dan baja penggalak;
- (iii) perkhidmatan ujian dan aplikasi;
- (iv) penggunaan dron dan robotik;
- (v) kebun komuniti;
- (vi) akuakultur; dan
- (vii) makanan ternakan.

4. Seterusnya, suka untuk saya kongsikan di sini bahawa terdapat sekurang-kurangnya **tujuh (7) buah agensi** di bawah MOSTI dengan kerjasama pelbagai pihak terutamanya Kementerian Pertanian dan Industri Makanan (MAFI), telah berjaya menghasilkan produk atau kaedah penyelesaian berlandaskan teknologi berhubung isu sekuriti makanan negara.

AGENSI PERTAMA: NANOMALAYSIA BERHAD

Di bawah agensi ini terdapat tiga (3) projek utama yang berjaya dilaksanakan iaitu:

- (i) **Penggunaan automasi sistem fertigasi, pertanian menegak (*vertical farming*) dan akuaponik;**

Program ini telah dilaksanakan di bawah program REVOLUTIoNT yang mana menggandingkan bersama aplikasi internet pelbagai benda nano (IoNT) yang mampu beroperasi di kawasan terpencil dan mengurangkan kos operasi melalui penggunaan Panel Tenaga Suria Nano (NLEP).

Penggunaan teknologi ini boleh digunakan bagi pelbagai jenis tanaman hijau berdasarkan kesesuaian kawasan dan keperluan pasaran, menggandingkan bersama aplikasi internet pelbagai benda nano (IoNT).

Contoh kejayaan projek ini adalah seperti program pertanian akuaponik inovatif yang telah dilaksanakan di Manong, Perak

iaitu Floraponic Farm Malaysia (FFM). Projek ini juga telah mendapat kerjasama pihak Lembaga Pemasaran Pertanian Persekutuan (FAMA).

(ii) Penternakan Burung Walit Pintar (*Smart Swiftlet Farming*); dan

Dalam penternakan burung walit pintar, konsep penggunaan sel suria yang berasaskan nanoteknologi iaitu Panel Tenaga Suria Nano (NLEP) telah direplikasikan.

Hal ini bagi membolehkan penjanaan tenaga di kawasan *off grid* dan sistem pemantauan di habitat burung walit melalui penderia-penderia nano (nano-sensor) dengan sensitiviti yang tinggi boleh dilaksanakan seterusnya data yang diperlukan boleh dikumpul dengan tepat dan dianalisa untuk mengoptimumkan pengeluaran sarang burung.

Melalui penggunaan Panel Tenaga Suria Nano (NLEP), kos operasi mampu dikurangkan di mana tenaga solar dikumpulkan sebagai sumber tenaga utama selain daripada sumber tenaga berasaskan bahan api fosil daripada grid nasional sekali gus memberikan lebih fleksibiliti untuk beroperasi di kawasan terpencil.

Sistem ini juga membolehkan pemantauan berterusan dilakukan tanpa memerlukan lawatan tapak sepetimana kaedah konvensional sebelum ini yang memerlukan pengendali memasuki rumah burung tersebut secara fizikal.

Untuk makluman, projek ini telah diasaskan oleh SS Walit Care yang bertujuan untuk memasarkan sarang burung yang boleh dimakan (Edible Bird's Nest) atau lebih dikenali sebagai Yan Wo di kalangan masyarakat Cina.

SOALAN NO : 41

SS Walit Care terletak di Kg. Masjid Hiliran, Kuala Terengganu dan telah menghasilkan lebih daripada 50 buah unit rumah burung di sekitar negeri Terengganu sejak tahun 2010.

Pada tahun 2019 sahaja, jumlah eksport industri burung walit dalam negara adalah sebanyak 5,654 tan metrik dengan nilai eksport sebanyak RM1.154 bilion, manakala pada tahun 2020, jumlah eksport adalah sebanyak 3,640 tan metrik dan bernilai eksport sebanyak RM1.385 bilion.

(iii) Baja yang berdasarkan teknologi nano (*nanofertiliser*)

Produk baja yang berdasarkan teknologi nano (*Nanofertiliser*) ini membolehkan pelepasan nutrien secara terkawal dan mengurangkan penggunaan baja.

Baja nano yang mempunyai saiz rongga nano ini diperbuat daripada bahan yang bersifat pemangkin (catalyst) dalam proses tindakbalas fizikal dan kimia dalam tanah.

Kelebihan baja nano ini di antaranya adalah ia membolehkan pelepasan nutrien secara terkawal sehingga 45% berbanding baja kimia konvensyenal.

Baja nano mampu untuk menyimpan nutrien baja sehingga 60 hari sekaligus meningkatkan hasil tanaman sehingga 30%.

AGENSI KEDUA: AGENSI NUKLEAR MALAYSIA

Di bawah agensi ini terdapat dua (2) projek utama yang berjaya dilaksanakan iaitu:

(i) Benih Padi IS21;

Projek ini telah dilaksanakan dengan kerjasama pihak Kementerian Pertanian dan Industri Makanan (MAFI). Varieti benih baharu tanaman seperti Benih Padi IS21 ini, dihasilkan melalui teknologi

nuklear yang mana terbukti mampu meningkatkan produktiviti pertanian.

Benih Padi IS21 mempunyai ciri-ciri agronomi yang sangat diperlukan dalam industri padi negara. Varieti baharu ini juga telah diperakukan oleh Jawatankuasa Bantuan Kerajaan Kepada Industri Padi dan Beras (JKBKKIPB), Kementerian Pertanian dan Industri Makanan (MAFI) sebagai benih padi sah dan boleh digunakan oleh petani dibawah skim subsidi Kerajaan.

Benih Padi IS21 juga mampu mengeluarkan hasil tanaman sehingga sepuluh (10) tan sehektar jika diurus dengan baik mengikut garis panduan yang disyorkan. Penemuan ini dapat membantu usaha untuk meningkatkan pengeluaran sara diri atau SSL (*Self-Sufficiency Level*) padi negara.

Sehingga suku kedua 2022, sebanyak 2000 metrik tan Benih Padi IS21 berbanding sasaran sebanyak 4700 metrik telah berjaya diagihkan kepada seramai 7300 pesawah tan daripada seramai 14,000 pesawah padi dari kumpulan isi rumah B40 bagi tahun 2022.

Kini, selaras dengan arahan YAB Perdana Menteri, Agensi Nuklear Malaysia sedang mengkaji varieti padi baharu yang toleran terhadap perubahan iklim seperti banjir dan kemarau. Usaha R&D ini masih dalam pelaksanaan bersama para penyelidik daripada universiti dan agensi Kerajaan yang lain.

(ii) Produk biobaja dan baja penggalak oligokitosan.

Produk ini telah dikomersialkan dan berupaya meningkatkan kecekapan penggunaan baja dalam keseluruhan rantaian tanaman. Selain itu, ia juga boleh:

- (i) menjimatkan sehingga 50% kos baja tanaman;
- (ii) meningkatkan 8% hingga 12% keseluruhan hasil tanaman; dan
- (iii) meningkatkan 20% hingga 35% penjanaan pendapatan pertanian.

Salah satu produk biobaja ini iaitu Bioliquifert telah dijadikan sebagai biobaja subsidi bagi empat (4) zon penanaman padi di Malaysia.

Inisiatif ini melibatkan pembekalan sebanyak 770,000 liter Bioliquifert kepada pesawah di Kedah, Perlis dan Perak melalui Skim Insentif Pengeluaran Padi (SIPP) yang diselaraskan oleh Kementerian Pertanian dan Industri Makanan (MAFI).

AGENSI KETIGA: AGENSI ANGKASA MALAYSIA

Di bawah agensi ini telah dibangunkan Sistem Maklumat Geospatial Tanaman Padi (MakGeoPadi).

Sistem ini telah dibangunkan secara kerjasama dengan Kementerian Pertanian dan Industri Makanan (MAFI) melalui Jabatan Pertanian (DOA).

Sistem ini merupakan satu sistem aplikasi berteraskan teknologi angkasa khususnya teknologi remote sensing dan Sistem Penentudukan Global (GNSS) serta teknologi berkaitan iaitu Sistem Maklumat Geografi (GIS) dan teknologi maklumat dan komunikasi (ICT).

Hasil kajian keberkesanan pengoperasian Sistem MakGeoPadi ini mendapati bahawa sistem ini boleh diakses secara dalam talian oleh agensi pertanian dan 12 pihak berkuasa jelapang padi.

Ia juga membolehkan:

- Pemantauan 100% keseluruhan jelapang padi;
- Penjimatan masa turun ke lapangan sebanyak 57%;
- Penjimatan subsidi Kerajaan sehingga 10%; dan
- Memanfaatkan 192,663 pesawah di seluruh Malaysia.

AGENSI KEEMPAT: YAYASAN INOVASI MALAYSIA

Di bawah agensi ini, antara produk yang berjaya ialah Pakej Penanaman Cendawan Berasaskan Sisa Pertanian Secara Komersial Melalui Teknologi Silaj dan Oligokitosan.

Projek ini telah dilaksanakan dengan kerjasama pihak Institut Penyelidikan dan Kemajuan Pertanian Malaysia (MARDI) dan Agensi Nuklear Malaysia.

Projek ini telah menggunakan dana MyIS Komuniti dan terbukti telah menghasilkan kesan berganda kepada peserta melalui pemindahan teknologi & pengetahuan.

Untuk makluman, penerima teknologi dan pengendali perniagaan cendawan melalui koperasi ini telah berjaya menghasilkan pulangan pelaburan lebih RM3 juta atau 6 kali kesan berganda di komuniti setempat selepas 3 tahun beroperasi.

Bagi teknologi silaj dan oligokitosan pula sebanyak 140 orang penerima daripada Koperasi Asas Tani Kedah di Kampung Pering, Jerlun, Kedah telah berjaya menghasilkan produk silaj daripada 20 tan sehingga 100 tan sebulan. Maklumat ini membuktikan bahawa projek ini berjaya meningkatkan pendapatan komuniti penternak dan petani yang terlibat.

AGENSI KELIMA: AGRO-BIOTECHNOLOGY INSTITUTE, NATIONAL INSTITUTES OF BIOTECHNOLOGY MALAYSIA (ABI-NIBM)

Di bawah agensi ini, antara produk yang berjaya dibangunkan ialah penghasilan benih rumpai laut merah *Kappaphycus alvarezii* menggunakan kaedah kultur tisu.

Projek ini telah dilaksanakan bersama pihak Jabatan Perikanan Malaysia (DOF), Cawangan Langkawi. Rumpai laut merah spesis *Kappaphycus alvarezii* hanya boleh didapati di perairan di Sabah dan

amat berpotensi untuk digunakan dalam pelbagai produk makanan, farmaseutikal dan kosmetik serta alternatif kepada gelatin halal.

Memandangkan spesis ini mudah mendapat serangan penyakit, ABI-NIBM telah membangunkan teknologi pengkulturan tisu bagi menghasilkan benih rumpai laut secara konsisten.

Selain itu, ABI-NIBM juga telah membangunkan fasiliti asuhan dan pemulihan rumpai laut dengan kerjasama Jabatan Perikanan Malaysia (DOF), Cawangan Langkawi bagi mengatasi masalah yang timbul disebabkan bencana alam dan penyusutan kualiti rumpai laut.

AGENSI KEENAM: CRADLE FUND SDN. BHD.

Di bawah agensi ini terdapat dua (2) projek utama yang berjaya dilaksanakan iaitu:

- (i) Projek ini telah dibangunkan bersama HAVVA Agrotech Sdn Bhd. Ia membangunkan kepakaran dalam bidang urban farming dan urban gardening; dan

HAVVA membangunkan teknologi dan inovasi yang boleh digunakan oleh pengguna yang tinggal di bandar yang mahukan sayur-sayuran segar di premis kediaman masing-masing.

HAVVA menitik beratkan konsep sustainable farming dan terus menjalankan penyelidikan berlandaskan teknologi agar dapat mengurangkan pembaziran makanan serta carbon footprint di masa depan. Teknologi ini dapat mengurangkan penggunaan air sebanyak 90% dan menggunakan kawasan tanaman yang lebih kecil (100 tanaman dapat ditanam di kawasan yang lazimnya digunakan bagi 1 jenis tanaman dengan kaedah konvensional).

- (ii) Projek penternakan udang galah menggunakan teknologi termaju. Melalui penggunaan teknologi ini, penternak dapat meningkatkan saiz ternakan dan tumbesaran udang galah sekali

gus berjaya meningkatkan hasil pengeluaran ladang-ladang mereka.

GK Aqua juga mengembangkan teknologi mereka dengan memperkenalkan Malaysian Udang Galah Aquapreneurs (MUGA) bagi membuka peluang pekerjaan kepada golongan B40 di samping meningkatkan potensi negara sebagai pengeluar serta pengeksport udang galah bertaraf dunia.

AGENSI KETUJUH: MALAYSIA VENTURE CAPITAL MANAGEMENT BERHAD (MAVCAP) BERHAD

Agensi ini telah berjaya membantu dalam pembangunan *Platform Restaurant Supply Chain* atau disebut sebagai *Food Market Hub*.

Platform ini bertujuan untuk membantu dan menghubungkan vendor dan restoran untuk membeli dan mendapatkan bekalan makanan daripada pemberong makanan.

Platform ini telah mula digunakan di beberapa restoran di Lembah Klang dan Pulau Pinang dan masih sedang dalam proses adaptasi oleh pihak vendor restoran.

Sekian, terima kasih .

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' HAJI AHMAD NAZLAN BIN IDRIS
(JERANTUT)**

SOALAN

Dato' Haji Ahmad Nazlan bin Idris (Jerantut) minta **MENTERI PERTANIAN DAN INDUSTRI MAKANAN** menyatakan sejauh manakah kejayaan Kementerian dalam program *Smart SBB* dan tahap penerimaan pesawah-pesawah dalam usaha memperkasakan industri padi negara.

JAWAPAN

Tuan Yang di-Pertua,

Untuk makluman Ahli Yang Berhormat, Program SMART Sawah Berskala Besar (SMART SBB) merupakan inisiatif Kerajaan melalui Kementerian Pertanian dan Industri Makanan (MAFI) dengan pihak swasta untuk meningkatkan produktiviti pengeluaran hasil padi dan pendapatan pesawah. Program ini diperkenalkan pada Februari 2021 dengan sasaran keluasan sebanyak 150,000 hektar bagi fasa pertama dan peningkatan purata hasil kepada tujuh (7) tan metrik per hektar.

Pada masa kini, penerimaan pesawah terhadap program SMART SBB ini amat memberangsangkan. Pesawah menerima program ini secara sukarela dan tanpa sebarang paksaan kerana program ini mampu memberi pulangan keuntungan kepada pesawah. Ini kerana segala kos pengeluaran yang ditanggung sendiri oleh pesawah sebelum ini dapat

SOALAN NO. 42

dikurangkan dan sekaligus dapat meningkatkan hasil pendapatan mereka.

Dalam masa yang sama, terdapat juga segelintir pandangan tidak tepat mengenai konsep sebenar program SMART SBB yang menyatakan hak pemilikan tanah pesawah yang menyertai program ini akan diambil oleh syarikat peneraju. MAFI ingin menekankan bahawa pelaksanaan program SMART SBB ini tidak melibatkan sebarang pengambilalihan tanah sawah dan tiada paksaan dalam penyertaan.

Kejayaan pelaksanaan program SMART SBB pada sesi 1/2021 yang lalu telah diterjemahkan melalui pencapaian Aspirasi Keluarga Malaysia (AKM) MAFI. Sehingga Jun 2022, bilangan penglibatan dan hasil pendapatan kumpulan sasar iaitu pesawah, telah melebihi sasaran yang ditetapkan iaitu sebanyak 280 peratus. Seramai 4,321 orang pesawah telah mendapat manfaat daripada program SMART SBB melibatkan kawasan penanaman padi lebih daripada 10,000 hektar.

Program SMART SBB ini telah terbukti meningkatkan purata hasil padi sehektar di beberapa kawasan seperti di Selangor dan Sarawak. Pada musim baru-baru ini di Sekinchan, Selangor yang melibatkan kawasan padi seluas lebih 100 hektar telah berjaya meningkatkan purata hasil pengeluaran padi hampir 4 kali ganda iaitu daripada 2.5 tan metrik sehektar kepada 8 hingga 10 tan metrik sehektar. Program SMART SBB telah berjaya dilaksanakan di sembilan buah negeri termasuk Sabah dengan penglibatan sebanyak 24 syarikat peneraju.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

SOALAN:

Minta **PERDANA MENTERI** menyatakan apakah perancangan Kerajaan dalam memastikan Kementerian, agensi Kerajaan serta syarikat-syarikat GLC/GLIC memberi keutamaan kepada perkhidmatan yang dikendalikan oleh syarikat Bumiputra seperti perkhidmatan audit, perakaunan, kejuruteraan, media dan komunikasi serta peranan yang boleh dimainkan oleh agensi bermandat Bumiputra seperti TERAJU, MARA dan sebagainya dalam memastikan usaha ini tercapai.

JAWAPAN

**DI JAWAB OLEH YB DATUK DR ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Kerajaan telah menubuhkan Majlis Kemakmuran Bumiputra (MKB) sebagai platform tertinggi bagi memperkuat strategi serta membuat keputusan bagi pemerkasaan ekonomi dan sosioekonomi Bumiputra.
2. Di bawah MKB, dua (2) jawatankuasa telah ditubuhkan iaitu Jawatankuasa Pemandu Majlis Kemakmuran Bumiputra (JPMKB) dan Jawatankuasa Khas GLC dan GLIC (JKHAS) yang keduanya

dipengerusikan oleh saya sendiri selaku Menteri di Jabatan Perdana Menteri (Tugas-Tugas Khas).

3. JPMKB berperanan bagi membincang dan menilai cadangan penambahbaikan polisi, strategi dan inisiatif, serta isu dan cabaran berkaitan pemerkasaan ekonomi dan sosioekonomi Bumiputera termasuk memastikan pelaksanaan keputusan yang dibuat MKB.
4. Manakala JKHAS pula berperanan bagi menilai dan memantau polisi, strategi dan inisiatif Bumiputera sedia ada khususnya di GLC dan GLIC. Ini bagi memastikan penyertaan syarikat-syarikat Bumiputera adalah menyeluruh dan tidak hanya terhad serta tertumpu kepada projek-projek kerajaan sahaja tetapi juga kepada bekalan perkhidmatan profesional.
5. Kesemua strategi, inisiatif dan intervensi strategik yang diperaku di peringkat MKB seperti Tindakan Pembangunan Bumiputera 2030 (TPB2030) akan dilaksana dan dipantau oleh Unit Pemerkasaan Agenda Bumiputera (UPAB) di setiap kementerian dan akan diselaraskan oleh TERAJU selaku penyelaras utama bagi Pemerkasaan Agenda Bumiputera.
6. UPAB yang telah pun ditubuhkan di setiap kementerian berperanan bagi memastikan aspek perancangan, pelaksanaan, pemantauan dan pelaporan agenda pembangunan Bumiputera dapat dilaksanakan secara tersusun dan teratur bagi mencapai objektif yang ditetapkan/disasarkan dibawah TPB2030.
7. Dalam memastikan Kementerian, agensi Kerajaan serta syarikat-syarikat GLC dan GLIC memberi keutamaan kepada perkhidmatan yang dikendalikan oleh syarikat Bumiputera seperti perkhidmatan audit, perakaunan, kejuruteraan, media dan komunikasi, kedua-dua jawatankuasa telahpun memperaku akan perkara-perkara berikut:
 - a. Kajian Impak Dasar Perolehan Kerajaan yang dilaksanakan oleh TERAJU pada tahun 2021 bagi menilai dasar-dasar perolehan kerajaan sedia ada serta syor bagi menambahbaik

atau mewujudkan polisi bagi memberi keutamaan kepada syarikat Bumiputera. Kesemua syor yang telah dibentangkan kepada JPMKB akan diperhalusi dan dipertimbangkan bagi tujuan pelaksanaan.

- b. Penganjuran bengkel bersama syarikat GLC dan GLIC oleh TERAJU pada suku kedua tahun 2022 yang bertujuan untuk mengenal pasti inisiatif/agenda Bumiputera sedia ada di dalam GLIC dan GLC serta mendapatkan input mengenai penambahbaikan yang diperlukan dalam aspek pemerkasaan ekonomi dan sosioekonomi Bumiputera.
8. Di dalam bengkel ini, penekanan bukan sahaja akan diberikan kepada sokongan dan penglibatan GLC dan GLIC dalam pelaksanaan Tindakan Pembangunan Bumiputera 2030 (TPB2030), malah ianya akan turut memberi fokus kepada penyertaan GLC dan GLIC dalam Pelan Pelaksanaan Dasar (PPD) di bawah Rancangan Malaysia ke-12 (RMKe-12).
9. TERAJU juga akan turut bekerjasama dengan Kementerian Kewangan (MOF) selaku kementerian yang mengawal selia syarikat GLC dan GLIC untuk melihat keperluan bagi merangka dan mewujudkan polisi bagi syarikat GLC dan GLIC untuk memberi keutamaan kepada perkhidmatan profesional yang dikendalikan oleh syarikat Bumiputera.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' HAJI AHMAD NAZLAN BIN IDRIS
[JERANTUT]**

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI LUAR NEGERI** menyatakan pendirian Kerajaan berhubung tuduhan Pertubuhan Bangsa-Bangsa Bersatu mengenai layanan buruk Malaysia terhadap pelarian Rohingya yang berlindung di negara ini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Jerantut atas pertanyaan yang dikemukakan.

2. Sepertimana Yang Berhormat sedia maklum, Encik Thomas Andrews, Pelapor Khas mengenai situasi hak asasi manusia di Myanmar, telah mengadakan lawatan ke Malaysia dari 17 hingga 23 Jun 2022. Pelapor Khas dilantik oleh Majlis Hak Asasi Manusia (MHAM) dan berkhidmat atas kapasiti peribadi. Mandat beliau adalah untuk mengkaji dan melaporkan situasi politik dan hak asasi manusia di Myanmar, di samping memudah cara perbincangan di antara semua pihak berkepentingan di Myanmar.
3. Lawatan beliau ke Malaysia bertujuan untuk memahami dengan lebih mendalam perspektif dan pendekatan Malaysia, terutamanya menerusi ASEAN, dalam mencari jalan penyelesaian damai kepada situasi di Myanmar. Penerimaan lawatan Pelapor Khas oleh Malaysia mencerminkan komitmen negara dalam mencari penyelesaian yang aman dan berkekalan kepada situasi di Myanmar, terutamanya krisis di Rakhine yang telah membawa kepada masalah pelarian terbesar di rantau ini.
4. Semasa di Malaysia, Pelapor Khas telah mengadakan pertemuan dengan Menteri Luar Negeri serta pegawai-pegawai kanan Kementerian, pegawai-pegawai Kementerian Pembangunan Wanita, Keluarga dan Masyarakat; Jawatankuasa Pilihan Khas Parlimen mengenai Hal Ehwal Antarabangsa dan Jawatankuasa Pilihan Khas Parlimen mengenai Wanita, Hal Ehwal Kanak-Kanak dan Pembangunan Sosial; Suruhanjaya Hak Asasi Manusia Malaysia (SUHAKAM); dan masyarakat sivil.
5. Susulan lawatan ke Malaysia, Pelapor Khas telah mengeluarkan satu kenyataan media pada 23 Jun 2022 serta membentangkan laporan lisan mengenai hasil lawatannya ke Malaysia di Sesi ke-50 Majlis Hak

SOALAN NO : 44

Asasi Manusia pada 29 Jun 2022 yang bertajuk: “*Myanmar: UN expert encouraged by Malaysia’s leadership on Myanmar crisis; urges regional states to adopt similar stance*”. Laporan dan kenyataan media beliau secara keseluruhannya adalah positif terhadap Negara. Jelas sekali, beliau menghargai serta mengiktiraf peranan dan kepimpinan Malaysia dalam usaha mencari jalan penyelesaian yang aman dan berkekalan kepada situasi di Myanmar.

6. Pada pandangan Kementerian ini, perkara yang menyentuh mengenai layanan atau polisi Kerajaan Malaysia terhadap pelarian dalam laporan Pelapor Khas tersebut merupakan isu yang di luar mandat beliau. Sebagai negara berdaulat yang bukan merupakan negara anggota Konvensyen Pelarian 1951 dan Protokol 1967, Malaysia berhak menentukan polisi dalaman negaranya berdasarkan kepentingan dan keselamatan negara. Malah, Malaysia telah membenarkan pemegang-pemegang kad UNHCR untuk menetap di negara ini untuk sementara waktu dan diberi pelbagai kemudahan, atas dasar kemanusiaan, sebelum mereka dapat pulang ke negara asal atau ditempatkan ke negara ketiga.

7. Pada masa ini, pihak Majlis Keselamatan Negara (MKN) sedang meneliti penambahbaikan terhadap Dasar dan Mekanisme Pengurusan Pelarian dan Pemohon Suaka di Malaysia bagi memastikan pengurusan pelarian dalam negara lebih teratur di samping menjaga kepentingan dan keselamatan negara.

8. Untuk makluman Yang Berhormat jua, Malaysia merupakan negara pertama di rantau Asia Tenggara yang telah menerima permohonan lawatan Pelapor Khas tersebut. Penerimaan lawatan tersebut mencerminkan ikrar dan komitmen Malaysia sebagai ahli Majlis Hak Asasi Manusia untuk mengadakan libat urus dengan semua mekanisme Majlis tersebut, termasuklah Pelapor-pelapor Khas dengan mandat yang khusus.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BERTULIS

**DARIPADA : DATO' HAJI AHMAD NAZLAN BIN IDRIS
[JERANTUT]**

SOALAN

Dato' Haji Ahmad Nazlan bin Idris [Jerantut] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan perancangan Kementerian dalam menjadikan kedai harga patut dan iKEEP berperanan dalam membantu rakyat yang terkesan dengan isu kenaikan harga barang.

JAWAPAN

Tuan Yang di-Pertua,

Kementerian Perdagangan Dalam Negeri dan Hal Ehwal Pengguna (KPDNHEP) telah melaksanakan pelbagai inisiatif sebagai usaha untuk membantu rakyat yang terkesan dengan isu kenaikan harga barang terutamanya dalam keadaan semasa di mana rakyat khususnya golongan B40 yang terkesan dengan kenaikan kos sara hidup. Antara inisiatif yang pernah dilaksanakan bagi menangani isu ini adalah pelaksanaan Anugerah Kedai Harga Patut (AKHP) dan iKEEP.

Terkini, selaras dengan perkembangan semasa, Kerajaan melalui KPDNHEP serta Kementerian Pertanian dan Industri Makanan (MAFI) telah melaksanakan program yang dikenali sebagai Program Jualan Keluarga Malaysia (PJKM) bagi menangani kenaikan kos sara hidup. Program ini dilaksanakan dengan penglibatan rakan strategik daripada pasaraya tempatan atau kedai runcit. PJKM dilaksanakan sejak Disember 2021 sehingga Jun 2022 di semua 222 kawasan Parlimen yang merangkumi 2,198 lokasi seluruh negara yang mana lokasi-lokasi ini dipilih berdasarkan cadangandaripada Ahli Parlimen di kawasan tersebut dengan penumpuan kepada golongan B40 dan M40 secara lebih bersasar. Sehingga Jun 2022, anggaran seramai 3,927,257 orang pengunjung dan anggaran jualan sejumlah RM72,509,876,.38 telah dicapai untuk program PJKM ini. Antara objektif PJKM adalah:

- i. Sebagai salah satu daripada inisiatif jangka pendek Kerajaan untuk membantu mengurangkan kos sara hidup rakyat;
- ii. Membantu melestarikan kesejahteraan pengguna bagi mengatasi isu kenaikan harga barang keperluan yang sedang berlaku; dan
- iii. Membantu menawarkan pilihan kepada pengguna untuk mendapatkan pelbagai barang keperluan harian seperti beras, minyak masak, gula, ayam dan barang basah dengan harga yang lebih rendah sehingga 20% daripada harga semasa pasaran setempat.

Selaras dengan pengemuman YAB Perdana Menteri pada 4 Julai 2022 yang lalu, maka PJKM akan diperhebat dan diperluaskan. Dalam masa yang sama, Majlis Tindakan Sara Hidup Negara (NACCOL) juga berperanan melihat dan mencari kaedah terbaik untuk mengurangkan kesan kos sara hidup kepada rakyat memandangkan senario ini merupakan isu global.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN AHMAD TARMIZI BIN SULAIMAN
(SIK)**

SOALAN

Minta **MENTERI PERTAHANAN** menyatakan pelan, terma, spesifikasi, syarat dan kaedah bagi penyambungan kerja pembinaan kapal Littoral Combat Ship (LCS) yang telah diputuskan oleh kabinet pada April 2022 termasuk implikasi kewangan dan tempoh penyiapan aset ketenteraan tersebut.

JAWAPAN

Tuan Yang Di-Pertua,

Kementerian Pertahanan telah membentangkan Memorandum Jemaah Menteri berhubung cadangan penyelesaian bagi Kontrak Perolehan 6 Buah Kapal *Second Generation Patrol Vessel* Berkeupayaan *Littoral Combat Ship* (LCS) Untuk Tentera Laut Diraja Malaysia (TLDM) pada 20 April 2022. Jemaah Menteri telah bersetuju untuk meneruskan perolehan ini tertakluk kepada terma dan syarat yang perlu dipatuhi oleh pihak Syarikat Boustead Naval Shipyard Sdn Bhd (BNSSB) dalam pelan pemulihan tersebut.

Selaras dengan keputusan Jemaah Menteri tersebut, Kerajaan bersetuju memberikan tempoh selama 6 bulan untuk fasa mobilisasi kepada syarikat BNSSB bagi melaksanakan rundingan dengan 42 *Original Equipment Manufacturer* (OEM) dan 145 Vendor Tempatan yang terlibat dalam perolehan LCS ini. Fasa mobilisasi ini adalah amat penting, dimana syarikat BNSSB perlu membuktikan telah mendapat sokongan penuh daripada semua OEM dan Vendor yang terlibat serta bersetuju untuk terus membekalkan peralatan dalam meneruskan perolehan ini.

Selain itu, pembuktian ini penting bagi memastikan tiada isu peralatan yang diterima akan mengalami isu penggantian barang pada masa akan datang (*obsolete*) setelah pengesahan dan jaminan daripada OEM dan Vendor terlibat diperolehi. Projek ini akan diteruskan oleh syarikat BNSSB setelah fasa mobilisasi ini selesai dan syarikat BNSSB berjaya mendapatkan persetujuan daripada semua OEM dan Vendor untuk meneruskan perolehan ini. Oleh itu, **implikasi kewangan keseluruhan dan tempoh penyiapan aset ini hanya akan dapat dimuktamadkan setelah rundingan antara kedua-dua belah pihak selesai.**

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN AHMAD TARMIZI BIN SULAIMAN
[SIK]**

SOALAN

TUAN AHMAD TARMIZI BIN SULAIMAN [SIK] minta **MENTERI KANAN PENDIDIKAN** menyatakan kaedah bagi guru-guru kelas di sekolah rendah yang tertekan dan stress dalam menangani masalah tingkah laku murid-murid yang tidak berdisiplin kerana hukuman merotan sudah tidak dibenarkan lagi serta mohon penilaian semula melalui survey dan dapatan kajian dalam kalangan guru-guru dalam isu ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin dan peka terhadap tahap kesejahteraan psikologi guru bagi memastikan pengajaran dan pembelajaran murid dapat dilaksanakan dengan berkesan.

Untuk makluman Ahli Yang Berhormat, KPM melalui kaunselor pendidikan menyediakan perkhidmatan kaunseling, konsultasi dan advokasi kepada warga pendidikan, termasuk guru yang menghadapi masalah psikologi dalam menguruskan disiplin murid. Perkhidmatan ini disediakan di Bahagian di KPM, jabatan pendidikan negeri (JPN), pejabat pendidikan daerah (PPD), institut pendidikan guru (IPG) dan kolej matrikulasi. Justeru, guru boleh mendapatkan perkhidmatan kaunseling, konsultasi dan advokasi melalui temu janji menggunakan Sistem Pengurusan Perkhidmatan Kaunseling (e-2PK).

SOALAN NO : 47

Secara umum, KPM menjalankan program sokongan psikologi melalui pendekatan pembangunan, pencegahan dan pemulihan. Melalui program ini guru diberikan latihan meningkatkan tahap kesejahteraan psikologi merangkumi kemahiran mengawal diri dan mengurus tekanan. Program ini dijalankan pada setiap tahun di semua peringkat organisasi dan institusi pendidikan oleh kaunselor pendidikan.

Selain itu, KPM juga mewujudkan profiling kesejahteraan psikologi menggunakan Inventori Kesejahteraan Psikologi (IKPsi). Dengan ini, semua guru dapat mengakses Latihan Meningkatkan Kesejahteraan Psikologi Guru secara dalam talian untuk meningkatkan kemahiran pengurusan emosi, kawalan diri dan amalan harian yang positif.

Sehingga 30 Jun 2022, seramai 119,445 orang guru telah mempunyai profil kesejahteraan psikologi dan KPM mensasarkan keseluruhan guru menjalani program sokongan psikologi menjelang tahun 2025. Bagi guru yang dikenal pasti memerlukan sokongan psikologi, intervensi dilaksanakan oleh kaunselor pendidikan menggunakan Modul Kesejahteraan Diri (MKD).

KPM yakin segala pendekatan yang dilaksanakan pada masa ini dapat menyokong pengurusan emosi guru dengan baik dan berkesan, seterusnya dapat meningkatkan tahap kesejahteraan psikologi mereka.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : JAWAB BUKAN LISAN

**DARIPADA : TUAN AHMAD TARMIZI BIN SULAIMAN
[SIK]**

SOALAN :

Minta **PERDANA MENTERI** menyatakan tahap penilaian buku-buku bersifat Indie (Indie merujuk kepada hasil karya seni di luar daripada arus perdana yang komersial) di pasaran dan pesta buku yang didapati bercanggah dengan ajaran ahli sunnah wal jamaah yang menjadi pegangan oleh umat Islam di Malaysia.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Pihak JAKIM sentiasa melaksanakan pemantauan dan semakan terhadap semua buku-buku yang berada di pasaran terutamanya bagi penulisan yang melibatkan akidah dan nilai-nilai agama Islam.
2. Buku-buku Indie juga adalah tidak terkecuali daripada pemantauan dan semakan pihak JAKIM. Bagaimanapun, buku-buku Indie mahupun buku-buku selain daripada itu akan dilaksanakan semakan berdasarkan kepada aduan-aduan yang diterima oleh JAKIM.
3. Semua buku yang diadukan dan disyaki bercanggah dengan ajaran ahli Sunnah wal Jamaah akan dilaksanakan tapisan dan semakan oleh pihak JAKIM bersama dengan pakar-pakar yang dilantik. Sekiranya didapati bercanggah dengan ajaran ahli Sunnah wal Jamaah, buku tersebut akan dicadangkan untuk dikenakan Perintah Larangan oleh KDN melalui Akta 301 Akta Mesin Cetak dan Penerbitan 1984.

Sekian, terima kasih.

**PEMBERITAHUAN PERTANYAAN BAGI JAWAB BUKAN LISAN
DEWAN RAKYAT MESYUARAT KEDUA PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN
DARIPADA : TUAN AHMAD TARMIZI BIN SULAIMAN
[SIK]
SOALAN :

TUAN AHMAD TARMIZI BIN SULAIMAN [SIK] minta **MENTERI PERUSAHAAN PERLADANGAN DAN KOMODITI** menyatakan hala tuju industri getah yang masih tidak menentu apabila harga komoditi ini sentiasa tidak stabil dan berdepan dengan faktor cuaca yang menyukarkan para pekebun meningkatkan produktiviti.

JAWAPAN

Tuan Yang di-Pertua,

Kerajaan akan terus komited untuk melaksanakan langkah-langkah yang relevan bagi memastikan produktiviti pekebun kecil getah terus meningkat. Kementerian Perusahaan Perladangan dan Komoditi (KPPK) telah melancarkan Dasar Agrikomoditi Negara (DAKN) 2021-2030 bagi menentukan hala tuju sektor komoditi untuk jangka masa panjang.

Pada masa ini, prestasi harga getah agak memberangsangkan yang mana dalam tempoh enam bulan pertama tahun 2022, purata harga SMR 20 ialah RM7.24/kg iaitu 7.6% lebih tinggi berbanding tempoh yang sama pada tahun 2021. Walaupun harga getah mengukuh, sektor huluan getah berhadapan dengan beberapa isu utama seperti kekurangan tenaga buruh di sektor estet dan kebun kecil, cuaca yang tidak menentu dan penyakit luruhan daun *pestalotiopsis*.

Antara pendekatan yang dilakukan untuk meningkatkan produktiviti getah negara adalah seperti berikut:

- (a) Menambah nilai getah dan memberi pulangan dan pendapatan yang lebih baik kepada pekebun kecil melalui penglibatan dalam program atau aktiviti yang berkaitan seperti Projek Transformasi Perusahaan Getah Negara (TARGET). Pelaksanaan Projek Transformasi Perusahaan Getah Negara (TARGET) melalui Konsep Koperasi Pekebun Dan Pengusaha Ladang Getah Tempatan bertujuan untuk meningkatkan pendapatan pekebun kecil getah dengan cara memendekkan rantaian bekalan (*supply chain*) dan melibatkan pekebun dalam rantai industri getah (integrasi menegak);
- (b) Menambah kecekapan rantaian nilai getah peringkat ladang agar pekebun kecil mendapat harga yang lebih baik melalui penggunaan RRIMniaga di kalangan pelesen dan penglibatan pekebun kecil dalam MyROL.

Penggunaan RRIMniaga membolehkan urus niaga getah dilaksanakan dengan lebih mudah dan telus kerana data transaksi

direkodkan secara automatik. MyROL pula merupakan salah satu kaedah pemasaran getah melalui kaedah tender secara atas talian. Melalui MyRol, pekebun akan menikmati harga yang lebih kompetitif kerana getah yang dijual berkualiti tinggi di samping kuantiti yang banyak hasil daripada jualan secara berkelompok.

- (c) Meningkatkan produktiviti pekebun kecil melalui geran padanan oleh Kerajaan bagi tujuan adaptasi Teknologi RRIM HYDROBEST bagi melihat impak penggunaan RRIM HYDROBEST ke atas produktiviti. RRIM HYDROBEST merupakan salah satu kaedah merangsang pokok yang dapat membantu meningkatkan pengeluaran hasil torehan pekebun kecil getah.

Kerajaan juga akan memastikan kebijakan pekebun kecil getah melalui pelaksanaan pelbagai inisiatif bantuan seperti berikut:

(a) **Insentif Pengeluaran Getah (IPG)**

IPG adalah mekanisme sokongan harga iaitu pelaksanaannya akan diaktifkan sekiranya harga purata bulanan SMR 20 FOB berada di paras RM6.10 sekilogram ke bawah atau purata harga di peringkat ladang (*farmgate*) berada di paras RM2.50 sekilogram ke bawah. Sejak 1 September 2015 sehingga 20 Jun 2022, Kerajaan telah membuat pembayaran berjumlah **RM439.59** juta kepada **202,443** orang pekebun kecil di seluruh negara. Sejak Ogos 2021 hingga Jun 2022 pula, harga getah telah melebihi paras harga pengaktifan.

(b) **Insentif Pengeluaran Lateks (IPL)**

Program IPL bertujuan memberi peluang kepada pekebun kecil getah untuk menambah pendapatan dengan memberi galakan kepada mereka untuk beralih kepada pengeluaran susu getah (lateks) berbanding getah sekerap (*cuplump*).

(c) **Taklimat dan hebahan** berkenaan kualiti getah agar pekebun kecil mendapat harga yang lebih baik dengan menghasilkan getah yang berkualiti.

Sekian terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN AHMAD TARMIZI BIN SULAIMAN
[SIK]**

SOALAN

Minta **PERDANA MENTERI** menyatakan status cadangan pindaan kepada MKN Arahan 23 dan bagaimanakah cadangan ini selaras dengan kewajipan dan komitmen Malaysia untuk menegakkan hak asasi manusia pada peringkat antarabangsa.

JAWAPAN

**DI JAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Untuk makluman Yang di-Pertua, Majlis Keselamatan Negara, Jabatan Perdana Menteri (MKN, JPM) telah dipertanggungjawab dalam menyelaras pengurusan pelarian di Malaysia berdasarkan kepada Arahan MKN No. 23 : Mekanisme Pengurusan Pendatang Asing Tanpa Izin (PATI) Yang Memegang Kad Pesuruhjaya Tinggi Pertubuhan Bangsa-Bangsa Bersatu untuk Pelarian (*United Nations High Commissioner for Refugees - UNHCR*) yang dikeluarkan pada tahun 2009.
2. Arahan ini menetapkan dasar mekanisme pengurusan dan tanggungjawab Kementerian/ Agensi dalam mengawal selia pelarian. Sidang MKN yang dipengerusikan oleh YAB Perdana Menteri pada

NO SOALAN : 50

7 April 2022 antara lain telah melantik YB Menteri Kanan Pertahanan sebagai pengurus jawatankuasa bagi menangani isu pelarian yang memegang kad UNHCR melalui Jawatankuasa Peringkat Tertinggi Pengurusan Pelarian dan Pemohon Suaka (JTPPPS) yang diurussetiakan oleh MKN,JPM. Jawatankuasa ini akan memperhalusi syor - syor yang terkandung di dalam penambahbaikan Arahan MKN No. 23 sebelum dibentang dalam Sidang MKN untuk tujuan kelulusan.

3. Penambahbaikan kepada Arahan MKN No. 23 ini akan memberikan keutamaan mengenai peranan Kerajaan dalam penentuan status pelarian yang pada masa ini hanya ditentukan oleh pihak UNHCR serta penekanan terhadap mekanisme pengurusan dan penguatkuasaan yang efisien. Pelaksanaan dasar – dasar membabitkan pendidikan, kebajikan dan sosial yang telah dilaksanakan sebelum ini adalah bersifat kemanusiaan dan akan diteruskan berdasarkan kepada kemampuan negara, dasar, undang-undang dan peraturan yang berkuatkuasa sepanjang tempoh keberadaan sementara golongan ini di dalam negara.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN AKMAL NASRULLAH BIN MOHD.
NASIR [JOHOR BAHRU]

SOALAN

YB TUAN AKMAL NASRULLAH BIN MOHD. NASIR [JOHOR BAHRU] minta **MENTERI PERUMAHAN DAN KERAJAAN TEMPATAN** menyatakan secara terperinci hasil dapatan penubuhan war room serta langkah yang diambil bagi menyelesaikan isu kelewatan projek perumahan bagi projek perumahan di bawah seliaan KPKT seperti PR1MA, Perumahan Penjawat Awam Malaysia (PPAM) dan Syarikat Perumahan Negara Berhad (SPNB) selari dengan matlamat penubuhannya supaya isu kelewatan projek perumahan dapat diselesaikan dengan tangkas, cepat dan terbaik secara terbuka serta telus.

JAWAPAN

Tuan Yang di-Pertua,

Untuk makluman Ahli Yang Berhormat, Mesyuarat *War Room* Pemantauan Pemajuan Projek Perumahan Swasta diadakan oleh Kementerian Perumahan dan Kerajaan Tempatan (KPKT) bagi menyelesaikan sebarang isu kelewatan projek perumahan. Mesyuarat ini berperanan sebagai satu platform untuk melaporkan status projek perumahan swasta sakit dan terbengkalai serta mencadangkan langkah-langkah pemulihan bagi projek berkenaan. Selain itu, penubuhan *war room* adalah untuk membincangkan permasalahan, mengenal pasti kaedah penyelesaian, penyelarasan pelaksanaan dan pelan tindakan kepada isu-isu berkaitan pemajuan perumahan swasta.

Antara hasil pelaksanaan *war room* sejak 27 Oktober 2021 adalah seperti berikut:

- i. sebanyak 10 projek Perumahan Penjawat Awam Malaysia (PPAM) dan 2 projek SPNB yang sakit telah memperolehi Certificate of Completion and Compliance (CCC) Penuh;
- ii. Kerajaan melalui Lembaga Pembiayaan Perumahan Sektor Awam (LPPSA) telah memperkenalkan Skim Bantuan Khas iaitu penangguhan bayaran balik ansuran bulanan selama enam (6) bulan kepada peminjam LPPSA yang layak. Permohonan untuk mendapatkan Skim Bantuan Khas ini dibuka sehingga 31 Disember 2022 dan boleh dimohon melalui portal LPPSA; dan
- iii. pengurusan PR1MA telah mengambil inisiatif dengan memberi bayaran pendahuluan kadar ganti rugi ditetapkan (Liquidated Ascertained Damages, LAD) kepada pembeli bagi projek yang gagal disiapkan dalam tempoh Perjanjian Jual Beli (PJB).

SOALAN NO: 51

Selain itu, antara tindakan lain yang telah diambil oleh KPKT bagi membantu memulihkan projek sakit ini adalah seperti:

- i. membuat pemeriksaan dan lawatan tapak secara berkala;
- ii. mengadakan mesyuarat bersama pemaju dengan lebih kerap; dan
- iii. mengarahkan pemaju untuk mengemukakan laporan kemajuan pada setiap bulan.

Untuk makluman Ahli Yang Berhormat juga, tindakan penguatkuasaan turut diambil oleh KPKT ke atas pemaju perumahan swasta berlesen yang terlibat dengan projek sakit seperti berikut:

- i. menyenarai hitam Ahli Lembaga Pengarah dan syarikat perumahan yang terlibat dengan projek sakit dalam sistem Jabatan Perumahan Negara (JPN);
- ii. membuat paparan di laman sesawang KPKT di bawah projek sakit; dan
- iii. sekiranya projek sakit tidak dapat disiapkan seperti yang dijanjikan, projek tersebut disyorkan sebagai projek terbengkalai.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN AKMAL NASRULLAH B. MOHD
NASIR (JOHOR BAHRU)**

SOALAN

TUAN AKMAL NASRULLAH BIN MOHD. NASIR (JOHOR BAHRU) minta **MENTERI DALAM NEGERI** menyatakan secara terperinci bilangan dan senarai operasi yang dilakukan oleh penguat kuasa khususnya Polis Diraja Malaysia (PDRM) dan Jabatan Imigresen Malaysia dalam mengawal sempadan dan mengekang penyeludupan barang bersubsidi ke luar negara berserta jumlah setiap item barang bersubsidi yang dirampas dalam operasi tersebut bermula tahun 2021 sehingga Jun 2022.

JAWAPAN

Tuan Yang Di Pertua,

Kementerian Dalam Negeri melalui Polis Diraja Malaysia (PDRM) terlibat secara langsung bagi penugasan kawalan keselamatan sempadan yang meliputi persempadanan negara di daratan, pesisir pantai dan pulau-pulau di Malaysia. Dalam usaha untuk menangani isu keselamatan kawalan sempadan negara dan masalah penyeludupan barang bersubsidi melalui jalan laut dan sempadan darat, PDRM telah melaksanakan operasi-operasi seperti berikut:

1. Pasukan Gerakan Am (PGA) melalui lapan (8) operasi tetap penugasan kawalan keselamatan sempadan negara PGA iaitu:

- (i) Op Wawasan Kedah / Perlis;

- (ii) Op Nyah 1 (Pantai Barat Utara);
- (iii) Op Nyah 1 (Selangor);
- (iv) Op Nyah 1 (Johor);
- (v) Op Wawasan Kelantan;
- (vi) Op Taring;
- (vii) Op Awas; dan
- (viii) Op Batas.

2. Menjalankan Op Kontraban khusus bagi membanteras aktiviti / kegiatan penyeludupan pelbagai barang terlarang atau kontraban dan ini termasuklah kegiatan penyeludupan barang bersubsidi ke luar negara;

3. Manakala, Pasukan Polis Marin (PPM) telah menjalankan 12 operasi setiap tahun iaitu:

- (i) Op Pensura;
- (ii) Op Paradise;
- (iii) Op Tango Papa;
- (iv) Op Gelora;
- (v) Op Gelora Khas;
- (vi) Op Lindung;
- (vii) Op Landai;
- (viii) Op Tutup;
- (ix) Tugas Khas / KK;
- (x) Bersepadu (Contoh: Op Naga Emas);
- (xi) Op Pintasan; dan
- (xii) Op Benteng Covid/ Op Benteng Laut.

Susulan daripada operasi-operasi tersebut, sebanyak **437 tangkapan** telah dibuat bagi tahun 2021 sehingga Jun 2022. Daripada jumlah tangkapan tersebut, nilai rampasan barang bersubsidi yang tertinggi adalah minyak diesel sebanyak **RM10.44 juta** diikuti dengan minyak masak sebanyak **RM1.59 juta**, minyak petrol sebanyak **RM636,176.50** dan tepung sebanyak **RM23,765.00**.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

**PERTANYAAN : BUKAN LISAN (BERTULIS)
DARIPADA : Y.B. TUAN HAJI AKMAL NASRULLAH
BIN MOHD. NASIR [JOHOR BAHRU]**

SOALAN

TUAN HAJI AKMAL NASRULLAH BIN MOHD. NASIR [JOHOR BAHRU] minta **PERDANA MENTERI** menyatakan secara terperinci satu persatu pendapatan, nilai aset dan liabiliti yang telah diisyiharkan oleh setiap anggota Kabinet demi ketelusan kepada rakyat.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Kerajaan sememangnya komited dengan dasar pengisytiharan harta dengan memperkuuhkan akauntabiliti dan integriti Ahli Parlimen melalui dasar pengisytiharan harta. Paparan perisyiharan harta anggota pentadbiran boleh di akses secara atas talian di **Portal Perisyiharan Harta**.

Berdasarkan Kod Etika Bagi Anggota Pentadbiran Dan Ahli Parlimen, paparan butiran perisyiharan harta akan dipaparkan di portal, selama tempoh 3 bulan dari tarikh penerimaan dokumen perisyiharan harta oleh SPRM. Butiran perisyiharan harta yang dipaparkan terdiri daripada jumlah pendapatan bulanan dan jumlah aset.

SPRM adalah merupakan *platform* untuk pemaparan harta melalui portal dan bukan menjadi tanggungjawab SPRM untuk memaksa mana-mana pihak untuk mengisytiharkan harta mereka. SPRM hanya diberikan mandat oleh Kabinet untuk menentukan masa dan kaedah pemaparan perisyiharan harta sahaja.

Walau bagaimanapun, Ahli Parlimen yang gagal mengisytiharkan harta akan dirujuk kepada Jawatankuasa Hak dan Kebebasan Parlimen mengikut Peraturan Mesyuarat 80 Peraturan-peraturan Majlis Mesyuarat Dewan Rakyat kerana melanggar hak dan keistimewaan majlis.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN AKMAL NASRULLAH BIN MOHD.
NASIR (JOHOR BAHRU)**

SOALAN

TUAN AKMAL NASRULLAH BIN MOHD. NASIR (JOHOR BAHRU) minta **MENTERI TENAGA DAN SUMBER ASLI** menyatakan kesediaan Kementerian menggunakan grid tenaga hijau dan mengubah kadar Feed-in-Tariff (FiT) bagi mengurangkan kos pemilikan solar secara keseluruhan sebagai strategi menurunkan bil utiliti.

JAWAPAN

Tuan Yang di-Pertua,

Untuk makluman Ahli Yang Berhormat, sistem penghantaran dan pengagihan grid di negara ini tidak dibahagikan secara khusus kepada grid hijau dan grid bukan hijau. Namun demikian, tenaga elektrik hijau yang dihasilkan daripada sumber penjanaan Tenaga Baru Boleh Bahan boleh dibekalkan kepada pengguna yang berminat dengan membayar premium tambahan 3.7sen/kWj melalui Program Tarif Elektrik Hijau.

Manakala, bagi cadangan pelarasian kadar Feed-in-Tariff (FiT) bagi sumber solar pula, kelulusan FiT bagi sumber solar telah ditamatkan pada tahun 2016 setelah kos pemasangan serta tempoh pulangan pemasangan sistem solar di negara ini telah mencapai tahap wajar pengguna. Dalam erti kata lain, harga bagi pemasangan sistem solar telah mencapai harga yang munasabah dan boleh ditampung oleh pengguna.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN JAWAB LISAN

**DARIPADA : TUAN AKMAL NASRULLAH BIN MOHD. NASIR
[JOHOR BAHRU]**

SOALAN

minta **PERDANA MENTERI** menyatakan kos penyelenggaraan dan bil utiliti bagi kediaman rasmi Perdana Menteri Sri Perdana, kediaman rasmi Timbalan Perdana Menteri Sri Satria serta semua kediaman Kerajaan yang diduduki oleh semua Menteri Kabinet sejak Januari 2021 sehingga Mei 2022.

JAWAPAN:

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Di-Pertua,

1. Kediaman Rasmi YAB Perdana Menteri merupakan lambang kemegahan negara yang telah dibina sejak 25 tahun yang lalu. Kompleks Seri Perdana ini bukan sahaja digunakan sebagai tempat kediaman, malah di dalam kompleks berkenaan juga terletaknya beberapa bangunan yang boleh digunakan untuk majlis-majlis rasmi negara.
2. Memandangkan Kompleks Seri Perdana dan Kompleks Sri Satria telah berusia lebih daripada 20 tahun, keperluan pengurusan fasiliti dan penyelenggaraan yang telah dilaksanakan terhadap kedua-dua kompleks ini adalah secara berkala dan mengikut keperluan yang mendesak. Penyelenggaraan ini adalah bagi memastikan semua fasiliti yang terdapat di kompleks berkenaan sentiasa terpelihara keadaannya, dan supaya kekal berfungsi sebagaimana yang dikehendaki.
3. Sejak Januari 2021 sehingga Mei 2022, anggaran kos penyelenggaraan dan bayaran bil utiliti yang telah dibelanjakan untuk Kompleks Seri Perdana dan Sri Satria serta kediaman Kerajaan yang diduduki oleh Menteri Kabinet berkaitan adalah sebanyak RM14 juta.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : PUAN ALICE LAU KIONG YIENG [LANANG]

SOALAN

PUAN ALICE LAU KIONG YIENG [LANANG] minta **MENTERI KANAN PENDIDIKAN** menyatakan jumlah peruntukan sebenar yang disediakan (mengikut belanjawan tahunan yang diumumkan) bagi menaik taraf atau memperbaiki sekolah daif di Sarawak terutamanya di kawasan Parlimen Lanang bagi tahun 2018, 2019, 2020, 2021 dan 2022, serta berapa jumlah sebenar yang telah dibelanjakan. Senaraikan setiap sekolah daif di kawasan Parlimen Lanang dan jumlah peruntukan yang diluluskan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk negeri Sarawak.

Untuk makluman Ahli Yang Berhormat, sebanyak 361 projek menaik taraf dan membangunkan semula bangunan daif di sekolah seluruh Sarawak telah diluluskan bagi tempoh tahun 2016 sehingga 2022 dengan kos projek sebanyak RM2.373 bilion. Sehingga 19 Julai 2022 sebanyak 206 projek telah siap sepenuhnya, 65 projek berada di peringkat pembinaan dan 90 projek di peringkat prabina.

Khusus bagi Parlimen Lanang, sebanyak empat projek menaik taraf dan membangunkan semula bangunan daif di sekolah telah diluluskan dengan kos sebanyak RM4.03 juta. Sehingga 19 Julai 2022, semua projek telah siap sepenuhnya dan kesemua peruntukan telah dibelanjakan.

Perincian peruntukan tahunan bagi projek menaik taraf dan membangunkan semula bangunan daif di sekolah seluruh negeri Sarawak daripada tahun 2016 hingga 2022 adalah seperti berikut:

Tahun	Bilangan Projek	Kos Projek (RM)
2016	20	79,670,000
2017	30	92,640,000
2018	116	416,576,260
2019	75	827,100,000
2020	52	350,000,000
2021	59	402,710,000
2022	9	203,850,000
JUMLAH	361	2,732,546,260

SOALAN NO : 56

Bagi Parlimen Lanang, perincian peruntukan adalah adalah seperti berikut:

Bil	Tahun	Sekolah	Kos Projek (RM)	Status Projek
1.	2018	SK Ulu Sungai Salim	2,154,450	Siap
2.	2018	SK Tanjung Latap	276,994	Siap
3.	2018	SK Kg Banyok	738,075	Siap
4.	2018	SK Sg Salim	860,826	Siap

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

**PERTANYAAN : BUKAN LISAN (BERTULIS)
DARIPADA : Y.B. PUAN ALICE LAU KIONG YEING
[LANANG]**

SOALAN

PUAN ALICE LAU KIONG YEING [LANANG] minta **PERDANA MENTERI** menyatakan pecahan pengundi 18 tahun yang telah didaftarkan secara automatik di 31 buah Parlimen di Sarawak mengikut kaum dan jantina.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pilihan Raya Malaysia (SPR) telah **mewartakan Daftar Pemilih Tambahan Bulan Mei Tahun 2022 pada 16 Jun 2022**. Sehingga pewartaan tersebut, jumlah pemilih terkini bagi Negeri Sarawak ialah seramai **1,936,064 orang**. Statistik mengikut kategori umur dan jantina bagi 31 bahagian pilihan raya parlimen dalam Negeri Sarawak adalah seperti di **Lampiran A**.

Sekian, terima kasih.

SURUHANJAYA PILIHAN RAYA MALAYSIA

DAFTAR PEMILIH TERKINI BULAN MEI 2022

STATISTIK UMUR

(DIWARTAKAN PADA 16 JUN 2022)

MENGIKUT PARLIMEN

BAHAGIAN PILIHAN RAYA	JUMLAH	UMUR (TAHUN)								
		18-20	21-29	30-39	40-49	50-59	60-69	70-79	80-89	90 DAN KE ATAS
SARAWAK										
P.192 MAS GADING	46,949	2,485	10,034	9,343	7,993	7,903	5,439	2,669	864	219
P.193 SANTUBONG	79,207	5,368	20,053	17,449	13,575	11,028	7,154	3,345	1,000	235
P.194 PETRA JAYA	109,344	6,702	26,238	25,093	18,718	15,353	10,452	4,877	1,538	373
P.195 BANDAR KUCHING	109,799	3,196	13,695	17,524	18,704	19,836	19,980	11,591	4,174	1,099
P.196 STAMPIN	120,486	6,722	26,781	28,101	23,434	16,309	11,336	5,726	1,719	358
P.197 KOTA SAMARAHAN	81,459	5,631	20,621	19,517	14,614	10,230	6,479	3,114	1,064	189
P.198 PUNCAK BORNEO	79,770	4,324	16,542	16,997	14,159	12,695	9,024	4,299	1,352	378
P.199 SERIAN	65,085	3,381	13,010	13,436	11,334	10,993	7,873	3,660	1,102	296
P.200 BATANG SADONG	32,521	1,753	6,464	6,773	5,381	5,412	3,911	2,055	582	190
P.201 BATANG LUPAR	42,943	2,168	8,801	9,486	7,159	7,172	4,761	2,430	736	230
P.202 SRI AMAN	50,042	2,570	10,314	9,666	8,159	8,075	6,352	3,512	1,116	278
P.203 LUBOK ANTU	28,953	1,441	5,074	5,624	4,976	5,183	3,697	2,011	677	270
P.204 BETONG	41,657	2,136	8,547	9,094	6,689	6,757	4,878	2,542	829	185
P.205 SARATOK	44,251	2,305	9,197	9,364	7,109	7,373	5,401	2,601	697	204
P.206 TANJONG MANIS	32,825	1,821	7,380	7,110	5,753	5,144	3,440	1,572	438	167
P.207 IGAN	28,239	1,589	6,451	6,252	4,570	4,337	3,038	1,513	392	97
P.208 SARIKEI	54,752	2,408	10,581	11,213	9,709	8,854	6,841	3,474	1,267	405
P.209 JULAU	34,748	1,803	7,131	7,034	6,239	5,871	3,693	1,874	729	374
P.210 KANOWIT	30,945	1,616	6,026	6,495	5,141	5,051	3,749	1,841	693	333
P.211 LANANG	87,242	4,278	18,427	17,434	15,074	13,311	10,740	5,515	1,855	608
P.212 SIBU	105,587	5,432	22,449	23,302	19,021	15,846	11,497	5,520	1,915	605
P.213 MUKAH	46,860	2,569	10,245	9,834	8,004	7,374	5,106	2,782	760	186
P.214 SELANGAU	45,359	2,688	9,921	9,562	8,060	7,102	4,510	2,188	901	427
P.215 KAPIT	45,115	2,537	9,441	9,872	7,596	7,107	4,634	2,462	1,020	446
P.216 HULU RAJANG	43,247	2,692	9,876	9,264	7,168	6,345	4,125	2,086	1,063	628
P.217 BINTULU	113,025	7,164	27,859	24,861	18,507	17,096	11,365	4,457	1,245	471
P.218 SIBUTI	58,273	3,289	13,917	13,852	9,653	7,845	6,087	2,715	708	207
P.219 MIRI	142,698	7,873	32,275	31,413	24,008	20,726	16,267	7,213	2,206	717
P.220 BARAM	59,278	3,033	11,407	11,657	9,990	9,794	7,246	3,368	1,638	1,145
P.221 LIMBANG	41,878	2,330	8,675	9,269	7,236	6,217	5,087	2,102	716	246
P.222 LAWAS	33,527	1,912	7,510	7,350	5,767	4,935	3,734	1,530	571	218
SARAWAK Total	1,936,064	105,216	414,942	413,241	333,500	297,274	217,896	106,644	35,567	11,784

SURUHANJAYA PILIHAN RAYA MALAYSIA
DAFTAR PEMILIH TERKINI BULAN MEI 2022
STATISTIK JANTINA
(DIWARTAKAN PADA 16 JUN 2022)
MENGIKUT PARLIMEN

BAHAGIAN PILIHAN RAYA	JUMLAH	LELAKI	%	PEREMPUAN	%
SARAWAK					
P.192 MAS GADING	46,949	24,057	51.24	22,892	48.76
P.193 SANTUBONG	79,207	39,246	49.55	39,961	50.45
P.194 PETRA JAYA	109,344	53,605	49.02	55,739	50.98
P.195 BANDAR KUCHING	109,799	53,388	48.62	56,411	51.38
P.196 STAMPIN	120,486	60,926	50.57	59,560	49.43
P.197 KOTA SAMARAHAN	81,459	41,194	50.57	40,265	49.43
P.198 PUNCAK BORNEO	79,770	40,504	50.78	39,266	49.22
P.199 SERIAN	65,085	33,061	50.80	32,024	49.20
P.200 BATANG SADONG	32,521	16,062	49.39	16,459	50.61
P.201 BATANG LUPAR	42,943	21,499	50.06	21,444	49.94
P.202 SRI AMAN	50,042	25,191	50.34	24,851	49.66
P.203 LUBOK ANTU	28,953	14,637	50.55	14,316	49.45
P.204 BETONG	41,657	20,900	50.17	20,757	49.83
P.205 SARATOK	44,251	22,094	49.93	22,157	50.07
P.206 TANJONG MANIS	32,825	16,386	49.92	16,439	50.08
P.207 IGAN	28,239	13,948	49.39	14,291	50.61
P.208 SARIKEI	54,752	27,512	50.25	27,240	49.75
P.209 JULAU	34,748	17,732	51.03	17,016	48.97
P.210 KANOWIT	30,945	15,475	50.01	15,470	49.99
P.211 LANANG	87,242	43,084	49.38	44,158	50.62
P.212 SIBU	105,587	52,527	49.75	53,060	50.25
P.213 MUKAH	46,860	23,726	50.63	23,134	49.37
P.214 SELANGAU	45,359	22,951	50.60	22,408	49.40

SURUHANJAYA PILIHAN RAYA MALAYSIA
DAFTAR PEMILIH TERKINI BULAN MEI 2022
STATISTIK JANTINA
(DIWARTAKAN PADA 16 JUN 2022)
MENGIKUT PARLIMEN

BAHAGIAN PILIHAN RAYA	JUMLAH	LELAKI	%	PEREMPUAN	%
P.215 KAPIT	45,115	22,362	49.57	22,753	50.43
P.216 HULU RAJANG	43,247	22,088	51.07	21,159	48.93
P.217 BINTULU	113,025	57,499	50.87	55,526	49.13
P.218 SIBUTI	58,273	29,994	51.47	28,279	48.53
P.219 MIRI	142,698	71,156	49.86	71,542	50.14
P.220 BARAM	59,278	30,656	51.72	28,622	48.28
P.221 LIMBANG	41,878	21,384	51.06	20,494	48.94
P.222 LAWAS	33,527	17,359	51.78	16,168	48.22
SARAWAK Total	1,936,064	972,203	50.22	963,861	49.78

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : PUAN ALICE LAU KIONG YIENG
[LANANG]**

SOALAN

Puan Alice Lau Kiong Yieng [Lanang] minta **MENTERI KOMUNIKASI DAN MULTIMEDIA** menyatakan langkah-langkah yang berkesan untuk mengatasi masalah penyebaran berita palsu di media dan juga gambar-gambar/video seksual yang banyak memberi kesan buruk kepada masyarakat dan negara kita.

JAWAPAN

Tuan Yang di-Pertua,

Penguatkuasaan undang-undang di bawah perundangan sedia ada seperti Seksyen 505 Kanun Kesekeamanan dan Akta Komunikasi dan Multimedia 1998 (AKM 1998) akan terus dilaksanakan untuk membendung berita tidak benar atau mana-mana kandungan yang boleh menimbulkan kecelaruan dalam masyarakat dan keadaan yang tidak baik untuk keselamatan dan kestabilan negara serta kesejahteraan awam.

Pada masa ini, pihak Kementerian dan pihak berautoriti yang lain juga memainkan peranan aktif dalam mengesan dan memantau penularan berita/maklumat yang tidak benar yang timbul atau tular melibatkan perkara-perkara yang berada di dalam ruang lingkup pengawalseliaan serta bidang kuasa mereka, seterusnya mengeluarkan kenyataan menjelaskan atau menafikan sebarang berita palsu dan mengelirukan melibatkan agensi dan Kementerian masing-masing. Kenyataan-kenyataan penafian atau penjelasan yang dibuat akan

diterbitkan dalam portal sebenarnya.my sebagai repositori kepada berita-berita yang telah ditentusahkan dan untuk menjadi sumber rujukan bagi orang ramai menentusahkan sesuatu berita yang tular.

Usaha ini disokong oleh Pasukan Respons Pantas (PRP) yang menyelaras hebahan penafian atau penjelasan berkenaan berita yang tidak ditentusahkan kesahihan kepada masyarakat. Bagi tempoh 24 Mac 2020 sehingga 7 Julai 2022, sebanyak 509 penafian berita palsu telah disiarkan oleh PRP dan disebarluaskan melalui platform media rasmi di bawah K-KOMM seperti portal sebenarnya.my serta akaun media sosial rasmi K-KOMM dan jabatan/agensi di bawahnya.

Dalam pada itu, agensi penyiaran K-KOMM iaitu RTM dan BERNAMA turut sentiasa peka dan proaktif dalam menyampaikan maklumat berdasarkan sumber-sumber yang berautoriti melalui platform rasmi agensi bagi memastikan hanya berita dan maklumat yang tepat serta sahih disampaikan kepada masyarakat.

Bagi kandungan berunsur lucah, antara tahun 2018 sehingga Jun 2022, pihak SKMM telah menyekat sejumlah 5,266 laman web lucah, berdasarkan kesalahan di bawah Seksyen 233 Akta Komunikasi dan Multimedia 1998 [Akta 588]. Antara tahun 2020 sehingga Mei 2022 sejumlah 92 kes telah disiasat oleh SKMM melibatkan berita palsu secara umum dan enam daripadanya telah didakwa di mahkamah. Usaha yang dijalankan SKMM ini akan diteruskan selaras laporan dan aduan awam yang diterima, terutamanya yang melibatkan kandungan palsu yang boleh menjaskan keharmonian perhubungan antara berbilang kaum dan agama di dalam negara.

Berlandaskan aspirasi tersebut, pihak Kementerian akan meneruskan langkah advokasi dalam membudayakan amalan ‘semak sebelum sebar’. Dengan cara ini, rantai berita palsu akan dapat diputuskan dan tidak akan disebarluaskan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : PUAN ALICE LAU KIONG YIENG [LANANG]

TARIKH : JULAI – OGOS 2022

SOALAN

PUAN ALICE LAU KIONG YIENG [LANANG] minta **MENTERI PENGANGKUTAN** menyatakan usaha dan langkah yang telah dan akan diambil untuk meningkatkan pengangkutan awam di negeri Sarawak terutama di Sibu untuk mengelakkan kesesakan lalu lintas yang semakin teruk.

JAWAPAN

Tuan Yang Di Pertua,

1. Kerajaan telah mewujudkan skim Dana Bantuan Sementara Bas Berhenti-henti (ISBSF) bermula pada tahun 2012 termasuk di Sabah dan Sarawak. Objektif asasnya adalah untuk memastikan perkhidmatan bas berhenti-henti terutama di laluan-laluan yang tidak menguntungkan dapat terus beroperasi.
2. Program ISBSF diwujudkan bagi menangani kerugian di dalam operasi harian pengendali bas berhenti-henti bagi memastikan kesinambungan terhadap perkhidmatan berkenaan. Ia juga bertujuan bagi menggalakkan pengendali bas berhenti-henti memulihkan laluan yang telah ditamatkan perkhidmatan akibat kerugian yang dialami dan mendorong pengendali dalam meningkatkan mutu perkhidmatan dengan menambah kekerapan perjalanan dan membaiki keadaan bas sekaligus memperbaiki aksesibiliti rakyat.
3. Kerajaan Malaysia telah memperuntukkan dana sebanyak RM5,600,000 setahun bagi Sarawak untuk 11 syarikat pengusaha bas berhenti-henti berkaitan.
4. Di Sibu, sebanyak 4 syarikat bas yang telah menerima Dana Sokongan Sementara Bas Berhenti-henti (ISBSF). Antara syarikat tersebut adalah:
 - (a)Lanang Road Bus Company Berhad;
 - (b)Rejang Transport Sdn Bhd;
 - (c)Sungei Merah Bus Berhad; dan
 - (d)Teku Road Bus Co Sdn Bhd.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : PUAN ALICE LAU KIONG YIENG [LANANG]

SOALAN

PUAN ALICE LAU KIONG YIENG [LANANG] minta **MENTERI KANAN PENDIDIKAN** menyatakan senarai komputer riba/laptop yang telah diberi di bawah Skim Permohonan Bantuan Laptop Percuma untuk pelajar B40 Sarawak dan apakah kriteria untuk mendapat bantuan komputer riba/laptop sekiranya tidak diberikan bantuan tersebut walaupun memang layak untuk menerima.

JAWAPAN

Tuan Yang di-Pertua,

Untuk makluman Ahli Yang Berhormat, inisiatif Tabung CERDIK seperti yang diluluskan dalam Bajet 2021 adalah satu inisiatif pemberian peranti digital lengkap dengan pelan data kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. Tabung CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC). Kesemua 150,000 peranti digital di bawah inisiatif ini telah selesai diagihkan kepada murid B40 terpilih pada 29 Oktober 2021. Daripada jumlah tersebut, sebanyak 25,673 unit peranti telah diagihkan kepada murid yang layak di 204 buah sekolah di negeri Sarawak.

Pemilihan sekolah dan murid untuk inisiatif CERDIK adalah mengikut kriteria yang ditetapkan seperti berikut:

- i. murid B40 yang dikenal pasti di sekolah bawah KPM;
- ii. senarai sekolah rendah disusun mengikut kedudukan bilangan murid B40 tertinggi bagi kohort Tahun Empat di setiap pejabat pendidikan daerah (PPD);
- iii. senarai sekolah menengah disusun mengikut kedudukan bilangan murid B40 tertinggi bagi kohort Tingkatan Tiga di setiap PPD;
- iv. pemilihan sekolah di setiap PPD dibuat dengan mengambil kira keseimbangan lokasi sekolah di kawasan bandar dan luar bandar serta kemudahan capaian internet dan bekalan elektrik di kawasan sekitarnya; dan
- v. bagi sekolah yang terpilih, setiap murid B40 dalam kohort Tahun Empat di sekolah rendah atau kohort Tingkatan Tiga di sekolah menengah akan menerima peranti digital Tabung CERDIK.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
**DARIPADA : DATO' WIRA HAJI AMIRUDDIN BIN HAJI
HAMZAH [KUBANG PASU]**

SOALAN

DATO' WIRA HAJI AMIRUDDIN BIN HAJI HAMZAH
[KUBANG PASU] minta **MENTERI KEWANGAN** menyatakan jumlah belanja mengurus agensi LAKSANA (bertanggungjawab memantau pelaksanaan pakej ransangan ekonomi setelah berlaku pandemik COVID-19) bagi tahun 2020, 2021 dan 2022. Berapa ramai anggota LAKSANA. Adakah agensi ini akan terus beroperasi setelah perbelanjaan pakej ransangan tamat pada 31 Disember 2022.

JAWAPAN

Tuan Yang di-Pertua,

Agensi Pelaksanaan Ekonomi dan Koordinasi Strategik Nasional (Agensi LAKSANA) adalah sebuah agensi di bawah Kementerian Kewangan Malaysia (MOF) yang pada mulanya dipertanggungjawabkan untuk memantau pelaksanaan pakej-pakej rangsangan ekonomi. Penubuhan Agensi LAKSANA pada tahun 2020 dibuat berikutan penularan pandemik COVID-19 di mana wujud keperluan sebuah badan pemantau yang mengkoordinasi kerjasama di antara agensi Kerajaan bagi memastikan kelancaran pelaksanaan inisiatif yang diumumkan oleh MOF supaya bantuan tersebut segera sampai kepada rakyat dan perniagaan yang terkesan.

Bermula tahun 2021, Agensi LAKSANA turut diberi mandat untuk memantau pelaksanaan bajet tahunan negara iaitu Belanjawan 2021 dan yang terkini, Bajet 2022 sebagai usaha untuk meningkatkan kecekapan fiskal negara melalui pelaksanaan pelbagai inisiatif strategik yang dikhususkan untuk menyokong rakyat dan perniagaan serta memacu pertumbuhan ekonomi negara. Agensi LAKSANA kini merupakan urusetia kepada Jawatankuasa Induk Pemantauan Bajet 2022 yang dipengerusikan oleh YAB Perdana Menteri dan bertindak melaporkan kemajuan pelaksanaan 283 inisiatif di bawah Bajet 2022 kepada YAB PM secara bulanan.

Selain inisiatif yang melibatkan sumber fiskal Kerajaan, Agensi LAKSANA turut memantau dan melaporkan inisiatif bukan fiskal seperti inisiatif cukai, skim jaminan Kerajaan serta pembiayaan oleh badan berkanun seperti Bank Negara Malaysia.

Pencapaian pelbagai inisiatif dilaporkan secara mingguan oleh Menteri Kewangan sendiri kepada media sejak April 2020, dalam bentuk Laporan LAKSANA (kini dijenamakan semula sebagai Laporan Kewangan Rakyat) dan setakat ini, sebanyak 104 laporan telah dibentangkan.

NO SOALAN :61

Di samping mandat asal yang diterima oleh Agensi LAKSANA, agensi ini turut diberi amanah selaku urus setia kepada beberapa jawatankuasa yang lain iaitu yang pertama, urusetia bagi Majlis Pekerjaan Negara (NEC) yang bertanggungjawab menyelaras program-program berkaitan pekerjaan (employment) dan penciptaan pekerjaan di bawah Kementerian/Agenis yang terlibat seperti PERKESO, HRD Corp, PERHEBAT dan lain-lain. Pada tahun 2021, dengan pemantauan rapi oleh Agensi LAKSANA, NEC telah berjaya mencapai sasaran pengambilan pekerjaan sebanyak hampir 560 ribu pekerjaan (berbanding sasaran sebanyak 500 ribu pekerjaan) manakala pada tahun 2022, sasaran bagi NEC adalah sebanyak 600 ribu pekerjaan.

Selain NEC, Agensi LAKSANA juga merupakan penyelaras kepada inisiatif Program Transformasi GLIC/GLC yang diumumkan oleh Kerajaan pada tahun 2021 bertujuan memperkasa Syarikat-Syarikat Pelaburan Berkaitan Kerajaan (GLIC) dan Syarikat-Syarikat Berkaitan Kerajaan (GLC) untuk menarik pelaburan berkualiti tinggi serta menghasilkan peluang pekerjaan berkemahiran dan berpendapatan tinggi.

Berdasarkan mandat sedia ada, Agensi LAKSANA akan terus beroperasi bagi memastikan pelaksanaan inisiatif strategik Kerajaan khususnya di bawah bajet tahunan, NEC, Program Transformasi GLIC/GLC dibuat dengan berkesan dan mencapai hasrat yang ditetapkan. Agensi LAKSANA juga akan melaksanakan sebarang mandat baharu yang diterima dari semasa ke semasa khususnya melibatkan pemantauan dan pelaporan program serta mencadangkan langkah intervensi kepada pihak berkepentingan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
**DARIPADA : DATO' WIRA HAJI AMIRUDDIN BIN HAJI
HAMZAH [KUBANG PASU]**

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **MENTERI KEWANGAN** menyatakan jumlah hutang berkaitan 1MDB yang perlu dibayar oleh Kerajaan tahun 2022 dan 2023. Adakah jumlah yang dinyatakan dalam laporan oleh Kementerian Kewangan sebanyak USD6.5 bilion (RM28.6 bilion) benar. Adakah dana kutipan balik wang 1MDB mencukupi. Jika tidak, punca mana dana selebihnya akan diambil.

JAWAPAN

Tuan Yang di-Pertua,

Setakat 30 Jun 2022, dengan andaian kadar tukaran wang asing USD1.00 bersamaan dengan RM4.50, hutang 1MDB yang telah dan akan dibayar bagi tahun 2022 hingga 2039 adalah seperti di jadual berikut:

Perkara	Tahun 2022 (RM Juta)			Tahun 2023 (RM Juta)			Tahun 2024- 2038* (RM Juta)	Tahun 2039 (RM Juta)
	Prinsipal	Faedah	Prinsipal	Faedah	Faedah	Prinsipal	Faedah	
Jumlah yang telah dibayar	7,875 (USD1,750)	903.02						
Jumlah yang belum dibayar	7,875 (USD1,750)	667.16	13,500 (USD3,000)	584.5	4,312.50	5,000	143.75	
Jumlah Keseluruhan	15,750	1,570.18	13,500	584.5	4,312.50	5,000	143.75	

* Jumlah komitmen bayaran faedah adalah sebanyak RM287.5 juta setahun.

Tuan Yang di-Pertua,

Setakat 30 Jun 2022, jumlah dana pemulihan aset 1MDB yang telah berjaya didapatkan kembali adalah sebanyak **RM19.28 bilion** daripada beberapa mata wang asing termasuk dolar AS, dolar Singapura dan dolar Australia. Dana ini telah dan akan digunakan bagi tujuan pembayaran hutang 1MDB di mana setakat 30 Jun 2022, sebanyak **RM10.84 bilion** telah digunakan untuk tujuan pelunasan hutang 1MDB.

Bagi mengurangkan beban kewangan Kerajaan, usaha untuk mendapatkan semula semua dana berkaitan 1MDB yang telah

NO SOALAN :62

diseleweng akan diteruskan sama ada melalui tindakan undang-undang mahupun rundingan penyelesaian.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' WIRA HAJI AMIRUDDIN BIN HAJI
HAMZAH [KUBANG PASU]

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **MENTERI KEWANGAN** menyatakan prestasi aset-aset Tabung Haji yang dipindahkan ke Urusharta Jamaah Sdn Bhd (UJSB) sehingga kini. Adakah sebahagiannya telah dapat dilupuskan pada harga yang memberi keuntungan kepada UJSB. Bagaimana dengan aset-aset perladangan kelapa sawit ketika mana harga komoditi berada di paras yang sangat baik sekarang.

JAWAPAN

Tuan Yang di-Pertua,

Untuk makluman YB, antara mandat utama UJSB adalah untuk memaksimumkan nilai pemulihan melalui penambahbaikan nilai aset yang dipindahkan oleh Lembaga Tabung Haji (TH). Nilai semasa aset-aset TH yang dipindahkan kepada UJSB hanyalah sebanyak RM9.7 bilion berbanding kos pengambilalihan aset tersebut oleh UJSB dengan harga premium sebanyak RM19.9 bilion.

Langkah yang dilaksanakan untuk memenuhi mandat ini adalah seperti penstrukturran portfolio/ syarikat, pemulihan dan penyelengaraan aset, serta pelupusan aset secara berkala bagi mengurangkan impak kepada ekosistem kewangan negara. UJSB dengan bantuan Kerajaan bertanggungjawab untuk melunaskan sukuk bernilai RM27.5 bilion yang diterbitkan kepada TH.

Tuan Yang di-Pertua,

Bagi status portfolio saham UJSB, daripada 106 saham tersenarai yang dipindahkan kepada UJSB, 75 daripada kaunter saham ini telah dilupuskan kerana ia tidak menunjukkan potensi untuk pulih atau naik berdasarkan kos asal UJSB. Kos pengambilan saham-saham ini adalah tinggi jika dibandingkan pada harga pasaran ketika itu dan kebanyakannya juga tidak mudah diniagakan (*illiquid counters*). Pelupusan di pasaran terbuka ini dilaksanakan pada harga pasaran semasa di Bursa Malaysia atau melalui penawaran kembali kepada TH mengikut Perjanjian Hak Penafian Pertama (*First Right of Refusal*).

UJSB juga telah mengambil langkah untuk menstruktur semula komposisi portfolio sahamnya bagi menambah baik nilai aset syarikat, termasuk, antaranya, melabur semula dana yang diterima daripada pelupusan saham-saham kurang berdaya saing tersebut di dalam 329 kaunter saham tersenarai di dalam negara dan di pasaran antarabangsa terutamanya di dalam sektor saham yang berpotensi

atau memberi pulangan dividen yang stabil seperti sektor teknologi, perindustrian, dan sektor produk pengguna ruji (*consumer staples*).

Tuan Yang di-Pertua,

Untuk makluman YB, bagi prestasi aset syarikat perladangan sawit, iaitu UJ Estates (Holdings) Sdn. Bhd. (UJ Estates), prestasi ladang tersebut telah menunjukkan pertumbuhan yang memberangsangkan. Syarikat ini berjaya dibaik pulih dan merekod keuntungan sebanyak RM37.69 juta bagi tahun kewangan 2021 dengan baki tunai hampir RM65 juta. Ia merupakan keuntungan pertama yang dicatatkan semenjak ia dibeli oleh TH pada tahun 2015 dan dipindahkan kepada UJSB pada 2018.

Penilaian terhadap UJ Estates juga telah menujukkan peningkatan yang memberangsangkan iaitu sebanyak RM570 juta berbanding penilaian bagi tahun 2019 iaitu RM188 juta sahaja. Namun begitu, penilaian semasa ini masih di bawah paras kos asal yang perlu ditanggung oleh UJSB semasa pemindahan dilakukan iaitu sebanyak RM810 juta.

Tuan Yang di-Pertua,

Bagi 29 harta tanah yang diambil alih dari TH pula, hanya sebidang tanah kosong yang dilupuskan pada tahun 2020 melalui tender terbuka. Tanah kosong ini dilupuskan pada harga RM920 ribu berbanding nilai pasaran semasa berjumlah RM900 ribu. Usaha giat sedang dijalankan bagi membaiki bangunan-bangunan yang diambil alih dan pemasaran yang agresif dilaksanakan bagi meningkatkan kadar hunian bangunan.

Selain itu, sebanyak 5 buah hotel milik TH yang diambil dengan harga RM803 juta telah melalui penjenamaan semula di bawah “Raia Hotel”. Walaupun sektor hospitaliti terjejas teruk sepanjang tempoh pandemik Covid-19, Raia Hotel telah berjaya mencatatkan keuntungan sebelum cukai setakat Mei 2022 sebanyak RM3.8 juta, dengan hasil pendapatan kasar sebanyak RM25.75 juta. Operasi rangkaian Raia

NO SOALAN :63

Hotel ini berjaya dibaikpulih dengan suntikan modal untuk pengubahsuaian bagi memenuhi cita rasa pelanggan dan penambahbaikan mutu perkhidmatan bagi keselesaan pelanggan.

Tuan Yang di-Pertua,

UJSB akan terus memberi tumpuan terhadap usaha menambah baik dan mengoptimumkan nilai aset-aset yang diambil alih dari TH melalui pengurusan kos yang berhemah, penstrukturkan aset yang kurang berdaya maju, pelaburan semula dalam saham-saham yang berkualiti, serta pelupusan aset-aset secara teratur dalam memastikan ekosistem kewangan negara tidak terganggu, terutamanya dalam keadaan pasaran kewangan semasa yang mencabar.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' WIRA HAJI AMIRUDDIN BIN
HAJI HAMZAH (KUBANG PASU)**

SOALAN

DATO' WIRA HAJI AMIRUDDIN BIN HAJI HAMZAH (KUBANG PASU) minta **MENTERI TENAGA DAN SUMBER ASLI** menyatakan prestasi pencapaian negara terkini terhadap sasaran “*40% renewable energy capacity by 2035*” -pecahan mengikut sektor solar, angin, hidro dan tenaga bio. Apakah perancangan dan galakan Kerajaan bagi memastikan sasaran ini tercapai.

JAWAPAN

Tuan Yang di-Pertua,

1. Untuk makluman Ahli Yang Berhormat, campuran kapasiti Tenaga Boleh Baharu Negara sehingga suku pertama tahun 2022 adalah berjumlah 9,381MW atau 23% daripada keseluruhan kapasiti terpasang bekalan elektrik negara berbanding sasaran 40% pada tahun 2035.

2. Pecahan pencapaian kapasiti TBB ini berdasarkan sumber adalah seperti berikut:

- a) Hidro - 5,692 MW (62%)
- b) Tenaga bio - 1,138 MW (12%)
- c) Solar - 2,024 MW (21%)
- d) Hidro kecil - 527 MW (5%)

SOALAN NO : 64

3. Dalam memastikan supaya sasaran 40% kapasiti TBB pada 2035 tercapai, Kerajaan telah memperkenalkan Pelan Hala Tuju Tenaga Boleh Baharu Malaysia ataupun dengan izin, Malaysia Renewable Energy Roadmap (MyRER). Pelan ini telah menggariskan kerangka strategik untuk mencapai visi pembangunan TBB negara iaitu “Ke arah Sistem Tenaga Rendah Karbon” melalui pelaksanaan 4 tonggak berasaskan teknologi iaitu solar, bio-tenaga, hidro dan sumber-sumber baharu.
4. Beberapa program pembangunan TBB seperti program bidaan Solar Berskala Besar, Tarif Galakan TBB (*Feed-In Tariff - FiT*), Skim Pemeteran Bersih (*Net Energy Metering - NEM*), Penggunaan Sendiri (*Self-Consumption*) dan skim Tarif Elektrik Hijau (*Green Electricity Tariff - GET*) telah dibangunkan bagi menyokong aspirasi peningkatan TBB negara.
5. Selain itu, Kerajaan juga sedang meneliti potensi dan kebolehlaksanaan program korporat Power Purchase Agreement (PPA) untuk TBB bagi membolehkan pelanggan korporat seperti RE100, syarikat yang komited dalam menepati ciri *Environmental Social Governance* (ESG) untuk memperolehi bekalan elektrik dari sumber TBB.

Sekian Terima Kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' WIRA HAJI AMIRUDDIN BIN HAJI
HAMZAH [KUBANG PASU]**

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **PERDANA MENTERI** menyatakan jumlah subsidi tahunan yang terpaksa ditanggung oleh Petronas dalam membekalkan gas kepada industri di Malaysia sejak ianya mula diperkenalkan. Apakah Kerajaan berhasrat untuk menghentikan subsidi ini agar ianya dapat disalurkan terus kepada keperluan rakyat yang lain.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Jumlah keseluruhan subsidi melalui kehilangan pendapatan (foregone revenue) oleh PETRONAS bagi pembekalan gas asli kepada sektor elektrik dan bukan elektrik daripada tahun 1997 sehingga tahun 2019 adalah sebanyak RM278 bilion.

2. Selaras dengan pelan rasionalisasi subsidi, Kerajaan telah melaksanakan langkah menyemak semula harga gas asli yang dikawal kepada sektor elektrik dan bukan elektrik bagi Semenanjung Malaysia. Langkah ini bertujuan untuk memastikan jaminan keselamatan bekalan berikutnya pengeluaran gas asli daripada sumber domestik yang semakin

berkurangan, meningkatkan kecekapan penggunaan tenaga dan meminimumkan herutan dalam pasaran tenaga.

3. Langkah semakan semula harga gas asli kepada sektor elektrik dan bukan elektrik bagi Semenanjung Malaysia telah dilaksanakan sejak tahun 2014 dengan kenaikan sebanyak RM1.50/MMBtu pada setiap enam bulan dan telah mencapai harga rujukan pasaran pada tahun 2020. Langkah ini telah mengurangkan kehilangan pendapatan oleh PETRONAS sebanyak RM16.6 bilion iaitu dari RM22.9 bilion pada tahun 2014 kepada RM6.3 bilion pada 2019.
4. Namun begitu, semakan harga gas asli ini tidak melibatkan gas petroleum cecair atau *Liquefied Petroleum Gas* (LPG) yang masih diberikan subsidi oleh Kerajaan.
5. Selaras dengan usaha pemulihan ekonomi negara, harga gas asli kepada sektor elektrik masih dikawal oleh Kerajaan berikutan peningkatan harga minyak mentah global yang turut memberikan kesan kepada harga pasaran gas asli. Langkah ini diambil bagi mengurangkan impak kenaikan harga gas asli kepada tarif elektrik.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DATO' SERI ANWAR BIN IBRAHIM [PORT DICKSON]

SOALAN

Dato' Seri Anwar bin Ibrahim [Port Dickson] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan jumlah nilai penyelewengan minyak masak berbotol yang disubsidi sepannya tempoh program subsidi sementara dan langkah-langkah yang dilaksanakan untuk membendung ketirisan dan penyelewengan.

JAWAPAN:

Yang di-Pertua,

Tindakan penguatkuasaan bagi membanteras penyelewengan minyak masak paket dan botol telah dipertingkatkan bagi memastikan subsidi sampai ke golongan sasar. Sepanjang tahun 2018 sehingga Jun 2022, sebanyak 430 kes telah dihasilkan berkaitan penyelewengan minyak masak paket dan botol melibatkan nilai rampasan hampir RM15.7 juta.

Kerajaan menzahirkan komitmen tinggi dalam usaha membendung sebarang penyelewangan atau kepincangan berhubung barang keperluan bersubsidi negara terutama minyak masak. Justeru, Kementerian telah mengambil tindakan-tindakan seperti berikut:

- i. Mengarahkan pemeriksaan dan pengauditan di setiap peringkat rantai pengedaran minyak masak melalui aktiviti semakan *Pre-Delivery Plan*;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
- iii. Membuat risikan ke atas pengilang, pembungkus, pemberong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;
- iv. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan;
- v. Mempertingkatkan kerjasama dengan agensi-agensi penguatkuasaan lain seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM) dan Eastern Sabah Security Command (ESSCOM); dan
- vi. Mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegeruan di kalangan peniaga.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' SERI ANWAR BIN IBRAHIM
[PORT DICKSON]**

SOALAN

DATO' SERI ANWAR BIN IBRAHIM [PORT DICKSON] minta **MENTERI KANAN PENDIDIKAN** menyatakan jumlah pelajar dari keluarga B40, M40 dan T20 yang menuntut di Sekolah Berasrama Penuh (SBP), Maktab Rendah Sains MARA (MRSRM) dan Universiti Teknologi MARA (UITM) dari tahun 2012 hingga 2022.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam menyediakan akses pendidikan yang berkualiti dan saksama. KPM memberikan keutamaan kepada murid berpotensi dalam kalangan keluarga yang kurang berkemampuan untuk mengikuti pembelajaran di Sekolah Berasrama Penuh (SBP).

Untuk makluman Ahli Yang Berhormat, bagi pengambilan ke SBP untuk tahun 2022, jumlah penawaran dan kemasukan murid Tingkatan 1 mengikut kategori status sosioekonomi adalah seperti berikut:

TAHUN	B40				M40				T20				JUMLAH			
	Tawaran T1		Kemasukan T1		Tawaran T1		Kemasukan T1		Tawaran T1		Kemasukan T1		Tawaran T1		Kemasukan T1	
	Bil.	%	Bil.	%	Bil.	%	Bil.	%	Bil.	%	Bil.	%	Bil.	%	Bil.	%
2022	5,633	60.3	3,905	42.4	2,069	22.1	2,771	30.1	1,648	17.6	2,529	27.5	9,350	100.0	9,205	98.4

Data enrolmen murid SBP bagi tahun 2012 hingga 2022 adalah seperti berikut:

TAHUN	B40		M40		T20		JUMLAH
	Bil.	%	Bil.	%	Bil.	%	
2012	18,723	50.1	9,663	25.9	8,991	24.1	37,377
2013	18,004	48.6	10,769	29.1	8,282	22.4	37,055
2014	18,926	49.5	10,545	27.6	8,745	22.9	38,216
2015	18,207	46.1	11,968	30.3	9,312	23.6	39,487
2016	17,722	44.0	12,765	31.7	9,834	24.4	40,321
2017	18,892	45.8	11,987	29.1	10,325	25.1	41,204
2018	18,472	44.3	13,042	31.3	10,218	24.5	41,732
2019	18,997	44.6	12,910	30.3	10,707	25.1	42,614
2020	19,165	46.5	12,662	30.7	9,375	22.8	41,202
2021	19,541	46.1	13,570	32.0	9,318	22.0	42,429
2022	20,761	46.3	15,317	34.2	8,725	19.5	44,803

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' SERI ANWAR BIN IBRAHIM
[PORT DICKSON]

SOALAN

DATO' SERI ANWAR BIN IBRAHIM [PORT DICKSON] minta **MENTERI KEWANGAN** menyatakan jumlah keseluruhan subsidi dan pecahannya yang ditampung oleh Kerajaan bagi tahun 2022 dan cara-cara pembiayaan subsidi tersebut oleh Kerajaan.

JAWAPAN

Tuan Yang di-Pertua,

Jumlah peruntukan asal bagi bantuan dan subsidi yang disediakan dalam Bajet 2022 adalah berjumlah RM31 bilion dan pecahan adalah seperti berikut :

- i. Sara Hidup dan Kebajikan Masyarakat sebanyak 11.1 bilion terutamanya untuk Bantuan Keluarga Malaysia dan juga bantuan di bawah Jabatan Kebajikan Masyarakat;
- ii. Sektor Kepenggunaan sebanyak RM5.8 bilion yang meliputi subsidi barang asas termasuk produk petroleum dan minyak masak;
- iii. Sektor Pendidikan sebanyak RM4.0 bilion;
- iv. Biasiswa/Pinjaman Pelajaran sebanyak RM3.8 bilion;
- v. Sektor Pertanian sebanyak RM2.0 bilion;
- vi. Faedah dan Pinjaman sebanyak RM1.2 bilion;
- vii. Sektor Pengangkutan sebanyak RM1.0 bilion;
- viii. Sektor Komuniti dan Keagamaan sebanyak RM1.1 bilion;
- ix. Sektor Kesihatan sebanyak RM0.6 bilion;
- x. Pemberian elaun dan lain-lain bantuan sebanyak RM0.3 bilion; dan
- xi. Sektor Keselamatan sebanyak RM0.1 bilion.

Kerajaan komited untuk memastikan rakyat Malaysia terlindung daripada kesan penuh kenaikan harga komoditi dan makanan global. Sehubungan itu, Kerajaan telah mengekalkan harga bersubsidi semasa untuk petrol RON95 pada RM2.05 seliter, Diesel di stesen minyak pada RM2.15 seliter, LPG di bawah RM30 setong dan pek 1kg minyak masak pada RM2.50 walaupun harga sebenar tanpa subsidi melebihi dua kali ganda harga bersubsidi tersebut. Justeru, tanggungan subsidi untuk produk petroleum dan minyak masak sahaja diunjurkan akan mencecah RM40 bilion.

Di samping meneruskan subsidi sedia ada dan menanggung beban subsidi yang jauh lebih besar, Kerajaan juga telah

memperkenalkan subsidi baharu bagi membantu rakyat menghadapi cabaran kos sara hidup, khususnya meluluskan subsidi melebihi RM1 bilion untuk ayam dan telur serta subsidi elektrik melebihi RM6 bilion.

Berikutan tambahan subsidi, adalah diunjurkan perbelanjaan bantuan dan subsidi akan mencecah RM77.7 bilion untuk tahun 2022, jika harga bersubsidi serta harga pasaran minyak, arang batu, dan komoditi lain kekal pada paras semasa.

Untuk menampung peningkatan subsidi tersebut, Kerajaan akan membiayainya melalui hasil tambahan dan juga penjimatan perbelanjaan. Dalam konteks tersebut, Kerajaan akan menyemak dan menilai semula keberkesanan program subsidi dan insentif bagi memastikan agar peruntukan yang optimum disediakan bagi setiap program, dan yang paling penting, penjimatan yang diperoleh dapat disalurkan kepada mereka yang lebih memerlukan.

Buat masa ini, Kementerian Kewangan sedang memperincikan kaedah pelaksanaan subsidi secara bersasar bagi barang bersubsidi seperti produk petroleum. Ini adalah untuk memastikan pelaksanaan yang lancar dan adil bagi seluruh Keluarga Malaysia.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATO' SRI AZALINA OTHMAN SAID

SOALAN

YB DATO' SRI AZALINA OTHMAN SAID [PENGERANG] minta **MENTERI PERUMAHAN DAN KERAJAAN TEMPATAN** menyatakan pecahan aset Jabatan Bomba dan Penyelamat Malaysia (JBPM) dan bilangan *Rapid Intervention Motorcycle* (RIM) yang ditempatkan di Parlimen Pengerang.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) sentiasa berusaha untuk meningkatkan perkhidmatan kebombaan dengan menambah dan menaik taraf aset, jentera serta peralatan kebombaan di seluruh negara termasuklah di negeri Johor.

Pada masa ini, di kawasan Parlimen Pengerang terdapat sebanyak empat (4) buah Balai Bomba dan Penyelamat (BBP) iaitu BBP Bandar Penawar, BBP Punggai, BBP Sebana Cove dan BBP Sungai Rengit. Secara keseluruhannya, terdapat 10 buah jentera di Parlimen Pengerang dengan perincian seperti **Jadual 1** di bawah:

Jadual 1: Bilangan Jentera di BBP di Kawasan Parlimen Pengerang

BIL	BALAI BOMBA	BILANGAN JENTERA						
		FRT	LFRT	EMRS	ALP / TTL	Water Tanker	RIM	FOAM TENDER
1.	Bandar Penawar	1	1	1	0	1	0	0
2.	Punggai	1	0	0	0	0	0	0
3.	Sebana Cove	1	0	0	0	0	0	1
4.	Sungai Rengit	1	0	0	1	0	0	1
JUMLAH ASET JENTERA		4	1	1	1	1	0	2

Nota: *Fire Rescue Tander (FRT), Light Fire Rescue Tander (LFRT), Emergency Medical Rescue Service (EMRS), Aerial Ladder Platform (ALP), Turn Table Ladder (TTL), Rapid Intervention Motorcycle (RIM)*

Berhubung isu yang dibangkitkan oleh Ahli Yang Berhormat, Kementerian ingin memaklumkan bahawa objektif utama penubuhan *Rapid Intervention Motorcycle* (RIM) adalah untuk menangani insiden-insiden kecemasan di kawasan yang mempunyai masalah kesesakan jalan raya serta jalan sempit khususnya di bandar-bandar utama.

Oleh yang demikian, Kementerian berpandangan bahawa keperluan penyediaan pasukan RIM di kawasan Parlimen Pangerang adalah kurang mendesak tetapi ia akan terus dikaji dari semasa ke semasa berdasarkan risiko setempat. Walau bagaimanapun, pasukan RIM telah ditempatkan di beberapa lokasi yang strategik di negeri Johor melibatkan BBP Larkin, BBP Muar, BBP Penggaram dan BBP Kluang. Pecahan bilangan agihan RIM adalah seperti di Jadual 2:

Jadual 2: Bilangan RIM di BBP di Negeri Johor

BIL.	BALAI BOMBA	BIL. RIM
1.	Larkin	3
2.	Muar	3
3.	Penggaram	3
4.	Kluang	3
JUMLAH RIM		12

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' SRI AZALINA OTHMAN SAID
[PENGERANG]**

SOALAN

DATO' SRI AZALINA OTHMAN SAID [PENGERANG] minta **MENTERI PELANCONGAN, SENI DAN BUDAYA** menyatakan sekiranya terdapat dasar penyeliaan untuk pengendali penginapan dalam talian bagi mengelakkan unsur-unsur diskriminasi terhadap pelanggan.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa berusaha untuk memperkasakan mekanisme kawal selia urusan pelesenan dan penguatkuasaan industri pelancongan di bawah Akta Industri Pelancongan [Akta 482] dan peraturan-peraturan berkaitan. Ini termasuklah kawal selia ke atas syarikat pengusahaan pelancongan yang menawarkan pakej penginapan secara atas talian.
2. MOTAC sedia maklum akan populariti platform penempahan penginapan dalam talian (*Online Travel Agency - OTA*) yang semakin popular di Malaysia. Walaupun sebahagian besar OTAs ini adalah berpengkalan di luar negara, sebilangan daripada syarikat OTAs ini telah pun berdaftar dan berlesen dengan MOTAC, antaranya Traveloka, Hotel.com dan Klook.com. Inisiatif pendaftaran ini giat dijalankan bagi menggalakkan lebih banyak OTAs untuk mendaftar dengan MOTAC.
3. Dalam hal ini, MOTAC telah membangunkan Garis Panduan Syarikat Perniagaan Pengendalian Agensi Pelancongan Dan Agensi Pengembaraan (TOBTAB) Yang Menjalankan Perniagaan Dalam Talian sebagai panduan serta rujukan penggiat industri pelancongan. Garis Panduan ini antara lain telah mengambil kira keperluan atau ketetapan bahawa syarikat pengusahaan pelancongan yang membangunkan dan menggunakan platform dalam talian dalam segala pengurusan penjualan pakej pelancongan termasuklah pengendali penginapan hendaklah berlesen di bawah MOTAC. Garis Panduan ini juga telah menggariskan dengan jelas definisi perniagaan dalam talian serta syarat-syarat yang perlu dipenuhi oleh syarikat yang menjalankan perniagaan dalam talian.
4. MOTAC juga kini sedang giat meneliti kaedah untuk menjadikan kawal selia ini melangkaui had garis panduan sedia ada bagi memberi lebih manfaat kepada semua pihak termasuk pengguna, syarikat OTAs serta pengusaha premis penginapan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB DATUK SERI AZALINA OTHMAN SAID
(PENTERANG)**

SOALAN

DATUK SRI AZALINA OTHMAN SAID (PENTERANG) minta **MENTERI DALAM NEGERI** menyatakan berapa kes jenayah seksual kanak-kanak dilaporkan kepada pihak PDRM untuk tahun 2021 dan 2022 dan daripada jumlah kes tersebut, berapa kes didakwa di Mahkamah dan berapa kes dikelaskan sebagai NFA (no further action).

JAWAPAN

Tuan Yang Di Pertua,

Jumlah kes jenayah seksual kanak-kanak dilaporkan kepada PDRM adalah melibatkan siasatan di bawah Kanun Keseksaan dan juga Akta Kesalahan-kesalahan Seksual Terhadap Kanak-kanak (AKSTK) 2017.

Jenis kes yang disiasat di bawah Kanun Keseksaan ialah semua jenis kesalahan rogol dan seks luar tabii. Jumlah kes kesalahan rogol adalah sebanyak 1,605 bagi tahun 2021. Daripada jumlah tersebut 633 telah dituduh di mahkamah dan 194 kes telah dikelaskan sebagai ‘No Further Action’ (NFA). Bagi tahun 2022 sehingga Jun, 794 kes disiasat, 289 dituduh dan 65 kes telah dikelaskan sebagai NFA. Jumlah kes yang dinyatakan tersebut adalah jumlah keseluruhan kes yang dibuka termasuk melibatkan golongan dewasa. Kes melibatkan kanak-kanak adalah 80% daripada keseluruhan jumlah kes yang dinyatakan tersebut.

Bagi kesalahan seks luar tabii pula, jumlah kes yang disiasat bagi tahun 2021 adalah sebanyak 196 kes. 107 telah dituduh di mahkamah dan 15 kes telah di NFA. Bagi tahun 2022 sehingga Jun pula, jumlah kes yang disiasat adalah sebanyak 25 kes, 9 daripadanya telah dituduh dan 2 di NFA. Jumlah ini juga adalah melibatkan keseluruhan kes termasuk melibatkan golongan dewasa. Peratus kes seks luar tabiie yang melibatkan kanak-kanak adalah lebih kurang 25% daripada jumlah keseluruhan kes tersebut.

Bagi kes yang disiasat melibatkan AKSTK 2017 untuk tahun 2021 adalah sebanyak 1,080 kes iaitu 531 kes telah dituduh di mahkamah dan 148 kes NFA. Bagi tahun 2022 (Januari hingga Jun) sebanyak 572 kes telah dilaporkan termasuk sebanyak 94 kes telah dituduh di mahkamah dan 21 kes NFA.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB TUAN NGA KOR MING (TELUK INTAN)

SOALAN

TUAN NGA KOR MING (TELUK INTAN) minta **MENTERI DALAM NEGERI menyatakan jumlah bilangan :-**

- (a) stateless children dalam negara kita dan jumlah kanak-kanak yang dilahirkan oleh ibu warganegara Malaysia tetapi bapa warga asing yang masih menunggu kerakyatan; dan
- (b) langkah-langkah yang perlu dilakukan oleh Kerajaan untuk menyelesaikan masalah tersebut di atas.

JAWAPAN

Tuan Yang Di Pertua,

Untuk makluman Ahli Yang Berhormat, istilah *stateless* secara umumnya adalah merujuk kepada seseorang pada masa ini ialah “**seseorang yang tidak bernegara**” iaitu beliau tidak memiliki kewarganegaraan mana-mana Negara. Berdasarkan kepada istilah tersebut, **tiada golongan yang berstatus *stateless* di Malaysia, ini kerana tanpa dokumen perjalanan yang sah mereka tidak akan dibenarkan masuk ke negara ini.**

Dalam hal ini, bagi mereka yang berada dalam negara, Kementerian Dalam Negeri (KDN) melalui Jabatan Pendaftaran Negara (JPN) hanya akan merekodkan status sama ada seseorang individu sebagai **warganegara** atau **bukan warganegara** sahaja berdasarkan kepada status perkahwinan dan taraf kewarganegaraan ibu bapa kandung individu berkenaan sewaktu kelahiran berlaku. Sehubungan itu, JPN **tidak merekodkan individu yang tidak memiliki taraf kewarganegaraan (*stateless*)** dan JPN tidak mempunyai maklumat mengenai jumlah kanak-kanak yang tiada kerakyatan (*stateless*).

Berdasarkan rekod JPN, sebanyak **2,484 permohonan** kewarganegaraan yang diterima bagi individu di bawah umur 21 tahun yang dilahirkan di luar negara oleh ibu bertaraf warganegara yang berkahwin dengan bapa bertaraf bukan warganegara dari tahun 2017 hingga 30 Jun 2022. Dari jumlah berkenaan, sebanyak **2,332 permohonan** yang masih diproses.

KDN dan JPN sentiasa berusaha dan mengambil tindakan proaktif membantu menyelesaikan masalah masyarakat khususnya mengenai isu pendaftaran dokumen pengenalan diri **individu yang berkelayakan** dengan mengadakan pelbagai program turun padang dan khidmat nasihat berterusan yang dilaksanakan oleh Jabatan seperti Program Menyemai Kasih Rakyat (MEKAR) JPN, Program Aspirasi Keluarga Malaysia dan Program Kita Demi Negara.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' SRI AZALINA OTHMAN SAID
(PENGERANG)**

SOALAN

DATO' SRI AZALINA OTHMAN SAID (PENGERANG) minta **MENTERI PEMBANGUNAN WANITA, KELUARGA DAN MASYARAKAT** menyatakan mengapa kriteria kelayakan untuk program bantuan sosial JKM tidak mengambil kira perbezaan Pendapatan Garis Kemiskinan (PGK) mengikut negeri serta perbezaan saiz isi rumah, di mana ia adalah penting untuk memastikan bantuan diterima oleh isi rumah miskin tegar.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) menyediakan 11 skim bantuan kewangan yang diberikan secara bulanan atau secara *one-off*. Konsep pemberian bantuan kewangan ini adalah bersifat sementara dan saraan hidup bagi membantu individu atau keluarga dalam kalangan produktif dan tidak produktif yang tidak mampu dan berkeperluan, sehingga dapat dipulihkan untuk hidup berdikari atau meneruskan kehidupan yang lebih berkualiti.

Pecahan skim bantuan yang disediakan oleh JKM adalah seperti berikut:

Bil	Skim	Kadar	Kategori
1	Bantuan Warga Emas (BWE)	RM500	Bulanan
2	Bantuan Kanak-Kanak (BKK)	Minimum RM150 dan maksimum RM1000	Bulanan
3	Elaun Pekerja Orang Kurang Upaya (EPOKU)	RM450	Bulanan
4	Bantuan OKU Tidak Berupaya Bekerja (BTB)	RM300	Bulanan
5	Bantuan Penjagaan OKU Terlantar dan Pesakit Kronik Terlantar	RM500	Bulanan
6	Bantuan Am Persekutuan (BA)	Minimum RM100 dan maksimum RM350 sekeluarga	Bulanan
7	Bantuan Anak Pelihara (BAP)	RM250 bagi seorang kanak-kanak dan maksimum RM500 bagi dua orang kanak-kanak atau lebih.	Bulanan
8	Bantuan Latihan Perantis (BLP) / sebulan seorang	RM200	Bulanan

Bil	Skim	Kadar	Kategori
9	Bantuan Geran Pelancaran	RM2700	one-off
10	Bantuan Alat Tiruan/Alat Sokongan (BAT)	Mengikut harga sebenar yang telah ditetapkan.	one-off
11	Tabung Bantuan Segera (TBS) /	Maksimum RM300 atau (bagi bayaran bulan pertama bantuan bulanan/ <i>refund</i> adalah mengikut kadar bantuan bulanan yang diluluskan)	one-off

Bantuan kewangan ini diberikan kepada kumpulan sasar yang menepati kelayakan berdasarkan kepada nilai PGK Makanan 2019 iaitu RM1,169 bagi Semenanjung Malaysia dan Sarawak serta RM1,180 bagi Sabah dan Wilayah Persekutuan Labuan. Penggunaan nilai PGK Makanan 2019 sebagai kriteria asas kelayakan skim bantuan kebaikan mulai tahun 2022 adalah selaras dengan pembentangan Belanjawan 2022 pada 29 Oktober 2021. Nilai PGK Makanan 2019 ini digunakan agar pendekatan pembasmian kemiskinan lebih berfokus dan berkesan serta mengambil kira perbezaan antara daerah, kawasan bandar dan luar bandar.

Selain itu, penilaian kelayakan juga dilihat dari segi jumlah pendapatan per kapita semasa iaitu pada kadar RM310. Nilai PGK dan per kapita semasa yang telah ditetapkan ini telah mengambil kira keperluan bagi setiap negeri berdasarkan Kajian Semula PGK yang dijalankan oleh Unit Perancang Ekonomi, Jabatan Perdana Menteri (EPU, JPM), Jabatan Perangkaan Malaysia (DOSM) dan Kementerian Kesihatan Malaysia (KKM) pada tahun 2019.

Bagi Skim Bantuan Am (Negeri) yang menggunakan peruntukan Kerajaan Negeri, pertimbangan kelulusan adalah mengikut nilai PGK atau per kapita yang ditetapkan oleh negeri masing-masing seperti jadual berikut:

Nilai PGK dan per kapita yang digunakan bagi Skim Bantuan Am (Negeri) mengikut negeri

Bil	Negeri	PGK Makanan 2019 (RM)	PGK Negeri (RM)	Per kapita (RM)
1	Perlis	-	830	210
2	Kedah	-	720	244
3	Pulau Pinang	-	260	-
4	Perak	1169	-	
5	Selangor	1500	-	Tidak melebihi 350
6	WP Kuala Lumpur	1169	-	310
7	Negeri Sembilan	1169	-	-
8	Melaka	-	1279	-
9	Johor	1169	-	-
10	Pahang	1169	-	310
11	Terengganu	1169	-	310
12	Kelantan	1169	-	310
13	Sabah	1180	-	310
14	Sarawak	-	990	240
15	WP Labuan	1180	-	310

Tuan Yang di-Pertua,

Pendapatan Garis Kemiskinan merupakan panduan utama dalam pemberian bantuan kepada pemohon. Walau bagaimanapun, dalam situasi tertentu, aspek sokongan sosial keluarga seperti tanggungan keluarga, masalah kesihatan yang kronik, keperluan penjagaan yang rapi, psikososial, tahap ketidakupayaan ketua keluarga atau ahli keluarganya dan faktor-faktor lain yang boleh memberikan gambaran kedudukan kewangan dan perbelanjaan keluarga turut diambil kira dalam penilaian dan pemberian bantuan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI PANGLIMA HAJAH AZIZAH
BINTI DATUK SERI PANGLIMA HAJI MOHD
DUN [BEAUFORT]**

SOALAN

DATUK SERI PANGLIMA HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI ALAM SEKITAR DAN AIR** menyatakan berapa jumlah projek tebatan banjir di Sabah yang akan dilaksanakan untuk memperbaiki sistem perparitan dan saliran terutama di kawasan yang sering dilanda banjir.

JAWAPAN

Tuan Yang Di-Pertua,

1. Untuk makluman Yang Berhormat, sebanyak lima (5) projek telah berjaya disiapkan dalam RMKe-10 dan RMKe-11 dengan kos sebanyak RM53 juta yang dijangka akan memberi manfaat kepada 12,500 orang penduduk di sekitar kawasan projek.
2. Lanjutan daripada itu, Kerajaan telah meluluskan sebanyak tujuh belas (17) projek tebatan banjir dalam RMKe-11 di Negeri Sabah dengan jumlah anggaran peruntukan sebanyak RM 749 juta. Sebanyak tiga belas (13) projek dalam peringkat pelaksanaan, manakala empat (4) projek lagi dalam peringkat awalan projek. Kesemua projek RMKe-11 masih diteruskan di dalam RMKe-12.
3. Untuk makluman YB juga, berdasarkan kepada keputusan Mesyuarat Jemaah Menteri (MJM Tahun 1996), bersetuju menggariskan bahawa semua sistem saliran dalaman iaitu sistem saliran buatan adalah dibawah tanggungjawab Pihak Berkuasa Tempatan (PBT) manakala sistem saliran semulajadi iaitu sungai dan anak sungai adalah di bawah seliaan JPS.
4. Lanjutan daripada itu, Seksyen 50 Akta Jalan, Parit dan Bangunan 1974 (Akta 133) menjelaskan bahawa pihak berkuasa tempatan (PBT) hendaklah membina dan menyenggara parit dan alur air, manakala Jabatan Pengairan dan Saliran (JPS) diberi tanggungjawab sepenuhnya bagi mengurus dan menyenggara semua sungai termasuk sungai di kawasan PBT.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DATUK SERI PANGLIMA HAJAH AZIZAH BINTI DATUK SERI PANGLIMA HAJI MOHD DUN [BEAUFORT]

SOALAN

DATUK SERI PANGLIMA HAJAH AZIZAH BINTI DATUK SERI PANGLIMA HAJI MOHD DUN minta **MENTERI KESIHATAN** menyatakan:-

- (a) apakah punca utama peningkatan kes bantut dalam kalangan kanak-kanak bawah lima tahun; dan
- (b) apakah punca utama peningkatan kadar obesiti dalam kalangan dewasa.

JAWAPAN

Tuan Yang di-Pertua,

1. Kementerian Kesihatan Malaysia (KKM) telah melaksanakan beberapa kajian bagi mengkaji isu bantut dalam kalangan kanak-kanak. Antaranya ialah:

- (i) *Malnutrition among Children Under 5 Years Old in Putrajaya (2021);*

- (ii) *National Health Morbidity Survey* (NHMS 2019) yang turut mengkaji isu bantut dalam kalangan kanak-kanak; dan
- (iii) Laporan oleh UNICEF bertajuk *Double Burden of Child Malnutrition in Malaysia: A Landscape Analysis (Volume I)*, 2020.

2. Berdasarkan kajian-kajian ini, antara faktor utama yang menyumbang kepada masalah bantut ialah:

- (i) bayi yang dilahirkan dengan *intrauterine growth restriction* (IUGR) iaitu keadaan yang mana janin tidak berkembang sempurna di dalam kandungan;
- (ii) bayi yang dilahirkan kurang berat lahir/*low birth weight* (LBW) iaitu kurang daripada 2,500gm;
- (iii) kanak-kanak daripada keluarga berpendapatan rendah;
- (iv) kanak-kanak yang mempunyai ibu yang berpendidikan rendah;
- (v) kanak-kanak yang mempunyai bapa tidak bekerja;
- (vi) kanak-kanak yang tinggal di luar bandar;
- (vii) penggunaan botol susu – meningkatkan risiko jangkitan penyakit seperti cirit-birit jika botol dan puting susu tidak dibersihkan dengan betul;
- (viii) pemberian makanan yang terlalu awal atau lewat dari umur bayi 180 hari;
- (ix) tidak memberi anak makanan berkhasiat;
- (x) tidak memberi anak makanan yang mencukupi;
- (xi) tidak memberi anak makanan yang pelbagai;

- (xii) tidak memberi anak makanan yang bersih;
- (xiii) tidak memberi anak makanan yang selamat;
- (xiv) kekurangan makanan daripada sumber protein haiwan;
- (xv) jangkitan penyakit yang kerap seperti selsema dan batuk; dan
- (xvi) faktor ketinggian (genetik) ibu bapa iaitu ketinggian ibu kurang daripada 150 sentimeter (sm) serta ketinggian bapa kurang daripada 160sm.

3. Secara rumusannya, kanak-kanak bantut terjadi apabila gaya hidup serta corak pengambilan makanan yang tidak sihat berlaku terutama apabila terdapat masalah ekonomi serta sosial dalam masyarakat. Oleh itu, tindakan serta kerjasama semua pihak selain Kementerian Kesihatan amat diperlukan bagi menangani faktor kepada masalah bantut ini.

4. Dalam usaha menangani masalah bantut dalam kalangan kanak-kanak, Kementerian Kesihatan Malaysia juga menyeru semua ibu bapa untuk membawa anak-anak mereka ke fasiliti kesihatan kerajaan ataupun swasta bagi memantau pertumbuhan mereka.

Tuan Yang di-Pertua,

5. Berdasarkan kajian yang dijalankan oleh *World Health Organisation* (2021), punca utama peningkatan kadar obesiti dalam kalangan dewasa adalah disebabkan ketidakseimbangan pengambilan dan penggunaan tenaga harian. Perubahan dalam pola pemakanan dan aktiviti fizikal selalunya adalah hasil daripada perubahan persekitaran dan masyarakat yang dikaitkan dengan pembangunan dan kekurangan dasar sokongan dalam sektor seperti kesihatan, pertanian, pengangkutan, perancangan bandar, alam sekitar, pemprosesan makanan, pengedaran, pemasaran dan pendidikan.

6. Menurut Tinjauan Kebangsaan Kesihatan dan Morbiditi 2019:
- (i) 53.2 % orang dewasa di Malaysia mengamalkan 3 sudu teh gula dalam minuman yang disediakan sendiri setiap hari. Ini tidak termasuk pengambilan gula daripada minuman manis lain seperti minuman berkarbonat dan minuman pra-campuran serta makanan yang mengandungi gula tambahan;
 - (ii) 95% orang dewasa di Malaysia tidak mengambil sayur-sayuran dan buah-buahan mengikut saranan yang disyorkan. Makan sayur-sayuran dan buah-buahan yang mencukupi penting dalam pengurusan berat badan dan mencegah penyakit tidak berjangkit; dan
 - (iii) 1 daripada 4 orang dewasa di Malaysia adalah tidak aktif fizikal. Menurut World Health Organisation (2019), tidak aktif fizikal adalah penyumbang utama faktor risiko yang ke-4 bagi kematian di dunia.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI PANGLIMA HAJAH AZIZAH
BINTI DATUK SERI PANGLIMA HAJI MOHD
DUN [BEAUFORT]**

SOALAN

YB DATUK SERI PANGLIMA HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI PERUMAHAN DAN KERAJAAN TEMPATAN** menyatakan berapa jumlah rakyat yang telah mendapat manfaat program Satu Keluarga, Satu Rumah yang telah diumumkan oleh Perdana Menteri baru-baru ini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah mengadakan Mesyuarat Majlis Perumahan Mampu Milik Negara (MPMMN) Bilangan 1 Tahun 2022 yang dipengerusikan oleh YAB Perdana Menteri pada 10 Februari 2022. MPMMN adalah merupakan sebuah platform bagi membincangkan dan menyelaras hala tuju perancangan, pelaksanaan serta pemantauan penyediaan Rumah Mampu Milik (RMM) di seluruh negara selaras dengan matlamat Satu Keluarga Satu Rumah.

KPKT dengan kerjasama Kementerian Kewangan telah melancarkan Inisiatif Pembiayaan Perumahan Malaysia (i-Biaya). i-Biaya pada masa ini menawarkan tiga (3) jenis skim pembiayaan kepada kumpulan sasaran. Kumpulan sasaran dalam kalangan golongan yang tidak mempunyai pendapatan tetap atau kumpulan gig ekonomi melalui Skim Jaminan Kredit Perumahan (SJKP), pembeli rumah pertama mengikut julat

SOALAN NO: 76

pendapatan isi rumah di bawah Skim Rumah Pertamaku (SRP) dan Skim Rent-to-Own menerusi Perbadan PR1MA Malaysia (RTO PR1MA).

SJKP ditawarkan menerusi bank-bank terpilih oleh Syarikat Jaminan Kredit Perumahan Berhad. Sejak i-Biaya dilancarkan pada 14 April 2022, sebanyak 637 permohonan pembiayaan perumahan telah diluluskan menerusi SJKP bermula 15 April 2022 sehingga 30 Jun 2022. Seramai 438 orang (68.8%) pemohon yang berjaya berada dalam julat umur 35 tahun ke bawah. Sejak SJKP dilaksanakan pada tahun 2008, sebanyak 13,299 pinjaman bernilai RM1.53 billion telah diluluskan.

Berdasarkan data yang dilaporkan sehingga 30 Mei 2022, sebanyak 73,839 pinjaman pembiayaan telah diluluskan dengan nilai pinjaman keseluruhan sebanyak RM16.6 billion di bawah SRP yang ditawarkan oleh Cagamas Berhad. Daripada jumlah tersebut, 67,400 pemohon (91%) yang berjaya berada dalam julat umur 35 tahun ke bawah. Terdapat peningkatan pembiayaan sebanyak 27% (2,755) pada bulan Mei 2022 berbanding April 2022.

Sementara itu bagi Skim RTO, sehingga 15 Jun 2022, sebanyak 8 unit telah ditempah bagi pembiayaan menerusi RTO ini dengan nilai keseluruhan pembiayaan berjumlah RM 2,444,148.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

**DARIPADA : DR. AZMAN BIN ISMAIL
[KUALA KEDAH]**

TARIKH : JULAI – OGOS 2022

SOALAN

DR. AZMAN BIN ISMAIL [KUALA KEDAH] minta **MENTERI PENGANGKUTAN** menyatakan perkembangan pembinaan terminal feri baru Kuala Kedah. Bilakah projek ini dijangka selesai .

JAWAPAN

Tuan Yang Di Pertua,

Setakat 6 Julai 2022 proses perolehan kontraktor bagi projek ini secara tender terbuka telah selesai dilaksanakan dan kontraktor yang berjaya akan dilantik dalam masa terdekat setelah kelulusan Pihak Berkuasa Melulus bagi projek ini diperoleh. Kerja-kerja fizikal projek dijangka bermula pada suku tahun ketiga tahun 2022 bagi tempoh pelaksanaan selama 36 bulan.

Sekian, terima kasih.

SOALAN NO : 78

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DR. AZMAN BIN ISMAIL
(KUALA KEDAH)**

SOALAN

DR. AZMAN BIN ISMAIL (KUALA KEDAH) minta MENTERI PEMBANGUNAN LUAR BANDAR menyatakan perkembangan projek pembinaan jambatan merentasi Sungai Kedah di Alor Madi-Anak Ganu.

SOALAN NO : 78

JAWAPAN

Untuk makluman Yang Berhormat, Projek Membina Jalan dan Jambatan Alor Ganu/Titi Gajah, Daerah Kota Setar ke Titi Besi, Daerah Kubang Pasu, Kedah telah diluluskan oleh Unit Perancang Ekonomi, Jabatan Perdana Menteri di bawah Rancangan Malaysia Ke-11 (RMK11), *Rolling Plan* 1, tahun 2016, Kementerian Pembangunan Luar Bandar dengan kos keseluruhan projek berjumlah RM54.5 juta.

Skop projek ini ialah membina jalan sepanjang 4km dengan kelebaran berturap 6.5m termasuk menaiktaraf 500m di persimpangan Lebuhraya Darulaman (FT01) dan jalan ke Titi Besi serta membina 2 buah jambatan merentangi Sungai Anak Bukit dan Sungai Alor Ganu. Agensi Pelaksana projek ini ialah Jabatan Kerja Raya (JKR).

Untuk makluman Yang Berhormat, status semasa projek ini adalah dalam peringkat pengambilan tanah. Siasatan pengambilan tanah projek ini sedang dalam pelaksanaan. Projek ini juga sedang dalam proses perolehan tender. Peringkat pembinaan projek ini dijangka bermula pada bulan Januari 2023. Projek ini dijangka siap pada bulan Januari 2025.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DR. AZMAN BIN ISMAIL [KUALA KEDAH]

SOALAN

DR. AZMAN BIN ISMAIL [KUALA KEDAH] minta **MENTERI ALAM SEKITAR DAN AIR** menyatakan perkembangan pembinaan projek Rancangan Tebatan Banjir di utara Kedah bagi segmen Anak Bukit-Kubang Rotan-Kubang Pangas.

JAWAPAN

Tuan Yang Di-Pertua,

1. Untuk makluman Yang Berhormat, Kementerian Alam Sekitar dan Air (KASA) melalui Jabatan Pengairan dan Saliran (JPS) sedang giat menyiapkan baki kerja Projek Pembinaan Lencongan Sungai Baru rujukan CH0-12600 serta Kerja-kerja Berkaitan Rancangan Tebatan Banjir Sungai Kedah/Anak Bukit.
2. Kemajuan semasa projek ini adalah 38.67% dan dijangka siap pada 27 Disember 2023 selepas permohonan untuk pelanjutan masa diluluskan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DR. AZMAN BIN ISMAIL [KUALA KEDAH]

SOALAN

DR. AZMAN BIN ISMAIL minta **MENTERI KESIHATAN** menyatakan senaraikan ubat-ubat utama yang Kementerian gunakan untuk merawat COVID-19 serta jumlah dana yang digunakan untuk setiap ubat setakat ini.

JAWAPAN

Tuan Yang di-Pertua,

1. Ubat-ubatan utama yang digunakan di dalam rawatan Covid-19 terdiri daripada 29 ubat yang merangkumi 8 kelas ubat-ubatan seperti berikut:

Bil.	Nama Produk	Kelas Ubat
1.	Favipiravir 200mg Tablet	Antiviral
2.	Remdesivir 100mg Injection	Antiviral
3.	Tocilizumab 80 mg/4ml Injection	Monoclonal antibody

SOALAN NO. 80

Bil.	Nama Produk	Kelas Ubat
4.	Tocilizumab 200 mg/10ml Injection	Monoclonal antibody
5.	Tocilizumab 400 mg/20ml Injection	Monoclonal antibody
6.	Enoxaparin Sodium 20 mg injection	Anticoagulant
7.	Enoxaparin Sodium 40 mg injection	Anticoagulant
8.	Enoxaparin Sodium 60 mg Injection	Anticoagulant
9.	Dexamethasone Sodium Phosphate (8mg/2ml) Injection	Steroid
10.	Methylprednisolone Sodium Succinate 500mg Injection	Steroid
11.	Methylprednisolone Sodium Succinate 1g Injection	Steroid
12.	Dabigatran Etexilate 110mg Capsule	Anticoagulant
13.	Dabigatran Etexilate 150mg Capsule	Anticoagulant
14.	Atracurium Besylate 10 mg /ml in 2.5 ml Injection	Neuromuscular blocker
15.	Rocuronium Bromide 10 mg/ml Injection	Neuromuscular blocker
16.	Midazolam 5mg/ml Injection (3ml)	Short acting hypnotic sedative
17.	Midazolam 5mg/ml Injection (1ml)	Short acting hypnotic sedative

SOALAN NO. 80

Bil.	Nama Produk	Kelas Ubat
18.	Propofol 10 mg / ml (1%) Injection	Non barbiturate sedative
19.	Morphine Sulphate 10 mg/ml Injection	Opiod anagesic
20.	Fentanyl Citrate 50 mcg/ml Injection	Opiod anagesic
21.	Dexmedetomidine Hydrochloride 100mcg/ml Injection	Sedative
22.	Ketamine HCl 10 mg / ml Injection	Sedative
23.	Cisatracurium Besylate 2 mg/ml Injection	Neuromuscular blocker
24.	Fondaparinux 2.5 mg/0.5ml Injection	Anticoagulant
25.	Magnesium Sulphate 50% Injection	Antidysrhythmics
26.	Baricitinib 4mg Tablet	Imunosupressant agent
27.	Nirmatrelvir 150mg/ Ritonavir 100mg tab (Paxlovid)	Antiviral
28.	Molnupiravir 200mg cap (Lagevrio)	Antiviral
29.	Tixagevimab 150mg and Cilgavimab 150mg inj. (Evusheld)	Antiviral

2. Semenjak tahun 2020 sehingga 15 Jun 2022, Kementerian Kesihatan Malaysia telah membelanjakan sebanyak RM310.8 juta untuk tujuan perolehan ubat-ubatan dan juga rawatan COVID-19. Perincian

SOALAN NO. 80

kos adalah seperti berikut:

Tahun	Ubat dan Gas Perubatan (RM)	Ubat Antiviral (RM)	Jumlah (RM)
2020	6,601,036.00	-	6,601,036.00
2021	176,653,659.50	-	176,653,659.50
2022* sehingga 15 Jun 2022	72,141,266.30	55,404,144.97	127,545,411.27
	255,395,961.80	55,404,144.97	310,800,106.77

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DR. AZMAN BIN ISMAIL (KUALA KEDAH)

SOALAN

PR-1452-T06242

DR. AZMAN BIN ISMAIL [KUALA KEDAH] minta **MENTERI PERTANIAN DAN INDUSTRI MAKANAN** menyatakan jumlah tanah berstatus "pertanian" yang pernah digunakan untuk penanaman padi yang telah ditukarkan status kepada "kediaman", mengikut negeri di Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, kuasa bagi pengurusan tanah di Malaysia adalah berdasarkan kepada Kanun Tanah Negara 1965 (KTN) dan peraturan/kaedah tanah negeri yang dikeluarkan dari semasa ke semasa oleh Pihak Berkuasa Negeri (PBN) dan Perlembagaan Persekutuan. Perkara 74 dalam Senarai 2 (Senarai Negeri) dalam Jadual Kesembilan, juga memperuntukkan bahawa urusan tanah dan pertanian termasuk di bawah kuasa perundangan dan pentadbiran Kerajaan Negeri. Justeru, Kementerian Pertanian dan Industri Makanan (MAFI) tidak dapat menyediakan maklumat terperinci mengenai jumlah kluasan tanah berstatus pertanian yang pernah digunakan untuk penanaman padi yang telah ditukarkan status kepada kediaman mengikut negeri di Malaysia.

Untuk makluman Ahli Yang Berhormat, MAFI hanya merekodkan pasel padi aktif mengikut negeri untuk mengeluarkan data pengeluaran hasil padi negara. Jumlah kluasan pasel padi negara adalah sebanyak 283,911 hektar pada tahun 2021. Kerajaan juga telah mengambil langkah proaktif untuk mengoptimumkan penggunaan tanah sawah melalui pelaksanaan pelbagai program antaranya ialah melalui pengurusan tanah sawah yang cekap secara *contract farming*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN BARU BIAN [SELANGAU]

SOALAN

Tuan Baru Bian [Selangau] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan Kerajaan telah mengumumkan penghapusan harga siling bagi ayam dan telur serta menghentikan subsidi bagi minyak masak botol 2kg, 3kg dan 5kg mulai 1 Julai 2022. Malah sebelum pengumuman ini, terdapat peningkatan mendadak dalam kos sara hidup yang dirasai oleh semua segmen masyarakat, terutamanya mereka yang berpendapatan rendah. Apakah langkah-langkah khusus yang akan diambil oleh Kementerian untuk membantu golongan berpendapatan rendah yang akan terjejas oleh langkah-langkah ini.

JAWAPAN

Yang di-Pertua,

Pasukan Khas Jihad Tangani Inflasi yang telah diumumkan pada 30 Jun 2022, diketuai oleh YB Menteri Komunikasi dan Multimedia adalah bertujuan untuk meneliti, memantau serta mencadangkan kepada Kerajaan langkah-langkah segera bersifat jangka pendek dan sederhana untuk dilaksanakan bagi menangani isu inflasi.

Bagi pelaksanaan inisiatif yang melibatkan implikasi dasar, maka ia akan diangkat kepada Majlis Tindakan Sara Hidup Negara (NACCOL) dan Jemaah Menteri.

Pasukan Khas Jihad Tangani Inflasi ini bersidang 2 kali seminggu dan keahlian di peringkat Menteri adalah seperti berikut:

- (i) Menteri Komunikasi dan Multimedia (K-KOMM)-Pengerusi;
- (ii) Menteri Kewangan (MOF);
- (iii) Menteri Pertanian dan Industri Makanan (MAFI);
- (iv) Menteri Perdagangan Dalam Negeri dan Hal Ehwal Pengguna (KPDNHEP);
- (v) Menteri di Jabatan Perdana Menteri (Ekonomi);
- (vi) Menteri Wilayah Persekutuan (KWP);
- (vii) Menteri Pembangunan Usahawan dan Koperasi (KUSKOP); dan
- (viii) Ketua Setiausaha Negara (KSN).

Pasukan Khas ini turut dianggotai oleh 11 orang pegawai kanan kerajaan termasuk dari Majlis Keselamatan Negara (MKN), Bank Negara Malaysia (BNM), Jabatan Perangkaan (DOSM) dan Polis Diraja Malaysia (PDRM).

Ahli Pasukan Khas Jihad Tangani Inflasi (JIHAD) tidak menerima sebarang elauan khas. Lain-lain kementerian boleh dipanggil sekiranya terdapat isu timbul terutamanya melibatkan kemaslahatan rakyat. Pasukan Khas JIHAD ini adalah bersifat *action-oriented*, justeru ia akan mengutamakan penyelesaian segera sesuatu masalah yang boleh menyebabkan kenaikan barang dan perkhidmatan.

Pasukan Khas Jihad Tangani Inflasi memberi penekanan dan tumpuan

terhadap strategi yang memberi impak segara bagi mengubah persepsi dan jangkaan (*expectation*) rakyat. Sepanjang penubuhan pasukan ini, beberapa keputusan penting telah diambil seperti berikut:

- (i) Pelaksanaan operasi bersepadau KPDNHEP bersama Polis Diraja Malaysia (PDRM), Jabatan Kastam Diraja Malaysia (Kastam), Jabatan Perkhidmatan Kuarantin dan Pemeriksaan Malaysia (MAQIS) dan Jabatan Sukarelawan Malaysia (RELA) bagi menangani ketirisan minyak masak bersubsidi ke luar negara;
- (ii) Memperkenalkan Bakul Makanan Siswa Keluarga Malaysia berharga RM3.50 sepinggan di universiti-universiti;
- (iii) Peluasan Program Jualan Keluarga Malaysia (PJKM) ke 600 kawasan Dewan Undangan Negeri (DUN) di seluruh negara hingga akhir tahun 2022;
- (iv) pewartaan larangan eksport minyak sawit tulen dalam bungkusan polibeg; dan
- (v) Mekanisme penetapan harga siling minyak masak botol tidak bersubsidi ditentukan secara bulanan untuk seluruh Malaysia mengikut harga purata minyak sawit mentah (CPO) bagi satu tan metrik di pasaran dunia pada bulan sebelumnya. Harga siling minyak sawit botol 5kg untuk Sabah, Sarawak dan Labuan ditetapkan pada paras RM34.70 sama seperti di Semenanjung, berkuatkuasa pada 8 Ogos ini. Turut ditentukan adalah harga siling minyak masak tidak bersubsidi kemasan botol seperti berikut:
 - (a) 1kg iaitu RM7.70;
 - (b) 2kg iaitu RM14.70; dan
 - (c) 3kg iaitu RM 21.70.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN BARU BIAN [SELANGAU]

SOALAN

TUAN BARU BIAN [SELANGAU] minta **PERDANA MENTERI** menyatakan Malaysia mencatatkan peningkatan kadar kemiskinan tertinggi di negeri Sabah, Sarawak, Kelantan dan Kedah pada tahun ini disebabkan oleh ketidaksamaan dan pembangunan yang tidak seimbang di seluruh Malaysia dari segi kekayaan, pendapatan, pendidikan dan infrastruktur. Apakah rancangan khusus yang perlu dilakukan oleh Kerajaan untuk menyelesaikan masalah yang berbangkit dari segi pengagihan kekayaan dan meningkatkan tahap pendidikan dan pendapatan golongan yang kurang berasib baik, terutamanya di Sarawak.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Agenda pengagihan ekonomi yang adil dan saksama merentas semua kumpulan pendapatan, etnik, wilayah dan rantaian bekalan merupakan landasan pembangunan untuk menjadikan Malaysia negara yang makmur, inklusif dan mampan. Bagi tujuan ini, Kerajaan komited untuk memastikan tiada ahli Keluarga Malaysia yang ketinggalan.
2. Secara umumnya, Kerajaan akan meneruskan strategi dan inisiatif yang dilaksanakan bagi menangani kemiskinan dan meningkatkan pembangunan ekonomi serta merapatkan jurang pembangunan kawasan luar bandar, khususnya Sarawak, melalui peningkatan akses kepada kemudahan asas dalam tempoh Rancangan Malaysia Kedua Belas (RMKe-12), 2021-2025 seperti berikut:
 - i. Mempergiat penyediaan infrastruktur asas di kawasan luar bandar dan pedalaman antaranya beberapa pakej Lebuhraya Pan Borneo yang dapat meningkatkan ketersambungan dan mobiliti;
 - ii. Meningkatkan liputan bekalan air luar bandar termasuk bekalan air alternatif dan sistem sanitasi;
 - iii. Meningkatkan liputan bekalan elektrik luar bandar termasuk memperkuuh sistem bekalan elektrik di Sarawak dengan pelaksanaan projek hidroelektrik Baleh berkapasiti 1,285 megawatt yang dijangka siap pada tahun 2025;
 - iv. Menambah baik kesalinghubungan pengangkutan antara kawasan luar bandar dan bandar bagi menggalakkan lagi integrasi ekonomi; dan
 - v. Memperluas liputan jalur lebar bagi meningkatkan aktiviti sosioekonomi melalui platform digital dengan pelaksanaan Pelan Jalinan Digital Negara (JENDELA) ini termasuk menyediakan 636 tapak di Sarawak.

3. Pendidikan merupakan langkah utama dalam mengeluarkan masyarakat daripada kelompok kemiskinan. Kerajaan telah memberi tumpuan kepada Pendidikan TVET di Sarawak melalui 52 buah Institut Latihan Kemahiran Awam (ILKA) di Sarawak yang meliputi GIATMARA, Institut Kemahiran MARA (IKM), Institut Latihan Perindustrian (ILP), Institut Kemahiran Belia Negara, Politeknik dan Kolej Komuniti serta Institut Latihan di bawah Kementerian Pertanian dan Industri Makanan.
4. Dengan adanya ILKA ini, ia secara langsung akan meningkatkan lagi kebolehpasaran belia Sarawak dan peluang untuk mendapatkan pekerjaan yang lebih baik serta menikmati kehidupan yang lebih terjamin. Latihan dan peluang peningkatan kemahiran ini juga mampu menyediakan tenaga kerja berkemahiran di Sarawak untuk memenuhi keperluan industri.
5. Di samping itu, status sosioekonomi Bumiputera Sarawak ditambah baik antaranya melalui Program Khas Bumiputera Sarawak dengan mewujudkan lebih banyak peluang latihan, pekerjaan, pemilikan tanah dan aktiviti ekonomi bernilai tinggi bagi meningkatkan taraf hidup rakyat serta mengurangkan kemiskinan dan ketidaksamarataan dalam kalangan rakyat.
6. Usaha Kerajaan Persekutuan adalah sebagai pelengkap kepada usaha oleh Kerajaan Negeri Sarawak sendiri yang dilihat berkemampuan untuk melaksana pembangunan berdasarkan perancangan komprehensif pada peringkat negeri sendiri.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN BARU BIAN
(SELANGAU)**

SOALAN

Minta **MENTERI PERTAHANAN** menyatakan Jalan Jiwa Murni dari Ba' Kelalan ke Bario adalah projek yang dibiaya oleh Persekutuan yang dianugerahkan kepada tentera. Projek ini dimulakan pada tahun 2012 dan dijadualkan siap pada tahun 2018 tetapi masih tidak lengkap kerana terdapat kira-kira 7 km lagi untuk sampai ke perkampungan Kelabit di Kampung Pa Lungan berdekatan Bario. Apakah punca kelewatan itu. Bilakah projek ini dijangka siap dan berapa kos projek setakat ini.

JAWAPAN

Tuan Yang Di-Pertua,

Projek Jiwa Murni bagi pembinaan jalan dari Ba'kelalan ke Bario dilaksanakan secara berfasa iaitu **Fasa 1 melibatkan jajaran sepanjang 13 km yang telah siap sepenuhnya pada Ogos 2018.** Projek telah diserahkan kepada Kerajaan Negeri Sarawak pada September 2018. Walau bagaimanapun, jajaran ini telah mengalami kerosakan yang teruk kerana tidak dibuat senggaraan oleh JKR Sarawak. Manakala **Fasa 2 pula melibatkan jumlah jajaran sepanjang 21 km iaitu jajaran ke Lapo Bunga sepanjang 7km dan jajaran ke Bario sepanjang 14km.** Projek telah mula dilaksanakan pada Mei 2016 dan projek sepatutnya siap pada April 2018.

Walau bagaimanapun, projek telah mengalami kelewatan disebabkan oleh beberapa faktor seperti keadaan cuaca yang sering berlaku hujan di kawasan pedalaman dan juga pandemik COVID-19 yang melanda negara. Selain itu, kejadian cerun runtuh di jajaran Ba'kelahan ke Bario pada Fasa 1 telah menyebabkan penghantaran bahan binaan dan pekerja ke tapak tergendala. Projek dijangka siap sepenuhnya pada Oktober 2022 dengan kos keseluruhan projek sebanyak RM116 juta.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN CHA KEE CHIN [RASAH]

SOALAN

Tuan Cha Kee Chin [Rasah] minta **MENTERI ALAM SEKITAR DAN AIR** menyatakan peruntukan yang telah disalurkan untuk semua sungai di daerah Seremban sejak tahun 2018 sehingga 2022. Berikan senarai nama sungai dan jumlah peruntukan secara terperinci.

SOALAN NO: 85**JAWAPAN**

Tuan Yang Di-Pertua,

Untuk makluman YB, berikut adalah peruntukan yang telah disalurkan untuk semua sungai di Daerah Seremban sejak tahun 2018 sehingga 2022.

TAHUN 2018		
BIL	NAMA PROJEK	PERUNTUKAN
1	Kerja-Kerja Membina Penahan Tebing Sungai Di Anak Air Sungai Beranang Kampung Daching Seberang dan Lain-Lain kerja berkaitan mukim Lenggeng Daerah Seremban, NSDK	71,505.00
2	Kerja-Kerja Membina Penahan Tebing Sungai Di Sungai Batang Labu Kampung Batu dan Lain-Lain kerja berkaitan mukim Labu Daerah Seremban, NSDK	65,750.00
3	Kerja-Kerja Membina Penahan Tebing Sungai Di Sungai Lambar Di Kampung Lambar dan Lain-Lain kerja berkaitan Mukim Labu Daerah Seremban, NSDK	101,460.00
4	Kerja-Kerja Struktur Pwnahan Tebing di Anak Sungai Batang Labu, Kampung Kubang Mukim Labu, Daerah Seremban NSDK	11,000.00
	JUMLAH	249,715.00

SOALAN NO: 85

TAHUN 2019		
BIL	NAMA PROJEK	PERUNTUKAN
1	Kerja-kerja Penyaluran Sungai Bemban di Kampung Bemban Mukim Rantau Daerah Seremban NSDK	20,000.00
2	Kerja-kerja Penyaluran Sungai Kuala Sawah dan lain-lain kerja berkaitan di Kampung Kuala Sawah Mukim Rantau Daerah Seremban NSDK	20,000.00
3	Kerja-kerja Penyaluran Sungai Mormor dan lain-lain kerja berkaitan di Kampung Stesen Mukim Setul Daerah Seremban NSDK	20,000.00
4	Kerja-kerja Penyaluran Sungai Batang Jerlang dan lain-lain kerja berkaitan Mukim Pantai Daerah Seremban NSDK	19,895.00
5	Kerja-kerja Penyaluran Sungai Mendum di Kg Mendum dan lain-lain kerja berkaitan Mukim Lenggeng Daerah Seremban NSDK	40,000.00
6	Kerja-kerja Penyaluran Semula Sungai Jijan di Kg Jijan dan Lain-lain kerja berkaitan, Mukim Labu Daerah Seremban NSDK	40,000.00
7	Kerja-kerja Penyaluran Semula Sungai Tarun di Kg Tarun dan Lain-lain kerja berkaitan, Mukim Lenggeng Daerah Seremban NSDK	40,000.00
8	Kerja-kerja Penyaluran Sungai Mahang dan lain-lain kerja berkaitan di Kg Sg Mahang Daerah Seremban NSDK	19,900.00
9	Kerja-kerja Penyaluran Sungai Gadong dan lain-lain kerja berkaitan di Kg Gadong Daerah Seremban NSDK	10,000.00
10	Kerja-kerja Penyaluran Sungai Kayu Ara dan lain-lain kerja berkaitan di Kg Sungai Kayu Ara Daerah Seremban NSDK	19,800.00

SOALAN NO: 85

11	Kerja-kerja Penyaluran Sungai Belangkan dan lain-lain kerja berkaitan di Kg Ulu Belangkan Daerah Seremban NSDK	20,000.00
12	Kerja-kerja Penyaluran Sungai Jerangkang dan lain-lain kerja berkaitan di Kg Jerangkang Mukim Labu Daerah Seremban NSDK	20,000.00
13	Kerja-kerja Penyaluran Sungai Chelet dan lain-lain kerja berkaitan di Kg Chelet Mukim Setul Daerah Seremban NSDK	20,000.00
14	Kerja-kerja Penyaluran Anak Sungai Linggi dan lain-lain kerja berkaitan di Kg Dusung Nyior Mukim Rasah Daerah Seremban NSDK	20,000.00
	JUMLAH	329,595.00

TAHUN 2021

BIL	NAMA PROJEK	PERUNTUKAN
1	Kerja-Kerja Pembinaan Rubble Wall Di Sg Linggi, Taman Happy, Mukim Rasah, Daerah Seremban	120,000.00
2	Kerja Pembaikan Tebing Sungai Paroi Di Kg Pachor Dan Kg Paroi Serta Lain-Lain Kerja Berkaitan, Mukim Ampangan, Daerah Seremban	90,000.00
3	Kerja-Kerja Pembaikan Tebing Sg Batang Penar di Kg Blok A, Mukim Ampangan, Daerah Seremban	90,000.00
4	Kerja Pembaikan Tebing Sungai Tarun Di Kg Tarun Serta Lain-Lain Kerja Berkaitan, Mukim Lenggeng, Daerah Seremban	90,000.00

SOALAN NO: 85

5	Kerja Pembaikan Tebing Sungai Mahang Di Kg Sg Mahang Dan Lain-Lain Kerja Berkaitan, Mukim Setul, Daerah Seremban	60,000.00
6	Kerja-Kerja penyaluran Sg Kachung, Sg Nyatoh dan Sg Kuala Sawah, Mukim Rantau, Daerah Seremban, NSDK	47,000.00
7	Kerja Penyaluran Sungai Kg Ara Dan Lain-Lain Kerja Berkaitan, Mukim Rasah, Daerah Seremban	90,000.00
8	Kerja Pembaikan Tebing Sungai Asahan Di Kg Palegong, Mukim Labu, Daerah Seremban	40,000.00
9	Kerja-Kerja Pembaikan Tebing Sungai Setul di Kg Batu 8, Mantin serta Lain-Lain Kerja Berkaitan, Mukim Setul, Daerah Seremban	90,000.00
10	Kerja Pembaikan Tebing Sungai Lambar di Kg Pulau Serta Lain-Lain Kerja Berkaitan, Mukim Labu, Daerah Seremban	123,000.00
11	Kerja-Kerja Penyaluran Sg Sikamat di Taman Venterinar, Mukim Pantai, Daerah Seremban, NSDK	19,990.00
12	Kerja-Kerja Pembaikan Tebing Sg Batang Penar di Jambatan UTC Ampangan, Daerah Seremban, NSDK	19,990.00
13	Kerja-Kerja Penyaluran Sg Batang Nilai di Kg Baru Nilai, Mukim Setul, Daerah Seremban, NSDK	19,950.00
14	Kerja-Kerja Penyaluran Anak Air Sungai Paroi Di Kg Sungai Landak, Mukim Ampangan, Daerah Seremban, Negeri Sembilan Darul Khusus	19,990.00
15	Kerja-Kerja Kecemasan Penahan Tebing di Sg Batang Jerlang, Mukim Pantai, Daerah Seremban, NSDK	19,900.00
	JUMLAH	939,820.00

SOALAN NO: 85

TAHUN 2022		
BIL	NAMA PROJEK	PERUNTUKAN
1	Kerja-Kerja Membina Penahan Tebing Sungai Bemban Serta Lain-Lain Kerja Berkaitan, Mukim Rasah, Daerah Seremban, Negeri Sembilan	136,100.00
2	Kerja-kerja Membina Penahan Tebing Sungai Batang Jerlang, Mukim Pantai, Daerah Seremban, Negeri Sembilan Darul Khusus	183,190.00
3	Kerja-Kerja Membina Penahan Tebing Sungai Lambar di Kg Lambar Serta Lain-Lain Kerja Berkaitan, Mukim Labu, Daerah Seremban, NSDK	118,180.00
4	Kerja-Kerja Membina Penahan Tebing Sungai Jijan Di Kg Jijan Serta Lain-Lain Kerja Berkaitan, Mukim Lenggeng, Daerah Seremban, NSDK	165,910.00
5	Kerja-Kerja Pembaikan Tebing di Sungai Batang Benar di Kg Batang Benar Serta Lain-Lain Kerja Berkaitan, Mukim Setul, Daerah Seremban, NSDK	136,640.00
6	Kerja-Kerja Penyaluran Sungai Rawa Serta Lain-Lain Kerja Berkaitan, Mukim Lenggeng, Daerah Seremban, Negeri Sembilan Darul Khusus	19,900.00
7	Kerja-Kerja Penyaluran Anak Sungai Paroi, Mukim Ampangan, Daerah Seremban, Negeri Sembilan Darul Khusus	19,900.00
8	Kerja-Kerja Penyaluran Sungai Mor-Mor Di Kg. Stesen Nilai, Mukim Setul, Daerah Seremban, Negeri Sembilan Darul Khusus	19,930.00
	JUMLAH	799,750.00

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN CHA KEE CHIN [RASAH]

SOALAN

TUAN CHA KEE CHIN [RASAH] minta **MENTERI KANAN PENDIDIKAN** menyatakan nama sekolah dan jumlah peruntukan yang telah diterima oleh setiap SJK (Cina), SJK (Tamil) dan SMJK di daerah Seremban untuk tahun 2018, 2019, 2020, 2021 dan 2022 (setakat ini).

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) sentiasa komited dalam usaha untuk menyediakan prasarana dan kemudahan infrastruktur pendidikan kepada semua sekolah termasuk di daerah Seremban.

Sepanjang tahun 2018 sehingga 15 Julai 2022, KPM telah menyalurkan peruntukan bagi penyelenggaraan mengikut jenis sekolah seperti berikut:

Jenis Sekolah	Tahun 2018 (RM)	Tahun 2019 (RM)	Tahun 2020 (RM)	Tahun 2021 (RM)	Tahun 2022 (sehingga 15 Julai) (RM)
Sekolah Jenis Kebangsaan Cina	1,360,030.00	1,440,000.00	200,788.00	1,872,465.00	2,110,444.00
Sekolah Jenis Kebangsaan Tamil	800,000.00	1,900,000.00	848,800.00	657,330.00	672,508.00
Sekolah Menengah Jenis Kebangsaan	350,000.00	925,000.00	307,692.00	54,583.00	265,000.00
Jumlah	2,510,030.00	4,265,000.00	1,357,280.00	2,584,378.00	3,047,952.00

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN CHA KEE CHIN [RASAH]

SOALAN

TUAN CHA KEE CHIN minta **MENTERI KESIHATAN** menyatakan jumlah pegawai dan kakitangan untuk setiap jenis klinik kesihatan dan hospital di daerah Seremban pada ketika ini dan nyatakan juga bilangan kekosongan yang masih belum diisi.

JAWAPAN

Tuan Yang di-Pertua,

1. Sehingga 30 Jun 2022, seramai 4,817 anggota KKM berstatus tetap yang terdiri daripada pelbagai skim perkhidmatan yang berkhidmat di fasiliti kesihatan KKM di daerah Seremban iaitu 98.1% daripada 4,909 keseluruhan jawatan di daerah tersebut seperti berikut:

		Pengisian	Kekosongan
a.	Hospital Tuanku Jaafar	: 3,463	5
b.	14 Klinik Kesihatan	: 1,070	66
c.	5 Klinik Komuniti	: 57	10
d.	14 Klinik Desa	: 37	3
e.	PKD Seremban	: 189	9

2. Manakala, anggota lantikan kontrak pula adalah seramai 991 orang bagi kesinambungan penyampaian kesihatan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

DARIPADA : TUAN CHA KEE CHIN (RASAH)

SOALAN

TUAN CHA KEE CHIN (RASAH) minta **MENTERI PERTANIAN DAN INDUSTRI MAKANAN** menyatakan jumlah subsidi ayam dan subsidi telur kepada penternak yang telah disalurkan sejak awal tahun ini mengikut bulan mulai Februari, Mac, April, Mei, Jun sehingga Julai 2022.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah meluluskan pemberian subsidi ayam dan telur bermula dari 5 Februari 2022 sehingga 30 Jun 2022 dengan peruntukan sebanyak RM730 juta. Pada 29 Jun 2022, Kerajaan bersetuju untuk melanjutkan tempoh pemberian subsidi yang berakhir pada 30 Jun 2022 sehingga 31 Ogos 2022. Jumlah peruntukan tambahan disediakan sebanyak RM369.5 juta dan menjadikan jumlah keseluruhan subsidi untuk penternak ayam sebanyak RM1.1 bilion.

Kadar pemberian subsidi untuk ayam pedaging ialah RM0.60 per kilogram untuk tempoh 5 Februari 2022 hingga 30 Mac 2022. Seterusnya Kerajaan bersetuju untuk meningkatkan kadar subsidi kepada RM1.40 per kilogram bermula 1 April sehingga 30 Jun 2022. Manakala bagi penternak

ayam telur pula, kadar pemberian subsidi ialah RM0.05 sebijji bermula 5 Februari hingga 30 Jun 2022 bagi telur gred A, B dan C. Bermula 1 Julai 2022, harga subsidi yang diluluskan ialah RM1.20 per kilogram bagi ayam pedaging dan RM0.03 sebijji bagi telur gred A, B, dan C.

Kementerian Pertanian dan Industri Makanan (MAFI) melalui Jabatan Perkhidmatan Veterinar (DVS) telah memproses permohonan subsidi sejak 28 Februari 2022. Pada bulan Mac 2022, peruntukan diluluskan sebanyak RM15,120 sebelum meningkat kepada RM5.56 juta pada bulan April 2022. Untuk bulan Mei 2022, sejumlah RM66.01 juta diluluskan dan meningkat kepada RM312.02 juta pada bulan Jun. Setakat 29 Julai 2022, sebanyak 8,970 permohonan subsidi telah diluluskan berjumlah RM748 juta.

Bagi mendapatkan subsidi ini, Jabatan Perkhidmatan Veterinar (DVS) telah menyediakan tatacara permohonan seperti mekanisma berikut:

- (i) penternak ayam pedaging dan penelur perlu mengemukakan permohonan secara online kepada Jabatan Perkhidmatan Veterinar (DVS) melalui laman sesawang www.unggasdvs.my;
- (ii) semakan dan verifikasi ke atas permohonan tersebut akan dibuat di peringkat DVS Negeri, manakala kelulusan permohonan akan ditentukan di peringkat ibupejabat menerusi Jawatankuasa Kelulusan Subsidi Ayam dan Telur; dan
- (iii) bagi permohonan yang diluluskan, pembayaran subsidi akan dilaksanakan oleh Agrobank sebagai bank pembayar kepada akaun pemohon dalam tempoh tiga (3) hari bekerja.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN CHA KEE CHIN [RASAH]

SOALAN

Tuan Cha Kee Chin [Rasah] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan nama Penyelaras Kepenggunaan Parlimen (PKP) yang telah dilantik untuk kesemua 8 Parlimen di Negeri Sembilan dan apakah bidang kuasa, tugas dan elaun atau bayaran yang diterima oleh mereka.

JAWAPAN

Yang di-Pertua,

Penyelaras Kepenggunaan Parlimen (PKP) bagi dua (2) Parlimen di Negeri Sembilan telah dilantik iaitu bagi Parlimen Kuala Pilah dan Jelebu. KPDNHEP sedang mendapatkan pencalonan bagi Parlimen berbaki sebelum pelantikan dibuat. Antara tugas PKP ialah merancang dan melaksanakan ceramah kepenggunaan kepada masyarakat di kawasan Parlimen masing-masing dan memberi panduan serta membantu masyarakat membuat aduan berkaitan kepenggunaan melalui pelbagai saluran aduan yang disediakan. Jemaah Menteri pada 12 Februari 2014 telah bersetuju dengan bayaran elaun PKP sebanyak RM700.00 sebulan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN CHAN FOONG HIN (KOTA KINABALU)

SOALAN

Tuan Chan Foong Hin [Kota Kinabalu] minta **PERDANA MENTERI** menyatakan pendapatan Petronas dalam pecahan bulan dari Januari hingga Julai 2022 serta jangkaan hasil Persekutuan dari dividen Petronas dan PITA pada tahun 2022 berbanding dengan tahun 2021.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Berdasarkan laporan yang telah diumumkan bagi suku pertama 2022, hasil pendapatan PETRONAS pada Januari adalah sebanyak RM25.6 bilion, Februari sebanyak RM26.7 bilion dan Mac sebanyak RM26.5 bilion manakala pendapatan bulan April hingga Julai sedang dimuktamadkan.
2. Pembayaran Bayaran Tunai Hasil Petroleum dilakukan dua kali setahun iaitu pada bulan Februari dan bulan Ogos. Ini bermaksud bayaran pada bulan Februari 2022 adalah bagi hasil petroleum setengah tahun kedua 2021 dan bayaran pada bulan Ogos 2022 pula adalah bagi hasil petroleum setengah tahun pertama 2022.
3. Manakala bayaran Cukai Kerajaan Persekutuan dilakukan berdasarkan jadual pembayaran yang telah pun ditetapkan. Jadual pembayaran untuk suku pertama 2022 pula telah ditetapkan dan dipersetujui dengan LHDN sejak 2021 dan sebarang pelarasan untuk Cukai Kerajaan Persekutuan akan dilakukan selepas semakan cukai berkala pada bulan Jun 2022. PETRONAS menganggarkan pertambahan Bayaran Tunai Hasil Petroleum dan Cukai Kerajaan Persekutuan bagi suku pertama 2022 ialah di antara RM2.5 bilion ke RM3 bilion. Jangkaan hasil Kerajaan Persekutuan daripada dividen PETRONAS bagi tahun 2022 sebanyak RM25 bilion adalah sama seperti bayaran dividen pada tahun 2021.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN CHAN FOONG HIN [KOTA KINABALU]

SOALAN

TUAN CHAN FOONG HIN [KOTA KINABALU] minta **PERDANA MENTERI** menyatakan jumlah perbelanjaan dan butiran kos untuk rombongan ke Arkib Nasional, London yang diketuai Menteri Dr. Maximus Ongkili bagi mencari dokumen berkaitan hak Sabah dalam Perjanjian Malaysia 1963 (MA63) yang berlepas pada 19 Jun 2022. Nyatakan juga delegasi rombongan tersebut dan peranan yang dimainkan oleh mereka.

JAWAPAN

Tuan Yang di-Pertua,

Dianggarkan jumlah perbelanjaan yang terlibat adalah sebanyak RM419,837 yang sebahagian besarnya melibatkan kos pengangkutan dan penginapan.

Untuk makluman Ahli Yang Berhormat, delegasi YB Menteri turut disertai oleh tiga (3) orang pegawai daripada Pejabat dan Bahagian Hal Ehwal Sabah dan Sarawak. Delegasi turut terdiri daripada Peguam Kanan Persekutuan dan Pegawai Kanan Penyelidik Sosial, Jabatan Peguam Negara dan juga Pegawai Arkib, Arkib Negara Malaysia yang terlibat dalam menjalankan carian dan semakan dokumen sepanjang di The National Archives, London, United Kingdom.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN CHAN FOONG HIN
[KOTA KINABALU]

SOALAN

TUAN CHAN FOONG HIN [KOTA KINABALU] minta **MENTERI KEWANGAN** menyatakan jumlah Cukai Durian Runtuh minyak sawit mentah yang dikutip oleh Kerajaan diperinci mengikut negeri-negeri di Malaysia sehingga pertengahan tahun pertama 2022.

JAWAPAN

Tuan Yang di-Pertua,

Untuk makluman Ahli Yang Berhormat, jumlah levi keuntungan luar biasa ke atas buah kelapa sawit yang dikutip oleh Kerajaan bagi tahun 2021 secara keseluruhannya adalah sebanyak RM1.9 bilion. Bagi tempoh sehingga pertengahan tahun pertama 2022, jumlah kutipan levi keuntungan luar biasa adalah sebanyak RM2.1 bilion.

Pada masa ini, Kerajaan tidak mempunyai data berhubung levi keuntungan luar biasa berdasarkan negeri pengeluaran. Ini berbangkit kerana levi keuntungan luar biasa pengeluar buah kelapa sawit dibayar mengikut stesen kastam di mana syarikat pengeluar tersebut didaftarkan bagi tujuan pembayaran levi, dan tidak semestinya mengikut lokasi ladang kelapa sawit.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN CHAN FOONG HIN [KOTA KINABALU]

SOALAN

TUAN CHAN FOONG HIN [KOTA KINABALU] minta **MENTERI KANAN PENDIDIKAN** menyatakan jumlah murid-murid dan guru-guru sekolah rendah dan sekolah menengah yang sehingga ke kini tidak mendapatkan sebarang vaksin COVID-19. Apakah tindakan yang diambil terhadap golongan ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa bekerjasama rapat dengan Kementerian Kesihatan Malaysia (KKM), termasuk dalam perkara berkaitan pengurusan vaksinasi warga pendidikan.

Untuk makluman Ahli Yang Berhormat, Kerajaan telah menetapkan supaya semua penjawat awam, termasuk guru untuk mendapatkan dos imunisasi COVID-19 yang lengkap selaras dengan Pekeliling Perkhidmatan Bilangan 4 Tahun 2021: Dasar Pelaksanaan Imunisasi COVID-19 bagi Perkhidmatan Awam Persekutuan bertarikh 18 Oktober 2021.

Berdasarkan rekod KPM, sehingga 6 Julai 2022, terdapat 2,095 atau 0.51 peratus guru di seluruh negara yang masih belum menerima vaksin. Guru yang tidak boleh divaksin atas sebab kesihatan perlu mengemukakan maklumat kesihatan yang telah disahkan oleh pegawai perubatan kerajaan kepada Ketua Jabatan masing-masing.

SOALAN NO : 93

Bagi guru yang tidak divaksin bukan atas sebab kesihatan yang telah diperakukan oleh pengamal perubatan pula, ketua jabatan boleh mengemukakan perakuan tata tertib ke atas guru tersebut kepada Pihak Berkuasa Tata tertib KPM selaras dengan Prosedur Pengurusan Kes Tata tertib Berkaitan Imunisasi COVID-19.

Seterusnya, Pihak Berkuasa Tata tertib akan melaksanakan prosiding tata tertib sepertimana ditetapkan di bawah Peraturan-peraturan Pegawai Awam (Kelakuan dan Tata tertib) 1993 yang melibatkan hukuman sehingga turun pangkat atau buang kerja.

Untuk makluman Ahli Yang Berhormat, berdasarkan data Jawatankuasa Petugas Khas Imunisasi COVID-19 (CITF) sehingga 31 Julai 2022, seramai 1,545,247 atau 30.7 peratus murid sekolah bawah KPM belum menerima vaksin. Daripada jumlah ini seramai 1,474,850 adalah murid sekolah rendah dan seramai 70,397 adalah murid sekolah menengah. KPM akan terus bekerjasama dengan KKM bagi meningkatkan kadar vaksinasi dalam kalangan murid. KPM juga turut menyediakan khidmat kaunseling dan taklimat kepada murid dan ibu bapa berkaitan kepentingan vaksinasi.

Dalam hal ini, KPM tidak menghalang murid yang tidak divaksin untuk hadir ke sekolah. Garis Panduan Pengurusan dan Pengoperasian Sekolah 3.0 menerangkan bahawa hanya warga sekolah yang bergejala sahaja tidak dibenarkan memasuki kawasan sekolah. Manakala lampiran tambahan (annexe) Garis Panduan Pengurusan dan Pengoperasian Sekolah 3.0 menjelaskan bahawa hanya murid yang dikenal pasti kontak rapat perlu dikuarantin dan tidak dibenarkan hadir ke sekolah.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB TUAN CHAN FOONG HIN (KOTA KINABALU)

SOALAN

TUAN CHAN FOONG HIN [KOTA KINABALU] minta **MENTERI KANAN KERJA RAYA** menyatakan apakah status pembinaan empat flyover sepanjang Jalan Sulaman dan Kingfisher sedangkan flyover Jalan Lintas telah siap dan terbuka untuk pengguna jalan raya. Apakah alasan kelewatan siap yang agak melampau sehingga kesesakan lalu lintas sentiasa sehingga kini.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya sentiasa berusaha dengan gigih melaksanakan projek - projek pembangunan selaras dengan dokongan Dasar Wawasan Kemakmuran Bersama 2030 bagi semua negeri di negara ini termasuk negeri Sabah berasaskan aspirasi Keluarga Malaysia.

Projek Menaik taraf Jalan UMS ke Sepanggar termasuk membina empat persimpangan bertingkat sedang giat dilaksanakan selepas ianya menjadi perlahan akibat Pandemik Covid -19 dan arahan Kerajaan untuk Perintah Kawalan Pergerakan mulai tahun 2020 hingga 2021. Setelah pihak kerajaan menarik balik arahan tersebut, pihak kontraktor telah memulakan semula kerja – kerja pembinaan namun terkekang akibat masalah pengalihan kabel dan paip penyedia utiliti seperti Telekom Malaysia, Sabah Electricity Sdn Bhd dan Jabatan Air Sabah.

Justeru itu,kementerian ini bersama pihak Unit Penyelarasian Pembangunan, Jabatan Perdana Menteri dan Jabatan Kerja Raya (JKR) Negeri Sabah telah melaksanakan langkah intervensi bagi membendung permasalahan ini daripada berlarutan. Hasil daripada langkah intervensi yang dibuat, pengalihan kabel dan paip utiliti oleh SESB dan Jabatan Air telah dapat diselesaikan. Namun pihak Agensi Pelaksana iaitu JKR Negeri Sabah sedang bekerjasama dengan pihak Telekom Malaysia Sabah bagi kerja – kerja pengalihan masih belum dilaksanakan dan sedikit sebanyak mengganggu kelancaran pembinaan projek menaik taraf jalan ini.

Apabila permasalahan pengalihan ini selesai, maka kerja – kerja pembinaan akan bertambah rancak serta dapat disiapkan mengikut jadual yang akan ditetapkan. Walau bagaimana pun, JKR Negeri Sabah sentiasa merangka kaedah terbaik bagi pengurusan trafik sementara (*Trafik Management Plan*) bagi mengurangkan kesesakan lalulintas yang berlaku

di kawasan pembinaan tersebut.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN CHAN MING KAI
(ALOR SETAR)**

SOALAN

Minta **MENTERI PERTAHANAN** menyatakan jumlah peratus saham yang dimiliki oleh Lembaga Tabung Angkatan Tentera (LTAT) di semua 97 buah syarikat masing-masing yang dipegang serta jumlah keuntungan atau kerugian tahun semasa bagi setiap syarikat.

JAWAPAN

Tuan Yang di-Pertua,

Lembaga Tabung Angkatan Tentera (LTAT) mempunyai pegangan saham di dalam 68 buah syarikat tersenarai (*listed companies*) di Bursa Malaysia dan 30 buah syarikat yang tidak tersenarai (*unquoted companies*).

Setakat yang terkini. Selain 5 syarikat subsidiari tersenarai, rata-rata pegangan LTAT ke atas syarikat tersenarai adalah kurang daripada 5 peratus. Jumlah keuntungan selepas cukai yang dicatat oleh kesemua 68 syarikat tersenarai bagi tahun kewangan 2021 adalah RM45,370.22 juta (Akaun Telah Diaudit).

Majoriti pelaburan LTAT dalam syarikat yang tidak tersenarai adalah dikategorikan sebagai syarikat subsidiari dan bersekutu. Jumlah keuntungan selepas cukai yang dicatat oleh kesemua 30 syarikat tidak tersenarai bagi tahun kewangan 2021 adalah RM210.22 juta (Akaun Telah Diaudit).

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN CHAN MING KAI (ALOR SETAR)

SOALAN

Minta **MENTERI PERTAHANAN** menyatakan status perolehan *Fighter Lead in Trainer – Light Combat Aircraft* dan *MALE UAS* serta jumlah perbelanjaan perolehan sehingga kini.

JAWAPAN

Tuan Yang Di-Pertua,

Kementerian Pertahanan telah melengkapkan semua proses penilaian tender bagi perolehan *Fighter Lead In Trainer - Light Combat Aircraft* (FLIT-LCA) dan *Medium-altitude Long-endurance Unmanned Aircraft System* (MALE UAS) untuk kegunaan Tentera Udara Diraja Malaysia (TUDM).

Peringkat seterusnya bagi perolehan *Fighter Lead In Trainer - Light Combat Aircraft* (FLIT-LCA) adalah pemeriksaan fizikal kepada petender yang telah disenarai pendek untuk proses rundingan harga sebelum dimuktamadkan oleh Kementerian Kewangan bagi pemilihan pembida yang berjaya. Sehubungan dengan itu, surat permohonan untuk mengadakan pemeriksaan fizikal dan rundingan harga dengan petender yang disenarai pendek telah dikemukakan kepada Kementerian Kewangan Malaysia pada 15 April 2022 untuk kelulusan.

Manakala bagi perolehan *Medium-altitude Long-endurance Unmanned Aircraft System* (MALE UAS), keputusan Lembaga Perolehan telah dikemukakan kepada Kementerian Kewangan pada 7 Julai 2022 untuk dimuktamadkan. Mengenai jumlah perbelanjaan bagi kedua-dua perolehan ini pula, ianya tertakluk kepada keputusan peringkat rundingan harga dan setelah dimuktamadkan oleh Kementerian Kewangan.

Secara kesimpulannya, Kementerian Pertahanan dan ATM akan memberikan komitmen sepenuhnya untuk memastikan projek-projek semasa dan yang akan datang berada pada landasan yang tepat bagi meningkatkan tahap keupayaan dan kesiapsiagaan ATM, khususnya dalam perolehan ini, untuk keperluan TUDM bagi mencegah sebarang bentuk ancaman udara dan seterusnya meningkatkan keselamatan ruang udara negara.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN CHAN MING KAI (ALOR SETAR)

SOALAN

TUAN CHAN MING KAI (ALOR SETAR) minta **MENTERI PEMBANGUNAN LUAR BANDAR** menyatakan jumlah peratus saham yang dimiliki oleh Majlis Amanah Rakyat (MARA) di semua 78 buah syarikat masing-masing yang dipegang serta jumlah keuntungan atau kerugian tahun semasa bagi setiap syarikat.

JAWAPAN

Untuk makluman Yang Berhormat,

Syarikat MARA telah ditubuhkan sejak tahun 1967 dan sehingga kini, MARA mempunyai 42 buah syarikat iaitu 40 syarikat subsidiari dan dua (2) syarikat bersekutu. Pegangan saham MARA dalam semua syarikat adalah di antara 29.18% hingga 100%. Syarikat-syarikat MARA terlibat dalam sektor ekonomi kritikal seperti aeroangkasa, pendidikan dan pembangunan modal insan, perkhidmatan kewangan, hartanah, pengangkutan, peruncitan dan perkhidmatan perniagaan.

Penubuhan Syarikat MARA di bawah Sektor Pelaburan bertujuan untuk menyokong dan melengkapkan ekosistem MARA iaitu keusahawanan dan pendidikan di samping memantapkan pemilikan ekuiti dalam sektor korporat serta memperkuuhkan pemilikan aset bukan kewangan. Selain itu, syarikat-syarikat di bawah MARA turut berperanan untuk membangunkan usahawan dan mewujudkan peluang pekerjaan kepada masyarakat bumiputera melalui aktiviti-aktiviti komersial dan pelaburan.

Setakat Mei 2022, jumlah keuntungan sebelum cukai bagi kesemua syarikat subsidiari aktif MARA adalah sebanyak RM25.4 juta.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN CHAN MING KAI [ALOR SETAR]

SOALAN

YB TUAN CHAN MING KAI [ALOR SETAR] minta **MENTERI PERUMAHAN DAN KERAJAAN TEMPATAN** menyatakan projek yang telah dipohon oleh Majlis Bandaraya Alor Setar (MBAS) kepada Jabatan Kerajaan Tempatan (JKT) serta jumlah peruntukan yang diluluskan dan projek yang masih belum diluluskan peruntukan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah memperuntukkan sebanyak RM2.5 juta di bawah Peruntukan BP.1 untuk pelaksanaan 28 projek melibatkan kerja-kerja menaik taraf sistem perparitan, jalan dan lampu jalan kepada Majlis Bandaraya Alor Setar (MBAS) bagi tahun 2022. Sehingga kini, semua permohonan MBAS bagi tahun 2022 telah diluluskan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN CHAN MING KAI [ALOR SETAR]

SOALAN

TUAN CHAN MING KAI [ALOR SETAR] minta **PERDANA MENTERI** menyatakan jumlah peratus saham yang dimiliki oleh Perbadanan Kemajuan Negeri (PKEN) di semua 298 buah syarikat masing-masing yang dipegang serta jumlah keuntungan atau kerugian tahun semasa bagi setiap syarikat.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Secara prinsipnya, Perbadanan Kemajuan Ekonomi Negeri (PKEN) ditubuhkan di setiap negeri di Malaysia bagi meningkatkan tahap pembangunan sosioekonomi setempat. Dalam hal ini, peranan PKEN adalah sebagai pelaksana dalam merealisasikan aspirasi Kerajaan bagi meningkatkan kualiti taraf hidup rakyat serta agenda Bumiputera.
2. Sehingga 31 Disember 2021, terdapat 13 buah PKEN ditubuhkan di Malaysia di bawah Akta Perbadanan (Kekompetenan Badan Perundangan Negeri) Tahun 1962 (Akta 380). Senarai 13 PKEN yang ditubuhkan adalah seperti berikut:

- i. Perbadanan Johor (JCOPR);
- ii. Perbadanan Kemajuan Negeri Kedah (PKNK);
- iii. Perbadanan Kemajuan Iktisad Negeri Kelantan (PKINK);
- iv. Perbadanan Kemajuan Negeri Melaka (PKNM);
- v. Perbadanan Kemajuan Negeri, Negeri Sembilan (PKNNS);
- vi. Perbadanan Kemajuan Negeri Pahang (PKNP);
- vii. Perbadanan Kemajuan Negeri Perak (PKNPk);
- viii. Perbadanan Kemajuan Ekonomi Negeri Perlis (PKENPs);
- ix. Perbadanan Pembangunan Pulau Pinang (PDC);
- x. Perbadanan Pembangunan Ekonomi Sabah (SEDCO);
- xi. Perbadanan Pembangunan Ekonomi Sarawak (SEDC);
- xii. Perbadanan Kemajuan Negeri Selangor (PKNS); dan
- xiii. Perbadanan Memajukan Iktisad Negeri Terengganu (PMINT).

3. Selaras dengan objektif penubuhannya, setiap PKEN mempunyai Enakmen Negeri masing-masing yang mengawal selia operasi serta tadbir urus PKEN berkenaan. Bagaimanapun, berdasarkan **Pindaan Senarai Tugas Anggota Pentadbiran di Jabatan Perdana Menteri** bertarikh 24 September 2021, kesemua 13 PKEN diletakkan secara pentadbiran (*administrative*) di bawah Unit Perancang Ekonomi, Jabatan Perdana Menteri (EPU) bagi turut mengawal selia PKEN dalam perkara-perkara yang melibatkan urusan tadbir urus serta operasi syarikat.

4. Namun begitu, pemantauan oleh EPU terhadap PKEN adalah bersifat *administrative* dan terhad di peringkat **induk (*holding*) sahaja** manakala subsidiari PKEN adalah di bawah tanggung jawab Lembaga Pengarah PKEN masing-masing. Sehubungan dengan itu, maklumat mengenai pemilikan saham dan keuntungan syarikat-syarikat tersebut tidak dipantau oleh EPU.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN CHANG LIH KANG
[TANJONG MALIM]**

SOALAN

TUAN CHANG LIH KANG [TANJONG MALIM] minta **MENTERI KANAN PENDIDIKAN** menyatakan berapa jumlah pelajar warga asing yang sedang belajar di sekolah rendah dan sekolah menengah Malaysia. Senaraikan mengikut kewarganegaraan.

JAWAPAN

Tuan Yang di-Pertua,

Kementerian Pendidikan Malaysia (KPM) menetapkan penerimaan masuk kanak-kanak warganegara dan bukan warganegara ke sekolah kerajaan dan sekolah bantuan kerajaan adalah sebagaimana termaktub dalam Akta Pendidikan 1996 (Akta 550), Peraturan-Peraturan Pendidikan (Penerimaan Masuk Murid Ke Sekolah, Penyimpanan Daftar dan Syarat Bagi Pengekalan Murid Belajar di Sekolah) 1998 (PU(A) 275/1998) yang mula berkuat kuasa pada 23 Julai 1998.

Untuk makluman Ahli Yang Berhormat, sehingga 30 Jun 2022, jumlah murid bukan warganegara ialah seramai 10,574 orang. Daripada jumlah ini, seramai 2,255 orang bersekolah di sekolah kerajaan dan 8,319 orang bersekolah di sekolah bukan kerajaan. Daripada jumlah ini juga, seramai 6,692 orang bersekolah di sekolah rendah dan 3,882 orang murid di sekolah menengah. Maklumat bilangan murid bukan warganegara mengikut kewarganegaraan yang bersekolah di sekolah rendah dan menengah adalah seperti berikut:

Bil	Negara	Peringkat Rendah	Peringkat Menengah	Jumlah
1	Afghanistan	3	3	6
2	Albania	2	1	3
3	Algeria	1	0	1
4	American Samoa	2	0	2
5	Argentina	1	0	1
6	Australia	20	9	29
7	Bahamas	0	1	1
8	Bangladesh	89	65	154
9	Barbados	1	0	1
10	Belgium	3	0	3
11	Bermuda	1	0	1
	Wilayah Lautan Hindi British			
12	Hindi British	4	3	7
13	Brunei Darussalam	23	12	35

SOALAN NO : 100

Bil	Negara	Peringkat	Peringkat	Jumlah
14	Kemboja	107	44	151
15	Kanada	4	1	5
16	Chile	1	0	1
17	China	394	92	486
	Republik Demokratik Congo (Zaire)			
18	(Zaire)	1	0	1
19	Mesir	17	6	23
20	Eritrea	2	1	3
	Kepulauan Falkland (Malvinas)			
21	(Malvinas)	3	0	3
22	Fiji	3	0	3
23	Finland	1	0	1
24	Perancis	4	0	4
25	Polynesia Perancis	1	0	1
26	Gabon	1	0	1
27	Georgia	0	1	1
28	Jerman	5	2	7
29	Guam	0	1	1
30	Guyana	1	1	2
31	Hongkong	24	1	25
32	Iceland	1	0	1
33	India	212	120	332
34	Indonesia	3044	2072	5116
	Iran (Republik Islam)			
35	(Islam)	2	1	3
36	Iraq	4	2	6
37	Ireland	0	3	3
38	Itali	1	0	1
39	Jepun	24	3	27
40	Jordan	1	0	1
41	Kazakhstan	1	1	2
42	Kenya	2	0	2
43	Korea	52	21	73

SOALAN NO : 100

Bil	Negara	Peringkat P	Peringkat M	Jumlah
44	Kyrgyzstan	0	1	1
	Republik Demokratik Rakyat Laos	27	3	30
46	Lebanon	2	0	2
	Libya Arab Jamahiriya	4	1	5
48	Lithuania	2	0	2
49	Macau	2	0	2
50	Mongolia	1	0	1
51	Myanmar	139	54	193
52	Nepal	4	1	5
53	Belanda	1	0	1
54	New Zealand	3	3	6
55	Nigeria	15	4	19
56	Norway	1	0	1
57	Pakistan	123	99	222
	Wilayah Palestin, diduduki	4	3	7
58	Papua New Guinea	10	6	16
60	Peru	1	1	2
61	Filipina	886	477	1363
62	Poland	0	1	1
63	Romania	1	0	1
64	Persekutuan Russia	4	5	9
65	Arab Saudi	1	2	3
66	Senegal	2	0	2
	Serbia dan Montenegro	1	0	1
68	Singapura	76	88	164
69	Kepulauan Solomon	17	15	32
70	Somalia	0	1	1
71	Afrika Selatan	6	0	6
72	Sepanyol	1	2	3

SOALAN NO : 100

Bil	Negara	Peringkat P	Peringkat M	Jumlah
73	Sri Lanka	5	3	8
74	Sudan	2	2	4
75	Switzerland	1	0	1
76	Republik Arab Syria	5	3	8
77	Taiwan	35	5	40
	Republik Bersatu			
78	Tanzania	2	0	2
79	Thailand	713	426	1139
80	Timor-Leste	1	1	2
81	Tunisia	0	2	2
82	Turki	1	0	1
83	Turkmenistan	0	1	1
	Emiriah Arab			
84	Bersatu	4	0	4
85	Amerika Syarikat	16	12	28
86	United Kingdom	25	4	29
87	Uzbekistan	9	4	13
88	Vietnam	460	176	636
89	Yaman	15	9	24
90	Zambia	1	0	1
	JUMLAH KESELURUHAN	6,692	3,882	10,574

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB TUAN CHANG LIH KANG (TANJONG MALIM)

SOALAN

TUAN CHANG LIH KANG (TANJONG MALIM) minta **MENTERI DALAM NEGERI** menyatakan bilangan pasangan warga asing (suami atau isteri) yang bermastautin di negara kita. Senaraikan mengikut jantina dan kewarganegaraan.

JAWAPAN

Tuan Yang Di Pertua,

Untuk makluman Ahli Yang Berhormat, Pas Lawatan (Sosial) Jangka Panjang adalah satu kemudahan yang dikeluarkan oleh Jabatan Imigresen Malaysia (JIM) kepada pasangan warganegara asing yang berkahwin dengan warganegara Malaysia dan tinggal menetap di dalam negara untuk suatu tempoh tertentu.

Bilangan pasangan warga asing suami atau isteri yang mempunyai pas lawatan sosial jangka panjang (pasangan kepada warganegara) yang masih aktif sehingga 30 Jun 2022 adalah seramai 164,507 orang yang terdiri daripada 40,688 orang lelaki dan 123,819 orang wanita. Lima warganegara teratas yang memiliki pas lawatan sosial jangka panjang (pasangan kepada warganegara) adalah warganegara Indonesia, Thailand, Vietnam, Filipina dan India.

Warganegara Indonesia yang memiliki pas lawatan sosial jangka panjang (pasangan kepada warganegara) adalah seramai 74,630 orang (16,146 orang lelaki dan 58,484 wanita) diikuti oleh warganegara Thailand seramai 19,008 orang (1,354 orang lelaki dan 17,656 orang wanita) dan warganegara Vietnam seramai 17,634 (111 orang lelaki dan 17,523 orang wanita). Manakala, warganegara Filipina pula adalah seramai 12,208 orang (2,886 orang lelaki dan 9,322 orang wanita) dan negara India seramai 7,334 orang (3,693 orang lelaki dan 3,641 orang wanita).

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN CHANG LIH KANG (TANJONG
MALIM)**

SOALAN

TUAN CHANG LIH KANG (TANJONG MALIM) minta **MENTERI DALAM NEGERI** menyatakan berapa jumlah Pemastautin Kekal (PR) di Malaysia. Senaraikan mengikut kewarganegaraan.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod Jabatan Pendaftaran Negara (JPN) sehingga 30 Jun 2022, jumlah pemegang MyPR adalah sebanyak **215,650**. Pemegang MyPR tertinggi adalah dari negara Indonesia (135,526), Filipina (37,786), India (10,864), Thailand (7,335), Singapura (5,845), Cambodia (3,246), China (2,346), Taiwan (1,446), Britain (1,155), Pakistan (1,129) dan lain-lain (8,972).

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN CHANG LIH KANG
[TANJONG MALIM]**

SOALAN

TUAN CHANG LIH KANG [TANJONG MALIM] minta **MENTERI KANAN PENDIDIKAN** menyatakan sama ada Sekolah Antarabangsa (International Schools) dibenarkan memberi visa pelajar. Berapa jumlah visa pelajar dalam kategori ini (sekolah antarabangsa) telah diberi dan apakah kewarganegaraan mereka.

JAWAPAN

Tuan Yang di-Pertua,

Untuk makluman Ahli Yang Berhormat, sekolah antarabangsa yang diberikan kelulusan mengambil pelajar antarabangsa oleh Kementerian Dalam Negeri (KDN) perlu memohon pas pelajar daripada Jabatan Imigresen Malaysia (JIM). Dalam hal ini, Kementerian Pendidikan Malaysia (KPM) berperanan mengeluarkan surat sokongan permohonan pas pelajar tersebut mengikut syarat-syarat yang ditetapkan oleh JIM dan KPM. Pengeluaran pas pelajar adalah sepenuhnya bawah bidang kuasa JIM.

Berdasarkan rekod JIM, sehingga Jun 2022 sebanyak 7,171 pas pelajar telah dikeluarkan kepada pelajar di sekolah antarabangsa seluruh Malaysia. Statistik pengeluaran Pas Pelajar bagi sekolah antarabangsa mengikut warganegara adalah seperti jadual berikut;

STATISTIK PAS AKTIF PELAJAR WARGA ASING YANG SEDANG BELAJAR DI SEKOLAH ANTARABANGSA SEHINGGA 30 JUN 2022.

BIL	WARGANEGARA	JUMLAH
1	KOREA SELATAN	1,717
2	CHINA	924
3	JEPUN	447
4	INDONESIA	421
5	YEMEN	397
6	BANGLADESH	274
7	SINGAPURA	249
8	MALDIVES	242
9	HONG KONG	231
10	THAILAND	187
11	AMERIKA SYARIKAT	184
12	UNITED KINGDOM	171
13	INDIA	164
14	FILIPINA	118
15	PAKISTAN	111
16	SUDAN	107
17	AUSTRALIA	101
18	NIGERIA	71
19	TAIWAN	68
20	MESIR	66

SOALAN NO : 103

BIL	WARGANEGARA	JUMLAH
21	VIETNAM	64
22	LIBYA	61
23	IRAQ	59
24	IRAN	51
25	MYANMAR	48
26	SYRIA	46
27	PERANCIS	40
28	SOMALIA	36
29	KANADA	35
30	SRI LANKA	35
31	KEMBOJA	33
32	RUSSIA	26
33	PALESTIN	24
34	NEW ZEALAND	23
35	JERMAN	23
36	KAZAKHSTAN	17
37	JORDAN	17
38	ARAB SAUDI	14
39	BELANDA	14
40	ZIMBABWE	13
41	NEPAL	12
42	UZBEKISTAN	12
43	AFRIKA SELATAN	12
44	ITALY	11
45	FINLAND	10
46	SWITZERLAND	10
47	SWEDEN	10
48	MONGOLIA	10
49	BRUNEI DARUSSALAM	9
50	ALGERIA	8
51	TANZANIA	8
52	DENMARK	7
53	GHANA	7
54	KENYA	7
55	SEPANYOL	7
56	TURKIYE	7
57	AFGHANISTAN	7
58	PAPUA NEW GUINEA	6
59	IRELAND	5
60	UKRAINE	5
61	PORTUGAL	5
62	BELGIUM	5

SOALAN NO : 103

BIL	WARGANEGARA	JUMLAH
63	MAGHRIBI	4
64	OMAN	4
65	KYRGYZSTAN	3
66	LAOS	3
67	ERITREA	3
68	LUBNAN	3
69	NORWAY	3
70	AUSTRIA	3
71	GUINEA	3
72	LITHUANIA	3
73	ANTIGUA DAN BARBUDA	2
74	PANAMA	2
75	COMOROS	2
76	TURKMENISTAN	2
77	KUWAIT	2
78	BRAZIL	2
79	MAURITIUS	2
80	BURKINA FASO	1
81	VENEZUELA	1
82	KEPULAUAN SOLOMON	1
83	MACAU	1
84	CHAD	1
85	TOGO	1
86	CHILE	1
87	TRINIDAD DAN TOBAGO	1
88	SAINT KITTS DAN NEVIS	1
89	GREECE	1
90	REPUBLIK SUDAN SELATAN	1
91	TIADA NEGARA	1
92	ZAMBIA	1
93	HUNGARY	1
94	EMIRIAH ARAB BERSATU	1
95	MEXICO	1
JUMLAH KESELURUHAN		7,171

Sekian, terima kasih.

SOALAN NO : 104

PEMBERITAHUAN PERTANYAAN BUKAN LISAN DEWAN RAKYAT MESYUARAT KEDUA, PENGGAL KELIMA PARLIMEN KEEMPAT BELAS 2022

PERTANYAAN : BUKAN LISAN (BERTULIS)

DARIPADA : TUAN CHANG LIH KANG [TANJONG MALIM]

SOALAN

TUAN CHANG LIH KANG [TANJONG MALIM] minta **MENTERI ALAM SEKITAR DAN AIR** menyatakan langkah-langkah yang bakal diambil untuk mencegah bencana banjir di kawasan Parlimen Tanjong Malim, termasuk Kampung Poh, Pekan Trolak, Felda Trolak Selatan, Felda Trolak Timur, Kuala Slim dan sebagainya.

JAWAPAN

Tuan Yang Di-Pertua,

1. Bagi menangani bencana banjir yang berlaku di kawasan Parlimen Tanjong Malim, JPS telah mengenal pasti dua (2) kaedah Pelan Jangka Pendek dan Pelan Jangka Panjang.
2. Untuk Pelan Jangka Pendek, JPS akan menjalankan kerja-kerja pemuliharaan sungai bagi mengurangkan risiko banjir. Ini melibatkan langkah bagi mengenalpasti kawasan-kawasan berisiko banjir. Seterusnya, kerja-kerja seperti mengorek pulih sungai, membuang halangan di dalam sungai, kerja-kerja pengukuhan ban dan lain-lain di Sungai Bidor Kampung Poh dan Sungai Trolak, Pekan Trolak akan dijalankan.
3. Bagi Pelan Jangka Masa Panjang pula, JPS dalam perancangan untuk melaksanakan projek Rancangan Tebatan Banjir (RTB) Sungai Trolak Daerah Muallim.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB BUKAN LISAN

**DARIPADA : TUAN CHARLES ANTHONY SANTIAGO
(KLANG)**

SOALAN

TUAN CHARLES ANTHONY SANTIAGO (KLANG) minta **MENTERI TENAGA DAN SUMBER ASLI** menyatakan komitmen antarabangsa di Rio Summit 1992 untuk mengekalkan liputan hutan sebanyak 50% di seluruh negara. Nyatakan liputan hutan termasuk hutan simpanan kekal dan peratusan liputan terkini bagi setiap negeri dan terangkan cara liputan hutan ditentukan dan kualiti pengumpulan data tersebut.

JAWAPAN

Tuan Yang di-Pertua,

- Untuk makluman Ahli Yang Berhormat, jumlah kluasan hutan pada tahun 2018 adalah seluas 18,273,487 hektar iaitu bersamaan dengan 55.3 peratus daripada kluasan tanah negara. Sehubungan itu, Malaysia masih mengekalkan litupan kawasan berhutan melebihi 50 peratus selaras dengan komitmen negara semasa Sidang Kemuncak Bumi di Rio de Janeiro pada 1992. Kluasan kawasan berhutan termasuk Hutan Simpanan Kekal (HSK) mengikut negeri adalah seperti berikut:

Bil.	Negeri	Keluasan Tanah	Kawasan Berhutan		Kawasan Hutan Simpanan Kekal/ Hutan Simpan	
		Luas (hektar)	Luas (hektar)	%	Luas (hektar)	%
1.	Johor	1,910,200	447,753	23.44	332,749	17.42
2.	Kedah	944,700	342,431	36.25	341,976	36.20
3.	Kelantan	1,510,100	810,415	53.67	613,275	40.61
4.	Melaka	165,200	5,448	3.30	5,199	3.15
5.	Negeri Sembilan	668,600	157,964	23.63	155,549	23.26
6.	Pahang	3,584,000	2,056,695	57.39	1,559,385	43.50
7.	Perak	2,103,800	1,013,479	48.17	988,914	47.00
8.	Perlis	81,800	11,538	14.10	10,615	12.98
9.	Pulau Pinang	103,200	7,752	7.51	5,101	4.94
10.	Selangor	793,100	251,489	31.70	250,210	31.55
11.	Terengganu	1,295,900	651,248	50.25	540,309	41.69
12.	Wilayah Persekutuan Kuala Lumpur	24,300	2,049	8.43	68	0.28
13.	Wilayah Persekutuan Putrajaya	4,900	-	-	-	-
14.	Wilayah Persekutuan Labuan	9,200	-	-	-	-
Jumlah Semenanjung		13,199,000	5,758,261	43.62	4,803,350⁵	36.39
15.	Sabah	7,390,400	4,767,448.65	64.51	1,907,981.67	25.82
16.	Sarawak	12,445,100	7,747,777.00	62.25	4,209,053.00	33.82
JUMLAH KESELURUHAN		33,034,500	18,273,486.65	55.31	10,920,384.67	33.06

SOALAN NO : 105

2. Pengiraan data hutan adalah melibatkan beberapa elemen, antaranya seperti notis pewartaan bagi HSK dan Kawasan Perlindungan, peta geospatial bagi mengenal pasti sempadan hutan serta maklumat inventori sumber hutan bagi ketiga-tiga wilayah iaitu Semenanjung, Sabah dan Sarawak yang dilaksanakan setiap 10 tahun. Penggunaan teknologi terkini seperti *Geographical Information System (GIS)*, data-data *geospatial* dan imej satelit turut digunakan dalam mengukuhkan cerapan data dan memberi gambaran maklumat yang lebih terperinci.
3. Data-data yang dikumpul ini perlu melalui proses analisis, verifikasi dan pengesahan terperinci oleh pemilik (*custodian*) data daripada ketiga-tiga wilayah iaitu iaitu Jabatan Perhutanan Semenanjung Malaysia (JPSM), Jabatan Perhutanan Sabah (JPS) dan Jabatan Hutan Sarawak (JHS) sebelum dikemukakan kepada Kementerian Tenaga dan Sumber Asli (KeTSA) untuk proses semakan dari segi perubahan keluasan, punca dan justifikasi perubahan. Seterusnya, data yang telah disemak ini akan dibentangkan kepada Mesyuarat Jemaah Menteri dan Mesyuarat Majlis Tanah Negara sebelum dapat diterbitkan di laman sesawang KeTSA sebagai data rasmi nasional.
4. Data hutan merupakan data yang sensitif dan dinamik di mana elemen-elemen seperti perubahan status guna tanah, proses pewartaan keluar dan masuk HSK dan Kawasan Perlindungan, peningkatan keupayaan teknologi dan aplikasi terkini, perubahan ketetapan data rujukan dan data penyelidikan termasuk penetapan dasar baharu yang berlaku di ketiga-tiga wilayah akan memberi kesan kepada peningkatan dan pengurangan data hutan tahunan yang dilaporkan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN CHARLES ANTHONY SANTIAGO
(KLANG)**

SOALAN

TUAN CHARLES ANTHONY SANTIAGO (KLANG) minta **MENTERI TENAGA DAN SUMBER ASLI** menyatakan jumlah kawasan hutan terkini termasuk hutan simpanan kekal yang telah diperuntukkan dan diguna pakai bagi tujuan pertanian, perladangan serta perlombongan di setiap negeri.

JAWAPAN

Tuan Yang di-Pertua,

1. Untuk makluman Ahli Yang Berhormat, Malaysia mempunyai kawasan berhutan seluas 18.27 juta hektar atau 55.3 peratus daripada keluasan tanah negara. Daripada jumlah tersebut, keluasan Hutan Simpanan Kekal (HSK) adalah 10.92 juta hektar atau 33.06 peratus daripada keluasan tanah negara. Berdasarkan rekod yang dikemukakan oleh ketiga-tiga Jabatan Perhutanan di Semenanjung, Sabah dan Sarawak, tiada HSK yang digunakan bagi tujuan pertanian. Penubuhan ladang hutan adalah dibenarkan dalam HSK oleh Pihak Berkuasa Negeri (PBN) berdasarkan peruntukan seksyen 16, Akta Perhutanan Negara 1984 [Akta 313], Enakmen Hutan 1968 di Sabah dan Ordinan Hutan 2015 di Sarawak.
2. Seluas 439,189 hektar dalam kawasan HSK telah diluluskan oleh Majlis Tanah Negara (MTN) Ke-68 pada tahun 2012 sebagai Zon Penubuhan Ladang Hutan di Semenanjung. Sehingga kini, seluas 213,522.19 hektar atau 48.62 peratus telah dibangunkan sebagai ladang hutan di Semenanjung.
3. Kerajaan Negeri Sabah telah memperuntukkan seluas 600,000 hektar kawasan Hutan Simpan Komersial (Kelas II) untuk dibangunkan sebagai kawasan ladang hutan menjelang tahun 2036, selaras dengan Pelan Pembangunan Sabah Maju Jaya 2021-2025. Walau bagaimanapun, setelah mengambil kira aspek-aspek konservasi, hanya seluas 400,000 hektar daripada keluasan tersebut akan dibangunkan sebagai ladang hutan. Sehingga kini, seluas 163,143 hektar atau 41 peratus daripada sasaran tersebut telah dibangunkan sebagai ladang hutan di Sabah. Manakala di Sarawak, Kerajaan Negeri telah membuat ketetapan di bawah *Revised Policy Direction on Industrial Forest Plantation in Sarawak* pada tahun 2020 untuk mencapai sasaran sebanyak 1 juta hektar kawasan HSK dan Tanah Kerajaan akan dibangunkan sebagai ladang hutan (dikenali sebagai hutan industri di Sarawak). Sehingga kini, seluas 552,369.15 hektar atau 55.24 peratus telah dibangunkan sebagai ladang hutan di Sarawak.

SOALAN NO : 106

4. Pembangunan atau penubuhan ladang hutan di Negeri-negeri perlu mematuhi keluasan zon yang telah diluluskan dan dikawal rapi oleh Jabatan Perhutanan. Sekiranya penanaman spesies komoditi dan lain-lain pokok pertanian spesies bukan berkayu di dalam kawasan pembangunan ladang hutan tidak dikawal, ia akan memberikan kesan terhadap pensijilan hutan sekiranya terdapat ketidakpatuhan pembangunan zon ladang ini. Selain itu, MTN Ke-79 pada 2 Disember 2021 telah bersetuju dengan pelaksanaan moratorium selama 15 tahun kelulusan baharu ladang hutan dalam Zon Penubuhan Ladang Hutan HSK di Semenanjung yang telah ditetapkan oleh MTN pada tahun 2012.
5. Untuk makluman Ahli Yang Berhormat, adalah menjadi dasar KeTSA untuk tidak meluluskan sebarang kelulusan Surat Kebenaran Skim Pengendalian Melombong (*Operational Mining Scheme - OMS*) bagi aktiviti perlombongan di kawasan-kawasan pemeliharaan seperti HSK, Kawasan Rizab Perlindungan mahupun kawasan yang telah diwartakan secara khusus seperti tадahan air atau Kawasan Sensitif Alam Sekitar (KSAS). Pada masa ini tiada sebarang permohonan baharu OMS akan diluluskan terhadap mana-mana pajakan melombong (*Mining Lease – ML*) di dalam HSK. KeTSA juga menyarankan kepada Pihak Berkuasa Negeri supaya tidak mewarta keluar mana-mana HSK untuk tujuan pengeluaran ML.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB BUKAN LISAN

**DARIPADA : TUAN CHARLES ANTHONY SANTIAGO
(KLANG)**

SOALAN

TUAN CHARLES ANTHONY SANTIAGO (KLANG) minta **MENTERI TENAGA DAN SUMBER ASLI** menyatakan insentif-insentif yang Kementerian telah sediakan bagi menggalakkan Kerajaan-Kerajaan Negeri untuk mengekalkan kawasan hutan, terutamanya hutan simpanan kekal, bagi tujuan penyelidikan, rekreasi atau eko-pelancongan.

JAWAPAN

Tuan Yang di-Pertua,

1. Untuk makluman Ahli Yang Berhormat, Kerajaan Persekutuan telah memperkenalkan *Ecological Fiscal Transfer for Biodiversity Conservation* (EFT) pada tahun 2019 sebagai satu bentuk insentif kepada Kerajaan-kerajaan Negeri bagi melindungi dan memulihara kawasan perlindungan (*protected areas - PA*). Pemberian insentif melalui EFT menunjukkan komitmen Kerajaan Persekutuan dalam konservasi biodiversiti serta menggalakkan Kerajaan Negeri mewartakan kawasan perlindungan yang merupakan kawasan penting bagi perkhidmatan ekosistem (*ecosystem services*) termasuk sebagai kawasan tадahan air dan perlindungan hidupan liar.
2. Sejak diperkenalkan, Kementerian Kewangan telah menyalurkan peruntukan EFT sebanyak RM60 juta pada tahun 2019 dan RM70 juta pada tahun 2021 kepada Kerajaan-kerajaan Negeri melalui Pemberian Berdasarkan Tahap Pembangunan Ekonomi, Infrastruktur dan Kesejahteraan Hidup (TAHAP). Bermula tahun 2022, pelaksanaan EFT telah diletakkan di bawah seliaan Kementerian Tenaga dan Sumber Asli (KeTSA) selaras dengan keputusan Majlis Kewangan Negara Tahun 2021. YB Menteri Kewangan semasa menyampaikan ucapan Bajet 2022 pada 29 Oktober 2021 juga telah mengumumkan peruntukan EFT berjumlah RM70 juta akan disediakan setiap tahun kepada semua negeri.
3. Selain itu, Mekanisme *Reducing Emissions from Deforestation and Forest Degradation* (REDD Plus) telah dibangunkan di bawah *United Nations Framework Convention on Climate Change* (UNFCCC) bertujuan untuk memberikan nilai kewangan terhadap penyerapan karbon oleh hutan serta menawarkan insentif kepada negara-negara membangun bagi mengekalkan hutan dan mengurangkan pelepasan gas rumah kaca (GHG) daripada aktiviti perhutanan. Pada masa ini, KeTSA sedang memuktamadkan Kerangka Kewangan REDD Plus atau *REDD Plus Finance Framework* (RFF) yang merupakan satu inisiatif

SOALAN NO : 107

kewangan kepada Kerajaan Negeri bagi melaksanakan aktiviti mengekalkan dan memulihara hutan serta menjamin ekosistem hutan yang berterusan. Bagi melaksanakan pengoperasian RFF, KeTSA juga telah menujuhkan sebuah Syarikat Berhad Menurut Jaminan (CLBG) iaitu Malaysia Forest Fund atau MFF.

4. Sebagai tambahan, pada tahun 2022, KeTSA telah menerima peruntukan berjumlah RM9.15 juta melalui sumber Kumpulan Wang Covid-19 (KWC-19) yang diluluskan oleh Kementerian Kewangan (MOF) bagi pelaksanaan projek menaik taraf dan baik pulih kemudahan-kemudahan ekopelancongan serta Pembangunan Sistem Amaran Awal Risiko Kepala Air (*Early Headwater Risk Warning System*) yang melibatkan 25 lokasi Taman Eko Rimba dan Taman Negeri.

5. Di samping itu, KeTSA juga sedang melaksanakan Program Latihan dan Kemahiran Semula (*Reskill and Upskill*) Ekopelancongan Sumber Asli dengan meletakkan sasaran untuk melatih seramai 1,000 orang Malim Gunung Perhutanan (MGP). Peranan MGP akan turut menjadi mata dan telinga kepada Jabatan Perhutanan Negeri bagi penguatkuasaan pencerobohan hutan dan kegiatan pemburuan haram. Bagi tujuan tersebut, sejumlah RM1.46 juta telah diluluskan dan diperuntukkan oleh MOF kepada KeTSA melalui Kumpulan Wang Covid-19.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN CHARLES ANTHONY SANTIAGO
[KLANG]**

SOALAN

TUAN CHARLES ANTHONY SANTIAGO [KLANG] minta **MENTERI KANAN PENDIDIKAN** menyatakan jumlah pelajar yang telah mendaftar untuk menduduki peperiksaan SPM dari tahun 2017-2021 dan senarai pelajar yang tidak hadir/menduduki peperiksaan SPM mengikut setiap negeri dan kaum dari tahun 2017-2021.

JAWAPAN

Tuan Yang di-Pertua,

Kementerian Pendidikan Malaysia (KPM) memaklumkan bahawa data kehadiran calon peperiksaan Sijil Pelajaran Malaysia (SPM) adalah merujuk kepada calon yang pertama kali menduduki peperiksaan SPM dengan mendaftar sekurang-kurangnya enam mata pelajaran.

Untuk makluman Ahli Yang Berhormat, bagi tahun 2017 hingga 2021, peratus calon yang tidak menduduki peperiksaan SPM mengikut negeri adalah seperti jadual yang dilampirkan.

Sekian, terima kasih.

Negeri	Tahun									
	2017		2018		2019		2020		2021	
	Calon Tidak Menduduki SPM (%)	Jumlah Calon Berdaftar	Calon Tidak Menduduki SPM (%)	Jumlah Calon Berdaftar	Calon Tidak Menduduki SPM (%)	Jumlah Calon Berdaftar	Calon Tidak Menduduki SPM (%)	Jumlah Calon Berdaftar	Calon Tidak Menduduki SPM (%)	Jumlah Calon Berdaftar
Sabah	1.6	53,608	1.8	50,188	1.8	48,916	1.7	48,005	2.3	48,815
Selangor	1.6	33,296	1.9	30,601	2.0	30,111	1.6	28,970	2.8	28,666
Selangor	2.0	29,432	2.4	27,893	2.5	28,109	1.9	26,660	2.5	26,255
Selangor	1.2	13,631	1.2	13,032	1.5	13,030	1.3	12,988	1.9	12,727
Negeri Sembilan	1.3	17,229	1.6	15,852	1.6	15,922	1.1	15,977	2.1	15,990
Sabah	1.9	21,743	2.0	20,678	2.3	20,224	1.9	20,303	2.9	19,941
Serak	1.6	37,300	1.7	34,269	1.9	33,583	1.6	32,012	2.3	32,017
Serlis	1.7	3,735	1.8	3,654	2.2	3,623	1.8	3,540	2.7	3,341
Sabah	1.2	21,991	1.5	20,098	1.5	19,732	1.5	19,307	2.5	19,406
Sabah	1.8	36,744	2.0	36,650	2.3	36,995	1.6	35,782	2.6	37,518
Sarawak	1.8	35,726	2.0	34,710	2.3	34,710	2.1	34,560	3.4	35,558
Selangor	1.4	74,408	1.6	70,671	1.7	71,831	1.6	70,783	3.2	72,395
Serengganu	1.9	19,644	2.0	18,762	2.6	18,755	2.0	18,076	3.3	18,047
N. P. Kuala Lumpur	1.4	20,971	1.6	19,500	1.7	19,335	1.5	18,931	2.6	19,434
N. P. Labuan	2.0	1,027	2.5	1,023	1.6	1,067	0.9	1,031	0.7	1,035
N. P. Putrajaya	0.8	1,328	1.4	1,319	1.4	1,403	1.4	1,511	1.7	1,692

JADUAL: PERATUS CALON YANG TIDAK MENDUDUKI PEPERIKSAAN SPM MENGIKUT NEGERI

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : TUAN CHARLES ANTHONY SANTIAGO
[KLANG]**

SOALAN

Tuan Charles Anthony Santiago [Klang] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan bagaimanakah harga siling bergerak berdasarkan harga input akan ditentukan untuk ayam dan minyak masak. Nyatakan juga tempoh masa harga siling ini akan berkuatkuasa.

JAWAPAN:

Yang di-Pertua,

Pada masa ini, Kerajaan masih melaksanakan kawalan harga ayam dan telur ayam serta minyak masak secara penentuan harga siling. Pelaksanaan Penentuan Harga Maksimum Ayam Dan Telur Ayam bermula 1 Julai hingga 31 Ogos 2022 untuk mengelakkan kenaikan harga ayam dan telur ayam yang membebankan keluarga Malaysia. Penentuan harga ini dibuat setelah mengambil kira kos-kos input yang telah meningkat dalam industri terbabit.

Tempoh pelaksanaan Penentuan Harga Maksimum Ayam dan Telur Ayam akan dilaksanakan selama 2 bulan bermula 1 Julai 2022 hingga 31 Ogos 2022 bagi menstabilkan harga dan bekalan sumber protein negara ini.

Bagi harga minyak masak paket 1kg bersubsidi, Kerajaan telah melaksanakan Skim Penstabilan Harga Minyak Masak (COSS).

Pelaksanaan harga siling bergerak berdasarkan kos input pula perlukan kajian terperinci berkaitan jangkaan turun naik kos input. Dasar pemberian subsidi bersasar serta pemberian bantuan tunai kepada kumpulan yang memerlukan. Oleh yang demikian, perkara ini akan diteliti dengan lebih strategic diantara KPDNHEP dengan pihak Kementerian Kewangan dan Unit Perancang Ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATO' HAJI CHE ABDULLAH BIN MAT NAWI [
TUMPAT]**

SOALAN

Dato' Haji Che Abdullah bin Mat Nawi [Tumpat] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah status terkini Program Food Bank Malaysia sejak dilancarkan beberapa tahun lepas dan apakah perancangan dan langkah masa depan bagi Program Food Bank Malaysia dalam masa terdekat.

JAWAPAN

Yang di-Pertua,

1. Kementerian Perdagangan Dalam Negeri dan Hal Ehwal Pengguna (KPDNHEP) telah mula memperkenalkan Program Food Bank Malaysia (PFBM) pada **22 Disember 2018**. Pelaksanaan PFBM adalah bertujuan untuk :

- i. Membantu golongan kurang berkemampuan mendapatkan akses bekalan makanan agar dapat meringankan kos sara hidup golongan tersebut;
- ii. Memberikan kesedaran kepada pengguna berkenaan inisiatif zero waste bagi mengelakkan pembaziran;
- iii. Mengurangkan pembaziran makanan yang masih boleh diguna semula dan mengurangkan kos operasi pasaraya-pasaraya;
- iv. Mewujudkan struktur pengurusan lebihan makanan yang lebih tersusun dan terancang sebagai salah satu inisiatif peringkat nasional

2. Sehingga 30 Jun 2022, PFBM telah mengagihkan sumbangan sebanyak **2762 tan metrik lebihan makanan** kepada **684,056 ahli isi rumah** di seluruh negara

3. Kementerian sedang giat membuat perancangan untuk meningkatkan lagi program ini agar terus membantu golongan yang disasarkan seperti berikut:

- 3.1 Pembelian **empat belas (14) unit lori** yang dilengkapi pendingin bagi meningkatkan kutipan sumbangan makanan daripada penyumbang selaras dengan pertambahan program ini di seluruh negara.
- 3.2 Bagi menjamin kelangsungan bekalan sumbangan, Kementerian telah menjalankan kerjasama dengan Badan Bukan Kerajaan (NGO) sebagai Rakan Strategik Utama (RSU) PFBM. Sehingga Jun 2022, terdapat **lapan (8)** RSU PFBM iaitu :

- i. The Lost Food Project
- ii. Food Aid Foundation
- iii. Kechara Soup Kitchen
- iv. Mutiara Food Bank Malaysia
- v. Mikro Malaysia
- vi. Yayasan Al Manje
- vii. Pertubuhan Wanita Negara (NOW) Malaysia
- viii. Muhibbah Food Bank Malaysia

3.3 Memperkenalkan Inisiatif Teknologi Pembungkusan Makanan secara Retort, ianya mampu memanjangkan jangka hayat makanan antara 18 sehingga 24 bulan. Sehingga Jun 2022, **sebanyak sepuluh (10) mesin retort** telah dipasang di seluruh negara.

4. Memperkenalkan **Akta Perlindungan Penderma Makanan** yang telah diwartakan pada **13 Mac 2020**. Akta ini merupakan satu peruntukan bagi perlindungan daripada liabiliti sivil kepada mana-mana pihak yang menderma atau mengedarkan makanan. Dengan adanya Akta ini, penyumbang tidak akan berasa ragu-ragu serta takut untuk menyumbang kepada program ini.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' HAJI CHE ABDULLAH BIN MAT
NAWI (TUMPAT)**

SOALAN

DATO' HAJI CHE ABDULLAH BIN MAT NAWI (TUMPAT) minta **MENTERI PEMBANGUNAN LUAR BANDAR** menyatakan jumlah dan perincian projek infrastruktur dan utiliti yang telah diluluskan untuk Parlimen Tumpat bagi tahun 2022.

JAWAPAN

Untuk makluman Yang Berhormat, sehingga kini sejumlah RM1.68 juta peruntukan telah diluluskan untuk Parlimen Tumpat pada tahun 2022 melibatkan dua (2) projek insfrastruktur di bawah Program Jalan Luar Bandar (JALB), lapan (8) projek Jalan Perhubungan Desa (JPD) dan tujuh (7) projek di bawah Program Ameniti Sosial (PAMS) dengan jumlah keseluruhan kos projek sebanyak RM72.98 juta seperti perincian berikut:

- i. Projek Menaiktaraf Jalan Dari Simpang Tiga Kg. Kok Seraya Ke Kg. Terbok, Tumpat, Kelantan.
 - Skop Projek: Menaik taraf jalan sepanjang 3.3 KM dengan spesifikasi JKR R3
 - Kos Projek: RM43 juta
 - Peruntukan Tahun 2022: RM100 ribu

SOALAN NO : 111

- ii. Projek Membina Jalan Dan Jambatan Melintasi Rel Keretapi Dari Kg Kok Keli Ke Kok Pasir Tumpat, Kelantan
 - Skop Projek: Membina jalan sepanjang 0.7 KM dengan spesifikasi JKR R2 dan satu (1) unit jambatan
 - Kos Projek: RM28.5 juta
 - Peruntukan Tahun 2022: RM100 ribu
- iii. Projek Jalan Perhubungan Desa (JPD) Negeri Kelantan
 - Skop Projek: Membina Baru/ Menaik Taraf/ Menyelenggara Jalan Perhubungan Desa
 - Peruntukan Keseluruhan: RM50 juta
 - Bilangan Projek Tahun 2022 (Tumpat): 8 projek
 - Peruntukan Tahun 2022 (Tumpat): RM465 ribu
- iv. Program Ameniti Sosial (PAMS) Negeri Kelantan
 - Skop Projek: Membina dan menaik taraf projek kecil kemudahan awam dan asas di luar bandar
 - Peruntukan Keseluruhan: RM30 juta
 - Bilangan Projek Tahun 2022 (Tumpat): 7 projek
 - Peruntukan Tahun 2022 (Tumpat): RM1.02 juta

Pelaksanaan projek-projek infrastruktur seperti ini diharap dapat menyumbang kepada kesejahteraan hidup masyarakat luar bandar khususnya dari aspek pembangunan ekonomi dan sosial. Sesuai dengan fokus pelaksanaannya yang bersifat *touch point* dan *people centric*, Kementerian komited untuk memastikan semua kampung dan penduduk menerima manfaat ini demi memajukan kemudahan infrastruktur serta memenuhi tuntutan pembangunan sosio-ekonomi terlibat di kawasan luar bandar.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' HAJI CHE ABDULLAH BIN MAT
NAWI [TUMPAT]

SOALAN

DATO' HAJI CHE ABDULLAH BIN MAT NAWI [TUMPAT] minta **MENTERI KEWANGAN** menyatakan umlah rizab negara pada 31 Disember 2021 dan adakah ia telah bertambah atau menyusut pada waktu ini.

JAWAPAN

Tuan Yang di-Pertua,

Kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjelaskan aktiviti ekonomi domestik meskipun dalam keadaan pasaran kewangan dan kadar pertumbuhan global yang tidak menentu.

Dalam keadaan global yang tidak menentu ini, keadaan pasaran kewangan yang stabil dan teratur adalah penting untuk sistem kewangan tempatan, sesuai dengan kedudukan Malaysia sebagai sebuah ekonomi yang terbuka.

Kerajaan menerusi Bank Negara Malaysia (BNM) akan sentiasa memastikan keadaan pasaran kewangan yang stabil dan lancar, dan mengambil langkah proaktif dengan memperkenalkan langkah-langkah untuk memastikan kecairan yang mencukupi dan pasaran yang berdaya tahan dan mendalam untuk menegah ketidakstabilan nilai ringgit. Dalam usaha untuk menstabilkan pasaran, BNM juga telah menyalurkan kecairan melalui penggunaan rizab antarabangsa BNM. Oleh itu, rizab antarabangsa BNM telah menunjukkan penyusutan sebanyak USD7.7 bilion, iaitu daripada USD116.9 bilion kepada USD109.2 bilion, bagi tempoh dari penghujung Disember 2021 hingga Jun 2022.

Walau bagaimanapun, penurunan rizab antarabangsa ini dijangka bersifat sementara dan tidak berterusan. Pemulihan kestabilan pasaran dunia, penambahbaikan sentimen pelabur dan lebihan akaun semasa negara yang kekal positif dijangka menyokong paras rizab antarabangsa BNM dalam jangka masa panjang.

Kerajaan menerusi BNM akan sentiasa menjalankan pemantauan bagi memastikan keadaan yang teratur dalam pasaran pertukaran asing dan mengelakkan turun naik yang ketara dalam kadar pertukaran ringgit.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' HAJI CHE ABDULLAH BIN MAT NAWI
[TUMPAT]**

SOALAN

DATO' HAJI CHE ABDULLAH BIN MAT NAWI [TUMPAT] minta **MENTERI KANAN PENDIDIKAN** menyatakan justifikasi keputusan oleh pihak Kementerian yang memansuhkan Pentaksiran Tingkatan Tiga (PT3) baru-baru ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa melaksanakan penambahbaikan kepada sistem pentaksiran dan penilaian murid seiring dengan keperluan semasa. Dalam Sistem Pentaksiran Pendidikan Kebangsaan, murid ditaksir melalui Pentaksiran Berasaskan Sekolah (PBS) dan Peperiksaan Pusat.

Berikutnya pemansuhan Pentaksiran Tingkatan Tiga (PT3) mulai tahun 2022, KPM memberi tumpuan kepada pemerksaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi).

Untuk makluman Ahli Yang Berhormat, PBS telah diperkenalkan lebih 10 tahun yang lalu, iaitu mulai tahun 2011 di peringkat sekolah rendah dan tahun 2012 di peringkat sekolah menengah. Pentaksiran ini bertujuan untuk menilai aspek intelek, emosi, rohani, jasmani dan sosial selaras dengan Falsafah Pendidikan Kebangsaan.

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah Pengajaran dan Pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai sebagai asas yang kukuh untuk mengikuti pembelajaran di peringkat seterusnya.

Antara pendekatan dalam pengukuhan PBD bagi murid Tahun 4 hingga Tingkatan 3 mulai tahun 2022 adalah dengan menambah baik pengurusan ujian akhir sesi akademik melalui penyediaan soalan yang setara standardnya oleh KPM. Soalan tersebut disediakan oleh guru yang berkepakaran dalam pembinaan item dan disimpan dalam sistem bank

soalan yang dibangunkan oleh KPM.

Untuk tujuan pelaksanaan ujian akhir sesi akademik, pihak sekolah akan menjana set soalan daripada sistem tersebut dan ditadbir di sekolah seperti mana ujian akhir tahun sebelum ini. Panduan penskoran juga akan disediakan untuk kemudahan guru.

Penambahbaikan kepada ujian akhir sesi akademik ini adalah bagi membolehkan guru dan ibu bapa bersama-sama membantu membangunkan potensi murid bermula daripada peringkat sekolah rendah. Dalam mencapai hasrat ini, pelaporan ujian akhir sesi akademik akan digunakan untuk membolehkan intervensi awal dilakukan bagi mengoptimumkan potensi murid. Pelaporan ini bukan untuk tujuan perbandingan pencapaian antara murid atau sekolah.

Untuk makluman Ahli Yang Berhormat, kejayaan dan kemenjadian murid haruslah dilihat secara holistik dan bukan semata-mata berdasarkan prestasi dalam bidang akademik sahaja. Justeru, pentaksiran melalui PAJSK dan PPsi juga diperkujuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah.

KPM juga akan menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh sebanyak dua kali setahun iaitu pada pertengahan sesi akademik dan akhir sesi akademik dengan menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPsi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerksaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebih menyeronokkan untuk murid.

Selain itu, KPM juga mempergiatkan program latihan untuk pentadbir dan guru bagi meningkatkan kemahiran serta memantapkan pelaksanaan pentaksiran berterusan di sekolah. Guru juga akan terus dilatih untuk meningkatkan inovasi dan kreativiti dalam pengajaran dan pembelajaran termasuk penggunaan teknologi digital.

KPM yakin bahawa pentaksiran yang bersifat holistik dan berterusan melalui PBS merupakan pendekatan terbaik bagi mengoptimumkan potensi murid secara menyeluruh dan bersepadu.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN
**DARIPADA : DATO' HAJI CHE ABDULLAH BIN
MAT NAWI [TUMPAT]**

SOALAN

DATO' HAJI CHE ABDULLAH BIN MAT NAWI [TUMPAT] minta **PERDANA MENTERI** menyatakan status kemampuan kewangan Kerajaan Persekutuan dalam menanggung subsidi jemaah haji pada waktu ini berikutan kos seorang jemaah haji telah naik sehingga mencecah RM25,000.

JAWAPAN

**YB SENATOR DATUK HAJI IDRIS HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang Di-Pertua,

1. Untuk makluman Ahli Yang Berhormat, jemaah haji Malaysia tidak diberikan subsidi oleh Kerajaan Malaysia tetapi mereka menerima bantuan kewangan bagi jemaah haji Muassasah. Mereka dibiayai sepenuhnya oleh Tabung Haji melalui pendapatan pelaburannya.
2. Melalui Bantuan Kewangan Haji tersebut, Tabung Haji membiaya sebahagian kos menunaikan haji untuk jemaah haji Muassasah yang menunaikan haji buat pertama kali sahaja.
3. Tabung Haji telah melaksanakan mekanisma Bantuan Kewangan Haji secara bersasar untuk tahun 2022/1443 Hijrah di mana Bayaran Haji

untuk jemaah haji Muassasah dalam Kumpulan B40 telah dinaikkan kepada RM10,980 seorang, berbanding bayaran asal RM9,980 seorang. Manakala bagi Kumpulan Bukan B40, Bayaran Haji untuk jemaah haji Muassasah telah dinaikkan kepada RM12,980 seorang.

4. Bagi tahun 2022/1443 Hijrah, kos Haji ini telah meningkat daripada RM25,540 seorang kepada RM28,630 seorang bagi jemaah haji Muassasah. Ia disebabkan oleh tambahan kos bagi perkhidmatan-perkhidmatan yang disediakan di Tanah Suci termasuk mutawif, perkhemahan dan Masya'ir.
5. Berdasarkan peningkatan Kos Haji 1443 Hijrah tersebut, maka Lembaga Tabung Haji telah membiayai RM17,650 seorang atau 62% sebagai Bantuan Kewangan Haji untuk jemaah haji Muassasah dalam Kumpulan B40. Manakala bagi jemaah haji Muassasah dalam Kumpulan Bukan B40, Lembaga Tabung Haji menanggung RM15,650 seorang atau 54% sebagai Bantuan Kewangan Haji.
6. Lembaga Tabung Haji akan meneruskan Bantuan Kewangan Haji bagi membantu jemaah haji mencukupkan perbelanjaan tunai haji mereka, bersesuaian dengan peranan Lembaga Tabung Haji mentadbir semua urusan berkaitan pengendalian dan kebajikan jemaah Malaysia. Mekanisma Bantuan Kewangan Haji bersasar untuk musim haji 1444 Hijrah dan seterusnya akan dimaklumkan oleh Lembaga Tabung Haji kelak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN CHE ALIAS BIN HAMID [KEMAMAN]

TARIKH : JULAI – OGOS 2022

SOALAN

TUAN CHE ALIAS BIN HAMID [KEMAMAN] minta **MENTERI PENGANGKUTAN** menyatakan alternatif yang disediakan bagi mengurangkan kesesakan lalu lintas terutama bandar-bandar utama.

JAWAPAN

Tuan Yang di-Pertua,

1. Pengangkutan awam darat terbahagi kepada beberapa jenis perkhidmatan iaitu perkhidmatan bas, perkhidmatan rel serta perkhidmatan Teksi dan E-Hailing, yang menawarkan perkhidmatan mengikut model operasi masing-masing sepetimana yang telah ditetapkan.
2. Perkhidmatan bas terutamanya bas henti-henti menyediakan perkhidmatan pengangkutan yang menyambungkan pusat-pusat petempatan di kawasan bandar dan luar bandar untuk membawa penduduk ke lokasi-lokasi utama seperti tempat kerja, sekolah dan pekan yang berdekatan. Perkhidmatan rel terutamanya rel bandar seperti perkhidmatan MRT dan LRT merupakan perkhidmatan pengangkutan massa yang pantas serta melalui lokasi-lokasi berdensiti tinggi ke pusat bandar.

3. Bagi perkhidmatan Teksi dan e-Hailing ia merupakan pelengkap perjalanan penumpang dalam urusan pergerakan harian. Penumpang boleh menggunakan perkhidmatan Teksi dan e-Hailing sama ada sebagai pergerakan jarak dekat, jarak jauh ataupun pengantara sahaja. Perkhidmatan tekси dan e-hailing iaitu tempahan kenderaan secara atas talian merupakan pelengkap kepada jaringan pengangkutan awam dari segi perjalanan batuan pertama dan akhir. Sesuai dengan arus perubahan teknologi semasa, perkhidmatan e-hailing mempunyai liputan lebih meluas dan dapat memenuhi permintaan pelanggan dengan lebih baik berbanding kaedah tradisional (tahanan tepi jalan atau di pengkalan).
4. Dalam masa beberapa tahun lagi, rangkaian rel di Lembah Klang / Kuala Lumpur akan dilebarkan. Projek MRT Putrajaya (MRT2) sejauh 56.4 km dijangka siap sepenuhnya menjelang Januari 2023, manakala projek LRT3 sejauh 37.6 km pula dijangka siap sepenuhnya menjelang Februari 2024. Selain itu, Kerajaan juga sedang melaksanakan pembinaan projek Laluan Rel Pantai Timur (ECRL) sepanjang 665 km yang merupakan projek rel yang akan menghubungkan negeri-negeri di Pantai Timur dengan Pantai Barat Semenanjung Malaysia dan dijangka siap pada penghujung tahun 2026.
5. Dalam masa yang sama, Kerajaan juga telah meluluskan pelaksanaan Projek MRT 3 yang merupakan sebuah laluan lingkaran meliputi perimeter luar bandaraya Kuala Lumpur dan sebahagian kawasan berpenduduk padat di kawasan Ampang Jaya, Selangor. MRT 3 dirancang dengan laluan sepanjang 51km di mana 39 kilometer terletak di Wilayah Persekutuan Kuala Lumpur dan 12 kilometer terletak di Selangor. Laluan lingkaran ini akan merentasi rangkaian rel sedia ada, termasuk laluan MRT1, MRT2, LRT, Monorel dan KTM Komuter untuk membentuk 10 buah stesen pertukaran (interchange station) baharu supaya sistem rangkaian pengangkutan awam di Lembah Klang ini lebih menyeluruh, berkesinambungan dan efisien. Proses tender bagi projek ini akan dimulakan pada tahun ini dan projek dijangka siap sepenuhnya pada tahun 2030.

6. Projek Iskandar Malaysia Bus Rapid Transit (IMBRT) di Johor dijangka bermula sepenuhnya pada akhir tahun 2022, dengan Fasa 1 dijangka beroperasi pada akhir tahun ini. IMBRT mempunyai liputan rangkaian sepanjang 2,051km yang terdiri daripada 63km (Trunk Line), 1,247 km (*Direct Line*) dan 741km (*Feeder Line*) yang melibatkan pelbagai laluan. Perkhidmatan BRT ini mampu menampung seramai 4,500 jumlah penumpang perjam sehala.
7. Bagi memastikan kesalinghubungan perkhidmatan bas kepada rakyat, Kerajaan telah menyediakan perkhidmatan bas ‘MyBAS’ di 4 ibu negeri iaitu Kangar, Ipoh, Seremban dan Kuala Terengganu. Bagi tahun 2022 Kerajaan telah memperuntukan sebanyak RM78 juta bagi membiayai program ini di mana ianya turut diperluaskan ke Johor Bahru pada tahun 2022.
8. Selain itu, Kerajaan juga telah meneruskan Pas Perjalanan Tanpa Had My50 bagi perkhidmatan rel dan bas kendalian RapidKL bagi Lembah Klang dan Pulau Pinang. Kerajaan juga telah memperkenalkan inisiatif MyRail5 khusus bagi perkhidmatan KTM Komuter di sektor Lembah Klang, Utara dan Antarabandar Kuala Lipis – Tumpat untuk pelajar sekolah Tahun 1 sehingga Tingkatan 6 dan golongan orang kurang upaya kendalian Keretapi Tanah Melayu Berhad.

Sekian terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : TUAN CHE ALIAS BIN HAMID
[KEMAMAN]**

SOALAN

TUAN CHE ALIAS BIN HAMID minta **MENTERI KESIHATAN** menyatakan sejauh mana penguatkuasaan dan kawal selia telah dijalankan secara menyeluruh dalam industri *vape* yang mengandungi bahan terlarang seperti dadah.

JAWAPAN

Tuan Yang di-Pertua,

1. Untuk makluman, kawalan dan penguatkuasaan terhadap cecair *vape* yang mengandungi nikotin dijalankan oleh Bahagian Penguatkuasaan Farmasi, Kementerian Kesihatan Malaysia (KKM). Manakala, bagi cecair *vape* yang disyaki mengandungi bahan terlarang seperti dadah berbahaya, ianya adalah di bawah tindakan penguatkuasaan Polis Diraja Malaysia.

2. Nikotin yang terdapat dalam cecair *vape* telah disenaraikan sebagai racun Kumpulan C di bawah Jadual Pertama, Akta Racun 1952. Terdapat kawalan ke atas aktiviti berkaitan nikotin seperti pengimportan, pengilangan, penjualan dan pembekalan di bawah Akta Racun 1952. Di bawah akta ini, penjualan nikotin hanya boleh dilakukan oleh ahli farmasi berlesen atau pengamal perubatan berdaftar untuk rawatan perubatan sahaja. Penjualan sediaan mengandungi nikotin bagi tujuan selain daripada untuk rawatan perubatan merupakan satu kesalahan di bawah Akta Racun 1952.

SOALAN NO. 116

3. Sesiapa yang melakukan kesalahan di bawah Akta Racun 1952 dan jika disabitkan kesalahan boleh dihukum dengan denda tidak melebihi RM3,000 atau penjara tidak melebihi satu (1) tahun atau kedua-duanya sekali.
4. Sepanjang tahun 2021 sehingga Jun 2022, KKM telah merampas sebanyak 5,829 unit vape yang mengandungi nikotin dengan nilai rampasan berjumlah RM156,976. Selain itu, KKM turut menerima kes rampasan vape yang mengandungi nikotin daripada Pasukan Gerakan Am (PGA) melalui sekatan jalan raya. Sejak tahun lepas sehingga Jun 2022, sebanyak 60,925 unit vape yang dirampas oleh PGA diserahkan kepada BPF dengan nilai rampasan berjumlah RM2,026,025.
5. Bahagian Penguatkuasaan Farmasi juga telah meningkatkan pemantauan dan tindakan penguatkuasaan melibatkan pengiklanan dan penjualan vape mengandungi nikotin secara dalam talian. Sebanyak 11,173 iklan vape mengandungi nikotin telah diarahkan untuk diturunkan di platform e-dagang dalam negara sejak tahun 2019 sehingga Jun 2022. Sebanyak 3 laman sesawang yang menjual vape mengandungi nikotin turut dimajukan kepada Suruhanjaya Komunikasi dan Multimedia Malaysia (SKMM) untuk tindakan sekatan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KE EMPAT BELAS**

PERTANYAAN : BUKAN LISAN (BERTULIS)

**DARIPADA : TUAN CHE ALIAS BIN HAMID
(KEMAMAN)**

SOALAN

TUAN CHE ALIAS BIN HAMID (KEMAMAN) minta MENTERI PERTANIAN DAN INDUSTRI MAKANAN menyatakan :

- (a) bilangan nelayan asing yang menjadi awak-awak di bot nelayan tempatan kelas C di seluruh negara bermula tahun 2018 hingga sekarang; dan
- (b) sejauh mana tindakan tegas yang telah dilakukan terhadap awak-awak warga asing yang telah menjual hasil tangkapan di tengah laut.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) telah melaksanakan inisiatif pengambilan kru penangkapan ikan warga asing bagi memenuhi tenaga buruh untuk sektor perikanan. Jumlah kru penangkapan ikan warga asing bekerja di vesel penangkapan ikan tempatan Zon C dari tempoh 2018 hingga kini adalah seramai 88,541 orang.

MAFI bersama-sama agensi penguatkuasa yang lain seperti Agensi Penguatkuasa Maritim Malaysia (APMM) dan Polis Marin sentiasa bergiat aktif melakukan pemantauan dan penguatkuasaan bagi memastikan tidak berlakunya ketirisan dalam hasil perikanan negara.

Sepanjang tempoh lima (5) tahun bermula pada 2018 hingga 2022, sebanyak 698 kes tangkapan tempatan yang berkaitan dengan kesalahan kru asing. Dari jumlah tersebut sebanyak 454 kes adalah bagi kawasan perairan Pantai Barat Malaysia manakala sebanyak 205 kes melibatkan perairan Pantai Timur Malaysia dan sebanyak 39 kes bagi kawasan perairan Sarawak. Tindakan tegas yang telah dilakukan terhadap awak-awak warga asing telah diambil di bawah Akta:

- i. Seksyen 25 (a): denda tidak melebihi enam ratus ribu ringgit (RM600 ribu) bagi tiap-tiap anggota kru asing; dan
- ii. Seksyen 25 (aa): denda tidak melebihi empat juta ringgit (RM4juta) ke atas vesel penangkapan ikan tempatan bagi kesalahan dilakukan di laut lepas.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN CHE ALIAS BIN HAMID [KEMAMAN]

SOALAN

Tuan Che Alias bin Hamid [Kemaman] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan :-

- (a) statistik rampasan minyak masak botol dan paket bersubsidi di setiap negeri bagi tahun 2018 hingga pertengahan tahun 2022; dan
- (b) langkah penguatkuasaan dan pemantauan yang dilaksanakan bagi membendung penyelewengan minyak masak paket bersubsidi sama ada dilakukan oleh pengilang mahupun peniaga.

JAWAPAN:

Yang di-Pertua,

- a) Tindakan penguatkuasaan bagi membanteras penyelewengan minyak masak paket dan botol telah dipertingkatkan bagi memastikan subsidi sampai ke golongan sasar. Sepanjang tahun 2018 sehingga Jun 2022, sebanyak 430 kes telah dihasilkan berkaitan penyelewengan minyak masak paket dan botol melibatkan nilai rampasan hampir RM15.7 juta.
- b) Kerajaan menzahirkan komitmen tinggi dalam usaha membendung sebarang penyelewangan atau kepincangan berhubung barang keperluan bersubsidi negara terutama minyak masak. Justeru, Kementerian telah mengambil tindakan-tindakan seperti berikut:
- i. Mengarahkan pemeriksaan dan pengauditan di setiap peringkat rantaian pengedaran minyak masak melalui aktiviti semakan *Pre-Delivery Plan*;
 - ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
 - iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;
 - iv. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan;
 - v. Mempertingkatkan kerjasama dengan agensi-agensi penguatkuasaan lain seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM) dan Eastern Sabah Security Command (ESSCOM); dan
 - vi. Mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegerunan di kalangan peniaga.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN CHE ALIAS BIN HAMID [KEMAMAN]

TARIKH :

SOALAN

Tuan Che Alias bin Hamid [KEMAMAN] minta **MENTERI SUMBER MANUSIA** menyatakan sejauh mana kajian telah dibuat terhadap penerimaan majikan-majikan swasta khususnya sektor pembuatan dan pembinaan kepada cadangan Kerajaan untuk membenarkan pekerja memohon Aturan Kerja Fleksibel (AKF).

JAWAPAN

Tuan Yang Di Pertua,

Berdasarkan Pindaan kepada Akta Kerja 1955, satu peruntukan baharu berkaitan Aturan Kerja Fleksibel diwujudkan. Ini bagi membolehkan pekerja memohon kepada majikan bagi suatu aturan kerja fleksibel, dengan izin, *flexible working arrangement*. Walau bagaimanapun, ianya tertakluk kepada jenis pekerjaan yang sesuai bagi membenarkan pekerja melaksanakan pekerjaannya mengikut kesesuaian waktu kerja, hari bekerja atau tempat kerja.

Peruntukan ini adalah bertepatan dan sesuai dengan budaya kerja hibrid yang diamalkan pada masa ini terutamanya dalam situasi pekerja digalakkan untuk bekerja dari rumah bagi mengawal penularan wabak termasuk COVID-19. Walau bagaimanapun, pekerja dan majikan masih lagi tertakluk kepada peruntukan di bawah Akta Kerja seperti jumlah jam bekerja, waktu rehat mencukupi dan sebagainya.

Pindaan kepada Akta Kerja 1955 termasuk peruntukan baharu berkenaan aturan kerja fleksibel telah pun dibincangkan dalam sesi libat urus bersama pihak berkepentingan iaitu majikan, pekerja, kesatuan sekerja, pertubuhan majikan, pertubuhan pekerja dan agensi Kerajaan.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN STEVEN CHOONG SHIAU YOON
[TEBRAU]**

SOALAN

TUAN STEVEN CHOONG SHIAU YOON [TEBRAU] minta **MENTERI KANAN PENDIDIKAN** menyatakan daripada 1,020 buah sekolah-sekolah yang daif dan usang di Sarawak pada 30 Oktober 2020 (Borneo Post bertarikh 17 Jun 2022) berapa sekolah yang kini sedang dalam proses dinaik-taraf.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk negeri Sarawak.

Untuk makluman Ahli Yang Berhormat, sehingga tahun 2022, KPM telah diluluskan sebanyak 361 projek menaik taraf dan membangunkan semula bangunan daif di sekolah seluruh negeri Sarawak dengan kos peruntukan sebanyak RM2.373 bilion. Sehingga 19 Julai 2022, status pelaksanaan projek adalah 206 projek telah siap sepenuhnya, 65 projek di peringkat pembinaan dan 90 projek di peringkat prabina.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : JULAI – OGOS 2022

SOALAN

Tuan Steven Choong Shiao Yoon [TEBRAU] minta **MENTERI PENGANGKUTAN** menyatakan rancangan Kementerian untuk membendung kejadian penunggang motosikal tidak memakai topi keledar di kawasan kampung serta taman perumahan dan kerjasama yang dilaksanakan bersama pihak penguatkuasaan kerana ramai yang maut dalam kemalangan berpunca daripada kecederaan kepala.

JAWAPAN

Tuan Yang di Pertua,

1. Kajian MIROS menunjukkan bahawa penunggang motosikal luar bandar (57.3%) cenderung terlibat dalam kemalangan jalan raya jika dibandingkan dengan di bandar (42.7%). Selain itu, penunggangan pertama bagi remaja di luar bandar adalah seawal umur 12 tahun, berbanding dengan di bandar iaitu umur 13 tahun dan kedua-duanya masih belum mencapai umur kelayakan minimum untuk memohon lesen menunggang motosikal iaitu 16 tahun.

2. Antara usaha advokasi yang dilaksanakan oleh Kementerian Pengangkutan melalui JPJ dan MIROS adalah seperti berikut:

- a. Program Pemerkasaan Pengguna Jalan Raya Malaysia (SEIRING) dimana MIROS menjemput masyarakat setempat untuk hadir ke MIROS bagi merasai pengalaman peralatan MIROS seperti simulator pemanduan, *seatbelt convincer*, modul Pendidikan Keselamatan Jalan Raya, kursus pendek penyelenggaraan kenderaan, penggunaan topi keledar dengan selamat, kesedaran tentang kelesuan dan lain-lain. SEIRING adalah program yang bertujuan untuk memperkasakan masyarakat yang terdiri daripada golongan dewasa dan kanak-kanak bagi mempromosikan kawalan kendiri peraturan keselamatan jalan raya;
- b. Program Berasaskan Komuniti iaitu program libat urus bersama komuniti di Kajang bagi tujuan memberi panduan dan nasihat untuk menambahbaik dan menangani isu keselamatan jalan raya dalam kalangan komuniti berasaskan daptan kajian yang dilaksanakan oleh MIROS;
- c. Pro-Riders – bertujuan untuk memberi latihan penunggangan selamat dan penyelenggaraan motosikal dalam usaha mengurangkan kemalangan di kalangan penunggang motosikal;
- d. Program Pendidikan Keselamatan Jalan Raya (PKJR) yang dilaksanakan oleh JPJ bermula dari peringkat taska, prasekolah dan sekolah rendah sehingga ke peringkat sekolah menengah rendah bagi meningkatkan kesedaran pengguna jalan raya di peringkat awal; dan
- e. Program Kesedaran Awam Keselamatan Jalan Raya di peringkat komuniti, institusi pendidikan dan kelompok bersasar seperti *Safety Awareness and Focused Advocacy for Road Users – Motosikal (SAFER)* yang dijalankan oleh JPJ.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN STEVEN CHOONG SHIAU YOON
[TEBRAU]

SOALAN

TUAN STEVEN CHOONG SHIAU YOON [TEBRAU] minta **MENTERI KEWANGAN** menyatakan sebab mengapa beberapa Telco masih tidak mahu menyertai Digital Nasional Berhad (DNB) dan adakah ini akan melambatkan pelaksanaan 5G seperti yang dijadualkan.

JAWAPAN

Tuan Yang di-Pertua,

Secara umumnya, DNB sedang menjalankan **perbincangan secara berterusan** bersama syarikat Telekomunikasi mengenai pelaksanaan rangkaian 5G serta Perjanjian Akses Borong (*Wholesale Access Agreement*) dan Penyertaan Ekuiti oleh syarikat Telekomunikasi dengan penglibatan pihak Suruhanjaya Komunikasi dan Multimedia Malaysia (SKMM) sebagai agensi kawal selia.

Di antara perkara yang dirundingkan termasuklah **akses yang adil dan tanpa diskriminasi, standard prestasi, penentuan harga dan tadbir urus.**

Untuk makluman Dewan yang mulia, **industri telekomunikasi Malaysia menyokong pelan pelaksanaan 5G Kerajaan melalui Rangkaian Borong Tunggal** (*Single Wholesale Network* atau SWN) seperti yang dinyatakan oleh Pengerusi Kumpulan AXIATA serta ketua-ketua syarikat telekomunikasi yang lain.

Berdasarkan perbincangan dan sesi libat urus yang dijalankan, **dijangkakan kesemua syarikat Telekomunikasi akan dapat menawarkan perkhidmatan 5G tidak lama lagi.**

Sehingga penghujung bulan Jun 2022, kesemua 6 buah pengendali rangkaian mudah alih secara rasminya telah membuat permohonan akses dan sedang dalam proses untuk mengintegrasikan rangkaian masing-masing dengan rangkaian 5G DNB. Setelah proses integrasi selesai, syarikat Telekomunikasi dijangka berupaya menawarkan perkhidmatan 5G kepada pelanggan.

Berhubung penyertaan ekuiti, kesemua 6 buah pengendali rangkaian mudah alih telah menandatangani Terma Pelaburan (*Term Sheet*) yang mengandungi terma komersial utama bagi penyertaan Ekuiti sebelum tarikh akhir 30 Jun 2022. Terkini, kesemua pihak sedang memuktamadkan perjanjian rasmi Penyertaan Ekuiti tertakluk kepada

kelulusan berdasarkan proses tadbir urus dalaman syarikat-syarikat telekomunikasi.

Pada masa yang sama, perbincangan aktif sedang dijalankan untuk menangani isu mengenai Tawaran Akses Rujukan (*Reference Access Offer* atau RAO) serta untuk memuktamadkan Perjanjian Akses agar dapat dimeterai sebelum atau pada 31 Ogos 2022.

Dengan memenuhi segala obligasi serta dengan penyertaan oleh syarikat Telekomunikasi, tidak sepatusnya berlaku sebarang penangguhan ke atas tawaran perkhidmatan 5G kepada rakyat.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : TUAN STEVEN CHOONG SHIAU
YOON (TEBRAU)**

SOALAN

TUAN STEVEN CHOONG SHIAU YOON (TEBRAU) minta **MENTERI PEMBANGUNAN WANITA, KELUARGA DAN MASYARAKAT** menyatakan langkah-langkah yang telah diambil untuk memastikan Rumah Bonda akan dijalankan mematuhi piawaian yang ditetapkan bagi mengelakkan isu Bella tidak berulang.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) amat komited dan sentiasa memberi perhatian kepada aspek kebajikan dan keperluan penghuni di semua pusat jagaan yang berdaftar di bawah Akta Pusat Jagaan 1993.

Sehingga April 2022, terdapat 1,910 buah Pusat Jagaan yang telah berdaftar dengan Jabatan Kebajikan Masyarakat (JKM). Daripada jumlah tersebut, 1,262 adalah pusat jagaan kanak-kanak; 208 pusat jagaan warga emas; sembilan (9) pusat jagaan wanita; dan 50 pusat jagaan pelbagai kategori.

Bagi memastikan pusat jagaan ini diuruskan dengan baik, KPWKM melalui JKM sentiasa menjalankan pemeriksaan ke atas pengoperasian pusat jagaan dari semasa ke semasa bagi memastikan pusat jagaan mematuhi *standard* yang ditetapkan. Sehingga April 2022, sebanyak 659 kali pemeriksaan telah dilakukan ke atas 659 pusat jagaan.

Rumah Bonda merupakan premis yang tidak berdaftar di bawah Akta Pusat Jagaan 1993 [Akta 506]. Oleh yang demikian, tindakan penguatkuasaan lak terhadap premis berkenaan telah diambil pada 12 Julai 2021 selaras dengan seksyen 16A Akta 506. Notis Pemberitahuan Tindakan Lak telah diserahkan pada 9 Julai 2022 dan pengendali Rumah Bonda telah diberitahu bahawa sebarang aktiviti hendaklah dihentikan serta-merta mulai 12 Julai 2022. Selain daripada itu, tindakan kompaun juga telah diambil dengan keizinan Pendakwa Raya selaras dengan seksyen 21A Akta 506 dan Peraturan-Peraturan Pusat Jagaan (Pengkompaunan Kesalahan) 2011.

Amaun kompaun sebanyak RM5,000 yang dikenakan terhadap pengendali Rumah Bonda adalah amaun kompaun maksimum iaitu 50% daripada jumlah denda maksimum yang boleh dikenakan di bawah Akta 506. Pengendali Rumah Bonda telah membuat bayaran penuh kompaun tersebut pada 25 April 2022.

Berdasarkan subseksyen 16A(3) Akta 506, lak terhadap premis tersebut hanya boleh ditanggalkan antaranya dengan perintah mahkamah dan pengendali mestilah berhenti menggunakan premis tersebut sebagai pusat jagaan selagi belum berdaftar di bawah Akta 506.

Pada 15 Julai 2022; Mahkamah Majistret Kuala Lumpur telah membenarkan permohonan pengendali Rumah Bonda untuk penanggalan lak dengan aku janji bahawa premis tidak akan digunakan sebagai pusat jagaan sepetimana peruntukan seksyen 16A Akta 506.

Sekiranya didapati bahawa premis tersebut beroperasi semula sebagai pusat jagaan tanpa pendaftaran yang sah di bawah Akta 506, JKM akan mengambil tindakan penguatkuasaan terhadap pengendali premis tersebut dan pengendali premis boleh dikenakan tindakan kerana ingkar perintah mahkamah/menghina mahkamah (*contempt of court*).

Tindakan penguatkuasaan ke atas Rumah Bonda dilaksanakan bagi memastikan pengoperasian mana-mana pusat jagaan adalah mematuhi Akta Pusat Jagaan 1993 dan Peraturan-Peraturan Pusat Jagaan 1994.

Selain daripada itu salah satu lagi usaha kerajaan dalam memastikan pusat jagaan berdaftar di bawah Akta Pusat Jagaan 1993 adalah dengan melaksanakan *Program My Community Enforcement Care (MyCCE)*. Program MYCCE merupakan program berbentuk *shared responsibility* dan *community oriented enforcement* yang menggunakan pendekatan perkongsian tanggungjawab bersama komuniti dalam mengenal pasti TASKA dan Pusat Jagaan yang tidak mematuhi undang- undang.

Negeri Johor telah dipilih sebagai Projek Rintis Program MyCCE. Seramai 40 orang sukarelawan MyCCE Johor telah berdaftar dan berperanan sebagai mata dan telinga jabatan bagi menyalurkan maklumat berkaitan pusat jagaan tidak berdaftar serta melaksanakan advokasi perundangan berkaitan akta tersebut. Keahlian sukarelawan MyCCE ini juga telah diperluas ke seluruh negara mulai Mac 2022.

SOALAN NO. : 124

Selain itu, program advokasi kepada masyarakat khususnya kepada pengendali pusat jagaan turut diadakan secara berterusan bagi memastikan masyarakat sedar tentang kepentingan untuk sesebuah pusat jagaan berdaftar dengan JKM. Sehingga Mei 2022, sebanyak 73 program jerayawara telah diadakan.

JKM juga telah melaksanakan Sistem Penilaian Kendiri Pusat Jagaan (myKendiri) bagi mengawal kualiti dan standard minimum sesebuah pusat jagaan. myKendiri merupakan sistem yang memberikan tanggungjawab kepada pengendali pusat jagaan untuk mengemukakan laporan pengoperasian pada setiap enam (6) bulan. Sehingga Julai 2022, seramai 1,305 pengendali pusat jagaan telah melakukan penilaian kendiri melalui sistem myKendiri ini dan sebanyak 404 pemeriksaan telah dijalankan oleh Pegawai Diberi Kuasa (PDBK) JKM.

Dengan pelaksanaan langkah-langkah tersebut, Kementerian berharap mengharapkan kualiti jagaan di pusat jagaan berdaftar akan bertambah baik di masa hadapan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN CHOW KON YEOW [TANJONG]

SOALAN

Tuan Chow Kon Yeow [Tanjong] minta **MENTERI ALAM SEKITAR DAN AIR** menyatakan bilakah klasifikasi buangan berjadual sisa air (SW204) dan pengurusannya oleh Suruhanjaya Perkhidmatan Air Negara (SPAN) dapat diluluskan serta dilaksanakan. Sekiranya tidak diluluskan, apakah jalan penyelesaian Kementerian dalam mengatasi isu tersebut kini yang amat membebankan para operator air dalam negara.

JAWAPAN

Tuan Yang Di-Pertua,

1. Untuk makluman Ahli Yang Berhormat, enapcemar daripada loji rawatan air (LRA) dikategorikan sebagai buangan terjadual kerana mengandungi logam aluminium yang berpunca daripada bahan kimia tambahan di dalam proses rawatan air mentah. Enapcemar LRA dikodkan dengan SW 204 seperti mana yang dinyatakan di dalam Jadual Pertama, Peraturan-Peraturan Kualiti Alam Sekeliling (Buangan Terjadual) 2005, Akta Kualiti Alam Sekeliling 1974 dan pengurusannya juga tertakluk di bawah peraturan yang sama.
2. Pada masa ini, Jabatan Alam Sekitar (JAS) masih membenarkan pelupusan enapcemar LRA di tapak-tapak pelupusan sanitari ataupun tapak-tapak pelupusan khas enapcemar LRA melalui Pengurusan Khas Buangan Terjadual di mana kosnya lebih murah berbanding pelupusan ke tapak pelupusan selamat (*secure landfill*). Pada masa yang sama, JAS turut menggalakkan operator-operator air untuk mencari alternatif lebih baik bagi melupuskan enapcemar seperti dijadikan bahan tambak, bahan perapi tanah, penghasilan produk bata atau apa-apa alternatif lain yang sesuai. Proses ini juga dikawal oleh JAS di bawah prosedur Pengurusan Khas Buangan Terjadual.
3. Bagi pengelasan semula enapcemar sebagai bukan buangan terjadual, perkara ini masih dalam penelitian pihak JAS.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN CHOW KON YEOW [TANJONG]

YB TUAN CHOW KON YEOW [TANJONG] minta **MENTERI PERUMAHAN DAN KERAJAAN TEMPATAN** menyatakan status permohonan Kerajaan Negeri Pulau Pinang melibatkan lima (5) tapak tanah berkeluasan 72.6 ekar di kesemua lima (5) daerah bagi tujuan pembangunan Projek Perumahan Rakyat (PPR) di negeri Pulau Pinang. Kongsikan juga statistik PPR bagi seluruh negara sehingga kini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah menerima tiga (3) cadangan tapak bagi pembangunan Program Perumahan Rakyat (PPR) untuk tahun 2023 daripada Kerajaan Negeri Pulau Pinang. KP KT juga telah mengadakan lawatan penilaian tapak bagi meneliti kesesuaian tapak untuk pelaksanaan pembangunan PPR tersebut. Tapak yang dicadangkan adalah di Bandar Jelutong (Daerah Timur Laut), Ujong Batu, Butterworth (Daerah Seberang Perai Utara) dan Teluk Kumbar, Balik Pulau (Daerah Barat Daya). Pihak KP KT sentiasa bersedia mempertimbangkan sebarang cadangan pembangunan PPR yang dikemukakan oleh kerajaan negeri. Cadangan tapak yang ditawarkan akan diteliti oleh KP KT berdasarkan keutamaan yang ditentukan oleh kerajaan negeri, kesesuaian tapak dan keperluan penduduk setempat. Namun, kelulusan bagi pelaksanaan projek pembangunan ini adalah bergantung kepada kelulusan Unit Perancang Ekonomi (EPU).

Terdapat empat (4) projek PPR yang telah siap dibina di negeri Pulau Pinang iaitu PPR Jalan Thamby, Butterworth (Taman Bagan Jaya), PPR Kg. Tok Suboh, Seberang Perai Tengah, PPR Mak Mandin, Butterworth dan PPR Lorong Selamat, Georgetown (PPR Taman Manggis). Jumlah keseluruhan unit yang telah siap dibina adalah sebanyak 999 unit. Selain itu, terdapat satu (1) PPR dalam perancangan iaitu PPR Kepala Batas, Pulau Pinang yang melibatkan 700 unit rumah. Maklumat PPR di seluruh negara pula adalah seperti di **Lampiran A**.

Sekian, terima kasih.

LAMPIRAN A

STATUS PELAKSANAAN PROGRAM PERUMAHAN RAKYAT (PPR)
MENGIKUT NEGERI SEHINGGA JUN 2022

NEGERI	PROJEK SIAP		PROJEK DALAM PEMBINAAN		PROJEK DALAM PERANCANGAN		JUMLAH	
	BIL. PROJEK	BIL. UNIT	BIL. PROJEK	BIL. UNIT	BIL. PROJEK	BIL. UNIT	BIL. PROJEK	BIL. UNIT
Johor	12	11,195	6	2,530	2	1,300	20	15,025
Kedah	10	4,910	0	0	0	0	10	4,910
Kelantan	6	3,268	1	150	0	0	7	3,418
Melaka	3	1,436	2	375	1	300	6	2,111
Negeri Sembilan	3	670	2	552	0	0	5	1,222
Pahang	31	4,168	3	550	1	1,000	35	5,718
Perak	9	1,274	0	0	0	0	9	1,274
Perlis	3	1,428	0	0	1	75	4	1,503
Pulau Pinang	4	999	0	0	1	700	5	1,699
Sabah	33	23,009	5	3,090	0	0	38	26,099
Sarawak	10	4,791	1	461	0	0	11	5,252
Selangor	4	5,184	2	904	0	0	6	6,088
Terengganu	1	1,002	2	950	0	0	3	1,952
W.P. Kuala Lumpur	27	34,862	0	0	0	0	27	34,862
W.P. Labuan	0	0	1	500	0	0	1	500
JUMLAH	156	98,196	25	10,062	6	3,375	187	111,633

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN CHOW KON YEOW [TANJONG]

TARIKH : JULAI – OGOS 2022

SOALAN

TUAN CHOW KON YEOW [TANJONG] minta **MENTERI PENGANGKUTAN** menyatakan status permohonan menyediakan perkhidmatan teksi air di Pulau Pinang.

JAWAPAN

Tuan Yang Di Pertua,

1. Kerajaan Negeri Pulau Pinang telah mengemukakan cadangan penyediaan perkhidmatan teksi air sebagai pengangkutan awam di Pulau Pinang kepada Kementerian Pengangkutan (MOT). MOT juga dimaklumkan bahawa cadangan tersebut adalah salah satu daripada inisiatif di bawah Pelan Induk Pengangkutan Pulau Pinang (*Penang Transport Master Plan – PTMP*) yang bertujuan sebagai salah satu mod pengangkutan awam untuk mengurangkan kesesakan lalu lintas dan menggalakkan aktiviti pelancongan di Pulau Pinang .
2. Oleh itu, Kerajaan Negeri Pulau Pinang melalui Majlis Bandaraya Pulau Pinang (MBPP) telah bercadang untuk melaksanakan *Request for Proposal* (RFP) bagi mendapatkan cadangan menyeluruh daripada syarikat yang berminat untuk menyedia dan mengoperasikan perkhidmatan teksi air di Pulau Pinang dan telah memohon pertimbangan dan kelulusan MOT untuk Kerajaan Negeri melaksanakan RFP bagi perkhidmatan teksi air selaras dengan bidang kuasa Kerajaan Persekutuan yang telah termaktub di bawah Jadual 9, Akta Perlembagaan Persekutuan.
3. Lanjutan daripada permohonan tersebut, , pihak Kerajaan Negeri dan MBPP telah dijemput bagi membentangkan cadangan tersebut kepada pihak MOT pada 25 April 2022. Semasa sesi pembentangan tersebut, MOT telah mengemukakan beberapa persoalan dan cadangan penambahbaikan terhadap inisiatif tersebut di mana Kerajaan Negeri juga bersetuju untuk membuat penelitian semula. Walau bagaimanapun, sehingga kini, pihak Kementerian masih belum menerima maklum balas lanjut daripada pihak Kerajaan Negeri mahu pun MBPP berkenaan hasil penelitian semula seperti mana yang dijanjikan.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN CHOW KON YEOW [TANJONG]

SOALAN

YB TUAN CHOW KON YEOW [TANJONG] minta **MENTERI PERUMAHAN DAN KERAJAAN TEMPATAN** menyatakan mekanisme kawalan di peringkat Kementerian bagi mengawal selia isu penyewaan rumah mampu milik kepada pekerja yang dilihat semakin berleluasa kini. Huraikan usaha pencegahan serta pendekatan yang diambil kini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) selaku agensi penyelaras utama kepada 15 Kementerian/ Agensi Persekutuan, kerajaan negeri dan sektor swasta yang menyediakan perumahan mampu milik turut bertanggungjawab menyediakan perumahan awam melalui Program Perumahan Rakyat (PPR). PPR ini bertujuan membantu rakyat yang kurang berkemampuan untuk memiliki rumah, khususnya golongan B40. Kadar sewa dikenakan hanya serendah RM124 hingga RM240 sebulan serta lokasi yang strategik telah menjadikan PPR sebagai pilihan utama golongan B40.

Bagi memastikan tidak berlaku salah guna di PPR, KPKT telah mengambil tindakan seperti berikut:

- (i) proses tapisan untuk pemilihan dibuat secara teliti bagi memastikan hanya pemohon yang benar-benar layak sahaja ditawarkan untuk menduduki di PPR. Sebagai contoh, bagi rumah PPR disewakan atau sewa untuk milik (*Rent-to-own*), antara syarat-syarat yang ditetapkan adalah pengisian PPR ini dikhurasukan kepada penduduk tempatan yang berpendapatan rendah serta belum memiliki rumah sendiri;
- (ii) dalam dokumen perjanjian dengan penghuni, Kerajaan telah menetapkan syarat sekatan kepentingan dengan meletakkan halangan menjual atau memindah milik tanah serta melaksanakan apa-apa urus niaga termasuk sewaan dalam tempoh moratorium selama 10 tahun bagi dokumen perjanjian jual beli dan dokumen hak milik tanah. Sekatan ini bertujuan memastikan rumah PPR dimiliki dan dihuni oleh kumpulan sasar yang telah ditetapkan;
- (iii) KPKT melalui Jabatan Perumahan Negara (JPN) juga melaksanakan penguatkuasaan ke atas penghuni PPR daripada semasa ke semasa secara berterusan termasuk memeriksa

aduan yang diterima bagi memastikan penghuni rumah PPR berkenaan tidak menyewa kepada pihak lain;

- (iv) operasi penguatkuasaan juga dilaksanakan dengan kerjasama pelbagai pihak seperti kerajaan negeri, Pihak Berkuasa Tempatan (PBT), Jabatan Imigresen dan Polis Diraja Malaysia dalam usaha menangani pelbagai isu termasuk isu penghuni asal yang menyewakan kepada pihak lain;
- (v) KPKT sedang mengkaji untuk mewujudkan sistem demerit bagi penghuni PPR untuk memastikan penghuni mematuhi peraturan-peraturan yang telah ditetapkan; dan
- (vi) KPKT juga bersedia untuk meneliti dan mengkaji peruntukan undang-undang dalam Akta sedia ada khususnya melibatkan proses penguatkuasaan bagi menangani isu seumpama ini.

KPKT komited dalam memastikan PPR yang dibangunkan memenuhi matlamat pembinaannya, khususnya bagi menyediakan perumahan kepada golongan sasar yang ditetapkan. Justeru, jika terdapat sebarang pelanggaran syarat yang ditetapkan seperti menyewakan kepada orang lain termasuk warga asing, Kerajaan tidak akan berkompromi dan akan mengambil tindakan tegas ke atas penghuni tersebut.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : YB TUAN CHOW KON YEOW [TANJONG]

SOALAN

YB TUAN CHOW KON YEOW [TANJONG] minta **MENTERI PERUMAHAN DAN KERAJAAN TEMPATAN** menyatakan perkembangan penggubalan Akta Pembaharuan Semula Bandar bagi memacu pembangunan pembaharuan semula bandar. Bilakah ia dijangka dapat dilaksanakan dan jika tidak, apakah sebabnya.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui PLANMalaysia telah menjalankan kajian berhubung keperluan penyediaan akta khusus bagi mengawal selia aktiviti pembaharuan semula bandar. PLANMalaysia telah menyediakan dua (2) dokumen yang boleh dijadikan panduan oleh Pihak Berkuasa Negeri (PBN) dan Pihak Berkuasa Tempatan (PBT) iaitu:

- i) Panduan Pelaksanaan Pembaharuan Semula Bandar (2018) dengan tujuan membentuk satu mekanisme pelaksanaan Pembaharuan Semula Bandar bagi mewujudkan pembangunan bandar yang mampan, berdaya huni dan inklusif di kawasan-kawasan bandar yang usang, terbiar dan suram; dan

- ii) Garis Panduan Pelaksanaan Pembaharuan Bandar (GPP PSB) telah disediakan pada tahun 2021, di mana GPP ini tidak mencadangkan penggubalan suatu perundangan khusus tetapi lebih fokus kepada aspek operasi dan mewujudkan kerangka tadbir urus (*governance*) pembaharuan semula bandar yang seragam dan efektif di seluruh negara.

GPP ini telah disediakan berdasarkan undang-undang sedia ada yang berkuat kuasa seperti berikut:

- i. Kanun Tanah Negara (KTN) (Akta 828);
- ii. Akta Perancangan Bandar dan Desa 1976 (Akta 172);
- iii. Akta Jalan, Parit dan Bangunan 1974 (Akta 133);
- iv. Akta Hak Milik Strata 1985 (Akta 318);
- v. Akta Pengambilan Tanah 1960 (Akta 486);
- vi. Akta Pemajuan Perumahan (Kawalan & Pelesenan) 1966 (Akta 118);
- vii. Akta Pengurusan Strata 2013 (Akta 757);
- viii. Akta Kontrak 1950 (Akta 136);
- ix. Akta Warisan Kebangsaan 2005 (Akta 645);
- x. Akta Pesuruhjaya Tanah Persekutuan 1957 (Akta 349);
- xi. Undang-Undang Kecil Bangunan Seragam 1984;
- xii. Kaedah-Kaedah Pengawalan Perancangan (Am); dan
- xiii. GPP PSB ini juga selaras dengan cadangan pindaan kepada Akta Hak Milik Strata 1985 (Akta 318) oleh Jabatan Ketua Pengarah Tanah dan Galian Persekutuan (JKPTG) khususnya berkaitan Seksyen 57 *Penamatan Pecah Bahagian*.

Bagi memperkuuh keberkesanan perancangan dan pengurusan pembangunan spatial dan guna tanah negara, beberapa kajian Rancangan Kawasan Khas (RKK) Pembaharuan Semula Bandar bagi bandar-bandar terpilih seperti Pusat Bandar Tangkak, Johor dan Pekan Nilai, Negeri Sembilan yang berpandukan kepada GPP PSB akan dijalankan bagi rancangan pemajuan dalam tempoh lima (5) tahun akan datang.

Secara ringkasnya, terdapat pelbagai Akta yang sedang berkuat kuasa di Malaysia dan boleh diguna pakai untuk menjalankan pembaharuan semula bandar, antaranya:

- i. KTN dan Akta 486 berkaitan pentadbiran tanah dan pengambilan tanah;
- ii. Akta 318 dan Akta 757 berkaitan hak milik strata dan pengurusan strata (khususnya pindaan kepada Akta 318 berkaitan penamatan pecah bahagian);
- iii. Akta 172 dan Akta 133 berkaitan menjalankan pemajuan dan pembinaan; dan
- iv. Akta 171 berkaitan kawalan pemajuan dan perkhidmatan bandar.

Walau bagaimanapun, pihak Kementerian akan terus meneliti kaedah/ prosedur pembaharuan semula di negara-negara lain untuk disesuaikan dalam konteks sistem dan proses perancangan dan pembangunan bandar di Malaysia.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN FONG KUI LUN [BUKIT BINTANG]

SOALAN

TUAN FONG KUI LUN [BUKIT BINTANG] minta **MENTERI KANAN PENDIDIKAN** menyatakan bilangan pelajar yang gagal mengambil peperiksaan Sijil Pelajaran Malaysia pada tahun 2021, punca tidak mengambil peperiksaan dan apakah peluang kedua diberikan kepada mereka untuk mengulanginya.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan pengurusan peperiksaan Sijil Pelajaran Malaysia (SPM) berjalan lancar dan teratur, termasuk aspek kehadiran calon berdaftar untuk menduduki peperiksaan.

Bagi SPM tahun 2021, seramai 10,681 calon berdaftar tidak hadir menduduki peperiksaan. Daripada jumlah tersebut, 9,037 orang atau 2.3 peratus adalah terdiri daripada calon sekolah KPM, calon sekolah agensi kerajaan, calon sekolah menengah agama negeri, calon sekolah swasta dan calon sekolah menengah agama rakyat manakala 1,644 orang atau 0.42 peratus lagi adalah calon persendirian.

Walau bagaimanapun, KPM telah mengambil pendekatan dari awal bagi memastikan calon SPM hadir untuk menduduki peperiksaan. Antara pendekatan yang telah diambil adalah seperti berikut:

- i. menyediakan perkhidmatan bimbingan dan sokongan psikososial melalui pelbagai kaedah seperti program motivasi, infografik pendidikan dan video inspirasi untuk meningkatkan motivasi murid untuk terus hadir ke sekolah. Sesi konsultasi antara Guru Bimbingan dan Kaunseling bersama-sama dengan guru mata pelajaran dan guru kelas dilaksanakan untuk mengenal pasti murid yang tidak mengikuti sesi pembelajaran. Intervensi berfokus dijalankan agar murid kembali ke sekolah dan berminat untuk mengikuti pembelajaran;
- ii. mengadakan perbincangan di antara pihak sekolah dengan ibu bapa/penjaga murid untuk mengenal pasti sebab dan langkah-langkah yang boleh diambil bagi menangani isu murid yang kurang berminat untuk belajar. Kerjasama ini penting untuk memastikan ibu bapa/penjaga murid dapat menyokong pembelajaran anak-anak semasa di rumah dan sekolah;
- iii. melaksanakan intervensi murid risiko cicir pengajaran dan pembelajaran di peringkat jabatan pendidikan negeri (JPN) dan pejabat pendidikan daerah (PPD). Intervensi ini melibatkan

SOALAN NO : 130

- Sektor Pengurusan Pembelajaran, Sektor Pengurusan Sekolah dan Sektor Pembangunan Murid. Intervensi ini juga melibatkan *focal person*, pelibatan Ibu Bapa, Komuniti dan Swasta (PIBKS) pada peringkat daerah dan negeri melalui aktiviti *outreach*;
- iv. menyediakan Garis Panduan Mengurus Murid Berisiko Cicir di sekolah sebagai rujukan JPN, PPD dan sekolah dalam mengendalikan isu murid cicir dengan sistematik, terancang dan berkesan. KPM telah membangunkan *Dashboard* Murid Berisiko Cicir bagi mengenal pasti murid berisiko cicir; dan
 - v. menyediakan Manual Pengurusan Pencegahan dan Intervensi Murid Cicir: Serlahkan Keunggulan Diri (SUDI 2.0). Manual ini digunakan sebagai panduan kepada pihak sekolah untuk merancang dan menyediakan intervensi yang bersesuaian supaya murid kekal bersekolah sehingga tamat Tingkatan 5.

Di sebalik usaha-usaha yang dilaksanakan oleh KPM, masih terdapat calon sekolah yang tidak menduduki peperiksaan SPM atas pelbagai faktor. Ini termasuk isu seperti tidak berminat untuk meneruskan persekolahan kerana telah bekerja.

Untuk makluman Ahli Yang Berhormat, bagi membantu calon tidak menduduki peperiksaan SPM 2021, mereka boleh menduduki peperiksaan SPM Ulangan (SPMU) yang dilaksanakan pada setiap tahun. SPMU menawarkan tiga mata pelajaran, iaitu Bahasa Melayu, Sejarah dan Matematik. Untuk tahun ini, SPMU akan dilaksanakan pada bulan September.

Selain daripada itu, calon juga boleh menduduki peperiksaan SPM sebagai calon persendirian pada tahun-tahun berikutnya. Keputusan ini boleh digabungkan dalam satu sijil peperiksaan melalui perkhidmatan *patching* sijil peperiksaan SPM. Calon yang telah memperoleh sijil SPM kali pertama mulai tahun 2009 layak untuk memohon perkhidmatan ini. Dengan cara ini, calon masih berpeluang untuk mendapatkan sijil SPM atau memperbaiki keputusan mereka dan seterusnya dapat melanjutkan pelajaran ke peringkat yang lebih tinggi.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN FONG KUI LUN
[BUKIT BINTANG]

SOALAN

TUAN FONG KUI LUN [BUKIT BINTANG] minta **PERDANA MENTERI** menyatakan bilangan pengundi 18 tahun yang berdaftar di setiap negeri sebelum PRU15 diadakan dan mampukah mereka mengubah lanskap politik negara dalam tahun mendatang.

JAWAPAN

YB DATO' SRI DR. HAJI WAN JUNAIDI BIN TUANKU JAAFAR,

MENTERI DI JABATAN PERDANA MENTERI

(PARLIMEN DAN UNDANG-UNDANG)

Tuan Yang di-Pertua,

Untuk makluman Yang Berhormat, Suruhanjaya Pilihan Raya Malaysia (SPR) telah **mewartakan Daftar Pemilih Tambahan Bulan Mei Tahun 2022 pada 16 Jun 2022**. Sehingga pewartaan tersebut, jumlah pemilih terkini ialah seramai **21,113,234 orang**. Daripada jumlah tersebut, seramai **1,141,749 orang iaitu 5.4%** adalah pemilih berumur 18 tahun hingga 20 tahun manakala baki **19,971,485 orang atau 94.6%** ialah pemilih berumur 21 tahun dan ke atas. Statistik mengikut kategori umur dan negeri adalah seperti di **Lampiran A**.

Sekian, terima kasih.

SURUHANJAYA PILIHAN RAYA MALAYSIA

DAFTAR PEMILIH TERKINI BULAN MEI 2022

STATISTIK UMUR

(DIWARTAKAN PADA 16 JUN 2022)

MENGIKUT NEGERI

BAHAGIAN PILIHAN RAYA	JUMLAH	UMUR (TAHUN)								
		18-20	21-29	30-39	40-49	50-59	60-69	70-79	80-89	90 DAN KE ATAS
PERLIS	195,807	9,785	41,371	45,716	32,240	27,114	22,402	12,244	4,177	758
KEDAH	1,573,268	87,152	358,686	349,055	270,465	223,028	168,044	83,055	28,492	5,291
KELANTAN	1,402,278	80,665	335,165	346,811	238,522	181,721	131,667	63,715	19,195	4,817
TERENGGANU	920,200	53,127	220,034	240,485	161,619	116,281	80,870	35,580	10,410	1,794
PULAU PINANG	1,224,392	56,148	230,228	240,874	217,210	198,555	158,797	87,309	28,735	6,536
PERAK	2,033,709	91,175	402,469	440,936	355,101	298,884	245,999	137,416	50,489	11,240
PAHANG	1,134,665	61,184	250,383	280,905	199,520	147,895	114,576	59,206	17,806	3,190
SELANGOR	3,659,635	224,661	847,190	781,005	646,878	543,979	385,698	171,973	49,116	9,135
W.P KUALA LUMPUR	1,150,293	45,616	198,584	236,017	206,762	188,537	161,255	80,989	26,373	6,160
W.P PUTRAJAYA	42,169	2,943	9,076	12,351	9,529	4,342	3,265	602	59	2
NEGERI SEMBILAN	849,163	44,298	178,879	191,376	145,887	117,293	101,026	49,291	17,495	3,618
MELAKA	655,917	33,938	141,380	144,283	112,558	93,691	74,975	38,905	13,685	2,502
JOHOR	2,610,474	139,446	565,933	568,573	463,201	385,154	285,164	143,533	49,157	10,313
W.P LABUAN	44,433	2,611	10,485	11,003	7,136	5,821	4,754	1,844	565	214
SABAH	1,680,767	103,784	404,612	402,647	283,003	217,774	158,077	66,397	28,143	16,330
SARAWAK	1,936,064	105,216	414,942	413,241	333,500	297,274	217,896	106,644	35,567	11,784
JUMLAH KESELURUHAN	21,113,234	1,141,749	4,609,417	4,705,278	3,683,131	3,047,343	2,314,465	1,138,703	379,464	93,684

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN FONG KUI LU [BUKIT BINTANG]

SOALAN

TUAN FONG KUI LUN [BUKIT BINTANG] minta **MENTERI LUAR NEGERI** menyatakan kesan perang Ukraine-Rusia yang berlarutan ini ke atas Malaysia.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Bukit Bintang di atas pertanyaan yang dikemukakan.

Tuan Yang di-Pertua,

2. Tidak dinafikan bahawa konflik antara Rusia-Ukraine telah memberi *ripple effect* kepada ekonomi Malaysia, sama ada secara langsung maupun tidak langsung. Pada tahun 2021, Rusia merupakan rakan dagang ke-29 Malaysia, manakala Ukraine adalah rakan dagang ke-63 Malaysia. Pada tahun yang sama, jumlah perdagangan Malaysia dengan Rusia berjumlah RM8.781 bilion (USD2.120 bilion), manakala Ukraine mencatatkan jumlah dagangan sebanyak RM1.461 bilion (USD0.353 bilion). Sungguhpun demikian, kedua-dua negara ini merupakan pengeluar produk utama petrokimia dan hasil pertanian dunia (bijirin dan gandum). Perincian yang berikut merumuskan kesan langsung konflik Rusia-Ukraine ke atas Malaysia.

Kenaikan Harga Barang Komoditi

3. Sejak bermulanya Operasi Khas Ketenteraan Rusia di Ukraine pada 24 Februari 2022, dunia telah menyaksikan kenaikan harga komoditi asas secara mendadak. Walaupun faktor ini telah memberikan keuntungan berlipat ganda kepada industri pengeluar minyak sawit di Malaysia, namun kesan ke atas harga makanan turut dirasai oleh rakyat Malaysia. Rusia dan Ukraine adalah negara pengeluar dan pengeksport gandum dan jagung penting dunia. Walaupun gandum dan jagung bukan makanan ruji rakyat Malaysia, kedua-dua komoditi tersebut merupakan bahan utama yang digunakan untuk makanan haiwan, termasuk makanan ayam. Secara tidak langsung, konflik di Ukraine telah menaikkan harga makanan haiwan sekaligus harga makanan dan produk lain di Malaysia.

Kenaikan Tarif Tenaga Elektrik

4. Harga minyak mentah Brent telah mencecah USD101.19 setong pada 7 Julai 2022 dan berkemungkinan akan kekal tinggi selagi konflik ini berterusan. Walaupun PETRONAS dijangka mengaut keuntungan tinggi hasil dari kenaikan harga minyak mentah ini, kesan jangka pendeknya ialah subsidi petrol yang perlu ditanggung oleh kerajaan akan meningkat.

5. Sekatan unilateral yang dilaksanakan oleh Barat ke atas Rusia telah mengganggu rantaian bekalan minyak mentah dan gas secara global. Negara-negara di Eropah yang selama ini membeli minyak mentah dari Rusia terpaksa mencari alternatif dan pasaran baru untuk pembekalan minyak mentah dan gas. Faktor ini telah menyebabkan peningkatan kos operasi untuk loji-loji janakuasa di Malaysia yang bergantung kepada bekalan gas dan arang batu. Pada bulan Januari 2022, negara telah menyaksikan kenaikan tarif elektrik dan harga minyak mentah dan gas dunia. Trend ini dijangka akan terus meningkat di masa hadapan.

Gangguan Rantaian Bekalan Global yang Menjejasakan Operasi Syarikat Tempatan dan Syarikat Multinasional yang Beroperasi di Malaysia

6. Dunia masih sedang menyesuaikan diri dengan gangguan rantaian bekalan berterusan akibat pandemik COVID-19. Sebagai contoh, caj pengangutan kontena seluruh dunia telah meningkat lebih dari dua kali ganda sepanjang tahun 2021 disebabkan faktor berkaitan pandemik COVID-19. Jika konflik sedia ada di Ukraine berkemungkinan besar merebak ke negara jiran, adalah tidak mustahil gangguan rantaian bekalan global yang lebih besar akan terjadi pada masa akan datang.

7. Sebagai sebuah negara yang bergantung harap kepada sektor perdagangan, pasaran Malaysia terdedah secara langsung kepada sebarang elemen negatif di pasaran global, terutamanya yang melibatkan ekonomi besar seperti Rusia. Kesan negatif gangguan ini terhadap kos menjalankan perniagaan di Malaysia dan bagi syarikat rantaian bekalan pembuatan global yang bertapak di negara ini turut akan terjejas.

SOALAN NO : 132

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN FONG KUI LUN
(BUKIT BINTANG)**

SOALAN

Minta **MENTERI PERTAHANAN** menyatakan apakah tindakan Kerajaan ke atas rayuan kumpulan veteran ATM yang terpaksa mengadakan perhimpunan secara aman baru-baru ini.

JAWAPAN

Tuan Yang Di-Pertua,

Kerajaan menghargai pengorbanan perajurit yang berjuang untuk keamanan tanah air kita dan akan sentiasa berusaha melalui pelbagai inisiatif untuk memastikan kebajikan Veteran ATM sentiasa diberi perhatian. Terdapat 5 tuntutan yang telah dibuat oleh sekumpulan veteran ATM tersebut dan Kementerian Pertahanan telahpun mengambil tindakan susulan terhadap tuntutan-tuntutan tersebut. Malah, 2 daripada tuntutan tersebut telah berjaya diselesaikan dalam masa yang singkat.

Tuntutan pertama mengenai pengampunan untuk bekas tentera yang diberhentikan atas sebab tatatertib, Panel Penasihat Pengiktirafan Veteran ATM telah ditubuhkan bagi mempertimbangkan permohonan bekas tentera (diberhentikan kerana salah laku) yang tidak diiktiraf sebagai Veteran untuk didaftarkan sebagai Veteran ATM. Sebaik permohonan bekas tentera ini untuk didaftarkan sebagai Veteran ATM diluluskan, mereka layak menikmati pelbagai faedah serta manfaat seperti Veteran ATM yang lain.

Tuntutan kedua mengenai pembayaran pencen terbitan kepada balu atau duda Veteran ATM yang dikahwini selepas tamat tempoh perkhidmatan, Majlis Angkatan Tentera (MAT) pada 6 Julai 2022 telah bersetuju supaya pembayaran Pencen Terbitan kepada balu atau duda yang dikahwini Veteran ATM selepas tamat perkhidmatan dilanjutkan sehingga umur Veteran ATM terbabit mencapai 80 tahun berkuatkuasa mulai 1 Januari 2022.

Pada masa ini, Kementerian Pertahanan sedang mengambil tindakan terhadap 3 lagi tuntutan daripada Veteran ATM. Perkara-perkara ini memerlukan kajian yang mendalam serta penelitian yang terperinci kerana ianya bukan sahaja melibatkan Kementerian Pertahanan sebaliknya banyak pihak lain lebih-lebih lagi jika ia berkait rapat dengan kemampuan kewangan negara.

Tuntutan ketiga mengenai pemberian pencen kepada Veteran ATM tidak berpencen, Kementerian Pertahanan berpendapat bahawa peraturan sedia ada wajar dikekalkan selaras dengan kepentingan perkhidmatan dan bagi memastikan kesiapsiagaan ATM sentiasa terpelihara. Peraturan-Peraturan Angkatan Tetap (pencen, ganjaran dan faedah-faedah lain) 1982 menetapkan bahawa bagi melayakkan seseorang askar menerima pencen perkhidmatan, ia mestilah mempunyai perkhidmatan yang diakui sekurang-kurangnya 21 tahun.

Lazimnya, penamatan perkhidmatan sebelum 21 tahun adalah atas permohonan askar lisykar itu sendiri. Walau bagaimanapun, terdapat juga penamatan atas dasar kepentingan perkhidmatan (contohnya mereka yang tidak memenuhi syarat yang ditetapkan seperti tidak melepassi tapisan kecergasan yang ditetapkan). Askar lisykar sedia maklum bahawa mereka yang berhasrat untuk menamatkan perkhidmatan lebih awal tidak layak menerima pencen perkhidmatan dan perkara ini telah diberi penjelasan oleh pegawai atasan masing-masing.

Tuntutan keempat mengenai penyelarasan jurang pencen, Perbincangan di antara Kementerian Pertahanan, Angkatan Tentera Malaysia (ATM) dan agensi-agensi Kerajaan yang berkaitan seperti Jabatan Perkhidmatan Awam (JPA) dan Kementerian Kewangan (MoF) masih diteruskan bagi mencari penyelesaian terbaik kepada cadangan

penyelarasan pencen melibatkan Veteran ATM yang bersara sebelum 1 Oktober 2004 dan tidak menerima pelarasan pencen mengikut jadual gaji SSM 2004. Semasa sesi libat urus bersama pihak JPA, Kementerian ini telah dimaklumkan bahawa cadangan penyelarasan pencen ini perlu melalui beberapa proses termasuklah meminda akta dan peraturan pencen yang sedang berkuatkuasa sebelum ianya boleh diluluskan.

Tuntutan kelima mengenai pemberian Elaun Kenangan kepada penerima Pingat Jasa Malaysia (PJM), Kementerian Pertahanan melalui Jabatan Hal Ehwal Veteran (JHEV) telah membuat beberapa siri pembayaran secara *one-off* kepada semua penerima Pingat Jasa Malaysia (PJM) atau waris yang layak. Pada tahun 2020 sahaja, Kementerian Pertahanan melalui Jabatan Hal Ehwal Veteran (JHEV) ATM telah membuat pembayaran *one-off* Elaun Kenangan Pingat Jasa Malaysia (PJM) sebanyak RM500 secara berfasa mulai 31 Mac 2020 sehingga 24 November 2020 kepada 121,816 Veteran ATM yang melibatkan peruntukan berjumlah RM60.908 juta. Manakala pada tahun 2021 pula, pembayaran sebanyak RM500 secara *one-off* kepada balu atau duda penerima Pingat Jasa Malaysia (PJM) yang telah meninggal dunia selesai dilaksanakan dengan bayaran berjumlah RM 2.7 juta kepada 5,460 penerima.

Kementerian Pertahanan akan memperhalusi tuntutan-tuntutan yang dikemukakan serta mencari jalan penyelesaian yang terbaik terhadap setiap tuntutan tersebut. Namun, apa juu bentuk bantuan yang akan diberikan kepada Veteran ATM selepas ini, ia banyak bergantung kepada kedudukan dan kemampuan kewangan Kerajaan, dengan mengambil kira situasi ekonomi semasa dalam peralihan ke fasa endemik COVID-19.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB PUAN FONG KUI LUN (BUKIT BINTANG)

SOALAN

TUAN FONG KUI LUN (BUKIT BINTANG) minta **MENTERI DALAM NEGERI** menyatakan bilangan warga asing pelbagai negara yang berada di Malaysia dan tujuan kehadiran mereka serta status keberadaan mereka disini setakat 30 Jun 2022.

JAWAPAN

Tuan Yang Di Pertua,

Berdasarkan rekod di Jabatan Imigresen Malaysia, bilangan warga asing dari pelbagai negara yang mempunyai pas yang sah untuk berada di Malaysia sehingga 30 Jun 2022 adalah seramai 1,455,344 orang. Keberadaan warga asing tersebut adalah atas pelbagai tujuan dan memegang pas jangka panjang mengikut kategori.

Daripada jumlah berkenaan, seramai 1,149,608 warga asing merupakan pemegang Pas Lawatan Kerja Sementara (PLKS), 164,507 pemegang Pas Lawatan Sosial Jangka Panjang Pasangan kepada Warganegara, 58,783 lagi memegang Pas Pelajar manakala baki 82,446 lagi memegang pas-pas lain.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : DATO' SRI HASAN BIN ARIFIN [ROMPIN]

TARIKH : JULAI-OGOS 2022

SOALAN

DATO' SRI HASAN BIN ARIFIN [ROMPIN] minta **MENTERI PENGANGKUTAN** menyatakan statistik terkini kemalangan maut yang membabitkan pemandu mabuk dan jumlah pemandu yang ditarik atau dibatalkan lesen disebabkan memandu semasa berada pengaruh alkohol sehingga menyebabkan kemalangan.

JAWAPAN

Tuan Yang Di Pertua,

1. Berdasarkan statistik daripada Kementerian Dalam Negeri (KDN), Jumlah Terkini Kemalangan Maut sehingga Mei 2022 yang membabitkan pemandu mabuk dan dadah di bawah Seksyen 44 Akta Pengangkutan Jalan 1987 adalah seperti berikut:

TAHUN	MAUT
2019	9
2020	28
2021	21
JAN-MEI 2022	12
JUMLAH	70

2. Jumlah Lesen Memandu yang digantung atas arahan mahkamah akibat kesalahan di bawah pemanduan alkohol/dadah adalah seperti berikut :

SEKSYEN	TAHUN				
	2019	2020	2021	2022 (Sehingga Mei)	Jumlah
Seksyen 44	6	0	8	6	20
Seksyen 45	0	1	16	13	30
Seksyen 45A	0	40	719	841	1,600
Seksyen 45B	0	0	0	0	0
Seksyen 45C	0	0	2	0	2

- Seksyen 44 (Memandu dibawah pengaruh minuman memabukkan atau dadah)
- Seksyen 45 (Menjaga kenderaan dibawah pengaruh minuman memabukkan atau dadah)
- Seksyen 45 (A) (Memandu / Menjaga kenderaan dengan kepekatan alkohol melebihi had)
- Seksyen 45 (B) (Ujian Nafas)

SOALAN NO: 135

- Seksyen 45 (C) (Pengadaan spesimen bagi analisis)
3. Jumlah lesen memandu yang dibatalkan atas arahan mahkamah termasuk kesalahan memandu secara mabuk adalah seperti berikut :

	TAHUN				
	2019	2020	2021	2022 (Sehingga Mei)	Jumlah
JUMLAH	45	39	48	36	168

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATO' SRI HASAN BIN ARIFIN
[ROMPIN]**

SOALAN

DATO' SRI HASAN BIN ARIFIN minta **MENTERI KESIHATAN** menyatakan apakah inisiatif dan persediaan yang dirancang dalam memperkuuhkan sistem kesihatan awam negara sebagai persediaan menghadapi masalah kesihatan awam dan pandemik pada masa akan datang.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa memberi keutamaan dalam memperkuuhkan keupayaan dan kesiapsiagaan menghadapi masalah kesihatan awam dan pandemik pada masa akan datang. Pembinaan Pusat Kawalan Penyakit Negara yang setaraf dengan *Centre for Diseases Control and Prevention*, Amerika Syarikat dan di negara-negara lain seperti di Taiwan serta China telah diluluskan oleh Unit Perancang Ekonomi (EPU) di bawah *Rolling Plan 4* (2019-2020) Rancangan Malaysia ke-11 (RMK-11) dengan kos keseluruhan sebanyak RM500 juta yang akan dibina di atas tapak seluas 20 ekar yang terletak di Bandar Enstek, Negeri Sembilan. Pihak EPU juga telah meluluskan kos bagi kerja-kerja awalan projek di bawah *Rolling Plan 2*, Rancangan Malaysia ke-11 (RMK-11) dengan kos keseluruhan sebanyak RM200,000. Pembinaan Pusat Kawalan Penyakit Negara ini mempunyai keupayaan dan kesiapsiagaan negara dalam aspek

pencegahan dan pengawalan penyakit serta ancaman kesihatan awam termasuk penyiasatan dan pengenalpastian *potential agent of bioterrorism* akan dapat diperkuuhkan lagi bagi mengurangkan risiko ancaman serta mempertingkatkan kesihatan dan keselamatan negara dengan lebih efektif lagi. Terkini, projek sedang dalam proses penyediaan Reka Bentuk Awalan (*Design Phase*) bersama kontraktor, Pakar Runding terpilih dan KKM, dengan diketuai oleh Jabatan Kerja Raya Malaysia.

Tuan Yang di-Pertua,

2. Penglibatan Malaysia dengan agensi antarabangsa merupakan salah satu usaha mengukuhkan dan mengemaskini aktiviti-aktiviti pencegahan, kesiapsiagaan dan respon menghadapi masalah kesihatan awam dan pandemik di masa hadapan. Pertubuhan Kesihatan Sedunia (WHO) selaku agensi peneraju yang berkaitan, sentiasa mempertingkatkan usaha dalam memperkuuhkan sistem kesihatan terhadap sebarang ancaman kesihatan ataupun pandemik di masa hadapan. Beberapa inisiatif yang sedang dilaksanakan di peringkat WHO dalam menghadapi ancaman pandemik dimasa hadapan, antaranya meliputi:

- (i) Pengukuhan pelaksanaan *International Health Regulation* (IHR) 2005 melalui pindaan secara bersasar terhadap instrumen ini. Bagi tujuan tersebut, satu kumpulan kerja yang dianggotai oleh Negara-negara Anggota termasuk Malaysia, iaitu *The Member States Working Group on Strengthening WHO Preparedness and Response to Health Emergencies* (WGPR) telah ditubuhkan melalui mandat resolusi Perhimpunan Kesihatan Sedunia yang telah diadakan pada tahun 2021, iaitu merujuk kepada dokumen WHA 74.7 (2021);
- (ii) Usaha untuk merangka dan merundingkan suatu *WHO Convention, Agreement or Other International Instrument on Pandemic Prevention, Preparedness and Response*. Usaha ini dilihat akan melibatkan pelbagai agensi kerajaan (*all-of-government*) dan penglibatan masyarakat secara menyeluruh

(*all-of-society*), dengan skop yang tidak terhad dalam ruang lingkup sektor kesihatan sahaja. Justeru, *The Intergovernmental Negotiating Body* (INB) telah ditubuhkan oleh WHO susulan mandat yang diperolehi melalui Sesi Khas Ke-2 Perhimpunan Kesihatan Sedunia yang telah diadakan pada 29 November hingga 1 Disember 2021. Malaysia selaku negara anggota WHO telah turut serta sepanjang sidang INB diadakan sejak Februari 2022.

3. KKM sebagai agensi peneraju telah mewujudkan Jawatankuasa Teknikal bagi mengambil tindakan selanjutnya terhadap kedua-dua inisiatif tersebut di atas. Selain dari pelbagai Bahagian yang berkaitan di KKM, Jawatankuasa Teknikal ini turut melibatkan Kementerian/ Agensi berkepentingan yang lain seperti Majlis Keselamatan Negara (MKN), Kementerian Luar Negeri (KLN), Kementerian Perdagangan Antarabangsa dan Industri (MITI), Kementerian Pelancongan, Seni dan Budaya Malaysia (MOTAC), Kementerian Tenaga dan Sumber Asli (KeTSA) dan Kementerian Pengangkutan Malaysia (MOT). Setakat ini, pihak WHO mensasarkan kedua-dua inisiatif ini akan dimuktamadkan pada tahun 2024. Susulan kedua-dua inisiatif ini, kelak akan terdapat keperluan bagi Malaysia untuk menyediakan instrumen perundangan domestik yang bersesuaian bagi menyokong pelaksanaannya di peringkat kebangsaan.

Tuan Yang di-Pertua,

4. Pada ketika ini pandemik COVID-19 masih belum diisyiharkan sebagai endemik oleh WHO. Justeru, masih terdapat banyak perubahan dalam strategi pengurusan COVID-19 yang berlaku di dalam dan luar negara. KKM sentiasa memastikan strategi yang digunakan dalam menguruskan pandemik dapat mengawal jangkitan COVID-19 dan sekaligus tidak membebankan rakyat. Begitu juga, KKM komited untuk sentiasa menampaik strategi yang digunakan dalam menangani kejadian pandemik ini dari semasa ke semasa. Ini adalah selaras dengan pendekatan yang digariskan oleh WHO melalui *Guidance for Conducting A Country COVID-19 Intra Action Review (IAR)* dengan objektif sebagaimana berikut:

- (i) Memastikan tindakan yang diambil dalam menangani COVID-19 adalah amalan semasa yang terbaik, mengenalpasti jurang (*gaps*) dan pelajaran yang diperolehi;
- (ii) Mencadangkan tindakan pembetulan yang bersesuaian untuk menambahbaik dan mengukuhkan tindak balas yang berterusan kepada COVID-19; dan
- (iii) Hasil penemuan dan cadangan yang diperolehi IAR seterusnya dapat menyumbang kepada keberkesanan pengurusan kecemasan kesihatan awam dan juga keselamatan kesihatan untuk jangka panjang di masa hadapan.

5. Setakat ini KKM telah melaksanakan satu (1) kitaran IAR. Selain IAR, WHO turut menyarankan pelaksanaan *After Action Review* (AAR) dalam tempoh tiga (3) bulan selepas pengisytiharan rasmi tamatnya kejadian pandemik COVID-19 kelak.

6. Pelaksanaan kedua-dua IAR dan AAR ini dapat membantu ke arah pembangunan strategi yang lengkap dan dikemas kini mengikut amalan yang menunjukkan kesan yang terbaik dan berubah selari dengan perkembangan epidemiologi semasa, samada di dalam negara maupun di luar negara. Perubahan semasa yang begitu pantas ini sekaligus memerlukan keupayaan negara untuk menyediakan sumber yang mencukupi dan seterusnya memastikan sistem kesihatan awam negara mempunyai keupayaan untuk mencegah, bersiap sedia dan bertindak balas dalam menghadapi masalah kesihatan awam dan pandemik di masa hadapan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB DATO' SRI HASAN BIN ARIFIN (ROMPIN)

SOALAN

DATO' SRI HASAN BIN ARIFIN (ROMPIN) minta **MENTERI DALAM NEGERI** menyatakan statistik terkini kes berkaitan Macau Scam dan jumlah kerugian yang dicatatkan sehubungan penipuan ini. Apakah usaha agresif Kementerian dalam memberikan kesedaran kepada rakyat terutamanya warga emas yang berpotensi tinggi menjadi mangsa.

JAWAPAN

Tuan Yang Di Pertua,

Kementerian Dalam Negeri (KDN) memandang serius berhubung kes-kes yang melibatkan jenayah penipuan atas talian.

Pelbagai usaha telah dijalankan oleh PDRM untuk mengekang sindiket penipuan seperti ini termasuklah dengan meningkatkan penguatkuasaan undang-undang, pengoperasian, tangkapan dan seterusnya menjalankan pendakwaan ke atas mereka yang terlibat dalam penipuan.

Kepesatan pembangunan dan kecanggihan era teknologi telah membawa kepada wujudnya pelbagai aplikasi yang membantu memudahkan kehidupan masyarakat moden sama ada dari segi komunikasi, sosial, pertukaran maklumat dan sebagainya. Ianya juga menjadi faktor penipuan dalam talian semakin meningkat dan tidak kurangnya mangsa terlibat adalah dari kategori warga emas yang berumur lebih dari 60 tahun. Berdasarkan statistik mangsa bagi kategori warga emas yang terjebak dalam macau scam tahun 2021 seramai 1,843 orang. Manakala tahun 2022 pula seramai 942 orang warga emas yang terpedaya dalam kategori yang sama. Bagi jumlah keseluruhan dari tahun 2019 hingga 2022 (Jan-Jun) mencatatkan 6,325 kertas siasatan telah di buka dan sebanyak RM 330,285,276,.77 kerugian yang dicatitkan.

Antara usaha yang diambil oleh kerajaan dalam membentera jenayah komersil yang membabitkan jenayah atas talian adalah seperti:-

1. Memandangkan masih ramai lagi masyarakat menjadi mangsa penipuan jenayah atas talian maka PDRM (Jabatan Siasatan Jenayah Komersil (JSJK) telah mengambil tindakan drastik bagi memberi kesedaran kepada masyarakat berkaitan dengan jenayah siber melibatkan penipuan atas talian. PDRM (JSJK) telah melancarkan 2 kempen pencegahan secara besar besaran iaitu:

- 1.1 Pada 08 November 2021 kempen telah dilancarkan di Bejaya Time Square Kuala Lumpur oleh YDH Tan Sri Ketua Polis Negara dengan bertemakan."*Be Smart Stay Alert*".
- 1.2 Pada 25 Jun 2022., kempen telah dilancarkan di Mid Valley Southkey Mall (South Court) Johor Bahru oleh YDH Tan Sri Ketua Polis Negara dengan bertemakan "*Let's Fight Scammer Together*".
- 2 Pengisian kempen pencegahan adalah seperti pameran, ceramah / syarahan dan siaran media. Jabatan Siasatan Jenayah Komersil Polis Diraja Malaysia telah mengadakan kempen pencegahan seluruh Malaysia bagi tahun 2020 sebanyak 4,201 program, tahun 2021 sebanyak 5,968 program dan tahun 2022 dari bulan Januari hingga Jun sebanyak 2,570 program pencegahan telah diadakan. Kempen kesedaran ini akan dilaksanakan secara berterusan agar masyarakat sentiasa diberi pendedahan tentang modus operandi terkini dan cara pencegahan dari masa ke semasa.
- 3 Melaksanakan kajian pindaan ke atas akta-akta yang sedia ada supaya selaras dengan keperluan semasa terutama sekali dalam usaha PDRM dalam membentera jenayah siber yang melibatkan penipuan atas talian. PDRM khususnya JSJK telah mencadangkan 2 pindaan undang - undang iaitu cadangan pindaan Seksyen 116D Kanun Tatacara Jenayah yang memberi kuasa kepada pegawai penyiasat untuk membeku akaun bank yang digunakan untuk aktiviti jenayah. Cadangan pindaan ini juga melibatkan Seksyen 424A Kanun Keseksaan yang memperuntukan hukuman bagi kesalahan ke atas pemilik akaun bank yang menyerahkan akaun bank miliknya kepada orang lain untuk digunakan bagi aktiviti jenayah.
- 4 Jalinan kerjasama dengan lain-lain agensi kerajaan dan swasta dalam membentera jenayah siber melibatkan penipuan atas talian. PDRM (JSJK) telah menjalinkan kerjasama dan *task force* bersama Suruhanjaya Komunikasi dan Multimedia Malaysia (SKMM), Cyber Security Malaysia, Institusi Kewangan, Syarikat TELCO, Bank Negara

Malaysia dan lain-lain agensi. PDRM telah membangunkan sistem semakan maklumat akaun bank yang lebih pantas bersama dengan Bank Negara Malaysia dan Institusi Kewangan. PDRM juga membangunkan sistem semakan maklumat pemilik akaun bank bersama SKMM dan syarikat TELCO.

5. Bagi memudahkan masyarakat mendapatkan maklumat dan nasihat berhubung penipuan atas talan, PDRM (JSJK) juga telah membangunkan 4 platform yang boleh di akses oleh masyarakat iaitu:
 - 5.1 Aplikasi Semakmule
 - 5.2 CCID Scam Response Center
 - 5.3 CCID Infoline
 - 5.4 CCID Facebook

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' SRI HASAN BIN ARIFIN
[ROMPIN]

SOALAN

DATO' SRI HASAN BIN ARIFIN [ROMPIN] minta **MENTERI KEWANGAN** menyatakan berapa bayaran manfaat skim MySalam yang telah dibayar kepada penerima faedah sehingga penggal pertama tahun 2022 dan adakah Kerajaan bercadang untuk memperluaskan lagi faedah ini kepada golongan M40.

JAWAPAN

Tuan Yang di-Pertua,

Untuk makluman Ahli Yang Berhormat, jumlah penerima Bantuan Keluarga Malaysia (BKM) yang layak mendapat manfaat Skim mySalam pada tahun 2022 dianggarkan adalah lebih daripada 10.2 juta orang. Sejak Skim mySalam mula dilaksanakan pada tahun 2019 sehingga 30 Jun 2022, jumlah bayaran lebih RM584 juta telah dibuat kepada lebih 850,000 penerima yang melibatkan tuntutan bayaran ke atas manfaat hospitalisasi, penyakit kritikal dan berkaitan PUI COVID-19. Manakala bagi tuntutan ke atas kos peranti perubatan, dianggarkan lebih RM8 juta telah dibayar kepada lebih 1,700 penerima dari tahun 2021 sehingga 30 Jun 2022.

Pada masa ini, Kerajaan tidak berhasrat untuk memperluaskan pelaksanaan Skim mySalam kepada golongan M40 atas sebab berikut:

1. Surat Ikatan Amanah Skim mySalam juga telah menetapkan bahawa manfaat Skim tersebut hanya khusus kepada golongan B40 sahaja dan pada asalnya, perkara ini ditetapkan sebagai syarat surat ikatan yang tidak boleh diubah;
2. Kerajaan telah menumpukan usahanya kepada memperluas liputan kepada golongan B40 antaranya dilanjutkan kepada golongan bujang di bawah 40 tahun dan juga meningkatkan nilai ambang kelayakan pendapatan isirumah daripada RM4,000 kepada RM5,000 sebulan. Dengan itu, bilangan B40 yang diberi perlindungan di bawah mySalam telah naik daripada 4.7 juta pada tahun 2019 kepada lebih 10.2 juta pada tahun 2022 ; dan
3. Kerajaan juga telah menambahbaik manfaat yang disediakan di bawah mySalam untuk golongan B40 dengan melanjutkan manfaat hospitalisasi kepada pesakit COVID-19 dan yang dikuarantin. Di samping itu, penerima juga layak menerima bantuan untuk peranti perubatan

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATO' SRI HASAN BIN ARIFIN
[ROMPIN]**

SOALAN

DATO' SRI HASAN BIN ARIFIN minta **MENTERI KESIHATAN** menyatakan sehingga suku pertama tahun 2022, apakah statistik bunuh diri yang dicatatkan dan apakah inisiatif Kementerian termasuk kolaborasi dengan Kementerian lain dalam menangani isu ini. Nyatakan juga statistik individu yang disahkan menghidap penyakit berkaitan mental seperti tekanan perasaan, keceluaran keresahan (*anxiety*), bipolar, skizofernia, dan sebagainya.

JAWAPAN

Tuan Yang di-Pertua,

1. Berdasarkan data pihak Polis Diraja Malaysia (PDRM), bagi tempoh Januari sehingga Jun 2022 sebanyak 467 kes bunuh diri yang telah direkodkan.
2. Kementerian Kesihatan Malaysia (KKM) sentiasa komited dalam memastikan segala usaha telah dilakukan bagi mengekang berlakunya kejadian kes bunuh diri. KKM telah mengambil tindakan untuk mengukuhkan peranan secara bersepadau pelbagai agensi di dalam menangani permasalahan kesihatan mental dan seterusnya membendung tingkah laku bunuh diri dalam kalangan rakyat Malaysia

3. Antara langkah yang telah diambil adalah seperti mewujudkan Majlis Penasihat Promosi Kesihatan Mental dan Kumpulan Kerja Teknikal Pencegahan Bunuh Diri Kebangsaan yang terdiri daripada pakar-pakar dalam kesihatan mental dan pihak berkepentingan. KKM turut bekerjasama dengan pelbagai Kementerian dan agensi-agensi berikut bagi melaksanakan inisiatif-inisiatif tersebut seperti:

- (i) Kementerian Pembangunan Wanita, Keluarga dan Masyarakat (KPWKM) – melaksanakan latihan dan perluasan skop kaunselor dan pegawai kerja sosial di dalam pengendalian isu sosial berkaitan kesihatan mental dan tingkah laku bunuh diri di peringkat komuniti;
- (ii) Polis Diraja Malaysia (PDRM) - libat urus bagi perkongsian data kejadian bunuh diri dan cadangan mendapatkan '*informed consent*' daripada ahli keluarga yang terkesan akibat kejadian bunuh diri agar tindakan susul bagi melaksanakan intervensi kaunseling dan bantuan psikososial (*post-vention*) dapat dilaksanakan oleh pihak KKM;
- (iii) Kementerian Komunikasi dan Multimedia (KKMM) - memastikan pelaporan bertanggung jawab media tentang tingkah laku bunuh diri bagi mengelakkan '*suicide contagion*' kepada mereka yang berisiko dan memantau individu yang mempunyai keinginan bunuh diri di media sosial;
- (iv) Kementerian Pendidikan- pelaksanaan Program Minda Sihat Sekolah di mana saringan awal kesihatan mental dilakukan kepada pelajar sekolah supaya intervensi awal dapat diberikan dan latihan kepada guru-guru bagi mengenalpasti masalah kemurungan dan tingkah laku bunuh diri; dan
- (v) Jabatan Peguam Negara dan Kementerian Dalam Negeri - memberi input bagi menyokong usaha dekriminalisasi cubaan bunuh diri yang diterajui oleh pihak Jabatan Peguam Negara bagi meminda/memansuhkan Seksyen 309 Kanun Keseksaan.

4. Antara inisiatif kolaborasi terkini yang berjaya dilakukan adalah kerjasama baik di antara KKM dan juga Kerajaan Negeri Pulau Pinang yang telah melaksanakan usaha bagi pemasangan jaring keselamatan bagi mengelak kejadian bunuh diri dan menghalang tindakan cubaan bunuh diri di atas Jambatan Pulau Pinang.
5. Jumlah individu yang dikesan mengalami masalah kesihatan mental melalui program saringan dan intervensi di fasiliti kesihatan primer pada tahun 2021 adalah sebanyak 68,872 kes. Daripada jumlah ini, masalah kebimbangan (*anxiety*) adalah yang tertinggi sebanyak 28,764 kes diikuti kemurungan (*depression*) 20,315 kes dan stres 19,793 kes.
6. Bilangan individu yang dilaporkan mengalami penyakit mental seperti bipolar, skizofrenia dan penyakit mental yang lain mengikut klasifikasi ICD-10 pula adalah sebanyak 3,071.
- 7.
8. Statistik bagi bilangan pesakit mental pada tahun 2021 ini menunjukkan peningkatan berbanding tahun 2020 (2,899 kes) dan 2019 (1,990 kes). Kes paling tinggi dikesan adalah melibatkan individu dengan masalah *mood disorder* (1,476 kes) diikuti dengan *schizophrenia* dan *delusional disorders* (668 kes).

Sekian , terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DATUK DR. HASAN BIN BAHROM [TAMPIN]

SOALAN NO. 140

Datuk Dr. Hasan bin Bahrom [Tampin] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan kenaikan harga racun tanaman yang sangat membebankan, mengapa Kementerian tidak berupaya mengawal kenaikan harga yang mendadak dan apakah tindakan Kementerian dalam memastikan kestabilan harga racun.

JAWAPAN:

Yang di-Pertua,

Kenaikan harga racun adalah disebabkan oleh kenaikan kos bahan input racun dan juga peningkatan kos pengangkutan melibatkan penghantaran bahan terbabit dari negara pengeluar China. Kementerian Pertanian dan Industri Makanan telah dan sedang memantau isu ini dan akan mengambil tindakan lanjut ke atas isu yang dibangkitkan.

Peningkatan harga baja dan racun di pasaran tempatan berpunca daripada beberapa faktor. Bahan mentah bagi penghasilan input pertanian majoritinya diimport daripada negara China dan India. Perubahan polisi semasa negara pengeksport berkaitan pengeluaran demi menjamin kelangsungan sumber dalam negara menyebabkan pengurangan penawaran kepada negara-negara pengimpor.

Syarikat logistik, pengimport dan pengeksport terkesan disebabkan oleh gangguan dalam rantaian bekalan, yang tidak hanya mempengaruhi kegiatan pembuatan tetapi juga aktiviti logistik sejak pandemik COVID-19 melanda. Syarikat logistik terus menghadapi masalah kekurangan muatan kapal yang menyebabkan kenaikan terhadap harga sewaan kargo.

Selain daripada kos pengangkutan kapal, kos pelabuhan juga semakin tinggi disebabkan bilangan kapal dan anak kapal yang perlu dikuarantin akibat daripada jangkitan virus COVID-19. Perkara ini turut menyumbang kepada peningkatan kos pengeluaran baja dan racun tempatan.

Apabila bekalan baja dan racun berkurangan di pasaran dengan permintaan sentiasa berterusan daripada petani, manipulasi harga akan berlaku di sepanjang rantaian pembekalan produk tersebut.

Sebagai langkah untuk menangani isu ini di samping membantu golongan yang terjejas, Kementerian Pertanian dan Industri Makanan (MAFI) dan Kementerian Perdagangan Dalam Negeri dan Hal Ehwal Pengguna (KPDNHEP) telah menujuhkan Jawatankuasa Bersama serta mengadakan libat urus dengan pihak berkepentingan dan pemain industri bagi mendapatkan pandangan dan cadangan untuk menangani isu ini

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK DR. HASAN BIN BAHROM
[TAMPIN]**

SOALAN

DATUK DR. HASAN BIN BAHROM [TAMPIN] minta **MENTERI PELANCONGAN, SENI DAN BUDAYA** menyatakan berhubung dengan statistik kemasukan pelancong luar negara selepas pembukaan pintu sempadan negara pada 1 April 2022, apakah faktor utama tarikan para pelancong ke Malaysia dan bagaimana Kementerian mengangkat permainan tradisi sebagai salah satu pemacu sektor pelancongan negara.

JAWAPAN

Tuan Yang di-Pertua,

1. Bagi suku pertama tahun 2022, Malaysia telah mencatatkan ketibaan seramai 98,053 orang pelancong asing dengan perbelanjaan pelancong asing sebanyak RM359.66 juta.
2. Sejak Malaysia membuka semula pintu sempadan antarabangsa bermula 1 April 2022 yang lalu, negara telah menerima kehadiran hampir 2 juta orang pengunjung antarabangsa. Dalam usaha menggalakkan serta melancarkan pergerakan di pintu masuk negara, pihak berkuasa telah membuka kesemua kaunter di Kompleks Imigresen, Kastam dan Kuarantin (CIQ) iaitu di Kompleks Sultan Abu Bakar (KSAB) dan Bangunan Sultan Iskandar di Johor Bahru. Di samping itu, pengecualian bayaran tol selama seminggu telah diberikan kepada pengguna Tambak Johor dan Linkedua.
3. Antara faktor tarikan pelancong ke Malaysia adalah kejayaan negara mengimbangi keperluan ekonomi dengan kesihatan, yang jelas dibuktikan apabila pembukaan semula sektor ekonomi dan pelancongan secara berfasa tidak menyumbang kepada penularan COVID-19 yang tidak terkawal. Kejayaan ini bukanlah sekadar kebetulan tetapi ia dicapai melalui pelaksanaan rancangan yang rapi. Antaranya ialah Projek Rintis Gelembung Pelancongan Antarabangsa Langkawi (LITB), yang dilancarkan oleh Kementerian Pelancongan, Seni dan Budaya (MOTAC) bermula November 2021 yang telah berjaya menjadi platform untuk semua pihak terbabit seperti agensi-agensi Kerajaan Persekutuan dan Negeri, penggiat industri serta rakyat tempatan dalam menyesuaikan diri dengan situasi norma baharu. Di samping itu, Kementerian Kesihatan Malaysia mengesahkan bahawa tiada kes atau kluster COVID-19 di Malaysia yang berpunca daripada kehadiran pelancong asing melalui LITB ini.

4. Sementara itu, permainan-permainan tradisional adalah cerminan identiti dan jatidiri rakyat Malaysia yang menjadi salah satu tarikan dan produk pelancongan negara. Dalam hal ini, MOTAC telah melaksanakan pelbagai inisiatif melalui agensi-agensi di bawahnya seperti Jabatan Kebudayaan dan Kesenian Negara (JKKN) serta Jabatan Warisan Negara (JWN) dalam menganjurkan beberapa acara dan program bagi terus menjadikan permainan tradisi sebagai tarikan pelancong domestik dan antarabangsa. Antaranya ialah:

- (i) Menganjurkan Festival Permainan Malaysia sejak tahun 2015. Objektif program ini adalah untuk mengangkat dan mengetengahkan permainan tradisi kepada khalayak masyarakat supaya lebih cakna mengenai pelbagai permainan tradisional warisan masyarakat Malaysia. Antara permainan pelbagai kaum yang diketengahkan adalah Gasing, Galah Panjang, Congkak, Dam Aji, Batu Seremban, Kabadi, Sepak Raga, Yo-yo Cina, Tarik Tali, Gusti Lengan dan lain-lain lagi. Bagi tahun 2022, Festival Permainan Malaysia akan diadakan pada 23 hingga 25 September 2022 di Dataran Merdeka. Selain dapat memelihara dan mengekalkan permainan tradisional, program ini juga merupakan sebahagian daripada usaha JKKN untuk menyokong sektor pelancongan negara;
- (ii) Mengadakan Program Bimbingan Seni Budaya (PBSB) di peringkat sekolah rendah dan menengah dalam usaha melahirkan pelapis dan pewaris yang mampu untuk meneruskan legasi seni dan budaya Malaysia termasuk permainan tradisional iaitu Gasing. Program ini memupuk minat murid sekolah terhadap seni budaya termasuk permainan tradisional seawal zaman kanak-kanak lagi.

Sehingga kini MOTAC melalui JKKN dengan kerjasama Kementerian Pendidikan Malaysia telah berjaya membangunkan lapan (8) modul kesenian tradisional termasuk modul gasing selain modul-modul lain seperti tari, teater, muzik (gamelan dan kompong), silat, seni berbahasa, mak yong dan seni visual. Modul ini menjadi garis panduan kepada 2,401 Jurulatih Seni Budaya Negara (JSBN) dalam memberi latihan

kepada peserta program ini sejak tahun 2004;

- (iii) MOTAC juga pernah melaksanakan Festival Gasing dalam usaha mengetengahkan permainan ini kepada generasi hari ini serta Bengkel Juri Gasing bagi memberi nilai tambah kepada panel-panel yang dilantik untuk menjadi juri bagi pertandingan gasing; dan
- (iv) Meneroka pencalonan permainan tradisional ke peringkat antarabangsa melalui Konvesyen Pemeliharan Warisan Tidak Ketara 2003 (*Convention for the Safeguarding of the Intangible Cultural Heritage 2003*).

5. Pelaksanaan program/aktiviti berkaitan permainan tradisional secara berterusan akan dapat memartabatkan kembali permainan tradisional untuk terus dimainkan tidak hanya terhad oleh masyarakat di luar bandar tetapi menjadi satu produk untuk diketengahkan kepada semua. Di samping itu, ia juga dapat memupuk amalan baik di kalangan peminat-peminat dan penggiat-penggiat permainan tradisional serta para penyelidik.

6. Pada masa yang sama, agensi pelancongan dan pengusaha homestay turut digalakkan supaya menjadikan aktiviti permainan tradisional sebagai salah satu pakej dan pengisian produk mereka, sekali gus dapat menambahkan pendapatan kepada penggiat-penggiat industri permainan tradisional khususnya dan seterusnya dapat memperkasakan lagi pelancongan warisan dan budaya tempatan serta di persada dunia.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : JAWAB BUKAN LISAN

DARIPADA : YB DATUK DR. HASAN BIN BAHROM [TAMPIN]

SOALAN

Minta **PERDANA MENTERI** menyatakan faktor kewujudan 1,000 Institusi Tahfiz yang tidak berdaftar, sejauh mana Kerajaan bertindak menangani masalah ini dan apakah Kerajaan mempunyai usaha untuk menukuhkan satu Jawatankuasa Tahfiz Nasional bagi tindakan menyeluruh dari aspek perundangan dan peraturan pengurusan agar ianya berada di arus perdana pendidikan negara.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, Kerajaan sentiasa bekerjasama dengan Pihak Berkuasa Agama Negeri (PBAN) bagi memastikan sekolah tahniz swasta didaftarkan. Pada masa ini, sebanyak 1208 buah sekolah tahniz yang berdaftar dengan PBAN di seluruh negara. Sehingga kini, Pihak Berkuasa Agama Negeri akan terus mengesan dan membantu pihak sekolah tahniz berkenaan memenuhi syarat dan mendaftarkan sekolah mereka. Antara negeri yang aktif melaksanakan program pemutihan tahniz ialah Selangor, memandangkan satu perempat (383 buah) sekolah tahniz yang berdaftar adalah di Negeri Selangor.
2. Disamping itu, JAKIM juga telah mewujudkan Sistem Maklumat Pendidikan Islam (SIMPENI) bagi memudahkan semua pihak untuk menyemak sekolah tahniz yang berdaftar dengan Pihak Berkuasa Agama Negeri melalui portal SIMPENI dipautan (<https://simpeni.islam.gov.my/index.php>). Maklumat ini juga boleh diperolehi dengan menghubungi Pihak Berkuasa Agama Negeri atau Bahagian Pendidikan JAKIM.
3. Selain itu, Kerajaan juga mengalu-alukan pandangan YB agar ditubuhkan Jawatankuasa Tahniz Nasional bagi melaksanakan tindakan menyeluruh berkaitan tahniz. Untuk makluman Ahli Yang Berhormat, sebenarnya Kerajaan telah mewujudkan pelbagai jawatankuasa untuk membincangkan isu berkaitan pendidikan Islam termasuk tahniz iaitu:
 - i. Jawatankuasa Penyelarasan Pendidikan Islam Kebangsaan (JPPIK) adalah sebuah Jawatankuasa yang dahulunya dikenali sebagai Lembaga Penasihat Penyelarasan Pelajaran dan

Pendidikan Agama Islam (LEPAI) yang diletakkan di bawah Majlis Kebangsaan Bagi Hal Ehwal Ugama Islam Malaysia (MKI) bagi menyelaras perkara berkaitan pendidikan Islam.

ii. Jawatankuasa Teknikal Undang-Undang Syarak dan Sivil ditubuhkan pada 6 Mei 1988 bernaung di bawah MKI bagi menyelaras hal ehwal Islam di Malaysia termasuk perundangan Islam.

iii. Jawatankuasa Akreditasi Tahfiz (JAT) merupakan sebuah jawatankuasa di bawah JPPIK yang berperanan menyelaras perkara berkaitan pengiktirafan tahfiz dan huffaz.

iv. Jawatankuasa Induk dan Pelaksana Dasar Pendidikan Tahfiz Negara (DPTN) diwujudkan bagi memastikan kelancaran pelaksanaan DPTN dan isu-isu terkini serta syor berkaitan tahfiz dapat dibincangkan.

v. Jawatankuasa Kerja Pembangunan Tahfiz-TVET di bawah Majlis Pembangunan Kemahiran Kebangsaan (MPKK) ditubuhkan bagi membantu dan menasihati institusi tahfiz dalam memperkasakan kurikulum, bahan pengajaran dan pembelajaran melalui Sistem Persijilan Kemahiran Malaysia (SPKM).

4. Sehubungan itu, Kerajaan akan memastikan peranan dan fungsi setiap jawatankuasa ini akan dioptimumkan dari semasa ke semasa agar isu yang berlaku dapat ditangani sebaiknya dengan kerjasama semua Pihak Berkuasa Agama negeri-negeri dan agensi-agensi kerajaan yang berkenaan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATUK DR. HASAN BIN BAHROM [TAMPIN]

SOALAN

DATUK DR. HASAN BIN BAHROM [TAMPIN] minta **MENTERI KANAN PENDIDIKAN** menyatakan berkaitan jumlah guru Pendidikan Islam, apakah jumlah tersebut mencukupi dengan jumlah sekolah dan pelajar yang sedia ada dan berapa jumlah pengambilan guru Pendidikan Islam semasa Kementerian melaksana pengambilan 18 ribu orang guru yang lepas.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian terhadap pengisian guru, termasuk guru Pendidikan Islam di sekolah rendah dan menengah seluruh negara bagi memastikan pengajaran dan pembelajaran di sekolah dapat dilaksanakan dengan berkesan.

Berdasarkan rekod KPM sehingga 31 Julai 2022, seramai 47,750 guru opsyen Pendidikan Islam telah mengisi perjawatan di sekolah bawah KPM seluruh negara berbanding keperluan sebanyak 52,176. Dengan ini, jumlah kekurangan guru Pendidikan Islam adalah seramai 4,606 orang.

Untuk makluman Ahli Yang Berhormat, KPM telah mengumumkan pengambilan khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* pada 20 Jun 2021 bagi mengisi kekosongan guru di sekolah KPM seluruh negara. Urusan pengambilan khas guru baharu ini telah selesai dilaksanakan sepenuhnya oleh Suruhanjaya Perkhidmatan Pendidikan (SPP). Seramai 16,381 orang guru telah dilantik dan ditempatkan di sekolah bawah KPM. Daripada jumlah tersebut, seramai 13,770 orang adalah lantikan secara tetap manakala 2,611 orang lantikan secara *Contract of Service* (CoS).

Khusus bagi opsyen mata pelajaran Pendidikan Islam, seramai 3,531 guru Pendidikan Islam telah dilantik melalui pengambilan khas secara *one-off* ini yang terdiri daripada 2,340 guru lantikan secara tetap dan 1,191 guru lantikan secara CoS.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : DATUK DR. HASAN BIN BAHROM
(TAMPIN)**

SOALAN

DATUK DR. HASAN BIN BAHAROM (TAMPIN) minta **MENTERI PEMBANGUNAN WANITA, KELUARGA DAN MASYARAKAT** menyatakan berkaitan dengan Pusat Pemulihan dalam Komuniti (PPDK), berapa jumlah pusat, pelatih OKU dan penyelia-petugas di PPDK seluruh negara, apakah usaha Kementerian bagi meningkatkan kemahiran pelatih OKU dan penyelia dan petugas di PPDK dan apakah Kementerian berhasrat untuk meningkatkan sumbangan elaun kepada para penyelia – petugas selari dengan gaji minimum.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) telah melaksanakan program berbentuk sokongan, pemulihan dan pembelajaran kanak-kanak Orang Kurang Upaya (OKU) melalui Program Pemulihan Dalam Komuniti (PPDK) atau *Community Based Rehabilitation Programme* (CBR). Program ini merupakan salah satu strategi dalam pembangunan komuniti untuk rehabilitasi, penyamaan peluang dan integrasi sosial bagi OKU. Penempatan OKU di PPDK yang ditubuhkan di peringkat komuniti adalah terbuka kepada semua OKU warganegara Malaysia yang berdaftar dengan JKM yang memerlukan pemulihan dan latihan tanpa mengira kategori ketidakupayaan, had umur, jantina, kaum dan agama. Sehingga Mac 2022, sebanyak 568 buah PPDK yang beroperasi di seluruh negara

SOALAN NO.: 144

dengan bilangan pelatih seramai 18,702 orang, 568 orang penyelia dan 2,749 orang petugas.

Antara usaha yang dilaksanakan oleh KPWKM bagi meningkatkan kemahiran pelatih OKU serta penyelia/ petugas di PPDK adalah seperti berikut:

1. Program Kemahiran Kepada Pelatih OKU

(i) PPDKNet

PPDKNet merupakan Projek Rintis Program ICT dan Multimedia bagi membantu golongan OKU dalam proses pembelajaran dan pemulihan melalui koswer. Program PPDKNet adalah suatu inisiatif yang telah dilaksanakan oleh KPWKM dengan tujuan untuk:

- (a) Merapatkan jurang digital di antara komuniti Program Pemulihan dalam Komuniti (PPDK) dengan menggunakan ICT sebagai pemangkin kepada pembelajaran yang interaktif kepada golongan sasar;
- (b) Mewujudkan kesedaran tentang kepentingan pemulihan di kalangan OKU; dan
- (c) Memahami kepentingan ICT dalam kehidupan seharian.

Sehingga kini, sebanyak 240 buah PPDK telah dilengkапkan dengan PPDKNet.

(ii) Program Pemerksaan Ekonomi

Program Pemerksaan Ekonomi (EEP) di PPDK merupakan suatu program yang bertujuan menjana pendapatan pelatih OKU di PPDK. Sasaran program adalah OKU dewasa (17 tahun ke atas) yang berada di PPDK. Program ini selaras dengan Perancangan Strategik JKM iaitu untuk menjana pendapatan OKU melalui pelbagai kegiatan ekonomi. Antara program

SOALAN NO.: 144

kemahiran yang ditawarkan di peringkat awal pelaksanaan EEP adalah jahitan baju kurung, sulaman *name tag* dan tuala, pembuatan beg, sarung kusyen, cadar dan sebagainya.

Bermula pada tahun 2017, program ini telah diperluaskan kepada pelbagai projek meliputi jahitan, batik, kraftangan, pertanian, penternakan, perkhidmatan, pemprosesan makanan ringan, kuih tradisional, makanan sejuk beku dan lain-lain. Sehingga kini sebanyak 240 PPDK daripada 568 PPDK telah terlibat sepenuhnya dalam program ini yang melibatkan hampir 1,382 pelatih PPDK.

2. Program meningkatkan Kemahiran Kepada Penyelia dan Petugas PPDK

(i) Pendaftaran Sijil Kemahiran Malaysia (SKM)

Bagi tujuan meningkatkan kemahiran dan kompetensi penyelia dan petugas serta memastikan kualiti pemulihan pelatih OKU di PPDK, KPWKM telah menampung perbelanjaan pendaftaran bagi penyelia dan petugas PPDK sebanyak RM300 setiap seorang. Sehingga Disember 2020, seramai 741 orang telah berjaya memiliki SKM Tahap 3 dan 32 orang memiliki SKM Tahap 4 secara Pengiktirafan Pencapaian Terdahulu (PPT). Bagi tahun 2021 pula, seramai 150 orang telah mendaftar dan sedang mengambil SKM Tahap 3. Usaha untuk meningkatkan bilangan petugas memiliki SKM diteruskan pada tahun 2022 dan seramai 150 orang penyelia dan petugas PPDK akan didaftarkan untuk mendapatkan persijilan SKM Tahap 3.

Tuan Yang di-Pertua,

Berhubung persoalan apakah Kementerian berhasrat untuk meningkatkan sumbangan elauan kepada para penyelia dan petugas selari dengan gaji minimum, KPWKM telah mengangkat perkara ini kepada pihak MOF dan diluluskan kenaikan kadar bayaran elauan kepada penyelia

SOALAN NO.: 144

daripada RM1,200 kepada RM1500 dan daripada RM800 kepada RM1,200 kepada petugas berkuatkuasa mulai tahun 2021.

Melalui kenaikan kadar elaun tersebut, Kerajaan telah membelanjakan lebih kurang RM56,551,615 pada tahun 2021 bagi tujuan pembayaran elaun penyelia dan petugas PPDK di seluruh negara termasuk pembayaran KWSP dan PERKESO. Sehingga kini, Kerajaan masih membiayai keseluruhan peruntukan pentadbiran PPDK termasuk bayaran elaun kepada penyelia dan petugas.

Untuk makluman, terdapat perbezaan antara elaun dan gaji, di mana elaun merupakan bayaran yang diberikan kepada seseorang yang bertugas secara sukarela di sebuah organisasi seperti di PPDK, manakala gaji adalah suatu pemberian upah tetap yang diberikan oleh majikan kepada pekerja. Penyelia dan petugas PPDK yang dilantik merupakan sukarelawan yang bertanggungjawab untuk merancang dan melaksanakan aktiviti di PPDK.

Mulai tahun 2018, program PPDK dijalankan oleh Badan Bukan Kerajaan (NGO) yang telah berdaftar sebagai pertubuhan dengan Jabatan Pendaftaran Pertubuhan (ROS) dan menjadi sebuah entiti yang berdiri sendiri serta mampu untuk menjana pendapatan. Kadar elaun berkenaan tidak semestinya terikat kepada kadar bantuan kewangan Kerajaan yang diberikan pada masa ini. Sekiranya Pertubuhan PDK berkemampuan membayar elaun petugas dan penyelia PPDK dengan kadar yang lebih baik, ia merupakan satu inisiatif yang adalah amat dialu-alukan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DATUK HAJI HASANUDDIN BIN MOHD YUNUS [HULU LANGAT]

SOALAN

DATUK HAJI HASANUDDIN BIN MOHD YUNUS minta **MENTERI KESIHATAN** menyatakan berkenaan perkembangan pindaan Akta Pencegahan dan Pengawalan Penyakit Berjangkit berikutan status semasa negara yang berada dalam fasa endemik.

JAWAPAN

Tuan Yang di-Pertua,

Bacaan Kedua dan Ketiga Rang Undang-Undang (RUU) Pencegahan dan Pengawalan Penyakit Berjangkit tidak akan diteruskan susulan pengumuman oleh YAB Perdana Menteri pada 19 Mac 2022 yang lalu. Oleh yang demikian, Peruntukan-Peruntukan dalam Akta sedia ada akan terus dikuatkuasakan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN HASANUDDIN B. MOHD YUNUS
(HULU LANGAT)**

SOALAN

DATUK HAJI HASANUDDIN BIN MOHD YUNUS (HULU LANGAT) minta MENTERI DALAM NEGERI menyatakan apakah Kerajaan akan mempertimbangkan elaun khas kepada Tiger Platoon, Pasukan Gerakan Am PDRM yang gigih menjaga sempadan negara serta melakukan pelbagai tugas yang berdepan dengan risiko merbahaya.

JAWAPAN

Tuan Yang Di Pertua,

Kementerian dari semasa ke semasa melaksanakan kajian penampaikan elaun anggota keselamatan bagi memastikan elaun-elaun tersebut kekal relevan dan kadar bayaran adalah setara dengan penugasan yang dilaksanakan. Pembayaran sesuatu elaun kepada anggota keselamatan adalah berdasarkan beberapa faktor seperti risiko tugas, kesusahan dan kepakaran. Bagi penugasan yang melibatkan penguatkuasaan di pintu-pintu sempadan negara, kriteria risiko tugas telah diambil kira dalam pembayaran elaun kepada anggota yang terlibat.

Pasukan Tiger Platoon merupakan salah satu platoon di dalam Pasukan Gerakan Am (PGA), Polis Diraja Malaysia (PDRM) yang bertugas mengawal sempadan negara. Pada masa ini, anggota Tiger Platoon dibayar Bayaran

SOALAN : 146

Insentif Pasukan Gerakan Am sebanyak RM400.00 sebulan sama seperti yang dinikmati oleh semua pegawai dan anggota di dalam PGA.

Menerusi Kajian Rasionalisasi Elaun yang sedang dilaksanakan oleh Agensi Pusat, Kerajaan sedang meneliti semula syarat-syarat dan kadar pemberian kesemua 143 elaun sedia ada yang diterima Penjawat Awam Persekutuan. Usaha ini adalah bagi memastikan elaun-elaun yang diterima oleh Penjawat Awam termasuk anggota PDRM sentiasa relevan dengan keperluan Perkhidmatan Awam di samping aspek kebajikan anggota perkhidmatan awam sentiasa terbaik.

Dalam hal ini, kewajaran bagi pemberian elaun-elaun tertentu akan mengambil kira kepada tanggungan dan kedudukan kewangan Kerajaan.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATUK HAJI HASANUDDIN BIN MOHD YUNUS [HULU LANGAT]

SOALAN

YB DATUK HAJI HASANUDDIN BIN MOHD YUNUS [HULU LANGAT] minta **MENTERI PERUMAHAN DAN KERAJAAN TEMPATAN** menyatakan apakah status berkenaan Rang Undang-Undang Akta Sewaan Kediaman. Masalah penyewa dan pemilik rumah semakin meruncing dan ketiadaan undang-undang yang jelas untuk mengawal isu-isu ini menyebabkan banyak masalah penyewaan rumah seperti pencabulan hak dan diskriminasi kaum.

JAWAPAN

Tuan Yang di-Pertua,

Untuk makluman Ahli Yang Berhormat, bagi melindungi kepentingan serta hak penyewa dan pemilik kediaman, Kementerian ini sedang **menjalankan kajian dan penggubalan Akta Sewaan Kediaman/ Residential Tenancy Act (RTA)** bermula Jun 2019. Ketika ini, penyediaan perjanjian penyewaan kediaman adalah berdasarkan Akta Kontrak 1950 dan perjanjian itu bersifat umum yang tidak komprehensif serta tidak melindungi sepenuhnya kepentingan serta hak penyewa dan pemilik premis.

Cadangan penggubalan RTA telah pun dibentangkan dalam Mesyuarat Jemaah Menteri pada 23 Jun 2021 dan telah mendapat kelulusan prinsip untuk penggubalan Rang Undang-undang (RUU) RTA Sepanjang proses penggubalan RUU RTA ini, **sesi pengumpulan maklumat, data dan konsultasi** telah diadakan dengan pihak berkepentingan termasuk di peringkat Kerajaan Persekutuan, kerajaan negeri, Badan Bukan Kerajaan (Non-Governmental Organisation, NGO), badan profesional hartanah, pihak swasta, pemaju dan pihak-pihak yang berkepentingan daripada semasa ke semasa. Ini bertujuan untuk mendapatkan input dan maklum balas bagi isu-isu berkaitan penggubalan Akta RTA ini.

Kementerian Perumahan dan Kerajaan Tempatan (KPKT) juga telah menjalankan konsultasi awam terhadap cadangan Akta ini melalui Portal *Unified Public Consultation* (UPC) mulai 28 Januari hingga 28 Februari 2022. Ini adalah selaras dengan proses pelaksanaan Analisa Impak Peraturan (*Regulatory Impact Assessment*, RIA) yang ditetapkan oleh Perbadanan Produktiviti Malaysia (*Malaysia Productivity Corporation*, MPC) bagi mendapatkan maklum balas awam terhadap cadangan ini. Kementerian ini sedang meneliti maklum balas yang dikemukakan agar kepentingan semua pihak terpelihara dan diberikan perhatian sewajarnya.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DATUK HAJI HASANUDDIN BIN MOHD YUNUS [HULU LANGAT]

SOALAN

DATUK HAJI HASANUDDIN BIN MOHD YUNUS [HULU LANGAT] minta **MENTERI PELANCONGAN, SENI DAN BUDAYA** menyatakan jumlah terkini pelancong yang telah memasuki Malaysia sejak pintu sempadan negara dibuka dan adakah ia sudah berada pada paras sebelum pandemik.

JAWAPAN

Tuan Yang di-Pertua,

1. Bagi suku pertama tahun 2022, Malaysia telah mencatatkan ketibaan seramai 98,053 orang pelancong asing dengan perbelanjaan pelancong asing sebanyak RM359.66 juta. Untuk makluman, Malaysia telah menerima kehadiran seramai 6,696,230 orang pelancong asing dalam tempoh yang sama pada tahun 2019, iaitu sebelum penularan COVID-19 di seluruh dunia.

2. Sebagai perbandingan, pada suku pertama tahun 2022, negara-negara di seluruh dunia telah mencatatkan peningkatan ketibaan pelancong antarabangsa, dengan pergerakan seramai 76 juta orang pelancong antarabangsa, di mana 47 juta daripadanya dicatatkan pada bulan Mac 2022 sahaja. Walau bagaimanapun, prestasi ini masih lagi pengurangan sebanyak 61% jika dibandingkan dengan prestasi paras pra-pandemik pada tahun 2019. Prestasi ini dijangka akan bertambah baik pada tahun hadapan berdasarkan laporan Pertubuhan Pelancongan Dunia (*United Nation World Tourism Organisation - UNWTO*) yang meramalkan bahawa industri pelancongan bagi negara-negara di rantau

Asia Pasifik dijangka akan bertambah pulih pada tahun 2023.

3. Sejak Malaysia membuka semula pintu sempadan antarabangsa bermula 1 April 2022 yang lalu, negara telah menerima kehadiran hampir 2 juta orang pengunjung antarabangsa.
4. Antara faktor tarikan pelancong ke Malaysia adalah kejayaan negara mengimbangi keperluan ekonomi dengan kesihatan, yang jelas dibuktikan apabila pembukaan semula sektor ekonomi dan pelancongan secara berfasa tidak menyumbang kepada penularan COVID-19 yang tidak terkawal. Kejayaan ini bukanlah sekadar kebetulan tetapi ia dicapai melalui pelaksanaan rancangan yang rapi. Antaranya ialah Projek Rintis Gelembung Pelancongan Antarabangsa Langkawi (LITB), yang dilancarkan oleh Kementerian Pelancongan, Seni dan Budaya (MOTAC) bermula November 2021 yang telah berjaya menjadi platform untuk semua pihak terbabit seperti agensi-agensi Kerajaan Persekutuan dan Negeri, penggiat industri serta rakyat tempatan dalam menyesuaikan diri dengan situasi norma baharu. Di samping itu, Kementerian Kesihatan Malaysia mengesahkan bahawa tiada kes atau kluster COVID-19 di Malaysia yang berpunca daripada kehadiran pelancong asing melalui LITB ini.
5. Menurut statistik oleh Malaysia Airports Holdings Bhd (MAHB), trafik antarabangsa di rangkaian lapangan terbang tempatan meningkat sebanyak 53% susulan pembukaan semula sempadan pada 1 April 2022. Lapangan Terbang Antarabangsa Kota Kinabalu, Lapangan Terbang Antarabangsa Pulau Pinang dan Lapangan Terbang Antarabangsa Langkawi menunjukkan peningkatan paling ketara, dengan masing-masing mencatatkan peningkatan lebih 200%. Sejumlah 2.78 juta penumpang direkodkan pada bulan April 2022, dengan 77% adalah pergerakan penumpang domestik. Di samping itu, lima syarikat penerbangan iaitu Vietjet Air, Scoot, AirAsia, Thai AirAsia dan AirAsia X telah menyambung semula 17 laluan antarabangsa ke Malaysia.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK HAJI HASANUDDIN BIN MOHD YUNUS [HULU LANGAT]

SOALAN

YB DATUK HAJI HASANUDDIN BIN MOHD YUNUS [HULU LANGAT] minta **MENTERI PERUMAHAN DAN KERAJAAN TEMPATAN** menyatakan statistik terkini projek perumahan terbengkalai, rumah tidak terjual mengikut kategori harga dan lokasi.

JAWAPAN

Tuan Yang di-Pertua,

Untuk makluman Ahli Yang Berhormat, sehingga 30 Jun 2022, terdapat sebanyak **118** projek perumahan terbengkalai di seluruh Semenanjung Malaysia merangkumi **23,838 unit rumah** melibatkan **14,081 pembeli** di seluruh negara. Berdasarkan rekod Kementerian Perumahan dan Kerajaan Tempatan (KPKT), negeri Selangor, Kelantan dan Terengganu merupakan negeri-negeri yang mempunyai projek terbengkalai terbanyak di mana masing-masing merekodkan 48 projek, 21 projek dan 13 projek. Sementara itu, Perlis dan Wilayah Persekutuan Putrajaya tidak mempunyai projek terbengkalai. Senarai projek terbengkalai mengikut negeri adalah seperti berikut:

**STATISTIK PROJEK PERUMAHAN SWASTA TERBENGKALAI
MENGIKUT NEGERI SEHINGGA 30 JUN 2022**

Negeri	Bilangan Projek	Bilangan Unit Rumah	Bilangan Pembeli / Dijual
Selangor	48	14,749	7,994
Kelantan	21	1,179	1,021
Terengganu	13	1,349	1,097
Johor	8	2,595	2,119
Pahang	7	911	501
Perak	6	404	307
W.P. Kuala Lumpur	5	1,320	79
Negeri Sembilan	4	593	557
Pulau Pinang	3	139	85
Kedah	2	520	317
Melaka	1	79	4
Perlis	0	0	0
W.P. Putrajaya	0	0	0
Jumlah	118	23,838	14,081

Untuk makluman Ahli Yang Berhormat, berdasarkan **Pusat Maklumat Harta Tanah Negara (NAPIC)**, bagi suku pertama tahun 2022 (Q1, 2022) terdapat **35,592** unit rumah siap dibina tidak terjual yang bernilai **RM22.45 billion**. Terdapat 10,501 unit rumah dalam lingkungan harga RM300,000 hingga RM500,000 (29.5%), 10,227 unit rumah dalam lingkungan RM500,000 hingga RM1 juta (28.7%) dan 10,158 unit rumah berharga di bawah RM300,000 (28.5%) daripada jumlah kediaman siap dibina tidak terjual. Bilangan unit kediaman siap dibina tidak terjual mengikut kategori harga dan lokasi adalah seperti di **LAMPIRAN A**.

Sekian, terima kasih.

LAMPIRAN A

BILANGAN UNIT KEDIAMAN SIAP DIBINA TIDAK TERJUAL MENGIKUT KATEGORI HARGA DAN LOKASI

NEGERI	RM0 - RM100,000	RM100,001 - RM200,000	RM200,001 - RM300,000	RM300,001 - RM400,000	RM400,001 - RM500,000	RM500,001 - RM600,000	RM600,001 - RM700,000	RM700,001 - RM800,000	RM800,001 - RM900,000	RM900,001 - RM1,000,000	More than RM1,000,000	TOTAL
KUALA LUMPUR	-	-	280	408	456	599	584	329	160	-	521	3,337
PUTRAJAYA	-	-	-	-	144	76	-	-	-	25	81	326
LABUAN	-	-	-	65	-	-	-	-	-	-	-	65
SELANGOR	17	164	816	562	701	454	108	185	115	375	1,718	5,215
JOHOR	285	355	247	485	659	1,159	703	244	633	31	1,191	5,992
PULAU PINANG	574	519	303	939	1,015	403	363	61	522	297	820	5,816
PERAK	-	344	1,287	645	161	97	89	-	9	-	42	2,674
NEGERI SEMBILAN	27	-	34	242	192	224	56	118	41	15	74	1,023
MELAKA	-	57	213	193	59	29	26	35	-	-	18	630
KEDAH	714	239	340	735	308	6	29	-	7	82	12	2,472
PAHANG	53	393	205	240	295	62	114	14	13	-	70	1,459
TERENGGANU	73	-	198	159	213	6	19	-	-	-	-	668
KELANTAN	-	42	266	11	-	73	70	51	-	-	2	515
PERLIS	35	-	8	18	6	-	-	-	-	-	-	67
SABAH	487	7	730	675	431	613	79	31	6	-	83	3,142
SARAWAK	249	279	318	188	296	386	225	29	98	49	74	2,191
MALAYSIA	2,514	2,399	5,245	5,565	4,936	4,187	2,465	1,097	1,604	874	4,706	35,592

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN HASSAN BIN ABDUL KARIM
[PASIR GUDANG]**

SOALAN

YB TUAN HASSAN BIN ABDUL KARIM [PASIR GUDANG] minta **MENTERI PERUMAHAN DAN KERAJAAN TEMPATAN** menyatakan adakah Kerajaan bercadang untuk memperkenalkan konsep 'bina kemudian jual' bagi menangani masalah banyak projek perumahan yang terbengkalai atau disebut 'projek sakit'.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan melalui Dasar Perumahan Negara (DRN) menggalakkan konsep pembinaan secara Beli Kemudian Jual (BKJ) 10:90 bagi pemajuan perumahan swasta. Melalui kaedah pembinaan BKJ ini, pemaju akan mengenakan 10% wang pendahuluan daripada harga jualan kepada pembeli, manakala baki 90% pula akan dikenakan setelah rumah tersebut siap dengan Perakuan Siap dan Pematuhan (Certificate of Completion and Compliance, CCC) serta penyerahan pemilikan kosong (Vacant Possession, VP). Bagi pelaksanaan kaedah ini, Akta Pemajuan Perumahan (Kawalan dan Pelesenan) 1966 (Akta 118) dan peraturan-peraturannya telah memperuntukkan Jadual I dan Jadual J iaitu perjanjian jual beli bagi pembinaan pemajuan perumahan secara BKJ 10:90. Berdasarkan rekod, BKJ melibatkan 612 projek, 79 067 unit rumah dan 209 pemaju.

Projek Sakit ialah projek yang telah tamat tempoh Perjanjian Jual Beli serta mengalami kelewatan dengan jurang perbezaan melebihi 30% berbanding jadual kerja yang ditetapkan di dalam Perjanjian Jual Beli. Projek Terbengkalai pula adalah projek yang disahkan sebagai terbengkalai oleh YB Menteri Perumahan dan Kerajaan Tempatan di bawah Seksyen 11 (1) (ca) Akta 118 apabila kemajuan kerja terhenti bagi tempoh berterusan selama enam (6) bulan atau lebih, atau projek gagal disiapkan dalam tempoh Perjanjian Jual Beli.

Antara faktor yang menyebabkan sesuatu projek perumahan menjadi terbengkalai ialah kegagalan perancangan, skim pemajuan yang terlalu besar dan pemantauan pemajuan pembinaan yang tidak berkesan. Untuk makluman Ahli Yang Berhormat, Kementerian telah menubuhkan Mesyuarat *War Room* khusus untuk menangani isu projek terbengkalai. Mesyuarat ini akan melihat kaedah penyelesaian segera untuk mengembalikan hak perumahan kepada pembeli yang terkesan. Mesyuarat *War Room* Pemantauan Pemajuan Projek Perumahan Swasta dipengerusikan YB Menteri Perumahan dan Kerajaan Tempatan diadakan bagi menyelesaikan sebarang isu kelewatan projek perumahan.

Selain itu, KPKT telah membuat pindaan kepada Akta Pemajuan Perumahan (Kawalan dan Pelesenan) 1966 (Akta 118) yang telah dikuatkuasakan bersekali dengan Akta Pengurusan Strata 2013 (Akta 757) dan Akta Hak Milik Strata (Pindaan) 2013 (Akta 318) bermula 1 Jun 2015 untuk mengelakkan projek perumahan swasta daripada terbengkalai. Pindaan kepada Akta 118 dan peraturan-peraturannya adalah seperti berikut:

1) Seksyen 6

Deposit lesen pemajuan perumahan dipinda dari RM200,000 kepada 3.0% daripada anggaran kos pembinaan termasuk kos yuran profesional tetapi tidak termasuk kos tanah.

2) Seksyen 8A

Pembeli boleh secara individu memohon untuk menamatkan perjanjian jual beli pada bila-bila masa sekiranya tiada kemajuan pembinaan secara berterusan di tapak pembinaan selama enam (6) bulan atau lebih selepas perjanjian ditandatangani dengan syarat perlu mendapat perakuan daripada Pengawal Perumahan dan mendapat persetujuan bertulis daripada pihak pembiaya.

3) Subseksyen 24(2)(g) [kuasa untuk membuat peraturan-peraturan]

Menaikkan kadar penalti maksimum bagi kesalahan di bawah peraturan daripada RM20,000 kepada RM50,000.

4) Seksyen 18A (Fasal Baharu)

Tindakan pendakwaan terhadap pemaju perumahan berlesen yang menyebabkan projek perumahan terbengkalai mulai Jun 2015.

Kementerian akan sentiasa memberi perhatian terhadap isu ini dan kerjasama daripada pelbagai pihak adalah diperlukan untuk mencapai penyelesaian yang diharapkan.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN HASSAN BIN ABDUL KARIM (PASIR GUDANG)

SOALAN

PR-1452-T05970

TUAN HASSAN BIN ABDUL KARIM (PASIR GUDANG) minta **MENTERI PERTANIAN DAN INDUSTRI MAKANAN** menyatakan sejauh manakah kesan pemansuhan AP dalam pengimportan makanan telah berjaya mewujudkan keselamatan makanan *food security* di Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, mulai 18 Mei 2022, Kerajaan telah memutuskan untuk memansuhkan *Approved Permit* (AP) terhadap empat (4) komoditi pertanian di bawah kawal selia MAFI iaitu kubis bulat, kelapa tua biji, susu cair dan ayam (ayam bulat dan keratannya) bagi memastikan bekalan komoditi-komoditi tersebut dapat dibawa masuk oleh lebih banyak syarikat tempatan yang berkeupayaan dengan lebih cepat tanpa melalui kelulusan AP.

Kementerian mendapati jumlah kemasukan komoditi pertanian import dilihat semakin bertambah mulai bulan Julai 2022. Ini seterusnya menjadikan bekalan dan harga pasaran komoditi pertanian dalam negara semakin stabil. Terdapat peningkatan kemasukan jumlah ayam bulat yang diimport ke dalam negara sebanyak kira-kira 80% sejak inisiatif seperti pemansuhan AP import dilaksanakan. Ini dapat dilihat dari peningkatan jumlah import pada bulan Mei 2022 sebanyak 258 tan metrik berbanding 471 tan metrik pada bulan Jun 2022. Kemasukan keratan ayam juga telah meningkat sebanyak 30% daripada 7,800 tan metrik kepada 10,200 tan metrik setelah inisiatif diperkenalkan. Peningkatan jumlah import komoditi ayam turut membantu mengatasi isu kekurangan bekalan dan ketidakstabilan harga pasaran komoditi untuk menjamin sekuriti makanan dalam negara.

Impak yang sama juga dilihat berlaku bagi komoditi-komoditi pertanian lain yang telah dimansuhkan AP seperti kobis bulat, kelapa tua biji dan susu cair.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)
DARIPADA : TUAN HASSAN BIN ABDUL KARIM
[PASIR GUDANG]
TARIKH : JULAI – OGOS 2022

SOALAN

TUAN HASSAN BIN ABDUL KARIM [PASIR GUDANG] minta **MENTERI PENGANGKUTAN** menyatakan apakah Kerajaan mempunyai dasar untuk menjadikan sistem pengangkutan rail atau kereta api seperti LRT, MRT, monorail, komuter akan menjadi teras pengangkutan awam di kawasan bandar dan antara bandar di seluruh negara.

JAWAPAN

Tuan Yang Di Pertua,

1. Kementerian Pengangkutan sentiasa memandang serius langkah-langkah penambahbaikan dalam menaik taraf serta meningkatkan kualiti pengangkutan awam darat dalam menyalurkan perkhidmatan yang berkualiti serta memberikan keselesaan kepada rakyat. Penekanan aspek kesalinghubungan dan kebolehsampaian di antara pengguna dan perkhidmatan pengangkutan awam darat menjadi keutamaan Kerajaan dalam menjadikan perkhidmatan ini menjadi mod pilihan rakyat.
2. Di dalam Dasar Pengangkutan Negara 2019-2030 (DPN 2019-2030), di antara strategi utama yang telah dikenalpasti dalam mencapai matlamat serta teras dasar yang telah ditetapkan adalah dengan meningkatkan penggunaan perkhidmatan rel untuk penumpang dan juga barang.
3. Untuk makluman Ahli Yang Berhormat, hierarki petempatan dan pusat pertumbuhan merupakan antara asas utama yang mempengaruhi penyediaan asas atau teras pembangunan sistem pengangkutan awam di sesuatu lokasi itu. Berdasarkan Dasar Perbandaran Negara, terdapat tujuh (7) hierarki bandar dengan perbezaan populasi penduduk di mana Konurbasi Pertumbuhan Negara merupakan hierarki tertinggi dengan bilangan penduduk melebihi 2.5 juta orang. Buat masa ini, hanya kawasan Lembah Klang yang dikategorikan sebagai Konurbasi Pertumbuhan Negara, manakala Georgetown, Johor Bahru dan Kuantan di hierarki yang kedua iaitu Konurbasi Pertumbuhan Wilayah dengan populasi penduduk di antara 1.5 juta hingga 2.5 juta orang, dan lain-lain bandar berada di kategori hierarki yang lebih rendah berdasarkan populasi penduduk masing-masing.
4. Kepadatan penduduk sesebuah kawasan menentukan jenis mod pengangkutan awam yang sesuai selain keadaan ekonomi kawasan terbabit. Oleh itu, pusat pertumbuhan dengan kepadatan penduduk yang tinggi meningkatkan tahap permintaan terhadap mod pengangkutan dan begitu juga sebaliknya. Sebagai contoh, bagi kawasan Lembah Klang yang mempunyai kepadatan penduduk yang tinggi, sistem rel akan

menjadi teras dan tulang belakang serta mod utama kepada rangkaian pengangkutan awam, manakala bas pula sebagai mod sokongan kepada sistem rel.

5. Manakala bagi bandar-bandar utama selain daripada Lembah Klang yang juga mempunyai kepadatan yang tinggi contohnya seperti Georgetown, Johor Bahru, Kuantan dan Kuching, tumpuan utama adalah untuk meningkatkan tahap keupayaan dan kualiti perkhidmatan bas sedia ada ataupun melalui pengenalan sistem Bus Rapid Transit (BRT). Namun begitu, perkhidmatan rel bagi bandar-bandar utama ini juga boleh dibangunkan sekiranya terdapat keperluan dan permintaan yang tinggi tetapi keputusan hanya dapat dilakukan berdasarkan kepada hasil kajian kebolehlaksanaan yang akan dijalankan. Sebagai contoh, perancangan LRT Bayan Lepas di Pulau Pinang dan sistem ART di Kuching kini telah dipertimbang untuk dilaksanakan berdasarkan kepada keperluan dan hasil kajian kebolehlaksanaan yang telah dijalankan.

6. Bagi bandar-bandar lain di bawah hierarki pusat pertumbuhan dan kepadatan penduduk yang lebih rendah, masih belum terdapat keperluan kepada pembangunan sistem rel sebagai teras pengangkutan awam. Tumpuan utama pembangunan pengangkutan awam adalah kepada penambahbaikan infrastruktur dan kecekapan pengangkutan awam sedia ada seperti bas, teksi dan e-hailing serta memastikan perkhidmatan yang diberikan meliputi laluan kurang permintaan dan tidak hanya tertumpu di laluan yang memberikan keuntungan (*profitable routes*).

7. Bagi perkhidmatan pengangkutan antara bandar pula, sistem rel sememangnya telah menjadi teras kepada pengangkutan awam di negara ini. Sebagai contohnya, perkhidmatan KTMB yang menghubungkan negeri-negeri seperti:

- i. Laluan Pantai Barat dari Padang Besar, Perlis ke Gemas, Negeri Sembilan melalui Kuala Lumpur atau dikenali sebagai perkhidmatan ETS;
- ii. Laluan Pantai Timur atau dikenali sebagai Shuttle Timuran dari Gemas, Negeri Sembilan ke Tumpat, Kelantan;

- iii. Laluan Ekpress Timuran dari Gemas, Negeri Sembilan ke Johor Bahru; dan
- iv. ECRL yang sedang dalam pembinaan akan menghubungkan Kota Bharu – Dungun, Dungun – Mentakab dan Mentakab – Pelabuhan Klang.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN HASSAN BIN ABDUL KARIM
[PASIR GUDANG]

SOALAN

TUAN HASSAN BIN ABDUL KARIM [PASIR GUDANG] minta **MENTERI KEWANGAN** menyatakan apakah usaha yang telah diambil oleh Kerajaan untuk memperbaiki nilai mata wang Ringgit Malaysia berbanding Dolar Amerika Syarikat bagi memastikan harga barang yang diimport ke Malaysia tidak meningkat naik.

JAWAPAN

Tuan Yang di-Pertua,

Kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjelaskan aktiviti ekonomi domestik meskipun dalam keadaan pasaran kewangan dan kadar pertumbuhan global yang tidak menentu.

Dalam keadaan global yang tidak menentu ini, keadaan pasaran kewangan yang stabil dan teratur adalah penting untuk sistem kewangan tempatan, sesuai dengan kedudukan Malaysia sebagai sebuah ekonomi yang terbuka.

Kerajaan menerusi Bank Negara Malaysia (BNM) akan sentiasa memastikan keadaan pasaran kewangan yang stabil dan lancar, dan mengambil langkah proaktif dengan memperkenalkan langkah-langkah untuk memastikan kecairan yang mencukupi dan pasaran yang berdaya tahan dan mendalam untuk menegah ketidakstabilan nilai ringgit. Dalam usaha untuk menstabilkan pasaran, BNM juga telah menyalurkan kecairan melalui penggunaan rizab antarabangsa BNM.

Oleh itu, rizab antarabangsa BNM telah menunjukkan penyusutan sebanyak USD7.7 bilion, iaitu daripada USD116.9 bilion kepada USD109.2 bilion, bagi tempoh dari penghujung Disember 2021 hingga Jun 2022.

Walau bagaimanapun, penurunan rizab antarabangsa ini dijangka bersifat sementara dan tidak berterusan. Pemulihan kestabilan pasaran dunia, penambahbaikan sentimen pelabur dan lebihan akaun semasa negara yang kekal positif dijangka menyokong paras rizab antarabangsa BNM dalam jangka masa panjang.

Kerajaan menerusi BNM akan sentiasa menjalankan pemantauan bagi memastikan keadaan yang teratur dalam pasaran pertukaran asing dan mengelakkan turun naik yang ketara dalam kadar pertukaran ringgit. Pada masa yang sama, Kementerian Kewangan juga telah mengeluarkan Pekeliling Perbendaharaan 3.1 pada 14 Julai 2022 mengenai langkah penjimatan untuk dilaksanakan di peringkat semua Kementerian dan agensi Kerajaan. Usaha untuk mengenal pasti penjimatan perbelanjaan bagi menampung sebahagian daripada keperluan subsidi tambahan ini turut mengandungi langkah yang boleh membantu mengawal aliran keluar ringgit. Antara langkah kawalan perbelanjaan yang berkaitan termasuk kawalan ke atas lawatan ke luar negara serta perolehan barang dan bahan import. Di samping itu, sebarang pelaburan Badan Berkanun dan syarikat subsidiari yang melibatkan aliran wang ke luar negara perlu mendapat kelulusan Kementerian Kewangan terlebih dahulu.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

**PERTANYAAN : BUKAN LISAN (BERTULIS)
DARIPADA : Y.B. TUAN HASSAN BIN ABDUL KARIM
[PASIR GUDANG]**

SOALAN

TUAN HASSAN BIN ABDUL KARIM [PASIR GUDANG] minta **PERDANA MENTERI** menyatakan adakah Kerajaan akan mengkaji undang-undang kebankrapan yang ada sekarang dalam usaha membantu mengurangkan bilangan generasi muda diisytihar muflis.

JAWAPAN

**YB DATO SERI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Kerajaan telah mengkaji undang-undang berkaitan kebankrapan melalui Akta Kebankrapan (Pindaan) 2017 [Akta A1534] yang telah berkuat kuasa pada 6 Oktober 2017.

Melalui Akta A1534, Kerajaan telah memberi hak perlindungan dan jaminan kepada bankrap berdasarkan lunas undang-undang yang telah digariskan berdasarkan rujukan dan perbandingan negara-negara luar seperti United Kingdom, Singapura, New Zealand dan Hong Kong.

Akta A1534 juga telah memperkenalkan satu peruntukan yang baharu di bawah Seksyen 33C iaitu Pelepasan Automatik di mana tempoh kebankrapan ditadbir selama 3 tahun daripada tarikh pemfailan

Pernyataan Hal Ehwal oleh bankrap dengan mengambil kira amalan terbaik antarabangsa bagi melayakkan bankrap dilepaskan secara automatik. Bankrap dalam memohon Pelepasan Automatik ini hendaklah mematuhi syarat-syarat yang telah digariskan dalam Akta Insolvensi 1967 [Akta 360].

Tuan Yang di-Pertua,

Selain daripada peruntukan tersebut, terdapat dasar baharu, antara lain, yang diperkenalkan dan peruntukan telah digubal bagi melindungi kepentingan bankrap seperti berikut:

1. Perlindungan penjamin sosial - Perlindungan mutlak diberi kepada penjamin sosial (tindakan perintah kebankrapan tidak boleh diambil) di bawah seksyen 5(3)(a) Akta 360 di mana penjamin tersebut diberikan perlindungan mutlak kerana tidak mendapat sebarang keuntungan atau faedah daripada pinjaman yang dibuat oleh peminjam;
2. Mekanisme Penyelamat (*Voluntary Arrangement*) - Kaedah dan mekanisme di bawah Bahagian I Akta 360 ini merupakan peluang terakhir bagi penghutang untuk berunding dan mengelakkan daripada perintah kebankrapan oleh Mahkamah. Penghutang yang memilih dan bersedia untuk meneruskan mekanisme ini perlu memfailkan permohonan ke Mahkamah untuk mendapatkan perintah interim;
3. Pelepasan tanpa bantahan pemiutang - Pelepasan Melalui Sijil Ketua Pengarah Insolvensi di bawah seksyen 33A Akta 360 membenarkan pemiutang membuat bantahan. Pindaan terhadap permohonan pelepasan yang dibuat tidak membenarkan bantahan dibuat oleh pemiutang sekiranya bankrap berada dalam keadaan-keadaan seperti berikut:
 - a. Bankrap atas alasan sebagai penjamin sosial;
 - b. Bankrap didaftarkan sebagai Orang Kurang Upaya (OKU) di bawah Akta Orang Kurang Upaya 2008;
 - c. Bankrap yang telah meninggal dunia; dan

- d. Bankrap yang mengidap sakit serius yang telah disahkan oleh Pegawai Perubatan Kerajaan.

Kategori di atas merupakan pindaan yang dibuat bagi menjamin dan melindungi penjamin sosial daripada tindakan kebankrapan. Manakala bagi pesakit serius dan OKU merupakan golongan yang diberi pembelaan dan perlindungan sepenuhnya oleh Kerajaan di mana golongan ini tidak berupaya dalam menjana pendapatan dan melunaskan hutang; dan

4. Nilai minima (*threshold*) kebankrapan dinaikkan - Peruntukan seksyen 5(1)(a) Akta 360 telah dipinda melalui Akta Insolvensi (Pindaan) 2020 [Akta A1624] yang telah diwartakan pada 22 Oktober 2020 dan berkuat kuasa sejak 1 September 2021. Pindaan ini adalah untuk menetapkan nilai had minima keberhutangan kepada RM100,000.

Justeru, pindaan Akta ini akan dapat membantu dan memudahkan bankrap termasuk generasi muda untuk memahami dan mematuhi arahan yang telah ditetapkan berdasarkan undang-undang yang telah ditetapkan.

Kunci utama seorang bankrap termasuk generasi muda agar status kebankrapan tidak berkekalan sepanjang hayat ialah memahami, memberi kerjasama yang penuh dan mematuhi arahan Jabatan Insolvensi Malaysia. Pindaan Akta ini tidak akan memberi kesan atau impak yang positif sekiranya bankrap tidak memberi kerjasama yang penuh kepada Jabatan Insolvensi Malaysia.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB TAN SRI HAJI IDRIS BIN JUSOH (BESUT)

SOALAN

TAN SRI HAJI IDRIS BIN JUSOH [BESUT] minta **MENTERI KANAN KERJA RAYA** menyatakan status terkini pembinaan Lebuh Raya Pantai Timur 3 (LPT3) sejauh 147 kilometer dari Kampung Gemuruh, Terengganu selepas pembentangan hasil kerja awalan kepada Agensi Pusat mengenai hala tuju perlaksanaan projek tersebut.

JAWAPAN

Tuan Yang Di-Pertua,

Untuk makluman Ahli Yang Berhormat, Hasil Kajian Kerja Awalan bagi Projek Lebuhraya Pantai Timur Fasa 3 (LPT3) telah dibentangkan kepada Agensi Pusat pada 20 April 2022. Agensi Pusat telah bersetuju supaya cadangan LPT3 dari Kampung Gemuroh, Terengganu ke Pengkalan Kubor, Kelantan ini dilaksanakan secara penswastaan melalui kaedah Kerjasama Awam Swasta (PPP).

Lanjutan daripada keputusan semasa pembentangan di Agensi Pusat, cadangan LPT3 ini akan diangkat kepada Jawatankuasa Penswastaan Kementerian Kerja Raya bagi memperincikan lagi cadangan pelaksanaan LPT3.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TAN SRI HAJI IDRIS BIN JUSOH (BESUT)

SOALAN

PR-1452-T06467

TAN SRI HAJI IDRIS BIN JUSOH (BESUT) minta **MENTERI PERTANIAN DAN INDUSTRI MAKANAN** menyatakan langkah-langkah menangani ancaman berlakunya krisis bekalan makanan akibat dari kesan tiga P, iaitu pandemik COVID-19, perubahan iklim dan perang konflik di Ukraine.

JAWAPAN:

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) telah dan sedang melaksanakan beberapa intervensi berorientasikan perdagangan, pengeluar makanan dan pengguna yang bertujuan untuk mengukuhkan sekuriti bekalan makanan negara. Pelaksanaan intervensi ini dapat menyumbang kepada peningkatan daya tahan sistem makanan negara dalam mengharungi kesan pandemik COVID-19, perubahan iklim dan konflik geopolitik Rusia-Ukraine.

Antara intervensi jangka pendek yang kini dalam pelaksanaan adalah:

- (i). melaksanakan sekatan eksport ayam berkuat kuasa 1 Jun 2022 melibatkan bekalan ayam sebanyak 3.6 juta ekor sebulan;
- (ii). mewujudkan stokpail ikan melibatkan 1000 tan metrik oleh Lembaga Kemajuan Ikan Malaysia untuk menjamin kesinambungan bekalan ikan semasa musim tengkujuh dan perayaan;
- (iii). mempermudah proses pembayaran tuntutan subsidi harga ayam dengan membenarkan bayaran pendahuluan tuntutan;
- (iv). mewujudkan insurans tanaman iaitu Skim Takaful Agromakanan yang akan dilancarkan pada suku ketiga 2022 dengan memanfaatkan seramai 189,500 pesawah padi;
- (v). melaksanakan moratorium penguatkuasaan bagi pengambilan pekerja asing dalam industri penternakan ayam supaya produktiviti di tahap optimum; dan
- (vi). melaksanakan advokasi berteraskan kehilangan lepas tuai dan pembaziran makanan secara berterusan untuk mengoptimumkan sumber dalam sistem makanan.

Selain itu, beberapa intervensi langkah sederhana dan panjang juga telah dikenal pasti, antaranya usaha untuk:

- (i). mengkaji mekanisme untuk mengurangkan kos minyak sawit mentah kepada syarikat pengilangan makanan ternakan sebagai inisiatif untuk mengurangkan kos makanan ternakan;

- (ii). mewujudkan *One Stop Quarantine Centre* (OSQC) yang bertujuan untuk menambahbaik pemeriksaan biosekuriti negara melibatkan tujuh (7) perkhidmatan merentasi lapan (8) kementerian. OSQC akan meningkatkan kadar pemeriksaan sehingga 50% serta memberi jaminan dari aspek keselamatan makanan;
- (iii). memberi galakan insentif cukai bersasar kepada 1,000 syarikat yang terlibat dalam aktiviti pertanian melalui pelanjutan tempoh pelepasan cukai pendapatan daripada 10 tahun kepada 15 tahun;
- (iv). menggalakkan pertanian bandar melalui pemerkasaan Program Kebuniti Keluarga Malaysia; dan
- (v). memperkuuhkan industri input pertanian menerusi penggantian sumber protein yang diimport, pembangunan aditif makanan ternakan dan penambahbaikan formulasi makanan ternakan.

MAFI yakin intervensi yang sedang dan akan dilaksanakan ini dapat membantu menangani ketidaktentuan harga input pertanian, kekurangan pekerja asing serta impak perubahan iklim kepada aktiviti pertanian. Sekaligus, mengurangkan pengaruh krisis global terhadap sistem makanan negara serta menjamin kestabilan dan kemampuan sistem makanan negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

DARIPADA : TAN SRI HAJI IDRIS BIN JUSOH (BESUT)

SOALAN

PR-1452-T06468

TAN SRI HAJI IDRIS BIN JUSOH (BESUT) minta **MENTERI PERTANIAN DAN INDUSTRI MAKANAN** menyatakan status pelaksanaan Dasar Agromakanan Negara 2021-2030 khasnya dalam aspek pemodenan teknologi sektor agromakanan negara selaras dengan Revolusi Perindustrian 4.0 (4IR).

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa komited dalam memodenkan pertanian khususnya bagi pertanian pintar yang telah dikenal pasti dapat menjana semula pertumbuhan ekonomi negara. Komitmen ini telah dizahirkan dalam strategi jangka panjang MAFI iaitu Dasar Agromakanan Negara 2021-2030 (DAN 2.0).

DAN 2.0 telah menetapkan lima teras utama pelaksanaan dasar dan pemodenan sektor agromakanan dijadikan sebagai Teras 1: Mendukung Modenisasi Dan Pertanian Pintar. Teras ini disokong oleh empat strategi utama seperti berikut:

- Strategi 1: Mempergiat R&D&C&I sebagai Pemangkin Sektor Agromakanan;
- Strategi 2: Meningkatkan Penggunaan Teknologi dan Automasi dalam Sektor Agromakanan;
- Strategi 3: Mewujudkan ekosistem yang kondusif untuk R&D&C&I; dan
- Strategi 4: Mempergiat Program dan Aktiviti Inovasi untuk Menyokong Kemajuan Agroteknologi.

Sehingga kini, antara usaha yang telah diambil oleh jabatan dan agensi MAFI untuk menggalakkan peralihan ke pertanian moden selaras dengan Revolusi Perindustrian 4.0 adalah dengan inisiatif penaiktarafan kawasan Taman Kekal Pengeluaran Makanan (TKPM) oleh Jabatan Pertanian dengan peruntukan sebanyak RM232 juta di bawah RMKe-12 yang melibatkan penaiktarafan sistem pengairan pintar menggunakan *Internet of Things* (IoT), perolehan jentera, mesin dan aplikasi pertanian pintar. Penaiktarafan ini akan membantu pengusaha TKPM yang terdiri daripada golongan petani beralih kepada pertanian pintar.

Lembaga Pertubuhan Peladang (LPP) juga telah melaksanakan pelbagai program dalam usaha menggalakkan peladang dan usahawan peladang di luar bandar bergiat aktif dan beralih ke arah pertanian moden. Antaranya Program Ladang e-Satelit dengan peruntukan RM10 juta berbentuk geran padanan dengan nisbah 70 peratus oleh Kerajaan dan 30 peratus oleh peserta dengan had maksimum RM30,000 bagi menggalakkan petani menggunakan teknologi terkini seperti sistem pertanian pintar dan dron. Ia dimanfaatkan oleh seramai 394 petani di seluruh negara.

Pendigitalan pemasaran merupakan antara aspek pemodenan yang turut diberi tumpuan. MAFI melalui Lembaga Pemasaran Pertanian Persekutuan (FAMA) turut mensasarkan peralihan petani luar bandar daripada jualan hanya secara *offline* kepada kaedah jualan atas talian secara digital. Pada masa ini, MAFI mempunyai platform *Agrobazaar Online* (ABO) bagi memberi pendedahan kepada petani mengenai konsep e-dagang. Sehingga 30 Jun 2022, seramai 7,660 usahawan telah berdaftar di platform ABO dengan transaksi jualan berjumlah RM9.5 juta. Penyertaan petani/ usahawan luar bandar di platform ini akan disertakan dengan latihan melalui modul *Digital Zone Apprentice* (DZA).

Dengan pelaksanaan inisiatif-inisiatif ini, MAFI akan terus komited dalam meningkatkan adaptasi teknologi dalam usaha untuk mentransformasi sektor agromakanan negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : TAN SRI HAJI IDRIS BIN JUSOH
[BESUT]**

SOALAN

TAN SRI HAJI IDRIS BIN JUSOH minta **MENTERI KESIHATAN** menyatakan status terkini projek naik taraf wad kebergantungan tinggi (*High Dependency Ward*) Hospital Besut.

JAWAPAN

Tuan Yang di-Pertua,

1. Projek Pembinaan *High Dependency Ward* (HDW) di Hospital Besut telah diluluskan dengan kos keseluruhan sebanyak RM7.68 juta dan sedang dalam fasa pembinaan. Tempoh pelaksanaan projek adalah selama 24 bulan dan dijangka siap pada 7 Oktober 2022.
2. Sehingga 31 Mei 2022, status kemajuan fizikal projek adalah mendahului jadual iaitu sebanyak 70% sebenar berbanding 69% jadual. KKM akan sentiasa memantau rapi kemajuan projek bagi memastikan kerja-kerja dapat disiapkan mengikut jadual dengan kualiti yang baik.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TAN SRI HAJI IDRIS BIN JUSOH [BESUT]

SOALAN

Tan Sri Haji Idris bin Jusoh [Besut] minta **MENTERI ALAM SEKITAR DAN AIR** menyatakan status semasa pembinaan projek benteng pemecah ombak di muara Kuala Besut bagi mengurangkan impak hakisan di persisiran pantai di kawasan berkenaan.

JAWAPAN

Tuan Yang Di-Pertua,

1. Untuk makluman YB, proses perlantikan kontraktor penyiap bagi menyelesaikan baki kerja Projek Pemuliharaan Muara Sungai Besut, Besut Terengganu sedang dijalankan. Kos bagi menyiapkan baki projek tersebut telah melebihi siling asal dan pihak JPS telah memohon peruntukan tambahan. Pelantikan kontraktor penyiap ini dalam peringkat penilaian dan akan diteruskan sebaik sahaja permohonan diluluskan oleh pihak Unit Perancang Ekonomi, Jabatan Perdana Menteri.
2. Selain itu, JPS juga akan melaksanakan Projek Pengawalan Hakisan Pantai Muara Kuala Besut, Besut, Terengganu dengan kos projek sebanyak RM174,000.00. Projek ini telah bermula pada 18 Julai 2022 dan dijangka siap pada 10 Oktober 2022.
3. Bagi memastikan keselamatan para nelayan dari Jeti Bot Nelayan Kuala Besut, Jabatan Laut Malaysia (JLM) juga telah mengambil tindakan dengan memasang dua (2) unit boyo di kawasan pembinaan tersebut sebagai penanda arah alur pelayaran untuk ke laut pada tahun 2021.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. DATUK IGNATIUS DARELL LEIKING
[PENAMPANG]

SOALAN

DATUK IGNATIUS DARELL LEIKING [PENAMPANG] minta **PERDANA MENTERI** menyatakan berapa jumlah kes muflis yang direkodkan Jabatan Insolvensi dalam kalangan belia di Wilayah Sabah mengikut golongan umur serta jenis kategori kebankrapan.

JAWAPAN

**YB DATO SERI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, berdasarkan rekod Jabatan Insolvensi Malaysia, terdapat sejumlah 3,687 kes kebankrapan di Wilayah Sabah bermula dari tahun 2018 sehingga Mei 2022 dan bagi tahun 2022 setakat bulan Mei sahaja, terdapat sejumlah 220 kes kebankrapan yang direkodkan.

Bilangan belia yang bankrap di Wilayah Sabah mengikut pecahan umur dari tahun 2018 hingga bulan Mei 2022 ialah 11 kes bagi kategori umur 25 tahun dan ke bawah dan 706 kes bagi kategori umur 25 - 34 tahun. Bagi tahun 2022 sahaja sehingga bulan Mei, bilangan belia yang bankrap mengikut pecahan umur ialah 0 kes bagi kategori umur 25 tahun dan ke bawah dan 24 kes bagi kategori umur 25 - 34 tahun.

Walau bagaimanapun, merujuk kepada kategori kebankrapan bagi tahun 2022 setakat bulan Mei, terdapat 150 kes disebabkan oleh pinjaman peribadi, 33 kes disebabkan oleh pinjaman perniagaan, 7 kes disebabkan oleh sewa beli kenderaan, 11 kes disebabkan oleh cukai pendapatan, 4 kes disebabkan oleh kad kredit, 2 kes disebabkan oleh penjamin korporat, 6 kes disebabkan oleh penjamin perumahan dan 3 kes disebabkan oleh caruman KWSP manakala 4 kes disebabkan oleh keberhutangan lain (Petisyen Kebankrapan yang difailkan oleh pempetisyen tidak mengandungi kategori kebankrapan).

Sekian. Terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK IGNATIUS DARELL LEIKING
[PENAMPANG]

SOALAN

DATUK IGNATIUS DARELL LEIKING [PENAMPANG] minta **MENTERI KEWANGAN** menyatakan senarai jumlah kutipan cukai yang telah dikutip oleh Kerajaan Persekutuan daripada Sabah pada tahun 2013, 2014, 2015, 2016, 2017, 2018, 2019, 2020 dan 2021.

JAWAPAN

Tuan Yang di-Pertua,

Untuk makluman Ahli Yang Berhormat dan Dewan Yang Mulia ini, Perkara yang dibangkitkan oleh Yang Berhormat adalah salah satu perkara yang dirujuk dalam saman yang telah difaikkan ke mahkamah oleh 12 orang wakil rakyat dan Persatuan Undang-Undang Sabah (*Sabah Law Society*) terhadap Kerajaan Persekutuan dan Kerajaan Negeri Sabah.

Oleh yang demikian, tiada apa-apa ulasan atau jawapan boleh diberikan atas dasar *sub judice*.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BERTULIS
DARIPADA : Y.B. DATUK IGNATIUS DARELL LEIKING
[PENAMPANG]

SOALAN NO. 162

Datuk Ignatius Darell Leiking [Penampang] minta **KEMENTERIAN PERDAGANGAN ANTARABANGSA DAN INDUSTRI** menyatakan jumlah pelabur asing yang telah berpindah ke negara lain mengikut jenis perniagaan, negara yang terlibat serta jumlah peluang pekerjaan yang hilang.

JAWAPAN

Tuan Yang di-Pertua,

Persekutuan ekonomi global pasca COVID-19 adalah sangat mencabar dan telah memberi kesan terhadap ekonomi utama di seluruh dunia. Namun demikian, Kerajaan melalui Lembaga Pembangunan Pelaburan Malaysia (MIDA) komited untuk memastikan Malaysia terus kekal sebagai destinasi pelaburan terpilih.

Meskipun berhadapan dengan situasi pandemik COVID-19 yang mencabar, Malaysia kekal menjadi destinasi pelaburan terpilih terutamanya sektor automotif dan ekonomi digital. Sebagai contohnya, pengeluar automotif gergasi seperti **Porsche, Mercedes-Benz, Volkswagen, Stellantis** dan **Kia Motors** telah membuat keputusan untuk menjadikan Malaysia sebagai pusat pengedaran alat ganti, kilang pemasangan dan logistik serantau. Selain itu, Kerajaan juga berjaya menarik beberapa syarikat pusat data antarabangsa yang terkemuka untuk melabur di Malaysia.

Walaupun Malaysia terus mencatatkan prestasi pelaburan yang cemerlang serta keyakinan pelabur asing terhadap Malaysia juga kekal teguh, namun terdapat kritikan bahawa syarikat-syarikat multinasional, bank asing dan pelabur asing menutup operasi atau memindahkan operasi ke negara-negara lain pada tahun 2020 hingga 2021. Keputusan syarikat-syarikat ini untuk memindahkan sebahagian kecil daripada aktiviti mereka ke negara-negara jiran adalah satu keputusan komersial yang dipengaruhi oleh beberapa faktor termasuk strategi penstrukturran semula syarikat, saiz pasaran domestik yang luas, kos buruh yang rendah serta ketersediaan sumber mineral.

Seterusnya bagi memudahkan perdagangan dan pelaburan sewaktu pandemik, MIDA telah menujuhkan Pusat Sehenti untuk pelawat perniagaan jangka pendek atau *One Stop Centre* (OSC) untuk memasuki Malaysia. Walaupun OSC ini telah tamat beroperasi sejak 1 April 2022 dengan pembukaan sempadan Malaysia kepada pengunjung antarabangsa, OSC telah memudahcara sejumlah RM171.82 bilion

pelaburan berpotensi daripada kalangan pelawat perniagaan. Di antara syarikat-syarikat pelaburan yang difasilitasi adalah SK Nexilis, AT&S, Porsche, Insulet Corporation, Intel Corporation dan Kumpulan Bin Zayed dalam tempoh sempadan negara ditutup.

Malaysia juga telah menarik pelaburan tertinggi pada tahun 2021. Jumlah pelaburan yang telah diluluskan bagi tahun 2021 adalah sebanyak RM309.4 bilion dari 4,568 projek yang akan menyediakan peluang pekerjaan sebanyak 105,022. Sektor perkilangan menyumbang RM195.1 bilion kepada nilai pelaburan yang diluluskan, manakala sektor perkhidmatan sebanyak RM97.0 bilion dan sektor utama sebanyak RM17.3 bilion. Pelaburan langsung asing (FDI) mendominasi pelaburan yang diluluskan iaitu sebanyak RM208.6 bilion. Bagi tahun 2021, sumbangan FDI melonjak sebanyak 224.9 peratus berbanding kelulusan pada tahun 2020 iaitu sebanyak RM64.3 bilion.

Bagi suku pertama tahun 2022 pula, Malaysia telah berjaya menarik pelaburan sebanyak RM42.8 bilion, yang mana 65 peratus daripadanya atau RM27.8 bilion merangkumi pelaburan langsung asing. Pelaburan yang diluluskan ini dijangka akan menjana peluang pekerjaan sebanyak 24,906 di Malaysia.

Malaysia akan terus menjadi destinasi pelaburan yang terpilih di rantau Asia Pasifik dan ASEAN walaupun berhadapan dengan lanskap FDI global yang sentiasa mencabar dan persaingan yang sengit daripada rakan-rakan dagang yang lain. Kerajaan akan terus meningkatkan usaha bagi menarik pelaburan berkualiti tinggi dalam sektor perkilangan, demi memastikan ekosistem yang lengkap untuk menyokong pembangunan industri untuk menjana lebih banyak peluang pekerjaan dalam negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATUK IGNATIUS DARELL LEIKING
[PENAMPANG]**

SOALAN

Datuk Ignatius Darell Leiking [Penampang] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sejauh manakah fungsi Penyelaras Kepenggunaan Parlimen di setiap kawasan Parlimen dapat membantu menangani aktiviti penyeludupan dan manipulasi barang bersubsidi di Sabah.

JAWAPAN

Yang di-Pertua,

Antara fungsi Penyelaras Kepenggunaan Parlimen (PKP) ialah membantu pihak Kementerian untuk mengumpul maklumat mengenai isu-isu dan masalah kepenggunaan di kawasan Parlimen untuk dipanjangkan ke KPDNHEP Negeri/ Daerah agar tindakan penguatkuasaan boleh dilaksanakan. PKP juga diseur untuk menjalin hubungan dengan pemimpin masyarakat seperti Penghulu/ Ketua Kampung bagi mendapatkan isu-isu kepenggunaan semasa.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATUK IGNATIUS DARELL LEIKING
[PENAMPANG]**

SOALAN

Datuk Ignatius Darell Leiking [Penampang] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah Kerajaan sedar kekurangan minyak paket bersubsidi di Wilayah Sabah semakin kritikal dan membimbangkan sedangkan 8 daripada 10 daerah termiskin di Malaysia terletak di Sabah.

JAWAPAN:

Yang di-Pertua,

Untuk makluman, Kerajaan memandang serius kesalahan menjual minyak masak paket bersubsidi kepada pihak yang tidak sepatutnya terutama di negeri Sabah. Oleh sebab itu, Kementerian telah mengambil tindakan-tindakan pematuhan dan penguatkuasaan seperti pemeriksaan dan pengauditan di setiap peringkat rantaian pengedaran minyak masak melalui aktiviti semakan *Pre-Delivery Plan*, menjalankan pemeriksaan pematuhan permit ke atas peniaga-peniaga kecil dan pengusaha restoran, membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran, menetapkan had pembelian minyak masak polibeg sebanyak 3 paket, mempertingkatkan kerjasama dengan agensi-agensi penguatkuasaan di sempadan seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM), dan Estern Sabah Security Commad (ESSCOM) dan mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegerunan di kalangan peniaga.

Kerajaan juga menyeru agar pihak pengguna berperanan menjadi mata dan telinga ke atas sebarang salah laku dengan menyalurkan aduan rasmi mengikut saluran yang telah disediakan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : YB PUAN ISNARAISAH MUNIRAH
MAJILIS [KOTA BELUD]**

SOALAN:

Minta **PERDANA MENTERI** menyatakan status terkini cadangan mewujudkan NADMA di peringkat negeri dan daerah serta penambahan kakitangan dan kos yang terlibat.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Jemaah Menteri dalam mesyuaratnya pada 22 Disember 2021 telah bersetuju agar struktur Agensi Pengurusan Bencana Negara (NADMA) diteliti semula untuk diperkuuhkan peranannya sebagai agensi pengurusan bencana negara. Keperluan penambahbaikan pengurusan bencana negara ini turut dibentangkan oleh YAB Perdana Menteri dalam Mesyuarat Khas Penggal Keempat, Parlimen Keempat Dewan Rakyat pada 20 Januari 2022.
2. Dalam hal ini, sebagai manifestasi kepada saranan dan kehendak pucuk pimpinan tertinggi negara, NADMA telah menyediakan cadangan pengukuhan pengurusan bencana negara yang mengambil kira keperluan semasa dan masa hadapan, isu-isu yang ingin ditangani seterusnya penambahbaikan tadbir urus termasuk mewujudkan NADMA hingga ke peringkat Negeri.
3. Buat masa ini, cadangan tersebut antara lain turut melibatkan penstrukturkan organisasi dan pengukuhan dasar serta perundangan, telah melalui beberapa siri perbincangan bersama Jabatan Perdana Menteri dan agensi-agensi berkaitan. Aspek pertambahan perjawatan dan kos-kos yang mungkin terlibat sedang dalam peringkat rundingan dan penilaian dengan mengambil kira dasar-dasar semasa yang sedang berkuat kuasa.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : PUAN ISNARAISAH MUNIRAH MAJILIS
[KOTA BELUD]**

SOALAN

Puan Isnaraissah Munirah Majilis [Kota Belud] minta **MENTERI KOMUNIKASI DAN MULTIMEDIA** menyatakan:

- (a) kedua-dua kos melalui kaedah pemasangan jalur lebar luar bandar secara gentian optik dan kaedah pembinaan menara; dan
- (b) “*Pros and Cons*’ kedua-dua kaedah ini dan kesesuaian di kawasan luar bandar Sabah.

JAWAPAN

Tuan Yang di-Pertua,

Anggaran kos melalui kaedah pemasangan jalur lebar gentian optik adalah di antara RM2 ribu sehingga RM2.5 ribu bagi setiap sambungan (*port*). Manakala, anggaran kos bagi kaedah pembinaan menara adalah di antara RM1.5 juta sehingga RM2.4 juta bagi setiap menara. Namun begitu, kos sebenar bagi penyediaan infrastuktur gentian optik dan menara komunikasi dipengaruhi oleh faktor lokasi, perolehan tanah, permit dan kelulusan pihak berkuasa, jarak penyambungan rangkaian angkut balik dan bentuk serta halangan muka bumi. Oleh demikian, kos sebenar bagi setiap lokasi boleh berubah-ubah berdasarkan situasi.

Secara umumnya, Kementerian melalui Suruhanjaya Komunikasi dan Multimedia Malaysia (SKMM) menerusi Pelan JENDELA meluaskan capaian jalur lebar gentian optik dan membina menara komunikasi baharu

SOALAN NO: 166

di seluruh negara termasuk di kawasan luar bandar di Sabah. Antara ‘pros and cons’ bagi kaedah pemasangan secara gentian optik dan pembinaan menara adalah seperti berikut:

	Gentian optik	Pembinaan menara
PROS	<ul style="list-style-type: none">• Sambungan gentian optik dibina di sekeliling gentian optik yang menggunakan tenaga cahaya untuk menghantar data. Oleh itu data dapat disambung dengan lebih laju dan stabil.• Gentian optik dapat menyediakan kelajuan yang tinggi di mana gentian optik dapat menguruskan kesesakan rangkaian dan mengekalkan kelajuan tinggi sekaligus menjadikannya pilihan yang lebih baik.• Kelajuan sambungan gentian optik lebih stabil dan tidak merosot secara berkadar dengan jarak.	<ul style="list-style-type: none">• Perkhidmatan jalur lebar tanpa wayar secara teorinya boleh dipasang di mana-mana sahaja.• Kos pemasangan yang rendah serta perkhidmatan jalur lebar tanpa wayar boleh menyediakan sambungan internet di kawasan terpencil.• Proses pemasangan yang agak mudah dan dalam jangka masa yang singkat (bergantung kepada kecepatan proses permohonan permit).
CONS	<ul style="list-style-type: none">• Pemasangan kabel gentian optik di kawasan luar bandar akan mengambil masa atau bahkan boleh mencecah bertahun-tahun untuk mendapatkan sambungan yang berkualiti tinggi.• Kos pemasangan dan membaik pulih gentian optik agak tinggi.	<ul style="list-style-type: none">• Rangkaian sambungan jalur lebar tanpa wayar menggunakan medium /atau sumber yang dikongsi (frekuensi) menyebabkan ia boleh menjadi sesak jika ramai pengguna. Ini akan menyebabkan proses muat turun dan muat naik agak perlahan• Jarak liputan dibatas oleh frekuensi yang digunakan serta halangan pada muka bumi.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : PUAN ISNARAISAH MUNIRAH MAJILIS
[KOTA BELUD]**

SOALAN

Puan Isnaraissah Munirah Majilis [Kota Belud] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah Kementerian sedar terdapat sindiket dan penjaja haram yang menjual minyak masak paket bersubsidi secara berleluasa dan mengakibatkan masalah kekurangan bekalan semakin teruk di Sabah.

JAWAPAN:

Yang di-Pertua,

Untuk makluman, Kerajaan memandang serius kesalahan menjual minyak masak paket bersubsidi kepada pihak yang tidak sepatutnya terutama di negeri Sabah. Oleh sebab itu, Kementerian telah mengambil tindakan-tindakan pematuhan dan penguatkuasaan seperti pemeriksaan dan pengauditan di setiap peringkat rantaian pengedaran minyak masak melalui aktiviti semakan *Pre-Delivery Plan*, menjalankan pemeriksaan pematuhan permit ke atas peniaga-peniaga kecil dan pengusaha restoran, membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran, menetapkan had pembelian minyak masak polibeg sebanyak 3 paket, mempertingkatkan kerjasama dengan agensi-agensi penguatkuasaan di sempadan seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM), dan Estern Sabah Security Commad (ESSCOM) dan mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegerunan di kalangan peniaga.

Kerajaan juga menyeru agar pihak pengguna berperanan menjadi mata dan telinga ke atas sebarang salah laku dengan menyalurkan aduan rasmi mengikut saluran yang telah disediakan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : PUAN ISNARAISAH MUNIRAH MAJILIS
(KOTA BELUD)**

SOALAN

PUAN ISNARAISAH MUNIRAH MAJILIS (KOTA BELUD) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah usaha Kementerian bagi membantu penjaga/guru taska yang menerima gaji yang tidak sesuai dengan bebanan dan kos tanggungan hidup semasa dan sekiranya ini berterusan, dikhuatiri mental mereka terganggu dan memberikan kesan yang lebih besar kepada anak-anak di bawah jagaan mereka.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) menyambut baik ucapan Yang Amat Berhormat Perdana Menteri, Datuk Seri Ismail Sabri Yaakob pada 28 April 2022 sempena Hari Pekerja dengan pengumuman pelaksanaan kadar gaji minimum RM1,500. Penetapan gaji minimum ini selaras dengan peruntukan di bawah peruntukan Akta Majlis Perundingan Gaji Negara 2011 yang menetapkan keperluan mengkaji gaji minimum setiap dua (2) tahun.

TASKA yang berdaftar di bawah Jabatan Kebajikan Masyarakat (JKM) adalah TASKA swasta yang berentitikan perniagaan berdasarkan keuntungan dan memerlukan daya usaha kreatif di pihak pengusaha bagi memastikan perniagaan TASKA berkembang maju dan berdaya saing.

Bidang kuasa JKM adalah tertakluk kepada Akta TASKA 1984 iaitu untuk membuat pendaftaran, pemeriksaan dan penguatkuasaan ke atas TASKA dan perkara berkaitan dengannya demi menentukan kesejahteraan, keselamatan dan perkembangan menyeluruh kanak-kanak.

Bagi meringankan beban ibu bapa yang berpendapatan rendah dan menyediakan peluang kepada kanak-kanak untuk mendapat asuhan dan didikan awal yang lebih baik di TASKA, Kerajaan telah menyediakan Subsidi Yuran Pengasuhan kepada kanak-kanak yang layak. Bermula tahun 2016 hingga 2021, Kerajaan telah membelanjakan sebanyak RM18.4 juta yang memberi manfaat kepada 7,474 orang kanak-kanak.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : PUAN ISNARAISAH MUNIRAH BT
MAJILIS @ FAKHARUDY [KOTA BELUD]

SOALAN

PUAN ISNARAISAH MUNIRAH BT MAJILIS @ FAKHARUDY [KOTA BELUD] minta **MENTERI KEWANGAN** menyatakan adakah Kementerian akan meluluskan permohonan kenaikan elauan pembantu taska kemas yang ketika ini hanya RM500 sebulan oleh Kementerian Pembangunan Luar Bandar.

JAWAPAN

Tuan Yang di-Pertua,

Kementerian Kewangan (MOF) mengambil maklum mengenai keluhan warga kerja PPMS di Tabika/Taska KEMAS mengenai kadar Elaun Saguhati PPMS bernilai RM500 sebulan serta tekanan kos sara hidup semasa yang dihadapi. Untuk makluman, MOF telah menerima cadangan daripada Jabatan Kemajuan Masyarakat (KEMAS) agar kadar **Elaun Saguhati** bagi 11,419 **Pembantu Pemaju Masyarakat Sukarela (PPMS)** ini dinaikkan daripada RM500 kepada RM800 (iaitu kenaikan sebanyak RM300). Pada ketika ini, peruntukan yang disediakan bagi pembayaran elauan sebanyak RM500 sebulan kepada 11,419 PPMS adalah sebanyak RM68.5 juta.

Kenaikan kadar elauan sebanyak RM300 tersebut dianggarkan akan melibatkan tambahan implikasi kewangan RM41 juta komitmen Belanja Mengurus (OE) Kerajaan Persekutuan. Oleh yang demikian, cadangan kenaikan kadar Elaun Saguhati ini akan diteliti dengan mengambilkira komitmen kewangan sedia ada Kerajaan serta impaknya ke atas kedudukan kewangan Kerajaan.

Namun, Kerajaan juga sentiasa peka terhadap kebijakan serta kesejahteraan rakyatnya. Kerajaan sejak tahun 2012 telah melaksanakan pemberian bantuan tunai yang lebih bersasar kepada golongan yang memerlukan bagi meringankan kos sara hidup dan beban rakyat berpendapatan rendah. Pada tahun ini, melalui Bantuan Keluarga Malaysia (BKM), mereka yang berpendapatan rendah atau golongan B40 boleh mendapat sehingga maksimum RM2,600 termasuk Bantuan Tunai Tambahan seperti yang diumumkan oleh YAB Perdana Menteri pada 22 Jun 2022, dan sebahagian besar PPMS adalah layak untuk menerima manfaat BKM ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : DATO' JOHARI BIN ABDUL
(SUNGAI PETANI)**

SOALAN

PR-1452-T05959

DATO' JOHARI BIN ABDUL (SUNGAI PETANI) minta **MENTERI PERTANIAN DAN INDUSTRI MAKANAN** menyatakan apakah yang menghalang Kementerian membenarkan tanah-tanah terbiar milik Kerajaan Negeri atau Persekutuan diusahakan tanaman kontan agar masalah makanan negara dapat dikurangkan.

JAWAPAN

Tuan Yang di-Pertua,

Untuk makluman Ahli Yang Berhormat, tanah-tanah terbiar milik Kerajaan Negeri adalah di bawah bidang kuasa Kerajaan Negeri selaras dengan Seksyen 40 Kanun Tanah Negara (KTN) yang secara jelas memperuntukkan bahawa Pihak Berkuasa Negeri (PBN) mempunyai hak ke atas semua tanah yang termasuk di dalam sempadan negeri masing-masing. Sehubungan itu, sebarang pembangunan tanah-tanah terbiar milik Kerajaan Negeri adalah tertakluk di bawah bidang kuasa PBN masing-masing.

Bagi tanah-tanah milik Kerajaan Persekutuan, kebenaran untuk membangunkan tanah-tanah tersebut perlu mendapat kebenaran daripada Jabatan Ketua Pengarah Tanah dan Galian Persekutuan (JKPTG) dan persetujuan Kementerian/ Jabatan Pengguna (KJP).

Sejak 2007 sehingga 2020, seluas 10,367.86 hektar tanah terbiar telah dibangunkan di seluruh Semenanjung Malaysia, W.P Labuan, Sabah dan Sarawak melibatkan seramai 8,179 orang pengusaha dengan jumlah peruntukan sebanyak RM111.6 juta. Tanah-tanah tersebut telah dibangunkan dengan pelbagai jenis tanaman seperti buah-buahan, sayur-sayuran, padi dan kelapa dengan jumlah pengeluaran keseluruhan yang dicatatkan sebanyak 225,578.03 tan metrik dengan nilai pengeluaran berjumlah RM214.5 juta.

Usaha pembangunan tanah-tanah terbiar ini diteruskan oleh pihak Kementerian melalui Jabatan Pertanian di bawah RMKe-12 melalui Projek-Projek seperti Projek Pembangunan Tanaman Buah-Buahan Jangka Panjang, Projek Pembangunan Tanaman Buah-Buahan Jangka Pendek dan Projek Pembangunan Tanaman Sayuran.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' JOHARI BIN ABDUL
(SUNGAI PETANI)**

SOALAN

DATO' JOHARI BIN ABDUL (SUNGAI PETANI) minta **MENTERI TENAGA DAN SUMBER ASLI** menyatakan berapa luaskah hutan yang telah dicerobohi dan balak ditebang secara haram di seluruh negara dari tahun 2011 hingga 2021 dan nyatakan berapa tangkapan dibuat dan berapa yang telah dihadapkan ke mahkamah dan berapa yang telah dihukum.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Tenaga dan Sumber Asli (KeTSA) melalui Jabatan Perhutanan Semenanjung Malaysia dan Jabatan-jabatan Perhutanan Negeri, memandang serius isu pencerobohan dan pembalakan haram khususnya dalam kawasan Hutan Simpanan Kekal (HSK). Penjenayah yang melakukan kesalahan tersebut diambil tindakan di bawah Akta Perhutanan Negara 1984 [Akta 313] bagi Semenanjung Malaysia, melalui Ordinan Hutan 2015 (Bab 71) bagi Sarawak dan bagi Sabah pula tindakan diambil di bawah Enakmen Hutan 1968 (Sabah No. 2 of 1968). Perincian maklumat hutan yang telah diceroboh dan dibalak secara haram, jumlah tangkapan, jumlah yang dihadapkan ke mahkamah dan jumlah yang telah disabitkan bersalah dari tahun 2011 hingga tahun 2021 di seluruh negara adalah seperti berikut:

Keluasan HSK yang telah diceroboh dan dibalak secara haram (hektar)	Jumlah tangkapan pesalah (bilangan individu)	Jumlah pesalah yang dihadapkan ke mahkamah (bilangan individu)	Jumlah pesalah yang telah disabitkan bersalah (bilangan individu)
36,996.65	5,208	717	681

Sumber: Jabatan Perhutanan Semenanjung Malaysia, Jabatan Perhutanan Sabah dan Jabatan Hutan Sarawak

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATO' JOHARI BIN ABDUL [SUNGAI PETANI]

SOALAN

DATO' JOHARI BIN ABDUL [SUNGAI PETANI] minta **PERDANA MENTERI** menyatakan formula untuk melayakkan seseorang warganegara yang miskin untuk mendapat bantuan dan berdaftar dengan e-Kasih sudah tidak sesuai. Adakah Kementerian bercadang untuk mengkaji semula formula yang diguna pakai kini.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Yang Berhormat, Kerajaan akan mengemaskini Pendapatan Garis Kemiskinan (PGK) dalam tempoh Rancangan Malaysia Kedua Belas (RMKe-12), 2021-2025. Pengemaskinian ini adalah perlu bagi memastikan pengukuran kemiskinan bagi pembasmian kemiskinan memenuhi keperluan semasa.
2. Pada masa ini, Unit Perancang Ekonomi, Jabatan Perdana Menteri (EPU, JPM) sedang melaksanakan sesi libat urus berkaitan pengemaskinian PGK 2022 melalui Jawatankuasa Pemandu Dasar Menangani Kemiskinan dan Jawatankuasa Teknikal Pengukuran Kemiskinan. Jawatankuasa ini dianggotai oleh pelbagai kementerian dan agensi, ahli akademik, badan pemikir serta pertubuhan masyarakat civil termasuk Bank Dunia dan *United Nations Development Programme* (UNDP).
3. Untuk makluman Ahli Yang Berhormat, Jabatan Perangkaan Malaysia (DOSM) sedang giat melaksanakan Survei Pendapatan, Perbelanjaan Isi Rumah dan Perkhidmatan Asas (HIES & BA). Dapatan survei ini dijangka diterbitkan pada tahun 2023.
4. Hasil dapatan survei ini, Kerajaan akan mengemas kini Pendapatan Garis Kemiskinan (PGK) untuk mengukur kadar kemiskinan berdasarkan tren pendapatan dan pola perbelanjaan rakyat serta mengikut harga barang dan perkhidmatan semasa. Ini akan mengambil kira pendapatan dan perbelanjaan, corak perbelanjaan isi rumah kesan daripada pandemik COVID-19 serta kenaikan inflasi dan kos sara hidup. PGK 2022 baharu akan digunakan dalam mengukur kemiskinan dan sebagai panduan dalam penyampaian perkhidmatan Kerajaan kepada kumpulan sasar.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB DATO' JOHARI BIN ABDUL (SUNGAI PETANI)

SOALAN

DATO' JOHARI BIN ABDUL (SUNGAI PETANI) minta **MENTERI DALAM NEGERI** menyatakan terdapat kes jenayah yang berkaitan dengan dadah makin meningkat. Apakah usaha Kerajaan untuk menggunakan media Kerajaan seperti televisyen dan radio secara besar-besaran agar maklumat bahayanya dadah ini sampai ke akar umbi masyarakat termasuk ke sekolah-sekolah.

JAWAPAN

Tuan Yang Di Pertua,

Kementerian Dalam Negeri melalui Agensi Antidadah Kebangsaan (AADK) sentiasa memandang serius isu penyalahgunaan dan penagihan dadah serta giat melaksanakan pelbagai program pendidikan pencegahan dadah melalui lima jenis media iaitu media penyiaran, media cetak, media bersemuka, media luar dan media baharu. Seiring dengan peredaran semasa dan perkembangan teknologi, media baharu lebih banyak digunakan untuk menyebarkan mesej-mesej antidadah dengan memuat naik infografik menarik berkaitan maklumat dadah, video-video pendek bermesejkan moral dan nasihat bagi meningkatkan kesedaran awam dan perkhidmatan terkini yang disediakan oleh AADK.

Sehingga Jun 2022, akaun media sosial rasmi AADK telah mencatatkan pencapaian seperti berikut:

- i. akaun Facebook mencatatkan 28,747 muat naik dengan anggaran 8,114,438 pengunjung;
- ii. akaun Twitter mencatatkan 9,367 muat naik dengan anggaran 200,642 pengunjung;
- iii. laman sesawang mencatatkan 1,972 muat naik dengan anggaran 97,543 pengunjung; dan
- iv. akaun Youtube, mencatatkan 41 muat naik dengan anggaran 79,298 pengunjung.

AADK juga terus menggunakan media penyiaran melalui televisyen dan radio untuk memastikan maklumat antidadah yang tepat dapat disampaikan kepada setiap lapisan masyarakat. Sejak tahun 2021, AADK telah menyertai 35 slot televisyen dan radio di stesen penyiaran kerajaan dan swasta. Antara slot program televisyen dan radio yang disertai AADK ialah i) program Bual Bicara AWANI pagi di Astro AWANI; ii) Selamat Pagi Malaysia (SPM) di Radio Televisyen Malaysia (RTM); iii) Koresponden Bernama di Bernama TV; iv) Ruang Bicara di Bernama TV; dan v) Malaysia Petang di Bernama TV. Pada masa yang sama, penulisan berkaitan pendidikan pencegahan dadah telah diterbitkan sebanyak 131 kali di dalam surat khabar serta terdapat 2,163 papan tanda (*billboard*) antidadah di jalan raya sejak tahun 2021.

Di samping itu, AADK juga telah menerima permintaan khusus daripada pelbagai syarikat media untuk membuat liputan mengenai laporan berita atau informasi berkenaan AADK. Antara kandungan liputan mengenai AADK adalah seperti kepulihan klien AADK, rahsia kejayaan pengekalan kepulihan klien AADK, punca dan kesan penagihan dadah, aktiviti dan program klien yang mengikuti Program Rawatan dan Pemulihan dalam Komuniti serta Program Rawatan dan Pemulihan dalam Institusi. Secara keseluruhannya, AADK mendapat sebanyak 28 permintaan khusus daripada pelbagai syarikat media yang menyampaikan kandungan-kandungan positif berkenaan rawatan dan pemulihan dadah serta pencegahan dadah kepada klien.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' JOHARI BIN ABDUL
[SUNGAI PETANI]**

SOALAN

DATO' JOHARI BIN ABDUL [SUNGAI PETANI] minta **MENTERI KANAN PENDIDIKAN** menyatakan adakah Kementerian sedar pelajar-pelajar di semua peringkat di sekolah menengah tidak mempunyai semangat nasionalisme yang tinggi kerana tidak banyak aktiviti yang mendedahkan mereka ke situ. Apakah rancangan Kementerian untuk membetulkan keadaan ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha memberi fokus kepada usaha memupuk serta memperkuuh semangat nasionalisme dan jati diri sebagai warganegara Malaysia dalam kalangan murid melalui kurikulum serta kegiatan kokurikulum.

Dalam konteks kurikulum Sejarah, KPM memberi penekanan kepada kesepaduan aspek pengetahuan (kandungan Sejarah), kemahiran (Kemahiran Pemikiran Sejarah) dan nilai (Elemen Kewarganegaraan dan Nilai Sivik). Ini adalah untuk memberi pemahaman kepada murid dalam membina jati diri dan semangat cinta akan negara.

Penerapan Elemen Kewarganegaraan dan Nilai Sivik adalah bertujuan untuk membentuk warganegara yang mempunyai jati diri dan berkeperibadian Malaysia yang patriotik berlandaskan prinsip Rukun Negara serta berteraskan Perlembagaan Negara. Penerapan ini memberi penekanan kepada aspek amalan dan penghayatan dalam kalangan murid bagi membentuk dan melahirkan warganegara yang memahami hak, tanggungjawab serta peranannya kepada negara.

Untuk makluman Ahli Yang Berhormat, penghayatan Rukun Negara dalam kalangan murid diperkuuhkan lagi melalui aktiviti kokurikulum Kelab Rukun Negara (KRN). Antara objektif kelab KRN adalah untuk mendidik dan mempertingkat kesedaran murid tentang kepentingan Rukun Negara. Program atau aktiviti yang dilaksanakan seperti Program My Rukun Negara melibatkan semua ahli kelab di sekolah. Penglibatan murid dalam aktiviti kelab ini memberi peluang kepada murid untuk menghayati dan mengamalkan matlamat dan prinsip Rukun Negara serta dapat diperaktikkan sejak di bangku sekolah lagi. Sehingga kini, sebanyak 1,434 KRN telah ditubuhkan di sekolah menengah.

Selain KRN, KPM dengan kerjasama Jabatan Penerangan Malaysia telah menubuhkan Kelab Malaysiaku di 689 buah sekolah menengah. Penubuhan kelab ini adalah untuk melahirkan generasi muda yang mempunyai semangat nasionalisme dan cinta akan negara di samping berperanan untuk memberi pendedahan kepada murid berkaitan Sistem Demokrasi Berparlimen. Antara aktiviti yang dilaksanakan adalah:

- (i) amalan Demokrasi Berparlimen,
- (ii) Kembara Kelab Malaysiaku;
- (iii) Wacana Kemerdekaan;
- (iv) Kem Aspirasi Pelajar;
- (v) sketsa Rukun Negara serta ceramah; dan
- (vi) tayangan video-video berkaitan kemerdekaan.

Program yang dilaksanakan ini dapat mewujudkan ruang yang lebih luas bagi usaha mendidik dan membangunkan sahsiah murid serta memperkuuhkan semangat nasionalisme dalam kalangan mereka.

Terkini, KPM telah memperkenalkan konsep Sekolahku SEJAHTERA sebagai pemangkin pembentukan kemenjadian murid. Sekolahku SEJAHTERA merupakan satu konsep penerapan nilai murni dan amalan baik untuk diamalkan oleh murid di semua sekolah dan institusi pendidikan. Antara elemen SEJAHTERA yang menyokong semangat nasionalisme adalah empati, etika, jati diri, harmoni, eksplorasi dan rasional.

KPM yakin usaha yang dilaksanakan melalui kurikulum dan aktiviti kokurikulum ini akan dapat meningkatkan semangat nasionalisme dalam kalangan murid.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB PUAN JUNE LEOW HSIAD HUI (HULU SELANGOR)

SOALAN

PUAN JUNE LEOW HSIAD HUI [HULU SELANGOR] minta **MENTERI KANAN KERJA RAYA** menyatakan secara terperinci apakah prosedur serta garis masa untuk mewartakan larangan kenderaan berat pada waktu puncak di sesuatu kawasan tersebut dan apakah perkembangan terkini dalam mewartakan larangan itu di jalan FT 1208.

JAWAPAN

Tuan Yang Di-Pertua,

Untuk makluman Ahli Yang Berhormat, punca kuasa di bawah peruntukan undang-undang berkenaan pewartaan larangan kenderaan berat pada waktu puncak telah dinyatakan dalam seksyen 70 Akta Pengangkutan Jalan 1987 [Akta 333] iaitu kuasa menyekat penggunaan kenderaan-kenderaan pada jalan-jalan tertentu.

Berikut ialah prosedur dan garis masa pewartaan larangan kenderaan berat pada waktu puncak:

1. Permohonan JKR Negeri kepada Cawangan Senggara Fasiliti Jalan (CSFJ), Ibu Pejabat JKR Malaysia. Permohonan tersebut dikemukakan berserta justifikasi selepas mengambil kira nasihat daripada Majlis Keselamatan Jalan Raya Kebangsaan atau Jawatan Kuasa Penasihat Lalu Lintas Tempatan. Garis masa kemuka permohonan kepada CSFJ ialah 2 minggu selepas jawatan kuasa bersidang;
2. Lawatan ke lokasi oleh CSFJ untuk cerapan data koordinat dan peta jajaran. Garis masa lawatan ialah dalam tempoh 2 minggu selepas menerima permohonan JKR Negeri;
3. CSFJ memproses cerapan data koordinat dan peta jajaran. Garis masa pemprosesan ialah dalam tempoh 2 minggu selepas lawatan tapak;
4. CSFJ menyediakan draf warta. Garis masa penyediaan draf warta ialah dalam tempoh 2 minggu selepas menerima data cerapan dan peta jajaran;
5. CSFJ kemuka draf warta kepada Penasihat Undang-Undang (PUU), Kementerian Kerja Raya Malaysia (KKR) untuk semakan. Garis masa ialah 2 minggu selepas menerima draf warta daripada CSFJ;

6. PUU KKR kemuka draf warta kepada Jabatan Peguam Negara (AGC) untuk semakan. Garis masa semakan AGC ialah 2 minggu selepas menerima draf warta daripada PUU; serta
7. AGC kembalikan draf warta kepada PUU KKR untuk tandatangan Menteri Kanan Kerja Raya (MKKR) dan selanjutnya diwartakan. Garis masa untuk tandatangan dan warta ialah 2 minggu selepas PUU KKR menerima semula draf warta daripada AGC. Tandatangan MKKR terhadap warta berkenaan adalah tertakluk kepada keberadaan MKKR di pejabat.

Berhubung dengan perkembangan terkini warta larangan kenderaan berat pada waktu puncak di FT1208, draf warta berkenaan kini dalam tindakan PUU KKR untuk semakan selanjutnya.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : YB PUAN JUNE LEOW HSIAD HUI
(HULU SELANGOR)**

SOALAN :

Puan June Leow Hsiad Hui [Hulu Selangor] minta Menteri Perusahaan Perlادangan Dan Komoditi menyatakan secara terperinci apakah syarat kelulusan, prosedur, jumlah peruntukan tahunan yang diberi bagi permohonan jalan kebun/ladang dan mengapa masih banyak jalan ladang yang hanya wujud di dalam peta tetapi tidak pada tapak sebenar.

JAWAPAN:

Tuan Yang Di-Pertua,

Kementerian Perusahaan Perladangan dan Komoditi (KPPK) memberikan bantuan untuk membina Jalan Ladang Pekebun Kecil (JLPK) Persendirian kepada pekebun kecil persendirian komoditi di bawah Kementerian ini iaitu sawit, getah, lada, koko dan kenaf yang dilaksanakan di seluruh negara.

Bagi pekebun-pekebun kecil persendirian yang mempunyai keperluan untuk menyenggara dan membaikpulih jalan ladang, permohonan boleh dikemukakan kepada KPPK melalui agensi-agensi di peringkat negeri iaitu Lembaga Minyak Sawit Malaysia (MPOB), Lembaga Getah Malaysia (LGM), Lembaga Lada Malaysia (MPB), Lembaga Koko Malaysia (LKM) dan Lembaga Kenaf dan Tembakau Negara (LKTN).

Permohonan JLPK Persendirian yang meliputi skop kerja pembinaan baharu, senggara dan naik taraf jalan akan dipertimbangkan berdasarkan kriteria dan keutamaan berikut:

- (a) meliputi jalan ke kebun/ ladang milik persendirian pekebun-pekebun kecil persendirian yang diselia di bawah Agensi-agensi KPPK;
- (b) keutamaan kepada jalan ke ladang yang sedang diusahakan/ dimajukan oleh pekebun-pekebun kecil persendirian agar dapat menjadi rangkaian perhubungan yang bermanfaat kepada penduduk sekitarnya mengangkut input pertanian dan mengeluarkan hasil tanaman;
- (c) menjadi laluan utama mengangkut input pertanian dan mengeluarkan hasil tanaman yang digunakan oleh pekebun kecil persendirian dan orang ramai di kampung berhampiran;
- (d) jalan yang menghubungkan jalan besar/ jalan utama dengan jalan ladang/ pertanian/ pekebun kecil persendirian tidak terselia

sebagai laluan utama kenderaan bagi mengangkut input dan hasil pertanian; dan

- (e) keutamaan projek JLPK Persendirian adalah yang bernilai kurang RM500 ribu supaya pelaksanaan JLPK Persendirian dapat dibuat dengan segera serta siap sepenuhnya pada tahun semasa.

Di bawah Rancangan Malaysia Kesebelas (RMKe-11), projek JLPK Persendirian telah diluluskan peruntukan sebanyak RM64.8 juta yang melibatkan pelaksanaan 263 projek jalan ladang pekebun kecil persendirian dengan jarak 524 km. Projek ini diteruskan pelaksanaannya di bawah Rancangan Malaysia Kedua Belas (RMKe-12) dengan kelulusan peruntukan sebanyak RM9.0 juta bagi tahun 2021 dan RM8.4 juta bagi tahun 2022 yang masing-masing melibatkan jarak 56 km dan 69 km. Inventori JLPK ini telah dibuat bagi memastikan perancangan JLPK di masa hadapan dapat dilakukan dengan lebih baik.

Projek JLPK telah memberikan manfaat dan meninggalkan kesan yang besar kepada pekebun-pekebun kecil. Ia telah menyediakan kemudahan akses perhubungan kepada pekebun-pekebun kecil untuk mengangkut keluar-masuk input pertanian dan hasil. Projek ini akan dipohon di bawah Rancangan Malaysia Ketiga Belas (RMKe-13) memandangkan ianya adalah *touchpoint* kepada pekebun kecil dan sentiasa mempunyai keperluan di lapangan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : PUAN JUNE LEOW HSIAD HUI
(HULU SELANGOR)**

SOALAN

PUAN JUNE LEOW HSIAD HUI (HULU SELANGOR) minta **MENTERI PEMBANGUNAN WANITA, KELUARGA DAN MASYARAKAT** menyatakan secara terperinci senarai berserta objektif program atau aktiviti di bawah pakej Wanita Bangkit, jumlah peserta dari bandar dan luar bandar serta jumlah keseluruhan geran yang disalurkan kepada peserta sebagai inisiatif bimbingan permulaan perniagaan.

JAWAPAN

Tuan Yang di-Pertua,

Inisiatif Wanita Bangkit@KPWKM lahir daripada situasi pandemik COVID-19 yang telah memberi kesan kepada kehidupan masyarakat termasuk golongan wanita dalam pelbagai aspek terutamanya penjanaan pendapatan. Bagi menyokong usaha Keluarga Malaysia untuk membantu golongan sasar menikmati kehidupan yang lebih baik, Kementerian Pembangunan Wanita, Keluarga dan Masyarakat (KPWKM) melalui Jabatan Pembangunan Wanita (JPW) melaksanakan Inisiatif Wanita Bangkit@KPWKM. Objektif utama program ini adalah untuk memberi fokus kepada aktiviti penjanaan pendapatan melalui sektor formal iaitu dengan menghubungkan peluang pekerjaan kepada wanita dan juga dalam sektor informal iaitu mendekatkan wanita kepada platform dan peluang perniagaan atau keusahawanan.

Inisiatif ini akan memberi manfaat kepada wanita terutamanya daripada golongan suri rumah, B40, M40, wanita yang menjadi Ketua Isi Rumah termasuk ibu tunggal mahupun wanita yang ingin membantu keluarga mencari pendapatan yang lebih. Wanita Bangkit ini menjalankan kerjasama dengan pelbagai agensi dan syarikat yang menghubungkan serta menyediakan peluang kepada wanita untuk menjana pendapatan dan peluang pekerjaan.

Dalam konteks penjanaan pendapatan, inisiatif di bawah KPWKM ialah Program MyKasih Kapital yang merupakan insentif tambahan kerajaan dengan memberikan suntikan modal perniagaan berbentuk keusahawanan khusus kepada golongan wanita yang sedang bergelut dengan masalah kewangan bagi menjana semula ekonomi keluarga. Pemberian insentif ini adalah sebagai satu usaha menggalakkan kaum wanita berniaga terutamanya yang terlibat dalam bidang e-dagang atau *dropship* dan lain-lain perniagaan. Sejak April 2021 hingga 30 Jun 2022, sejumlah 10,300 peserta MyKasih Kapital telah berjaya mengikuti Kursus Keusahawanan dan telah menerima insentif yang melibatkan peruntukan sebanyak RM5.15 juta. Pecahan peserta mengikut negeri adalah disertakan seperti di Jadual 1 berikut:

Jadual 1: Bilangan Peserta Bagi Program MyKasih Kapital (April 2021 Sehingga Jun 2022)

BIL.	NEGERI	BIL. PESERTA
1.	Johor	1,255
2.	Kedah	516
3.	Kelantan	516
4.	Melaka	357
5.	Negeri Sembilan	401
6.	Pahang	579
7.	Perak	575
8.	Perlis	147
9.	Pulau Pinang	414
10.	Putrajaya	78
11.	Sabah	863
12.	Sarawak	779
13.	Selangor	1,821
14.	Terengganu	633
15.	WP Kuala Lumpur	1,366
JUMLAH PESERTA		10,300
NILAI GERAN (RM)		5,150,000.00

Sumber: Yayasan Kebajikan Negara

Di samping itu, KPWKM pada tahun 2021 turut bekerjasama dengan syarikat-syarikat seperti RichWorks Sdn. Bhd., HEYHO Sdn. Bhd., DSAB Holdings Sdn. Bhd., UniKL Resources Sdn. Bhd., Leong Hup International Berhad dan Syukor Dagang Sdn. Bhd. Syarikat-syarikat ini berperanan sebagai penyedia peluang-peluang pekerjaan dan keusahawanan bagi wanita untuk menjana pendapatan.

Merujuk kepada penyediaan peluang pekerjaan kepada wanita, KPWKM bekerjasama dengan PERKESO dalam menyediakan beberapa siri Karnival Kerjaya. Sejak 2021, seramai 506 wanita telah mendapat pekerjaan.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : PUAN JUNE LEOW HSIAD HUI
[HULU SELANGOR]**

SOALAN

YB PUAN JUNE LEOW HSIAD HUI [HULU SELANGOR] minta **MENTERI PERUMAHAN DAN KERAJAAN TEMPATAN** menyatakan secara terperinci apakah mekanisme Kementerian dalam mengawal harga rumah negara dan usaha terkini dalam mempermudahkan golongan belia untuk mendapatkan rumah pertama.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah mengadakan Mesyuarat Majlis Perumahan Mampu Milik Negara (MPMMN) Bilangan 1 Tahun 2022 yang dipengerusikan oleh YAB Perdana Menteri pada 10 Februari 2022. Isu harga rumah dan pemilikan perumahan telah dibincangkan dalam mesyuarat tersebut.

Untuk makluman Ahli Yang Berhomat juga, walaupun terdapat isu kenaikan kos dalam pembinaan perumahan, ini tidak akan menghalang Kerajaan untuk meneruskan sasaran di bawah Rancangan Malaysia ke-12 (RMKe-12), iaitu untuk menyediakan sebanyak 500,000 unit Rumah Mampu Milik (RMM). Kerajaan berpandangan usaha ini boleh dicapai dengan bantuan dan gandingan tenaga daripada semua pihak. Untuk merealisasikan hasrat ini, seperti yang diputuskan dalam mesyuarat MPMMN, Kerajaan Persekutuan akan memberi subsidi dan kerajaan negeri pula menyediakan tanah bagi pembangunan RMM. Pihak bank pula telah diminta untuk mempermudahkan pembiayaan bagi memastikan Projek Perumahan Rakyat (PPR) dan RMM dapat dijual atau dibeli dengan harga yang berpatutan.

Pada masa yang sama, KP KT sedang meneliti mekanisme pelaksanaan PPR yang baharu dari aspek reka bentuk, kemudahan dan fasiliti serta bahan-bahan binaan yang akan digunakan semasa pembinaan bagi memastikan pembinaannya lebih efisien dan *value for money* kepada Kerajaan. Di dalam meneliti perkara ini, KP KT dibantu oleh Panel Berkepakaran (*Panel of Experts*, POE) merangka strategi pendekatan aksesibiliti perumahan ideal yang praktikal dan mampu agar pembangunan perumahan dapat mengekalkan harga yang mampu milik.

Bagi meningkatkan aksesibiliti perumahan oleh rakyat, KP KT telah mengambil tindakan seperti berikut:

- (i) melaksanakan Program Pemilikan Kediaman atau *Home Ownership Programme* (HOPE) bagi melihat ekosistem keseluruhan perumahan menerusi empat (4) komponen utama iaitu penyediaan perumahan, pembiayaan, promosi dan polisi;
- (ii) di bawah HOPE, KPKT memperkenalkan Inisiatif Pembiayaan Perumahan Malaysia atau i-Biaya seperti Skim Rumah Pertamaku (SRP) di bawah Cagamas Berhad, Skim Jaminan Kredit Perumahan di bawah Syarikat Jaminan Kredit Perumahan Berhad (SJKP) dan Rent-to-Own (RTO) PR1MA dengan kerjasama institusi kewangan yang terpilih agar dapat menarik minat pembeli khususnya golongan B40 dan M40 serta golongan belia untuk memudahkan pembiayaan bagi memiliki rumah. Pencapaian skim-skim tersebut sehingga kini adalah seperti berikut:

a. **Skim Rumah Pertamaku (SRP) di bawah Cagamas Berhad**

SRP membolehkan individu berumur 40 tahun dan ke bawah memperoleh nisbah pinjaman kepada nilai (*loan-to-value*, LTV) sehingga 110% untuk membeli harta tanah yang berharga sehingga RM500,000. Ini membolehkan peminjam memiliki rumah tanpa perlu membayar wang muka. Skim ini dijamin oleh Cagamas Berhad yang akan menanggung sebarang kerugian untuk pembiayaan dengan nisbah LTV melebihi paras 90%.

b. **Skim Jaminan Kredit Perumahan oleh Syarikat Jaminan Kredit Perumahan Berhad (SJKP)**

Skim ini membolehkan individu memperoleh pembiayaan sehingga 100% daripada institusi kewangan kepada mereka yang berpendapatan dan tidak tetap untuk membeli harta tanah yang berharga sehingga RM300,000. SJKP ditawarkan menerusi bank – bank terpilih oleh Syarikat Jaminan Kredit Perumahan Berhad.

c. **Rent-to-Own (RTO) PR1MA**

Sehingga 15 Jun 2022, sebanyak lapan (8) unit telah ditempati bagi pembiayaan menerusi RTO ini dengan nilai keseluruhan pembiayaan berjumlah RM2,444,148.

- (iii) YAB Perdana Menteri semasa Majlis Pelancaran HOPE dan KJBR pada 15 Julai 2022 telah mengumumkan Inisiatif Pemilikan Perumahan Keluarga Malaysia atau i-MILIKI yang melibatkan pemberian insentif pengecualian duti setem ke atas surat cara pindah milik dan perjanjian pinjaman bagi pembelian rumah pertama secara peringkat atau tier harga rumah iaitu:
- a. bagi rumah berharga RM500,000 dan ke bawah, insentif pengecualian duti setem adalah sebanyak 100%; dan
 - b. bagi rumah berharga melebihi RM500,000 sehingga RM1 juta, insentif pengecualian sebanyak 50%.

Pengecualian ini adalah bagi perjanjian jual beli yang disempurnakan dalam tempoh mulai 1 Jun 2022 sehingga Disember 2023.

Sekian, terima kasih.

**PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

**PERTANYAAN : BUKAN LISAN
DARIPADA : PUAN JUNE LEOW HSIAD HUI
(HULU SELANGOR)**

Soalan

Puan June Leow Hsiad Hui [Hulu Selangor] minta MENTERI SUMBER MANUSIA menyatakan secara terperinci berapa jumlah keseluruhan pelajar tajaan Malaysia yang memilih untuk bekerja di luar negara dan berapa yang berjaya dipanggil balik untuk bekerja di dalam negara bagi tempoh 2015 – 2021.

JAWAPAN

Tuan Yang Di Pertua,

Kementerian Sumber Manusia melalui TalentCorp berkolaborasi bersama Jabatan Perkhidmatan Awam menerusi menerajui inisiatif *Scholarship Talent Attraction & Retention* (STAR) yang berperanan untuk memudahcara transisi graduan tajaan Kerajaan di bawah Jabatan Perkhidmatan Awam yang tidak berpeluang mendapat penempatan pekerjaan di sektor awam untuk menyempurnakan ikatan perjanjian biasiswa bersama syarikat dan pemain industri.

Matlamat pelaksanaan inisiatif ini kekal sebagai usaha Kerajaan mengoptimumkan pulangan pelaburan Kerajaan. Menerusi pelaksanaan *Scholarship Talent Attraction & Retention*, sejumlah 6,023 pelajar tajaan Jabatan Perkhidmatan Awam telah diluluskan untuk berkhidmat di bawah syarikat swasta tempatan pada 2015-2021 (31 Disember 2021). Graduan kini berkhidmat bersama syarikat terkemuka negara antaranya PETRONAS, Schlumberger, ExxonMobil, Shell, Khazanah Nasional Berhad, Ernst & Young.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BERTULIS
DARIPADA : Y.B. TUAN KARUPAIYA A/L MUTUSAMI
[PADANG SERAI]

SOALAN

Tuan Karupaiya A/l Mutusami [Padang Serai] minta **KEMENTERIAN PERDAGANGAN ANTARABANGSA DAN INDUSTRI** menyatakan apakah langkah yang diambil oleh Kerajaan dalam menyakinkan pelabur luar kembali melabur ke negara Malaysia.

JAWAPAN

Tuan Yang di-Pertua,

Malaysia merupakan antara destinasi pelaburan utama bagi pelabur-pelabur asing di rantau ini. Kedudukan Malaysia yang strategik serta persekitaran perniagaan yang kondusif menyebabkan Malaysia terus dilihat sebagai sebuah negara yang kompetitif dan berdaya saing.

Pelaburan yang diluluskan bagi tahun 2021 berjumlah RM309.4 bilion dengan pelaburan langsung asing mendominasi sebanyak RM208.6 bilion, sementara pelaburan langsung domestik menyumbang sebanyak RM100.8 bilion. Jumlah pelaburan langsung asing menyaksikan lonjakan sebanyak 224.4 peratus berbanding kelulusan pada tahun 2020 sebanyak RM64.3 bilion.

Momentum ini diteruskan ke suku pertama 2022. Bagi tempoh Januari – Mac 2022, Malaysia telah berjaya menarik sebanyak RM42.8 bilion pelaburan yang diluluskan; 65 peratus atau RM27.8 bilion daripada jumlah itu merangkumi pelaburan langsung asing manakala 35 peratus atau RM15.0 bilion adalah pelaburan domestik. Sektor perkilangan menyumbang RM30.0 bilion kepada nilai pelaburan yang diluluskan, sektor perkhidmatan sebanyak RM12.7 bilion manakala sektor utama sebanyak RM0.1 bilion.

Bagi memastikan Malaysia kekal sebagai hub untuk aktiviti R&D, Industri Teknologi Tinggi dan Perkhidmatan Global, beberapa strategi pelaburan telah dilaksanakan antaranya:

- i. mencari sumber peluang pelaburan baharu dengan memanfaatkan Perkembangan *Megatrends*, Industri 4.0, Ekonomi Digital dan E-Dagang;
- ii. menyasarkan produk dan perkhidmatan khusus yang akan merapatkan jurang dan memperlengkap rantaian nilai ekosistem industri; dan

- iii. memacu syarikat sedia ada di Malaysia untuk melabur semula ke atas produk dan aktiviti nilai tambah tinggi yang akan membawa Malaysia menjadi pemain global.

Sejak wabak COVID-19 melanda seluruh dunia pada tahun 2020, Lembaga Kemajuan Pelaburan Malaysia (MIDA) telah mempergiat usaha untuk menarik pelaburan seperti berikut:

- i. Penubuhan “*One Stop Centre & Business Travellers Centre*” di KLIA untuk membantu pengembara perniagaan jangka pendek membuat lawatan ke Malaysia. Inisiatif ini adalah bagi menarik pelaburan baharu selain memastikan syarikat asing sedia ada dapat mengekalkan operasi di Malaysia semasa tempoh Perintah Kawalan Pergerakan. MIDA telah memudahcara kemasukan pelabur dengan potensi nilai pelaburan sebanyak RM 171.82 bilion.
- ii. Pelaburan digital juga menjadi tumpuan MIDA melalui kerjasama dengan *Malaysia Digital Economy Corporation* (MDEC) dalam penubuhan *Digital Investment Office* (DIO) bertujuan untuk mengkoordinasi, memantau dan mempercepatkan pelaburan digital di negara ini. Peranan DIO adalah sejajar dengan Rangka Tindakan MyDIGITAL untuk menarik pelaburan bernilai RM70 bilion dalam sektor digital menjelang tahun 2025.
- iii. Penubuhan *Project Acceleration & Coordination Unit* (PACU) di MIDA yang menyediakan fasilitasi kepada semua projek yang diluluskan oleh *National Committee on Investment* (NCI). PACU memastikan agar pelaburan yang telah diluluskan dapat dilaksanakan dengan lebih pantas. Penggunaan platform digital seperti InvestMalaysia bagi mempercepatkan kelulusan daripada pelbagai agensi dan pelaksanaan projek pelaburan di Malaysia di setiap peringkat.

Kementerian Perdagangan Antarabangsa dan Industri akan terus memperkenal dan merangka dasar-dasar pelaburan baharu bagi

memastikan Malaysia kekal kompetitif sebagai destinasi pelaburan pilihan.

Dasar Pelaburan Baharu Negara yang berteraskan Aspirasi Pelaburan Nasional (NIA) akan mensasarkan pelaburan berkualiti tinggi dan berintensifkan modal dan teknologi dengan berteraskan elemen-elemen Alam Sekitar, Sosial dan Tadbir Urus (*Environmental, Social and Governance (ESG)*). Pembaharuan kepada agenda pelaburan ini melibatkan lima teras utama iaitu, meningkatkan *economic complexity*, mewujudkan pekerjaan bernilai tinggi, memperluaskan rantaian domestik, membangunkan kluster baharu dan sedia ada, serta mempertingkatkan keterangkuman. Lima sub-sektor utama yang telah dikenal pasti di bawah NIA adalah Elektrikal dan Elektronik; Ekonomi Digital; Farmaseutikal; Kimia; dan Aeroangkasa.

Malaysia akan terus menjadi destinasi pelaburan yang terpilih di rantau Asia Pasifik dan ASEAN walaupun berhadapan dengan lanskap pelaburan langsung asing (FDI) global yang sentiasa mencabar dan persaingan yang sengit daripada rakan-rakan dagang yang lain. Kerajaan akan terus meningkatkan usaha bagi menarik pelaburan bernilai dan berimpak tinggi dalam sektor perkilangan dan memastikan ekosistem yang lengkap untuk menyokong pembangunan industri perkilangan serta sektor perkhidmatan seperti hab utama, logistik, teknologi hijau dan tenaga yang boleh diperbaharui.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN KARUPAIYA A/L MUTUSAMI
(PADANG SERAI)**

SOALAN

TUAN KARUPAIYA A/L MUTUSAMI (PADANG SERAI) minta **MENTERI PERTANIAN DAN INDUSTRI MAKANAN** menyatakan mengenai krisis makanan yang melanda Malaysia. Adakah bekalan makanan domestik mencukupi untuk bertahan dalam memenuhi permintaan keseluruhan rakyat Malaysia.

JAWAPAN:

Tuan Yang di-Pertua,

Untuk makluman Ahli Yang Berhormat, sektor agromakanan negara berdepan dengan pelbagai risiko dan cabaran di peringkat global mahupun domestik, malah kesannya semakin dirasai sekarang. Isu penularan pandemik COVID-19, dasar-dasar perlindungan yang diamalkan oleh beberapa buah negara serta konflik geopolitik dunia seperti krisis Rusia-Ukraine telah memberi kesan terhadap rantaian bekalan makanan dunia dan Malaysia tidak terkecuali dari menerima tempiasnya.

Dalam hal ini, Kementerian Pertanian dan Industri Makanan (MAFI) bersama jabatan dan agensi di bawah MAFI sentiasa memantau status bekalan makanan negara secara mingguan melalui Jawatankuasa Teknikal Menangani Isu Sekuriti Bekalan Makanan Negara. Penumpuan buat masa ini diberikan kepada lapan (8) komoditi utama iaitu ayam, daging, susu segar, telur, ikan, buah, sayur dan beras.

Berdasarkan analisis bekalan bagi tempoh Januari hingga Jun 2022, bekalan makanan dalam negara adalah stabil dan kekal mencukupi bagi menampung keperluan domestik. Walaubagaimanapun, terdapat gangguan bekalan ayam khususnya pada bulan Mei 2022 yang disebabkan oleh beberapa faktor, antaranya:

1. kos pengeluaran meningkat disebabkan oleh kenaikan harga makanan ternakan;
2. penetapan harga kawalan di peringkat ladang (*ex-farm*) yang rendah;
3. kekurangan pekerja asing dan pekerja tempatan kurang berminat untuk menceburi industri ini;
4. modal kerja terjejas; dan
5. kesan cuaca dan penyakit.

Walau bagaimanapun gangguan ini hanya bersifat sementara dan Kerajaan telah dan sedang melaksanakan pelbagai intervensi bersifat jangka pendek, sederhana termasuk perancangan jangka masa panjang untuk menjamin sekuriti bekalan makanan negara.

Melangkah ke hadapan, MAFI akan terus melaksanakan strategi-strategi yang digariskan di bawah Dasar Agromakanan Negara 2021-2030 (DAN 2.0) dan Pelan Tindakan Dasar Sekuriti Makanan Negara 2021-2025 bagi mendepani cabaran-cabaran sekuriti bekalan makanan secara inklusif supaya sistem makanan negara lebih berdaya tahan dan mampan, terutama sebagai persediaan menangani apa jua krisis semasa atau yang mungkin berlaku pada masa akan datang.

Usaha-usaha untuk memperkuuh sekuriti makanan akan terus diperkasa menerusi kerjasama dan kolaborasi strategik semua pihak beraspirasikan “*Food Security Is A Shared Responsibility*” bagi meningkatkan tahap pengeluaran makanan negara dan memantapkan rantaian bekalan makanan demi kesejahteraan Keluarga Malaysia

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN KARUPAIYA A/L MUTUSAMI
[PADANG SERAI]**

SOALAN

TUAN KARUPAIYA A/L MUTUSAMI [PADANG SERAI] minta **PERDANA MENTERI** menyatakan mengenai jurang kekayaan yang dialami oleh rakyat Malaysia semasa pasca pandemik.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Yang Berhormat, jurang kekayaan boleh diukur antaranya melalui pendapatan dan simpanan. Pendapatan dan simpanan adalah dinamik tertakluk kepada keadaan sosioekonomi. Pandemik COVID-19 memberi kesan kepada pendapatan dan simpanan terutamanya kepada kumpulan isi rumah B40 dan M40. Berdasarkan anggaran Jabatan Perangkaan Malaysia (DOSM), pendapatan purata kasar bulanan isi rumah peringkat nasional telah menurun sebanyak 10.3% daripada RM7,901 pada tahun 2019 kepada RM7,089 pada tahun 2020. Sebanyak 20.0% atau kira-kira 600,000 isi rumah daripada kumpulan isi rumah M40 yang telah beralih kepada had pendapatan di bawah kumpulan B40.
2. Penurunan purata pendapatan isi rumah ini memberi kesan kepada isi rumah B40 dan M40. Ini dapat dilihat melalui agihan pendapatan di antara kumpulan pendapatan T20, M40 dan B40. Bagi B40, agihan pendapatan telah menurun daripada 16% pada tahun 2019 kepada 15.9% pada tahun 2020. Agihan pendapatan M40 juga menurun daripada 37.2% kepada 36.9% manakala agihan pendapatan T20 pula meningkat daripada 46.8% kepada 47.2% dalam tempoh yang sama.
3. Bagi pengukuran kekayaan melalui simpanan, antara data proksi yang boleh digunakan dalam menilai jurang kekayaan adalah simpanan pencarum dalam Kumpulan Wang Simpanan Pekerja (KWSP). Berdasarkan laporan *Social Protection Insight* Jilid 5 2021 yang diterbitkan oleh KWSP, 20% pencarum teratas menyumbang kepada 77% daripada jumlah aset keseluruhan KWSP. Manakala, 80% pencarum lain hanya menyumbang kepada 23% aset tersebut. Data ini menunjukkan terdapat jurang kekayaan berdasarkan simpanan bagi pekerja yang mencarum di KWSP pada tahun 2020.

4. Secara keseluruhan, jurang kekayaan dapat diukur menggunakan pekali Gini untuk mengukur ketaksamarataan pendapatan antara isi rumah. Pekali Gini telah meningkat dari 0.407 pada tahun 2019 kepada 0.411 pada tahun 2020. Ini menunjukkan ketaksamarataan pendapatan isi rumah semakin melebar. Peningkatan pekali Gini antaranya disebabkan oleh penurunan pendapatan dan agihan pendapatan bagi kumpulan isi rumah B40 dan sebahagian dari isi rumah M40 dibandingkan dengan kumpulan isi rumah T20.
5. Selain daripada itu, jurang kekayaan juga boleh diukur melalui pencapaian keluaran dalam negeri kasar (KDNK) per kapita mengikut wilayah. KDNK per kapita nasional meningkat kepada RM47,324 pada tahun 2021 berbanding RM43,518 pada tahun 2020. Sebagai contoh, KDNK per kapita bagi Wilayah Tengah (Kuala Lumpur, Selangor, Melaka dan Negeri Sembilan) meningkat daripada RM63,080 pada tahun 2020 kepada RM66,198 pada tahun 2021. Manakala, KDNK per kapita bagi Wilayah Sabah (Labuan dan Sabah) juga meningkat daripada RM23,085 kepada RM27,981 dalam tempoh yang sama. Peningkatan tersebut menunjukkan bahawa jurang antara Wilayah Tengah dengan Wilayah Sabah berjaya dirapatkan daripada 1:2.7 pada tahun 2020 kepada 1:2.4 pada tahun 2021. Ini disumbangkan oleh peningkatan aktiviti sosioekonomi susulan pembukaan sektor ekonomi dan sosial serta sempadan antarabangsa menuju ke arah peralihan dari fasa pandemik ke endemik.
6. Pada tahun ini, DOSM sedang giat melaksanakan Survei Pendapatan, Perbelanjaan Isi Rumah dan Kemudahan Asas (HIES & BA) 2022 yang mengambil kira pendapatan dan perbelanjaan isi rumah termasuk kesan pandemik COVID-19 bagi tempoh 12 bulan di seluruh Malaysia. Dapatan mengenai survei ini termasuk statistik berkaitan jurang pendapatan terkini peringkat nasional, negeri dan daerah dijangka diterbitkan pada tahun 2023.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN KARUPAIYA A/L MUTUSAMI
[PADANG SERAI]**

SOALAN

YB TUAN KARUPAIYA A/L MUTUSAMI [PADANG SERAI] minta **MENTERI PERUMAHAN DAN KERAJAAN TEMPATAN** menyatakan apakah prosedur yang diikuti oleh Kementerian dalam memastikan infrastruktur dan kemudahan taman perumahan meningkat mengikut perkembangan populasi kawasan setempat.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui PLANMalaysia (Jabatan Perancangan Bandar dan Desa) mengambil pendekatan yang serius terhadap kepentingan untuk merancang dan membangunkan perumahan secara lebih teratur bagi mencapai matlamat fizikal, sosial, ekonomi dan alam sekitar. Sehubungan itu, pembangunan perumahan telah diberi penekanan di dalam beberapa dasar pembangunan di peringkat negara, khususnya melalui **Rancangan Fizikal Negara Keempat (RFN Ke-4), Dasar Perbandaran Negara (DPN) dan Dasar Perumahan Negara (DRN)**.

Selain itu, perkara berkaitan dengan infrastruktur dan kemudahan di sesebuah taman perumahan telah diambil kira dalam penyediaan **Garis Panduan Perancangan (GPP) Perumahan PLANMalaysia yang diterbitkan pada tahun 2016**. GPP ini bertujuan untuk memandu dan memudah cara pihak pemaju dalam membangunkan kawasan taman perumahan dan mengambil kira penyediaan kemudahan awam dan infrastruktur yang diperlukan. Garis panduan ini juga telah menggariskan perkara-perkara berkaitan dengan **perancangan sistem jalan raya di kawasan perumahan, penyediaan kemudahan masyarakat, penyediaan kemudahan infrastruktur dan juga kemudahan utiliti serta penyediaan kawasan lapang rekreasi**.

Penyediaan kemudahan masyarakat seperti **kemudahan pendidikan, kesihatan, keselamatan dan pusat-pusat komuniti** hendaklah disediakan dengan **keluasan tertentu berpandukan kepada piawaian tadahan penduduk sesebuah kawasan perumahan**. Bagi memperincikan lagi penyediaan kemudahan masyarakat tersebut, PLANMalaysia juga telah menyediakan satu **Garis Panduan Perancangan Kemudahan Masyarakat (Semakan Semula, Tahun 2022)** dan ianya boleh dijadikan panduan bersama dalam membangunkan sesebuah kawasan perumahan.

Selain itu, keperluan penyediaan kemudahan infrastruktur dan utiliti seperti **tapak pencawang elektrik, loji pengolahan kumbahan, kolam takungan dan laluan kemudahan utiliti** turut digariskan di dalam GPP Perumahan mengikut standard dan keperluan yang telah ditetapkan oleh agensi yang berkaitan. Sebagai contoh, **penyediaan pencawang masuk utama (PMU), pencawang pembahagian utama (PPU), stesen suis utama (SSU) dan pencawang elektrik (PE)** adalah merujuk kepada piawaian reka bentuk yang disyaratkan oleh pihak Tenaga Nasional Berhad (TNB).

Penyediaan keperluan kemudahan lain seperti kawasan lapang dan rekreasi juga turut digariskan di dalam GPP Perumahan yang perlu diambil kira dalam sesuatu pembangunan kawasan perumahan. PLANMalaysia juga telah mengambil inisiatif dengan menerbitkan **Garis Panduan Perancangan Kawasan Lapang (Semakan Semula, Tahun 2021)** bagi memperincikan lagi keperluan kawasan lapang dan ianya boleh dirujuk bersama dalam memastikan sesebuah kawasan perumahan mempunyai persekitaran berkualiti dan mampan serta **mengambil kira faktor populasi (tadahan penduduk) mengikut kategori-kategori kawasan lapang** yang perlu disediakan. Sebagai contoh, bagi sesebuah kawasan perumahan yang mempunyai **500 hingga 2,000 orang penduduk**, perlu disediakan **satu taman / laman permainan bagi kemudahan penduduk setempat**.

Oleh yang demikian, dalam memastikan sesebuah kawasan perumahan disediakan dengan segala kemudahan dan infrastruktur lengkap serta selari dengan faktor populasi penduduk setempat, **pematuhan kepada prosedur garis panduan perancangan ini adalah penting bagi memastikan pembangunan perumahan menepati matlamat, prinsip dan piawaian perancangan yang telah ditetapkan**. Penyediaan infrastruktur dan kemudahan yang digariskan di dalam GPP Perumahan dan GPP lain yang berkaitan telah mengambil kira perkembangan populasi kawasan setempat dalam memastikan kesejahteraan penduduk ke arah mewujudkan sebuah bandar yang mampan, berdaya tahan dan berdaya huni (liveable city).

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN KARUPAIYA A/L MUTUSAMI
[PADANG SERAI]

SOALAN

TUAN KARUPAIYA A/L MUTUSAMI [PADANG SERAI] minta **PERDANA MENTERI** menyatakan pendirian kerajaan terhadap dakwaan rasuah oleh Ultra Kirana Sdn. Bhd. kepada beberapa ahli politik termasuk yang memegang jawatan dalam kabinet Kerajaan sekarang.

JAWAPAN

YB DATO SERI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)

Tuan Yang di-Pertua,

Untuk makluman Yang Berhormat, Suruhanjaya Pencegahan Rasuah Malaysia (SPRM) telah menerima beberapa aduan terhadap individu-individu terlibat yang tersenarai dalam satu lejar seperti dikemukakan di mahkamah baru-baru ini.

Siasatan sedang dijalankan mengikut bidang kuasa yang diperuntukan di bawah Akta Suruhanjaya Pencegahan Rasuah Malaysia (ASPRM) 2009 (Akta 694).

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB PUAN KASTHURIRAANI A/P PATTO (BATU KAWAN)

SOALAN

PUAN KASTHURIRAANI A/P PATTO (BATU KAWAN) minta **MENTERI DALAM NEGERI** menyatakan apakah status pengagihan RM13 juta yang telah diumumkan oleh Menteri Kewangan dalam Belanjawan 2022 tahun lepas bagi Unit D11 di Bukit Aman serta apakah tahap perlindungan bagi kanak-kanak di alam maya (online) daripada sindiket pemangsa seksual kanak-kanak dan setakat manakah pelaburan Kerajaan dari segi kepakaran, sumber manusia serta teknologi yang digunakan oleh Queensland Police Services di Australia di atas ‘tip-off’ mereka sebelum ini dalam penangkapan Richard Huckle dan Alladin Lanim. Nyatakan peruntukan Kerajaan yang dilaburkan dalam sektor ini dan apakah langkah jangka masa pendek dan panjang dalam membendung jenayah seksual kanak-kanak di alam maya.

JAWAPAN

Tuan Yang Di Pertua,

Peruntukan yang diluluskan oleh Kementerian Kewangan di dalam Memperkasakan Bahagian Siasatan Seksual, Wanita dan Kanak-Kanak (D11), Jabatan Siasatan Jenayah (JSJ), Polis Diraja Malaysia berjumlah RM13 juta.

Pewujudan 100 perjawatan

Pada 18 Mei 2022 Jabatan Perkhidmatan Awam (JPA) menerusi Mesyuarat Jawatankuasa Kerja Pembangunan Organisasi (JKKPO) Bilangan 10 Tahun 2022 telah mempertimbangkan permohonan KDN dan bersetuju memperakukan 100 perjawatan seperti yang dimohon. Kementerian Kewangan Malaysia (MOF) melalui surat rujukan MOF.NBO.600-9/13/55 JLD.7 (23) bertarikh 3 Jun 2022 telah bersetuju memperakukan pindaan waran perjawatan bagi Cadangan Pengukuhan Cawangan Siasatan Seksual, Wanita dan Kanak-Kanak (D11), Jabatan Siasatan Jenayah, Polis Diraja Malaysia, Kementerian Dalam Negeri berkuat kuasa mulai 1 Jun 2022.

Perolehan peralatan dan aset

Perolehan peralatan dan aset merangkumi perolehan kenderaan; peralatan dan kelengkapan pejabat; dan alat rakaman percakapan serta patung anatomi adalah dalam tindakan penyediaan spesifikasi dan perolehan oleh PDRM. Perolehan ini melibatkan 14 kontinjen di seluruh negara.

Kempen kesedaran

Bagi membendung jenayah seksual kanak-kanak di alam maya, PDRM telah merancang sebanyak 129 program kempen kesedaran sepanjang tahun 2022. Sebanyak 37 program kempen kesedaran kanak-kanak telah dijalankan mulai Mac 2022 sehingga 29 Jun 2022 di 12 buah negeri iaitu

Perlis, Kedah, Pulau Pinang, Perak, Selangor, Kuala Lumpur, Negeri Sembilan, Johor, Terengganu, Kelantan, Sarawak dan Sabah. Baki 92 program akan dijalankan setiap bulan dan dijangka selesai pada bulan Oktober 2022.

Tuan Yang Di Pertua,

Antara langkah-langkah yang diambil bagi perlindungan kanak-kanak di alam maya atau secara *online*, unit MICAC (*Malaysian Internet Crimes Against Children*) diperluaskan di semua peringkat kontinjen bagi membanteras jenayah seksual terhadap kanak-kanak di alam maya.

MICAC adalah unit yang mengendalikan kes-kes eksplotasi seksual online khususnya pornografi kanak-kanak secara atas talian. Kebanyakan maklumat ini disalurkan melalui ICACCOPS (*Internet Crime Against Children- Child Online Protective Services*), NCMEC (*Cybertipline Report*), Interpol – NCECC Report (*National Child Exploitation Coordination Centre*) dan beberapa agensi lain termasuk Suruhanjaya Komunikasi dan Multimedia Malaysia (SKMM), Jabatan Kebajikan Masyarakat (JKM), Kementerian Pembangunan Wanita, Keluarga dan Masyarakat (KPWKM) dan Bank Negara Malaysia (BNM).

Di samping itu, kempen dan program kesedaran kepada ibu bapa, kanak-kanak dan masyarakat mengenai tanggungjawab masing-masing untuk menentukan keselamatan kanak-kanak di alam maya masih dilaksanakan di semua peringkat kontinjen oleh PDRM.

Kementerian sangat serius di dalam usaha membanteras dan menangani jenayah seksual terhadap kanak-kanak di media sosial. Kerjasama yang erat dari segi perkongsian maklumat dengan agensi di peringkat antarabangsa seperti Interpol, *Australian Federal Police*, *Britain's National Crime Agency* dan di dalam negara antaranya Kementerian Komunikasi dan Multimedia Malaysia (K-KOMM), Kementerian Pelajaran Malaysia (KPM), Kementerian Pembangunan Wanita, Keluarga dan Masyarakat (KPWKM), Suruhanjaya Komunikasi dan Multimedia Malaysia (SKMM), Jabatan Kebajikan Masyarakat (JKM), dan Bank Negara Malaysia (BNM)

SOALAN : 185

merupakan strategi berterusan PDRM berkaitan isu ini.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : PUAN KASTHURIRAANI A/P PATTO
[BATU KAWAN]**

SOALAN

PUAN KASTHURIRAANI A/P PATTO minta **MENTERI KESIHATAN** menyatakan bilangan graduan doktor dan jururawat di Malaysia dari tahun 2015 sehingga kini, adakah wujud kekurangan tenaga kerja doktor tetap, doktor kontrak serta jururawat dan mengapa sebuah hospital Kerajaan di Batu Kawan tidak dipertimbangkan untuk dibina walaupun wujud tawaran dari Perbadanan Pembangunan Pulau Pinang atau Penang Development Corporation untuk membina sebuah hospital di Batu Kawan.

JAWAPAN

Tuan Yang di-Pertua,

1. Bagi tempoh di antara tahun 2009 hingga 2015, keluaran graduan perubatan hanya sekitar 3,000 setahun, tetapi bermula tahun 2016, jumlah keluaran graduan perubatan adalah antara 5,000 hingga 6,000 orang setiap tahun.

2. Perincian bilangan graduan perubatan dari tahun 2015 hingga tahun 2021 adalah seperti berikut:

- | | | |
|------------------|---|-------------|
| (i) tahun 2015 | : | 3,604 orang |
| (ii) tahun 2016 | : | 5,988 orang |
| (iii) tahun 2017 | : | 5,956 orang |

SOALAN NO. 186

(iv) tahun 2018	:	5,938 orang
(v) tahun 2019	:	6,223 orang
(vi) tahun 2020	:	3,919 orang
(vii) tahun 2021	:	4,698 orang

3. Bilangan graduan kejururawatan daripada Institut Latihan Kementerian Kesihatan Malaysia (ILKKM) yang lulus peperiksaan ILKKM dan Lembaga Jururawat Malaysia (LJM) dari tahun 2015 hingga Jun 2022 adalah seperti berikut:

(i) tahun 2015	:	2,689 orang
(ii) tahun 2016	:	2,475 orang
(iii) tahun 2017	:	2,182 orang
(iv) tahun 2018	:	2,118 orang
(v) tahun 2019	:	1,045 orang
(vi) tahun 2020	:	1,280 orang
(vii) tahun 2021	:	839 orang
(viii) tahun 2022 (sehingga Jun)	:	408 orang

4. Berdasarkan rekod KKM, hingga 31 Mac 2022, jumlah Pegawai Perubatan adalah seramai 59,348 orang iaitu:

(a) 32,106 orang pegawai lantikan tetap yang merangkumi:

- (i) 25,711 orang Pegawai Perubatan lantikan tetap; dan
- (ii) 6,395 orang Pakar Perubatan lantikan tetap.

(b) 27,242 orang pegawai lantikan kontrak yang merangkumi:

- (i) 27,218 orang pegawai Perubatan lantikan kontrak; dan
- (ii) 24 orang Pakar Perubatan lantikan kontrak.

5. Hingga 31 Mac 2022, seramai 69,575 jururawat yang berkhidmat di KKM merangkumi 66,379 jururawat lantikan tetap dan 3,196 jururawat lantikan kontrak.

6. Nisbah doktor perubatan kepada penduduk pada tahun 2011,

adalah 1 doktor perubatan kepada 791 orang penduduk. Manakala pada tahun 2020, nisbahnya adalah 1:441 . Ini jelas menunjukkan jumlah keseluruhan doktor perubatan di seluruh negara semakin meningkat dari tahun ke tahun daripada 36,607 doktor pada tahun 2011 kepada 73,996 doktor pada tahun 2020.

7. Selain itu, bilangan graduan perubatan juga telah meningkat dengan ketara sejak tahun 2008. Pada tahun 2012, bilangan graduan perubatan yang dilantik untuk menjalani latihan siswazah ialah seramai 3,743 orang, manakala pada tahun 2020 pula adalah seramai 5,113 orang. Bagi meningkatkan bilangan doktor negara ini, Kerajaan juga telah memperkenalkan pelbagai insentif bagi menarik minat doktor dan pakar perubatan untuk terus berkhidmat dengan kerajaan serta pengambilan doktor pakar swasta berkhidmat secara sessional dan pengambilan doktor pakar perubatan luar negara secara kontrak.

8. Nisbah jururawat kepada penduduk pada tahun 2011 adalah 1 jururawat kepada 387 orang penduduk. Manakala pada tahun 2020, nisbahnya adalah 1:297. Ini jelas menunjukkan jumlah keseluruhan jururawat di seluruh negara semakin meningkat dari tahun ke tahun daripada 74,788 orang pada tahun 2011 kepada 109, 921 orang pada tahun 2020.

9. Selain itu, KKM juga melaksanakan kerjasama awam swasta melalui penyumberluaran perkhidmatan perubatan pesakit dan dengan melibatkan kerjasama di antara KKM dan agensi selain KKM terutama melibatkan kepakaran dalam bidang pembedahan.

10. KKM telah mengkaji keperluan perkhidmatan perubatan dan kesihatan di kawasan Batu Kawan, Pulau Pinang. Berdasarkan analisa KKM, keperluan perkhidmatan perubatan penduduk di kawasan Batu Kawan masih lagi mampu ditampung oleh tiga (3) buah hospital sedia ada iaitu Hospital Sungai Bakap, Hospital Bukit Mertajam dan Hospital Seberang Jaya. Ketiga-tiga hospital ini juga diterajui kepakarannya oleh Hospital Seberang Jaya.

11. Selain itu, perkhidmatan kesihatan juga disediakan melalui

SOALAN NO. 186

sembilan belas (19) klinik kerajaan yang terdiri daripada empat (4) klinik kesihatan, sebuah (1) klinik ibu dan anak, sebelas (11) klinik desa serta tiga (3) klinik komuniti.

12. Walau bagaimanapun, KKM sedia maklum bahawa kawasan tersebut sedang pesat membangun dengan pertambahan kawasan perumahan dan pusat komersial. Justeru, KKM menyambut baik saranan pihak Perbadanan Pembangunan Pulau Pinang (PDC) untuk meneruskan hasratnya dalam perancangan penyediaan perkhidmatan kesihatan bersama sektor swasta.

Sekian terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : PUAN KASTHURIRAANI A/P PATTO
(BATU KAWAN)**

SOALAN

PUAN KASTHURIRAANI A/P PATTO (BATU KAWAN) minta **MENTERI DALAM NEGERI** menyatakan senarai balai polis dan Pusat Tahanan Imigresen yang lengkap dipasang CCTV serta nyatakan jenis model dan kos pembelian kamera badan atau “body camera” bagi anggota polis, berapa ramai anggota yang memakainya dan berapa unit yang telah dibeli untuk anggota PDRM dan Imigresen.

JAWAPAN

1) CCTV

i) Jabatan Imigresen Malaysia (JIM)

Jabatan Imigresen Malaysia (JIM) telah melaksanakan Kontrak Perkhidmatan Sewaan Sistem Pemantauan Kamera Litar Tertutup (CCTV) di Cawangan Pejabat Penguatkuasa Dan Cawangan Depot Imigresen Malaysia untuk tempoh 36 bulan mulai 1 April 2022 berjumlah RM24,840,000.00. Kerja-kerja pemasangan CCTV sedang dilaksanakan dan dijangka selesai pada 30 September 2022. Jumlah CCTV JIM di 6 Depot Imigresen berjumlah 358 unit.

ii) Polis Diraja Malaysia (PDRM)

Jumlah CCTV PDRM adalah sebanyak 6,303 unit meliputi dua (2) kontrak.

i) Polis Diraja Malaysia (PDRM) telah melaksanakan Kontrak Perkhidmatan Sewaan Kamera Litar Tertutup (CCTV) bagi Lokap Polis Diraja Malaysia (PDRM) melibatkan lima (5) Zon Lokasi untuk tempoh 36 bulan mulai 15 April 2021 sehingga 14 April 2024 berjumlah 5,478 unit dengan kos RM85,068,187.63.

ii) Kontrak Perkhidmatan Penyewaan Sistem Kamera Litar Tertutup (CCTV) Bagi Lokap Polis Diraja Malaysia (PDRM) untuk tempoh 36 bulan mulai 01 April 2020

sehingga 31 Mac 2023 berjumlah 825 unit dengan kos RM18,189,252.00.

2) BODY WORN CAMERA (BWC)

i) Jabatan Imigresen Malaysia (JIM)

Jabatan Imigresen Malaysia (JIM) telah melaksanakan Kontrak Perkhidmatan Sewaan Sistem Pemantauan Kamera Litar Tertutup (CCTV) di Cawangan Pejabat Penguatkuasa Dan Cawangan Depot Imigresen Malaysia untuk tempoh 36 bulan mulai 1 April 2022 berjumlah RM24,840,000.00. Jumlah *Body Worn Camera* (BWC) JIM di 6 Depot Imigresen berjumlah 100 unit.

ii) Polis Diraja Malaysia (PDRM)

Perolehan baharu *Body Worn Camera* (BWC) bagi kegunaan anggota Polis Diraja Malaysia (PDRM) telah diluluskan oleh Kerajaan di bawah Rancangan Malaysia Kedua Belas (RMKe-12), *Rolling Plan 1* dengan kos sebanyak RM30 juta. KDN dan PDRM sedang memuktamadkan spesifikasi perolehan dan dijadualkan untuk proses tender pada Oktober 2022.

SOALAN NO : 188

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : PUAN KASTHURIRAANI A/P PATTO
(BATU KAWAN)**

SOALAN

PUAN KASTHURIRAANI A/P PATTO (BATU KAWAN) minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan penerima bantuan JKM mengikut jenis bantuan, negeri, jantina, kaum dan apakah dasar pelan tindakan golongan OKU di Malaysia dan apakah penambahbaikan yang sedang dan akan dibawa oleh pihak Kementerian.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) menyediakan bantuan kewangan kebijakan bagi meringankan beban kumpulan sasar buat sementara waktu sehingga mereka mampu berdikari. Bantuan ini terbuka kepada semua golongan yang memerlukan berdasarkan syarat dan kelayakan yang telah ditetapkan oleh Garis Panduan Pengurusan Bantuan Persekutuan JKM 2018 dan pekeliling yang berkaitan.

Sehingga Mei 2022, jumlah penerima bantuan JKM adalah seramai 522,942 orang melibatkan 11 skim bantuan. Jumlah peruntukan yang disalurkan adalah sebanyak RM1.04 bilion. Daripada jumlah ini, RM921.4 juta atau 88.6 peratus adalah menggunakan peruntukan Kerajaan Persekutuan manakala RM123.4 juta atau 11.4 peratus di bawah Kerajaan Negeri melalui Bantuan Am Negeri. Bantuan Kewangan Kebajikan mengikut skim adalah seperti yang berikut:

Skim	2022 (sehingga Mei 2022)	
	Bil. Kes	RM
Bantuan Kanak-Kanak (BKK)	65,690	139,571,395
Bantuan Warga Emas (BWE)	139,059	360,343,185
Elaun Pekerja Orang Kurang Upaya (EPOKU)	95,561	214,421,303
Bantuan OKU Tidak Berupaya Bekerja (BTB)	89,075	133,898,218
Bantuan Penjagaan OKU Terlantar/Pesakit Kronik Terlantar (BPT)	26,291	66,761,765
Bantuan Am (BA)	3,134	3,965,497
Bantuan Latihan Perantis (BLP)	101,514	123,979,594
Bantuan Anak Pelihara (BAP)	146	356,300
Geran Pelancaran (GP)	431	777,350
Tabung Bantuan Segera (TBS)	0	0
Bantuan Alat Tiruan/Sokongan (BAT)	1,639	491,780
JUMLAH	522,942	1,045,474,340

Pecahan mengikut negeri etnik adalah seperti yang berikut:

**MAKLUMAT PENERIMA BANTUAN JKM MENGIKUT SKIM BANTUAN,
NEGERI DAN KAUM TAHUN 2017 HINGGA 2022 (MEI)**

Negeri	2017		2018		2019		2020		2021		2022 (Sehingga Mei)	
	Bil. Kes	RM	Bil. Kes	RM								
Perlis	10,012	27,212,860	9,239	28,180,254	9,058	29,406,253	9,028	29,367,870	8,947	38,219,170	8,931	15,732,300
Kedah	41,274	123,284,243	43,082	130,377,685	43,285	159,702,628	44,024	160,392,789	44,255	209,504,594	44,680	87,513,479
Pulau Pinang	18,145	63,383,710	18,591	69,996,400	18,659	73,881,273	19,565	75,468,662	20,620	104,025,561	20,470	44,433,609
Perak	38,431	126,121,379	39,616	129,832,511	40,489	155,808,147	42,938	160,293,996	45,099	214,355,999	45,703	90,616,285
Selangor	38,939	130,915,115	41,943	133,913,690	42,064	161,352,047	43,358	162,985,310	45,761	217,664,841	47,478	93,878,237
Melaka	24,717	82,281,582	25,298	76,419,302	25,071	91,099,123	24,913	90,272,074	25,224	117,436,538	25,513	49,195,314
Negeri Sembilan	26,792	84,664,775	26,768	79,965,758	26,221	92,108,695	26,433	93,056,452	27,236	131,185,281	27,287	54,731,208
Johor	48,218	153,495,889	49,659	158,357,579	49,178	184,813,960	50,768	186,408,674	53,194	261,216,825	53,561	110,020,979
Kelantan	44,818	127,579,218	46,482	132,467,195	46,345	154,529,085	46,866	163,475,856	47,096	218,067,192	47,415	90,549,689
Terengganu	39,678	113,279,835	41,731	118,412,032	41,970	131,168,671	42,272	132,655,657	41,770	165,442,729	41,206	66,722,153
Pahang	25,891	91,265,089	28,065	90,802,749	27,683	106,158,948	28,603	107,343,365	29,819	149,007,945	29,742	62,899,632
Sabah	52,692	158,623,396	58,391	189,365,340	59,421	201,619,170	62,660	219,218,930	64,528	300,127,512	63,940	133,640,732
Sarawak	57,378	187,534,999	58,114	209,610,850	57,333	174,989,338	51,124	179,268,601	50,885	233,421,740	51,278	115,049,738
W.P. Kuala Lumpur	10,843	35,913,645	11,655	37,802,530	11,782	45,260,948	12,505	46,287,013	13,910	62,687,561	14,657	27,993,665
W.P. Labuan	849	2,546,071	913	2,876,860	959	3,140,085	1,012	3,344,637	1,064	4,743,005	1,082	2,497,320
JUMLAH	478,677	1,523,943,866	499,549	1,588,380,734	499,518	1,765,038,370	506,070	1,809,839,885	519,409	2,427,106,493	522,942	1,045,474,340

Skim	2017		2018		2019		2020		2021		2022 (Sehingga Mei)	
	Bil. Kes	RM	Bil. Kes	RM								
Bantuan Kanak-Kanak (BKK)	73,432	219,783,490	70,980	216,610,720	68,277	200,219,600	62,884	192,662,892	64,854	312,782,640	65,690	139,571,395
Bantuan Warga Emas (BWE)	134,614	489,443,140	139,590	516,366,900	139,161	573,104,530	138,631	575,146,399	138,446	831,564,284	139,059	360,343,185
Eluan Pekerja Orang Kurang Upaya (EPOKU)	78,536	326,486,206	84,299	327,969,000	85,486	408,390,250	89,255	420,470,313	93,236	493,915,987	95,561	214,421,303
Bantuan OKU Tidak Berupaya Bekerja (BTB)	57,318	132,997,324	65,011	158,696,440	69,291	205,569,500	78,419	225,358,827	85,468	292,131,957	89,075	133,898,218
Bantuan Penjagaan OKU Terlantar/ Pesakit Kronik Terlantar (BPT)	25,082	92,684,244	25,358	91,683,980	25,496	107,194,150	25,584	107,652,616	25,800	161,239,314	26,291	66,761,765
Bantuan Am (BA)	105,617	252,378,569	106,118	267,595,128	103,664	261,379,965	103,979	281,324,589	105,175	328,451,328	3,134	3,965,497
Bantuan Latihan Perantis (BLP)	164	775,600	159	325,800	206	929,150	65	151,500	179	1,128,553	101,514	123,979,594
Bantuan Anak Pelihara (BAP)	249	1,022,300	271	1,024,030	313	1,268,950	429	1,588,600	424	1,763,419	146	356,300
Geran Pelancaran (GP)	1,588	4,779,200	1,500	4,050,000	600	1,620,000	366	989,433	44	118,750	431	777,350
Tabung Bantuan Segera (TBS)			4,559	1,367,552	5,173	1,552,011	5,272	1,581,452	4,610	1,382,937	0	0
Bantuan Alat Tiruan/Sokongan (BAT)	2,077	3,593,793	1,704	2,691,184	1,851	3,810,264	1,186	2,913,264	1,173	2,627,324	1,639	491,780
JUMLAH	478,677	1,523,943,866	499,549	1,588,380,734	499,518	1,765,038,370	506,070	1,809,839,885	519,409	2,427,106,493	522,942	1,045,474,340

Etnik	2017		2018		2019		2020		2021		2022 (Sehingga Mei)	
	Bil. Kes	RM	Bil. Kes	RM								
Melayu	262,593	818,199,229	281,246	894,258,353	281,229	993,716,602	284,917	1,018,939,855	292,427	1,366,460,956	294,416	588,602,053
Cina	74,773	247,154,976	82,426	262,082,821	82,420	291,231,331	83,502	298,623,581	85,702	400,472,571	86,285	172,503,266
Psb	38,347	126,473,480	39,964	127,070,459	39,961	141,203,070	40,486	144,787,191	41,553	194,168,519	41,835	83,637,947
India	54,270	161,977,252	54,950	174,721,881	54,947	194,154,221	55,668	199,082,387	57,135	266,981,714	57,524	115,002,177
Psw	39,215	119,279,604	34,968	111,186,651	34,966	123,552,686	35,425	126,688,792	36,359	169,897,455	36,606	73,183,204
Lain-Lain	6,414	28,785,470	4,995	15,883,807	4,995	17,650,384	5,061	18,098,399	5,194	24,271,065	5,229	10,454,743
PsM Orang Asli	3,065	6,231,796	999	3,176,761	999	3,530,077	1,012	3,619,680	1,039	4,854,213	1,046	2,090,949
JUMLAH	478,677	1,508,101,808	499,549	1,588,380,734	499,518	1,765,038,370	506,070	1,809,839,885	519,409	2,427,106,493	522,942	1,045,474,340

Kementerian juga telah membangunkan Pelan Tindakan OKU 2016 hingga 2022 (PTOKU 2016-2022) selaras dengan komitmen negara kepada *Incheon Strategy to Make the Right Real for Persons with Disabilities in Asia and the Pacific (2013 – 2022)*. Pelan ini mempunyai sepuluh (10) teras strategik dengan 107 program/tindakan yang bertujuan untuk meningkatkan aksesibiliti OKU terhadap persekitaran fizikal, maklumat, pengangkutan, pendidikan, ekonomi, kesihatan dan perkhidmatan sosial. Di samping itu, pelan ini berperanan meningkatkan penyertaan OKU dalam proses perancangan dan membuat keputusan melalui penyelidikan dan pembangunan dan advokasi.

PTOKU 2016-2022 kini telah memasuki tahun terakhir pelaksanaannya. Kementerian ini selaku penyelaras amat menghargai kerjasama dan komitmen 20 kementerian dan agensi peneraju yang terlibat sama menjayakan pelan ini. Pada masa ini, KPWK sedang meneliti serta menganalisis pencapaian program berdasarkan maklum balas yang diterima. Sehubungan dengan itu, KPWK dalam tindakan untuk mengadakan sesi libat urus bagi menghasilkan laporan pencapaian PTOKU dengan lebih komprehensif.

Untuk makluman, KPWK telah merancang gerak kerja bagi penyediaan PTOKU yang baharu. Penyediaan PTOKU ini akan mengambil kira dapatan pencapaian PTOKU 2016-2022, input daripada Peluang Pekerjaan OKU di Malaysia dan Kajian Sistem Sokongan kepada Penjaga OKU di Malaysia serta maklum balas daripada komuniti OKU.

Kementerian akan terus mengutamakan keperluan komuniti OKU bagi merangka PTOKU yang tuntas dan lebih proaktif dengan memberikan ruang dan peluang kepada komuniti OKU untuk terlibat bersama-sama membangunkan pelan tindakan tersebut menerusi pelbagai platform yang akan disediakan. Komuniti OKU diseru untuk terus proaktif serta mengatur tindakan konstruktif secara bergerak bersama-sama dengan semua pihak khususnya pihak kerajaan dan swasta. Hal ini selaras dengan strategi untuk meningkatkan penglibatan dan peranan OKU khususnya NGO sebagai rakan strategik bagi menjayakan PTOKU di negara ini.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : PUAN KASTHURIRAANI A/P PATTO
[BATU KAWAN]**

SOALAN

PUAN KASTHURIRAANI A/P PATTO minta **MENTERI KESIHATAN** menyatakan mengikut pecahan tahun, negeri, jantina dan kaum dari tahun 2018 sehingga kini, apakah:-

- (a) bilangan pesakit mental mengikut jenis masalah kesihatan mental dan apakah pelan tindakan pihak Kementerian dari subsidi ubatan dan kekurangan tenaga kerja pakar (specialist doctors); dan
- (b) bilangan kes cubaan membunuh diri dan bilangan kes bunuh diri dan status menyahjenayahkan cubaan membunuh diri (*decriminalising suicide*) dan bilangan kes kanser mengikut jenis dan apakah rancangan Kementerian untuk “early detection” untuk pesakit kanser serta bantuan kewangan untuk golongan B40 atau M40 untuk menerima rawatan memandangkan kos rawatan kanser di Malaysia adalah antara yang tertinggi di dunia.

JAWAPAN

Tuan Yang di-Pertua,

1. Data bagi individu yang disaring dan dikesan mempunyai masalah kesihatan mental seperti *stress*, kebimbangan dan kemurungan dari tahun 2017 sehingga 2021 mengikut pecahan tahun, negeri dan jantina adalah seperti berikut:

**Data bagi masalah kesihatan mental stres (*stress*) mengikut
pecahan tahun , negeri dan jantina**

Negeri	2017		2018		2019		2020		2021	
	Jantina		Jantina		Jantina		Jantina		Jantina	
	Lelaki	Perempuan	Lelaki	Perempuan	Lelaki	Perempuan	Lelaki	Perempuan	Lelaki	Perempuan
PERLIS	126	175	86	161	114	195	63	114	0	0
KEDAH	760	855	771	867	745	888	355	483	258	453
PULAU PINANG	279	321	233	345	233	352	320	371	169	242
PERAK	875	940	959	1,157	1,015	1,277	696	940	1,060	1,213
SELANGOR	2,830	0	1,062	1,415	1,279	1,901	805	1,460	603	1,323
JKWPKL/P	228	419	420	783	444	913	182	382	0	0
NEGERI SEMBILAN	702	0	346	755	371	675	370	756	335	751
MELAKA	1,349	0	551	544	426	526	279	324	171	285
JOHOR	1,034	1,359	832	1,222	881	1,289	1,314	6,210	777	3,981
PAHANG	3,326	0	2,987	0	1,092	2,174	957	1,373	1,066	1,232
TERENGGANU	89	320	37	252	30	192	37	221	96	240
KELANTAN	717	823	534	726	566	863	473	554	385	534
SARAWAK	2,164	2,412	3,231	4,410	1,556	2,568	1,204	1,982	813	1,623
SABAH	1,221	1,947	1,065	1,729	982	1,756	862	1,433	633	1,345
JKWP LABUAN	41	90	41	90	10	22	38	95	66	139
JUMLAH	15,741	9,661	13,155	14,456	9,744	15,591	7,955	16,698	6,432	13,361

**Data bagi masalah kesihatan mental kebimbangan (*anxiety*)
mengikut pecahan tahun , negeri dan jantina**

Negeri	2017		2018		2019		2020		2021	
	Jantina		Jantina		Jantina		Jantina		Jantina	
	Lelaki	Perempuan	Lelaki	Perempuan	Lelaki	Perempuan	Lelaki	Perempuan	Lelaki	Perempuan
PERLIS	145	233	153	230	153	308	117	207	0	0
KEDAH	824	918	789	1,129	956	1,363	411	765	348	641
PULAU PINANG	228	345	278	468	307	496	277	498	220	358
PERAK	138	126	1,008	1,195	1,244	1,627	890	1,298	1,358	1,668
SELANGOR	4,831	0	1,849	2,386	1,958	2,819	1,293	2,116	945	1,843
JKWPKL/P	378	636	602	1,074	643	1,300	246	649	0	0
NEGERI SEMBILAN	925	0	612	956	608	948	488	947	417	864
MELAKA	1,240	0	682	671	623	770	472	617	364	592
JOHOR	1,735	2,417	1,250	1,898	1,468	2,273	1,762	7,648	1,088	5,913
PAHANG	3,138	0	2,889	0	1,197	2,065	1,094	1,683	1,031	1,332
TERENGGANU	110	497	59	486	74	315	54	401	57	413
KELANTAN	803	1,030	587	860	607	752	701	640	370	572
SARAWAK	2,211	2,694	3,148	4,777	1,804	3,167	1,373	2,248	1,147	2,059
SABAH	1,484	2,354	1,243	2,076	1,203	2,566	966	1,752	766	1,725
JKWP LABUAN	91	182	91	182	25	55	90	146	91	198
JUMLAH	18,281	11,432	15,240	18,388	12,870	20,824	10,234	21,615	8,202	18,178

**Data bagi masalah kesihatan mental kemurungan (*depression*)
mengikut pecahan tahun , negeri dan jantina**

Negeri	2017		2018		2019		2020		2021	
	Jantina		Jantina		Jantina		Jantina		Jantina	
	Lelaki	Perempuan								
PERLIS	68	158	87	153	126	189	62	116	0	0
KEDAH	413	481	440	591	622	779	310	409	257	412
PULAU PINANG	170	229	122	207	130	234	124	230	101	188
PERAK	767	857	828	873	938	1,138	698	996	1,096	1,143
SELANGOR	2,814	0	1,112	1,432	1,179	1,882	860	1,489	587	1,302
JKWPKL/P	216	386	401	722	433	994	209	513	0	0
NEGERI SEMBILAN	604	0	431	605	483	518	331	666	311	682
MELAKA	856	0	414	371	377	463	243	330	202	370
JOHOR	951	1,259	665	968	833	1,299	1,313	6,466	760	4,190
PAHANG	1,672	0	1,471	0	822	1,317	747	999	689	847
TERENGGANU	65	265	31	222	27	146	62	204	66	230
KELANTAN	390	556	348	505	434	435	546	346	297	302
SARAWAK	1,553	1,775	3,958	2,546	1,208	2,131	883	1,408	722	1,313
SABAH	837	1,452	721	1,101	641	1,336	491	944	427	1,041
JKWP LABUAN	29	96	29	96	19	25	43	88	58	148
JUMLAH	11,405	7,514	11,058	10,392	8,272	12,886	6,922	15,204	5,573	12,168

2. Kerajaan melalui Kementerian Kesihatan Malaysia (KKM) mengambil tindakan bahawa kos ubat-ubatan di fasiliti Kementerian KKM adalah dibekalkan secara percuma kepada pesakit warganegara Malaysia. Bagi kos ubat-ubatan pesakit warga asing adalah termasuk dalam caj pendaftaran sebanyak RM40. Bagi tahun 2022 KKM telah diperuntukkan sebanyak RM4.408 bilion bagi pembelian ubat.
3. Hingga 31 Mac 2022, seramai 6,419 orang Pakar Perubatan berkhidmat di KKM. Daripada jumlah ini, seramai 6,395 Pakar Perubatan lantikan tetap manakala lagi adalah 24 Pakar Perubatan kontrak.
4. Bagi menambah jumlah Pakar Perubatan di KKM, Kerajaan telah melaksanakan inisiatif seperti berikut:
 - (i) meningkatkan slot tajaan Hadiah Latihan Persekutuan (HLP) untuk membolehkan lebih ramai Pegawai Perubatan melanjutkan pengajian dalam program Sarjana Kepakaran. Dalam hal ini, sebanyak 1,300 slot telah diperuntukkan pada tahun 2021;
 - (ii) selain program Sarjana Kepakaran dengan HLP, Pegawai Perubatan juga boleh mengikuti pengajian kepakaran melalui

SOALAN NO. 189

Program Latihan Kepakaran *Parallel Pathway*. Melalui program ini, seramai 189 Pegawai Perubatan telah berjaya menjadi Pakar Perubatan pada tahun 2020 berbanding hanya 98 orang pada tahun 2011;

- (iii) melantik semula secara kontrak Pegawai Perubatan Pakar warganegara Malaysia yang telah bersara wajib untuk berkhidmat dengan KKM; dan
- (iv) mendapatkan perkhidmatan kepakaran daripada pihak swasta menerusi penyampaian perkhidmatan dan penyumberluaran (*outsourcing*).

Tuan Yang di-Pertua,

5. Statistik kes bunuh diri yang dikongsikan oleh Polis Diraja Malaysia (PDRM) dengan KKM menunjukkan bahawa dalam tempoh 2019 sehingga Jun 2022 sebanyak 2,849 kes bunuh diri telah direkodkan. Dalam tempoh 2019 sehingga 2021, jumlah kes bunuh diri tertinggi direkodkan adalah tahun 2021 iaitu sebanyak 1,142 orang dengan peningkatan kes sebanyak 81% berbanding tahun 2020.

Bilangan Kes Bunuh Diri bagi Tahun 2019 – 2022 (Jan-Jun)

Tahun	2019	2020	2021	2022 (Jan-Jun)	Jumlah
Bilangan kes	609	631	1,142 (Jan- Jun = 546)	467	2,849

(Sumber data : PDRM)

Bilangan Kes Bunuh Diri Mengikut Pecahan Negeri Bagi Tahun 2019 – 2022 (Jan-Jun)

Negeri	2019	2020	2021	2022 (Jan-Jun)	Jumlah
	Bilangan Kes				
Johor	101	101	165	65	432
Kedah	35	16	65	25	141
Kelantan	18	30	12	5	65
Kuala Lumpur	82	60	129	35	306

SOALAN NO. 189

Negeri	2019	2020	2021	2022 (Jan-Jun)	Jumlah
	Bilangan Kes				
Melaka	12	22	26	13	73
Negeri Sembilan	42	44	51	17	154
Pahang	35	37	45	19	136
Perak	42	56	112	52	262
Perlis	1	0	5	4	10
Pulau Pinang	63	65	114	46	288
Sabah	24	49	56	31	160
Sarawak	54	40	64	21	179
Selangor	90	96	284	129	599
Terengganu	10	15	14	5	44
JUMLAH	609	631	1,142	467	2,849

(Sumber data : PDRM)

Bilangan Kes Bunuh Diri Mengikut Umur Bagi Tahun 2019 – 2022 (Jan-Jun)

UMUR (Tahun)	2019	2020	2021	2022 (Jan-Jun)	Jumlah
0-14	-	-	8	4	12
15-18	18	38	24	10	90
19-40	353	360	621	260	1,594
41 Tahun dan ke atas	238	233	474	192	1,137
Tidak diketahui	0	0	15	1	16

(Sumber data : PDRM)

Bilangan dan Peratus Kes Bunuh Diri Mengikut Jantina Bagi Tahun 2019 – 2022 (Jan-Jun)

JANTINA	2019	2020	2021	2022 (Jan-Jun)	Jumlah
LELAKI	518 (85%)	517 (82%)	958 (83.9%)	374 (80.1%)	2,367
PEREMPUAN	91 (15%)	114 (18%)	184 (16.1%)	93 (19.9%)	482

(Sumber data : PDRM)

SOALAN NO. 189

Bilangan Kes Bunuh Diri Mengikut Bangsa Bagi Tahun 2019 – 2022 (Jan-Jun)

Bangsa	2019	2020	2021	2022 (Jan-Jun)	Jumlah
Melayu	79	107	170	68	424
Cina	206	214	376	156	952
India	117	116	223	110	566
Lain-lain	76	67	98	32	273
Bukan Warganegara	131	127	259	100	617
Tidak diketahui	0	0	16	1	17

(Sumber data : PDRM)

6. Bagi statistik kes mencederakan diri (*self-harm*) yang mendapatkan rawatan di hospital KKM menunjukkan bahawa dalam tempoh 2018 sehingga Jun 2022 sebanyak 5,109 kes telah direkodkan.

Bilangan Kes Mencederakan Diri Sendiri di Hospital KKM Bagi Tempoh 2018-2022 (Jan-Jun)

Tahun	2018	2019	2020	2021	2022 (Jan-Jun)	Jumlah
Bilangan Kes	1,416	1,390	1,146	1,036	121	5,109

Bilangan Kes Mencederakan Diri Sendiri di Hospital KKM Mengikut Jantina Bagi Tempoh 2018-2022 (Jan-Jun)

JANTINA	2018	2019	2020	2021	2022 (Jan-Jun)	Jumlah
Lelaki	639	611	510	467	42	2,269
Perempuan	777	779	636	567	79	2,838
Tidak Maklumat	0	0	0	2	0	2
Jumlah	1,416	1,390	1,146	1,036	121	5,109

Bilangan Kes Mencederakan Diri Sendiri di Hospital KKM Mengikut Pecahan Umur Bagi Tempoh 2018-2022 (Jan-Jun)

SOALAN NO. 189

UMUR (TAHUN)	2018	2019	2020	2021	2022 (Jan-Jun)	Jumlah
0-19	306	312	247	248	28	1,141
20-39	775	721	625	514	65	2,700
40-59	234	254	204	189	16	897
60 Tahun ke atas	101	103	70	84	12	370
Tiada Maklumat	0	0	0	1	0	1
Jumlah	1,416	1,390	1,146	1,036	121	5,109

Bilangan Kes Mencederakan Diri Sendiri di Hospital KKM Mengikut Pecahan Negeri Bagi Tempoh 2018-2022 (Jan-Jun)

Negeri	2018	2019	2020	2021	2022 (Jan-Jun)	Jumlah
Johor	261	192	183	154	17	807
Kedah	55	87	52	40	4	293
Kelantan	25	37	26	26	0	114
Melaka	18	51	38	21	1	129
Negeri Sembilan	166	164	107	107	10	554
Pahang	66	59	49	39	2	215
Perak	101	139	99	103	14	456
Perlis	5	3	3	6	0	17
Pulau Pinang	114	83	61	100	11	369
Sabah	103	88	71	65	8	335
Sarawak	160	136	95	94	25	510
Selangor	267	285	273	203	24	1,052
Terengganu	20	11	27	28	3	89
WP Kuala Lumpur	32	37	43	25	0	137
WP Labuan	1	5	1	3	0	10

Negeri	2018	2019	2020	2021	2022 (Jan-Jun)	Jumlah
WP Putrajaya	23	13	18	22	2	78
Jumlah	1,416	1,390	1,146	1,036	121	5,109

Bilangan Kes Mencederakan Diri Sendiri di Hospital KKM Mengikut Pecahan Bangsa Bagi Tempoh 2018-2022 (Jan-Jun)

BANGSA	2018	2019	2020	2021	2022 (Jan-Jun)	Jumlah
Melayu	373	355	359	349	38	1,474
Cina	224	263	180	200	28	895
India	510	507	379	279	27	1,693
Lain-lain	198	183	142	144	23	690
Bukan Warganegara	105	71	71	64	2	313
Tidak diketahui	6	11	15	0	3	46

7. Bagi status menyahjenayahkan cubaan membunuh diri (*decriminalising suicide*), pihak KKM telah menyediakan draf Memorandum Jemaah Menteri berhubung Moratorium terhadap Kesalahan Percubaan Bunuh Diri di bawah Seksyen 309 Kanun Keseksaan [Akta 574] dan telah dibentangkan oleh YB Menteri Kesihatan di dalam Majlis Jemaah Menteri pada 26 September 2021. Keputusannya adalah moratorium ini ditangguhkan sehingga kajian oleh pihak Jabatan Peguam Negara selesai.

8. Maklumbalas daripada pihak Jabatan Peguam Negara (JPN) adalah kajian telah hampir selesai (90%) namun begitu masih menunggu kelulusan daripada pengurusan tertinggi dan pihak JPN menyasarkan akan membentangkan Memorandum Jemaah Menteri Pemansuhan / Pindaan Seksyen 309 Kanun Keseksaan bagi kesalahan cubaan bunuh diri di Parlimen dalam waktu terdekat pada tahun ini.

9. Sepanjang tempoh 2018, sejumlah 29,552 kes kanser baharu telah dilaporkan di Daftar Kanser Kebangsaan. Data bagi 2019 dan seterusnya masih melalui proses pengesahan dan tidak dimasukkan di dalam analisis. Pecahan kes kanser bagi tahun 2018 mengikut jenis, jantina, etnik dan negeri adalah seperti Jadual 1 hingga 6 di bawah:

SOALAN NO. 189

Jadual 1. Pecahan jumlah dan peratus kes mengikut jantina bagi semua warganegara Malaysia pada tahun 2018

Bil.	Jenis Kanser (Semua)	Jumlah	Peratus (%)
1.	Lelaki	12,957	43.8
2.	Perempuan	16,595	56.2
	Jumlah	29,552	100

Jadual 2. Pecahan jumlah dan peratus kes mengikut jenis kanser bagi semua warganegara Malaysia pada tahun 2018

Bil.	Jenis Kanser (Semua)	Jumlah	Peratus (%)
1.	PAYUDARA	5,972	20.2
2.	KOLOREKTAL	4,341	14.7
3.	PARU-PARU	2,389	8.1
4.	LIMFOMA	1,459	4.9
5.	PROSTAT	1,181	4.0
6.	NASOPHARYNX	1,100	3.7
7.	LEUKEMIA	981	3.3
8.	PANGKAL RAHIM (SERVIKS)	905	3.1
9.	RAHIM	881	3.0
10.	KELENJAR TIROID	826	2.8
11.	LAIN-LAIN	9,517	32.2
	Jumlah	29,552	100.0

Jadual 3. Pecahan jumlah dan peratus mengikut jenis kanser dalam kalangan lelaki pada tahun 2018

Bil.	Jenis Kanser	Jumlah	Peratus (%)
1.	KOLOREKTAL	2,521	19.5
2.	PARU-PARU	1,573	12.1
3.	PROSTAT	1,181	9.1
4.	LIMFOMA	862	6.7
5.	NASOPHARYNX	831	6.4
6.	LEUKEMIA	558	4.3
7.	HATI	544	4.2
8.	PUNDI KENCING	425	3.3
9.	PERUT	393	3.0
10.	BUAH PINGGANG	342	2.6

SOALAN NO. 189

Bil.	Jenis Kanser	Jumlah	Peratus (%)
11.	LAIN-LAIN	3,727	28.8
	Jumlah	12,957	100.0

Jadual 4. Pecahan jumlah dan peratus mengikut jenis kanser dalam kalangan perempuan pada tahun 2018

Bil.	Jenis Kanser	Jumlah	Peratus (%)
1.	PAYUDARA	5,899	35.5
2.	KOLOREKTAL	1,820	11.0
3.	PANGKAL RAHIM (SERVIKS)	905	5.5
4.	RAHIM	881	5.3
5.	PARU-PARU	816	4.9
6.	OVARI	777	4.7
7.	KELENJAR TIROID	627	3.8
8.	LIMFOMA	597	3.6
9.	LEUKEMIA	423	2.5
10.	PERUT	270	1.6
11.	LAIN-LAIN	3,580	21.6
	Jumlah	16,595	100.0

Jadual 5. Pecahan jumlah dan peratus kes kanser mengikut negeri pada tahun 2018

Bil.	Negeri	Jumlah	Peratus (%)
1.	Selangor	4,269	14.45
2.	Johor	3,986	13.49
3.	Perak	3,008	10.18
4.	Sarawak	3,005	10.17
5.	WPKL&P	2,994	10.13
6.	Pulau Pinang	2,452	8.30
7.	Sabah	2,059	6.97
8.	Kedah	1,887	6.39
9.	Pahang	1,287	4.36
10.	Kelantan	1,252	4.24
11.	Melaka	1,067	3.61
12.	Negeri Sembilan	1,027	3.48
13.	Terengganu	1,025	3.47
14.	Perlis	212	0.72
15.	Labuan	14	0.05

Bil.	Negeri	Jumlah	Peratus (%)
16.	Tiada Maklumat	8	0.03
	Jumlah	29,552	100.0

Jadual 6. Pecahan jumlah dan peratus kes kanser mengikut etnik pada tahun 2018

Bil.	Negeri	Jumlah	Peratus (%)
1.	Malay	10,521	35.6
2.	Chinese	8,370	28.3
3.	Indian	1,619	5.5
4.	Lain-lain	9,042	30.6
	Jumlah	29,552	100.0

Tuan Yang Dipertua,

10. Bagi pengesanan awal kanser (*early detection*) KKM telah menyediakan perkhidmatan saringan di klinik-klinik kesihatan untuk tiga (3) jenis kanser iaitu kanser payu dara, kanser serviks dan kanser kolorektal (usus besar). Sementara itu, perkhidmatan saringan kanser mulut ada disediakan di semua klinik pergigian di seluruh negara.

11. Bagi kanser payudara, KKM menggalakkan wanita menjalankan pemeriksaan kendiri setiap bulan bagi mengesan kelainan serta menjalankan Pemeriksaan Payudara Klinikal setiap tahun. Bagi mereka yang berisiko tinggi untuk mendapat kanser ini, seperti mempunyai sejarah keluarga, mereka disarankan untuk menjalankan ujian mamogram. Kerajaan telah menyediakan perkhidmatan saringan payudara melalui mamogram di seluruh negara sejak tahun 2012. Perkhidmatan *pap smear* untuk saringan kanser serviks telah dimulakan sejak tahun 1969 dan dijadikan Program Saringan Peringkat Kebangsaan bermula dari tahun 1995. Pada tahun 2018, kerajaan telah memperkenalkan saringan kanser serviks menggunakan ujian *Human Papilloma Virus (HPV)* secara berfasa dan akan menyeluruh di seluruh negara pada tahun 2024.

12. Pada tahun 2014, KKM telah memulakan program saringan kanser kolorektal dengan mengesan kehadiran darah dalam najis menggunakan, *Immunological Fecal Occult Blood Test (iFOBT)* di klinik-

klinik kesihatan diikuti dengan prosedur kolonoskopi di hospital. Mereka yang berumur antara 50 hingga 75 tahun tanpa mempunyai tanda dan gejala kanser kolorektal diminta untuk hadir ke klinik kesihatan berhampiran untuk menjalani ujian ini. Bagi mereka yang mengalami tanda dan gejala kanser kolorektal seperti najis berdarah, perubahan corak pembuangan air besar, ketidakselesaan perut yang berlarutan atau mereka yang mempunyai keluarga terdekat pernah disahkan menghidap kanser kolorektal dinasihatkan untuk segera berjumpa doktor perubatan untuk pemeriksaan lanjut.

13. Dalam Pelan Tindakan Kawalan Kanser Kebangsaan 2021-2025, program-program saringan yang sedia ada akan diperkuuhkan. Aktiviti-aktiviti yang memberi fokus kepada peningkatan pengetahuan serta kesedaran rakyat mengenai kepentingan saringan kanser dipergiat lagi. KKM sentiasa menghasilkan infografik-infografik berkaitan kanser utama secara umum termasuk tanda dan gejala kanser yang menasarkan orang ramai dengan memuat naik infografik-infografik ini di laman-laman sosial KKM. Maklumat-maklumat penting tentang kanser serta kepentingan menjalani ujian saringan telah dimasukkan dalam modul latihan untuk sukarelawan KOSPEN. Di samping itu, sebagai usaha untuk meningkatkan jumlah orang ramai melakukan saringan kanser, jalinan kerjasama bersama agensi-agensi di luar KKM seperti fasiliti swasta dan NGO terus diperkuuhkan.

Tuan Yang di-Pertua,

14. Untuk makluman Ahli Yang Berhormat, selaras dengan peruntukan di bawah Perintah Fi (Perubatan) 1982, caj maksimum RM500 adalah terpakai kepada mana-mana pesakit yang dimasukkan ke wad Kelas 3. Caj tersebut meliputi rawatan kanser di semua fasiliti KKM. Walau bagaimanapun, dalam situasi di mana pesakit tidak berkemampuan untuk membayar bil hospital, pengecualian bagi kesemua atau sebahagian daripada caj pesakit luar dan cai wad Kelas 3 boleh dibuat oleh Pengarah Hospital atau wakilnya selaras Perenggan 16 (7) Perintah Fi (Perubatan) 1982. Tatacara pengecualian ini diperincikan di bawah Surat Pekeliling Bahagian Kewangan Bil.2 Tahun 2006.

Sekian terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DR. KELVIN YII LEE WUEN
[BANDAR KUCHING]**

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan senarai pegawai perubatan, doktor gigi, farmasi di setiap hospital dan klinik Kerajaan di setiap negeri seluruh negara.

JAWAPAN

Tuan Yang di-Pertua,

1. Berdasarkan rekod KKM sehingga 31 Mei 2022, terdapat seramai 32,106 pegawai perubatan, 4,168 pegawai pergigian dan 8,352 pegawai farmasi di seluruh negara.
2. Perincian pegawai perubatan, pegawai pergigian dan pegawai farmasi di negeri-negeri adalah seperti berikut:

Bil.	Negeri	Pegawai Perubatan	Pegawai Pergigian	Pegawai Farmasi
1.	Perlis	355	77	116
2.	Kedah	1,750	262	483
3.	Pulau Pinang	1,536	211	573
4.	Perak	2,259	336	712
5.	Selangor	4,703	435	1,135
6.	Wilayah Persekutuan	979	236	314

SOALAN NO. 190

Bil.	Negeri	Pegawai Perubatan	Pegawai Pergigian	Pegawai Farmasi
	Kuala Lumpur dan Putrajaya			
7.	Negeri Sembilan	1,529	233	356
8.	Melaka	988	187	281
9.	Johor	2,418	391	850
10.	Pahang	1,448	350	483
11.	Terengganu	1,134	269	342
12.	Kelantan	1,645	280	430
13.	Sabah	2,281	260	626
14.	Sarawak	2,371	333	644
15.	Wilayah Persekutuan Labuan	76	12	27
16.	Institusi/ Ibu Pejabat Kementerian Kesihatan Malaysia/Kader	6,634	296	980

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DR. KELVIN YII LEE WUEN
[BANDAR KUCHING]**

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan memandangkan isu kematian bayi di hospital-hospital Sabah dan Sarawak adalah satu masalah yang ketara, kritikal dan berlarutan, apakah rancangan untuk menambah bilangan hospital yang serba lengkap di Sabah terutamanya untuk memastikan penjagaan kesihatan ibu yang lebih baik di kawasan luar bandar.

JAWAPAN

Tuan Yang di-Pertua,

1. Kementerian ini mengambil maklum bahawa faktor lokaliti penduduk di pedalaman Sabah yang terletak jauh daripada hospital boleh mengakibatkan kelewatan untuk mendapatkan perkhidmatan hospital. Antara pendekatan yang praktikal dan kos efektif bagi menambah baik penyampaian perkhidmatan kesihatan di kawasan pedalaman dengan kepadatan penduduk rendah adalah melalui penyediaan prasarana klinik kesihatan yang komprehensif, dilengkapi dengan nilai tambah seperti:

- a) *sick bay* untuk pemerhatian pesakit;
- b) bilik bersalin;
- c) perkhidmatan diagnostik seperti x-ray dan makmal; dan,
- d) perkhidmatan *tele-consultation* melalui *virtual clinic*.

2. Untuk makluman, buat masa ini:

- (i) kesemua klinik kesihatan di pedalaman Sabah telah menyediakan sekurang-kurang sebuah bilik bersalin yang akan dikendalikan oleh jururawat terlatih atau jururawat masyarakat;
- (ii) klinik kesihatan dengan reka bentuk piaawai, keperluan nilai tambah seperti bilik bersalin yang lengkap, *sick bay*, bilik x-ray dan unit pergigian boleh ditambah secara modular mengikut keperluan setempat; dan
- (iii) klinik kesihatan dengan reka bentuk piaawai juga telah dilengkapi dengan infrastruktur ICT bagi membolehkan pelaksanaan *tele-consultation* dijalankan.

3. KKM melihat inisiatif pembangunan klinik kesihatan yang lebih komprehensif begini dapat menambah baik akses penduduk luar bandar kepada perkhidmatan kesihatan yang lebih lengkap.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DR. KELVIN YII LEE WUEN
[BANDAR KUCHING]**

SOALAN

DR. KELVIN YII LEE WUEN minta **MENTERI KESIHATAN** menyatakan data dari 2017 hingga sekarang, jumlah panggilan kecemasan yang dikendalikan oleh perkhidmatan ambulans semua hospital di seluruh negara, dan jumlah kes *out-of-hospital cardiac arrest* (OHCA) dan peratusan kematian OHCA dan berapa diantaranya telah diberikan CPR. Data boleh diberikan secara tahunan untuk 2017-2021 dan bulanan setiap hospital dari 2022 ke sekarang.

JAWAPAN

Tuan Yang di-Pertua,

1. Sehingga kini, tiada sebarang registri atau pangkalan data yang dibangunkan bagi memantau prevalens dan kelangsungan hidup kes-kes *Out-of-Hospital Cardiac Arrest* (OHCA) di negara ini. Namun begitu, terdapat beberapa inisiatif yang telah dan sedang dilaksanakan bagi membolehkan KKM bertindak dengan lebih agresif dan objektif dalam menangani kes-kes ini di masa akan datang.

2. Inisiatif pertama adalah penglibatan KKM di dalam *Pan Asian Resuscitation Outcomes Study* (PAROS) *Clinical Research Network* (CRN). Kolaborasi ini adalah bertujuan untuk mempertingkatkan sistem perkhidmatan Perubatan Kecemasan dan kelangsungan hidup kes-kes OHCA di rantau Asia Pasifik.

3. Perkara ini dilaksanakan dengan mengumpul maklumat *baseline* berkenaan prevalens, perawatan dan *outcome* kes-kes OHCA, menerangkan variasi yang terdapat di dalam kesemua sistem perkhidmatan Perubatan Kecemasan yang terlibat dan seterusnya mencadangkan beberapa intervensi yang boleh dilaksanakan bagi menangani kes-kes OHCA di rantau ini.
4. Hasil dapatan kajian tersebut telah dipersembahkan di dalam jurnal perubatan *Resuscitation* pada tahun 2015 dan antara dapatan khusus yang diperolehi untuk Malaysia adalah seperti berikut:
- a) Sebanyak 389 kes OHCA telah dicatatkan di tiga (3) pusat pengumpulan data di Malaysia iaitu Lembah Klang, Kota Bharu dan Pulau Pinang dari Januari 2009 hingga Disember 2012 dengan 84.1% dianggap berpunca daripada jantung.
 - b) Sebanyak 47% daripada jumlah kes yang dicatatkan dengan kejadian disaksikan oleh seseorang.
 - c) Sebanyak 37.1% kes mempunyai *unknown unshockable rhythm* yang dicatatkan sebagai *first arrest rhythm*.
 - d) Sebanyak 22.6% kes menerima bantuan CPR oleh pemerhati (*bystander*) dengan 2.6% menerima bantuan defibrilasi dan 12.7% menerima suntikan adrenalin oleh pasukan respons pra-hospital.
 - e) Sebanyak 8% kes terselamat sehingga sampai ke hospital untuk rawatan susulan dan 0.5% terselamat sehingga discaj dari hospital.
 - f) Bagi masa respons ambulans pula, purata masa ambulans sampai ke tempat kejadian adalah 17.4 minit, purata masa pasukan berada di tempat kejadian adalah 15.8 minit dan purata masa ambulans sampai ke hospital dari tempat kejadian adalah 10 minit.

SOALAN NO. 192

5. Inisiatif yang kedua yang berkait rapat dengan isu ini adalah pengwujudan program *Public Access Defibrillator* (PAD). Susulan dari pengumuman YB Menteri Kesihatan pada bulan Mac 2022 yang lalu berkenaan pembangunan polisi penempatan peranti *Automated External Defibrillator* (AED) di negara ini, KKM sedang giat membangunkan satu *toolkit* yang akan menjadi dokumen utama dan rujukan kepada semua pemegang taruh yang berminat mewujudkan program tersebut di premis masing-masing.
6. Di samping itu juga, proses pengumpulan maklumat tentang kes-kes OHCA yang lebih teratur dan pemetaan peranti AED ini juga akan dilaksanakan bagi memudahkan rakyat dan pasukan respons perubatan mendapatkan maklumat berkenaan peranti tersebut sekiranya mereka berdepan dengan kes tersebut dan ingin menggunakannya dalam respons awalan.
7. Beberapa aktiviti kesedaran juga dirancang bagi meningkatkan kesedaran awam berkenaan OHCA serta betapa pentingnya pemberian CPR yang berkualiti dan penggunaan AED dalam masa respons kritikal dapat menyelamatkan nyawa dan meningkatkan kelangsungan hidup kes-kes OHCA.
8. Akhir sekali, kerjasama dengan dua (2) pertubuhan bukan kerajaan iaitu St. John Ambulance of Malaysia (SJAM) dan Persatuan Bulan Sabit Merah Malaysia (PBSMM) melalui pemberian geran bagi menempatkan 100 buah peranti AED dan aktiviti-aktiviti latihan dan kesedaran dengan orang awam juga diharapkan dapat direalisasikan dalam masa terdekat ini.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

**PERTANYAAN : BUKAN LISAN (BERTULIS)
DARIPADA : Y.B. DR. KELVIN YII LEE WUEN
[BANDAR KUCHING]**

SOALAN

DR. KELVIN YII LEE WUEN [BANDAR KUCHING] minta **PERDANA MENTERI** menyatakan jangka masa yang akan diambil oleh Kerajaan untuk "decriminalise" cubaan membunuh diri di Malaysia dan adakah moratorium hukuman akan dibuat sementara menunggu akta tersebut dipinda.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Jabatan Peguam Negara mengambil inisiatif untuk mengkaji undang-undang berkenaan dengan kesalahan persubahatan dan percubaan membunuh diri di Malaysia. Isu percubaan membunuh diri menjadi lebih meruncing pada masa ini atas beberapa faktor seperti keadaan sosioekonomi dan tahap kesihatan mental masyarakat. Oleh yang demikian, pendekatan yang lebih holistik perlu diambil untuk mengekang perbuatan tersebut.

Berdasarkan hasil kajian perbandingan peruntukan undang-undang mengenai percubaan membunuh diri di United Kingdom, New Zealand, India dan Singapura, didapati negara-negara tersebut telah mengeluarkan percubaan membunuh diri daripada sistem keadilan jenayah dan memasukkan orang yang membuat percubaan membunuh

diri ke dalam sistem rawatan kesihatan mental. Ini bermakna percubaan membunuh diri bukan lagi suatu kesalahan jenayah di negara-negara tersebut.

Jabatan Peguam Negara telah menimbang cadangan daripada pihak berkepentingan untuk mengeluarkan kesalahan percubaan membunuh diri daripada sistem keadilan jenayah dan menggantikannya dengan rawatan kesihatan yang sewajarnya. Seterusnya, Jabatan Peguam Negara telah meneliti dengan lebih lanjut pilihan perundangan yang ada serta implikasi perundangan sekiranya kesalahan percubaan membunuh diri dikeluarkan daripada sistem keadilan jenayah. Di samping itu, Jabatan Peguam Negara juga telah meneliti keperluan untuk meminda undang-undang lain yang berbangkit daripada pengeluaran kesalahan percubaan membunuh diri daripada sistem jenayah bagi mengelakkan berlaku kelompongan dalam undang-undang berkenaan perkara tersebut.

Pada masa ini, Jabatan Peguam Negara masih dalam peringkat kajian berhubung perkara ini, dan telah menyelesaikan isu-isu utama berbangkit daripada pemansuhan kesalahan percubaan membunuh diri dalam seksyen 309 Kanun Keseksaan.

Berhubung dengan persoalan sama ada moratorium hukuman akan dibuat sementara menunggu akta tersebut dipinda, perkara ini akan diputuskan setelah kajian tersebut dimuktamadkan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DR. KELVIN YII LEE WUEN
[BANDAR KUCHING]**

SOALAN

Minta **MENTERI PENGAJIAN TINGGI** menyatakan:

- (a) kandungan silibus pendidikan sivik di institusi pengajian tinggi (IPT) awam dan swasta dari segi pengajaran asas demokrasi, sistem pemerintahan dan perundangan, tanggungjawab pengundi dan Kerajaan; dan
- (b) pelan tindakan untuk mengintegrasikan Program Pendidikan Pengundi dalam silibus IPT.

JAWAPAN

Tan Sri Yang di-Pertua,

- (a) Kandungan silibus pendidikan sivik di Institusi Pendidikan Tinggi (IPT) diterapkan kepada pelajar melalui Matapelajaran Pengajian Umum (MPU). MPU wajib diambil oleh semua pelajar peringkat Sijil hingga ke Ijazah Sarjana Muda sebagai salah satu syarat pengijazahan. MPU diperkenalkan bertujuan untuk mengukuhkan jati diri; meningkatkan semangat perpaduan dan patriotisme; membentuk sistem nilai; meningkatkan kemahiran insaniah; dan meningkatkan penghayatan terhadap elemen nilai ketamadunan kepada pelajar di IPT bagi menghayati dan menghargai sejarah.

Pada tahun 2019, KPT telah membangunkan kursus Falsafah dan Isu Semasa; dan Kursus Penghayatan Etika dan Peradaban bagi menggantikan kursus Tamadun Islam dan Tamadun Asia (TITAS) serta Hubungan Etnik. Objektif kursus ini adalah untuk memberikan penghayatan kepada pelajar IPT berhubung dengan etika; nilai murni; pengetahuan berkenaan *ethic and philosophy of knowledge*; serta perkara asas keilmuan tanpa mengira fahaman agama, bangsa dan literasi demokrasi. Ini bagi meningkatkan kematangan pelajar berhubung dengan literasi demokrasi, sistem pemerintahan dan perundangan, tanggungjawab pengundi dan juga Kerajaan. Selain itu, kursus Pengajian Malaysia 1 dan 2 turut menyentuh tentang sistem politik dan pentadbiran Negara berserta strukturnya, yang mengandungi topik berkaitan Federalisme, Demokrasi Berparlimen di Malaysia, Raja Berperlembagaan dan Komponen Utama Kerajaan.

Kementerian juga turut bekerjasama dengan Akademi Pilihan Raya (APR) bagi merangka program berkaitan Undi 18 kepada para pelajar di IPT dalam usaha untuk mewujudkan kesedaran tentang hak dan tanggungjawab, peranan, penglibatan serta pengetahuan tentang kelayakan mengundi, proses demokrasi, sistem pilihan raya negara dan perkara-perkara lain yang berkaitan.

- (b) Selain mengintegrasikan elemen pendidikan pengundi dalam silibus IPT, elemen ini turut diterapkan melalui program-program pembangunan mahasiswa. Antaranya adalah melalui pelaksanaan Program Memperkasa Literasi Politik Mahasiswa yang melibatkan kesemua Universiti Awam (UA). Terdapat pelbagai aktiviti yang disenaraikan dalam program ini. Salah satunya ialah “Adaptasi Pendidikan Pengundi dalam Subjek Akademik” yang memberikan fokus kepada penerapan pendidikan pengundi dalam silibus universiti agar mahasiswa diberikan pengetahuan dan kefahaman selaku pengundi muda mengenai sistem demokrasi, pilihan raya dan politik negara.

Sebagai komitmen untuk melaksanakan perkara ini, pihak Kementerian dengan kerjasama kesemua 20 UA telah memulakan usaha menandatangani memorandum persefahaman (MoU) bersama Suruhanjaya Pilihan Raya (SPR) untuk memanfaatkan kepakaran SPR dalam melaksanakan program-program pemerkasaan literasi politik kepada mahasiswa.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

SOALAN

TUAN KESAVAN A/L SUBRAMANIAM [SUNGAI SIPUT] minta **PERDANA MENTERI** menyatakan secara perincian senarai projek-projek yang telah dirancang oleh Kerajaan dalam Rancangan Malaysia Ke-12 bagi kawasan Parlimen Sungai Siput.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Dalam tempoh dua tahun RMKe-12, sebanyak 12 projek telah dilaksanakan di Parlimen Sungai Siput dengan kos berjumlah RM171.64 juta. Bagi tahun 2021, iaitu tahun pertama RMKe-12, sebanyak 8 projek dilaksanakan di Parlimen Sungai Siput yang mana lima daripadanya merupakan projek sambungan RMKe-11 dan tiga projek baharu. Bagi tahun 2022 pula, sebanyak lapan projek dilaksanakan di Parlimen Sungai Siput yang terdiri lima projek sambungan tahun 2021 RMKe-12 dan tiga projek baharu. Antara projek yang dilaksanakan adalah seperti berikut:
 - i. Pembinaan Bangunan Baharu 2 Bilik Darjah Prasekolah Di SK Sungai Siput Utara, Perak;
 - ii. Pembinaan Bangunan Gantian Di Sekolah Kebangsaan Karai, Kuala Kangsar, Perak;
 - iii. Pembinaan Bangunan Baharu Yang Mengandungi Bilik Khas, Auditorium Dan Dewan Serbaguna Serta Naik Taraf Blok Berkaitan Di Sekolah Seni Malaysia Perak (SMK Muhibbah), Sungai Siput, Perak;
 - iv. Pembinaan Asrama, Dewan Makan, Surau, Padang Dan Lain-Lain Kemudahan Di Sekolah Menengah Kebangsaan Bawong, Sungai Siput, Perak; Dan
 - v. Pembinaan 12 Bilik Darjah Di SJK (T) Heewood, Sungai Siput (U), Perak

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN KESAVAN A/L
SUBRAMANIAM [SUNGAI SIPUT]

SOALAN

TUAN KESAVAN A/L SUBRAMANIAM [SUNGAI SIPUT] minta **PERDANA MENTERI** menyatakan jumlah Daftar Pemilih sehingga 30 April 2022 bagi bahagian pilihan raya P.062, Parlimen Sungai Siput dan pecahan mengikut kaum Melayu, Cina, India dan Asli serta pecahan mengikut umur seperti 18 hingga 20 tahun, 21 hingga 29 tahun, 30 hingga 39 tahun, 40 hingga 49 tahun, 50 hingga 59 tahun, 60 hingga 69 tahun, 70 hingga 79 tahun, 80 hingga 89 tahun dan 90 tahun ke atas.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pilihan Raya Malaysia (SPR) telah **mewartakan Daftar Pemilih Tambahan Bulan Mei Tahun 2022 pada 16 Jun 2022**. Sehingga pewartaan Daftar Pemilih Tambahan Bulan Mei Tahun 2022 ini, jumlah pemilih terkini bagi **Bahagian Pilihan Raya Parlimen P.062 Sungai Siput** ialah seramai **72,337 orang**. Jumlah pemilih mengikut kategori umur adalah seperti berikut:

Bil.	Kategori Umur	Jumlah Pemilih
a.	18 hingga 20 tahun	3,314
b.	21 hingga 29 tahun	14,031
c.	30 hingga 39 tahun	14,895
d.	40 hingga 49 tahun	13,097
e.	50 hingga 59 tahun	11,421
f.	60 hingga 69 tahun	8,718
g.	70 hingga 79 tahun	4,672
h.	80 hingga 89 tahun	1,838
i.	90 tahun dan ke atas	351
Jumlah		72,337

Walau bagaimanapun, SPR tidak menyediakan statistik pemilih mengikut kaum.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN KESAVAN A/L SUBRAMANIAM
[SUNGAI SIPUT]

SOALAN :

TUAN KESAVAN A/L SUBRAMANIAM [SUNGAI SIPUT] minta **PERDANA MENTERI** menyatakan senarai Pusat Daerah Mengundi dan nama Pusat-Pusat Mengundi serta jumlah Saluran Mengundi mengikut Pusat Daerah Mengundi bagi bahagian pilihan raya P.062 Parlimen Sungai Siput.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, jumlah daerah mengundi (DM) dalam Bahagian Pilihan Raya Parlimen P.062 Sungai Siput ialah 36 DM. Senarai 36 DM dalam P.062 Sungai Siput adalah seperti berikut:

Bahagian Pilihan Raya Negeri N.21 Lintang

062/21/01 Kampong Kandang Hulu

062/21/02 Kampong Batang Kulim

062/21/03 Salak North

062/21/04 Kampong Enggor

062/21/05 Karai Luar

062/21/06 Pekan Karai

062/21/07 Kampong Karai

062/21/08 Kampong Jawang

062/21/09 Changkat Salak

- 062/21/10 Salak Timor
062/21/11 Kamuning Barat
062/21/12 Kamuning Timor
062/21/13 Kampong Temin
062/21/14 Sungai Pelus
062/21/15 Trosor
062/21/16 Kampong Mor
062/21/17 Lktp Lasah
062/21/18 Lintang
062/21/19 Ladang Elphil
062/21/20 Rancangan Belia Khas Perlop
062/21/21 Chior Lasah
062/21/22 Chenein
062/21/23 Pos Piah
062/21/24 Pos Perwor
062/21/25 Pos Legap
062/21/26 Pos Kuala Mu

Bahagian Pilihan Raya Negeri N.22 Jalong

- 062/22/01 Jalong Timor

- 062/22/02 Jalong Barat
- 062/22/03 Jalan Lintang
- 062/22/04 Lintang Road Barat
- 062/22/05 Kampong Bahagia
- 062/22/06 Rimba Panjang Utara
- 062/22/07 Kampong Muhibbah
- 062/22/08 Simpang Tiga
- 062/22/09 Main Road
- 062/22/10 Mahkamah
- 062/22/11 Sungai Buloh Selatan
- 062/22/12 Sungai Pelang

Untuk makluman Yang Berhormat, SPR sedang dalam proses mengemaskini maklumat pusat mengundi dan saluran yang akan digunakan untuk Pilihan Raya Umum Ke-15 yang akan datang mengambil kira faktor pertambahan pemilih selepas pelaksanaan umur pengundi 18 tahun dan pendaftaran pemilih secara automatik.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN KESAVAN A/L SUBRAMANIAM
(SUNGAI SIPUT)**

SOALAN

TUAN KESAVAN A/L SUBRAMANIAM (SUNGAI SIPUT) minta **MENTERI TENAGA DAN SUMBER ASLI** menyatakan dengan terperinci jumlah keluasan tanah rezab perhutanan dan jumlah kelulusan tanah mengikut pecahan syarikat yang telah diberikan serta aktiviti-aktiviti tanaman syarikat-syarikat tersebut di dalam kawasan Parlimen Sungai Siput.

JAWAPAN

Tuan Yang di-Pertua,

1. Untuk makluman Ahli Yang Berhormat, sehingga tahun 2020, seluas 986,848.26 hektar atau 47.27 peratus daripada keluasan tanah negeri Perak telah diwartakan sebagai Hutan Simpanan Kekal (HSK). Daripada jumlah ini, seluas 123,996.13 hektar adalah kawasan HSK di dalam Parlimen Sungai Siput iaitu Hutan Simpan Kledang Saiong, Hutan Simpan Korbu, Hutan Simpan Piah dan Hutan Simpan Temenggor.

2. Berdasarkan semakan dengan Kementerian Perusahaan Perladangan dan Komoditi (MPIC), setakat ini tiada kelulusan diberikan kepada mana-mana syarikat di bawah Program Pembangunan Ladang Hutan (PPLH) di kawasan Parlimen Sungai Siput, Perak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BERTULIS

DARIPADA : TUAN KESAVAN A/L SUBRAMANIAM

[SUNGAI SIPUT]

SOALAN NO. 199

Tuan Kesavan A/L Subramaniam [Sungai Siput] minta MENTERI PERDAGANGAN DALAM NEGERI DAN HAL EHWAL PENGGUNA menyatakan berdasarkan statistik data SSM sehingga Mei 2022, berapa syarikat sendirian berhad yang masih aktif dan mempunyai majoriti saham melebihi 51% yang dimiliki oleh kaum India.

JAWAPAN

Tuan Yang di-Pertua,

Untuk makluman Ahli Yang Berhormat, data pemegangan saham dilaporkan ke Suruhanjaya Syarikat Malaysia (SSM) melalui serah simpan penyata tahunan di bawah seksyen 68 Akta Syarikat 2016. Pemegangan saham oleh kaum India dalam rekod SSM adalah berdasarkan kepada Jadual Analisis Saham yang dilaporkan oleh syarikat sendirian berhad melalui serah simpan penyata tahunan iaitu bilangan pemegangan saham yang dikategorikan mengikut kaum yang terdapat di dalam Penyata Tahunan atau *Register of Member* (ROM).

Merujuk kepada rekod SSM sehingga 30 Jun 2022, sebanyak **1,666** syarikat sendirian berhad dengan pemegangan saham oleh kaum India berjumlah 51% hingga 60%. Manakala untuk pemegangan saham sebanyak 60.1% hingga 70% oleh kaum India dalam syarikat sendirian berhad ialah **1,406** syarikat.

Sebanyak **886** syarikat lagi dengan pemegangan saham sebanyak 70.1% hingga 80% oleh kaum India. Selain itu, pemegangan saham sebanyak 80.1% hingga 90% oleh kaum India ialah **655** syarikat sendirian berhad. Manakala sebanyak **22,908** syarikat sendirian berhad dengan pemegangan saham oleh kaum India yang berjumlah 90.1% hingga 100%. Jumlah syarikat sendirian berhad yang mempunyai pemegangan saham sebanyak 51% hingga 100% oleh kaum India ialah **27,521** syarikat.

Namun begitu, data yang dikemukakan bagi syarikat awam yang mempunyai pemegang saham melebihi 500 orang, pelaporan berhubung bilangan saham adalah terhad kepada 20 pemegang saham yang tertinggi sahaja. Selain itu, data yang dikemukakan ini juga adalah tertakluk kepada kadar pematuhan dalam lingkungan 91% hingga 92% bagi serah simpan penyata tahunan oleh semua syarikat aktif iaitu termasuk syarikat berhad menurut saham dan jaminan ke SSM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : TUAN KHALID BIN ABD SAMAD
[SHAH ALAM]**

SOALAN

Tuan Khalid bin Abd Samad [Shah Alam] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah langkah-langkah yang telah diambil oleh Kerajaan bagi mengurangkan beban kos sara hidup rakyat ketika ini.

JAWAPAN

Yang di-Pertua,

Pasukan Khas Jihad Tangani Inflasi yang telah diumumkan pada 30 Jun 2022, diketuai oleh YB Menteri Komunikasi dan Multimedia adalah bertujuan untuk meneliti, memantau serta mencadangkan kepada Kerajaan langkah-langkah segera bersifat jangka pendek dan sederhana untuk dilaksanakan bagi menangani isu inflasi.

Bagi pelaksanaan inisiatif yang melibatkan implikasi dasar, maka ia akan diangkat kepada Majlis Tindakan Sara Hidup Negara (NACCOL) dan Jemaah Menteri.

Pasukan Khas Jihad Tangani Inflasi ini bersidang 2 kali seminggu dan keahlian di peringkat Menteri adalah seperti berikut:

- (i) Menteri Komunikasi dan Multimedia (K-KOMM)-Pengerusi;
- (ii) Menteri Kewangan (MOF);
- (iii) Menteri Pertanian dan Industri Makanan (MAFI);
- (iv) Menteri Perdagangan Dalam Negeri dan Hal Ehwal Pengguna (KPDNHEP);
- (v) Menteri di Jabatan Perdana Menteri (Ekonomi);
- (vi) Menteri Wilayah Persekutuan (KWP);
- (vii) Menteri Pembangunan Usahawan dan Koperasi (KUSKOP); dan
- (viii) Ketua Setiausaha Negara (KSN).

Pasukan Khas ini turut dianggotai oleh 11 orang pegawai kanan kerajaan termasuk dari Majlis Keselamatan Negara (MKN), Bank Negara Malaysia (BNM), Jabatan Perangkaan (DOSM) dan Polis Diraja Malaysia (PDRM).

Ahli Pasukan Khas Jihad Tangani Inflasi (JIHAD) tidak menerima sebarang elauan khas. Lain-lain kementerian boleh dipanggil sekiranya terdapat isu timbul terutamanya melibatkan kemaslahatan rakyat. Pasukan Khas JIHAD ini adalah bersifat *action-oriented*, justeru ia akan mengutamakan penyelesaian segera sesuatu masalah yang boleh menyebabkan kenaikan barang dan perkhidmatan.

Pasukan Khas Jihad Tangani Inflasi memberi penekanan dan tumpuan

NO SOALAN : 200

terhadap strategi yang memberi impak segara bagi mengubah persepsi dan jangkaan (*expectation*) rakyat. Sepanjang penubuhan pasukan ini, beberapa keputusan penting telah diambil seperti berikut:

- (i) Pelaksanaan operasi bersepada KPDNHEP bersama Polis Diraja Malaysia (PDRM), Jabatan Kastam Diraja Malaysia (Kastam), Jabatan Perkhidmatan Kuarantin dan Pemeriksaan Malaysia (MAQIS) dan Jabatan Sukarelawan Malaysia (RELA) bagi menangani ketirisan minyak masak bersubsidi ke luar negara;
- (ii) Memperkenalkan Bakul Makanan Siswa Keluarga Malaysia berharga RM3.50 sepinggan di universiti-universiti;
- (iii) Peluasan Program Jualan Keluarga Malaysia (PJKM) ke 600 kawasan Dewan Undangan Negeri (DUN) di seluruh negara hingga akhir tahun 2022;
- (iv) pewartaan larangan eksport minyak sawit tulen dalam bungkus polibeg; dan
- (v) Mekanisme penetapan harga siling minyak masak botol tidak bersubsidi ditentukan secara bulanan untuk seluruh Malaysia mengikut harga purata minyak sawit mentah (CPO) bagi satu tan metrik di pasaran dunia pada bulan sebelumnya. Harga siling minyak sawit botol 5kg untuk Sabah, Sarawak dan Labuan ditetapkan pada paras RM34.70 sama seperti di Semenanjung, berkuatkuasa pada 8 Ogos ini. Turut ditentukan adalah harga siling minyak masak tidak bersubsidi kemasan botol seperti berikut:
 - (a) 1kg iaitu RM7.70;
 - (b) 2kg iaitu RM14.70; dan
 - (c) 3kg iaitu RM 21.70.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN KHALID BIN ABD SAMAD
[SHAH ALAM]**

SOALAN

TUAN KHALID BIN ABD SAMAD [SHAH ALAM] minta **MENTERI KOMUNIKASI DAN MULTIMEDIA** menyatakan status pelaksanaan 5G seluruh negara dan langkah mengatasi capaian terhad di kawasan luar bandar.

JAWAPAN

Tuan Yang di-Pertua,

Kerajaan melaksanakan inisiatif untuk menambah baik infrastruktur digital termasuk di kawasan luar bandar menerusi Pelan Jalinan Digital Negara (JENDELA). Bagi pelaksanaan rangkaian 5G pula, Digital Nasional Berhad (DNB) sebagai penyedia rangkaian borong tunggal infrastruktur dan rangkaian 5G telah memulakan pelaksanaan rangkaian 5G pada tahun 2021 yang melibatkan kawasan sekitar Putrajaya, Cyberjaya dan Kuala Lumpur. Sehingga 4 Julai 2022, sebanyak 1,506 tapak telah siap dibangunkan dan liputan 5G telah mencapai 27% kawasan berpenduduk di seluruh negara. Jumlah langganan perkhidmatan 5G juga dianggarkan telah mencecah 250,000 langganan.

Berdasarkan laporan yang dikeluarkan oleh OpenSignal pada 22 Jun 2022, Malaysia telah menduduki tangga pertama di dunia bagi kelajuan muat naik 5G iaitu pada kelajuan 50.3Mbps dan tangga kedua di dunia bagi kelajuan muat turun 5G iaitu pada kelajuan 382.2Mbps. Pencapaian ini membuktikan rangkaian 5G yang dibangunkan adalah berkualiti dan berkemampuan tinggi.

SOALAN NO : 201

Peluasan rangkaian 5G diteruskan bagi tahun 2022 dengan sasaran 36% liputan di kawasan berpenduduk dan melibatkan penyediaan keseluruhan kira-kira 4,000 tapak 5G. Kawasan yang terlibat adalah kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak. Peluasan ke tempat-tempat lain akan dilaksanakan pada tahun berikutnya, dengan sasaran utama 80% liputan di kawasan berpenduduk pada penghujung tahun 2024.

Bagi membolehkan ketersediaan dan kebolehcapaian liputan rangkaian sistem telekomunikasi di Malaysia berada pada tahap memberangsangkan selain daripada pembinaan menara-menara telekomunikasi dan satelit, Kerajaan juga turut melaksanakan penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Secara keseluruhannya, Fasa 1 bagi projek PoP ini akan melibatkan 630 lokasi berhampiran sekolah dan Fasa 2 pula akan melibatkan 3693 lokasi berhampiran sekolah di kawasan luar bandar di seluruh negara. Manakala jumlah PoP secara keseluruhan di Selangor adalah sebanyak 224.

Sekian, terima kasih.

**MESYUARAT KEDUA, PENGGAL KELIMA PARLIMEN KE-14
TAHUN 2022**

PERTANYAAN : BUKAN LISAN

**DARIPADA : TUAN KHALID BIN ABD SAMAD
[SHAH ALAM]**

SOALAN

TUAN KHALID BIN ABD SAMAD [SHAH ALAM] minta **MENTERI SUMBER** menyatakan status pengambilan pekerja asing dari luar negara dari negara Bangladesh dan Indonesia.

JAWAPAN

Tuan Yang di-Pertua,

Untuk makluman Tuan Yang di-Pertua, setakat ini status pengambilan pekerja asing bagi kedua-dua negara ini iaitu Bangladesh dan Indonesia adalah masih berada pada proses yang terakhir di mana ia membabitkan prosedur pengambilan dan isu-isu teknikal sungguhpun Memorandum of Understanding (MoU) bagi kedua-dua negara ini telah ditandatangani pada 19 Disember 2021 untuk negara Bangladesh dan 01 April 2022 untuk negara Indonesia.

Bagi majikan yang telah membayar levi dan bercadang untuk menggajikan pekerja warga Bangladesh boleh memanjangkan permohonan pengesahan penggajian dan dokumentasi seperti kontrak pekerjaan serta pesanan kerja bagi pekerja ke Suruhanjaya Tinggi Bangladesh di Kuala Lumpur. Kemasukan pekerja warga Bangladesh, Indonesia dan negara-negara sumber yang lain ini tertakluk kepada saringan keselamatan dan kesihatan termasuk pematuhan syarat-syarat Jabatan Imigresen.

SOALAN NO : 202

Dalam pada itu, Kementerian telah menerima 320,199 jumlah kuota permohonan pekerja asing sehingga tarikh 24 Jun 2022 manakala sebanyak 277,372 adalah jumlah kuota yang diluluskan daripada jumlah keseluruhan permohonan kuota tersebut secara dalam talian untuk kesemua negara termasuk negara Bangladesh dan Indonesia bagi penggajian pekerja asing.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN KHALID BIN ABD SAMAD
[SHAH ALAM]**

SOALAN

YB TUAN KHALID BIN ABD SAMAD [SHAH ALAM] minta **MENTERI PERUMAHAN DAN KERAJAAN TEMPATAN** menyatakan apakah perancangan Kementerian dalam mengekang kenaikan berlipat kali ganda harga rumah kepada Rakyat berikutan Laporan Indeks Kos Binaan yang mengatakan bahawa kenaikan harga komoditi pembinaan meningkat sehingga 20 peratus.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan memandang serius mengenai isu kenaikan kos harga bahan binaan pasca COVID-19, yang secara tidak langsung menyumbang kepada kenaikan harga rumah. Sehubungan itu, perkara ini telah dibincangkan dalam Mesyuarat Majlis Perumahan Mampu Milik Negara (MPMMN) Bilangan 1 Tahun 2022 yang dipengerusikan oleh YAB Perdana Menteri pada 10 Februari 2022.

Susulan daripada Mesyuarat tersebut, satu perbincangan mengenai isu kenaikan kos bahan binaan dalam industri pembinaan telah diadakan pada 14 Februari 2022, melibatkan agensi-agensi seperti Kementerian Perdagangan Antarabangsa dan Industri (MITI), Kementerian Perdagangan Dalam Negeri dan Hal Ehwal Pengguna (KPDNHEP), Kementerian Kerja Raya (KKR), Kementerian Kewangan (MOF), Jabatan Kerja Raya (JKR), Lembaga Pembangunan Industri Pembinaan Malaysia (CIDB), Suruhanjaya Persaingan Malaysia (MyCC) dan lain-lain lagi. Hasil perbincangan tersebut telah dibentangkan kepada Jemaah Menteri pada 11 Mac 2022. Antara perkara yang dimaklumkan berhubung isu bahan binaan dalam industri pembinaan adalah seperti berikut:

- (i) kos bahan dan pembinaan menyumbang kepada 60% hingga 70% daripada kos pembinaan, manakala baki 30% hingga 40% melibatkan kos buruh, jentera dan kos-kos lain;
- (ii) faktor-faktor yang mempengaruhi kenaikan harga bahan binaan adalah seperti yang berikut:
 - (a) permintaan yang meningkat dan penawaran yang terhad dalam pasaran;
 - (b) kenaikan kos dan kekurangan bahan mentah seperti sekrap besi dan bijih besi turut menyebabkan kenaikan harga keluli;

SOALAN NO: 203

- (c) peningkatan kos logistik seperti kos penyimpanan, kos pengangkutan dan kos pemprosesan turut menyebabkan kenaikan harga bahan binaan; dan
- (d) terma kredit di mana kos bahan binaan lebih murah sekiranya pemaju membayar tunai berbanding secara kredit.

Untuk makluman Ahli Yang Berhomat juga, walaupun terdapat isu kenaikan kos dalam pembinaan perumahan, ini tidak akan menghalang Kerajaan untuk meneruskan sasaran di bawah Rancangan Malaysia ke-12 (RMKe-12), iaitu untuk menyediakan sebanyak 500,000 unit Rumah Mampu Milik (RMM). Kerajaan berpandangan usaha ini boleh dicapai dengan bantuan dan gandingan tenaga daripada semua pihak. Untuk merealisasikan hasrat ini, seperti yang diputuskan dalam mesyuarat MPMMN, Kerajaan Persekutuan akan memberi subsidi dan kerajaan negeri pula menyediakan tanah bagi pembangunan RMM. Pihak bank pula telah diminta untuk mempermudahkan pembiayaan bagi memastikan Projek Perumahan Rakyat (PPR) dan RMM dapat dijual atau dibeli dengan harga yang berpatutan.

Pada masa yang sama, KPKT sedang meneliti mekanisme pelaksanaan PPR yang baharu dari aspek reka bentuk, kemudahan dan fasiliti serta bahan-bahan binaan yang akan digunakan semasa pembinaan bagi memastikan pembinaannya lebih efisien dan *value for money* kepada Kerajaan. Di dalam meneliti perkara ini, KPKT dibantu oleh Panel Berkepakaran (*Panel of Experts*, POE) merangka strategi pendekatan aksesibiliti perumahan ideal yang praktikal dan mampan agar pembangunan perumahan dapat mengekalkan harga yang mampu milik.

KPKT juga akan memperkenalkan Indeks Harga Rumah Mampu Milik berdasarkan lokaliti. Indeks ini akan dijadikan sebagai panduan oleh Pihak Berkuasa Tempatan (PBT) dan pemaju perumahan swasta untuk membangunkan perumahan mengikut kemampuan pembeli. Indeks ini akan dipaparkan melalui Dashboard Maklumat Rumah Mampu Milik untuk memudahkan penyedia perumahan di peringkat Persekutuan, Negeri dan pemaju swasta serta rakyat untuk melihat maklumat RMM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN KHALID BIN ABD SAMAD
[SHAH ALAM]**

SOALAN

Tuan Khalid bin Abd Samad [Shah Alam] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah perkembangan terkini berkenaan Indeks Kos Sara Hidup yang telah mula dirangka pada Jun 2019 sewaktu pemerintahan Pakatan harapan.

JAWAPAN

Tuan Yang di-Pertua,

Untuk makluman Ahli Yang Berhormat,

“Jabatan Perangkaan Malaysia (DOSM) sedang memuktamadkan kajian indeks kos sara hidup. Namun, kajian tersebut hanya melibatkan bandar-bandar utama di Malaysia. Kementerian bercadang untuk meluaskan lagi indeks tersebut di bandar-bandar lain. Kriteria-kriteria bersesuaian akan turut diluaskan mengambil kira keunikan setiap bandar yang termasuk dalam kajian tersebut kelak.

Walau bagaimanapun, adalah diingatkan bahawa kajian yang dijalankan ini dibuat sebelum berlakunya penularan pandemik Covid-19 serta semakan semula garis kemiskinan baru. Kementerian ini berpandangan bahawa kajian semula perlu dilaksanakan dengan mengambil kira dua perkara yang dinyatakan tersebut.”

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN KHOO POAY TIONG [KOTA MELAKA]

SOALAN

Tuan Khoo Poay Tiong [Kota Melaka] minta **MENTERI ALAM SEKITAR DAN AIR** menyatakan:

1. adakah projek Melaka Gateway di bawah Syarikat KAJ Development Sdn Bhd telah mendapatkan kelulusan Laporan Impak Alam Sekitar (EIA), termasuklah tarikh EIA tersebut dijalankan dan tarikh kelulusan laporan EIA tersebut; dan
2. apakah intipati laporan EIA tersebut (dipohon melampirkan salinan laporan EIA tersebut bersama dengan jawapan).

JAWAPAN

Tuan Yang Di-Pertua,

1. Syarikat KAJ Development Sdn. Bhd. masih belum mengemukakan Laporan Penilaian Impak Alam Sekeliling (*Environmental Impact Assessment - EIA*) untuk penilaian dan kelulusan Ketua Pengarah Alam Sekeliling di bawah Seksyen 34A, Akta Kualiti Alam Sekeliling 1974 (Akta 127).
2. Projek ini tertakluk kepada Jadual Kedua berdasarkan Perintah Kualiti Alam Sekeliling (Aktiviti yang Ditetapkan)(Laporan kesan kepada Alam Sekeliling) 2015, maka pameran awam akan dilaksanakan dan mana-mana pihak boleh membuat ulasan kepada cadangan projek tersebut.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN KHOO POAY TIONG [KOTA MELAKA]

SOALAN

Tuan Khoo Poay Tiong [Kota Melaka] minta **MENTERI ALAM SEKITAR DAN AIR** menyatakan:

1. rumusan teknikal mengenai 6 projek tebatan banjir di bawah RMK-12 yang sedang dilaksanakan di Melaka, terutamanya penjelasan mengenai rasional dan bagaimanakah projek-projek tersebut dapat menangani masalah banjir di Melaka; dan
2. apakah status terkini pelaksanaan projek-projek tersebut.

JAWAPAN

Tuan Yang Di-Pertua,

1. Berdasarkan analisis hidrologi awal, didapati bahawa kapasiti sungai sedia ada di negeri Melaka hanya boleh menampung kadar alir yang rendah. Pembangunan dan perubahan guna tanah telah menyumbang kepada peningkatan kadar air larian permukaan (*surface runoff*) yang masuk ke dalam sungai-sungai di negeri Melaka. Ini menyebabkan limpahan sungai ketika hujan lebat.
2. Saluran sungai yang sempit dan cetek, ditambah dengan halangan struktur seperti pembetung, jambatan dan alur limpah pengairan tetap (*fixed irrigation weir*) telah menyekat aliran air sungai. Selain itu, terdapat kawasan lembangan sungai yang terletak di kawasan dataran rendah. Risiko banjir meningkat apabila paras air sungai lebih tinggi serta faktor-faktor di atas dan menyebabkan limpahan air sungai tersebut. Keadaan ini bertambah buruk apabila hujan lebat bertembung dengan air pasang tinggi yang telah menghalang aliran air banjir daripada keluar ke muara sungai.
3. Bagi mengatasi masalah ini, antara kaedah kawalan yang boleh dilaksanakan adalah melebar dan mendalamkan sungai; membina ban, tembok banjir (*floodwall*) dan kolam takungan banjir serta menaiktaraf kolam takungan sedia ada; membina struktur baraj bagi mengawal aras air sungai; menaiktaraf jambatan sedia ada; memasang sistem pam, perlindungan cerun sungai dan struktur saluran keluar atau *outlet structure* seperti pintu kepak atau *flap gate* di saluran keluar parti-parit yang masuk ke dalam sungai. Kaedah-kaedah ini dijangka meningkatkan kapasiti sungai bagi menampung kadar alir yang tinggi semasa hujan lebat.
4. Oleh yang demikian, berdasarkan kajian perunding ke atas projek-projek tebatan banjir di negeri Melaka, skop kerja dan status bagi projek-projek adalah seperti jadual yang dilampirkan.

Skop kerja dan status bagi projek-projek tebatan banjir di Negeri Melaka

Bil	Projek	Skop	Status
1	Rancangan Tebatan Banjir Alor Gajah Fasa 1	1. Pembinaan Kolam Takungan Banjir 2. Kerja Menaiktaraf Sungai 3. Pembinaan Parit <i>Pegoh Diversion</i> 4. Pembinaan Perimeter Bund 5. Kerja Menaiktaraf Lintasan di Taman Sri Bayu 1	Penilaian Tender
2	Rancangan Tebatan Banjir Sungai Duyong	1. Kerja-kerja penggalian sungai dan menaiktaraf ban 2. Pembinaan <i>Flood wall</i> 3. Pembinaan rumah pam 4. Pembinaan <i>Tidal Control Gate</i> 5. Kerja Micropile di bawah jambatan 6. Pembinaan <i>Medium Traffic Bridge (MTB)</i> 7. Pembinaan <i>Culvert Crossing</i> 8. Pembinaan <i>River Slope Protection</i> 9. Pembinaan <i>Outlet Structure</i>	Pembinaan

SOALAN NO: 206

3	Rancangan Tebatan Banjir Bandar Jasin	<ul style="list-style-type: none"> 1. Menaiktaraf Sungai Kesang sepanjang 11.00km 2. Memasang micropile di jambatan Chin Chin 3. Memasang <i>gabion</i> dan <i>gabion matresses</i> di jambatan Chenderah Kumpai 4. Meroboh dan membina <i>Medium Traffic Bridge</i> (MTB) 5. Menaiktaraf parit di bandar Jasin sepanjang 315m 6. Meroboh dan membina Stesen Sistem Hidrologi dan stesen JAS sediada di Chin Chin 	Penilaian Tender
4	Rancangan Tebatan Banjir Bandar Merlimau	<ul style="list-style-type: none"> 1. Menaiktaraf dan melebarkan Sungai Merlimau sepanjang 1.7km 2. Menaiktaraf Sungai Merlimau sepanjang 1.55km 3. Menaiktaraf 3 Nos <i>Medium Traffic Bridge</i> (MTB) 4. Menaiktaraf Parit Utama M2M6 sepanjang 50m 5. Membina 2 Nos kolam takungan banjir 6. Menaiktaraf Jambatan No.2 di Lintasan JKR M25 	Penilaian Tender
5	Rancangan Tebatan Banjir Sungai Melaka Fasa 1	Masih dalam proses rekabentuk oleh perunding yang dilantik	Dalam fasa rekabentuk terperinci

SOALAN NO: 206

6	Projek Menaiktaraf Kolam Tebatan Banjir Krubong-Durian Tunggal Sebagai Kolam Dwi-Fungsi Untuk Tebatan Banjir dan Sumber Air Negeri Melaka	1. Menaiktaraf Kolam Takungan Banjir 2. Pembinaan Infrastruktur <i>Draw-Off Tower</i> termasuk Sistem Mekanikal dan Elektrikal 3. Pembinaan <i>Ancillary Building</i>	Penilaian Tender
---	---	---	------------------

Sekian,

terima

kasih

SOALAN NO: 206

Bil	Projek	Skop
1	Rancangan Tebatan Banjir Alor Gajah Fasa 1	<ul style="list-style-type: none"> 1. Pembinaan Kolam Takungan Banjir 2. Kerja Menaiktaraf Sungai 3. Pembinaan Parit <i>Pegoh Diversion</i> 4. Pembinaan Perimeter Bund 5. Kerja Menaiktaraf Lintasan di Taman Sri Bayu 1
2	Rancangan Tebatan Banjir Sungai Duyong	<ul style="list-style-type: none"> 1. Kerja-kerja penggalian sungai dan menaiktaraf ban 2. Pembinaan <i>Flood wall</i> 3. Pembinaan rumah pam 4. Pembinaan <i>Tidal Control Gate</i> 5. Kerja Micropile di bawah jambatan 6. Pembinaan <i>Medium Traffic Bridge</i> (MTB) 7. Pembinaan <i>Culvert Crossing</i> 8. Pembinaan <i>River Slope Protection</i> 9. Pembinaan <i>Outlet Structure</i>
3	Rancangan Tebatan Banjir Bandar Jasin	<ul style="list-style-type: none"> 1. Menaiktaraf Sungai Kesang sepanjang 11.00km 2. Memasang micropile di jambatan Chin Chin 3. Memasang <i>gabion</i> dan <i>gabion matresses</i> di jambatan Chenderah Kumpai 4. Meroboh dan membina <i>Medium Traffic Bridge</i> (MTB) 5. Menaiktaraf parit di bandar Jasin sepanjang 315m 6. Meroboh dan membina Stesen Sistem Hidrologi dan stesen JAS sediada di Chin Chin

SOALAN NO: 206

4	Rancangan Tebatan Banjir Bandar Merlimau	<ol style="list-style-type: none"> 1. Menaiktaraf dan melebarkan Sungai Merlimau sepanjang 1.7km 2. Menaiktaraf Sungai Merlimau sepanjang 1.55km 3. Menaiktaraf 3 Nos <i>Medium Traffic Bridge</i> (MTB) 4. Menaiktaraf Parit Utama M2M6 sepanjang 50m 5. Membina 2 Nos kolam takungan banjir 6. Menaiktaraf Jambatan No.2 di Lintasan JKR M25
5	Rancangan Tebatan Banjir Sungai Melaka Fasa 1	Masih dalam proses rekabentuk oleh perunding yang dilantik
6	Projek Menaiktaraf Kolam Tebatan Banjir Krubong-Durian Tunggal Sebagai Kolam Dwi-Fungsi Untuk Tebatan Banjir dan Sumber Air Negeri Melaka	<ol style="list-style-type: none"> 1. Menaiktaraf Kolam Takungan Banjir 2. Pembinaan Infrastruktur <i>Draw-Off Tower</i> termasuk Sistem Mekanikal dan Elektrikal 3. Pembinaan <i>Ancillary Building</i>

Status Pelaksanaan Projek-projek tebatan banjir di negeri Melaka adalah seperti berikut:

Bil	Projek	Status
1	Rancangan Tebatan Banjir Alor Gajah Fasa 1	Penilaian Tender
2	Rancangan Tebatan Banjir Sungai Duyong	Pembinaan

SOALAN NO: 206

3	Rancangan Tebatan Banjir Bandar Jasin	Penilaian Tender
4	Rancangan Tebatan Banjir Bandar Merlimau	Penilaian Tender
5	Rancangan Tebatan Banjir Sungai Melaka Fasa 1	Dalam fasa rekabentuk terperinci
6	Projek Menaiktaraf Kolam Tebatan Banjir Krubong-Durian Tunggal Sebagai Kolam Dwi-Fungsi Untuk Tebatan Banjir dan Sumber Air Negeri Melaka	Penilaian Tender

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

**DARIPADA : TUAN KHOO POAY TIONG
[KOTA MELAKA]**

TARIKH : JULAI – OGOS 2022

SOALAN

TUAN KHOO POAY TIONG [KOTA MELAKA] minta **MENTERI PENGANGKUTAN menyatakan :-**

- (a) langkah-langkah yang telah diambil untuk mengurangkan kesesakan lalu lintas di Melaka, terutamanya dari segi pembangunan sistem pengangkutan awam; dan
- (b) apakah rasional dan status pembinaan tram sebagai mod pengangkutan awam baharu di Melaka sepetimana yang diumumkan oleh Menteri baru-baru ini.

JAWAPAN

Tuan Yang Di Pertua,

Ketika ini mod pengangkutan awam di negeri Melaka meliputi perkhidmatan bas berhenti-henti, bas ekspres, teksi/kereta sewa serta perkhidmatan e-hailing.

Kerajaan di bawah skim Interim Stage Bus Support Fund (ISBSF) membelanjakan lebih 4 juta setahun untuk menyediakan perkhidmatan bas berhenti-henti di negeri Melaka meliputi 29 laluan dengan jumlah 40 buah bas keseluruhannya.

Sejak tahun 2021 pemantauan prestasi pengendali bas berhenti-henti ini dipantau sepenuhnya melalui sistem GPS kenderaan yang telah diintegrasikan ke pusat kawalan Agensi Pengangkutan Awam Darat (APAD). Ini bertujuan untuk memastikan perkhidmatan yang disediakan pengendali adalah mengikut keperluan tahap perkhidmatan yang telah ditetapkan termasuk dari segi trip dan ketepatan masa bas beroperasi.

Selain daripada itu terdapat 30 pengendali bas ekspres yang menyediakan perkhidmatan dari/ke Melaka dengan purata jumlah perjalanan 186 trip sehari. Dengan penambahbaikan sistem pengangkutan yang sedang dan akan dilaksanakan di negeri Melaka di harap dapat menarik lebih ramai pengguna pengangkutan awam sekaligus membantu dalam mengurangkan isu kesesakan jalan raya di negeri ini.

Kementerian Pengangkutan juga akan bekerjasama dengan kementerian yang lain seperti Kementerian Perumahan dan Kerajaan Tempatan untuk penyediaan infrastruktur bagi menyokong sistem pengangkutan di negeri ini termasuk cadangan penyediaan laluan khas pengangkutan awam di laluan-laluan utama.

Sekian, terima kasih

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB TUAN KHOO POAY TIONG (KOTA MELAKA)

SOALAN

TUAN KHOO POAY TIONG (KOTA MELAKA) minta **MENTERI DALAM NEGERI menyatakan :-**

- (a) sama ada Kerajaan bercadang untuk meminda akta-akta berkaitan dengan dadah untuk mengetatkan penguatkuasaan terhadap penyalahgunaan dan pengedaran dadah; dan
- (b) adakah Kerajaan akan menerima pakai prinsip “decriminalising drug” untuk mengatasi masalah dadah di Malaysia.

JAWAPAN

Tuan Yang Di Pertua,

Kementerian Dalam Negeri (KDN) melalui Agensi Antidadah Kebangsaan (AADK) amat memandang serius isu penyalahgunaan dan penagihan dadah di negara kita. Bagi memastikan perudangan semasa terus relevan, Mesyuarat Jawatankuasa Bertindak Penguatkuasaan Undang-Undang yang telah dipengerusikan oleh Menteri Dalam Negeri pada 21 Julai 2020 bersetuju bahawa suatu dasar pengalihan penyalahguna dadah dari hukuman penjara ke program rawatan dan pemulihan dadah perlu dilaksanakan. Tujuan utama dasar pengalihan penyalahguna dadah ini adalah untuk meningkatkan akses bagi mendapatkan rawatan dan pemulihan dadah untuk mereka yang memerlukannya supaya dapat kembali kepada masyarakat. Mesyuarat juga bersetuju supaya dasar pengalihan ini diperhalusi dalam Akta baharu yang dikenali sebagai Akta Penyalahgunaan Dadah dan Bahan bagi menggantikan Akta Penagih Dadah (Rawatan dan Pemulihan) 1983.

Akta baharu ini kelak akan merangkumi aspek perundangan yang lebih komprehensif dan tersusun bagi membolehkan penyalah guna dan penagih dadah serta bahan dapat menerima rawatan dan pemulihan dengan sewajarnya di dalam institusi atau komuniti.

Berhubung isu pengedaran dadah, Polis Diraja Malaysia (PDRM) telah membuat penilaian dan merangka pendekatan baru dalam membendung aktiviti pengedaran dadah termasuk menggunakan strategi 5M iaitu i) menentang penyeludupan dadah; ii) menyekat penawaran dadah; iii) memperhebatkan jaringan nasional dan antarabangsa; iv) memperkuuh dan meningkatkan pelaksanaan pelucutahan harta; dan v) menjadi rakan kepada rehabilitasi. Selain itu, pihak PDRM turut menjalankan ‘Operasi Ice Breaker’ bermula pada pertengahan tahun 2019 dan ‘Operasi Damn Tokan’ bagi menggempur rangkaian pengedaran dadah secara agresif.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN KHOO POAY TIONG [KOTA MELAKA]

SOALAN

TUAN KHOO POAY TIONG minta **MENTERI KESIHATAN** menyatakan:-

- (a) statistik berkenaan dengan Skim Peduli Kesihatan (PeKa B40) untuk tahun 2019- 2022 (bilangan saringan kesihatan yang telah dijalankan, bilangan penerima, jumlah manfaat dibayar mengikut jenis, dan lain-lain statistik berkaitan); dan
- (b) adakah Kementerian bercadang untuk memperluaskan skim ini kepada golongan berpendapatan M40.

JAWAPAN

Tuan Yang di-Pertua,

1. Sejak 15 April 2019 hingga 30 Jun 2022, seramai 640,553 orang telah disaring di bawah Skim Peduli Kesihatan untuk Kumpulan B40 atau dikenali sebagai PeKa B40. Walau bagaimanapun, jumlah saringan tersebut hanyalah 10.8% daripada 5,950,291 penerima Bantuan Prihatin Rakyat (BPR) yang layak untuk skim ini.
2. Berikut adalah jumlah penerima dan jumlah peruntukan mengikut jenis manfaat yang telah disalurkan di bawah program PeKa B40:

SOALAN NO. 209

Manfaat	Bilangan saringan/penerima	Perbelanjaan
Manfaat 1: Saringan Kesihatan	640,553	RM54,901,994
Manfaat 2: Bantuan Alat Perubatan	36,850	RM66,136,420
Manfaat 3: Insentif Melengkapkan Rawatan Kanser	6,886	RM2,709,200
Manfaat 4: Insentif Tambang Pengangkutan	22,403	RM2,306,044
Jumlah	706,692	RM126,053,658

3. Buat masa ini, KKM akan terus memberi fokus program PeKa B40 kepada golongan B40. Bagi kumpulan yang berpendapatan sederhana (M40) dan mampu membiayai sendiri saringan kesihatan mereka boleh mendapat pelepasan pendapatan bercukai sehingga RM1,000 untuk pemeriksaan perubatan. Pelepasan pendapatan bercukai juga boleh diperolehi untuk perbelanjaan berikut:

- (i) RM8,000 untuk perbelanjaan rawatan perubatan untuk diri sendiri, pasangan dan anak-anak;
- (ii) RM8,000 untuk rawatan perubatan dan keperluan khas ibu bapa; dan
- (iii) RM6,000 untuk peralatan sokongan asas bagi diri sendiri, pasangan dan ibu bapa yang kurang upaya.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT MESYUARAT KEDUA PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN LARRY SOON @ LARRY SNG
WEI SHIEN [JULAU]**

SOALAN

TUAN LARRY SOON @ LARRY SNG WEI SHIEN [HULU SELANGOR] minta MENTERI BELIA DAN SUKAN menyatakan secara terperinci: -

- a) apakah tahap pengangguran dalam kalangan golongan belia di negara yang status sosioekonominya berada dalam kategori miskin tegar peringkat nasional dan merentas pelbagai negeri bagi tahun 2020, 2021 dan 2022; dan
- b) langkah kerajaan ke arah mencapai matlamat Miskin Tegar Sifar 2025.

JAWAPAN

Tan Sri Yang Di Pertua,

Untuk makluman Ahli Yang Berhormat, Kementerian Belia dan Sukan tidak mempunyai data berkaitan kadar pengangguran dalam kalangan golongan belia di negara yang status ekonominya berada dalam kategori miskin tegar. Walau bagaimanapun, berdasarkan kepada Survei Tenaga Buruh, Jabatan Perangkaan Malaysia, kadar pengangguran belia berumur 15 hingga 30 tahun bagi tahun 2020 adalah seramai 497,200 orang dengan kadar peratusan 8.7% dan telah menunjukkan peningkatan sebanyak 0.2% kepada 8.5% pada tahun 2021 dengan bilangan pengangguran seramai 533,800 orang belia.

Bagi tempoh sehingga April tahun 2022, menunjukkan kadar pengangguran bagi belia berumur 15 hingga 30 tahun menurun sebanyak 0.3% kepada 7.7%, dengan bilangan belia yang mengagggur menurun sebanyak 102,000 (0.2% penurunan) daripada 502,400 orang pada bulan Mac 2022 kepada 501,200 orang pada April 2022. Mohon mengambil maklum bahawa data penuh pengangguran belia bagi tahun 2022 akan diperolehi pada awal tahun 2023 dengan mengambil kira tahun semasa 2022 adalah sehingga Disember. Perincian kadar pengangguran belia berumur 15 hingga 30 tahun mengikut tahun 2020 hingga 2022 adalah seperti pada **Lampiran 1**.

Berdasarkan Statistik Kemiskinan Nasional belia berumur 15-40 tahun yang berdaftar di dalam Sistem eKasih, Jabatan Perdana Menteri (JPM) menunjukkan bilangan belia miskin tegar di bawah kategori Ketua Isi Rumah (KIR) pada tahun 2020 seramai 40,136 dan pada tahun 2021 berlaku pertambahan sebanyak 774 menjadikan keseluruhan sebanyak 40,910. Manakala belia dalam kategori Belia Ahli Isi Rumah (AIR) pada tahun 2020 mencatatkan seramai 522,219 dan tahun 2021 berlaku penurunan sebanyak 50,388 orang dengan jumlah keseluruhan seramai 471,831. Perincian Statistik Kemiskinan Nasional mengikut negeri adalah seperti jadual berikut: -

Statistik Kemiskinan Nasional Ketua Isi Rumah (KIR) Belia (15-40 Tahun) Mengikut Status Kemiskinan & Negeri Bagi Tahun 2020 - 2021

BIL.	NEGERI	STATUS KEMISKINAN	
		MISKIN TEGAR	
		2020	2021
1	Johor	833	801
2	Kedah	1,828	2,065
3	Kelantan	8,217	8,255
4	Melaka	514	515
5	Negeri Sembilan	767	840
6	Pahang	985	965
7	Pulau Pinang	823	879
8	Perak	2,035	2,156
9	Perlis	1,493	1,493
10	Selangor	2,760	2,221
11	Terengganu	1,610	1,286
12	Sabah	9,412	10,526
13	Sarawak	8,242	8,278
14	WP.Kuala Lumpur	412	447
15	WP.Labuan	197	172
16	WP.Putrajaya	8	11
JUMLAH KESELURUHAN		40,136	40,910

Statistik Kemiskinan Nasional Ahli Isi Rumah (AIR) Belia (15-40 Tahun) Mengikut Status Kemiskinan & Negeri Bagi Tahun 2020 – 2021

BIL.	NEGERI	STATUS KEMISKINAN	
		MISKIN TEGAR	
		2020	2021
1	Johor	19,093	15,252
2	Kedah	32,280	31,678
3	Kelantan	98,542	91,930

BIL.	NEGERI	STATUS KEMISKINAN	
		MISKIN TEGAR	
		2020	2021
4	Melaka	8,338	7,749
5	Negeri Sembilan	13,775	12,892
6	Pahang	21,518	18,831
7	Pulau Pinang	15,822	15,766
8	Perak	29,767	27,850
9	Perlis	15,072	13,441
10	Selangor	29,813	20,797
11	Terengganu	26,338	19,006
12	Sabah	96,253	89,002
13	Sarawak	108,809	101,274
14	WP.Kuala Lumpur	5,448	5,380
15	WP. Labuan	1,325	955
16	WP. Putrajaya	26	28
JUMLAH KESELURUHAN		522,219	471,831

Untuk makluman Yang Berhormat, data bagi tahun 2022 akan dibekalkan pada awal tahun 2023 dengan mengambil kira tahun semasa 2022 sehingga Disember.

(b)

Seperti Yang Berhormat sedia maklum, YAB Perdana Menteri dalam pembentangan Rancangan Malaysia Kedua Belas pada 27 September 2021, telah mengumumkan bahawa Kerajaan akan melaksanakan program pembasmian kemiskinan tegar menggunakan pendekatan keseluruhan negara atau dengan izin, *whole-of-nation approach*, bagi menghapuskan kemiskinan tegar di kalangan rakyat negara ini.

Program Pembasmian Kemiskinan Tegar (BMTKM) adalah pelengkap kepada program sedia ada untuk menangani isu kemiskinan dalam Keluarga Malaysia. Kumpulan sasar miskin tegar ini merentasi pelbagai kumpulan etnik dalam Keluarga Malaysia merangkumi Bumiputera, Cina, India, etnik-etnik lain di Semenanjung Malaysia, Sabah dan Sarawak serta masyarakat Orang Asli.

Unit Perancang Ekonomi, Jabatan Perdana Menteri (EPU) dan ICU telah diberi tanggungjawab untuk menyelaras dan memudah cara pelaksanaan program BMTKM yang melibatkan penyertaan pelbagai pihak berkepentingan di seluruh negara.

BMTKM akan menggunakan pendekatan berikut:

- i. Menubuhkan Unit Kemiskinan khusus pada peringkat Persekutuan, Negeri dan Daerah;
- ii. Mewujudkan pangkalan data kemiskinan yang bersepadu dan berpusat;
- iii. Mempertingkat program pendekatan dari bawah ke atas melalui pendekatan keseluruhan negara (*whole-of-nation approach*); dan
- iv. Melaksanakan penyelesaian kemiskinan pada peringkat akar umbi.

Program BMTKM yang bertujuan membasmi miskin tegar pada tahun 2025 ini akan bermula dengan fasa 1 melibatkan 80 lokaliti rintis di seluruh negara. Fasa 2 dan Fasa 3 akan bermula pada September dan Disember 2022. Fasa 4 sehingga fasa 6 akan dilaksanakan pada tahun 2023.

Berdasarkan data eKasih sehingga 30 Jun 2022 yang dikeluarkan oleh ICU, JPM, terdapat seramai 144,932 ketua isi rumah (KIR) miskin tegar di seluruh negara. Sarawak mencatatkan bilangan KIR miskin tegar tertinggi iaitu seramai 39,858 orang diikuti Sabah 22,884, Kelantan 17,615 dan Kedah 11,307. Justeru, Kerajaan telah memperuntukan lebih banyak lokaliti untuk menghapuskan kemiskinan tegar di keempat-empat negeri ini.

Antara program di bawah BMTKM yang dicadangkan merangkumi peningkatan pendapatan, projek-projek pertanian, bantuan peralatan nelayan, perikanan, keusahawanan, pemasaran serta pembangunan minda dan motivasi.

Bagi memastikan pelaksanaan BMTKM adalah seperti yang dirancang, Jawatankuasa Pemantauan Peringkat Daerah dan Cawangan akan bersidang sebulan sekali untuk memantau pelaksanaan BMTKM dan mengambil tindakan intervensi sekiranya perlu bagi mengatasi isu/masalah berbangkit dengan berkesan.

Sekian, terima kasih.

**PENGANGGUR BELIA DAN KADAR PENGANGGURAN BELIA
MENGIKUT KUMPULAN UMUR TERPILIH, JANUARI 2020 - APRIL
2022**

Siri Masa	('000)	(%)	('000)	(%)
	Penganggur belia (15 - 24 tahun)	KP belia (15 - 24 tahun)	Penganggur belia (15 - 30 tahun)	KP belia (15 - 30 tahun)
2020				
Januari	268.1	10.0	396.9	6.4
Februari	288.0	10.8	395.0	6.4
Mac	291.4	11.3	470.5	7.8
April	324.2	12.9	528.0	9.0
Mei	362.4	14.2	573.7	10.0
Jun	335.8	13.1	581.7	9.7
Julai	313.2	13.9	544.5	9.7
Ogos	331.0	13.7	502.3	8.9
September	325.5	13.0	502.6	8.5
Oktober	321.6	13.4	513.2	8.9
November	344.5	13.0	528.4	8.8
Disember	312.2	13.2	497.2	8.7
2021				
Januari	295.3	13.5	509.2	9.2
Februari	347.6	13.9	544.3	9.2
Mac	321.1	13.4	537.3	9.3
April	310.7	13.7	507.3	8.7
Mei	328.1	13.6	545.7	9.2
Jun	340.9	12.7	565.1	9.4
Julai	344.1	13.7	520.6	8.5
Ogos	321.1	13.9	524.1	8.8
September	335.1	13.9	507.8	8.5
Oktober	358.8	13.9	508.4	8.1
November	350.9	13.7	517.9	8.2
Disember	367.7	13.7	533.8	8.5
2022				
Januari	364.5	13.2	521.8	8.3
Februari	356.9	13.0	513.7	8.1
Mac	361.0	13.1	502.4	8.0
April	357.2	12.8	501.2	7.7

SKIM PERANTISAN NASIONAL

Skim Perantisan Nasional (SPN) merupakan program berkonsepkan “*place and train*” bagi membantu melonjakkan kebolehpasaran belia dan menyediakan lebih banyak peluang untuk belia mendapatkan pengalaman bekerja. Kementerian Belia dan Sukan bekerjasama dengan Kementerian Sumber Manusia di bawah inisiatif PENJANA bagi melaksanakan program SPN untuk belia mendapatkan pengalaman bekerja di sektor swasta dan syarikat berkaitan Kerajaan (GLC). Program SPN melibatkan penempatan latihan perantisan selama 3 hingga 6 bulan. Perantis akan ditempatkan di syarikat mengikut keperluan bidang kerja dan kemahiran yang diperlukan oleh syarikat tersebut. Dalam tempoh penempatan ini, perantis akan mengikuti latihan kemahiran *soft skills* yang dikendalikan oleh penyedia latihan secara berkala. Latihan *soft skills* ini mensasarkan peningkatan modal insan dan *profile* perantis. Sehingga Disember 2021, jumlah peserta yang terlibat dalam program Skim Perantisan Nasional (SPN) adalah seperti berikut: -

Jumlah permohonan keseluruhan perantis SPN	23,969 orang
Jumlah penempatan perantis SPN	7,679 orang
Jumlah syarikat dan <i>training provider</i>	171 syarikat 4 <i>training provider</i>

SOALAN NO : 210

Senarai Program myPRENEUR

Bil	Tajuk Program	Tarikh	Bilangan Peserta	Status
1.	ASAS KEMAHIRAN DIGITAL - CANVA	23.2.2022	155	Telah dilaksanakan
2.	BISNES FRANCAIS TANPA MODAL?	24.2.2022	120	Telah dilaksanakan
3.	BISNES ICON - INSPIRED YOUR BUSINESS	10.3.2022	140	Telah dilaksanakan
4.	RAHSIA LETUPKAN SALE	30.3.2022	121	Telah dilaksanakan
5.	PERSIJILAN HALAL JAKIM	31.3.2022	120	Telah dilaksanakan
6.	PERSONAL BRANDING IN BUSINESS	22.4.2022	119	Telah dilaksanakan
7.	IDEA LAMA? BUSINESS SENDU?	26.4.2022	126	Telah dilaksanakan
8.	MOH KOME DAFTAR PERNIAGAAN DI SURUHANJAYA SYARIKAT MALAYSIA (SSM)	19.5.2022	173	Telah dilaksanakan
9.	ONLINE BUSINESS DENGAN LAZADA	23.5.2022	123	Telah dilaksanakan
10.	PERSIJILAN MESTI/BESS	31.5.2022	115	Telah dilaksanakan
11.	FACEBOOK-FREE COST MARKETING	8.6.2022	135	Telah dilaksanakan
12.	MANUAL TEKNOLOGI - PENANAMAN CENDAWAN TIRAM	14.6.2022	127	Telah dilaksanakan
13.	ANDA USAHAWAN BIJAK? JOM CAKNA CUKAI..!	28.6.2022	107	Telah dilaksanakan
14.	ASAS PERNIAGAAN DIGITAL - INSTAGRAM	22.6.2022	153	Telah dilaksanakan
15.	NAK BISNES SELAMAT:LINDUNGI HARTA INTELEK	30.6.2022	82	Telah dilaksanakan
16.	KURSUS "STEP TO SUCCESS" MYPRENEUR@APBM SIRI 1/2022	25-27.3.2022	50	Telah dilaksanakan
17.	KURSUS "STEP TO SUCCESS" MYPRENEUR@APBM SIRI 2/2022	28-31.5.2022	47	Telah dilaksanakan
18.	"EMPOWER BAKERS" MYPRENEUR@APBMBG	17-19.6.2022	30	Telah dilaksanakan
JUMLAH PENYERTAAN			2043 Peserta	

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN LARRY SOON @ LARRY SNG WEI SHIEN [JULAU]

SOALAN

Tuan Larry Soon @ Larry Sng Wei Shien [Julau] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan jumlah semasa permohonan untuk membuka stesen minyak di dalam kawasan Parlimen Julau. Berapa jumlah yang telah diluluskan, jumlah permohonan yang akan diluluskan serta tempoh masa untuk meneliti dan meluluskan setiap permohonan.

JAWAPAN

Yang di-Pertua,

Untuk makluman Yang Berhormat, pada masa kini terdapat lima (5) tapak stesen minyak yang telah diluluskan dan sedang dalam proses pembinaan di Kawasan Parlimen Julau di lokasi seperti berikut:

- i. Pedanum Land District, Pakan Julau, Sarawak;
- ii. Julau/ Entabai Road, Julau, Sarawak;
- iii. Pakan Bazar, Pedanum Land District, Pakan, Sarawak;
- iv. Jalan Entabai, Julau, Sarikei, Sarawak; dan
- v. KJD Road, Meradong, Sarikei, Sarawak.

Proses penelitian dan kelulusan mengambil masa lebih kurang empat (4) minggu, tertakluk kepada syarikat minyak mengemukakan dokumen lengkap.

Walau bagaimanapun, Kementerian Perdagangan Dalam Negeri dan Hal Ehawal Pengguna (KPDNHEP) berusaha untuk memastikan bekalan petrol dan diesel di kawasan Parlimen Julau melalui program pengedaran *Community Drumming (CD)*. Pada ketika ini terdapat 69 *point of sale (POS)* di bawah program *CD* yang membekalkan produk petroleum kepada penduduk di 37 kawasan pengedaran di Julau.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN LARRY SOON @ LARRY SNG WEI SHIEN [JULAU]

SOALAN

Minta **MENTERI PENGAJIAN TINGGI** menyatakan secara terperinci:

- (a) berapa jumlah pinjaman yang telah diluluskan dan dibelanjakan oleh PTPTN bagi tiga tahun terkini bermula dari tahun 2020, 2021 dan 2022; dan
 - (b) jumlah terkini pembayaran semula yang telah berjaya dikutip dan juga jumlah pinjaman yang gagal dibayar bagi tempoh bermula tiga tahun bermula tahun 2020, 2021 dan 2022.

JAWAPAN

Tan Sri Yang di-Pertua,

Bagi tempoh tiga tahun terkini, iaitu mulai tahun 2020, 2021 dan hingga 30 Jun 2022, PTPTN telah meluluskan pinjaman sebanyak RM8.22 bilion. Daripada jumlah tersebut, sebanyak RM7.48 bilion telah dikeluarkan kepada peminjam dengan baki selebihnya akan dikeluarkan secara berperingkat sehingga peminjam tamat pengajian.

Bagi bayaran balik pinjaman untuk tempoh tiga tahun terkini pula, iaitu mulai tahun 2020, 2021 dan hingga 30 Jun 2022 pula, PTPTN telah berjaya mengutip bayaran balik sebanyak RM5.418 bilion. Secara kumulatif, PTPTN telah mengutip sebanyak RM17.83 bilion daripada keseluruhan jumlah patut kutip, iaitu RM27.38 bilion, dengan jumlah tunggakan sebanyak RM9.55 bilion (34.87%).

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN LARRY SOON @
LARRY SNG WEI SHEIN
[JULAU]**

SOALAN

TUAN LARRY SOON @ LARRY SNG WEI SHEIN TAN [JULAU] minta **MENTERI PEMBANGUNAN USAHAWAN DAN KOPERASI** menyatakan berapa jumlah usahawan Bumiputera yang telah berjaya dilahirkan di negeri Sarawak bagi tiga tahun terkini iaitu bermula dari tahun 2020, 2021, 2022 dan nyatakan juga jumlah mereka yang gagal serta puncanya.

JAWAPAN

Tuan Yang di-Pertua,

Bagi tahun 2020 hingga Jun 2022, seramai **13,189 usahawan bumiputera di negeri Sarawak** telah berjaya dilahirkan atau menerima manfaat melalui pelbagai jenis program yang dilaksanakan oleh agensi di bawah KUSKOP. Antara program-program tersebut adalah:

- 1. Program Tunas Usahawan Belia Bumiputera (TUBE) oleh SME Corp.** yang bertujuan membantu meningkatkan penglibatan belia Bumiputera dalam bidang perniagaan dan keusahawanan. Bagi tempoh 2021 sehingga 2022, seramai **123 usahawan baharu** dari negeri Sarawak telah dibangunkan dengan melibatkan peruntukan sebanyak RM1.81 juta.
- 2. Program-program latihan dan bimbingan oleh Institut Keusahawanan Negara (INSKEN)** seperti Latihan Asas Keusahawanan, Program Latihan Asas Bisnes, Latihan Perkembangan Bisnes dan

Bimbingan Perkembangan Bisnes. Bagi tempoh 2021 sehingga 2022, seramai **3,375 usahawan** dari negeri Sarawak telah dilatih oleh INSKEN melalui program-program bimbingan keusahawanan.

3. Kemudahan skim dan inisiatif pembiayaan oleh TEKUN Nasional, SME Bank, Bank Rakyat dan PERNAS kepada seramai 9,691 usahawan bumiputera di Negeri Sarawak bagi tahun 2020 hingga 2022 dengan nilai pembiayaan berjumlah RM755.1 juta.

Berdasarkan Kaji Selidik Ke Atas Usahawan semasa Perintah Kawalan Pergerakan 3.0 (PKP 3.0), yang telah dilaksanakan oleh Kementerian Pembangunan Usahawan dan Koperasi (KUSKOP) pada Jun 2021 mendapati bahawa **sebanyak 3.16% atau 37,415 usahawan** telah berhenti beroperasi atau gulung tikar. Daripada jumlah tersebut, peratusan perniagaan gulung tikar melibatkan responden yang terdiri daripada **usahawan bumiputera negeri Sarawak tahun 2021 adalah sebanyak 0.03% atau 22 usahawan**.

Dari aspek kelangsungan perniagaan pula, KUSKOP juga mendapati bahawa antara punca kegagalan usahawan dan penutupan perniagaan terutamanya dalam tempoh pandemik adalah disebabkan **penguatkuaan pelaksanaan Perintah Kawalan Pergerakan (PKP)** sehingga menjaskan operasi perniagaan. Selain itu, antara punca kegagalan lain adalah terdapat peluang pendapatan lain yang lebih baik berbanding perniagaan sedia ada serta persaingan yang tinggi dalam aktiviti perniagaan yang sama.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN LARRY SOON @ LARRY SNG
WEI SHIEN (JULAU)**

SOALAN

TUAN LARRY SOON @ LARRY SNG WEI SHIEN (JULAU) minta **MENTERI PEMBANGUNAN LUAR BANDAR** menyatakan adakah pihak Kementerian mempunyai cadangan atau peruntukan khusus untuk membangunkan kawasan Parlimen Julau supaya penduduk-penduduk di kawasan sekitar turut dapat akses kepada kemudahan awam dan fasiliti yang membangun, sistem jalan raya yang baik serta saluran bekalan air yang bersih di dalam kawasan Parlimen ini.

JAWAPAN

Untuk makluman Yang Berhormat, sebanyak dua (2) projek Jalan Luar Bandar (JALB) dan dua (2) projek Jambatan Luar Bandar (JMLB) telah diluluskan kepada Kementerian ini di bawah *Rolling Plan* Kedua, Rancangan Malaysia Kedua belas (RP-2, RMKe-12) Tahun 2022 di kawasan Parlimen Julau, Sarawak dengan kos berjumlah RM72.17 juta. Dengan kelulusan ke empat-empat projek ini, diharap sistem jalan raya dan jaringan perhubungan yang selesa dan selamat di kawasan luar bandar di Parlimen Julau dapat dipertingkatkan seterusnya dinikmati penduduk setempat.

Kementerian sentiasa komited dalam memastikan liputan bekalan air bersih dan terawat dapat dinikmati oleh setiap penduduk di kawasan

SOALAN NO : 214

pedalaman di seluruh Sarawak. Penyediaan bekalan air bersih dan terawat ini akan dilaksanakan secara berperingkat mengikut kemampuan kewangan dan bajet yang telah diperuntukkan kepada Kementerian pada tahun semasa.

Bagi tempoh RMKe-12 sehingga tahun 2022, Kementerian diperuntukkan kos projek sebanyak RM2.025 bilion bagi pelaksanaan 44 projek di bawah Program Bekalan Air Luar bandar (BALB) di Sarawak. Daripada jumlah ini, dua (2) projek telah diluluskan pelaksanaan di bawah Parlimen Julau iaitu Projek BALB Julau Fasa II, Bahagian Sarikei melibatkan kos projek sebanyak RM69 juta dan Projek BALB Kawasan Nanga Lasi, Jalan KJD, Bahagian Sarikei melibatkan kos projek sebanyak RM53 juta.

Projek BALB Julau Fasa II, Bahagian Sarikei kini dalam peringkat rekabentuk oleh perunding dan pelaksanaan dijangka dapat dimulakan selewat-lewatnya pada pertengahan tahun 2023 yang akan memberi manfaat kepada 4,800 penduduk. Projek BALB Kawasan Nanga Lasi, Jalan KJD, Bahagian Sarikei pula baru sahaja diluluskan peruntukan pada tahun 2022 dan dalam penyediaan *Terms of Reference (TOR)* bagi pelantikan perunding.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : YB TUAN LIM GUAN ENG
[BAGAN]**

SOALAN:

Minta **PERDANA MENTERI** menyatakan sama ada arahan akan dikeluarkan untuk mengurangkan lawatan luar negeri oleh anggota pentadbiran agar memberikan perhatian penuh menangani kos sara hidup yang meningkat dan bilangan serta nyatakan kos lawatan luar negeri setiap tahun sejak 2020.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

1. Kerajaan pada masa ini sedang giat melaksanakan usaha menangani keperluan kos sara hidup rakyat. Pelbagai usaha telah dibuat Perdana Menteri dan pasukan dalam Kabinet khususnya bagi menteri yang terbabit secara langsung dengan ekonomi, kos sara hidup dan harga barang.
2. Pada masa yang sama, Kerajaan juga telah dan sedang mengambil tindakan tuntas untuk menyelesaikan isu-isu berkaitan ekonomi dan inflasi bagi memastikan kesan global yang sedang berlaku di seluruh dunia tidak memberi kesan teruk kepada rakyat negara ini. Antara lain tindakan Kerajaan ialah meningkatkan kekerapan mengadakan Mesyuarat Majlis Tindakan Sara Hidup (NACCOL) yang sebelum ini diadakan 2 kali setahun kepada 2 bulan sekali. Ini penting bagi membincangkan cara terbaik untuk menyelesaikan masalah yang dihadapi oleh rakyat Keluarga Malaysia melibatkan kos sara hidup.
3. Selain itu, Kerajaan juga telah menujuhkan Pasukan Khas Jihad Tangani Inflasi. Ini penting kerana kesan inflasi semakin menghimpit kehidupan rakyat dan tindakan segera perlu diambil bagi menguruskan inflasi serta memperbetulkan persepsi rakyat dengan lebih cekap dan bersepakutu.
4. Justeru, Kerajaan pada masa ini perlu mengambil pendekatan menyeluruh dalam mengimbangi keperluan rakyat dan usaha membangunkan negara melalui penarikan pelabur-pelabur asing serta menjaga hubungan diplomatik dengan negara luar. Lawatan luar negeri oleh anggota pentadbiran pula hendaklah mengambil kira serta mematuhi Pekeliling Perbendaharaan Malaysia - Garis Panduan Penjimatan Perbelanjaan Awam yang telah dikeluarkan oleh Kementerian Kewangan pada 14 Julai 2022.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN LIM GUAN ENG [BAGAN]

SOALAN

TUAN LIM GUAN ENG minta **MENTERI KESIHATAN** menyatakan perbelanjaan untuk menampung kos pembangunan dan pengurusan hospital dan klinik kesihatan di Pulau Pinang, khususnya status rancangan memindah dan membina Klinik Kesihatan Mak Mandin yang baru dalam kawasan Parlimen Bagan.

JAWAPAN

Tuan Yang di-Pertua,

1. Kementerian Kesihatan Malaysia (KKM) telah memperuntukkan sebanyak RM903.04 juta di bawah belanja mengurus bagi tahun 2022 untuk tujuan pengurusan dan pengoperasian enam (6) buah hospital manakala sebanyak RM235 juta di bawah pengurusan klinik kesihatan di Pulau Pinang.
2. Di bawah *Rolling Plan* 2, Rancangan Malaysia Kedua Belas (RMKe-12) tahun 2022, sebanyak RM197.8 juta telah diperuntukkan untuk projek-projek pembangunan di Pulau Pinang bagi melaksanakan projek-projek berikut:
 - (i) Pembinaan *Multi Storey Block*, Hospital Seberang Jaya;
 - (ii) Naik Taraf Jabatan Kecemasan, Unit Forensik Dan Patologi Hospital Balik Pulau, Pulau Pinang;

SOALAN NO. 217

(iii) Pembinaan Blok Wanita dan Kanak-Kanak Hospital Pulau Pinang, Pulau Pinang; dan

(iv) Pembinaan Blok Baharu Pusat Perkhidmatan Stem Sel, Hospital Pulau Pinang

3. KKM telah mengemukakan permohonan di bawah *Rolling Plan 3, RMKe-12* untuk tahun 2023 bagi pembinaan Klinik Kesihatan (Jenis 3) dan Kuarters Integrasi Mak Mandin, Pulau Pinang. Senarai muktamad projek yang diluluskan di bawah RP3, RMKe-12 tahun 2023 akan diketahui selepas Bajet 2023 diluluskan oleh Parlimen.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN LIM GUAN ENG [BAGAN]

SOALAN

TUAN LIM GUAN ENG [BAGAN] minta **MENTERI KESIHATAN** menyatakan status saman yang dikeluarkan di bawah Ordinan Darurat berkaitan dengan kesalahan melanggar Perintah Kawalan Pergerakan dan berapa kes yang dihadapkan ke mahkamah serta denda yang dikenakan oleh mahkamah setakat ini.

JAWAPAN

Tuan Yang di-Pertua,

1. Jumlah kompaun yang telah ditawarkan dalam tempoh Ordinan Darurat dikuatkuasakan, iaitu dari 11 Mac 2021 sehingga 8 Ogos 2021 adalah sejumlah 101,560 kompaun. Daripada jumlah ini, sebanyak 49,186 kompaun telah dijelaskan (48.4%).

2. Daripada baki yang belum menjelaskan kompaun, sebanyak 467 (0.5%) kes telah dituduh di mahkamah dan telah dijatuhi hukuman dengan nilai denda keseluruhan adalah berjumlah RM88,870.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

DARIPADA : TUAN LIM GUAN ENG (BAGAN)

SOALAN

TUAN LIM GUAN ENG (BAGAN) minta **MENTERI PERTANIAN DAN INDUSTRI MAKANAN** menyatakan rancangan untuk Wisma Peladang di Kawasan Parlimen Bagan dan perbelanjaan untuk penternakan ayam yang mesra alam di sekitar Pulau Pinang serta status pembayaran subsidi ayam kepada penternak.

JAWAPAN

Tuan Yang di-Pertua,

Untuk makluman Ahli Yang Berhormat, pada ketika ini, Wisma Peladang di kawasan Parlimen Bagan belum ada perancangan dalam penternakan dan pengeluaran ayam. Walaubagaimanapun, Wisma Peladang terlibat dalam pemasaran ayam melalui Peladang Outlet (PO) dan program-program jualan terus di bawah jabatan atau agensi negeri Pulau Pinang.

Bagi memastikan penternakan ayam di Pulau Pinang mesra alam dan bebas dari pencemaran, Jabatan Perkhidmatan Veterinar Negeri Pulau Pinang telah menguatkuasakan Enakmen Unggas di bawah Seksyen 3 yang mewajibkan penternak untuk melaksanakan penternakan secara reban tertutup. Melalui sistem ini, industri ayam juga akan dapat meningkatkan kemampuannya dan mencapai tahap produktiviti yang lebih tinggi.

Perbelanjaan untuk bertukar dari penternakan secara sistem reban terbuka kepada sistem reban tertutup memakan perbelanjaan yang tinggi. Kementerian Pertanian dan Industri Makanan (MAFI) melalui Agrobank telah menyediakan bantuan kewangan di bawah Dana Pembiayaan Agromakanan Keluarga Malaysia (DPAKM) dengan peruntukan sebanyak RM800 juta bagi menjamin kesinambungan aktiviti pengeluaran makanan. Daripada jumlah tersebut, sebanyak RM300 juta diperuntukan bagi pembiayaan ternakan ayam.

Berkenaan status pembayaran subsidi ayam kepada penternak, sehingga 15 Julai 2022, sebanyak 7,680 permohonan telah diluluskan berjumlah RM632.6 juta. Daripada jumlah tersebut, sebanyak 223 permohonan bernilai RM17,154,227.16 diberikan kepada penternak di Pulau Pinang.

Sekian, terima kasih.

SOALAN NO: 220

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN LIM KIT SIANG
[ISKANDAR PUTERI]**

SOALAN

YB TUAN LIM KIT SIANG [ISKANDAR PUTERI] minta **MENTERI PERUMAHAN DAN KERAJAAN TEMPATAN** menyatakan kedudukan kewangan semasa PR1MA berserta dengan nilai semasa simpanan hartanah (*landbank*) badan ini, nilai perolehan, lokasi dan butiran rancangan pembangunan hartanah-hartanah ini.

JAWAPAN

Tuan Yang di-Pertua,

Untuk makluman Ahli Yang Berhormat, secara amnya, PR1MA memiliki status kewangan yang stabil serta berupaya menampung obligasi semasa termasuk kos pembangunan dan keperluan operasi dengan Nilai Purata Perolehan Kumpulan sekitar RM2.0 bilion setahun.

PR1MA telah menjalankan transformasi holistik pada tahun 2019 dan kini PR1MA berada dalam kedudukan asas yang kukuh dalam mendukung agenda perumahan negara. PR1MA kekal komited dalam melaksanakan mandat yang telah diberikan oleh Kerajaan bagi menyediakan Rumah Mampu Milik (RMM) kepada kumpulan sasarannya iaitu golongan M40. PR1MA kini mempunyai 61 projek yang berdaya maju di seluruh negara dengan pelbagai peringkat kemajuan iaitu sebanyak 28,321 unit telah siap dibina, 18,696 unit sedang dalam pembinaan dan 2,264 unit sedang dalam perancangan.

Untuk makluman Ahli Yang Berhormat jua, setakat hari ini PR1MA mempunyai 32 bidang tanah dengan jumlah kluasan 1,830 ekar di seluruh negara dengan nilai RM1.4bil (Nilaian Jabatan Penilaian dan Perkhidmatan Harta, JPPH). Tanah-tanah ini telah dikenal pasti dan sedia dibangunkan melalui model pelaksanaan yang lebih berdaya maju dan mampan seperti kaedah *Joint Venture* iaitu usahasama dengan pemaju-pemaju swasta yang berkelayakan. Pembangunan di atas tanah milik PR1MA ini akan menyumbang kepada sasaran 500,000 unit RMM di bawah Rancangan Malaysia Kedua Belas (RMKe-12). Secara keseluruhaninya, PR1MA mensasarkan sebanyak 33,372 unit rumah akan disiapkan dalam tempoh RMKe-12 ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
**DARIPADA : TUAN LIM KIT SIANG [ISKANDAR
PUTERI]**

SOALAN

TUAN LIM KIT SIANG [ISKANDAR PUTERI] minta **MENTERI KEWANGAN** menyatakan butiran jumlah perbelanjaan subsidi petroleum yang ditanggung oleh Kerajaan mengikut kategori RON95 dan diesel untuk setiap bulan sejak daripada bulan Januari 2020.

JAWAPAN

Tuan yang di-Pertua,

Jumlah perbelanjaan subsidi petroleum yang dibiayai oleh Kerajaan yang melibatkan petrol, diesel dan *Liquefied Petroleum Gas* (LPG) bagi tahun 2020 adalah sebanyak RM1.6 bilion dan tahun 2021 adalah sebanyak RM13.2 bilion. Manakala keperluan bagi tahun 2022 diunjurkan sebanyak RM38.3 bilion. Unjuran subsidi ini mengambil kira harga bersubsidi serta harga pasaran petroleum, dan komoditi lain kekal pada paras semasa.

Subsidi yang diberikan oleh Kerajaan ketika ini merupakan subsidi menyeluruh (*blanket subsidies*) yang meliputi petrol, elektrik, minyak masak dan pelbagai bahan lain. Oleh yang demikian, Kerajaan sedang memperincikan mekanisma pelaksanaan subsidi secara bersasar termasuk produk petroleum bagi memastikan pelaksanaan yang lancar dan adil bagi seluruh Keluarga Malaysia dan sampai kepada golongan bersasar yang benar-benar memerlukan.

Kerajaan akan melaksanakan langkah perbelanjaan berhemah supaya kedudukan kewangan negara kekal terkawal. Kerajaan akan menyemak dan menilai semula keberkesanan program bantuan dan subsidi yang dilaksanakan bagi memastikan peruntukan yang optimum disediakan untuk membolehkan penjimatan yang diperoleh disalurkan kepada program-program yang mengutamakan kesejahteraan rakyat.

Sekian, terima kasih.

SOALAN NO: 222

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN LIM KIT SIANG
[ISKANDAR PUTERI]**

SOALAN

YB TUAN LIM KIT SIANG [ISKANDAR PUTERI] minta **MENTERI PERUMAHAN DAN KERAJAAN TEMPATAN** menyatakan kadar keberjayaan penjualan unit rumah PR1MA di bawah program HOC beserta dengan pecahan butiran jualan sebelum dan selepas program HOC dan jumlah unit yang tidak terjual mengikut lokasi pembangunan.

JAWAPAN

Tuan Yang di-Pertua,

Untuk makluman Ahli yang Berhormat, Perbadanan PR1MA Malaysia (PR1MA) telah mengambil bahagian dalam Home Ownership Campaign (HOC) anjuran bersama Kementerian Perumahan dan Kerajaan Tempatan (KPKT) dan Persatuan Pemaju Hartanah dan Perumahan (REHDA). Kempen ini telah berlangsung dari 1 Mac 2019 sehingga 31 Disember 2021 bertujuan untuk membantu rakyat, terutamanya golongan yang menghadapi kesukaran untuk membeli rumah. Diskaun yang ditawarkan dalam kempen ini telah merangsang jualan sekaligus mendorong penjualan rumah-rumah yang tidak terjual (*property overhang*) di pasaran perumahan Malaysia.

Di bawah program HOC, PR1MA telah menawarkan diskau sebanyak 10% dan rebat sehingga 20% kepada projek-projek terpilih di seluruh Malaysia. Pihak PR1MA turut menanggung yuran guaman bagi perjanjian jual beli untuk pembeli rumah PR1MA. Tawaran promosi ini telah menggalakkan pembelian rumah PR1MA dalam kalangan kumpulan M40 untuk memiliki kediaman sendiri.

Sepanjang tempoh program HOC dijalankan, PR1MA telah mencatatkan peningkatan jualan yang amat memberangsangkan. Sebanyak lebih 22,000 unit residensi PR1MA telah pun dijual di bawah program ini dengan nilai jualan sebanyak RM4.7 bilion, berbanding jualan sebelum kempen dilaksanakan iaitu sebanyak 12,883 unit dengan nilai jualan sebanyak RM3.3 bilion. Bagi tahun 2022, sehingga 30 Jun, PR1MA telah berjaya menjual sebanyak 1,914 unit kediaman PR1MA dengan jumlah kutipan terkumpul sebanyak RM0.66 bilion. Jumlah unit rumah PR1MA yang tidak terjual mengikut negeri setakat 30 Jun 2022 adalah seperti di **Lampiran A**.

Sekian, terima kasih.

JUMLAH UNIT RUMAH PR1MA YANG TIDAK TERJUAL MENGIKUT NEGERI SETAKAT 30 JUN 2022

NEGERI	UNIT BELUM TERJUAL
Johor	1,414
Kedah	87
Kelantan	745
Melaka	1,622
Negeri Sembilan	1,047
Pahang	41
Perak	1,747
Perlis	7
Pulau Pinang	1,239
Sabah	2,013
Sarawak	29
Selangor	291
Terengganu	-
W.P. Kuala Lumpur	104
W.P. Putrajaya	0
JUMLAH	10,386

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN LIM KIT SIANG
[ISKANDAR PUTERI]**

SOALAN

YB TUAN LIM KIT SIANG [ISKANDAR PUTERI] minta **MENTERI PERUMAHAN DAN KERAJAAN TEMPATAN menyatakan kadar langganan insurans perumahan mengikut kategori nilai rumah.**

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) tidak mempunyai data langganan insurans perumahan mengikut kategori nilai rumah. Walau bagaimanapun, Bank Negara Malaysia (BNM) telah mengeluarkan Laporan Tinjauan Kestabilan Kewangan – Separuh Kedua 2021 yang memberikan penilaian mengenai risiko semasa dan potensi risiko terhadap kestabilan kewangan serta daya tahan sistem kewangan Malaysia. Tinjauan Kestabilan Kewangan ini turut melaporkan pelbagai langkah yang telah dilaksanakan untuk menguruskan risiko terhadap kestabilan kewangan serta mengandungi rencana mengenai isu yang mendapat perhatian ramai.

Laporan tinjauan oleh BNM ini telah memetik satu kaji selidik yang dijalankan pada bulan September 2021 oleh Zurich Malaysia sebagai sebahagian kajian pasaran tentang ‘Kesan Pandemik terhadap Perlindungan’. Kaji selidik tersebut menunjukkan bahawa hanya 50% isi rumah mempunyai perlindungan insurans/ takaful. Walau bagaimanapun, dapatan ini adalah berpandukan kepada kajian yang melibatkan hanya 1,201 orang rakyat Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN LIM LIP ENG [KEPONG]

TARIKH : JULAI-OGOS 2022

SOALAN

TUAN LIM LIP ENG [KEPONG] minta **MENTERI PENGANGKUTAN** menyatakan apakah rancangan lanskap, rekreasi dan komersial di bawah laluan dan tiang-tiang projek Fasa 1 Transit Aliran Massa (MRT) laluan Putrajaya di kawasan antara stesen-stesen Metro Prima, Kepong Baru, Jinjang dan Sri Delima. Apakah statistik penumpang Fasa 1 MRT laluan Putrajaya bagi tempoh tambang percuma selama sebulan bermula 16 Jun 2022.

JAWAPAN

Tuan Yang di-Pertua,

1. Bagi perancangan landskap, rekreasi dan komersial yang melibatkan aset-aset MRT termasuk tiang-tiang, pihak MRT Corp akan sentiasa mematuhi peraturan-peraturan Zon Perlindungan Keretapi (*Railway Protection Zone [RPZ]*). Tujuan kewujudan RPZ ini adalah untuk memastikan operasi MRT yang selamat dan boleh dipercayai.

2. Seperti yang telah dilaksanakan di MRT Laluan Kajang, pihak MRT Corp sedia untuk meneroka dan meninjau peluang pembangunan yang boleh dilaksanakan di bawah struktur MRT mengikut garis panduan dan peraturan yang telah ditetapkan oleh pihak berkuasa yang berkenaan, termasuk dari aspek landskap, rekreasi dan komersial.

3. *Landscaping* dan kawasan hijau boleh diwujudkan di lokasi-lokasi yang sesuai. Sebagai contoh, Serambi MRT@Stesen MRT Sri Damansara Barat telah diwujudkan untuk tujuan rekreasi bagi orang awam. Di Stesen MRT Kampung Selamat pula, sebuah kawasan hijau yang dinamakan Taman Linear Kampung Selamat turut diwujudkan pada awal tahun 2018.
4. Dari segi komersial, aset MRT seperti tiang-tiang di kawasan antara stesen-stesen Metro Prima, Kepong Baru, Jinjang dan Sri Delima boleh digunakan untuk tujuan pengiklanan dalam penjanaan pendapatan bukan tambang bagi MRT Corp, dan ini tertakluk kepada kelulusan pihak berkuasa tempatan yang berkenaan.
5. Berhubung statistik penumpang Fasa 1 MRT laluan Putrajaya bagi tempoh tambang percuma selama sebulan bermula 16 Jun 2022 pula, jumlah penumpang yang telah menggunakan MRT Laluan Putrajaya Fasa 1 sehingga 6 Julai 2022 adalah sebanyak 554,329 penumpang di mana purata harian adalah sebanyak 26,397 penumpang.
6. Jumlah penumpang yang direkodkan ini dijangka akan terus meningkat dari semasa ke semasa dengan peningkatan kesedaran orang ramai mengenai rangkaian transit bersepadu Lembah Klang melalui pemasaran dan pengiklanan yang berkesan dengan kerjasama MRT Corp dan Rapid Rail.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BERTULIS
DARIPADA : Y.B. TUAN LIM LIP ENG
[KEPONG]

SOALAN

Tuan Lim Lip Eng [Kepong] minta **KEMENTERIAN PERDAGANGAN ANTARABANGSA DAN INDUSTRI** menyatakan langkah-langkah Kerajaan mengurangkan keperluan modal berbayar syarikat bagi syarikat milik asing dan melonggarkan syarat pengambilan pekerja asing. Berapakah jumlah permohonan baharu daripada syarikat asing untuk membuka perniagaan di Malaysia sejak tahun 2020.

JAWAPAN

Tuan Yang di-Pertua,

Soalan yang dikemukakan adalah berkaitan keperluan modal berbayar syarikat iaitu perkara di bawah Suruhanjaya Syarikat Malaysia (SSM) yang merupakan agensi di bawah Kementerian Perdagangan Dalam Negeri dan Hal Ehwal Pengguna (KPDNHEP). Syarat pengambilan pekerja asing adalah di bawah seliaan Kementerian Sumber Manusia (KSM). Sehubungan itu, keputusan dasar mengenai perkara yang dibangkitkan adalah di bawah bidang kuasa KPDNHEP dan KSM.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BERTULIS
DARIPADA : Y.B. TUAN LIM LIP ENG
[KEPONG]

SOALAN

Tuan Lim Lip Eng [Kepong] minta **KEMENTERIAN PERDAGANGAN ANTARABANGSA DAN INDUSTRI** menyatakan apakah langkah-langkah Kerajaan dalam usaha menarik syarikat-syarikat asing terutamanya syarikat-syarikat daripada Negara China untuk disenaraikan di Bursa Malaysia. Berapa jumlah bersih ekuiti tempatan dari segi nilai dan peratusan yang dikuasai oleh pelaburan asing pada bulan Julai.

JAWAPAN

Tuan Yang di-Pertua,

Soalan yang dikemukakan adalah berkaitan penyenaraian syarikat asing di Bursa Malaysia serta maklumat mengenai ekuiti tempatan iaitu perkara di bawah Bank Negara. Sehubungan itu, keputusan dasar mengenai perkara yang dibangkitkan adalah di bawah bidang kuasa Kementerian Kewangan.

Skop peranan dan tanggungjawab Kementerian Perdagangan Antarabangsa dan Industri hanya tertakluk kepada pelaburan fizikal (*physical investment*) dan bukan pelaburan portfolio (*portfolio investment*).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN LIM LIP ENG [KEPONG]

SOALAN

TUAN LIM LIP ENG minta **MENTERI KESIHATAN** menyatakan langkah-langkah Kementerian dalam usaha meningkatkan kesedaran rakyat untuk menjadi penderma organ dan tisu. Jumlah pendaftaran penderma organ dan tisu serta jumlah orang yang telah menerima organ dan tisu baharu sejak tahun 2020.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa komited dalam usaha meningkatkan kesedaran rakyat Malaysia tentang kepentingan pendermaan organ dan tisu. Pusat Sumber Transplan Nasional telah ditubuhkan untuk merancang serta melaksanakan langkah-langkah promosi dan pendidikan kesihatan mengenai pendermaan organ di peringkat kebangsaan. Selain itu, terdapat unit-unit di peringkat negeri dan hospital seluruh negara yang berperanan untuk memastikan pelaksanaan program promosi dapat diperluaskan di peringkat komuniti.

2. Antara aktiviti yang dijalankan adalah:

- (i) Perkongsian informasi terkini menerusi laman web rasmi Derma Organ yang dibangunkan pada tahun 2020;
- (ii) Penggunaan *platform* media sosial dan liputan secara berterusan di media massa;

SOALAN NO. 227

- (iii) Kempen Jom Ikrar Derma Organ secara fizikal di kawasan tumpuan umum di seluruh negara melalui kerjasama dengan agensi kerajaan dan bukan kerajaan yang lain;
- (iv) Sambutan Minggu Kesedaran Pendermaan Organ (MKPO) yang diadakan setiap tahun. Pada tahun ini, MKPO akan diadakan pada 13 hingga 17 Ogos 2022. Sepanjang minggu tersebut, pelbagai aktiviti telah dirancang yang merangkumi program secara fizikal serta melalui semua platform media;
- (v) Inisiatif terkini iaitu penggunaan aplikasi MySejahtera bagi memperluaskan capaian dan memudahkan pendaftaran pengikrar penderma organ. Sejak pelaksanaan inisiatif ini, purata pendaftaran pengikrar baharu meningkat sehingga 500 orang setiap bulan; dan
- (vi) Pelaksanaan latihan dan bimbingan berstruktur kepada pelbagai pihak agar dapat membantu memperkasakan keupayaan individu dan organisasi lain untuk turut menjadi *advocates* terhadap pendermaan organ.

3. Sehingga kini, jumlah pengikrar penderma organ adalah sebanyak 512,992 orang. Jumlah keseluruhan pembedahan transplantasi yang telah dijalankan adalah sebanyak 2,660 di mana sebanyak 349 pembedahan dijalankan di antara tahun 2020-Mei 2022.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN LIM LIP ENG
(KEPONG)**

SOALAN

TUAN LIM LIP ENG (KEPONG) minta **MENTERI DALAM NEGERI** menyatakan kos dan fasiliti-fasiliti moden penjara terbesar yang akan dibina di Kelantan. Adakah projek tersebut diberikan melalui tender terbuka atau tidak.

JAWAPAN

Tuan Yang Di Pertua,

Untuk makluman Ahli Yang Berhormat, Jabatan Penjara Malaysia melalui Kementerian Dalam Negeri telah memohon peruntukan di bawah Rancangan Malaysia ke Dua Belas (RMK-12) RP3 Tahun 2023 bagi tujuan pembelian tanah untuk pembinaan Penjara di Negeri Kelantan. Status kelulusan bagi permohonan peruntukan tersebut dijangka akan diketahui selepas daripada pembentangan Belanjawan Negara bagi tahun 2023.

Buat masa ini cadangan pembinaan penjara tambahan di Negeri Kelantan masih di peringkat cadangan penyediaan pernyataan keperluan (*needs statement*) dan reka bentuk. Kos pembinaan akan diketahui setelah pernyataan keperluan (*needs statement*) dan reka bentuk dimuktamadkan. Cadangan pembinaan penjara baharu di Negeri Kelantan adalah selaras dengan keperluan bagi pemulihan banduan mengikut kategori di samping dapat mengurangkan kesesakan penjara khususnya penjara-penjara di Zon Timur.

Semua urusan berkaitan perolehan Kerajaan dilaksanakan berdasarkan amalan tadbir urus yang baik (*good governance practices*) dengan mematuhi prinsip-prinsip perolehan Kerajaan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

**DARIPADA : TUAN LOKE SIEW FOOK
[SEREMBAN]**

TARIKH : JULAI – OGOS 2022

SOALAN

TUAN LOKE SIEW FOOK [SEREMBAN] minta **MENTERI PENGANGKUTAN** menyatakan maklumat terperinci untuk setiap projek pembangunan di bawah Kementerian Pengangkutan berkenaan pembelian baru ataupun penyenggaraan dan pembaikpulihan (MRO) rolling stock KTMB termasuk butiran nilai kontrak, cara perolehan (tender terbuka atau rundingan terus), nama kontraktor terlibat, status kemajuan projek, tarikh mula dan tarikh jangka siap.

JAWAPAN

Tuan Yang Di Pertua,

Untuk makluman Ahli Yang Berhormat, perolehan baharu melibatkan tren elektrik yang dikenali sebagai SCS dan ETS serta penyenggaraan dan pembaikpulihan (MRO) rolling stock untuk KTMB adalah seperti berikut:

SENARAI PROJEK PEMBANGUNAN DI BAWAH KEMENTERIAN PENGANGKUTAN BERKENAAN PEMBELIAN BARU ATAU PENYELENGGARAAN DAN PEMBAIKAN (MRO) ROLLING STOCK KTMB

Bil.	Nama Projek	Butiran Nilai Kontrak (RM)	Cara Perolehan	Nama Kontraktor	Status Kemajuan Projek	Tarikh Mula	Tarikh Siap	Jangka	CATATAN
1.	Perkhidmatan Maintenance, Repair And Overhaul For 38 Six Cars Set (SCS) Bagi Level 1 dan Level 2	479,003,933.30	Rundingan Terus	CKM Landas MRO Sdn Bhd	Fizikal: 77.4% Kewangan: 71.4%	15 Februari 2017	15 Februari 2024		Projek merupakan MRO berkala
2.	Perolehan 10 Set (6-Cars) Electric Train Set (ETS)	456,000,000.00	Rundingan Terus	CRRC Rolling Stock Center (Malaysia) Sdn. Bhd.	Fizikal: 0% Kewangan: 0%	10 September 2021	9 September 2024		Status semasa: Peringkat Akhir rekabentuk
3.	Projek Penyelenggaraan, Pembaikan Dan Pemulihan (MRO) Tahap 4 Bagi 35 Set Six Car Set (SCS) Kelas 92	531,389,915.00	Rundingan Terus	M Rail Technics Sdn. Bhd.	Fizikal: 0% Kewangan: 0%	20 Mei 2022	19 November 2026		Status semasa: Peringkat assessment sebelum MRO bermula

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN LOKE SIEW FOOK [SEREMBAN]

TARIKH : JULAI – OGOS 2022

SOALAN

TUAN LOKE SIEW FOOK [SEREMBAN] minta **MENTERI PENGANGKUTAN** menyatakan statistik maklumat terperinci berkenaan kemalangan jalan raya yang melibatkan kenderaan basikal, basikal elektrik dan mikromobiliti untuk tahun 2019, 2020, 2021 dan 2022. Apakah langkah yang diambil oleh Kerajaan untuk memperluas budaya penggunaan mobiliti aktif (Active Mobility) yang lebih mesra alam dan selamat sejajar dengan Dasar Pengangkutan Awam Negara.

JAWAPAN**Tuan Yang Di Pertua,**

1. Mengikut maklumat yang diberikan oleh pihak Kementerian Dalam Negeri (KDN), statistik kemalangan jalan raya yang melibatkan basikal untuk tahun 2019 sehingga Mei 2022 adalah seperti berikut :

TAHUN	2019				
BIL	MENGIKUT JENIS KENDERAAN - C2	MATI	CEDERA PARAH	CEDERA RINGAN	JUMLAH KECEDERAAN
1	BASIKAL BIASA	105	35	59	199
2	BASIKAL BRG 3 RODA	1	0	0	1
3	BECA	1	0	0	1
JUMLAH		107	35	59	201

TAHUN	2020				
BIL	MENGIKUT JENIS KENDERAAN - C2	MATI	CEDERA PARAH	CEDERA RINGAN	JUMLAH KECEDERAAN
1	BASIKAL BIASA	61	20	70	151
2	BASIKAL LUMBA	2	1	2	5
JUMLAH		63	21	72	156

TAHUN	2021				
BIL	MENGIKUT JENIS KENDERAAN - C2	MATI	CEDERA PARAH	CEDERA RINGAN	JUMLAH KECEDERAAN
1	BASIKAL BIASA	85	35	130	250
2	BASIKAL LUMBA	2	1	1	4
3	BECA	0	0	1	1
JUMLAH		87	36	132	255

TAHUN	2022 (SEHINGGA MEI)				
BIL	MENGIKUT JENIS KENDERAAN - C2	MATI	CEDERA PARAH	CEDERA RINGAN	JUMLAH KECEDERAAN
1.	BASIKAL BIASA	49	43	104	196
2.	BASIKAL BRG 3 RODA	0	0	1	1
3.	BASIKAL LUMBA	2	1	3	6
4	BECA	0	0	2	2
JUMLAH		51	44	110	205

2. Bagi meluaskan pengunaan mobiliti aktif, agensi-agensi kerajaan yang berkenaan telah mewujudkan lebih banyak lorong basikal seperti laluan basikal di sepanjang Sungai Gombak dan Sungai Klang di Kuala Lumpur (River of Life) dan laluan basikal di Sungai Perak (Living River Bike Trail).
3. Menyedari akan tren penggunaan mobiliti bandar yang dinamik, Kementerian Perumahan dan Kerajaan Tempatan (KPKT) melalui PLANMalaysia kini dalam peringkat memuktamadkan Garis Panduan Perancangan Mobiliti Aktif yang memberi fokus kepada elemen mobiliti aktif iaitu pejalan kaki dan kenderaan mikromobiliti.
4. Garis panduan ini disediakan sebagai dokumen panduan dan rujukan kepada jabatan / agensi persekutuan, pihak berkuasa negeri, pihak berkuasa tempatan dan pihak berkepentingan dalam merancang, membangunkan dan mereka bentuk laluan pejalan kaki dan laluan kenderaan mikromobiliti di kawasan pembangunan sedia ada dan pembangunan baharu.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN LOKE SIEW FOOK [SEREMBAN]

SOALAN

TUAN LOKE SIEW FOOK [SEREMBAN] minta **MENTERI KOMUNIKASI DAN MULTIMEDIA** menyatakan bagaimanakah kedudukan Malaysia berbanding negara jiran termasuk Indonesia, Thailand, Singapura dan Vietnam dari segi kebolehcapaian infrastruktur internet iaitu (*fixed broadband subscription per 1000 population*) dan juga *Fibre-to-Home (FTTH) Global Ranking*.

JAWAPAN

Tuan Yang di-Pertua,

Setakat suku pertama 2022, jumlah langganan jalur lebar talian tetap (*fixed broadband*) di Malaysia adalah sebanyak 3.8 juta atau bersamaan 115.2 langganan bagi setiap 1000 penduduk. Ini merupakan pertambahan sebanyak hampir 1 juta langganan berbanding 2.9 juta langganan yang direkodkan pada tahun 2019.

Pencapaian yang memberangsangkan ini didorong peningkatan liputan yang lebih meluas melalui inisiatif Pelan Jalinan Digital Negara (JENDELA), kualiti rangkaian yang lebih baik dan peningkatan persaingan dalam pasaran jalur lebar tetap. Selain itu, situasi norma baru yang memerlukan pekerjaan atau pembelajaran dari rumah juga turut menyumbang kepada peningkatan langganan jalur lebar tetap.

Bagi tujuan perbandingan, setakat 2020, data dari *International Telecommunication Union* (ITU) merekodkan kadar penembusan jalur lebar talian tetap bagi setiap 1000 penduduk di Malaysia adalah pada 103.8 dan menduduki tangga ke-5 di belakang Singapura (265.5), Vietnam (171.6), Thailand (164.4) dan Brunei (162.5).

Manakala bagi langganan kediaman jalur lebar talian tetap berasaskan teknologi *fiber* pula, laporan *FTTH/B Global Ranking* yang diterbitkan pada Mei 2022 oleh *Fiber-to-the-home Global Alliance* melaporkan bahawa Malaysia menduduki tangga ke-35 berbanding 84 negara lain di dunia. Walaupun kedudukan ini tidak berubah sejak Disember 2020, peratusan kediaman yang melanggan jalur lebar talian tetap berasaskan teknologi *fiber* di Malaysia telah meningkat dari 28.0% kepada 32.1% dalam tempoh ini. Di peringkat ASEAN, Malaysia menduduki tangga yang ke-3 di belakang Singapura (95.8%) dan Vietnam (44.5%).

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN LOKE SIEW FOOK [SEREMBAN]

SOALAN

TUAN LOKE SIEW FOOK [SEREMBAN] minta **MENTERI KEWANGAN** menyatakan status terkini berkenaan kontrak pengurusan *fleet* kenderaan Kerajaan dan apakah Kerajaan menetapkan sasaran serta rancangan yang terperinci untuk menggantikan *fleet* kenderaan Kerajaan kepada EV secara berfasa.

JAWAPAN

Tuan Yang di-Pertua,

Perjanjian Konsesi antara Kerajaan Malaysia dan Spanco Sdn. Bhd. bagi membekal dan mengurus *fleet* kenderaan Kerajaan Malaysia telah dimeterai pada 31 Januari 2022. Kerajaan telah berusaha ke arah penggunaan kenderaan elektrik (EV) dan satu klausa berkenaan EV telah dimasukkan dalam Perjanjian Konsesi Baharu. Klausa kenderaan EV dalam Perjanjian Konsesi merupakan komitmen Kerajaan dalam menyokong *Low Carbon Blueprint* 2030. Penggunaan kenderaan EV ini akan dilaksanakan secara berfasa dan bersasar dimulai dengan Kenderaan Rasmi Jawatan dan diikuti dengan Kenderaan Jabatan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN LUKANISMAN BIN AWANG
SAUNI [SIBUTI]**

SOALAN

TUAN LUKANISMAN BIN AWANG SAUNI [SIBUTI] minta **MENTERI BELIA DAN SUKAN** menyatakan berapa jumlah geran pembangunan belia dan sukan yang telah disalurkan kepada Kerajaan Sarawak mengikut setiap Parlimen dan apakah jenis geran disediakan dan pembangunan yang akan dilaksanakan dalam Rancangan Malaysia ke-12. Apakah program khusus bagi Parlimen Sibuti.

JAWAPAN

Tan Sri Yang di-Pertua,

Untuk makluman Ahli Yang Berhormat, Kementerian Belia dan Sukan (KBS) sentiasa bekerjasama erat dengan persatuan-persatuan belia dan sukan sebagai rakan strategik dalam pelaksanaan program/aktiviti pembangunan belia dan sukan tanpa mengira lokasi negeri, daerah, bahagian, kawasan dan lokasi sebagai usaha mendekati golongan belia dan masyarakat bersukan bagi mencapai objektif Kementerian.

Pada masa ini KBS tidak menyediakan peruntukan kewangan berbentuk geran kepada persatuan-persatuan belia dan sukan untuk melaksanakan program/aktiviti sama ada di peringkat kebangsaan, negeri dan daerah, sebaliknya menyediakan peruntukan berbentuk bantuan

kewangan bagi menampung perbelanjaan program/ aktiviti belia dan sukan di peringkat masing-masing.

Sebagai contoh, pada tahun 2019 hingga bulan Jun 2022 Kementerian telah menyalurkan peruntukan kewangan sebanyak RM677,400.00 kepada Negeri Sarawak menggunakan peruntukan sedia ada bagi pelaksanaan program kepada belia di peringkat akar umbi. Antara program utama yang dilaksanakan adalah seperti berikut: -

- a) Hari Belia Negara Peringkat Negeri Sarawak
- b) Hari Belia Negara Peringkat Bahagian (12 Bahagian)
- c) Majlis Perundingan Belia Negeri Sarawak
- d) Program Youth Career Sarawak
- e) Anugerah Perdana Belia Peringkat Negeri Sarawak
- f) Kursus Pengurusan Organisasi (KPO)
- g) Program Ekonomi Digital - Kemahiran Digital Peluang-Menjana Ekonomi
- h) Hari Sukan Negara Peringkat Negeri Sarawak
- i) Malaysia Sports League (MSL) Peringkat Bahagian/ Negeri Sarawak
- j) 1000 Liga Negeri Sarawak
- k) Malaysia Little League (MILL) Negeri Sarawak
- l) Rakan Muda Day Out Bahagian Sarawak
- m) Rakan Muda Ramadhan Daerah Sarawak
- n) Anugerah Remaja Perdana Rakan Muda Peringkat Negeri Sarawak

Selain daripada itu Kementerian ini telah memperuntukkan sebanyak RM6,970,400.00 di bawah *Rolling Plan* Pertama dan Kedua, Rancangan Malaysia Kedua Belas bagi tujuan pelaksanaan projek-projek pembangunan di Negeri Sarawak.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN LUKANISMAN BIN AWANG SAUNI
[SIBUTI]**

SOALAN

TUAN LUKANISMAN BIN AWANG SAUNI [SIBUTI] minta **MENTERI KANAN PENDIDIKAN** menyatakan apakah status projek pembinaan gantian penuh sekolah daif SK Kampung Bulau melalui pakej Konsortium KPE Sdn Bhd, Pan Borneo di bawah PPD Subis yang telah menjalani majlis pecah tanah pada tahun 2019.

JAWAPAN

Tuan Yang di-Pertua,

Untuk makluman Ahli Yang Berhormat, projek pembinaan gantian penuh Sekolah Kebangsaan Kampung Bulau, Subis merupakan projek yang dirancang untuk dilaksanakan secara sumbangan atau Tanggungjawab Sosial Korporat (CSR) oleh pihak Lebuhraya Borneo Utara (LBU). Projek ini telah diluluskan oleh pihak LBU pada tahun 2016. Pada tahun 2018, pihak LBU telah melantik kontraktor untuk melaksanakan pembinaan. Oleh yang demikian, pihak kontraktor yang dilantik bertanggungjawab untuk mendapatkan kelulusan pelan bangunan (PB) daripada pihak berkuasa tempatan (PBT) sebelum kerja-kerja pembinaan dapat dilaksanakan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG
SAUNI [SIBUTI]**

SOALAN

TUAN LUKANISMAN BIN AWANG SAUNI minta **MENTERI KESIHATAN** menyatakan status terkini projek klinik kesihatan di tapak tanah Kementerian Kesihatan di Sepupok Niah yang tersenarai dalam Rancangan Malaysia ke-12 seperti dalam jawapan dalam Parlimen lepas dan apakah solusi bagi Klinik Kesihatan Bekenu yang dalam keadaan daif dan bocor.

JAWAPAN

Tuan Yang di-Pertua,

1. Kementerian Kesihatan mengambil maklum terhadap keadaan Klinik Kesihatan Bekenu yang daif, uzur dan usang. Pihak KKM dalam perancangan memohon peruntukan untuk pembaikan dan naiktaraf fasiliti dan klinik-klinik kesihatan terutamanya di luar bandar secara berperingkat bagi meningkatkan kesediaan fasiliti berkenaan dalam menyediakan perkhidmatan kesihatan yang terbaik kepada rakyat.
2. Atas faktor keselamatan dan tidak ekonomik dinaik taraf/dibaiki klinik-klinik yang berusia melebihi 50 tahun dicadangkan untuk dilaksanakan penggantian bangunan baru dengan mengambil kira keperluan populasi dan perkhidmatan yang akan diberikan serta liputan perkhidmatan kesihatan berdasarkan kepada kelulusan peruntukan yang diperolehi.

SOALAN NO. 236

3. Kementerian Kesihatan Malaysia (KKM) telah mengemukakan permohonan projek Klinik Kesihatan (Jenis 3) Dengan Kuarters Sepupok, Miri di bawah Rolling Plan Kedua, Rancangan Malaysia Kedua Belas (RP2, RMKe-12) pada tahun 2022. Walau bagaimanapun, permohonan tersebut tidak tersenarai di dalam projek yang diluluskan bagi tahun 2022.
4. Memandangkan keperluan projek ini adalah mendesak bagi penduduk di kawasan Sepupok, KKM telah sekali lagi mengemukakan permohonan projek ini sebagai keutamaan tinggi di bawah Rolling Plan Ketiga (RP3), RMKe-12 bagi tahun 2023. Senarai muktamad projek yang diluluskan di bawah RP3, RMKe-12 bagi tahun 2023 akan diketahui selepas Bajet 2023 diluluskan oleh Parlimen.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN
**DARIPADA : TUAN LUKANISMAN BIN AWANG SAUNI
[SIBUTI]**

SOALAN

YB TUAN LUKANISMAN BIN AWANG SAUNI [SIBUTI] minta **MENTERI PERUMAHAN DAN KERAJAAN TEMPATAN** menyatakan adakah Kementerian dapat mempertimbangkan pembinaan balai bomba jenis D di kawasan persimpangan Bekenu Lebuh Raya Pan Borneo bagi menampung persediaan sebarang kecemasan melibatkan perkhidmatan bomba di kawasan sekitar (Peninjau, Beluru, Hulu Sibuti, Tinjar, Bakas)?

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) telah mengkaji keperluan pembinaan Balai Bomba dan Penyelamat (BBP) di kawasan Bekenu berdasarkan markah risiko kebakaran. Kementerian telah merancang untuk membina sebuah BBP kategori D yang akan dimasukkan dalam Rolling Plan Ke-4 (RP4), Rancangan Malaysia Kedua Belas (RMKe-12) mengikut keutamaan bergantung kepada ketersediaan tapak, kelulusan agensi pusat serta keupayaan peruntukan kewangan semasa.

Pihak Kementerian melalui JBPM telah mengenal pasti satu tapak BBP di Lot 1783, Blok 10, Sibuti Land District yang berkeluasan 1.784 hektar. Untuk makluman Ahli Yang Berhormat juga, Jabatan Ketua Pengarah Tanah dan Galian Persekutuan Negeri Sarawak telah membuat permohonan pemberimilikan tapak tanah tersebut kepada Pengguna Tanah dan Survei Bahagian Miri pada 13 Disember 2019 dan sedang menunggu kelulusan.

Pada masa kini, kawasan Bekenu mendapat perkhidmatan kebombaan daripada BBP Batu Niah dengan jarak 38 kilometer yang mengambil masa lebih kurang 37 minit untuk sampai. Selain itu, terdapat juga Pasukan Bomba Sukarela (PBS) Unit Pekan Batu Niah yang bertindak sebagai *first responder* dengan kekuatan keanggotaan seramai 11 orang ahli dilengkapi dengan jentera, peralatan perlindungan diri dan peralatan asas pemadam yang telah dibekalkan oleh JBPM Negeri Sarawak.

Sekian, terima kasih.

SOALAN NO : 238

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN LUKANISMAN BIN AWANG
SAUNI (SIBUTI)**

SOALAN

TUAN LUKANISMAN BIN AWANG SAUNI (SIBUTI) minta **MENTERI PEMBANGUNAN LUAR BANDAR** menyatakan status terkini bermula 2018 hingga 2022 bagi pemasangan lampu jalan kampung di bawah Pejabat Daerah Subis dan daerah bagi kawasan persempadan Parlimen Sibuti.

JAWAPAN

Tuan Yang di-Pertua,

Untuk makluman Yang Berhormat, bagi tempoh 2018 sehingga 2022, Kementerian Pembangunan Luar Bandar melalui pelaksanaan Program Pemasangan Lampu Jalan Kampung wilayah Sarawak tahun 2019/2020, telah memasang sebanyak 95 unit lampu jalan kampung (LJK) di lima (5) buah kampung, melibatkan 47 unit LJK jenis *high pressure sodium vapour* (HPSV) dan 48 unit LJK jenis *light emitting diode* (LED). Pemasangan ini melibatkan kos keseluruhan sebanyak RM154,310.00.

Perincian pemasangan LJK adalah seperti berikut:-

Bil	Nama Kampung	Jumlah LJK (unit)		Jumlah Keseluruhan
		HPSV	LED	
1.	Kg. Cina Lower Road Lot 2	12	13	25
2.	Kg. Cina Lower Road Niah	11	13	24
3.	Kg. Cina Upper Road Niah	9	9	18
4.	Kg Siwak Jaya	6	5	11
5.	Kg Tanjung Belipat Niah	9	8	17
	Jumlah Pemasangan	47	48	95

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN M. KULASEGARAN
(IPOH BARAT)**

SOALAN

TUAN M. KULASEGARAN [IPOH BARAT] minta MENTERI SUMBER MANUSIA menyatakan :-

- (a) kaedah HRD Corp memperuntukan atau menggunakan pelbagai dana Kerajaan dan keberkesanan penggunaan serta perbelanjaan wang ini; dan
- (b) senarai syarikat-syarikat latihan yang berjaya mendapatkan projek tersebut.

JAWAPAN

Tuan Yang Di Pertua,

Kementerian Sumber Manusia menerusi Pembangunan Sumber Manusia telah menerima dana Kerajaan dengan mengunapakai prosedur yang ditetapkan oleh Kementerian Kewangan Malaysia dan dipantau oleh LAKSANA.

Kaedah Pembangunan Sumber Manusia melaksanakan program latihan kemahiran menggunakan dana kerajaan adalah berpandukan kepada skop, objektif dan sasaran golongan dana tersebut diperuntukkan. Sebagai contoh, bagi tahun 2020 dan 2021, inisiatif PENJANA dan PEMULIH HRD Corp telah dilaksanakan dengan objektif untuk menyokong agenda Kerajaan di dalam memulihkan semula ekonomi Negara yang terkesan disebabkan oleh COVID-19.

Menerusi inisiatif-inisiatif ini, terbukti keberkesanan penggunaan dana tersebut apabila lebih 80,000 pelatih bagi PENJANA dan 25,000 pelatih dilatih dan mendapat manfaat yang melibatkan penempatan pekerjaan dan menjana pendapatan.

Syarikat-syarikat penyedia latihan yang berminat perlu memohon dengan mengemukakan kertas cadangan latihan. Permohonan tersebut disaring oleh Jawatankuasa Pemilih Pembangunan Sumber Manusia yang terdiri daripada wakil Pengurusan, pegawai Unit Integriti dan Tadbir Urus yang terdiri daripada pegawai Suruhanjaya Pencegahan Rasuah Malaysia serta pegawai berkaitan program.

Penyedia Latihan dipilih berdasarkan kepada tahap kompetensi dalam menyampaikan latihan kemahiran bersesuaian dengan skop dan objektif dana Kerajaan yang diperuntukan. Sebanyak 1,200 Syarikat Penyedia Latihan telah mengambil bahagian dan berjaya mendapat program latihan kemahiran dibawah program PENJANA dan PEMULIH sepanjang 2020 dan 2021.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN M. KULASEGARAN [IPOH BARAT]

SOALAN

TUAN M. KULASEGARAN [IPOH BARAT] minta **MENTERI KANAN PENDIDIKAN** menyatakan dengan terperinci status perbinaan dan rancangan permulaan operasi SJKT-SJKT seperti SJKT Ladang Sagga di Rantau, SKJT St Helier di Bahau, SJKT Ladang Regent di Gemencheh, SJKT Ladang Pertang di Pertang di Negeri Sembilan, SJKT Bukit Jalil di Kuala Lumpur, SJKT Blue Valley di Cameron Highland di Pahang, SJKT PJS1 di Petaling Jaya, SJKT Seafield di Damansara, SJKT Bukit Ijok di Sg Pelek, SJKT Ladang Brauston di Kuala Selangor di Selangor, SJKT Gunung Rapat di Ipoh, SJKT Sg Reyla di Sg Siput, SJKT Ladang Haewood di Sg Siput di Perak dan SJKT Jasin Lalang di Jasin di Melaka.

JAWAPAN

Tuan Yang di-Pertua,

Untuk makluman Ahli Yang Berhormat, status pelaksanaan projek pembinaan 14 buah SJKT adalah seperti berikut:

BIL	NAMA SEKOLAH (STATUS SEKOLAH)	STATUS TERKINI KEMAJUAN FIZIKAL PROJEK SEHINGGA 31 JULAI (% SIAP)
1.	SJKT Ladang Seafield, Petaling Perdana, Selangor (SBK)	98 %
2.	SJKT Ladang Brauston, Selangor (SBK)	98 %
3.	SJKT Ladang Pertang, Negeri Sembilan (SBK)	98%
4.	SJKT Ladang Sagga, Negeri Sembilan (SBK)	99%
5.	SJKT Ladang Sungai Reyla, Perak (SBK)	97%
6.	SJKT Ladang Bukit Jalil, WP Kuala Lumpur (SBK)	99%
7.	SJKT Ladang Blue Valley, Pahang (SBK)	99%
8.	SJKT Ladang Bukit Ijok, Selangor (SBK)	98%
9.	SJKT Jasin Lalang, Melaka (SBK)	73%
10.	SJKT Gunung Rapat, Perak (SK)	98%
11.	SJKT Ladang Haewood, Perak (SK)	11%
12.	SJKT PJS1, Selangor (SK)	98%
13.	SJKT St. Helier, Negeri Sembilan (SBK)	60%
14.	SJKT Ladang Regent, Gemencheh, Negeri Sembilan (SBK)	99%

NOTA: SK merujuk kepada sekolah kerajaan, SBK merujuk kepada sekolah bantuan kerajaan

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK DR. HASAN BIN BAHROM
[TAMPIN]**

SOALAN

DATUK DR. HASAN BIN BAHROM [TAMPIN] minta **MENTERI PELANCONGAN, SENI DAN BUDAYA** menyatakan berhubung dengan statistik kemasukan pelancong luar negara selepas pembukaan pintu sempadan negara pada 1 April 2022, apakah faktor utama tarikan para pelancong ke Malaysia dan bagaimana Kementerian mengangkat permainan tradisi sebagai salah satu pemacu sektor pelancongan negara.

JAWAPAN

Tuan Yang di-Pertua,

1. Bagi suku pertama tahun 2022, Malaysia telah mencatatkan ketibaan seramai 98,053 orang pelancong asing dengan perbelanjaan pelancong asing sebanyak RM359.66 juta.
2. Sejak Malaysia membuka semula pintu sempadan antarabangsa bermula 1 April 2022 yang lalu, negara telah menerima kehadiran hampir 2 juta orang pengunjung antarabangsa. Dalam usaha menggalakkan serta melancarkan pergerakan di pintu masuk negara, pihak berkuasa telah membuka kesemua kaunter di Kompleks Imigresen, Kastam dan Kuarantin (CIQ) iaitu di Kompleks Sultan Abu Bakar (KSAB) dan Bangunan Sultan Iskandar di Johor Bahru. Di samping itu, pengecualian bayaran tol selama seminggu telah diberikan kepada pengguna Tambak Johor dan Linkedua.
3. Antara faktor tarikan pelancong ke Malaysia adalah kejayaan negara mengimbangi keperluan ekonomi dengan kesihatan, yang jelas dibuktikan apabila pembukaan semula sektor ekonomi dan pelancongan secara berfasa tidak menyumbang kepada penularan COVID-19 yang tidak terkawal. Kejayaan ini bukanlah sekadar kebetulan tetapi ia dicapai melalui pelaksanaan rancangan yang rapi. Antaranya ialah Projek Rintis Gelembung Pelancongan Antarabangsa Langkawi (LITB), yang dilancarkan oleh Kementerian Pelancongan, Seni dan Budaya (MOTAC) bermula November 2021 yang telah berjaya menjadi platform untuk semua pihak terbabit seperti agensi-agensi Kerajaan Persekutuan dan Negeri, penggiat industri serta rakyat tempatan dalam menyesuaikan diri dengan situasi norma baharu. Di samping itu, Kementerian Kesihatan Malaysia mengesahkan bahawa tiada kes atau kluster COVID-19 di Malaysia yang berpunca daripada kehadiran pelancong asing melalui LITB ini.

4. Sementara itu, permainan-permainan tradisional adalah cerminan identiti dan jatidiri rakyat Malaysia yang menjadi salah satu tarikan dan produk pelancongan negara. Dalam hal ini, MOTAC telah melaksanakan pelbagai inisiatif melalui agensi-agensi di bawahnya seperti Jabatan Kebudayaan dan Kesenian Negara (JKKN) serta Jabatan Warisan Negara (JWN) dalam menganjurkan beberapa acara dan program bagi terus menjadikan permainan tradisi sebagai tarikan pelancong domestik dan antarabangsa. Antaranya ialah:

- (i) Menganjurkan Festival Permainan Malaysia sejak tahun 2015. Objektif program ini adalah untuk mengangkat dan mengetengahkan permainan tradisi kepada khalayak masyarakat supaya lebih cakna mengenai pelbagai permainan tradisional warisan masyarakat Malaysia. Antara permainan pelbagai kaum yang diketengahkan adalah Gasing, Galah Panjang, Congkak, Dam Aji, Batu Seremban, Kabadi, Sepak Raga, Yo-yo Cina, Tarik Tali, Gusti Lengan dan lain-lain lagi. Bagi tahun 2022, Festival Permainan Malaysia akan diadakan pada 23 hingga 25 September 2022 di Dataran Merdeka. Selain dapat memelihara dan mengekalkan permainan tradisional, program ini juga merupakan sebahagian daripada usaha JKKN untuk menyokong sektor pelancongan negara;
- (ii) Mengadakan Program Bimbingan Seni Budaya (PBSB) di peringkat sekolah rendah dan menengah dalam usaha melahirkan pelapis dan pewaris yang mampu untuk meneruskan legasi seni dan budaya Malaysia termasuk permainan tradisional iaitu Gasing. Program ini memupuk minat murid sekolah terhadap seni budaya termasuk permainan tradisional seawal zaman kanak-kanak lagi.

Sehingga kini MOTAC melalui JKKN dengan kerjasama Kementerian Pendidikan Malaysia telah berjaya membangunkan lapan (8) modul kesenian tradisional termasuk modul gasing selain modul-modul lain seperti tari, teater, muzik (gamelan dan kompong), silat, seni berbahasa, mak yong dan seni visual. Modul ini menjadi garis panduan kepada 2,401 Jurulatih Seni Budaya Negara (JSBN) dalam memberi latihan

kepada peserta program ini sejak tahun 2004;

- (iii) MOTAC juga pernah melaksanakan Festival Gasing dalam usaha mengetengahkan permainan ini kepada generasi hari ini serta Bengkel Juri Gasing bagi memberi nilai tambah kepada panel-panel yang dilantik untuk menjadi juri bagi pertandingan gasing; dan
- (iv) Meneroka pencalonan permainan tradisional ke peringkat antarabangsa melalui Konvensyen Pemeliharan Warisan Tidak Ketara 2003 (*Convention for the Safeguarding of the Intangible Cultural Heritage 2003*).

5. Pelaksanaan program/aktiviti berkaitan permainan tradisional secara berterusan akan dapat memartabatkan kembali permainan tradisional untuk terus dimainkan tidak hanya terhad oleh masyarakat di luar bandar tetapi menjadi satu produk untuk diketengahkan kepada semua. Di samping itu, ia juga dapat memupuk amalan baik di kalangan peminat-peminat dan penggiat-penggiat permainan tradisional serta para penyelidik.

6. Pada masa yang sama, agensi pelancongan dan pengusaha homestay turut digalakkan supaya menjadikan aktiviti permainan tradisional sebagai salah satu pakej dan pengisian produk mereka, sekali gus dapat menambahkan pendapatan kepada penggiat-penggiat industri permainan tradisional khususnya dan seterusnya dapat memperkasakan lagi pelancongan warisan dan budaya tempatan serta di persada dunia.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN M. KULASEGARAN
[IPOH BARAT]**

SOALAN:

minta **PERDANA MENTERI** menyatakan:-

- a) memberi perincian jumlah bilangan Pegawai Tadbir dan Diplomatik dengan mengikut gred dan kaum tahun 2022; dan
- b) langkah-langkah yang diambil oleh Kerajaan untuk menarik minat atau menggalakkan kaum Cina, India, Orang Asli, Sabah dan Sarawak menjawat jawatan di sektor awam.

JAWAPAN**DI JAWAB OLEH YB DATUK DR ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

1. Berdasarkan status pengisian perjawatan di dalam Sistem HRMIS Jabatan Perkhidmatan Awam sehingga 5 Julai 2022, bilangan pegawai Skim Perkhidmatan Pegawai Tadbir dan Diplomatik (PTD) adalah seramai 10,137 orang.
2. Pecahan mengikut Gred adalah seperti berikut:

Gred Jawatan	Bilangan	Peratus
KSN	1	0.01%
Turus 1	1	0.01%
Turus 2	3	0.03%
Turus 3	21	0.21%
JUSA A	52	0.51%
JUSA B	156	1.54%
JUSA C	379	3.74%
M54	833	8.22%
M52	1,242	12.25%
M48	2,207	21.77%
M44	3,179	31.36%
M41	2,063	20.35%
JUMLAH	10,137	100.00%

3. Pecahan mengikut kaum/etnik adalah seperti berikut:

Kaum	Bilangan	Peratus
Melayu	8,568	84.52%
India	604	5.96%
Cina	372	3.67%
Bumiputera Sarawak	260	2.56%
Bumiputera Sabah	200	1.97%
Orang Asli	14	0.14%
Lain-lain	119	1.17%
Jumlah	10,137	100%

4. Kaedah pengambilan ke Perkhidmatan Awam yang dilaksanakan oleh Suruhanjaya Perkhidmatan Awam adalah berdasarkan merit di mana calon-calon perlu melalui tapisan yang ditetapkan antaranya syarat kelayakan akademik, syarat lantikan dan proses temu duga. Proses ini dilaksanakan bagi memastikan hanya calon yang berkualiti sahaja dilantik ke Perkhidmatan Awam. Sehubungan itu, tiada sistem kuota mengikut kaum diamalkan dalam urusan pengambilan. Tawaran untuk berkhidmat dalam Perkhidmatan Awam adalah terbuka kepada semua kaum bergantung kepada kesediaan, minat dan kecenderungan mereka.
5. Suruhanjaya Perkhidmatan Awam (SPA) melaksanakan program Hari Kerjaya SPA yang dijalankan secara tahunan dan Program Outreach bertujuan untuk memberi pendedahan dan menarik minat calon untuk memohon pekerjaan dalam sektor awam terutama bagi jawatan-jawatan yang terletak di bawah kuasa SPA sebagai Pihak Berkuasa Melantik. Program ini mensasarkan pemohon pekerjaan yang terdiri daripada seluruh rakyat Malaysia termasuklah kaum Cina, India, Orang Asli, Bumiputera Sabah dan Sarawak

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

DARIPADA : TUAN M. KULASEGARAN [IPOH BARAT]

SOALAN

Tuan M. Kulasegaran [Ipoh Barat] minta **MENTERI SUMBER MANUSIA** menyatakan:

- (a) secara terperinci kadar pengangguran belia yang menganggur di kawasan bandar berbanding dengan kawasan luar bandar; dan
- (b) apakah langkah-langkah baru yang akan diambil oleh Kementerian bagi menangani jurang perbezaan kadar pengangguran belia di bandar dan di luar bandar.

JAWAPAN

Tuan Yang di-Pertua,

Berdasarkan Survei Tenaga Buruh terkini oleh Jabatan Perangkaan Malaysia, kadar pengangguran belia mengikut strata di kawasan **bandar** pada tahun 2021 bagi kategori umur 15-19 tahun adalah 11.4% manakala kategori umur 20-24 tahun adalah 10%. Manakala, kadar pengangguran belia mengikut strata di kawasan **luar bandar** pada tahun 2021 adalah lebih tinggi iaitu 22.9% bagi kategori umur 15-19 tahun dan 11.5% bagi kategori umur 20-24 tahun.

Kerajaan secara berterusan merangka dan melaksanakan pelbagai inisiatif merentasi kementerian dan agensi bagi membantu mengurangkan kadar pengangguran secara keseluruhannya, termasuk pengangguran belia di bandar dan di luar bandar. Antara inisiatif yang dilaksanakan adalah seperti berikut:

- (i) Bagi memastikan golongan pencari kerja yang berada di kawasan pedalaman tidak tercicir, Kementerian Sumber Manusia (KSM) melalui PERKESO menjalankan kerjasama strategik dengan Kementerian Pembangunan Luar Bandar (KPLB) melalui penubuhan Pusat Satelite MYFutureJobs. Inisiatif ini bertujuan untuk memudahkan dan membantu masyarakat luar bandar terutamanya pencari kerja termasuk graduan dari luar bandar untuk mendapatkan perkhidmatan seperti penggunaan komputer, capaian internet yang lebih stabil dan tempat yang selesa, selain berfungsi sebagai *focal point* untuk komuniti setempat mendapatkan pekerjaan melalui Portal MYFutureJobs.
- (ii) Program latihan semula (*re-skilling*), program peningkatan kemahiran (*up-skilling*) dan Pembelajaran Sepanjang Hayat yang menyediakan latihan kemahiran menjadi instrumen penting diperkenalkan oleh kerajaan dalam membantu golongan pekerja termasuk belia

dilengkапkan dengan kemahiran yang bersesuaian dan terkini. Menerusi inisiatif ini, belia berpeluang mendalami kemahiran berkaitan pekerjaan mereka atau kemahiran baharu sebagai persiapan mencari pekerjaan lain;

- (iii) PERKESO turut mempergiatkan beberapa program bagi menggalakkan penyertaan tenaga kerja termasuk di kalangan belia melalui program-program berikut :
 - a) Program Karnival Kerjaya;
 - b) Program Insentif Pengambilan Pekerja; dan
 - c) Program latihan kemahiran semula dan peningkatan kemahiran melalui Penyedia Latihan yang dilantik.
- (iv) KSM melalui PERKESO juga mengadakan jalinan kerjasama bersama Kementerian Belia Dan Sukan (KBS) untuk memperkasa Program Perantisan kepada para belia. Usahasama ini adalah seiring dengan penekanan Kementerian dalam menangani isu pengangguran belia yang lebih dinamik melalui integrasi MYBelia dan Portal MYFutureJobs.

Selain itu, KSM melalui Perbadanan Sumber Manusia Berhad (PSMB) telah menujuhkan HRDCorp Placement Centre (HPC) yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga Jun 2022, sebanyak 42,310 peluang pekerjaan tersedia melalui HPC dan lebih 6,000 pekerja berjaya ditempatkan melalui inisiatif ini.

Tuan Yang di-Pertua,

Selanjutnya, KSM melalui TalentCorp juga melaksanakan inisiatif yang berfokus kepada pembangunan kebolehpasaran dan kebolehkerjaan bakat muda negara melalui melalui sinergi dan kerjasama merentasi kementerian, jabatan, agensi Kerajaan, pemain industri dan institusi pengajian tinggi awam/ swasta serta teknikal. Antara inisiatif tersebut ialah:

- i. Platform analitis penilaian psikometrik bersepada Nurturing EXpert Talent (MYNext) yang menggabungkan graduan, pekerja, syarikat dan institusi pendidikan untuk merapatkan jurang di antara penawaran bakat dengan pekerjaan masa hadapan (*future jobs*). Lebih 160,000 profil bakat telah mendaftar dengan MYNext yang melibatkan 22 institusi pengajian tinggi awam dan swasta.
- ii. Program Latihan Industri Berstruktur yang bertindak sebagai penggalak kepada penglibatan syarikat dan industri untuk melatih bakat muda dalam negara. Ia juga menawarkan lebih banyak peluang penempatan latihan industri berkualiti melalui insentif potongan cukai berganda. Sejak dilaksanakan bermula tahun 2012, program ini telah memanfaatkan lebih 90,000 graduan.
- iii. Young Employable Students (YES!) yang merupakan langkah intervensi proaktif dengan kerjasama pemain industri dan jurulatih akademik untuk meningkatkan kemahiran kerjaya graduan dalam elemen kepimpinan, kemahiran insani (soft-skills), keusahawanan dan pendedahan kepada perkembangan semasa pasaran pekerjaan. Secara keseluruhannya, YES! telah memberi manfaat kepada lebih 10,000 bakat graduan di institusi pengajian tinggi awam dan swasta.
- iv. Kolaborasi Industri-Akademia [Industry-Academia Collaboration (IAC)] yang merupakan jalinan kerjasama industri untuk kebolehpasaran siswazah bagi memastikan bekalan modal insan berprestasi tinggi dan sedia untuk pasaran di Malaysia. Kolaborasi ini melibatkan 20 institusi pengajian tinggi dengan lebih 50 industri dari pelbagai sektor ekonomi.
- v. Program Pengekalan Bakat Tajaan Kerajaan [Scholarship Talent Attraction & Retention (STAR)] yang merupakan kolaborasi TalentCorp bersama Jabatan Perkhidmatan Awam (JPA) berperanan untuk memudahkan graduan tajaan Kerajaan yang tidak berpeluang mendapat penempatan pekerjaan di sektor awam untuk menyempurnakan ikatan perjanjian biasiswa bersama syarikat dan

pemain industri terkemuka Malaysia. Sehingga Disember 2021, lebih 7,000 graduan JPA telah dilluluskan di bawah program ini untuk berkhidmat bersama syarikat berdaftar melibatkan lebih 3,000 majikan.

- vi. Selain daripada itu, TalentCorp juga telah diluluskan oleh Kementerian Pengajian Tinggi (KPT) untuk memudahcara 105 bakat graduan di bawah program intervensi kebolehpasaran graduan (Grad2Work). Program ini dibangunkan untuk melatih bakat dengan jaminan kerja dan gaji permulaan setara kelayakan dalam bidang digital, teknologi maklumat dan Industri 4.0.

Program dan inisiatif di bawah KSM dan Agensi akan sentiasa diteruskan bagi menangani pengangguran termasuk penganguran belia di bandar dan di luar bandar.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN
DARIPADA : TUAN MA'MUN BIN SULAIMAN
(KALABAカン)

SOALAN

TUAN MA'MUN BIN SULAIMAN (KALABAカン) minta **MENTERI PERTANIAN DAN INDUSTRI MAKANAN** menyatakan perancangan Kementerian dalam menjamin keselamatan makanan negara (*Food Security*) demi memenuhi keperluan makanan rakyat negara ini, Apakah Kementerian akan mewujudkan Taman Kekal Pengeluaran Makanan (TKPM) atau Taman Kekal Penternakan Ruminan di kawasan Parlimen Kalabakan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) telahpun melaksanakan pelbagai intervensi untuk mengukuhkan sekuriti bekalan makanan negara yang secara tidak langsung turut menyumbang kepada kestabilan harga makanan. Antaranya:

1. melaksanakan sekatan eksport ayam bulat berkuat kuasa 1 Jun 2022 melibatkan bekalan ayam sebanyak 3.6 juta ekor sebulan sehingga bekalan ayam kembali stabil;
2. mewujudkan stokpail ayam melibatkan 4,536 tan metrik untuk menstabilkan bekalan ayam oleh Lembaga Pertubuhan Peladang;
3. mewujudkan stokpail ikan melibatkan 1,000 tan metrik oleh Lembaga Kemajuan Ikan Malaysia untuk menjamin kesinambungan bekalan ikan semasa musim tengkujuh dan perayaan;
4. memberi subsidi kepada pengeluar bagi membantu mengurangkan kos pengeluaran di ladang untuk meningkatkan kuantum pengeluaran ternakan.
5. memudah cara prosedur import (IP) soya, gandum, jagung dan makanan ternakan berasaskan haiwan dan tumbuhan melalui penangguhan fi permit serta mewujudkan *priority lane* bagi proses kemasukan pantas makanan asas;
6. mempercepatkan proses keperluan lesen pengimportan di bawah DVS melalui kelulusan secara interim bermula 1 Julai 2022 dengan proses kelulusan dalam masa tujuh (7) hari bekerja berbanding dengan 30 hingga 90 hari;
7. melaksanakan moratorium penguatkuasaan bagi pengambilan pekerja asing dalam industri agromakanan supaya produktiviti di tahap optimum; dan
8. memberi bantuan tunai tambahan sebagai bantuan makanan sebanyak RM100 kepada isi rumah kategori B40 dan RM50 kepada golongan bujang.

Kerajaan Negeri Sabah juga sedang dalam proses membentuk Jawatankuasa Sekuriti Makanan (*Food Security*) Negeri yang dipengerusikan oleh YAB Ketua Menteri. Pembentukan Jawatankuasa ini bertujuan membincangkan isu berkaitan sekuriti makanan dan merangka strategi pemantapan sekuriti makanan khususnya di Sabah.

Pada masa yang sama, Kerajaan Negeri Sabah sedang mengenal pasti lokasi yang sesuai di Kalabakan untuk mewujudkan Taman Kekal Pengeluaran Makanan (TKPM). Walau bagaimanapun, buat masa ini belum ada perancangan untuk mewujudkan Taman Kekal Penternakan Ruminan di kawasan Parlimen yang berkenaan.

Secara keseluruhan, inisiatif-inisiatif ini akan dapat menyumbang kepada kesinambungan bekalan makanan, sekaligus mengukuhkan sekuriti makanan negara.

Sekian, terima kasih.

SOALAN NO : 245

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN MA'MUN BIN SULAIMAN
(KALABAカン)**

SOALAN

TUAN MA'MUN BIN SULAIMAN (KALABAカン) minta **MENTERI PEMBANGUNAN LUAR BANDAR** menyatakan kesediaan mewujudkan loji-loji air untuk pembekalan air terawat kepada penduduk-penduduk Kampung Bergosong Kecil, Kg Pisak Pisak, Kg Sg Pukul, Kg Lahat Lahat, Kg Sg Melayu, dan Kg Sg Haji Kuning di Pulau Sebatik dan Kg Brantian dan Kg Sg Udin di dalam daerah Kalabakan. Penempatan penduduk yang disebutkan di atas telah tidak pernah menerima bekalan air terawat semenjak Sabah mencapai kemerdekaan pada tahun 1963.

SOALAN NO : 245

JAWAPAN

Untuk makluman Yang Berhormat, Program Bekalan Air Luar Bandar (BALB) di bawah Kementerian Pembangunan Luar Bandar (KPLB) adalah bertujuan untuk membantu mempercepat liputan dan merapatkan jurang bekalan air bersih dan terawat ke kawasan luar bandar melalui penyambungan paip retikulasi dari paip utama Pihak Berkuasa Air Negeri (PBAN) ke rumah-rumah atau akaun baharu di kawasan luar bandar yang masih belum mendapat bekalan air bersih dan terawat.

Bagi kawasan yang belum mendapat liputan bekalan air bersih dan terawat terutamanya di sekitar Pulau Sebatik, PBAN hendaklah mengemukakan permohonan kepada Unit Perancang Ekonomi Negeri (UPEN) Sabah untuk dimasukkan sebagai senarai keutamaan negeri agar permohonan ini boleh diangkat kepada Unit Perancang Ekonomi, Jabatan Perdana Menteri untuk kelulusan projek dan peruntukan, seterusnya dilaksanakan oleh pihak Kementerian.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN MA'MUN BIN SULAIMAN
[KALABAカン]**

SOALAN :

Minta **PERDANA MENTERI** menyatakan jumlah dan kaedah yang diguna pakai dalam penyaluran dana peruntukan Ahli Parlimen di kawasan-kawasan yang diwakili oleh Ahli Parlimen Blok Pembangkang yang tidak terlibat dengan Perjanjian Persefahaman (MOU) antara Kerajaan dan pihak Pakatan Harapan

JAWAPAN

**YB DATUK DR. HAJI ABD LATIFF BIN HAJI AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Peruntukan Khas YAB Perdana Menteri untuk Kawasan Parlimen hanyalah sebagai penambah dan pelengkap kepada peruntukan di bawah Rancangan Malaysia Lima Tahun. Penyediaan dan penyaluran peruntukan ini adalah mengikut dasar dan kemampuan semasa kewangan Kerajaan.

2. Bagi kawasan Parlimen yang tidak menandatangani Memorandum Persefahaman dengan Kerajaan, sejumlah RM100,000 telah disediakan bagi setiap Parlimen. Untuk Parlimen Kalabakan, peruntukan telah dibelanjakan sepenuhnya berdasarkan permohonan yang dikemukakan oleh Yang Berhormat.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN MA'MUN BIN SULAIMAN
(KALABAカン)**

SOALAN

TUAN MA'MUN BIN SULAIMAN (KALABAカン) minta **MENTERI TENAGA DAN SUMBER ASLI** menyatakan maklumat terkini yang telah dilaksanakan oleh Jabatan Ukur dan Pemetaan Malaysia terhadap perwartaan garis sempadan negara di Pulau Sebatik di antara negara kita dan negara jiran Republik Indonesia. Terdapat laporan penduduk negara jiran telah membina struktur di kawasan tanah negara kita di Kg Sg Hj Kuning disebabkan ketiadaan penyelesaian garis sempadan yang dimuktamadkan hingga hari ini.

Jawapan

Tuan Yang di-Pertua,

1. Untuk makluman Ahli Yang Berhormat, kerja-kerja penandaan dan pengukuran sempadan darat antarabangsa antara Malaysia dan Indonesia sepanjang 24 kilometer di Pulau Sebatik telah selesai pada tahun 2019. Walaubagaimanapun, dalam Mesyuarat Jawatankuasa Bersama Sempadan Malaysia-Indonesia Ke-43 atau JMI-43 yang telah diadakan di Kuala Lumpur dari 19 hingga 21 November 2019, kedua-dua negara telah bersetuju supaya Memorandum Persefahaman atau MOU bagi memuktamadkan jajaran sempadan ini ditandatangani secara berpakej dengan dua lagi kawasan *Outstanding Boundary Problem* (OBP) iaitu kawasan Sungai Sinapad dan Sungai Sesai serta kawasan B 2700 - B 3100 di Pensiangan. Pada masa ini, kerja-kerja penandaan dan pengukuran sempadan bagi kedua-dua kawasan OBP tersebut sedang giat dijalankan oleh pasukan kerja kedua-dua negara dan dijangka dapat diselesaikan pada tahun 2024.
2. Berhubung dakwaan terdapat pembinaan struktur oleh rakyat negara jiran di kawasan Malaysia, satu laporan rasmi boleh dibuat kepada pihak berkuasa dan sekiranya terbukti dakwaan tersebut benar, Kerajaan Malaysia boleh mengemukakan bantahan kepada Kerajaan Indonesia melalui saluran diplomatik.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

**DARIPADA : YB TUAN MA'MUN BIN SULAIMAN
(KALABAカン)**

SOALAN

TUAN MA'MUN BIN SULAIMAN [KALABAカン] minta **MENTERI KANAN KERJA RAYA** menyatakan kesediaan untuk meneruskan projek pembinaan Lebuh Raya Trans Borneo yang bakal menyambungkan Pekan Kalabakan ke Serudung di sempadan negara, Kompleks Kastam, Imigresen, Keselamatan dan Kuarantin (CIQS Complex) dan perumahan kakitangan Kerajaan dalam usaha pembukaan sempadan untuk tujuan sosial dan ekonomi di antara daerah Kalabakan serta Tawau dan Kalimantan Utara Indonesia. Inisiatif pembukaan sempadan darat ini juga dapat memungkinkan warga Sabah berantisipasi dengan perancangan pemindahan ibu kota Indonesia ke Kalimantan.

NOTA: DITERIMA DARIPADA JABATAN PERDANA MENTERI

JAWAPAN

Tuan Yang Di-Pertua,

Kementerian ini mengambil maklum akan keperluan cadangan jalan Trans Borneo yang bakal menghubungkan Kalabakan - Serudung (Malaysia) ke Kalimantan (Indonesia).

Untuk Makluman Ahli Yang Berhormat, Kementerian ini telah mengangkat cadangan untuk pelaksanaan Kerja-kerja Awalan dan Rekabentuk bagi Projek Pembinaan Jalan Dari Kalabakan ke Sempadan Malaysia-Indonesia (Simanggaris) pada *Rolling Plan 3*, Rancangan Malaysia Kedua Belas (RP3, RMKe-12) untuk pertimbangan Agensi Pusat. Kelulusan bagi cadangan projek ini tertakluk kepada pertimbangan Agensi Pusat berdasarkan keutamaan dan kedudukan kewangan Kerajaan.

Kerja Awalan dan Rekabentuk bagi projek ini perlu dilaksanakan terlebih dahulu sebelum projek ini dilaksanakan bagi mengenalpasti jajaran yang terbaik berdasarkan skop dan kos yang optimum yang menguntungkan Kerajaan dan rakyat, di samping memastikan kesan terhadap sosial dan alam sekitar dapat diminimumkan.

Manakala bagi cadangan pembinaan Kompleks Kastam, Imigresen, Keselamatan dan Kuarantin (CIQS) serta perumahan kakitangan Kerajaan adalah di bawah tanggungjawab Kementerian/Agensi yang berkaitan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : DATUK SERI PANGLIMA MADIUS
TANGAU (TUARAN)**

SOALAN

DATUK SERI PANGLIMA MADIUS TANGAU (TUARAN) minta **MENTERI PERTANIAN DAN INDUSTRI MAKANAN** menyatakan apakah langkah-langkah jangka panjang, pertengahan dan semasa untuk memastikan keperluan keselamatan makanan di negara ini terjamin.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) telah mengenal pasti beberapa intervensi yang bertujuan untuk memastikan bekalan makanan negara kekal terjamin.

Antara strategi jangka pendek dalam pelaksanaan adalah:

1. melaksanakan sekatan eksport ayam bulat berkuat kuasa 1 Jun 2022 melibatkan bekalan ayam sebanyak 3.6 juta ekor sebulan sehingga bekalan ayam kembali stabil;
2. mewujudkan stokpail ayam melibatkan 4,536 tan metrik oleh Lembaga Pertubuhan Peladang untuk menstabilkan bekalan dan harga ayam di pasaran;
3. mewujudkan stokpail ikan melibatkan 1,000 tan metrik oleh Lembaga Kemajuan Ikan Malaysia untuk menjamin kesinambungan bekalan ikan semasa musim tengkujuh dan perayaan;
4. memberi subsidi kepada pengeluar bagi membantu mengurangkan kos pengeluaran di ladang untuk meningkatkan kuantum pengeluaran;
5. memudah cara prosedur import (IP) soya, gandum, jagung dan makanan ternakan berasaskan haiwan dan tumbuhan melalui penangguhan fi permit serta mewujudkan *priority lane* bagi proses kemasukan pantas makanan asas;
6. mempercepatkan proses permohonan lesen pengimportan di bawah Jabatan Perkhidmatan Veterinar (DVS) menerusi kelulusan secara interim bermula 1 Julai 2022 dengan proses kelulusan dalam tempoh masa tujuh (7) hari bekerja berbanding 30 hingga 90 hari;
7. mewujudkan insurans tanaman iaitu Skim Takaful Agromakanan yang akan dilancarkan pada suku ketiga 2022 dengan memanfaatkan seramai 189,500 pesawah padi;

8. memberi bantuan tunai tambahan sebanyak RM100 kepada isi rumah kategori B40 dan RM50 kepada golongan bujang sebagai inisiatif bantuan makanan;
9. melaksanakan moratorium penguatkuasaan bagi pengambilan pekerja asing dalam industri agromakanan supaya produktiviti di tahap optimum; dan
10. melaksanakan advokasi berteraskan kehilangan lepas tuai dan pembaziran makanan secara berterusan untuk mengoptimumkan sumber dalam sistem makanan.

Manakala intervensi langkah sederhana dan panjang merangkumi usaha untuk:

1. mengkaji mekanisme untuk mengurangkan kos minyak sawit mentah kepada syarikat pengilangan makanan ternakan sebagai salah satu daripada inisiatif untuk mengurangkan kos makanan ternakan;
2. mempelbagaikan sumber import makanan dengan menambah bilangan loji di luar negara;
3. mewujudkan *One Stop Quarantine Centre* (OSQC) yang bertujuan untuk menambahbaik pemeriksaan biosecuriti negara melibatkan tujuh (7) perkhidmatan merentasi lapan (8) kementerian. OSQC akan meningkatkan kadar pemeriksaan sehingga 50% serta memberi jaminan dari aspek keselamatan makanan;
4. memberi galakan insentif cukai bersasar kepada 1,000 syarikat yang terlibat dalam aktiviti pertanian melalui pelanjutan tempoh pelepasan cukai pendapatan daripada 10 tahun kepada 15 tahun;
5. menggalakkan aktiviti pertanian bandar melalui pemerkasaan Program Kebuniti Keluarga Malaysia berjumlah RM30 juta;
6. memperkuuhkan industri input pertanian menerusi pembangunan aditif makanan ternakan, penambahbaikan formulasi makanan ternakan dan pembangunan jagung bijian.

MAFI yakin intervensi yang diambil mampu menjamin sekuriti makanan negara khususnya dalam memastikan ketersediaan bekalan makanan kekal mencukupi.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI PANGLIMA MADIUS TANGAU
[TUARAN]**

SOALAN

DATUK SERI PANGLIMA MADIUS TANGAU [TUARAN] minta **MENTERI ALAM SEKITAR DAN AIR** menyatakan menyatakan apakah status terkini Non-Revenue Water (NRW) di setiap wilayah dan negeri dan apakah langkah-langkah untuk menangani khususnya di wilayah Sabah.

JAWAPAN

Tuan Yang Di-Pertua,

1. Untuk makluman Ahli Yang Berhormat, purata kadar air tidak berhasil atau *Non-Revenue Water* (NRW) Kebangsaan pada tahun 2021 adalah 36%, berbanding 36.4% pada tahun 2020. Bagi Negeri Sabah, purata kadar NRW bagi tahun 2021 adalah 52.5% berbanding 59.4% pada tahun 2020. Perincian kadar NRW mengikut negeri bagi tahun 2021 adalah seperti berikut:

No.	Negeri	NRW (%)
1	Johor	25.1%
2	Kedah	49.9%
3	Kelantan	52.6%
4	Labuan	37.6%
5	Melaka	31.2%
6	Negeri Sembilan	32.3%
7	Pahang	49.3%
8	Perak	29.6%
9	Perlis	63.3%
10	Pulau Pinang	23.6%
11	Sabah	52.5%
12	Sarawak	45.3%
13	Selangor	27.5%
14	Terengganu	32.8%
Malaysia		36.0%

SOALAN NO: 250

Tuan Yang Di-Pertua,

2. Bagi membantu negeri mengurangkan kadar NRW, Kerajaan Persekutuan telah melaksanakan Program Pengurangan NRW Kebangsaan di bawah Rancangan Malaysia Kesebelas (RMKe-11) melalui 2 pendekatan. Pendekatan 1 secara geran dengan jumlah peruntukan yang diluluskan sebanyak RM535 juta. Manakala, Pendekatan 2 secara geran sepadan dengan peruntukan yang diluluskan sebanyak RM1.371 bilion.
3. Negeri Sabah adalah termasuk dalam negeri di bawah Pendekatan 1 dengan jumlah peruntukan sebanyak RM171.1 juta yang merangkumi kerja-kerja pemasangan meter SIV baharu, penggantian meter yang rosak, pemberian tangki dan penyediaan *Geographic Information System (GIS)*.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

**DARIPADA : YB DATUK SERI PANGLIMA MADIUS
TANGAU (TUARAN)**

SOALAN

DATUK SERI PANGLIMA MADIUS TANGAU [TUARAN] minta **MENTERI KANAN KERJA RAYA** menyatakan berapa peruntukan yang telah dibelanjakan untuk melaksanakan Lebuh Raya Pan Borneo khususnya pelbagai jajaran di Sabah dan apakah langkah-langkah untuk memastikan agar projek ini siap tepat pada masanya.

JAWAPAN

Tuan Yang Di-Pertua,

Untuk makluman Ahli Yang Berhormat, pelaksanaan projek Fasa 1 Lebuhraya Pan Borneo (LPB) Sabah dengan anggaran jarak keseluruhan 706 km dibahagikan kepada 35 pakej kerja di mana sehingga kini, 15 pakej kerja telah dibuat pelantikan kontraktor bagi tujuan kerja-kerja pembinaan dengan status kemajuan sehingga Mei 2022 bagi pakej kerja yang telah dimulakan adalah 63%, termasuklah pembinaan bagi tiga (3) pakej kerja baharu yang melibatkan laluan daripada Sandakan Mile 32 sehingga Sg. Baoto dan dijangka akan siap pada suku keempat 2024. Manakala satu (1) pakej kerja baharu yang melibatkan laluan dari Serusop ke Pituru pula dijangka akan dilaksanakan pada suku keempat 2022, menjadikan keseluruhan 16 pakej kerja akan dilaksanakan buat masa kini, dengan kos keseluruhan sebanyak RM 10,849 juta menggunakan peruntukan pembangunan (*Development Expenditure – DE*) sepenuhnya.

Untuk makluman Ahli Yang Berhormat juga, Kerajaan komited bagi memastikan kelangsungan pelaksanaan Projek Lebuhraya Pan Borneo Sabah di mana sejumlah RM1 bilion peruntukan pembangunan (DE) telah diperuntukkan setiap tahun. Selain daripada itu, beberapa *mitigation plan* dan tindakan susulan berterusan sedang dilaksanakan antaranya dengan melantik *Project Management Consultant* (PMC). Dengan mengambil kira peningkatan harga bahan binaan di pasaran, Kerajaan turut mempertimbangkan permohonan *Variation of Price* (VOP) tertakluk kepada kadar dan terma-terma yang ditetapkan, untuk memastikan kelancaran Projek Lebuhraya Pan Borneo Sabah sebagai pemangkin pembangunan sektor sosio-ekonomi, perindustrian serta pelaburan di sepanjang jajaran projek tersebut serta dapat disiapkan mengikut masa yang telah ditetapkan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK SERI PANGLIMA MADIUS TANGAU
[TUARAN]**

SOALAN

DATUK SERI PANGLIMA MADIUS TANGAU [TUARAN] minta **MENTERI KANAN PENDIDIKAN** menyatakan apakah langkah-langkah yang telah diambil untuk memastikan agar peperiksaan SPM itu diadakan hanya pada hari Isnin hingga Khamis sahaja.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan pengurusan peperiksaan Sijil Pelajaran Malaysia (SPM) berjalan lancar dan teratur, termasuk penyediaan Jadual Waktu Peperiksaan (JWP) SPM.

Untuk makluman Ahli Yang Berhormat, KPM telah membuat ketetapan bahawa JWP SPM dilaksanakan pada Isnin hingga Khamis sahaja. Dalam penyediaan JWP SPM ini, KPM membuat penelitian secara menyeluruh mengambil kira hari cuti hujung minggu bagi sekolah di negeri Kumpulan A (Johor, Kedah, Kelantan dan Terengganu) dan negeri Kumpulan B (Melaka, Negeri Sembilan, Pahang, Perak, Perlis, Pulau Pinang, Sabah, Sarawak, Selangor, Wilayah Persekutuan Kuala Lumpur, Wilayah Persekutuan Labuan dan Wilayah Persekutuan Putrajaya). Di samping itu, KPM turut mengambil kira Jadual Hari Kelepasan Am Persekutuan dan Negeri setiap tahun.

Selain itu, setiap tahun, KPM juga memuat naik draf JWP SPM ke laman sesawang KPM bagi satu tempoh yang ditetapkan untuk mendapatkan pandangan pelbagai pihak berkepentingan.

KPM sentiasa berusaha menambah baik pengurusan peperiksaan SPM seiring dengan keperluan semasa.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI PANGLIMA MADIUS BIN
TANGAU [TUARAN]

SOALAN

DATUK SERI PANGLIMA MADIUS BIN TANGAU [TUARAN] minta **MENTERI KEWANGAN** menyatakan berapa jenis subsidi yang diberikan oleh Kerajaan di pelbagai sektor dan berapa jumlah bagi setiap jenis.

JAWAPAN

Tuan Yang di-Pertua,

Jumlah peruntukan asal bagi bantuan dan subsidi yang disediakan bagi tahun 2022 adalah berjumlah RM31 bilion dan pecahan adalah seperti berikut :

- i. Sara Hidup dan Kebajikan Masyarakat sebanyak 11.1 bilion yang merangkumi Bantuan Keluarga Malaysia kepada golongan B40 serta bantuan kebajikan di bawah Jabatan Kebajikan Masyarakat;
- ii. Sektor Kepenggunaan sebanyak RM5.8 bilion termasuk subsidi barang kepenggunaan asas seperti petrol RON95, Diesel, LPG dan minyak masak;
- iii. Sektor Pendidikan sebanyak RM4.0 bilion;
- iv. Biasiswa/Pinjaman Pelajaran sebanyak RM3.8 bilion;
- v. Sektor Pertanian sebanyak RM2.0 bilion;
- vi. Faedah dan Pinjaman sebanyak RM1.2 bilion;
- vii. Sektor Pengangkutan sebanyak RM1.0 bilion;
- viii. Sektor Komuniti dan Keagamaan sebanyak RM1.1 bilion;
- ix. Sektor Kesihatan sebanyak RM0.6 bilion;
- x. Pemberian elaun dan lain-lain bantuan sebanyak RM0.3 bilion; dan
- xi. Sektor Keselamatan sebanyak RM0.1 bilion.

Kerajaan komited untuk menjamin kesejahteraan rakyat termasuk melindungi isirumah daripada kesan penuh impak peningkatan harga komoditi dan makanan global. Dengan itu, Kerajaan telah meneruskan subsidi sedia ada pada harga semasa dan menanggung subsidi yang jauh lebih tinggi daripada apa yang disediakan pada asalnya dalam Bajet 2022.

Untuk tahun 2022, bantuan dan subsidi diunjurkan meningkat dengan mendadak daripada peruntukan asal RM31 bilion kepada mencecah RM77.7 bilion. Peningkatan keperluan subsidi berbangkit ekoran langkah Kerajaan untuk bukan sahaja meneruskan subsidi tetapi meningkatkan perbelanjaan subsidi terutamanya berkaitan petrol, diesel,

Liquefied Petroleum Gas (LPG) dan minyak masak berikutnya harga minyak mentah mencecah USD100 setong berbanding dengan andaian Bajet 2022 pada paras USD67 setong.

Di samping itu, Kerajaan juga memperkenalkan subsidi baharu yang tidak disediakan di dalam Bajet 2022, khususnya subsidi elektrik serta subsidi ayam dan telur. Kerajaan komited untuk memastikan bekalan makanan asas yang mencukupi pada harga yang berpatutan. Untuk ayam dan telur, Kerajaan telah meluluskan peruntukan subsidi sebanyak RM1.1 bilion untuk tempoh bulan Februari hingga Ogos 2022. Di samping itu, Kerajaan juga telah memberi bantuan tunai tambahan bernilai RM630 juta kepada golongan penerima BKM.

Pada tahun ini, Kerajaan juga telah memutuskan untuk mengekalkan kadar tarif elektrik pada harga semasa walaupun kos bahanapi telah meningkat dengan mendadak. Adalah dianggarkan subsidi elektrik yang terlibat untuk tahun 2022 adalah sekitar RM6.5 bilion.

Strategi Kerajaan adalah menyemak dan menilai semula keberkesanan setiap program subsidi dan insentif adalah bagi memastikan agar peruntukan yang optimum disediakan bagi setiap program, dan yang paling penting, penjimatan yang diperoleh dapat disalurkan kepada mereka yang lebih memerlukan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUN DR. MAHATHIR BIN MOHAMAD
[LANGKAWI]**

SOALAN

minta **PERDANA MENTERI** menyatakan cadangan Kerajaan memberi ganjaran harta tanah dan lain-lain dilapor bernilai RM100 juta kepada Dato' Seri Najib, sama ada ianya telah diberi dan supaya diperincikan pemberian kepada bekas Perdana Menteri itu dan bila. Jika tidak, apakah Kerajaan masih akan meneruskan pemberian tersebut dan kenapa.

JAWAPAN:

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Di-Pertua,

1. Elaun dan Keistimewaan Mantan Perdana Menteri Malaysia adalah tertakluk kepada ketetapan kadar dan syarat di perenggan 21(1), Jadual Pertama, Akta Ahli Parlimen (Saraan) 1980 [Akta 237].
2. Walau bagaimanapun, dengan mengambil kira situasi semasa, Kerajaan sedang melaksanakan kajian terperinci berhubung Ketentuan Elaun dan Keistimewaan bagi Bekas Perdana Menteri yang termaktub di bawah Akta Ahli Parlimen (Saraan) 1980 [Akta 237] yang mana kajian ini akan melihat secara menyeluruh berhubung cadangan untuk memberikan ganjaran sama ada berbentuk harta tanah atau lain-lain kepada YB Dato' Sri Najib bin Tun Haji Abdul Razak, atau mana-mana bekas Perdana Menteri selepas YB Dato' Sri Najib bin Tun Haji Abdul Razak.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. DATO' HAJI MAHFUZ BIN HAJI OMAR [POKOK SENA]

SOALAN

DATO' HAJI MAHFUZ BIN HAJI OMAR [POKOK SENA] minta **PERDANA MENTERI** menyatakan statistik individu yang bankrap setiap tahun dari tahun 2018 hingga 2022 dan apakah langkah Kerajaan untuk membendung masalah ini.

JAWAPAN

**YB DATO SERI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, jumlah keseluruhan kes kebankrapan dari tahun 2018 hingga bulan Mei 2022 ("tempoh tersebut") adalah sebanyak 46,132 kes. Jumlah kes yang didaftarkan pada tahun 2018 adalah 16,482 kes dan pada tahun 2019 ialah sebanyak 12,051 kes. Manakala jumlah kes yang didaftarkan pada tahun 2020 pula adalah 8,351 kes.

Bagi tahun 2021, jumlah kes kebankrapan yang didaftarkan adalah 6,554 kes. Mulai bulan Januari 2022 hingga Mei 2022, sebanyak 2,694 kes kebankrapan telah didaftarkan. Jumlah kes kebankrapan mengikut pecahan negeri bagi tempoh tersebut ialah seperti berikut:

NEGERI	TAHUN					JUMLAH
	2018	2019	2020	2021	Mei 2022	
WILAYAH PERSEKUTUAN	1,707	1,122	872	918	413	5,032
SELANGOR	4,191	3,088	1,900	1,789	475	11,443
JOHOR	2,148	1,313	889	702	396	5,448
PERAK	1,346	870	679	423	176	3,494
PULAU PINANG	1,109	600	386	373	190	2,658
KEDAH	1,136	764	381	359	236	2,876
KELANTAN	583	610	324	253	147	1,917
TERENGGANU	483	350	367	139	63	1,402
PAHANG	770	413	399	256	121	1,959
MELAKA	375	361	254	146	53	1,189
NEGERI SEMBILAN	789	713	444	311	76	2,333
PERLIS	96	85	49	26	24	280
SARAWAK	758	708	551	293	104	2,414
SABAH	991	1,054	856	566	220	3,687
JUMLAH	16,482	12,051	8,351	6,554	2,694	46,132

Tuan Yang di-Pertua,

Kerajaan telah mengambil beberapa langkah untuk mengurangkan kadar kebankrapan dan cara yang terbaik untuk mengelak daripada kebankrapan ialah melalui kesedaran individu itu sendiri tentang risiko atau kesan daripada perintah kebankrapan. Kesedaran ini dapat diterap melalui pendidikan dan pendekatan perbelanjaan yang berhemah.

Bertentangan dan berbeza jauh sekali dengan miskonsepsi segelintir orang awam terhadap fungsi dan peranan Jabatan Insolvensi Malaysia, Jabatan Insolvensi Malaysia bukanlah pihak yang memulakan prosiding kebankrapan mahupun menjatuhkan perintah kebankrapan terhadap seseorang individu. Malahan sebaliknya, Jabatan Insolvensi Malaysia merupakan agensi yang mentadbir hal ehwal seseorang individu bankrap selepas perintah kebankrapan direkodkan di Mahkamah Tinggi.

Bagi membantu mengurangkan kadar kebankrapan, Jabatan Insolvensi Malaysia telah dan akan terus melaksanakan pelbagai program bagi mewujudkan kesedaran masyarakat tentang isu muflis dengan melaksanakan program bersama masyarakat (*outreach programme*) serta Mdl Prihatin. Program ini bertujuan untuk menyampaikan maklumat, memberikan pendidikan dan mewujudkan kesedaran kepada orang awam termasuklah taklimat dan ceramah kesedaran mengenai isu muflis kepada agensi-agensi awam, swasta, orang awam dan pelajar-pelajar institusi pengajian tinggi awam dan swasta bagi menerangkan kesan dan akibat daripada perintah kebankrapan. Ini bertujuan untuk memberi pendedahan kepada semua lapisan masyarakat supaya masalah ini dapat ditangani di peringkat awal lagi.

Selanjutnya, Jabatan Insolvensi Malaysia juga turut meminda peruntukan perenggan 5(1)(a) Akta Insolvensi 1967 [Akta 360] melalui Akta Insolvensi (Pindaan) 2020 [Akta A1624] yang telah diwartakan pada 22 Oktober 2020 dan berkuat kuasa sejak 1 September 2021. Pindaan ini adalah untuk menetapkan nilai had minima keberhutungan kepada RM100,000.

Selain itu, Kerajaan juga melalui Agensi Kaunseling dan Pengurusan Kredit (AKPK) iaitu sebuah agensi di bawah Bank Negara Malaysia telah mengadakan program-program untuk memberi kesedaran tentang isu muflis. Program ini juga melibatkan perancangan kewangan kepada semua golongan supaya dapat menangani masalah pengurusan kewangan di peringkat pra kebankrapan. Pengurusan kewangan yang berhemah akan menjamin kedudukan kewangan di tahap yang terbaik. Melalui program ini akan dapat membantu masyarakat untuk berbelanja

NO SOALAN :255

secara berhemah dan bijak dalam pengurusan kewangan bagi mengelakkan kemufusan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB DATO' HAJI MAHFUZ BIN HAJI OMAR
(POKOK SENA)**

SOALAN

DATO' HAJI MAHFUZ BIN HAJI OMAR (POKOK SENA) minta **MENTERI SUMBER MANUSIA** menyatakan statistik keperluan pekerja asing di Malaysia dari tahun 2020 - 2022 dan berapakah jumlah kemasukan pekerja asing dalam tempoh tersebut mengikut sektor.

INPUT DARIPADA KDN:

JUMLAH PEKERJA ASING YANG MEMEGANG PAS LAWATAN KERJA SEMENTARA (PLKS) DI MALAYSIA DARI TAHUN 2020 SEHINGGA JUN 2022

	2020	2021	1 JAN – 30 JUN 2022
JUMLAH	1,483,380	1,171,909	1,149,608

JUMLAH PEKERJA ASING AKTIF YANG MEMEGANG PAS LAWATAN KERJA SEMENTARA (PLKS) DI MALAYSIA MENGIKUT WARGANEGARA SEHINGGA 30 JUN 2022

	BANGLADESH	INDONESIA	NEPAL	LAIN-LAIN NEGARA
JUMLAH	385,202	338,903	160,422	265,081

JUMLAH PEKERJA ASING AKTIF YANG MEMEGANG PAS LAWATAN KERJA SEMENTARA (PLKS) DI MALAYSIA MENGIKUT SEKTOR PEKERJAAN SEHINGGA 30 JUN 2022

	PERKILANGAN	PEMBINAAN	PERLADANGAN	PERKHIDMATAN, PERTANIAN, PERLOMBONGAN DAN PENGKUARIAN, DAN PEMBANTU RUMAH ASING (PRA).
JUMLAH	407,233	266,690	136,235	339,450

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' HAJI MAHFUZ BIN HAJI OMAR
[POKOK SENA]

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI KEWANGAN** menyatakan data lengkap berapakah jumlah pinjaman kerajaan Malaysia diperolehi daripada GLC dan Dana awam seperti KWSP, KWAP, TH, LTAT, Perkeso dan lain-lain sejak 5 tahun lepas dan berapa jumlah telah dibayar balik mengikut tahun.

JAWAPAN

Tuan Yang di-Pertua,

Secara amnya, instrumen hutang Kerajaan Persekutuan dipegang oleh pemegang pemastautin dan bukan pemastautin. Pemegang pemastautin adalah terdiri daripada pertubuhan keselamatan sosial, syarikat insurans, institusi perbankan, institusi kewangan pembangunan dan lain-lain.

Dalam hal ini, KWSP dan KWAP merupakan antara pelabur institusi yang turut melanggan apabila Kerajaan membuat terbitan instrumen Sekuriti Kerajaan Malaysia (MGS) dan Terbitan Pelaburan Kerajaan Malaysia (MGII). Sehingga akhir-Mac 2022, jumlah pemegangan KWSP dan KWAP dalam instrumen MGS masing-masing berjumlah RM113.2 bilion dan RM19.1 bilion, manakala pemegangan dalam instrumen MGII pula berjumlah RM123.3 bilion dan RM9.8 bilion.

Maklumat rasmi pemegangan hutang Kerajaan Persekutuan yang diterbitkan dalam negeri boleh dirujuk melalui Sorotan dan Perangkaan Bulanan Bank Negara Malaysia di (<https://www.bnm.gov.my/-/monthly-highlights-statistics-in-may-2022>). Berdasarkan maklumat tersebut, Tabung Haji (TH), Lembaga Tabung Angkatan Tentera (LTAT) dan Perkeso tidak disenaraikan sebagai antara pemegang utama instrumen hutang Kerajaan Persekutuan.

Kerajaan akan membuat bayaran balik kepada KWSP dan KWAP mengikut jadual berdasarkan tarikh kematangan instrumen MGS dan MGII yang dipegang oleh dua entiti ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' HAJI MAHFUZ BIN HAJI OMAR
[POKOK SENA]

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI KEWANGAN** menyatakan perincian tentang gaji, elauan dan sebarang imbuhan yang diberikan kepada pengurus, ahli lembaga pengarah dan pengurusan kanan Syarikat Digital Nasional Berhad.

JAWAPAN

Tuan Yang di-Pertua,

Untuk makluman Ahli Yang Berhormat, sehingga 31 Disember 2021, yang merupakan tarikh penyata kewangan DNB yang telah diaudit, jumlah keseluruhan imbuhan yang diterima oleh Ahli Lembaga Pengarah dan Pengurusan Kanan DNB adalah berjumlah RM3.3 juta.

Untuk makluman Ahli Yang Berhormat, terma pekerjaan DNB adalah berada dalam piawaian industri berdasarkan kajian penandaaranan yang dijalankan oleh konsultan sumber manusia terkemuka serta penandaaranan bersama syarikat telekomunikasi tempatan, Telekom Malaysia, sebagai sebuah syarikat berkaitan Kerajaan. Selain itu, pakej gaji dan imbuhan adalah disyorkan oleh Jawatankuasa Pencalonan dan Ganjaran (*Nomination and Remuneration Committee*) dan diluluskan oleh pihak Lembaga Pengarah DNB.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' HAJI MAHFUZ BIN HAJI OMAR
[POKOK SENA]

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI KEWANGAN** menyatakan jumlah bayaran lima peratus tunai royalti pengeluaran Petroleum kepada kerajaan Kelantan mengikut tahun dari 2019 hingga 2022.

JAWAPAN

Tuan Yang di-Pertua,

Untuk makluman Ahli yang Berhormat dan Dewan Yang Mulia ini,

Bagi pengeluaran petroleum di Semenanjung Malaysia, tiada Bayaran Tunai dibuat oleh PETRONAS kepada negeri-negeri kerana kedudukan medan pengeluaran yang beroperasi adalah di luar wilayah negeri termasuk negeri Kelantan.

Namun demikian, Kerajaan Persekutuan menyediakan bayaran dalam bentuk Wang Ehsan kepada negeri-negeri terdekat dengan kawasan pengeluaran termasuk negeri Kelantan yang mana dana Wang Ehsan tersebut digunakan bagi melaksanakan projek dan program untuk manfaat rakyat di negeri berkenaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS (2022)**

PERTANYAAN : BUKAN LISAN

**DARIPADA : YB MARIA CHIN ABDULLAH
[PETALING JAYA]**

SOALAN

Minta **PERDANA MENTERI** menyatakan adakah Kerajaan mengadakan pelan untuk memperbaiki serta mempertingkatkan sistem audio dan video untuk Mahkamah Syariah.

JAWAPAN

**YB SENATOR DATUK HAJI IDRIS HAJI AHMAD
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Kerajaan telah meluluskan penyambungan semula Projek Transformasi e-Syariah Versi 3 (ESV3) pada tahun 2021 dengan kos sebanyak RM3.49 juta. Projek ESV3 bermatlamat untuk menambahbaik platform semasa E-Syariah di samping memenuhi keperluan baharu pengguna Negeri. Secara umum komponen melibatkan pelaksanaan projek tersebut adalah seperti berikut:

i. Modul utama e-Syariah:

- a) Pengurusan Kes Mahkamah
- b) e-Bicara
- c) e-Nafkah
- d) e-Sulh
- e) e-Nasihat
- f) Sistem Pendaftaran Peguam Syarie (SPPS)

- g) Document Management System (DMS)
- h) Portal e-Syariah (e-Filling & e-Review)
- i) Aplikasi Mobil
- j) Pelaporan Statistik
- k) Dashboard / Business Intelligent (BI)
- l) Kewangan (online payment & offline payment)
- m) Keselamatan

ii. Modul Sokongan sistem e-Syariah:

- a) e-Aduan
- b) Key Performance Indicator (KPI)
- c) Electronic Training Management System (ETMS)

iii. Integrasi Sistem:

- a) MyIdentity (JPN)
- b) SPPIIM (JAKIM)
- c) eJinayat (JAKIM)
- d) iGFMAS / iSPEK / SAGA (MAIS)
- e) iGuaman (JBG)
- f) eVetting (CGSO)

2. Nilai tambah yang akan diberi penumpuan di dalam pelaksanaan projek baharu ini adalah seperti berikut:

- i. Mewujudkan fungsi pendaftaran penuh secara atas talian melibatkan semua pengguna di dalam proses pengurusan kes;
- ii. Memastikan elemen *End-To-End Services* sebagaimana saranan MAMPU dilihat secara terperinci dalam setiap modul yang akan dibangunkan;
- iii. Memasukkan fungsian baharu berdasarkan sistem i-Syariah Negeri Sarawak iaitu e-Filling dan e-Review; dan
- iv. Memastikan pelaksanaan projek turut memberi perhatian khusus melaksanakan perkhidmatan secara norma baharu.

3. Skop lain yang dicadangkan dalam penambahbaikan platform e-Syariah Versi 3 adalah CRT, VCS, iKiosk. Pembangunan dan integrasi skop ini **tidak termasuk** dalam pembangunan fasa sedia ada. Skop ini melibatkan:

- i) *Court Recording & Transcribing System (CRT)*
- ii) *Video Conferencing System (VCS)*
- iii) *Vulnerable Witness Video Link (VW-VL)*
- iv) *Exhibit Presentation System (EPS)*
- v) *Video Link to Prison & Tech Court*
- vi) *Interactive Kiosk System & Hardware*

Proses naik taraf sistem audio video ini memerlukan peruntukan yang tinggi iaitu anggaran kos RM500,000 untuk satu dewan bicara. Oleh kerana peruntukan untuk menyediakan kemudahan ini adalah tinggi, Kerajaan Persekutuan mencadangkan agar Kerajaan Negeri menyediakan peruntukan kewangan bagi melaksanakan proses naiktaraf ini di mahkamah-mahkamah Syariah negeri. Ini adalah kerana sistem ini melibatkan fasiliti bangunan yang berada di bawah milikan Kerajaan Negeri.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : PUAN MARIA CHIN BINTI ABDULLAH
[PETALING JAYA]**

SOALAN

YB PUAN MARIA CHIN BINTI ABDULLAH [PETALING JAYA] minta **MENTERI PERUMAHAN DAN KERAJAAN TEMPATAN** menyatakan adakah Pihak Berkuasa Perancang Tempatan (PBPT) mempunyai kuasa untuk mengguna atau membenarkan digunakan mana-mana tanah melainkan menurut rancangan tempatan dan siapa yang mempunyai kuasa untuk menyiasat dan mengambil tindakan di bawah Akta 172 mengenai perkara ini.

JAWAPAN

Tuan Yang di-Pertua,

Untuk makluman Ahli Yang Berhormat, Seksyen 5 Akta Perancangan Bandar dan Desa 1976 (Akta 172) mentafsirkan Pihak Berkuasa Perancang Tempatan (PBPT) adalah Pihak Berkuasa Tempatan (PBT) bagi kawasan di mana tanah atau bangunan itu terletak. Sebagaimana Seksyen 6, Akta 172, fungsi-fungsi PBPT adalah untuk:

- i. mengawal selia, mengawal dan merancang pemajuan dan penggunaan semua tanah dan bangunan dalam kawasannya;
- ii. mengusahakan, membantu dan menggalakkan pemungutan, penyenggaraan, dan penyiaran perangkaan, buletin, dan monograf, dan penyiaran lain berhubung dengan perancangan bandar dan desa serta perkaedahannya; dan
- iii. melaksanakan apa-apa fungsi lain yang ditugaskan kepadanya dari semasa ke semasa oleh Pihak Berkuasa Negeri atau oleh Jawatankuasa.

PBPT juga boleh melaksanakan apa-apa fungsi lain yang menjadi tambahan kepada, atau bersampingan dengan, atau berbangkit daripada apa-apa fungsi yang dinyatakan di atas dan melakukan semua perkara yang perlu atau suai manfaat bagi menjalankan fungsinya di bawah Akta 172. Antara fungsi utama PBPT adalah menyediakan Rancangan Tempatan (RT) bagi mana-mana kawasan pentadbirannya di bawah Seksyen 12, Akta 172, dan mempertimbangkan permohonan Kebenaran Merancang (KM) di bawah Seksyen 21 dan 22, Akta 172.

Seterusnya Seksyen 19, Akta 172 memperuntukkan bahawa PBPT dikecualikan daripada permohonan KM menurut RT yang berkuat kuasa yang mana menyokong peruntukan Seksyen 18 di mana tiada seorang pun melainkan PBT boleh menggunakan atau membenarkan digunakan mana-mana tanah atau bangunan melainkan menurut RT yang sedang berkuat kuasa ataupun menurut draf pengubahan RT.

Untuk makluman Ahli Yang Berhormat, hak milik tanah adalah hak milik mutlak tuan punya tanah seperti yang telah ditetapkan di dalam Kanun Tanah Negara (KTN). Sebarang aktiviti pembangunan atau pemajuan yang hendak dijalankan di atas tanah tersebut adalah di atas tanggungjawab pemunya tanah. Walau bagaimanapun, bagi menjalankan aktiviti pemajuan di atas tanah tersebut, PBT berhak untuk menentukan jenis-jenis pemajuan yang dibenarkan untuk dibangunkan di tanah tersebut berdasarkan kepada RT yang berkuat kuasa. Antara mekanisme kawalan perancangan adalah melalui KM yang diberikan sebelum suatu pembangunan dijalankan. Seksyen 19, Akta 172 menerangkan larangan terhadap pemajuan tanpa mendapat KM selain daripada PBT.

PBT melalui Seksyen 26 hingga Seksyen 29, Akta 172, mempunyai kuasa untuk mengambil tindakan penguatkuasaan terhadap mana-mana rancangan pemajuan atau pembangunan yang tidak mengikut kebenaran yang telah diberikan oleh PBT.

Selain daripada itu, PBT di bawah pentadbiran kerajaan negeri juga boleh mengguna pakai seksyen-seksyen yang berkaitan dalam Akta Kerajaan Tempatan 1976 (Akta 171) dan juga Akta Jalan, Parit dan Bangunan 1974 (Akta 133) bagi arahan-arahan PBT, penalti dan penguatkuasaan terhadap kesalahan-kesalahan yang berkaitan dengan pembangunan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : PUAN MARIA CHIN BINTI ABDULLAH
[PETALING JAYA]**

SOALAN

YB PUAN MARIA CHIN BINTI ABDULLAH [PETALING JAYA] minta **MENTERI PERUMAHAN DAN KERAJAAN TEMPATAN** menyatakan apakah status pembangunan Sistem Tribunal Pengurusan Strata Online (eTPS Online) dan mengapa Sistem eTPS Online belum lagi dilancarkan memandangkan pembangunan tersebut bermula pada bulan Januari 2021 dan dijangkakan siap pada bulan Jun 2021.

JAWAPAN

Tuan Yang di-Pertua,

Untuk makluman Ahli Yang Berhormat, Sistem Tribunal Pengurusan Strata (eTPS) merupakan sistem secara dalam talian yang digunakan oleh Tribunal Pengurusan Strata (TPS). Sistem ini melibatkan dua fasa iaitu Fasa 1 bagi kegunaan dalaman Tribunal Perumahan dan Pengurusan Strata (TPPS) dan Fasa 2 iaitu bagi memberikan akses kepada orang awam memfailkan tuntutan di TPS secara dalam talian tanpa perlu hadir ke kaunter. Ini merupakan suatu inisiatif Kementerian Perumahan dan Kerajaan Tempatan (KPKT) bagi membangunkan suatu sistem pengurusan TPS secara dalam talian. Untuk makluman Ahli Yang Berhormat, sistem ini dibangunkan secara berperingkat.

Sistem eTPS Fasa 1: Untuk kegunaan dalaman Tribunal Perumahan dan Pengurusan Strata (TPPS)

Sistem eTPS Fasa 1 telah dilaksanakan dan mula digunakan pada 1 Julai 2020. Pada peringkat Fasa 1, penggunaan sistem hanya untuk kegunaan dalaman.

Sistem eTPS Fasa 2: Terbuka kepada orang awam untuk membuat pemfailan secara dalam talian

Sistem eTPS Fasa 2 akan memberikan akses kepada orang awam untuk membuat pemfailan secara dalam talian. Pada masa ini, sistem eTPS Fasa 2 masih dalam proses pembangunan kerana terdapat isu perundangan berkenaan dengan penggunaan tandatangan secara digital semasa proses pemfailan dilakukan secara dalam talian.

Untuk makluman Ahli Yang Berhormat, pada masa ini pandangan dari aspek perundangan sedang diteliti bagi memastikan proses pemfailan secara dalam talian dan tandatangan digital yang dilakukan melalui sistem eTPS Fasa 2 ini adalah teratur.

Untuk makluman Ahli Yang Berhormat juga, sistem eTPS Fasa 2 ini sedang dalam pembangunan bagi memudahkan capaian secara dalam talian oleh pengguna TPS. Ini adalah selaras dengan hasrat KPKT untuk terus memberikan perkhidmatan yang terbaik kepada orang awam.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : PUAN MARIA CHIN BINTI ABDULLAH
[PETALING JAYA]**

SOALAN

PUAN MARIA CHIN BINTI ABDULLAH [PETALING JAYA] minta **MENTERI KANAN PENDIDIKAN** menyatakan apakah data belanjawan dan jumlah peruntukan keseluruhan bagi pembaikan infrastruktur dan fasiliti di sekolah rendah dan menengah di seluruh negara bagi tahun 2018 hingga 2022.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada usaha pembaikan infrastruktur dan fasiliti bangunan yang dapat berfungsi dalam keadaan baik untuk semua sekolah di seluruh negara.

Untuk makluman Ahli Yang Berhormat, peruntukan penyelenggaraan institusi pendidikan termasuk di sekolah rendah dan menengah bagi tahun 2018 sehingga 2022 adalah sebanyak RM3.498 bilion seperti berikut;

TAHUN	PERUNTUKAN (RM)
2018	639,620,860
2019	659,130,000
2020	550,000,000
2021	800,000,000
2022	850,000,000
JUMLAH PERUNTUKAN	3,498,750,860

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DR. MASZLEE BIN MALIK
[SIMPANG RENGGAM]**

SOALAN

DR. MASZLEE BIN MALIK [SIMPANG RENGGAM] minta **MENTERI PELANCONGAN, SENI DAN BUDAYA** menyatakan usaha dan insentif Kementerian untuk membuka akses terbuka kepada koleksi di Arkib Negara dalam portal milik Arkib Negara untuk kegunaan umum seperti yang diusahakan oleh National Archives of Singapore.

JAWAPAN

Tuan Yang di-Pertua,

1. Untuk makluman, pada masa ini Arkib Negara Malaysia telah sedia ada menyediakan kemudahan perkhidmatan penyelidikan secara dalam talian menerusi aplikasi *Online Finding Aid (OFA)*.
2. Sehingga kini, sebanyak 1,772,460 bahan boleh diakses oleh penyelidik dalam dan luar negara melalui aplikasi tersebut. Arkib Negara Malaysia akan meneruskan usaha pendigitalan koleksi bahan arkib supaya ia dapat diakses oleh umum.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DR. MASZLEE BIN MALIK
[SIMPANG RENGGAM]**

SOALAN

Minta **MENTERI PENGAJIAN TINGGI** menyatakan apakah wujud usaha sama di antara Kementerian dengan KPM untuk penyelarasan data murid-murid sedari sekolah rendah sehingga ke sekolah menengah demi memastikan mereka memilih kursus-kursus di IPT yang sesuai dengan pencapaian, kecenderungan, bakat dan kelayakan mereka.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa menjalankan kerjasama rapat dengan Kementerian Pendidikan Malaysia (KPM) dalam memastikan kesinambungan pendidikan menengah dan pendidikan tinggi. Ini terutamanya bagi perkara yang melibatkan proses pelajar lepasan SPM dan STPM/Setaraf memilih kursus-kursus di IPT yang sesuai dengan pencapaian, kecenderungan, bakat dan kelayakan mereka.

Antara usaha yang dijalankan termasuklah:

- (i) Perkongsian data keputusan SPM, STPM dan Kolej Matrikulasi antara Lembaga Peperiksaan (LP), Majlis Peperiksaan (MPM) dan Bahagian Matrikulasi, KPM (BM,KPM) dengan Bahagian Kemasukan Pelajar Awam, Jabatan Pendidikan Tinggi (BKPA,

JPT). Kerjasama ini adalah untuk memastikan calon-calon dapat memilih program pengajian yang bersesuaian dengan pencapaian akademik serta kecenderungan minat calon menerusi Sistem Permohonan Kemasukan Pelajar IPTA dan ILKA yang dikenali sebagai UPUOnline®;

- (ii) Bekerjasama dengan Bahagian Pengurusan Sekolah Harian KPM (BPSH, KPM) bagi mendapatkan data penilaian kecenderungan calon semasa di sekolah menengah untuk dipaparkan dalam UPOonline®. Ini bertujuan untuk membantu calon semasa membuat pilihan program pengajian;
- (iii) Menyediakan platform penilaian semula personaliti dan kecenderungan kerjaya yang terkini melalui e-Profiling (<https://eprofiling.mohe.gov.my/>) di portal GREaT KPT. Kemudahan ini membolehkan calon membuat pilihan yang lebih tepat berdasarkan data yang terkini dan persekitaran semasa yang diketahui boleh mempengaruhi personaliti dan kecenderungan seseorang; dan
- (iv) Menjalankan kerjasama strategik dengan Bahagian Sukan, Kokurikulum & Kesenian KPM (BSKK, KPM) dan BM, KPM bagi mendapatkan markah kokurikulum yang mewakili 10% dalam pengiraan merit kemasukan ke IPTA dan ILKA. Dalam hal ini, 10% markah yang dimiliki oleh calon adalah signifikan dan amat membantu calon dalam susunan merit yang terdiri daripada 90% markah akademik dan 10% markah kokurikulum. Kerjasama ini juga bertujuan mengenal pasti calon atlet yang akan dipertimbangkan kemasukan melalui Laluan Khas Sukan di mana mereka tidak perlu bersaing dengan kumpulan arus perdana untuk melanjutkan pengajian, dan hanya perlu memenuhi Syarat Am dan Syarat Khas program pengajian yang dipilih.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DR. MASZLEE BIN MALIK
[SIMPANG RENGGAM]**

SOALAN

DR. MASZLEE BIN MALIK [SIMPANG RENGGAM] minta **MENTERI KANAN PENDIDIKAN** menyatakan apakah Kementerian masih meneruskan usaha mengurangkan berat beg sekolah seperti yang telah dinyatakan dalam surat pekeliling jadual anjal melalui Surat Siaran KPM Bilangan 8 Tahun 2018 bertarikh 12 September 2018. Mengapakah surat siaran tersebut tiada lagi atau tidak dapat ditemui lagi di laman web KPM sekarang.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk mencari jalan penyelesaian yang terbaik dalam menangani isu beg berat murid yang telah berlarutan sekian lama. Usaha ini masih diteruskan demi kesejahteraan murid untuk ke sekolah.

Untuk makluman Ahli Yang Berhormat, Surat Siaran KPM Bilangan 8 Tahun 2018: Panduan Menangani Isu Beg Berat Murid di Sekolah masih berkuat kuasa. Sehingga kini, surat siaran tersebut masih boleh dicapai melalui portal KPM. KPM juga telah melaksanakan penambahbaikan inisiatif bagi menangani isu beg berat secara holistik. Berdasarkan penelitian ke atas maklum balas yang diperoleh, isu beg berat adalah kritikal dalam kalangan murid sekolah rendah, khususnya murid Tahap 1, iaitu Tahun 1, Tahun 2 dan Tahun 3. Oleh yang demikian, KPM telah melaksanakan inisiatif seperti berikut:

1. Penyediaan Lokar Sekolah Rendah Secara Berfasa

Fasa 1 melibatkan penyediaan lokar untuk murid Tahun 1 dan Tahun 2 di sekolah rendah yang beroperasi secara dua sesi. Pelaksanaan ini akan melibatkan 10,662 kelas dengan 323,186 orang murid.

Bagi Fasa 2 pula, penyediaan lokar akan diperluaskan kepada murid Tahun 3, Tahun 4, Tahun 5 dan Tahun 6 di sekolah rendah yang beroperasi secara dua sesi. Pelaksanaan dijangka pada tahun 2023. Bagi sekolah satu sesi pula, murid akan menyimpan buku di dalam laci meja di bilik darjah masing-masing.

Pada masa ini, perolehan lokar bagi Fasa 1 telah selesai dilaksanakan secara tender terbuka. Pembekalan lokar ini akan dilaksanakan mulai Oktober 2022.

2. Penyusunan Semula Jadual Waktu

KPM telah melaksanakan penyusunan semula jadual waktu pada peringkat sekolah melalui surat makluman bertarikh 23 Mac 2022. KPM memutuskan agar jadual waktu disusun antara tiga hingga empat mata pelajaran bagi Tahap 1 dan lima hingga enam mata pelajaran bagi Tahap 2 dalam sehari.

Penyusunan jadual waktu ini membolehkan guru merancang pengajaran dan pembelajaran (PdP) secara optimum dengan memperuntukkan masa bagi melaksanakan pendekatan modular dan bertema serta pembelajaran berdasarkan projek dan pendekatan lain yang bersesuaian agar menjadikan pembelajaran murid lebih bermakna. Penyusunan ini dibuat berdasarkan prinsip mengurangkan bilangan mata pelajaran dalam jadual waktu sehari dengan mengambil kira peruntukan minimum jam setahun.

3. Buku Aktiviti, Buku Kerja dan Buku Latihan

KPM telah mengambil inisiatif untuk membuat penambahaikan terhadap Surat Pekeliling Ikhtisas (SPI) Bil. 1/2000: Penggunaan Buku Kerja di Sekolah Rendah bertarikh 3 Februari 2000. Penambahbaikan ini selaras dengan Kurikulum Standard Sekolah Rendah (KSSR) (Semakan 2017) yang berfokuskan kepada kandungan kurikulum, pedagogi dan pentaksiran. Sehubungan dengan itu, berdasarkan SPI Bil. 3 Tahun 2022 bertarikh 24 Mac 2022, penggunaan buku aktiviti, buku kerja dan buku latihan bagi murid sekolah rendah adalah mengikut ketetapan berikut:

- i. buku aktiviti yang disediakan oleh KPM (bagi mata pelajaran yang mempunyai buku aktiviti);
- ii. buku kerja sebagai bahan rujukan atau bahan ulang kaji di luar waktu PdP; dan
- iii. buku latihan dihadkan tidak melebihi dua buah buku bagi setiap mata pelajaran pada satu-satu masa.

4. Buku Teks Digital

KPM menerbitkan buku teks dalam format digital secara berterusan. Sehingga kini, sebanyak 718 judul buku teks digital telah dimuat naik dalam pelantar *Digital Educational Learning Initiative Malaysia* (DELIMa). Murid yang mempunyai peranti digital boleh mengakses buku teks digital melalui pelantar DELIMa.

5. Pendekatan pengajaran dan pembelajaran (PdP)

Selaras dengan pelaksanaan KSSR (Semakan 2017), KPM menggalakkan guru menggunakan pendekatan PdP berpusatkan murid, iaitu pembelajaran bertema, modular, pembelajaran berdasarkan projek, simulasi amali (virtual lab) atau pembelajaran terbeza.

6. Kerjasama dengan Jabatan Kemajuan Agama Islam Malaysia (JAKIM)

KPM bekerjasama dengan pihak JAKIM dari aspek penyelarasan uniform agar murid diberi kelonggaran untuk memakai uniform sekolah masing-masing semasa sesi persekolahan KAFA. Pihak JAKIM juga telah mengeluarkan surat makluman bertarikh 24 Mac 2022 kepada semua pihak berkuasa agama negeri yang melaksanakan Kelas Al-Quran dan Fardu Ain (KAFA) di sekolah kebangsaan. Murid yang mengikuti sesi KAFA di sekolah kebangsaan dibenarkan untuk memakai pakaian seragam sekolah kebangsaan. Kebenaran ini melibatkan seramai 363,494 orang murid daripada 1,451 buah sekolah di seluruh negara.

Selain itu, KPM juga terus meningkatkan kerjasama erat dengan ibu bapa/penjaga bagi membantu menangani masalah beg berat murid, khususnya dalam memastikan murid membawa buku mengikut jadual ditetapkan. Di samping itu, sesi libat urus dengan Persatuan Ibu bapa dan Guru (PIBG) turut ditingkatkan sebagai satu pendekatan pemantauan.

Bagi memastikan usaha ini dilaksanakan di peringkat sekolah, KPM telah melaksanakan beberapa siri tinjauan secara bersemuka dan secara dalam talian bagi tempoh Februari hingga Mei 2022. Tinjauan bertujuan untuk mengenal pasti status pelaksanaan di peringkat sekolah berkaitan

inisiatif yang telah digariskan oleh KPM.

Hasil tinjauan secara dalam talian terhadap 7,776 sekolah rendah pada 17 hingga 20 Mei 2022 mendapati 99.3 peratus sekolah telah melaksanakan penyusunan jadual waktu bagi mengatasi masalah beg berat murid. Pihak sekolah telah meminimumkan penggunaan buku aktiviti, buku kerja dan buku latihan berdasarkan ketetapan KPM melalui SPI Bil. 3 Tahun 2022. Pihak sekolah juga telah memastikan sekurang-kurangnya satu pendekatan PdP berpusatkan murid dilaksanakan semasa PdP.

Tinjauan juga mendapati 53.1 peratus sekolah kebangsaan memaklumkan bahawa murid mereka dibenarkan memakai uniform sekolah kebangsaan untuk menghadiri kelas KAFA.

KPM yakin pendekatan yang dilaksanakan ini dapat menangani isu beg berat murid di sekolah secara berterusan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DR. MASZLEE BIN MALIK
[SIMPANG RENGGAM]**

SOALAN

DR. MASZLEE BIN MALIK [SIMPANG RENGGAM] minta **MENTERI KANAN PENDIDIKAN** menyatakan apakah perancangan Kerajaan untuk membantu para penulis, pengkaji dan penerbit buku demi membantu industri penerbitan dan perbukuan di negara ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha membangunkan industri penerbitan dan perbukuan negara. Ini termasuklah melaksanakan pelbagai inisiatif bagi membantu para penulis, pengkaji dan penerbit buku untuk terus terlibat dalam pembangunan industri penerbitan dan perbukuan.

Untuk makluman Ahli Yang Berhormat, KPM melalui Dewan Bahasa dan Pustaka (DBP) telah membangunkan pelantar digital yang dikenali sebagai JendelaDBP. Pelantar ini merupakan pusat sehentian digital bagi menyebarluaskan maklumat berkaitan bahasa, sastera, penerbitan dan bidang lain termasuklah sains dan teknologi. Pelantar ini terdiri daripada Laman Utama, Sohor Kini, eMajalah, Ujana, TV DBP dan Radio DBP. Kandungan bahan dalam pelantar ini dapat dioptimumkan sebagai medan pertukaran kandungan antara penulis tempatan dengan pengguna bahasa Melayu dari seluruh dunia. Pelantar ini menyediakan peluang yang lebih luas kepada penulis pelbagai genre untuk berkarya secara digital.

Di samping itu, KPM turut mengaktifkan usaha pembangunan modal insan melalui kursus penulisan, penterjemahan dan penerbitan yang dilaksanakan oleh Institut Terjemahan dan Buku Malaysia (ITBM). Inisiatif ini bertujuan menggalakkan masyarakat menjadi penulis dalam memperkayakan kepustakaan bahasa Melayu. Usaha ini juga dipergiatkan kepada ahli akademik untuk membukukan pengalaman, bahan kajian dan penyelidikan seperti Program Penerbitan Tesis kepada Buku.

Untuk makluman Ahli Yang Berhormat, KPM turut mendapat kelulusan potongan cukai sebanyak RM15 juta pada tahun 2021 daripada Kementerian Kewangan bagi penganjuran pesta buku secara fizikal dan dalam talian serta aktiviti galakan membaca. Inisiatif potongan cukai ini merupakan sebahagian daripada ekosistem industri penerbitan dan perbukuan yang memberikan peluang kepada industri ini termasuklah penulis dan penerbit untuk terus melonjak dengan lebih maju dan berdaya saing.

KPM juga telah mengadakan kerjasama dalam penerbitan melibatkan agensi awam seperti Agensi Nuklear Malaysia, Jabatan Perikanan Malaysia, Jabatan Pembangunan Kemahiran serta Institut Penyelidikan Perubatan. Kerjasama ini dapat menambahkan jumlah penerbitan dan memperluas medium untuk berkarya.

Bagi memupuk kesedaran dan membina kelompok pengikut aktiviti perbukuan dari segenap lapisan masyarakat, program dan aktiviti pemasaran/jualan buku turut dilaksanakan menerusi pelbagai medium dan platform media seperti Pesta Buku Antarabangsa Dalam Talian yang telah diadakan bagi menggantikan pesta buku fizikal pada tahun 2020 dan 2021. Pada tahun ini, Pesta Buku Antarabangsa Kuala Lumpur 2022 (PBAKL 2022) telah dilaksanakan secara hibrid. PBAKL 2022 secara fizikal dilaksanakan mulai 3 hingga 12 Jun 2022 di Pusat Dagangan Dunia, Kuala Lumpur, manakala secara dalam talian, telah dilaksanakan bermula 1 hingga 14 Jun 2022. PBAKL 2022 mencatatkan seramai 1.39 juta pengunjung. Pesta buku ini juga telah melibatkan seramai 164 pempamer dan 709 reruai sepanjang 10 hari penganjurannya.

Untuk makluman Ahli Yang Berhormat, Malaysia telah dipilih sebagai tuan rumah bagi Kongres *International Board on Books for Young People* (IBBY) Kali Ke-38 oleh *Malaysia Board on Books for Young People* (MBBY) yang akan berlangsung pada 5 hingga 8 September 2022 dengan kerjasama Perbadanan Putrajaya. Kongres antarabangsa IBBY ini merupakan acara dwi tahunan yang menghimpunkan ahli IBBY dan orang awam serta penulis, penyelidik, pengkaji, pengamal, aktivis dan penyokong sastera dan perkembangan membaca kanak-kanak di seluruh dunia.

Selain itu, bagi memastikan jualan buku yang lebih efektif dan meluas, seminar secara maya, pemasaran dan penjualan buku dalam talian, penggunaan media sosial serta pempengaruh (influencer) untuk mempromosikan buku dan kerjasama dengan platform jualan terkemuka turut dilaksanakan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DR. MASZLEE BIN MALIK
[SIMPANG RENGGAM]**

SOALAN

DR. MASZLEE BIN MALIK [SIMPANG RENGGAM] minta MENTERI KANAN PENDIDIKAN menyatakan :-

- (a) usaha pembangunan pendidikan khas di institusi di bawah KPM dan nyatakan peruntukan yang diberikan kepada Bahagian Pendidikan Khas bagi tahun 2020, 2021 dan 2022 serta cara peruntukan itu digunakan secara terperinci; dan
- (b) apakah usaha yang dilakukan untuk membantu anak-anak dyslexia, autism dan lain-lain spektrum murid berkeperluan khas pembelajaran untuk mengatasi keciciran pembelajaran 'learning loss' yang telah mereka lalui selama dua tahun akibat COVID-19.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk meningkatkan akses dan kualiti pendidikan Murid Berkeperluan Pendidikan Khas (MBPK). Dalam hal ini, KPM memberikan tumpuan kepada enam teras strategik iaitu:

- i. penambahbaikan aksesibiliti dan mobiliti terutamanya menyediakan sekurang-kurangnya empat kemudahan asas yang merangkumi susur landai, susur tangan, parkir, dan tandas mesra orang kurang upaya (OKU), menaik taraf kelas pendidikan khas dan Pusat Perkhidmatan Pendidikan Khas (3PK);
- ii. pemantapan sumber manusia dengan berfokus kepada peningkatan profesional secara berterusan kepada guru dan

- i. pembantu pengurusan murid (PPM);
- ii. pemantapan pengajaran dan pembelajaran, kokurikulum dan pengembangan potensi MBPK;
- iii. penambahbaikan sistem sokongan;
- iv. pemantapan pengurusan data; dan
- v. pemantapan tadbir urus.

Untuk makluman Ahli Yang Berhormat, pada tahun 2020, sebanyak RM45.12 juta telah diperuntukkan untuk meningkatkan fasiliti, menambah baik sekolah serta mengadakan kemudahan mesra OKU di sekolah yang menawarkan program pendidikan khas integrasi (PPKI). Peruntukan tersebut telah memberi manfaat kepada 597 buah sekolah.

Pada tahun 2021, KPM telah menerima peruntukan khas sebanyak RM45 juta bagi membiayai keperluan MBPK bawah agenda memperkasa pendidikan khas. Daripada jumlah tersebut, sebanyak RM33.73 juta digunakan bagi menyediakan kemudahan mesra OKU di 245 buah sekolah. Manakala sebanyak RM11.27 juta digunakan bagi pembangunan sumber manusia, pelaksanaan pengajaran dan pembelajaran (PdP) serta saringan, intervensi dan khidmat sokongan kepada MBPK.

Seterusnya pada tahun 2022, sebanyak RM50 juta diperuntukkan kepada KPM untuk pendidikan khas. Sebanyak RM20.07 juta digunakan untuk membiayai pembelian peralatan mengajar dan sebanyak RM29.93 juta untuk menambah baik fasiliti sekolah yang melaksanakan pendidikan khas.

Untuk makluman Ahli Yang Berhormat, KPM menyedari bahawa pandemik COVID-19 memberi kesan kepada pembelajaran murid, khususnya MBPK. KPM telah melaksanakan penjajaran kandungan kurikulum mata pelajaran dengan memberi fokus kepada Kandungan Asas. Penjajaran kurikulum ini turut mengambil kira keperluan pembelajaran seperti yang berikut:

- i. pengurusan diri dan tingkah laku bagi MBPK masalah pembelajaran;
- ii. mobiliti dan orientasi bagi MBPK kurang upaya penglihatan;
- iii. penggunaan asas bahasa isyarat bagi MBPK kurang upaya pendengaran; dan

- iv. pengenalan kepada asas membaca, menulis, mengira (3M) bagi semua kategori MBPK.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program ini bertujuan memastikan pembelajaran pemulihan bagi murid yang belum menguasai literasi dan numerasi melalui pelaksanaan *Catch-Up Plan 1: Merapatkan Jurang Pembelajaran* yang telah dilaksanakan pada 1 September hingga 10 Disember 2021 manakala *Catch-Up Plan 2: Bridging Programme* dilaksanakan bermula 9 Januari hingga 25 Februari 2022 yang lalu.

Dalam pelaksanaan *Catch-Up Plan 2*, terdapat dua program yang dilaksanakan, iaitu Program Pengukuhan dan Pengayaan serta Program Intervensi melalui sesi pengajaran dan pembelajaran bersemuka di sekolah. Program Pengukuhan dan Pengayaan dilaksanakan bagi MBPK yang telah mencapai tahap penguasaan (TP) antara TP 3 hingga TP 6 bagi semua mata pelajaran. Program Intervensi pula dilaksanakan bagi MBPK yang belum mencapai TP 1 dan TP 2, termasuk MBPK yang belum menguasai kemahiran asas membaca, menulis dan mengira (3M) atau mata pelajaran yang belum dapat dihabiskan dalam Kandungan Asas (KA).

KPM yakin tindakan yang telah diambil ini merupakan satu pendekatan komprehensif bagi meningkatkan tahap pembelajaran MBPK dengan lebih menyeluruh dan berkesan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DR. MICHAEL TEO YU KENG [MIRI]

SOALAN

DR. MICHAEL TEO YU KENG [MIRI] minta **MENTERI KANAN PENDIDIKAN** menyatakan pecahan pemberian bantuan kewangan kepada semua sekolah daif, tahfiz dan sekolah persendirian di Parlimen P.219 Miri yang telah diluluskan sehingga Mei 2022 dan apakah langkah-langkah yang telah dan akan diambil oleh Kementerian Pendidikan untuk memastikan setiap bantuan adalah cukup untuk memenuhi keperluan sekolah berkenaan.

JAWAPAN

Tuan Yang di-Pertua,

Untuk makluman Ahli Yang Berhormat, Akta Pendidikan 1996 (Akta 550) menetapkan bahawa kerajaan bertanggungjawab sepenuhnya ke atas peruntukan kepada sekolah kerajaan (SK) dan pada masa yang sama, kerajaan boleh memberi sumbangan bantuan kepada sekolah bantuan kerajaan (SBK) di bawah Kementerian Pendidikan Malaysia (KPM).

Bagi sekolah berstatus SBK, kerajaan menyediakan peruntukan untuk bayaran emolumen dan elaun guru, utiliti, kawalan keselamatan dan pembersihan kawasan, peralatan pengajaran dan pembelajaran serta pemberian bantuan geran perkapita (PCG). KPM turut menyediakan pelbagai bantuan persekolahan kepada murid di SBK yang layak seperti mana yang diterima oleh murid di SK.

KPM menyalurkan peruntukan kepada sekolah-sekolah melalui Jabatan Pendidikan Negeri (JPN) dan Pejabat Pendidikan Daerah (PPD) masing-masing mengikut keperluan. Sehingga Jun 2022, jumlah peruntukan mengurus yang telah disalurkan kepada PPD Miri adalah sebanyak RM133,057,977.15.

Untuk makluman Ahli Yang Berhormat, KPM tidak menyedia atau menyalurkan bantuan kewangan kepada sekolah tafhib dan sekolah persendirian selaras dengan perundangan dan peraturan semasa yang berkuat kuasa.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS
DARIPADA : DR. MICHAEL TEO YU KENG [MIRI]

SOALAN

DR. MICHAEL TEO YU KENG minta **MENTERI KESIHATAN** menyatakan secara terperinci status terkini projek pembinaan Hospital Miri dan nyatakan kos yang terlibat.

JAWAPAN

Tuan Yang di-Pertua,

1. Projek Pembinaan Bangunan Tambahan Hospital Miri telah diluluskan dengan kos keseluruhan projek adalah sebanyak RM340 juta. Jabatan Kerja Raya (JKR) Malaysia telah melantik kontraktor bagi projek ini di mana kerja-kerja pembinaan telah dimulakan pada 25 Jun 2020 dan tarikh siap projek adalah pada 17 Disember 2023.
2. Sehingga 30 Jun 2022, kemajuan fizikal projek telah mencapai 23.95%. KKM akan sentiasa memantau rapi kemajuan projek ini bagi memastikan kerja-kerja pembinaan dapat disiapkan mengikut jadual dengan kualiti yang baik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DR. MICHAEL TEO YU KENG [MIRI]

DR. MICHAEL TEO YU KENG [MIRI] minta **MENTERI KESIHATAN** menyatakan 3 penyakit mengikut ranking penyebab kematian di Parlimen Miri P.219 dan usaha Kementerian menanganinya.

JAWAPAN

1. Pada tahun 2021, tiga (3) penyakit utama yang menyebabkan kematian di Bahagian Miri ialah Penyakit Sistem Sirkulatori seperti Penyakit Serangan Jantung, Penyakit Lemah Jantung dan Penyakit Strok; COVID-19 dan komplikasinya; dan Penyakit Sistem Respiratori seperti Penyakit Pneumonia, Penyakit Peparu Akut dan Kronik.
2. Kebanyakan kematian dari Penyakit Sistem Sirkulatori adalah berpunca dari penyakit tidak berjangkit seperti penyakit kardiovaskular, diabetes, dan hipertensi, yang berkaitrapat dengan peningkatan tekanan darah yang tinggi, peningkatan paras gula darah, kegemukan, peningkatan paras kolesterol, tabiat merokok, pemakanan tidak sihat dan cara hidup yang tidak aktif.
3. Kementerian Kesihatan telah menjalankan pelbagai usaha untuk menangani penyakit-penyakit ini seperti:
 - a) meningkatkan usaha Program Vaksin COVID-19 di seluruh Bahagian Miri. Sehingga ke hari ini, 93.1% penduduk dewasa di Bahagian Miri telah mendapat vaksin COVID-19 bagi dos ketiga atau booster dan 77.9% bagi PICKids;

- b) mempertingkatkan usaha dalam Kempen Amalkan Cara Hidup Sihat dan Kempen Kesedaran mengenai Penyakit Darah Tinggi, Kencing Manis dan Kolesterol Tinggi;
- c) mempergiatkan promosi di kalangan penduduk bagi saringan kesihatan; dan
- d) menguatkuasakan Larangan Merokok di fasiliti awam dan kawasan terbuka.

Sekian terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : DR. MICHAEL TEO YU KENG[MIRI]

SOALAN

Dr. Michael Teo Yu Keng [Miri] minta **MENTERI SUMBER MANUSIA** menyatakan bagaimanakah cara-cara untuk menangani masalah pengangguran yang tinggi disebabkan pandemik COVID-19 di Parlimen Miri P.219.

JAWAPAN

Tan Sri Yang di-Pertua,

Kerajaan memandang serius berkaitan isu kehilangan pekerjaan dalam kalangan masyarakat pada hari ini terutamanya disebabkan pandemik COVID-19. Antara usaha Kerajaan melalui PERKESO dalam membantu pekerja yang kehilangan pekerjaan serta menangani masalah pengangguran yang tinggi adalah melalui bantuan faedah di bawah Akta Sistem Insurans Pekerjaan 2017 [Akta 800] iaitu faedah berbentuk kewangan dan bantuan pencarian pekerjaan.

Selain itu, Kerajaan melalui Kementerian Sumber Manusia dan PERKESO sentiasa berusaha mewujudkan lebih banyak peluang pekerjaan bagi membantu graduan yang menganggur. Antaranya, dalam Belanjawan 2022, PERKESO telah diberikan peruntukan sebanyak RM2 bilion bagi melaksanakan JaminKerja – Insentif Penggajian di bawah Sistem Insurans Pekerjaan yang dijangka akan memanfaatkan 300,000 pencari kerja dari seluruh negara.

JaminKerja – Insentif Penggajian memberi tumpuan kepada usaha merangsang para majikan untuk membuat pengambilan pekerja terutamanya dalam kalangan individu yang tidak aktif bekerja seperti golongan penganggur, golongan rentan seperti OKU, bekas banduan, warga emas dan golongan wanita menganggur bagi tempoh berpanjangan, untuk memastikan tiada golongan dipinggirkan. Program JKIP memberi insentif kepada:

- i. Majikan yang membuat pengambilan pekerja berusia 18 hingga 20 tahun di bawah kategori perantisan dengan kadar insentif sebanyak RM900 selama enam bulan;
- ii. Majikan yang membuat pengambilan pekerja berusia 16 hingga 49 tahun di bawah kategori Pencari Kerja Am yang akan menerima insentif sebanyak 20 peratus daripada gaji pekerja bagi tempoh enam (6) bulan pertama dan 30 peratus untuk tempoh enam (6) bulan berikutnya;

- iii. Majikan yang mengambil pekerja daripada kategori golongan mudah terjejas, wanita dan pekerjaan di bawah sektor pelancongan akan menerima bayaran insentif sebanyak 30 peratus daripada gaji pekerja bagi tempoh enam (6) bulan pertama dan 40 peratus bagi enam (6) bulan berikutnya; dan
- iv. Majikan yang menggantikan pekerja asing atau pegawai dagang dengan pekerja tempatan di bawah Program Malaysianization. Di bawah program ini, majikan yang layak bakal menerima insentif sebanyak 20 peratus daripada gaji bulanan bagi tempoh enam (6) bulan pertama dan 30 peratus bagi enam (6) bulan berikutnya.

Untuk makluman Ahli-Ahli Dewan yang mulia ini, di bawah Belanjawan 2022, PERKESO turut memperkenalkan Program SIPGig. Program ini menyediakan insentif kewangan berjumlah RM600 sehingga RM800 sebulan bagi tempoh maksimum enam bulan bagi pekerja gig yang baharu. Selain itu, insentif ini turut memberi fokus kepada individu yang diberikan notis cuti tanpa gaji, diberhentikan kerja, penganggur lebih daripada 60 hari, pencari kerja daripada golongan terjejas dan suri rumah yang tidak bekerja lebih daripada enam bulan yang terlibat dalam pekerjaan yang tidak terikat dengan waktu bekerja menggunakan Platform Digital berdaftar di bawah PERKESO.

PERKESO melalui Pejabat PERKESO Miri juga turut melaksanakan program bagi membantu Kerajaan Negeri dalam merangsang pasaran buruh. Antaranya, melaksanakan Karnival Kerjaya Wanita Negeri Sarawak yang diadakan pada 5 hingga 6 Mac 2022 dan Karnival Kerjaya Jerayawara Anjuran Bersama Tabung Ekonomi Gagasan Anak Sarawak pada 29 Jun 2022. PERKESO Miri juga telah bekerjasama dengan majikan mengadakan sesi temu duga. **Sejak Januari sehingga 30 Jun 2022, sebanyak 60 sesi temuduga telah dilaksanakan.** Kerjasama strategik antara PERKESO dan majikan membantu meningkatkan peluang pencari kerja dalam kalangan penganggur dan secara tidak langsung turut membantu majikan dalam memenuhi kekosongan jawatan yang ditawarkan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : YB DATO' HAJI MOHD FASIAH
BIN HAJI MOHD FAKEH [SABAK BERNAM]**

SOALAN

Dato' Haji Mohd Fasiah bin Haji Mohd Fakeh [Sabak Bernam] minta PERDANA MENTERI menyatakan bilangan peguam syarie yang terdapat di seluruh negara mengikut negeri dan apakah langkah Kerajaan bagi melantik lebih ramai peguam syarie (terutama peguam syarie muda) di seluruh negara untuk menyediakan perkhidmatan undang-undang syariah yang lebih menyeluruh bagi memenuhi keperluan orang Islam di negara ini serta apakah langkah Kerajaan bagi meningkatkan kecekapan peguam-peguam syarie golongan muda berkenaan.

JAWAPAN

**YB SENATOR DATUK HAJI IDRIS HAJI AHMAD
MENTERI DI JABATAN PERDANA MENTERI (HAL EHWAL AGAMA)**

Tuan Yang Di Pertua,

1. Jumlah bilangan Peguam Syarie bagi keseluruhan Wilayah Persekutuan Kuala Lumpur, Putrajaya dan Labuan adalah sebanyak 1097 orang. Bagi tahun 2022, bilangan Peguam Syarie yang memperbaharui Lesen Amalan Peguam Syarie Wilayah Persekutuan adalah sebanyak 953 orang.
2. Langkah-langkah kerajaan khusus bagi Wilayah Persekutuan untuk melantik lebih ramai Peguam Syarie ialah:

- (a) Menerima permohonan calon-calon yang berkelayakkan dari kalangan lulusan Undang-Undang atau Undang-Undang Syariah serta calon yang mempunyai kelulusan Diploma Pentadbiran Kehakiman Islam (UKM, UIAM, UiTm, USAS) atau Diploma Amalan Kehakiman dan Guaman Syarie (USIM) atau kelululusan yang setaraf dan setara yang diiktiraf oleh Kerajaan Malaysia.
- (b) Setelah menerima permohonan ini, calon-calon dikehendaki membuat Pengisytiharan Permohonan dengan menjalani proses yang dinamakan tampalan di papan kenyataan Mahkamah Syariah Wilayah Persekutuan Kuala Lumpur, Putrajaya dan Labuan. Bagi calon yang berada di semenanjung, boleh membuat proses tampalan dengan Pos Berdaftar untuk Mahkamah Syariah Labuan dan begitulah sebaliknya.
- (c) Setelah selesai membuat proses tampalan pengisytiharan tersebut, calon-calon dikehendaki membuat perakuan melalui Afidavit Penyampaian (Tampalan) tersebut.
- (d) Jawatankuasa Peguam Syarie Mahkamah Syariah Wilayah Persekutuan membuat semakan dan saringan dan calon yang berjaya menyempurnakan proses pengisytiharan dan tampalan akan dipanggil untuk sessi ujian bertulis.
- (e) Calon yang lulus ujian bertulis, akan dimaklumkan dan mereka akan memfailkan permohonan untuk diterima masuk sebagai Peguam Syarie di Mahkamah Syariah Kuala Lumpur.
- (f) Mahkamah Wilayah Persekutuan akan mengadakan sesi tauliah penerimaan masuk sebagai Peguam Syarie secara rasmi.
3. Apabila Akta Profession Guaman Syarie (Akta 814) telah diluluskan dan mula berkuatkuasa pada 21 Jun 2022, tanggungjawab untuk melantik Peguam Syarie adalah di bawah Lembaga Peguam Syarie (Seksyen 4 Akta 814). Lembaga Peguam Syarie akan menguruskan perlantikan Peguam Syarie Wilayah selepas Mesyuarat Agong Pertama bagi melantik Ahli Majlis Peguam Syarie akan diadakan pada 8 Ogos 2022 nanti.

SOALAN NO : 276

4. Keanggotaan Lembaga Peguam Syarie sebagaimana diperuntukkan seksyen 6 Akta 814 adalah seperti berikut:-

- (a) Ketua Hakim Syarie (Mahkamah Syariah Wilayah Persekutuan) sebagai Pengerusi.
- (b) Pengerusi Majlis Peguam Syarie yang akan menjadi Timbalan Pengerusi Lembaga.
- (c) Wakil Jabatan Peguam Negara
- (d) Ketua Pendakwa Syarie Wilayah Persekutuan.
- (e) Ahli akademik yang dilantik.

5. Antara usaha untuk meningkatkan kecekapan kepada Peguam-Peguam Syarie Muda, Mahkamah Syariah Wilayah Persekutuan telah mengadakan kursus-kursus pemahaman dan amalan asas Guaman Syarie sebelum Peguam-Peguam Syarie diberi tauliah.

6. Bagi meningkatkan kecekapan Peguam-Peguam Syarie sedia ada dan calon calon yang akan dilantik selepas Jun 2022, Maka program-program pengukuhan dan pembelajaran berterusann akan dirangka pada sepanjang tahun. Mahkamah Syariah Wilayah Persekutuan bersedia bekerjasama dengan Majlis Peguam Syarie dan Persatuan-persatuan Peguam Syarie dalam usaha pembelajaran berterusan mengenai undang-udang dan yang berkaitan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DATO' HAJI MOHD FASIAH BIN HAJI MOHD FAKEH [SABAK BERNAM]

SOALAN

DATO' HAJI MOHD FASIAH BIN HAJI MOHD FAKEH minta **MENTERI KESIHATAN** menyatakan setakat manakah syarat suntikan vaksin yang dikenakan bagi rakyat negara ini untuk keluar negara dan nyatakan adakah Kerajaan bercadang untuk melonggarkan syarat berkenaan memandangkan kebanyakan negara luar seperti Thailand dan Singapura telah pun melonggarkan syarat suntikan vaksin bagi memasuki negara berkenaan serta bagi memudahkan rakyat negara ini untuk keluar negara.

JAWAPAN

Tuan Yang di-Pertua,

1. Pandemik COVID-19 masih lagi belum pulih sepenuhnya. Pihak Pertubuhan Kesihatan Sedunia (WHO) juga masih belum mengisyiharkan bahawa dunia telah berada pada fasa endemik. Sehubungan dengan itu, risiko jangkitan terutama yang melibatkan rentas sempadan masih lagi wujud. Syarat vaksinasi yang dikenakan untuk keluar negara adalah untuk melindungi rakyat negara ini daripada jangkitan COVID-19 terutama jangkitan yang teruk termasuk kematian. Pelonggaran syarat vaksinasi pada masa akan datang adalah bergantung kepada situasi semasa seperti risiko jangkitan di peringkat global, tahap imuniti penduduk, perubahan varians COVID-19 dan saranan-saranan badan antarabangsa termasuk daripada pihak WHO.
2. Buat masa ini, rakyat yang ingin keluar negara disarankan mendapatkan vaksin yang lengkap manakala bagi individu yang akan menunaikan Umrah atau Haji, mereka perlu dapatkan dos penggalak terlebih dahulu. Seseorang individu perlu memenuhi syarat berikut untuk dianggap sebagai vaksinasi lengkap:

Jenis Vaksin	Jumlah Suntikan Yang Perlu Diterima Mengikut Status Vaksinasi				Tempoh Efektif Status Vaksinasi Selepas Suntikan Terakhir
	Dos Primer Lengkap	Individu		Pengembara	
		Vaksinasi Lengkap (mengikut umur)	Vaksinasi Lengkap (mengikut umur)		
• CoronaVac (Sinovac) • Covilo (Sinopharm)	2 dos	3 dos	3 dos	3 dos	3 dos
• Comirnaty (Pfizer-BioNTech) • COVID-19 AstraZeneca (Oxford-AstraZeneca) • Spikevax (Moderna)	2 dos	2 dos	3 dos	2 dos	3 dos
• COVID-19 Janssen (Johnson & Johnson) • Convidecia (CanSino)	1 dos	1 dos	2 dos	1 dos	2 dos
• Semua jenis vaksin lain	Mengikut kelulusan pihak berkuasa negara pengeluar				

3. Selain itu, syarat vaksinasi lengkap juga bergantung kepada keperluan negara yang dilawati. Sebagai contohnya, negara German mensyaratkan supaya mengambil salah satu vaksin yang telah diluluskan oleh pihak berkuasa negara tersebut iaitu:

- (i) Comirnaty (BioNTech/Pfizer);
- (ii) COVID-19 Janssen (Johnson & Johnson);
- (iii) Spikevax (Moderna);
- (iv) COVID-19 AstraZeneca (Oxford-AstraZeneca); dan
- (v) Covishield (Serum Institute of India).

4. Negara-negara lain juga masih menetapkan syarat vaksinasi kepada pengembara luar yang ingin melawat negara mereka. Di negara Thailand, pengembara luar yang tidak mendapatkan vaksinasi lengkap perlu mengikuti peraturan berikut iaitu:

- (i) Menjalani kuarantin selama 5 hari; atau
- (ii) Menjalani ujian RT-PCR dalam tempoh 72 jam sebelum

ketibaan dan memuat naik keputusan ke dalam Thailand Pass.

5. Namun begitu, pengembara berumur 18 tahun ke bawah yang tidak mendapatkan vaksinasi tidak dikenakan kuarantin jika melakukan perjalanan bersama ibu bapa yang telah lengkap vaksin.

6. Untuk negara Singapura pula, secara umum pemegang pas jangka panjang dan pelawat jangka pendek yang "tidak divaksin sepenuhnya" tidak dibenarkan memasuki negara tersebut melainkan dalam keadaan tertentu iaitu:

- (i) di atas sebab perubatan, atau
- (ii) mengambil vaksin yang tidak diluluskan bawah WHO EUL, dan tidak mengambil dos minima vaksin yang diluluskan bawah WHO EUL dengan, atau
- (iii) pulih daripada COVID-19 tetapi tidak melengkapkan dos minima vaksin yang diluluskan bawah WHO EUL.

7. Pengembara yang lahir pada atau sebelum 31 Disember 2009 (iaitu berumur 13 tahun ke atas mengikut tahun lahir) dianggap "divaksin sepenuhnya" atau "tidak divaksin sepenuhnya" berdasarkan status vaksinasi mereka menggunakan senarai vaksin EUL COVID-19 WHO. Tidak semua vaksin yang diberikan di luar Singapura diluluskan di bawah WHO EUL. Pelancong yang belum menerima dos penggalak selepas siri utama mereka masih dianggap "divaksin sepenuhnya" untuk masuk ke Singapura, tetapi mungkin dikehendaki mengambil dos penggalak untuk mengekalkan status "divaksin sepenuhnya" mereka di Singapura jika tinggal lebih daripada 30 hari.

8. Pengembara yang lahir pada atau sebelum 31 Dis 2009 (iaitu umur 13 tahun dan ke atas mengikut tahun lahir) yang "tidak divaksin sepenuhnya" atau dalam keadaan tertentu seperti yang dinyatakan di perkara 6 di atas akan tertakluk kepada kelulusan kemasukan, ujian dan peraturan kuarantin.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

**PERTANYAAN : BUKAN LISAN (BERTULIS)
DARIPADA : Y.B. DATUK HAJI MOHD FASIAH BIN
MOHD FAKEH [SABAK BERNAM]**

SOALAN

DATUK HAJI MOHD FASIAH BIN MOHD FAKEH [SABAK BERNAM] minta **PERDANA MENTERI** menyatakan bilangan hakim yang terdapat di mahkamah-mahkamah di negara ini mengikut mahkamah rendah dan mahkamah tinggi dan nyatakan bilangan hakim-hakim mengikut jenis mahkamah yang telah didakwa, disabitkan dan dijatuhkan hukuman bagi tempoh antara 2000 hingga terkini 2022 dan nyatakan kesalahan termasuk kesalahan jenayah yang telah dilakukan serta nyatakan langkah Kerajaan bagi meningkatkan integriti hakim-hakim di negara ini.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, bilangan Hakim Mahkamah Sesyen dan Majistret adalah seperti berikut:

MAHKAMAH SESYEN DAN MAJISTRET:

NEGERI	HAKIM MAHKAMAH SESYEN	MAJISTRET
Johor	15	15
Melaka	4	7
Negeri Sembilan	5	8

NO SOALAN :278

Wilayah Persekutuan Putrajaya	1	1
Selangor	31	25
Wilayah Persekutuan Kuala Lumpur	24	18
Perak	11	18
Pulau Pinang	9	11
Kedah	10	9
Perlis	2	2
Pahang	7	9
Terengganu	5	7
Kelantan	6	8
Sarawak	10	11
Sabah	10	12
JUMLAH	150	161

Bilangan Hakim Mahkamah Sesyen dan Majistret yang didakwa, disabitkan dan dijatuhkan hukuman bagi tempoh antara 2018 hingga terkini 2022 adalah seperti berikut:

HAKIM	BILANGAN YANG DIDAKWA	BILANGAN YANG DISABITKAN	KESALAHAN
HAKIM MAHKAMAH SESYEN	1	Dilepas dan dibebaskan akhir kespendakwaan	Menerima suapan dibernilai RM17,500 di bawah Seksyen 16(a)(B) Akta SPRM 2009
MAJISTRET	1	1-Disabitkan bersalah bagikesemua pertuduhan akhir pembelaan	Menerima suapan dibawah Seksyen 616(a)(B) Akta SPRM 2009 sebanyak RM185,000 dan Seksyen 17(a) Akta SPRM 2009 sebanyak RM110,000

Langkah-langkah Kerajaan bagi meningkatkan integriti pegawai kehakiman:

1. Hebahan berkala integriti melalui emel kepada semua Pegawai Kehakiman
2. Ceramah integriti diadakan secara berkala untuk memberi kesedaran dan peringatan secara berterusan kepada semua Pegawai Kehakiman
3. Membangunkan Pelan Antirasuah Organisasi PKPMP(OACP) yang mengandungi 3 strategi untuk mencapai 3 objektif strategik: menangani rasuah, penyelewengan dan salahguna kuasa dalam Badan Kehakiman. Bagi memastikan keberkesanan pelaksanaan OACP ,32 inisiatif telah dirangka dan akan dilaksanakan dalam tempoh 5 tahun akan datang (2021-2025). Pelaporan inisiatif ini dibentang dalam mesyuarat Jawatankuasa Antirasuah Organisasi (JAR) setiap 6 bulan sekali
4. Mengambil tindakan pengesanan melalui aduan atau laporan yang dikemukakan kepada Unit Integriti dan
5. Menjalankan naziran/siasatan ke atas pengurusan Pentadbiran di Mahkamah-Mahkamah Negeri.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : DATO' HAJI MOHD FASIAH BIN HAJI
MOHD FAKEH (SABAK BERNAM)**

SOALAN

DATO' HAJI MOHD FASIAH BIN HAJI MOHD FAKEH (SABAK BERNAM) minta **MENTERI PERTANIAN DAN INDUSTRI MAKANAN** menyatakan keluasan tanah terbiar di seluruh negara mengikut negeri dan nyatakan Langkah Kementerian bagi memajukan tanah-tanah terbiar ini khususnya bagi meningkatkan hasil pengeluaran makanan negara.

JAWAPAN

Tuan Yang di-Pertua,

Untuk makluman Ahli Yang Berhormat, tanah terbiar didefinisikan sebagai tanah darat atau tanah sawah yang berkeluasan minima 0.4 hektar ke atas sama ada bersambungan atau bertaburan yang merupakan tanah milik yang tidak diusahakan selama tiga tahun berturut-turut. Berdasarkan rekod Jabatan Pertanian, seluas 103,563 hektar tanah terbiar telah dikenal pasti melibatkan sejumlah 46,382 lot di Semenanjung Malaysia termasuk Wilayah Persekutuan Labuan.

Tanah terbiar dikategorikan kepada tanah darat dan tanah sawah. Tanah darat seluas 89,464.35 hektar sesuai untuk tanaman sayuran, buah-buahan dan aktiviti pertanian selain padi, manakala tanah sawah dengan keluasan 14,098.26 hektar khusus untuk tanaman padi.

Pemilikan tanah ini antaranya pemilik-pemilik individu, syarikat dan tanah kerajaan negeri yang memerlukan kebenaran untuk diusahakan sebagai aktiviti pertanian. Bagi tanah-tanah milik individu/syarikat, MAFI melalui Jabatan Pertanian menyediakan insentif dalam bentuk *inkind* di bawah projek seperti Projek Pembangunan Tanaman Buah-Buahan Jangka Panjang, Projek Pembangunan Tanaman Buah-Buahan Jangka Pendek dan Projek Pembangunan Tanaman Sayuran.

Beberapa inisiatif melibatkan kerjasama Kerajaan Negeri juga telah diperhalusi dan dicadangkan dalam Mesyuarat Menteri Besar dan Ketua Menteri Ke-139 bagi tujuan kelestarian tanah pertanian. Dalam mesyuarat ini Kerajaan Negeri juga bersetuju antara lain untuk melaksanakan inisiatif- inisiatif berikut:

- (i) Meningkatkan keluasan tanah yang sesuai khususnya tanah milik negeri untuk aktiviti pertanian dengan:

- a. Mewartakan kawasan tanah pertanian sebagai tanah rizab di bawah Seksyen 62 Kanun Tanah Negara (KTN) dan kemudiannya memajakkan tanah rizab berikut di bawah Seksyen 63 KTN untuk tempoh sekurang-kurangnya 10 sehingga 21 tahun.
- b. Memperkasakan pemberian tanah milik negeri kepada anak syarikat Kerajaan Negeri berkaitan pertanian yang kemudiannya akan memajakkan tanah tersebut kepada usahawan tani untuk tempoh 30 tahun.
- c. Pihak berkuasa negeri boleh, tertakluk kepada kaedah-kaedah tanah negeri meluluskan tempoh sekurang-kurangnya tiga tahun dan boleh dilanjutkan seterusnya bagi setiap Lesen Pendudukan Sementara (TOL).

- (ii) Mengelakkan pengezonan kawasan jelapang padi.
- (iii) Pewartaan Taman Kekal Pengeluaran Makanan (TKPM) dan membangunkan TKPM yang terbengkalai serta yang belum dimajukan.
- (iv) Menubuhkan Jawatankuasa Pembangunan Tanah Pertanian Peringkat Daerah bagi memudah cara urusan membangunkan tanah pertanian milik persendirian yang tidak diusahakan.

Tanah-tanah Kerajaan Negeri yang telah mendapat kebenaran untuk diusahakan juga boleh mendapat insentif dalam bentuk *inkind* di bawah projek pembangunan agromakanan oleh MAFI seperti yang dinyatakan sebelum ini.

Sekian, terima kasih

SOALAN NO: 280

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' DR. MOHD KHAIRUDDIN BIN
AMAN RAZALI [KUALA NERUS]**

SOALAN

**YB DATO' DR. MOHD KHAIRUDDIN [KUALA NERUS] minta
MENTERI PERUMAHAN DAN KERAJAAN TEMPATAN menyatakan
sejauh manakah kebolehpasaran rumah-rumah projek Perumahan
1Malaysia (PR1MA) pasca pandemik COVID-19.**

JAWAPAN

Tuan Yang di-Pertua,

Untuk makluman Ahli Yang Berhormat, Perbadanan PR1MA Malaysia (PR1MA) merupakan sebuah agensi perumahan di bawah Kementerian Perumahan dan Kerajaan Tempatan (KPKT) yang ditubuhkan melalui Akta PR1MA 2012. Tujuan PR1MA ditubuhkan adalah untuk merancang, membangun, membina dan menawarkan kediaman pada harga yang berpatutan serta berkualiti tinggi berkonsepkan gaya hidup moden bagi rakyat Malaysia yang berpendapatan isi rumah pertengahan (M40) antara RM2,500 hingga RM15,000 sebulan.

Negara kita kini sedang berada dalam fasa peralihan ke endemik dalam menangani krisis COVID-19. Penjualan perumahan PR1MA turut menghadapi cabaran disebabkan keadaan ekonomi yang kurang stabil dan sentimen pembeli yang lebih berhati-hati dalam perancangan kewangan semasa. Ini adalah akibat daripada kenaikan dalam kos pinjaman perumahan susulan peningkatan Kadar Dasar Semalam (Overnight Policy Rate, OPR) seperti yang diumumkan oleh Bank Negara Malaysia baru-baru ini.

Walau bagaimanapun, kebolehpasaran rumah-rumah PR1MA dalam tempoh ini tetap stabil berdasarkan permintaan dalam kalangan bakal pembeli. Beberapa inisiatif telah dilaksanakan oleh PR1MA sebagai usaha untuk merancakkan lagi jualan dan membantu pembeli untuk memiliki kediaman mereka, antaranya seperti berikut:

1. Skim Pembiayaan Sewa untuk Milik (Rent-to-Own, RTO)

Skim ini dilaksanakan untuk membantu mengurangkan beban rakyat yang ingin memiliki rumah. Ianya ditawarkan kepada bakal pembeli yang tidak layak mendapatkan pembiayaan daripada mana-mana institusi kewangan. Pembeli mempunyai pilihan untuk menyewa selama lima (5) tahun dahulu dengan kadar sewa yang berpatutan sebelum membeli rumah tersebut. Dalam tempoh

sewaan, bakal pembeli berpeluang untuk memperbaiki kedudukan kewangan mereka sehingga mereka boleh mendapatkan pinjaman bank di kemudian hari.

2. Skim Pinjaman Perumahan Inovatif PR1MA

PR1MA telah menjalankan kerjasama dengan Syarikat Jaminan Kredit Perumahan (SJKP) dalam usaha memudahkan rakyat yang berpendapatan pertengahan dan tidak mempunyai dokumen pendapatan yang tetap untuk membeli rumah. Inisiatif ini dapat membuka ruang kepada golongan yang memerlukan seperti pekerja gig, usahawan kecil dan golongan petani untuk memiliki rumah. Ianya memberikan manfaat kepada bakal pembeli rumah dan pada masa yang sama meningkatkan prestasi pasaran hartanah tempatan.

3. Kempen Pemilikan Rumah (*Home Ownership Campaign, HOC*)

PR1MA telah mengambil bahagian dalam Kempen Pemilikan Rumah (HOC) anjuran bersama KPKT dan Persatuan Pemaju Hartanah dan Perumahan (REHDA). PR1MA telah menyertai kempen HOC yang telah diadakan bermula 2019 sehingga 2021, bertujuan untuk membantu rakyat, terutamanya golongan yang menghadapi kesukaran untuk membeli rumah. Diskaun yang ditawarkan melalui kempen ini bertujuan untuk meningkatkan jualan dalam jangka masa yang terhad dan tertakluk kepada terma dan syarat tertentu. Pada masa yang sama, ia juga mendorong penjualan rumah-rumah yang tidak terjual (*property overhang*) di pasaran perumahan Malaysia.

4. Inisiatif Pemilikan Perumahan Keluarga Malaysia (i-Miliki)

Semasa pelancaran Home Ownership Programme (HOPE) dan Karnival Jom Beli Rumah pada 15 Julai 2022, YAB Perdana Menteri telah mengumumkan mengenai Inisiatif Pemilikan Perumahan Keluarga Malaysia (i-Miliki) iaitu pemberian insentif pengecualian duti setem ke atas surat cara pindah milik harta-

SOALAN NO: 280

dan perjanjian perumahan secara peringkat atau tier seperti berikut:

- i) 100% pengecualian duti setem untuk pembelian rumah pertama bernilai RM500,000 dan ke bawah; dan
- ii) 50% pengecualian duti setem untuk pembelian rumah pertama bernilai RM500,001 sehingga RM1 juta.

Pengecualian ini adalah bagi Perjanjian Jual Beli yang disempurnakan dalam tempoh mulai 1 Jun 2022 hingga 31 Disember 2023. Insentif ini bertujuan untuk meningkatkan pemilikan rumah dalam kalangan Keluarga Malaysia yang merupakan Pembeli Rumah Pertama.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' DR. MOHD KHAIRUDDIN BIN
AMAN RAZALI [KUALA NERUS]**

YB DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI PERUMAHAN DAN KERAJAAN TEMPATAN** menyatakan bila Projek Perumahan Rakyat (PPR) di Kuala Nerus akan dilaksanakan.

JAWAPAN

Tuan Yang di-Pertua,

Untuk makluman Ahli Yang Berhormat, status Program Perumahan Rakyat (PPR) Kuala Nerus di negeri Terengganu adalah sedang dalam fasa pembinaan. PPR Kuala Nerus ini melibatkan pembinaan 500 unit rumah pangsa lima (5) tingkat dengan kos keseluruhan berjumlah RM94,238,000.00.

Untuk makluman Ahli Yang Berhormat juga, terdapat satu projek PPR yang telah siap dibina di Terengganu iaitu PPR Padang Hiliran, Kuala Terengganu melibatkan pembinaan rumah pangsa berbilang tingkat merangkumi 1,002 unit. PPR ini telah siap dibina sepenuhnya pada tahun 2014 dan telah mula diisi pada bulan Oktober 2014.

Selain itu, terdapat satu PPR di peringkat pembinaan iaitu PPR Besut yang melibatkan 450 unit rumah teres satu tingkat dan dijangka siap pada tahun 2024.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' DR. MOHD KHAIRUDDIN BIN
AMAN RAZALI [KUALA NERUS]

SOALAN

DATO' DR. MOHD KHAIRUDDIN BIN AMAN RAZALI
[KUALA NERUS] minta **MENTERI KEWANGAN** menyatakan pelan jangka panjang Kerajaan untuk menangani trend kejatuhan nilai Ringgit pada ketika ini yang amat membimbangkan.

JAWAPAN

Tuan Yang di-Pertua,

Kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjelaskan aktiviti ekonomi domestik meskipun sedang berdepan dengan keadaan pasaran kewangan dan kadar pertumbuhan ekonomi global yang tidak menentu.

Sebagai pelan jangka panjang Kerajaan untuk menangani trend kejatuhan nilai Ringgit, Kerajaan menerusi Bank Negara Malaysia (BNM) akan terus menguruskan risiko-risiko yang wujud dalam pasaran pertukaran asing menerusi tiga (3) langkah berikut:

- i. **Langkah Pertama: Menggunakan instrumen dasar operasi bagi memastikan keadaan yang teratur dalam pasaran pertukaran asing.**

Walaupun BNM tidak menyasarkan sebarang paras kadar pertukaran, BNM akan memastikan tiada perubahan secara drastik atau melampau dalam nilai ringgit. Tindakan ini akan membantu perniagaan merancang dan melaksanakan keputusan dan pelaburan dengan lebih baik;

- ii. **Langkah Kedua: Memastikan institusi perbankan dan syarikat korporat di Malaysia mengambil langkah-langkah kehematan dalam menghadapi risiko pertukaran asing dan melindungi ringgit daripada aktiviti spekulatif.**

Langkah ini dapat mengurangkan risiko perubahan kadar ringgit yang berlebihan. Sebagai contoh, BNM memperkenalkan instrumen pelindung nilai seperti *dynamic hedging* bagi menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik; dan

- iii. **Langkah Ketiga: Melaksanakan beberapa inisiatif untuk meningkatkan akses dan menarik pelabur asing dalam**

pasaran bon domestik, termasuk usaha menambah baik mudah tunai bon pasaran sekunder serta memperkuuh struktur dan mudah tunai pasaran pertukaran asing.

Inisiatif tersebut telah membantu mengekalkan Malaysia dalam senarai Indeks Bon Kerajaan Dunia (*World Government Bond Index, WGBI*) FTSE Russell.

Kerajaan juga akan menggiatkan usaha untuk mengukuhkan sentimen pelabur asing terhadap Malaysia menerusi pelaksanaan dasar-dasar yang berupaya meningkatkan daya tarikan Malaysia sebagai destinasi pelaburan yang menarik. Usaha ini dijangka dapat meningkatkan kemasukan Pelaburan langsung asing (FDI) dan portfolio ke Malaysia seterusnya berpotensi untuk mengukuhkan ringgit dengan cara yang mampan.

Kementerian Kewangan juga telah mengeluarkan Pekeliling Perbendaharaan 3.1 pada 14 Julai 2022 mengenai langkah penjimatan untuk dilaksanakan di peringkat semua Kementerian dan agensi Kerajaan. Usaha untuk mengenal pasti penjimatan perbelanjaan bagi menampung sebahagian daripada keperluan subsidi tambahan ini turut mengandungi langkah yang boleh membantu mengawal aliran keluar ringgit. Antara langkah kawalan perbelanjaan yang berkaitan termasuk kawalan ke atas lawatan ke luar negara serta perolehan barang dan bahan import. Di samping itu, sebarang pelaburan Badan Berkanun dan syarikat subsidiari yang melibatkan aliran wang ke luar negara perlu mendapat kelulusan Kementerian Kewangan terlebih dahulu.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI MOHD REDZUAN BIN
MD YUSOF [ALOR GAJAH]**

SOALAN

DATUK SERI MOHD REDZUAN BIN MD YUSOF [ALOR GAJAH] minta **MENTERI PEMBANGUNAN USAHAWAN DAN KOPERASI** menyatakan apakah inisiatif Kerajaan untuk menggalakkan implementasi ramalan perubahan iklim di dalam setiap perancangan dan keputusan terhadap perniagaan usahawan memandangkan cuaca yang sedang kita hadapi tidak menentu.

JAWAPAN

Tuan Yang di-Pertua,

KUSKOP telah melaksanakan Kaji Selidik Impak Pembukaan Semula Ekonomi dan Daya Tahan Usahawan Terhadap Bencana dan Krisis pada 7 hingga 21 Februari 2022. Kajian tersebut mendapati usahawan mempunyai tahap persediaan dan daya tahan yang rendah apabila 52.77% usahawan tidak memiliki perlindungan perniagaan seperti insurans banjir dan kebakaran. Dalam hubungan ini, KUSKOP telah mengambil tindakan bagi meningkatkan kesedaran usahawan dalam melindungi perniagaan daripada bencana atau pandemik yang berlaku secara luar jangka.

KUSKOP melalui TEKUN Nasional telah menerokai peluang kerjasama dengan syarikat insurans tempatan bagi mewujudkan pakej perlindungan takaful terhadap harta benda perniagaan melalui takaful bencana dengan nilai perlindungan sehingga RM10,000. Institut Keusahawanan Negara (INSKEN) juga telah menyediakan modul bimbingan meliputi Pengurusan Risiko dalam perniagaan bagi usahawan mengenalpasti pelbagai risiko termasuk bencana banjir dan persediaan usahawan mengurangkan kesan negatif kepada perniagaan.

Bagi tempoh jangka masa panjang, Rancangan Malaysia Kedua Belas (RMK-12) telah menggariskan strategi bagi mempertingkat daya tahan terhadap perubahan iklim bagi mengurangkan risiko bencana yang boleh menjelaskan aktiviti ekonomi dan perniagaan Perusahaan Mikro, Kecil dan Sederhana (PMKS). Melalui strategi ini, impak perubahan iklim dan risiko bencana akan diambil kira dalam perancangan dan pelaksanaan dasar bagi membolehkan tindakan diambil berdasarkan penilaian bukti dan risiko. Selain itu, perancangan RMK-12 turut menggalakkan supaya Matlamat Pembangunan Lestasi (SDG) dan prinsip kelestarian meliputi Persekutaran, Sosial dan Tadbir Urus (ESG) digunakan oleh sektor awam dan swasta dalam membuat keputusan.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATUK SERI MOHD REDZUAN
BIN MD YUSOF [ALOR GAJAH]**

SOALAN

DATUK SERI MOHD REDZUAN BIN MD YUSOF [ALOR GAJAH] minta **MENTERI SUMBER MANUSIA** menyatakan secara terperinci perancangan Kerajaan bagi kedudukan sumber pencarian rakyat sekiranya semua syarikat telah menerapkan digitalisasi di dalam operasi harian dan tidak memerlukan tenaga kerja.

JAWAPAN

Tuan Yang Di Pertua,

Transformasi digital merupakan satu proses mengautomasikan proses kerja bagi meningkatkan produktiviti, kecekapan serta mengurangkan kesan hazard pekerjaan khususnya yang melibatkan kerja rutin dan 3D (*Dirty, Difficult and Dangerous*) yang boleh meningkatkan kos perubatan serta penurunan prestasi apabila bekerja dalam tempoh masa yang panjang. Oleh itu, apabila kerja rutin ini dapat dipermudahkan melalui proses pendigitalan, sumber tenaga kerja sedia ada boleh ditempatkan ke bahagian lain yang lebih mendesak.

Pelaksanaan pendigitalan dan penggunaan teknologi terkini di bawah inisiatif Dasar Industry4WRD akan menambah bilangan pekerja mahir di negara ini terutamanya di sektor pembuatan. Di bawah Rangka Tindakan Ekonomi Digital Malaysia yang telah dilancarkan pada Februari 2020, ia menyasarkan sebanyak 500,000 peluang pekerjaan baru berteknologi tinggi akan diwujudkan oleh pihak industri seiring dengan peningkatan literasi digital. Peluang pekerjaan dengan pendapatan tinggi ini akan meningkatkan ekonomi dan kesejahteraan sosial rakyat di negara ini.

Sektor peruncitan mempunyai potensi teknikal yang tinggi untuk penggunaan digitalisasi dan automasi. Dianggarkan bahawa 53 peratus daripada aktivitinya boleh dibuat secara automatik. Melalui digitalisasi, peruncit boleh memanfaatkan pengurusan stok yang cekap dan dipacu teknologi contohnya dalam aktiviti pembungkusan produk untuk penghantaran dan pengurusan stok barang.

Namun begitu, sektor peruncitan tetap memerlukan kognitif dan kemahiran sosial yang tidak dapat digantikan dengan penggunaan mesin. Artikel bertajuk; “*Where Machines Could Replace Humans and Where They Can’t (Yet)*” oleh Michael Chui, James Manyika dan Mehdi Miremadi di McKinsey Digital menganggarkan bahawa 47 peratus daripada aktiviti jurujual runcit masih memerlukan kelebihan manusia.

Selari dengan perubahan industri yang menuju ke arah revolusi perindustrian 4.0 yang melibatkan transformasi digital, Kementerian Sumber Manusia menerusi Jabatan Tenaga Manusia aktif meningkatkan kemahiran dan kompetensi tenaga pengajarnya. Antara bidang yang menjadi tumpuan adalah bidang Keselamatan Siber, Teknologi Pembuatan Termaju, Teknologi Nano, Teknologi Realiti Terimbuh dan Realiti Maya. Ini penting bagi melahirkan tenaga kerja mahir negara untuk memenuhi keperluan industri berteknologi tinggi.

Kesimpulannya, penerapan pendigitalan dan automasi ini tidak akan dapat menggantikan tenaga manusia, sebaliknya kompetensi manusia dalam skop kerja yang menyokong pembangunan pendigitalan dan automasi perlu ditingkatkan termasuklah skop penyelenggaraan.

Malahan, perkara-perkara yang melibatkan kreativiti dan inovasi masih memerlukan tenaga manusia untuk berfikir dan mencipta sesuatu. Bagi sektor perkhidmatan khususnya yang banyak melibatkan perkara yang subjektif untuk membuat keputusan, tenaga kerja manusia masih diperlukan dalam peratusan yang tinggi.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK SERI MOHD REDZUAN MD YUSOF
[ALOR GAJAH]**

SOALAN

DATUK SERI MOHD REDZUAN MD YUSOF [ALOR GAJAH] minta **MENTERI PENGAJIAN TINGGI** menyatakan adakah Kementerian bercadang untuk menambah biasiswa bagi pelajar-pelajar yang mengambil sijil profesional sebagai cara menambah jumlah kepakaran tempatan.

JAWAPAN

Tan Sri Yang di-Pertua,

Kementerian Pengajian Tinggi (KPT) menyediakan pelbagai kemudahan pembiayaan pendidikan dalam bentuk biasiswa dan bantuan kewangan kepada calon-calon berkelayakan bagi tujuan melanjutkan pengajian di peringkat persediaan, sijil, diploma, ijazah sehingga ke peringkat pasca siswazah.

Dalam usaha KPT memastikan akses pengajian tinggi kepada semua, antara biasiswa yang ditawarkan termasuklah program biasiswa Skim Latihan Akademik Bumiputera (SLAB) dan Skim Latihan Akademik IPT (SLAI) yang mensasarkan peningkatan akademik di universiti awam (UA) melalui pewujudan tenaga pengajar yang berpendidikan tinggi.

Selain itu, biasiswa *MyBrainScience* turut ditawarkan kepada orang awam di peringkat ijazah pertama dan pasca siswazah dalam bidang pengajian sains tulen. Dalam konteks pelajar terpilih (tokoh siswa) dan atlet cemerlang IPT, mereka turut berpeluang mendapat biasiswa mengikut syarat-syarat tertentu. Selain biasiswa, terdapat juga program bantuan kewangan KPT yang terdiri daripada Bantuan Kewangan Pelajar Kolej Komuniti (BKKKK), Bantuan Kewangan Asasi (BKA) dan Bantuan Kewangan Orang Kurang Upaya (BKOKU).

Pada masa ini, KPT tidak mempunyai program biasiswa yang ditawarkan kepada orang awam bagi membiayai pengajian di peringkat sijil profesional seperti Sijil Amalan Guaman (CLP), *Chartered Financial Analyst* (CFA), *Certified Public Accountants* (CPA), *Chartered Islamic Financial Professional* (CIFP), *Association of Chartered Certified Accountants* (ACCA) dan sebagainya. Walau bagaimanapun, pada tahun ini, KPT menerima peruntukan sebanyak RM3 juta di bawah Rancangan Malaysia Ke-12 (RMKe12) bagi membiayai kursus pentaulihan profesional kepada tenaga pengajar politeknik, Pegawai Pendidikan Pengajian Tinggi (PPPT) dan kolej komuniti. Program ini mempunyai tempoh tajaan antara tiga hingga 12 bulan.

Selain KPT, terdapat juga agensi lain seperti Majlis Amanah Rakyat (MARA) di bawah Kementerian Pembangunan Luar Bandar (KPLB) yang

menyediakan kemudahan pinjaman pelajaran boleh ubah untuk semua peringkat pengajian termasuk profesional. Inisiatif ini mensasarkan sebanyak 10% pelajar tajaan di peringkat pengajian profesional dalam pelbagai bidang profesional dan berimpak tinggi di bawah Rancangan Malaysia Kedua Belas (RMKe-12).

Sejak tahun 2020, MARA telah berusaha dengan giat dalam meningkatkan penyertaan bumiputera berkelayakan untuk menceburi bidang-bidang kritikal, professional dan spesialis, yang dikhususkan untuk melahirkan akauntan, jurutera dan arkitek bertauliah serta pakar perubatan dan pergigian. Antara program yang dilaksanakan adalah:

- i. Profesional perakaunan seperti *Association of Chartered Certified Accountant (ACCA)*, *Certificate Professional Account (CPA)*, *Institute of Chartered Accountant (ICAEW)*, dan *Chartered Institute of Management Accounting (CIMA)*;
- ii. Pakar bidang Kardioterasik Surgeri untuk peningkatan kepakaran di dalam kesihatan jantung dengan kerjasama UiTM – Institut Jantung Negara (IJN);
- iii. Pakar atau subkepakaran dalam bidang perubatan atau pergigian di Sektor Penjagaan Kesihatan di dalam dan luar negara dengan kerjasama Kementerian Kesihatan Malaysia (KKM);
- iv. Program kompetensi teknikal dengan pensijilan antarabangsa dalam program latihan *Elektrical Technical Officer (ETO)*, *Dynamic Positioning Officer (DPO)* dan *Remote Operated Vehicle Training (ROV)* dalam industri logistik dan pengangkutan laut; dan
- v. *Licensed Aircraft Maintenance Engineer (LAME)* di Universiti Kuala Lumpur (UniKL).

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : DATUK SERI MOHD REDZUAN BIN MD YUSOF
[ALOR GAJAH]**

SOALAN

Datuk Seri Mohd Redzuan bin Md Yusof [Alor Gajah] minta **MENTERI SUMBER MANUSIA** menyatakan adakah Kerajaan bercadang untuk menjadikan jaminan sistem pendapatan sebagai sebahagian daripada dasar sosio-ekonomi memandangkan masih terdapat syarikat-syarikat yang memberi gaji di bawah daripada paras garis kemiskinan.

JAWAPAN

Tuan Yang Di Pertua,

Menurut Laporan Survei Pendapatan Isi Rumah dan Kemudahan Asas oleh Jabatan Perangkaan Malaysia, Kadar Pendapatan Garis Kemiskinan ialah nilai purata keseluruhan pendapatan isi rumah yang diukur berdasarkan corak perbelanjaan isi rumah. Manakala pendekatan penentuan gaji minimum mengambil kira pendapatan pekerja yang bekerja. Oleh itu, purata pendapatan satu isi rumah turut merangkumi pendapatan individu yang bekerja.

Dasar gaji minimum digubal untuk menetapkan gaji lantai atau gaji pokok bagi pekerja kategori terendah dalam pasaran buruh. Bagi pekerja dalam kategori lebih tinggi, kadar gaji lebih tinggi boleh dirundingkan dengan majikan sesuai dengan kelayakan dan kemahiran yang dimiliki oleh pekerja tersebut. Kadar gaji juga boleh ditetapkan melalui kuasa pasaran yang dimuktamadkan melalui kontrak perkhidmatan dan perundingan Perjanjian Kolektif bagi pekerja yang mempunyai kesatuan sekerja.

Melalui Perintah Gaji Minimum 2022 yang berkuatkuasa mulai 1 Mei 2022, penetapan gaji minimum telah pun mengambil kira kadar Pendapatan Garis Kemiskinan sebagai salah satu kriteria asas dalam pengiraan formula gaji minimum. Kriteria asas formula ini juga turut menggunakan pakai indikator sosioekonomi lain seperti penengah gaji bagi mengukur kemampuan pihak majikan membayar kadar gaji minimum. Bagi kriteria pelarasian pula, formula penetapan gaji minimum mengambil kira Indeks Harga Pengguna (*Consumer Price Index, CPI*) yang mencerminkan perubahan kos sara hidup, pertumbuhan produktiviti dan kadar pengangguran.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI MOHD REDZUAN BIN
MD YUSOF [ALOR GAJAH]**

SOALAN

DATUK SERI MOHD REDZUAN BIN MD YUSOF [ALOR GAJAH] minta **MENTERI PEMBANGUNAN USAHAWAN DAN KOPERASI** menyatakan tentang usaha Kementerian di dalam mengesan perbezaan metodologi bagi proses menguji kecekapan ekonomi untuk entiti perniagaan kecil dan besar agar ianya selaras dengan pembangunan ekonomi pasca COVID-19.

JAWAPAN

Tuan Yang di-Pertua,

Penilaian ekonomi Perusahaan Mikro, Kecil dan Sederhana (PMKS) dilaksanakan melalui prestasi petunjuk makro yang merangkumi Keluaran Dalam Negeri Kasar (KDNK) dan nilai eksport. Petunjuk prestasi ini membolehkan pengukuran kecekapan di antara operasi perniagaan PMKS dan bukan PMKS dapat dilaksanakan dalam ekosistem dan persekitaran ekonomi yang sama.

Dalam hubungan yang sama, KUSKOP melalui SME Corp. telah melaksanakan penilaian Penarafan Daya Saing PKS untuk Peningkatan (SCORE) yang merupakan alat diagnostik untuk menilai daya saing PMKS dan mengenal pasti keupayaan syarikat-syarikat di peringkat firma bagi membolehkan bantuan yang bersesuaian dapat ditawarkan.

7 kriteria telah ditetapkan di bawah penilaian SCORE merangkumi keupayaan kewangan, prestasi perniagaan, keupayaan pengurusan, keupayaan teknikal, penerapan teknologi dan inovasi serta pensijilan termasuk bagi pematuhan untuk eksport.

Hasil penilaian SCORE juga digunakan bagi tujuan pemanfaatan perniagaan untuk akses pasaran yang lebih baik dan juga sebagai petunjuk awal bagi tujuan akses kepada pembiayaan. Sehingga Jun 2022, sebanyak 4,108 syarikat telah dinilai di bawah penilaian SCORE dengan prestasi penilaian seperti berikut:

- i. 5 bintang : 4 syarikat
- ii. 4 bintang : 116 syarikat
- iii. 3 bintang : 1,228 syarikat
- iv. 2 bintang : 2,329 syarikat
- v. Kurang dari 2 bintang : 431 syarikat

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK SERI HAJI MOHD. SALIM SHARIF
[JEMPOL]**

SOALAN

DATUK SERI HAJI MOHD. SALIM SHARIF [JEMPOL] minta **MENTERI KANAN PENDIDIKAN** menyatakan formula terbaik bagi mengatasi isu keciciran pelajaran dalam kalangan murid masyarakat Orang Asli, khususnya di peringkat sekolah menengah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin terhadap pendidikan Orang Asli. KPM telah memperkenalkan inisiatif Transformasi Pendidikan Orang Asli dan Peribumi di bawah Pelan Pembangunan Pendidikan Malaysia (PPPM) 2013-2025 untuk memastikan murid Orang Asli dan Peribumi mendapat pendidikan yang terbaik. Inisiatif ini antaranya adalah untuk meningkatkan enrolmen dan kehadiran murid Orang Asli ke sekolah dan memastikan mereka mendapat pendidikan yang berkualiti serta relevan dengan keperluan mereka.

Untuk makluman Ahli Yang Berhormat, pelbagai program telah dilaksanakan bawah Inisiatif Transformasi Pendidikan Orang Asli dan Peribumi. Antaranya, Program Intervensi Murid Orang Asli dan Peribumi (PIKAP). PIKAP melibatkan tiga mata pelajaran utama di Tahap I, iaitu Bahasa Melayu, Bahasa Inggeris dan Matematik yang mengandungi modul pembelajaran disesuaikan dengan konteks persekitaran untuk meningkatkan minat murid Orang Asli dan Peribumi kepada pembelajaran dan hadir ke sekolah.

KPM turut melaksanakan Program Literasi dan Numerasi Sekolah Rendah (PLaN) di 117 buah sekolah Orang Asli seluruh Malaysia. Program ini adalah bagi menyokong murid Orang Asli yang masih belum mencapai tahap penguasaan minimum bagi mata pelajaran Bahasa Melayu, Bahasa Inggeris dan Matematik.

Selain itu, KPM telah memperkenalkan Program Jom Belajar yang merangkumi Program Khas Murid Orang Asli (Prokhas) dan Chup Badui Sikulah (CBS). Program ini bertujuan untuk menyediakan pendidikan asas serta memantapkan penguasaan kemahiran asas membaca, menulis dan mengira (3M) kepada murid Orang Asli yang tidak pernah bersekolah.

Menyedari penempatan yang jauh menjadi antara faktor yang menyebabkan murid Orang Asli tercicir dalam pendidikan, KPM telah menyediakan asrama di 45 buah sekolah rendah dan sebuah sekolah menengah yang mempunyai enrolmen 100% murid Orang Asli. Selain itu, terdapat juga murid Orang Asli yang tinggal di asrama sekolah harian. Penyediaan asrama ini adalah untuk memudahkan murid Orang Asli hadir ke sekolah.

Untuk makluman Ahli Yang Berhormat, pihak kerajaan telah memperuntukkan sebanyak RM274 juta kepada komuniti Orang Asli dalam Bajet 2022. Peruntukan ini adalah bagi melaksanakan Program Peningkatan Taraf Hidup Orang Asli seperti pemberian subsidi dan bantuan persekolahan serta bantuan kebaikan untuk manfaat hampir 200,000 Orang Asli. Salah satu inisiatif tersebut adalah kenaikan kadar wang saku murid Orang Asli sekolah menengah daripada RM2.00 kepada RM4.00 sehari yang disalurkan melalui Jabatan Kemajuan Orang Asli (JAKOA). Pemberian wang saku ini adalah untuk memastikan murid Orang Asli dapat hadir ke sekolah menengah dan membelanjakan wang tersebut untuk makanan serta pembelian alat tulis.

KPM juga telah melaksanakan Kelas Dewasa Murid Orang Asli dan Peribumi (KEDAP) untuk meningkatkan tahap penguasaan kemahiran asas membaca, menulis dan mengira kepada masyarakat Orang Asli. Program ini juga dapat meningkatkan kesedaran tentang kepentingan pendidikan dalam kalangan ibu bapa Orang Asli seterusnya mengambil berat terhadap perkembangan pendidikan anak mereka.

KPM turut mengambil pelbagai pendekatan melalui sesi libat urus dengan kerjasama pelbagai agensi kerajaan seperti JAKOA, Jabatan Kesihatan Negeri (JKN), pelibatan ibu bapa, ketua komuniti dan pertubuhan bukan kerajaan (NGO) serta Tok Batin bagi memberikan kesedaran akan kepentingan pendidikan kepada masyarakat Orang Asli.

Bagi menangani isu keciciran dalam kalangan murid Orang Asli, KPM telah menyediakan Sekolah Model Khas Komprehensif 9 Tahun (K9) melibatkan murid tahun satu sehingga ke tingkatan tiga di sekolah yang sama. Pelaksanaan Sekolah K9 di SK Bandar 2, Pekan, negeri Pahang pada tahun 2008 adalah untuk menangani isu keciciran murid sewaktu transisi dari tahun enam ke tingkatan satu ketika itu. Sehingga kini, sejumlah sembilan Sekolah Model Khas K9 yang sedang beroperasi di seluruh negara, termasuk di Sabah dan Sarawak. Manakala di negeri Selangor pula, terdapat dua Sekolah Model Khas K9, iaitu di SK Bukit Kemandol dan SK Binjai Jaya. Permohonan baharu pengoperasian Sekolah Model Khas K9 dikemukakan oleh Pejabat Pendidikan Daerah melalui Jabatan Pendidikan Negeri sekiranya terdapat keperluan kritikal bagi membendung keciciran dalam kalangan murid Orang Asli di peringkat menengah rendah. Pihak KPM akan menilai kebolehlaksanaannya dari aspek keselamatan murid dan kesediaan sekolah yang dicadangkan dari segi aspek kemudahan fizikal seperti kecukupan bilik darjah dan kemudahan-kemudahan lain.

KPM turut merancang untuk mewujudkan sekolah Model Khas Komprehensif 11 (K11), iaitu pendidikan bermula daripada Tahun 1 hingga Tingkatan 5 di sekolah dan pentadbiran yang sama dalam tempoh Rancangan Malaysia Kedua Belas. Ini membolehkan murid Orang Asli dapat mengikuti pendidikan selama 11 tahun, iaitu daripada Tahun 1 hingga Tingkatan 5. Mereka yang tamat persekolahan dengan Sijil Pelajaran Malaysia berpeluang untuk melanjutkan pengajian ke peringkat seterusnya.

KPM yakin usaha berterusan yang dilaksanakan ini dapat meningkatkan akses pendidikan kepada murid Orang Asli di semua peringkat dengan lebih menyeluruh dan berkesan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

DARIPADA : DATUK SERI HAJI MOHD. SALIM SHARIF (JEMPOL)

SOALAN

DATUK SERI HAJI MOHD. SALIM SHARIF (JEMPOL) minta **MENTERI PERTANIAN DAN INDUSTRI MAKANAN** menyatakan sebarang inisiatif baharu yang bakal diperkenalkan bagi menarik lebih ramai golongan muda untuk menceburi industri pertanian.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa membuat penilaian terhadap perancangan dan pendekatan yang sedang dilaksanakan dalam menuju matlamat kemampunan dan seterusnya menjamin sekuriti makanan negara. Antara strategi utama yang direncanakan adalah menerusi pembabitan aktif dan berterusan golongan muda dalam bidang pertanian.

Berpandukan kepada Dasar Agromakanan Negara (DAN) 2.0, empat (4) pelan tindakan sebagai strategi bagi menarik dan mengekalkan bakat muda dalam sektor pertanian telah digariskan iaitu penjenamaan semula sektor agromakanan dengan pengaplikasian pertanian moden dan pintar, mewujudkan sumber tenaga kerja industri yang optimum, meningkatkan pendedahan generasi muda kepada aktiviti pertanian serta membangunkan model pengurusan dan amalan terbaik.

MAFI sentiasa komited untuk memperkuuhkan program sedia ada selain akan terus mengambil langkah progresif bagi memanfaatkan peluang-peluang kerjasama baharu dalam memastikan kesinambungan agromakanan negara. Melalui Program Agropreneur Muda yang diperkenalkan sejak 2016, galakan bagi penyertaan golongan muda dalam bidang pertanian berjaya ditingkatkan terutamanya dalam membantu mereka untuk mengurangkan kos permulaan serta pengembangan projek-projek pertanian dan agromakanan. Secara umumnya, antara bantuan dan perkhidmatan yang ditawarkan menerusi program ini adalah seperti berikut:

- i. Geran Agropreneur Muda (GAM) berbentuk barang sehingga RM20,000 bagi setiap projek;

- ii. bantuan modal melalui Pakej Pembiayaan Khas Agrobank dan TEKUN Nasional sehingga RM500,000 bagi projek pengembangan; dan
- iii. kursus jangka pendek dan khidmat nasihat teknikal dan kewangan melalui jabatan/agensi berkaitan di bawah Kementerian.

Selain itu, pelaksanaan program ini juga berfokus kepada beberapa inisiatif lain seperti aktiviti jelajah dan promosi, galakan pasaran serta kerjasama strategik dengan pihak yang berpotensi.

Buat masa ini, MAFI optimis untuk terus mengukuhkan platform Program Agropreneur Muda untuk menarik dan mengekalkan golongan muda seterusnya membantu mentransformasikan dan memacu sektor pertanian dengan pemodenan, teknologi dan inovasi. Menerusi program ini, aktiviti *outreach* (dengan izin) dan sesi turun padang akan dipergiatkan untuk mempromosikan kelebihan keusahawanan berasaskan bidang pertanian ini secara lebih holistik dan berkesan. MAFI juga mengambil langkah pragmatik untuk mendekati golongan muda dengan penerokaan kerjasama yang lebih bersasar terutamanya menerusi penggembangan strategik dengan pihak berkepentingan seperti kerajaan negeri, agensi kerajaan, syarikat berkaitan kerajaan (GLC), pihak swasta serta pemain industri.

Pengukuhan Program Agropreneur Muda ini juga boleh menjadi pemangkin kepada kerjasama yang lebih erat antara semua pihak terbabit termasuk kerajaan dan swasta dalam bersama-sama meningkatkan penglibatan golongan muda dalam sektor pertanian seterusnya membantu memastikan jaminan sekuriti makanan negara.

Sekian, terima kasih.

**PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN
DARIPADA : DATUK SERI HAJI MOHD. SALIM SHARIF
(JEMPOL)
TARIKH :

SOALAN

DATUK SERI HAJI MOHD. SALIM SHARIF [JEMPOL] minta **MENTERI SUMBER MANUSIA** menyatakan usaha yang telah diambil untuk memastikan semua majikan mematuhi pelaksanaan Perintah Gaji Minimum (PGM) 2022 sebanyak RM1,500 sebulan mulai 1 Mei 2022 lalu.

JAWAPAN

Tuan Yang di-Pertua,

Bagi memastikan semua majikan mematuhi Perintah Gaji Minimum yang baru ini, Kementerian Sumber Manusia melalui Jabatan Tenaga Kerja Semenanjung Malaysia akan sentiasa mengadakan pemeriksaan berkanun ke atas pihak majikan. **Sehingga 30 Jun 2022 sebanyak 20,452 majikan telah diperiksa** melibatkan 3,049 tempat pekerjaan.

Selain itu, Jabatan Tenaga Kerja Semenanjung Malaysia akan menjalankan siasatan sekiranya aduan diterima dari pihak pekerja. **Sehingga 30 Jun** Jabatan Tenaga Kerja Semenanjung Malaysia telah menerima sebanyak **157 aduan** berkaitan dengan pelaksanaan Perintah Gaji Minimum 2022. Hasil siasatan mendapati **118 majikan dikesan tidak mematuhi** Perintah Gaji Minimum. Nasihat telah diberi kepada majikan untuk mematuhi. Sekiranya gagal, tindakan perundangan akan diambil ke atas mereka.

Sekian, terima kasih

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB DATO' HJ SALIM SHARIF (JEMPOL)

SOALAN

DATUK SERI HAJI MOHD. SALIM SHARIF (JEMPOL) minta **MENTERI DALAM NEGERI** menyatakan langkah dan usaha yang telah dilakukan untuk membanteras kegiatan perjudian secara dalam talian atau online dengan lebih berkesan.

JAWAPAN

Tuan Yang Di Pertua,

Untuk makluman Yang Berhormat, antara tindakan yang telah diambil dan dirancang oleh pihak PDRM termasuklah:

1. Mengadakan operasi dan serbuan secara berterusan melalui Op Dadu termasuklah operasi bersepada dengan kerjasama agensi-agensi lain seperti Suruhanjaya Pencegahan Rasuah Malaysia (SPRM) serta Pihak Berkuasa Tempatan (PBT) untuk melumpuhkan kegiatan ini;
2. Bekerjasama dengan Suruhanjaya Komunikasi Multimedia Malaysia (SKMM) bagi sekatan laman sesawang perjudian di bawah Sek. 263 (2) Akta Komunikasi Multimedia;
3. Bekerjasama dengan syarikat-syarikat utiliti seperti Tenaga Nasional Berhad (TNB) dan syarikat bekalan air untuk tindakan pemotongan bekalan elektrik dan air ke atas premis yang sering digunakan oleh sindiket perjudian;

4. Mengambil tindakan ke atas pihak-pihak yang terlibat dalam kegiatan ini termasuklah penjaga premis dan penganjur kegiatan perjudian haram di bawah peruntukan undang-undang berkaitan judi sedia ada seperti Akta Rumah Judi Terbuka 1957 dan Akta Pertaruhan 1953. Selain itu, tindakan yang lebih keras juga akan diambil di bawah peruntukan undang-undang lain yang berkaitan iaitu Akta Pencegahan Jenayah 1959 (POCA) serta Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFPUAA) 2001; dan
5. Meneliti undang-undang berkaitan judi sedia ada bagi tujuan pindaan penambahbaikan bagi memastikan undang-undang ini relevan dengan perubahan modus operandi sindiket perjudian ini terutamanya perjudian atas talian (*online*). Dalam hal ini, Kementerian Dalam Negeri juga telah turut dilibatkan di dalam kajian undang-undang berkaitan perjudian yang sedang dijalankan oleh Kementerian Kewangan Malaysia (MOF) untuk ditambah baik supaya sentiasa selaras dengan perkembangan semasa. Untuk makluman Yang Berhormat juga pindaan akta di bawah Kementerian Kewangan berkaitan hukuman berat dan penalti yang dikenakan kepada operator/penganjur yang tidak dilesenkan dan pemain/punters bagi tujuan membanteras aktiviti perjudian yang tidak dilesenkan dijangka akan dibentangkan dalam masa terdekat.

Untuk makluman Yang Berhormat, PDRM menjalankan tindakan siasatan dan penguatkuasaan dengan kerjasama pihak SKMM yang memberikan khidmat bantuan teknikal termasuklah pembekalan maklumat bagi tujuan siasatan serta bantuan dari sudut analisis forensik digital. Suruhanjaya Komunikasi dan Multimedia (SKMM) telah menyekat sebanyak 5,476 laman sesawang perjudian sejak tahun 2016 sehingga 31 Januari 2022.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATUK SERI HAJI MOHD. SALIM SHARIF
[JEMPOL]**

SOALAN :

minta **MENTERI PERPADUAN NEGARA** menyatakan sejauh manakah kerjasama dua hala Kementerian bersama Kementerian Pendidikan untuk menyemai dan memupuk semangat perpaduan antara kaum bermula dari peringkat sekolah.

JAWAPAN:

Tuan Yang di-Pertua,

1. Kerjasama strategik Kementerian Perpaduan Negara (KPN) bersama Kementerian Pendidikan Malaysia (KPM) bagi menyemai dan memupuk semangat perpaduan bermula dari peringkat pendidikan pra-sekolah.
2. **Pelan Pendidikan Awal Kanak-Kanak Tabika Perpaduan 2021-2030** telah dibangunkan bagi memperkuatkkan peranan Tabika Perpaduan sebagai institusi pendidikan awal kanak-kanak dalam memperkembangkan potensi serta melahirkan murid yang mempunyai semangat cintakan negara dan mengamalkan nilai-nilai murni dalam kehidupan seharian.
3. Antara inisiatif yang digariskan dalam pelan ini ialah:
 - i. **Pengajaran Modul Pendidikan Rukun Negara.**

Murid diberikan pengetahuan dan pemahaman bagaimana prinsip-prinsip yang terkandung dalam Rukun Negara boleh diamalkan dalam kehidupan seharian. Bagi tujuan tersebut, **Buku Pendidikan Rukun Negara** telah diperkenalkan dalam sistem pengajaran dan pembelajaran.

- ii. **Pengajaran Elemen Perpaduan dan Nilai-Nilai Murni.**
Elemen perpaduan dan nilai murni diterapkan menerusi buku-buku aktiviti dan Lembaran Kerja bagi setiap mata pelajaran iaitu:
- a) Buku Bahasa Melayu;
 - b) Buku Bahasa Inggeris;
 - c) Buku Matematik Awal;
 - d) Buku Sains Awal; dan
 - e) Buku Pendidikan Moral.
- iii. **Pengajaran Komunikasi Asas Pelbagai Bahasa:**
- a) Bahasa Mandarin;
 - b) Bahasa Tamil;
 - c) Bahasa Kadazan (Sabah);
 - d) Bahasa Iban (Sarawak); dan
 - e) Bahasa Isyarat.
- iv. **Penerapan kemahiran asas Jom Urus Diri**
Bagi memberi pendedahan kepada murid tentang kemahiran asas pengurusan diri di rumah seperti pengurusan tempat tidur dan kemahiran berpakaian. Pengajaran program Jom Urus Diri akan membolehkan murid meningkatkan kemahiran, kekemasan dan disiplin dalam pengurusan diri.
4. Bagi tujuan memastikan inisiatif-inisiatif pembaharuan di Tabika Perpaduan dilaksanakan dengan baik, **Sistem Naziran diwujudkan** dengan memfokuskan **tiga (3) dimensi** penilaian seperti berikut:

- i. Dimensi Kualiti Guru;
 - ii. Dimensi Kurikulum; dan
 - iii. Dimensi Pentadbiran.
5. Kementerian Perpaduan Negara juga menggunakan **Kurikulum Standard Prasekolah Kebangsaan (KSPK)** yang dibangunkan oleh Kementerian Pendidikan Malaysia (KPM) untuk memperkembangkan potensi murid seawal usia empat (4) hingga enam (6) tahun secara holistik dari aspek jasmani, emosi, rohani, intelek dan sosial.
6. Bagi meningkatkan tahap perpaduan **di peringkat sekolah**, usaha berterusan melalui pendidikan dan penghayatan Rukun Negara telah dirancang dan dilaksanakan bersama Kementerian Pendidikan Malaysia (KPM) melalui **Kelab Rukun Negara (KRN)**. Sehingga 30 Jun 2022, terdapat **6,843 KRN** di seluruh negara
7. Manakala di peringkat institut pengajian tinggi (IPT), kerjasama dengan Kementerian Pengajian Tinggi (KPT) diperkuuhkan bagi menjayakan **Sekretariat Rukun Negara (SRN)** sebagai **tapak integrasi perpaduan** dalam kalangan **pelajar IPT**. Sehingga 30 Jun 2022, terdapat **187 SRN** di seluruh negara.
8. Kementerian Perpaduan Negara sedang **memantapkan modul pengurusan dan program KRN serta SRN** dengan kerjasama KPM dan KPT bagi tujuan berikut:
- i. Menarik minat lebih ramai pelajar dari pelbagai kaum menyertai KRN dan SRN;
 - ii. Memperkuuh pemahaman dan penghayatan pendidikan Rukun Negara; dan
 - iii. Mengukuhkan jaringan kerjasama antara pelajar dengan masyarakat dan rakan perpaduan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]

SOALAN

DATUK SERI PANGLIMA HAJI MOHD SHAFIE BIN HAJI APDAL [SEMPORNA] minta **MENTERI KEWANGAN** menyatakan jumlah hutang negara dan jumlah hutang isi rumah terkini sehingga 30 Jun 2022 dan peratusan hutang tersebut berbanding Keluaran Dalam Negara Kasar (KDNK).

JAWAPAN

Tuan Yang di-Pertua,

Sehingga akhir-Jun 2022, hutang Kerajaan Persekutuan adalah berjumlah RM1,045 bilion atau 63.8% kepada KDNK. Manakala, sehingga akhir-Mac 2022[1], jumlah keseluruhan hutang isi rumah adalah sebanyak RM1,391.6 bilion. Hutang isi rumah telah meningkat 4.6% didorong terutamanya oleh pinjaman perumahan dan kenderaan, susulan daripada pelbagai insentif pemilikan rumah yang ditawarkan oleh pihak Kerajaan dan sektor swasta, dan insentif cukai jualan dan perkhidmatan (SST) bagi pembelian kenderaan bermotor.

Nisbah hutang isi rumah kepada KDNK pada akhir Mac 2022 telah menurun kepada 87.1% berbanding Disember 2021 (89%) berikutan pertumbuhan KDNK nominal yang lebih kukuh.

Sekian, terima kasih.

[1] *Pada masa ini data hutang isi rumah hanya boleh yang diperoleh dan dilaporkan oleh BNM sehingga Mac 2022 sahaja.*

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]

SOALAN

**DATUK SERI PANGLIMA HAJI MOHD SHAFIE BIN HAJI APDAL
[SEMPORNA]** minta **MENTERI KEWANGAN** menyatakan :-

- (a) jumlah peruntukan tahunan di bawah perbelanjaan bekalan dan pembangunan untuk Sabah bagi tahun 2017 hingga 2022 (mengikut setiap Kementerian); dan
- (b) berapa jumlah peruntukan yang dipulangkan semula kepada Kementerian Kewangan disebabkan peruntukan tidak sempat digunakan pada tahun semasa.

JAWAPAN

Tuan Yang di-Pertua,

Untuk makluman Yang Berhormat, peruntukan mengurus (atau OE) dan perbelanjaan pembangunan (atau DE) bagi negeri Sabah pada tahun 2022 adalah masing-masing sebanyak 8.66 bilion ringgit dan 5.16 bilion ringgit. Secara keseluruhan, peruntukan OE dan DE untuk negeri Sabah bagi tahun 2017 hingga 2022 berjumlah masing-masing 52.26 bilion ringgit dan 17.48 bilion ringgit. Jumlah OE ini adalah merangkumi pembiayaan pengoperasian kementerian/jabatan Persekutuan di negeri Sabah serta pemberian tahunan kepada Kerajaan Negeri Sabah. Pemberian ini telah meningkat daripada 1.1 bilion ringgit pada tahun 2017 kepada 1.16 bilion ringgit pada tahun 2022.

Peruntukan DE untuk projek pembangunan di negeri Sabah telah meningkat daripada 3.2 bilion ringgit pada tahun 2017 kepada 5.2 bilion ringgit pada tahun 2022. Perbelanjaan DE di negeri Sabah antaranya adalah bagi pelaksanaan projek Lebuhraya Pan Borneo (LPB) Sabah, jalan perhubungan desa, jalan-jalan luar bandar, bekalan elektrik luar bandar dan bekalan air luar bandar serta menaik taraf sekolah daif.

Tuan Yang di-Pertua,

Pada setiap tahun, terdapat pelaksanaan projek-projek pembangunan Kerajaan Persekutuan yang tidak dapat dilaksanakan mengikut jadual yang dirancang. Kementerian/Jabatan Persekutuan kebiasaannya akan memohon sekatan peruntukan DE kepada Kementerian Kewangan terutamanya pada suku tahun keempat tahun berkenaan. Ini termasuk peruntukan yang dipohon untuk disekat oleh kementerian bagi projek-projek pembangunan yang tidak dapat dilaksanakan mengikut jadual di negeri-negeri termasuk Sabah. Walau bagaimanapun, peruntukan bagi projek-projek pembangunan yang telah bermula akan terus disediakan pada tahun berikutnya bagi memastikan projek disiapkan mengikut perancangan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]

SOALAN

DATUK SERI PANGLIMA HAJI MOHD SHAFIE BIN HAJI APDAL [SEMPORNA] minta **MENTERI KEWANGAN** menyatakan jumlah hasil yang diperoleh daripada Sabah mengikut jenis iaitu hasil cukai, hasil bukan cukai dan terimaan bukan hasil bagi tempoh 5 tahun terakhir.

JAWAPAN

Tuan Yang di-Pertua,

Untuk makluman Ahli Yang Berhormat dan Dewan Yang Mulia ini, Perkara yang dibangkitkan oleh Yang Berhormat adalah salah satu perkara yang dirujuk dalam saman yang telah difaikkan ke mahkamah oleh 12 orang wakil rakyat dan Persatuan Undang-Undang Sabah (*Sabah Law Society*) terhadap Kerajaan Persekutuan dan Kerajaan Negeri Sabah.

Oleh yang demikian, tiada apa-apa ulasan atau jawapan boleh diberikan atas dasar *sub judice*.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]

SOALAN

DATUK SERI PANGLIMA HAJI MOHD SHAFIE BIN HAJI APDAL
[SEMPORNA] minta **MENTERI KEWANGAN** menyatakan langkah Kerajaan dalam meminimumkan impak daripada langkah pengetatan monetari yang agresif oleh Rizab Persekutuan (Fed) Amerika Syarikat.

JAWAPAN

Tuan Yang di-Pertua,

Kebanyakan bank pusat telah beralih daripada sokongan dasar monetari ultra-akomodatif yang dilaksanakan semasa pandemik COVID-19 kepada dasar monetari yang lebih ketat. Tindakan ini didorong oleh permintaan dalam negeri yang kukuh dan kadar tekanan inflasi yang meningkat. Sebagai contoh, Rizab Persekutuan Amerika Syarikat (AS) (Fed) telah menaikkan kadar faedah dengan lebih pantas sebanyak 150 mata asas ke 1.75% sejak Mac tahun ini. Menurut penganalisis kewangan, kadar faedah ini dijangka ditingkatkan lagi sebanyak 175 mata asas ke 3.50% menjelang akhir tahun 2022. Kenaikan kadar faedah AS telah menjelaskan aliran modal, kadar pertukaran matawang dan pasaran kewangan global melibatkan ekonomi maju (*developed economies*), ekonomi pesat membangun (*emerging economies*) dan ekonomi membangun (*developing economies*).

Sebelum saya menjawab pertanyaan mengenai langkah yang diambil oleh Kerajaan, saya ingin memberi penekanan bahawa negara kita menghadapi tempoh persekitaran luaran yang tidak menentu ini dengan kedudukan ekonomi dan sistem kewangan yang teguh dah berdaya tahan. Kedudukan aset luar Malaysia adalah kukuh, dicerminkan oleh pegangan aset luar oleh institusi kewangan dan syarikat korporat yang tinggi. Selain itu, Malaysia mempunyai pegangan yang besar dalam kedudukan aset mata wang asing bersih dengan jumlah RM1.1 trilion atau 81.8% daripada KDNK. Keupayaan Malaysia untuk bertahan daripada kejutan luaran juga tinggi, didorong oleh sistem perbankan yang teguh, kadar pertukaran mata wang yang fleksibel serta rizab antarabangsa yang mencukupi. Selain itu, kecairan pasaran kewangan Malaysia juga disokong oleh pasaran modal yang mendalam dan pelbagai. Permintaan ke atas kertas hutang Kerajaan masih kekal tinggi dengan purata nisbah bidaan kepada terbitan (*bid-to-cover*) dicatatkan lebih 2 kali ganda. Oleh yang demikian, ekonomi Malaysia masih berada di landasan untuk mencapai sasaran pertumbuhan ekonomi antara 5.3 dan 6.3 peratus pada tahun ini.

Meskipun begitu, Kerajaan menerusi Bank Negara Malaysia (BNM) tetap berwaspada dan terus melaksanakan langkah-langkah yang komprehensif dan proaktif untuk mengehadkan impak atau limpahan daripada langkah pengetatan dasar monetari yang agresif oleh Fed ke atas pasaran kewangan domestik dan pengantaraan kewangan (*financial intermediation*). Langkah-langkah tersebut termasuk:

- i. **Memelihara kestabilan kewangan domestik dan memastikan risiko terhadap hutang luar negeri kekal terurus melalui pelaksanaan dasar berhemat**

Dalam konteks Kedudukan Kewangan Kerajaan, sebahagian besar hutang kerajaan persekutuan tertunggak adalah di dalam mata wang ringgit (97.5% merujuk kepada data bagi suku pertama 2022) dan hanya sebanyak 2.5% adalah dalam mata wang asing. Keadaan ini mengurangkan risiko terhadap kedudukan kewangan Kerajaan akibat daripada penurunan kadar pertukaran ringgit.

Dalam konteks penetapan dasar yang bersesuaian bagi menggalakkan pertumbuhan ekonomi yang lebih mampan, paras OPR terkini pada Mei 2022 iaitu 2.25% akan terus menyokong pertumbuhan ekonomi negara. Kenaikan OPR secara beransur-ansur pada bulan Mei dan Julai tahun ini adalah penting untuk mengelakkan tekanan pada masa akan datang untuk menaikkan kadar OPR secara tergesa-gesa dan pada magnitud yang besar seperti apa yang berlaku di Amerika Syarikat (kadar inflasi: 9.1%), di Filipina (kadar inflasi: 6.1%) dan di Turki (kadar inflasi: 78.6%) yang boleh merencatkan pertumbuhan ekonomi dan menjelaskan kesejahteraan rakyat. Jangkaan pertumbuhan yang menggalakkan dan penentukan dasar yang sesuai akan membantu menyokong keyakinan pelabur terhadap ekonomi dan ringgit.

Dalam konteks sistem perbankan, rangka kerja kawal selia berhemat BNM dan amalan pengurusan risiko yang mantap juga memastikan institusi perbankan Malaysia lebih berdaya tahan

terhadap risiko luaran dan domestik. Secara khususnya, penampang kukuh sistem perbankan yang telah dibina sejak sekian lama dijangka terus menyokong aktiviti pinjaman bank kepada ekonomi. Khususnya, penampang modal lebihan institusi perbankan berjumlah RM148.4 bilion (data bagi suku pertama 2022). Penampang ini akan memperkuuh keupayaan sistem perbankan untuk menangani kesan kejutan daripada pengeluaran dana luar secara mendadak.

Bagi syarikat korporat pula, pinjaman luar negeri oleh syarikat korporat daripada pihak yang tidak berkaitan akan terus dipantau dan tertakluk kepada rangka kerja Pentadbiran Pertukaran Asing (*Foreign Exchange Administration, FEA*) Bank Negara Malaysia. Rangka kerja tersebut, antara lain, bertujuan memastikan hutang luar negara disokong oleh perolehan mata wang asing, mempunyai lindung nilai secukupnya dan pinjaman digunakan untuk membiayai pelaburan yang produktif. Langkah kehematan ini penting dalam memastikan pinjaman luar negeri oleh syarikat korporat mempunyai kemampuan kendiri dan tidak menimbulkan risiko yang besar kepada ekonomi.

- ii. **Pada masa yang sama, rizab antarabangsa BNM akan terus mempertingkatkan keutuhan sektor luaran Malaysia.** Peranan utama rizab antarabangsa adalah sebagai penampang mudah tunai yang memastikan pelarasaran kadar pertukaran ringgit yang teratur, terutamanya semasa tempoh aliran modal yang besar dan tidak menentu. Rizab antarabangsa BNM berjumlah USD109.0 bilion pada 30 Jun 2022 adalah memadai untuk membiayai 5.8 bulan import barang dan perkhidmatan dan adalah 1.1 kali jumlah hutang luar negeri jangka pendek. Selain rizab antarabangsa, BNM juga boleh memperoleh kecairan tambahan melalui pengaturan swap dua hala dengan bank-bank pusat lain. Fasiliti ini dapat mengekalkan pasaran pertukaran asing yang teratur di samping mengurangkan kesan negatif akibat aliran modal yang mendadak.

- iii. Di samping itu, fleksibiliti pada kadar pertukaran kekal menjadi barisan pertahanan pertama Malaysia untuk menyerap kejutan luaran dan pada yang sama memastikan pengantaraan kewangan terus tidak terganggu. Bagi menyokong operasi pasaran pertukaran asing domestik yang teratur, BNM menggunakan pelbagai alat (*tools*) sedia ada termasuk intervensi pertukaran asing dua hala semasa tempoh tekanan pasaran. Tindakan ini memastikan mudah tunai adalah mencukupi dan turun naik (*volatility*) pertukaran asing tidak berlebihan.

Tuan Yang di-Pertua,

Selain daripada langkah-langkah yang dinyatakan, Kerajaan juga akan terus memastikan kemampanan fiskal dan keadaan makroekonomi yang stabil terpelihara. Perkara ini termasuk menggubal dasar fiskal jangka sederhana yang teguh, berhemah dan jelas. Kerajaan juga telah melaksanakan pelbagai dasar untuk menambah baik iklim pelaburan dan produktiviti Malaysia. Hal ini dijangka akan meningkatkan daya tarikan jangka panjang Malaysia kepada pelaburan langsung asing (*foreign direct investment*) dan portfolio. Asas ekonomi negara yang kukuh juga akan menjamin daya tahan ekonomi bagi menghadapi kejutan luaran dalam persekitaran global yang tidak menentu.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]

SOALAN

DATUK SERI PANGLIMA HAJI MOHD SHAFIE BIN HAJI APDAL [SEMPORNA] minta **MENTERI KEWANGAN** menyatakan umlah terkini subsidi petrol dan diesel sejak Januari 2022 dan apakah mekanisme pemberian subsidi bersasar yang bakal dilaksanakan kelak.

JAWAPAN

Tuan Yang di-Pertua,

Keperluan perbelanjaan bagi subsidi petroleum, diesel dan *Liquefied Petroleum Gas* (LPG) bermula Januari 2022 sehingga Disember 2022 adalah diunjurkan sebanyak RM38.3 bilion. Unjuran subsidi ini mengambil kira harga pasaran petroleum, arang batu, dan komoditi lain kekal pada paras semasa jika dibandingkan dengan perbelanjaan subsidi petroleum, diesel dan LPG bagi tahun 2020 hanya berjumlah RM1.6 bilion manakala tahun 2021 berjumlah RM11 bilion.

Pemberian Kerajaan ini berdasarkan kepada keprihatinan Kerajaan untuk membantu meringankan kos sara hidup rakyat dan mengelakkan isirumah menghadapi kesan penuh kenaikan harga komoditi dan makanan di peringkat global. Kerajaan turut mengunjurkan perbelanjaan subsidi sebanyak RM77.7 bilion meliputi petrol, diesel, LPG minyak masak, subsidi elektrik bagi menampung keperluan 2022.

Subsidi yang diberikan oleh Kerajaan ketika ini merupakan subsidi menyeluruh (*blanket subsidies*) yang meliputi petrol, elektrik dan minyak masak. Oleh yang demikian, Kerajaan sedang memperincikan kaedah pelaksanaan subsidi bersasar bagi barangan subsidi seperti produk petroleum. Ini adalah bagi memastikan pelaksanaan yang lancar dan adil bagi seluruh Keluarga Malaysia dan sampai kepada golongan bersasar yang benar-benar memerlukan.

Selain itu, Kerajaan juga akan menyemak dan menilai semula keberkesanan setiap program subsidi dan bantuan untuk memastikan agar peruntukan yang optimum disediakan bagi setiap program, dan yang paling penting, penjimatan yang diperoleh dapat disalurkan kepada mereka yang lebih memerlukan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB DATUK MOHD. AZIS BIN JAMMAN
(SEPANGGAR)**

SOALAN

DATUK MOHD. AZIS BIN JAMMAN (SEPANGGAR) minta **MENTERI DALAM NEGERI** menyatakan jumlah Kad Warga Asing/Kad Pemastautin Bukan Warganegara yang akan dikeluarkan dan diluluskan oleh Kerajaan di Sabah.

JAWAPAN

Tuan Yang Di Pertua,

Untuk makluman Ahli Yang Berhormat, Mesyuarat Jawatankuasa Induk Pengurusan Warga Asing (JKPWAS-Induk) Khas yang bersidang pada 17 Jun 2022 telah bersetuju dengan cadangan pendataan secara digital yang akan dilaksanakan oleh Kerajaan Negeri Sabah sebelum cadangan pengeluaran Kad Warga Asing/Kad Pemastautin Bukan Warganegara diteliti. Ini termasuklah dengan mengambil kira pandangan serta kerjasama pemimpin-pemimpin politik, ketua-ketua masyarakat dan semua pihak di Sabah bagi memastikan isu pengurusan warga asing di Sabah dapat diselesaikan dan tidak lagi dipolitikkan oleh mana-mana pihak.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. DATUK MOHD AZIS BIN JAMMAN
[SEPANGGAR]

SOALAN :

DATUK MOHD AZIS BIN JAMMAN [SEPANGGAR] minta **PERDANA MENTERI** menyatakan jumlah projek bagi baki Rolling Plan di bawah Rancangan Malaysia ke-12 di Parlimen Sepanggar dan nyatakan Pencapaian RP1 dan RP2 setakat ini.

JAWAPAN

DIJAWAB OLEH YB DATO' SRI MUSTAPA BIN MOHAMED

MENTERI DI JABATAN PERDANA MENTERI (EKONOMI)

Tuan Yang di-Pertua,

1. Dalam tempoh dua tahun RMKe-12, sebanyak 53 projek telah dilaksanakan di Parlimen Sepanggar dengan kos berjumlah RM3,678.15 juta. Bagi tahun 2021, iaitu tahun pertama RMKe-12, sebanyak 45 projek dilaksanakan di Parlimen Sepanggar yang mana 43 daripadanya merupakan projek sambungan dan dua projek baharu. Bagi tahun 2022 pula, terdapat sebanyak 48 projek dilaksanakan di Parlimen Sepanggar yang terdiri daripada 40 projek sambungan dan 8 projek baharu. Antara contoh projek adalah seperti berikut:

- i. Pembinaan Tabika Kemas Berkembar Kampung Gentisan, Kota Kinabalu, Sabah;
- ii. Projek Menaiktaraf Dan Membaikpulih Infrastruktur Dan Fasiliti (*Campus Renewal*) Di Institut Latihan Perindustrian (ILP) Kota Kinabalu, Sabah;
- iii. Pembinaan Bangunan Tambahan Wisma Laskar Di PTKK;
- iv. Taman Industri Kecil Dan Sederhana SEDCO, KKIP, Sepanggar; dan
- v. Menaiktaraf Jalan UMS (0110876) Dan Jalan Sepanggar (R606), Kota Kinabalu Termasuk Empat (4) Persimpangan Bertingkat Di Persimpangan Jalan Kingfisher, Persimpangan Jalan UMS, Persimpangan Rampayan Dan Persimpangan Jalan Sepanggar (Indah Permai).

2. Projek-projek yang dilaksanakan pada tahun 2021 dan 2022 berada dalam pelbagai peringkat pelaksanaan seperti penyediaan brif projek, reka bentuk, kerja-kerja tanah dan pembinaan. Sehingga kini, tiada projek yang diluluskan di Parlimen Sepanggar dibatalkan.
3. Bagi baki *Rolling Plan* RMKe-12 pula, permohonan projek perlu dikemukakan oleh pihak Kementerian untuk pertimbangan Unit Perancang Ekonomi, Jabatan Perdana Menteri (EPU, JPM) pada setiap tahun. Permohonan projek *Rolling Plan* Ketiga Tahun 2023 RMKe-12 masih dalam pertimbangan EPU, JPM.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK MOHD AZIS BIN JAMMAN
[SEPANGGAR]**

SOALAN

**YB DATUK MOHD AZIS BIN JAMMAN [SEPANGGAR] minta
MENTERI PERUMAHAN DAN KERAJAAN TEMPATAN
menyatakan :-**

- (a) adakah Kementerian bercadang untuk meningkatkan syarat permohonan Rumah Mesra Rakyat daripada RM3,000 kepada RM4,000 memandangkan kenaikan kos sara hidup ketika ini?; dan
- (b) jumlah permohonan projek perumahan Rumah Mesra Rakyat di Sabah dan di Sepanggar khususnya, berapa jumlah yang telah diluluskan dan ditolak.

JAWAPAN

Tuan Yang di-Pertua,

(a) Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah menerima permohonan untuk semakan semula syarat had pendapatan pemohon program Rumah Mesra Rakyat (RMR) daripada Syarikat Perumahan Negara Berhad (SPNB) dan sedang mendapatkan pertimbangan daripada agensi pusat yang berkenaan.

(b) Untuk makluman Ahli Yang Berhormat selanjutnya, bagi negeri Sabah, sebanyak 3,504 permohonan RMR telah lengkap diterima di mana sebanyak 1,566 permohonan telah diluluskan, sebanyak 1,876 permohonan telah ditolak manakala 62 permohonan lagi di dalam senarai menunggu. Daripada jumlah yang telah diluluskan tersebut sebanyak 1,342 unit RMR telah disiapkan, sebanyak 135 unit sedang dibina dan baki sebanyak 89 unit dalam peringkat perancangan.

Bagi kawasan Parlimen Sepanggar, sebanyak 60 permohonan telah lengkap diterima. Daripada jumlah tersebut, sebanyak 21 permohonan telah diluluskan, sebanyak 37 permohonan telah ditolak kerana tidak memenuhi syarat-syarat permohonan RMR manakala dua (2) permohonan lagi di dalam senarai menunggu. Daripada jumlah yang telah diluluskan tersebut, sebanyak 18 unit telah disiapkan, dua (2) unit sedang dibina dan baki satu (1) unit dalam peringkat perancangan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK MOHD. AZIS BIN JAMMAN
(SEPANGGAR)**

SOALAN

DATUK MOHD. AZIS BIN JAMMAN (SEPANGGAR) minta **MENTERI PEMBANGUNAN LUAR BANDAR** menyatakan pelan pembangunan menyeluruh bagi meningkatkan pendapatan dan hasil ekonomi penduduk luar bandar Sabah amnya dan rakyat Sepanggar khususnya bagi tempoh 5 tahun.

JAWAPAN

Untuk makluman Yang Berhormat, bagi memastikan pelan pembangunan luar bandar yang menyeluruh, meningkatkan pendapatan dan hasil ekonomi penduduk luar bandar, Kementerian Pembangunan Luar Bandar (KPLB) telah menggubal Dasar Pembangunan Luar Bandar (DPLB), 2030, yang telah di lancarkan pada tahun 2019 untuk dilaksanakan bagi tempoh 10 tahun mulai 2021 hingga 2030.

Salah satu fokus di bawah Teras Ekonomi, DPLB 2030, adalah untuk meningkatkan nilai tambah kepada sumber tempatan bagi menyokong kepelbagaian ekonomi serta menjana peluang pekerjaan dan keusahawanan di luar bandar.

Bagi tujuan pelaksanaan DPLB, Pelan Strategik KPLB (PSKPLB) 2021-2025 juga telah disediakan. Lima Fokus Strategik dalam

SOALAN NO : 301

PSKPLB adalah Infrastruktur Asas, Ekonomi, Keusahawanan, Modal Insan dan Sistem Penyampaian. Sebanyak 22 Strategi dan 92 Program telah dirangka bagi memacu pembangunan luar bandar secara holistik dan mampan.

Dasar ini turut menyokong kepada Rancangan Malaysia Kedua Belas (RMKe-12) 2021-2025, yang telah mengkhususkan satu bab dalam RMKe-12 iaitu Bab 7 bagi Memperkuatkan Pembangunan Sosioekonomi di Sabah dan Sarawak yang mana KPLB merupakan salah satu Kementerian Pelaksana.

Di bawah RMKe-12, KPLB melaksanakan pelbagai program peningkatan pendapatan dan pembangunan ekonomi luar bandar di negeri Sabah seperti berikut:

- a) Penyediaan infrastruktur dan prasarana asas yang lengkap di luar bandar Sabah dalam menyokong pembangunan ekonomi seperti penyediaan Bekalan Air Luar Bandar (BALB), Bekalan Elektrik Luar Bandar (BELB), Jalan Luar Bandar (JALB), Jalan Perhubungan Desa (JPD) dan Program Ameniti Sosial (PAMS) dan Jambatan Luar Bandar (JEMLB);
- b) Membina dan membaik pulih rumah melalui Program Perumahan Rakyat Termiskin (PPRT);
- c) Program Desa Lestari yang merupakan program bantuan geran bagi mewujudkan komuniti desa yang berpendapatan tinggi melalui penglibatan dalam pelbagai aktiviti ekonomi dan peluang pekerjaan;
- d) Program DesaMall@KPLB bagi membantu usahawan luar bandar memasarkan produk yang dahulunya dipasarkan secara *offline* atau runcitan kepada pemasaran secara dalam

SOALAN NO : 301

- talian melalui platform e-Dagang seperti Lazada, Shopee, PrestoMall dan eBay;
- e) Projek Agropolitan dan Projek Bersepadu Pembangunan Ekonomi Kampung (PROSPEK);
 - f) Menaiktaraf premis perniagaan MARA yang meliputi ruang niaga dan kemudahan infrastruktur; dan
 - g) Melaksanakan program pembangunan kawasan tanaman getah dan sawit di bawah Felcra Berhad, RISDA, Lembaga Industri Getah Sabah (LIGS) dan Lembaga Kemajuan Tanah Sabah (SLDB).

Bagi program peningkatan pendapatan khususnya di Parlimen Sepanggar, KPLB melaksanakan program seperti berikut bagi tahun 2021/2022 :

- a) Penyediaan infrastruktur dan prasarana asas yang lengkap dalam menyokong pembangunan ekonomi dengan peruntukan lebih RM1.6 juta;
- b) Membina dan membaik pulih 43 rumah di bawah PPRT pada tahun 2021 yang memberikan manfaat kepada 215 orang dengan peruntukan sebanyak RM1.75 juta;
- c) Program Desa Lestari di mana Kampung Kobuni, Inanam di bawah Parlimen Sepanggar telah terpilih sebagai kampung Desa Lestari bagi menjalankan projek eko-pelancongan melalui Koperasi Desa Cinta Kobuni Berhad dengan geran berjumlah RM601,200.00. Sebanyak 26 peluang pekerjaan baharu telah diwujudkan dan memberi manfaat secara langsung kepada 284 orang penduduk kampung. Sehingga Julai 2022, projek

SOALAN NO : 301

ekonomi ini berjaya menjana jumlah pendapatan kasar sebanyak RM47,110.00;

- d) Program Peningkatan Pendapatan (PPP) yang memberi manfaat kepada seorang peserta dengan peruntukan sebanyak RM8,500;
- e) Program Latihan Kemahiran dan Kerjaya (PLKK) yang memberi manfaat kepada 3 orang peserta tahun 2021 dengan peruntukan sebanyak RM11,400 melalui Pusat GIATMARA Sepanggar;
- f) Projek perolehan peralatan di Pusat GIATMARA Sepanggar tahun 2022 dengan peruntukan sebanyak RM700,000 yang akan memberi manfaat pembangunan modal insan kepada hampir 100 orang pelajar; dan
- g) Kursus Pemerkasaan PKD bagi menjana pendapatan peserta tahun 2021 di Pusat Komuniti Desa (PKD) Darau Laut yang memberi manfaat kepada 13 orang peserta.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK MOHD. AZIS BIN JAMMAN
(SEPANGGAR)**

SOALAN

Minta **MENTERI PERTAHANAN** menyatakan :-

- (a) adakah Kerajaan akan menyelaraskan semula skim pencen bagi pesara tentera yang sudah lama menamatkan perkhidmatan dengan mereka yang baru bersara; dan
- (b) adakah Kementerian bercadang untuk meningkatkan bantuan sara hidup bulanan bagi veteran tentera tidak berpencen.

JAWAPAN

Tuan Yang di-Pertua,

Perbincangan di antara Kementerian Pertahanan, Angkatan Tentera Malaysia (ATM) dan agensi-agensi Kerajaan yang berkaitan seperti Jabatan Perkhidmatan Awam (JPA) dan Kementerian Kewangan (MoF) masih diteruskan bagi mencari penyelesaian terbaik kepada cadangan penyelarasan pencen melibatkan Veteran ATM yang bersara sebelum 1 Oktober 2004 dan tidak menerima pelarasan pencen mengikut jadual gaji SSM 2004. Semasa sesi libat urus bersama pihak JPA, Kementerian ini telah dimaklumkan bahawa cadangan penyelarasan pencen ini perlu melalui beberapa proses termasuklah meminda akta dan peraturan pencen yang sedang berkuatkuasa sebelum ianya boleh diluluskan.

Hasil kajian dan semakan yang dijalankan oleh Kementerian mendapati penyelarasan ini akan melibatkan implikasi kewangan yang besar. Namun begitu, Kementerian tetap berusaha untuk mengenal pasti opsyen-opsyen terbaik dalam menangani permasalahan ini memandangkan Kementerian mengakui skim perkhidmatan ATM adalah berbeza dengan skim-skim perkhidmatan awam yang lain.

Mengenai cadangan untuk meningkatkan Bantuan Sara Hidup (BSH) pula, Kementerian Pertahanan merancang untuk menyemak semula kadar Bantuan Sara Hidup untuk semua penerima skim Bantuan Sara Hidup di kalangan Veteran ATM yang layak sama ada berpencen atau tidak berpencen bagi memastikan kebajikan warga Veteran ATM sentiasa terbela. Perkara-perkara ini memerlukan kajian yang mendalam serta penelitian yang terperinci kerana ianya bukan sahaja melibatkan Kementerian Pertahanan sebaliknya banyak pihak lain lebih-lebih lagi jika ia berkait rapat dengan kemampuan kewangan negara.

Walau bagaimanapun, Kementerian Pertahanan melalui Jabatan Hal Ehwal Veteran ATM (JHEV ATM) telah menyediakan pelbagai bentuk kemudahan serta bantuan kepada anggota tentera yang menamatkan perkhidmatan sama ada yang berpencen atau tidak berpencen. Skim-skim bantuan yang disediakan adalah meliputi:

- (i) Bantuan Sara Hidup;
- (ii) Bantuan Persekolahan (Sekolah Rendah dan Menengah/Kolej Vokasional Kebangsaan) kepada anak-anak veteran;
- (iii) Bantuan Kemasukan ke IPTA atau IPTS (terpilih) dan Politeknik kepada anak-anak veteran;
- (iv) Bantuan Perubatan (Dialisis/Alat/Ubat/Perkhidmatan dan Rawatan Kecemasan);
- (v) Bantuan Peralatan Pesakit;
- (vi) Bantuan Bencana Alam; dan
- (vii) Bantuan Mengurus Jenazah bagi Veteran ATM, isteri dan anak di bawah tanggungan.

Apa juar bentuk bantuan yang akan diberikan kepada Veteran ATM selepas ini, ia banyak bergantung kepada kedudukan dan kemampuan kewangan Kerajaan, dengan mengambil kira situasi ekonomi semasa dalam peralihan ke fasa endemik COVID-19. Walau bagaimanapun, Kementerian ini berjanji akan meneruskan agenda membela veteran ATM sama ada yang berpencen atau tidak berpencen dan memastikan kebijakan mereka akan diberi perhatian sewajarnya.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN
RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

SOALAN

Minta **MENTERI PENGAJIAN TINGGI** menyatakan:

- (a) berapa jumlah graduan tajaan luar negara yang tidak kembali pulang berkhidmat ke dalam negara setelah tamat belajar; dan
- (b) apakah usaha yang telah dilaksanakan oleh Kementerian bagi mengatasi perkara ini.

JAWAPAN

Tan Sri Yang di-Pertua,

Satu daripada syarat utama program penajaan Kementerian Pengajian Tinggi (KPT) ialah para pelajar atau pegawai yang mengikuti pengajian di luar negara perlu kembali ke Malaysia dan melaporkan diri kepada Kerajaan serta-merta selepas menamatkan pengajian.

Untuk tempoh 2011 hingga 2021, seramai 1,886 pelajar dan pegawai tajaan KPT di bawah program Skim Latihan Akademik Bumiputera (SLAB) dan Skim Latihan Akademik IPTA (SLAI) telah menamatkan pengajian Ijazah Lanjutan di luar negara. Daripada jumlah tersebut, seramai sembilan (9) orang pelajar dan pegawai telah dikenal pasti tidak kembali ke Malaysia untuk menyempurnakan ikatan kontrak berkhidmat dengan Kerajaan setelah tamat belajar atas pelbagai sebab, termasuklah mendapat pekerjaan di luar negara, menyambung pengajian dan menetap di luar negara.

Pihak KPT dan Universiti Awam (UA) telah melaksanakan pelbagai usaha untuk berdepan dengan perkara ini. Antaranya, KPT mengadakan taklimat serta perjumpaan dari semasa ke semasa dengan pelajar atau pegawai bagi mengingatkan tanggungjawab mereka sebelum, semasa dan selepas penajaan, di samping menekankan berkenaan dengan kesan pecah kontrak terutama implikasi kewangan ke atas pelajar atau pegawai tajaan.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

SOALAN

Minta **MENTERI BELIA DAN SUKAN** menyatakan

- a) apakah kaedah digunakan Kementerian dalam menentukan imbuhan khas kepada para atlet yang mengharumkan nama negara; dan
- b) bagaimanakah Kementerian akan memastikan pemberian imbuhan khas diberikan secara adil kepada setiap jenis sukan dan tidak tertumpu pada sukan tertentu.

JAWAPAN

Tan Sri Yang di-Pertua,

(a)

Pihak Kementerian melalui Majlis Sukan Negara (MSN) sentiasa mengambil berat dan prihatin atas usaha serta semangat yang ditunjukkan oleh para atlet dalam mencipta kejayaan di kejohanan tempatan dan antarabangsa.

Bagi menentukan pemberian imbuhan khas, beberapa kaedah dan syarat telah ditetapkan. Antaranya adalah:

SOALAN NO : 304

- a) memenangi pingat di Temasya Sukan Antarabangsa seperti Sukan SEA/Para ASEAN, Sukan Asia/Para Asia, Sukan Komanwel dan Sukan Olimpik/Paralimpik yang diadakan secara bergilir sama ada setiap dua (2) atau empat (4) tahun.
- b) memenangi pingat atau menduduki 3 tempat teratas (*Podium Finish*) di kejohanan sukan individu di peringkat Asia, Komanwel atau Dunia serta mengikut kategori had umur atlet (jika ada). Imbuhan yang diberikan mengikut had umur atlet untuk setiap kejohanan adalah berbeza diantara atlet senior dan remaja (junior).
- c) atlet yang berjaya mencipta atau memecahkan rekod baru di kejohanan atau temasya sukan antarabangsa yang diiktiraf oleh badan sukan antarabangsa.

Selain itu, pertimbangan pemberian imbuhan kepada sukan juga mengambil kira kejohanan atau temasya sukan yang disertai mestilah mendapat pengiktirafan dari Majlis Olimpik Malaysia (MOM), Majlis Paralimpik Malaysia (MPM) atau mana-mana badan induk sukan kebangsaan yang bergabung dengan badan induk sukan antarabangsa seperti Majlis Olimpik Dunia (International Olympic Council), Majlis Paralimpik Dunia (International Paralympic Council) serta Persatuan Sukan Antarabangsa (International Sport Federation) yang diiktiraf.

Kekerapan penganjuran kejohanan individu atau temasya sukan perlulah secara konsisten sama ada setiap tahun, dwi-tahunan (2 tahun) mahupun empat (4) tahun sekali. Malahan, bilangan penyertaan atlet atau pasukan juga diambil kira dalam menentukan kelayakan atlet berkenaan mendapat imbuhan sukan.

Selain dari itu, perubahan-perubahan semasa dalam kalender sukan antarabangsa turut menyebabkan penurunan kualiti sukan berkenaan. Kejohanan-kejohanan rasmi pula ditukarkan format kepada kejohanan bersiri yang turut membawa gelaran juara dunia. Kejohanan-kejohanan sebegini perlulah dinilai semula sebelum pemberian insentif.

(b)

Untuk makluman Ahli Yang Berhormat, imbuhan khas di bawah Majlis Sukan Negara adalah untuk atlet-atlet Sukan Prestasi Tinggi yang menjalani latihan atlet di bawah Majlis Sukan Negara dengan kerjasama PSK. Imbuhan ini juga tertakluk kepada penyertaan atlet dan pasukan yang menyertai kejohanan sukan atau temasya sukan antarabangsa yang diiktiraf oleh Majlis Olimpik Antarabangsa (*International Olympic Council*) dan Majlis Paralimpik Antarabangsa (*International Paralympic Council*).

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' MOHD. NIZAR
BIN HAJI ZAKARIA [PARIT]**

SOALAN

**DATO' MOHD. NIZAR BIN HAJI ZAKARIA [PARIT] minta
MENTERI PEMBANGUNAN USAHAWAN DAN KOPERASI
menyatakan:-**

- (a) sejauh manakah Kementerian melihat penglibatan belia dalam bidang francais; dan
- (b) apakah bentuk usaha yang telah dijalankan oleh Kementerian dalam mempergiatkan lagi penglibatan golongan belia dalam bidang francais.

JAWAPAN

Tuan Yang Di Pertua,

Kementerian Pembangunan Usahawan dan Koperasi (KUSKOP) optimis untuk melahirkan bangsa usahawan khususnya dalam sektor francais melalui Perbadanan Nasional Berhad (Pernas) dengan melaksanakan pelbagai inisiatif kepada golongan belia seperti berikut :-

- (a) **Program Transformasi Perniagaan (*Business-In-Transformation - BIT*)**

BIT adalah program transformasi peniagaan usahawan kecil ke

SOALAN NO : 305

arah francais yang diperkenalkan sejak tahun 2013 telah berjaya melahirkan 2,000 usahawan pra-francaisi dan memberi peluang pekerjaan kepada lebih 4,000 orang termasuk belia. Sehingga Jun 2022, sebanyak 127 syarikat dari pelbagai sektor seperti makanan dan minuman, peruncitan, perkhidmatan dan pendidikan telah mendaftar di bawah program BIT yang meliputi 76 peserta terdiri daripada golongan belia.

(b) Projek Jom Jadi Usahawan Berjaya, *Be Your Own Boss* (BYOB)

Bagi mempergiatkan penglibatan belia dalam bidang francais, KUSKOP telah menawarkan Program Pembiayaan Keusahawanan Francois Belia (YOUNITY) khusus untuk golongan belia melalui BYOB. Sehingga 30 Jun 2022, seramai 455 belia telah menyertai program YOUNITY dan sebanyak 26 pembiayaan berjumlah RM4.3 juta telah diluluskan.

KUSKOP juga telah menjalankan kerjasama strategik dengan Kementerian Pengajian Tinggi (KPT) dan Kementerian Belia dan Sukan (KBS) untuk meningkatkan penglibatan belia serta mahasiswa untuk menceburi bidang keusahawanan francais.

Pernas menerusi Institut Francois juga menyediakan pelbagai program latihan berfokuskan francais dan keusahawanan secara menyeluruh serta memberikan taklimat kesedaran keusahawanan francais kepada usahawan terutamanya golongan belia.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATO' MOHD NIZAR BIN HAJI ZAKARIA [PARIT]

SOALAN :

Dato' Mohd. Nizar bin Haji Zakaria [Parit] minta MENTERI PERUSAHAAN PERLADANGAN DAN KOMODITI menyatakan kedudukan Malaysia mengeksport komoditi minyak sawit yang terus meningkat harganya dengan permintaan pasaran kukuh sebagai jaminan Malaysia boleh mengelak daripada mengalami kegawatan global.

JAWAPAN:

Tuan Yang Di-Pertua,

- Malaysia merupakan negara pengeluar dan pengeksport kedua terbesar minyak sawit selepas Indonesia. Pada tahun 2021, Malaysia mengeluarkan 18.12 juta tan minyak sawit atau 23.9% dari jumlah pengeluaran minyak sawit global. Untuk eksport, Malaysia mengeksport 15.57 juta tan atau 31.0% dari jumlah eksport minyak sawit dunia.
- Berdasarkan statistik dari Jabatan Perangkaan Malaysia (DOSM), pada Januari hingga Mei 2022, nilai eksport minyak sawit dan lain-lain produk berasaskan sawit Malaysia telah melonjak sebanyak 58.8% kepada RM56.47 bilion berbanding RM35.56 bilion untuk tempoh yang sama pada tahun 2021 berikutan harga minyak sawit yang tinggi. Kuantiti eksport minyak sawit dan lain-lain produk berasaskan sawit juga telah meningkat sebanyak 19.7% kepada 10.90 juta tan pada Januari hingga Mei 2022 berbanding 9.11 juta tan untuk tempoh yang sama pada tahun 2021 disebabkan permintaan yang meningkat dari negara-negara pengimpor seperti Mesir, Arab Saudi dan Turkey berikutan eksport minyak sawit Indonesia yang menyusut sebanyak 35.0% kepada 7.28

juta tan pada Januari-Mei 2022 berbanding 11.19 juta tan pada Januari-Mei 2021. Pengurangan ini disebabkan oleh polisi eksport Indonesia yang mengekang pengeksportan minyak sawit bagi memastikan bekalan yang mencukupi di dalam negara dan mengawal harga di pasaran tempatan.

- Permintaan untuk minyak sawit Malaysia dijangka akan terus kukuh walaupun terdapat persaingan dari Indonesia yang telah kembali membekalkan minyak sawit ke pasaran dunia. Ini berikutan ketersediaan bekalan minyak sayuran lain seperti minyak kacang soya dan minyak bunga matahari yang dijangka akan terus berkurangan sehingga hujung tahun ini.
- Pendapatan eksport minyak sawit dan lain-lain produk berdasarkan sawit Malaysia turut dijangka meningkat pada tahun 2022 kepada RM125 bilion berbanding RM108.52 bilion pada tahun 2021. Ini dijangka dapat membantu negara dalam menangani isu kegawatan global.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATO' MOHD NIZAR BIN HAJI ZAKARIA
[PARIT]**

SOALAN

DATO' MOHD. NIZAR BIN HAJI ZAKARIA [PARIT] minta **MENTERI KOMUNIKASI DAN MULTIMEDIA** menyatakan perancangan strategik yang telah dicapai menerusi kerjasama Suruhanjaya Komunikasi dan Multimedia (SKMM) bagi pencapaian penggunaan teknologi 4G dan memperluaskan penggunaan teknologi 5G bagi meningkatkan akses internet di luar bandar terutama di negeri Perak.

JAWAPAN

Tuan Yang di-Pertua,

Peratusan liputan 4G di kawasan berpenduduk di Negeri Perak telah meningkat kepada 96.79% pada suku pertama 2022 berbanding 94.71% sebelum pelaksanaan JENDELA.

Ketersediaan rangkaian 5G telah dicapai secara berperingkat bermula penghujung 2021 di sekitar Putrajaya, Cyberjaya dan Kuala Lumpur. Peluasan liputan perkhidmatan 5G diteruskan pada tahun 2022 ke kawasan lain di seluruh negara diteruskan dengan penyediaan lebih 4,000 tapak yang akan dibina di kawasan Lembah Klang dan bandar-bandar utama di Johor, Melaka, Negeri Sembilan, Perak, Pulau Pinang, Sabah dan Sarawak.

Pelaksanaan pembangunan rangkaian 5G di negeri Perak telah bermula pada suku kedua tahun 2022. Sebanyak 99 tapak 5G dirancang untuk dibangunkan di daerah Kinta. Sehingga 4 Julai 2022, sebanyak 10 tapak telah siap dibangunkan dan kerja-kerja pembangunan rangkaian 5G sedang giat dijalankan di negeri Perak.

Pihak Digital Nasional Berhad (DNB) telah menyasarkan sehingga 80% kawasan berpenduduk akan mendapat liputan 5G pada penghujung tahun 2024. Pelaksanaan yang pantas dan meluas ini akan mengurangkan risiko peluasan jurang digital dalam masyarakat. Peluasan liputan melebihi 80% kawasan berpenduduk akan dilaksanakan DNB pada tahun-tahun seterusnya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN MORDI BIMOL [MAS GADING]

SOALAN:

minta **PERDANA MENTERI** menyatakan jumlah penjawat awam dalam perkhidmatan awam Persekutuan yang berkhidmat di negeri Sarawak tanpa mengira gred serta jenis perkhidmatan dan apakah angka terperinci dari segi komposisi kaum dan negeri asal penjawat awam tersebut.

JAWAPAN**DI JAWAB OLEH YB DATUK DR ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

1. Berdasarkan status pengisian perjawatan di dalam Sistem HRMIS Jabatan Perkhidmatan Awam sehingga 5 Julai 2022, bilangan pegawai awam Persekutuan yang berkhidmat di Negeri Sarawak adalah seramai 90,901. Daripada jumlah tersebut hanya 11.6% iaitu 10,531 orang yang merupakan kelahiran luar dari Sarawak.
2. Data mengikut pecahan kaum dan negeri kelahiran pegawai adalah seperti berikut:

Negeri Kelahiran	PECAHAN KAUM								JUMLAH
	Melayu	Cina	India	Bumiputera		Orang Asli (Semenanjung)	Lain-lain	Tiada Maklumat	
				Sabah	S'wak				
Sarawak	26,359	13,558	159	54	39,579	1	658	2	80,370
Penjawat Awam Bukan Kelahiran Sarawak									
Sabah	308	145	5	1,136	156		287		2,037
Kelantan	1,281	40			41		14		1,376
Perak	795	174	85	4	165	8	4		1,235
Kedah	817	77	27		25	1	7		954
Johor	631	107	27	2	76		5		848
W.P Kuala Lumpur	434	138	86		72		11		741
Terengganu	573	16			2		3		594
Selangor	386	109	57	1	8	2	8		571
Pahang	452	36	17		55	2	6		568
Pulau Pinang	250	150	41	4	8		1		454
Melaka	253	72	13		74		5		417
Negeri Sembilan	224	64	26		19	1	3		337
Perlis	109	9	2		22		1		143
W.P Labuan	16	1	2	4	5		6		34
W.P Putrajaya	1								1
Lain-lain	103	33	1	3	72		4		216
Tiada Maklumat	3	1			1				5
Jumlah Penjawat Awam Bukan Kelahiran Sarawak	6,636	1,172	389	1,154	801	14	365	0	10,531
JUMLAH KESELURUHAN	32,995	14,730	548	1,208	40,380	15	1,023	2	90,901

**PEMBERITAHUAN PERTANYAAN BUKAN LISAN DEWAN
RAKYAT MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN MORDI BIMOL
[MAS GADING]**

SOALAN

Minta **PERDANA MENTERI** menyatakan dengan terperinci projek-projek yang telah dilaksanakan dan peratusannya di kawasan Mas Gading di bawah setiap Rancangan Malaysia dari Rancangan Malaysia Ke-9 hingga Rancangan Malaysia Ke-12 dan senaraikan projek-projek yang belum atau tidak dapat dilaksanakan dan sebab utamanya.

JAWAPAN

**DI JAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Status pelaksanaan projek pembangunan yang diluluskan bagi kawasan Parlimen Mas Gading di bawah Rancangan Malaysia Kesembilan (RMKe-9) hingga Rancangan Malaysia Kedua Belas (RMKe-12) adalah seperti berikut:

Bil	RMKe	Pra Pelaksanaan	Dalam Pelaksanaan	Pasca Pelaksanaan	Jumlah
1.	9	0	8	59	67
2.	10	0	6	24	30
3.	11	0	14	11	25
4.	12	11	1	11	23
Jumlah		11	29	105	145

2. Terdapat 11 projek dalam fasa Pra Pelaksanaan di peringkat pelbagai aktiviti. Status projek tersebut adalah seperti berikut:

Bil	Kementerian	Nama Projek	Peruntukan 2022 (RM)	Status Aktiviti
1.	KDN	PEMBINAAN POS DAN KUARTERS IMIGRESEN SERIKIN, BAU, SARAWAK	500,000.00	Pengesahan Brif Projek
2.	KPLB	MEMBINA JAMBATAN DI SUNGAI JANTAN, LUNDU, SARAWAK	50,000.00	Pengesahan Brif Projek
3.	KPLB	MEMBINA/ MENAIKTARAF JALAN KPG. SEGONG/ PIMUUNG	50,000.00	Pengesahan Brif Projek

NO SOALAN : 309

Bil	Kementerian	Nama Projek	Peruntukan 2022 (RM)	Status Aktiviti
		SINGAI KE KPG. JUGAN, BAU, BAHAGIAN KUCHING, SARAWAK		
4.	KPLB	JAMBATAN DI JALAN KPG. SUBOH, KPG. KAPAR, SINGAI, BAU, SARAWAK	500,000.00	Pelantikan Perunding
5.	KPLB	JAMBATAN SELAMPIT, BAU, SARAWAK	1,000,000.00	Rekabentuk telah siap
6.	KPLB	MENAIKTARAF JALAN KAMPUNG TANJUNG POTING/TANJUNG SANIBONG/TANJUN G BAWONG, BAU, KUCHING, SARAWAK	4,000,000.00	Rekabentuk telah siap
7.	KPLB	MEMBINA JALAN KPG. KENDAIE / SELAMPIT, LUNDU, BAHAGIAN KUCHING, SARAWAK	6,000,000.00	Pelantikan Perunding
8.	KPM	PEMBINAAN BARU TANDAS DI SEKOLAH KEBANGSAAN JAGOI DI DAERAH BAU, SARAWAK	1,000.00	Penyediaan Dokumen Tender
9.	KPM	PEMBINAAN GANTIAN PENUH 42 BILIK DARJAH, ASRAMA 300 PELAJAR (200L, 100P) DAN LAIN- LAIN KEMUDAHAN DI SMK LAKE, BAU, SARAWAK	7,000,000.00	Iklan Perolehan Tender

Bil	Kementerian	Nama Projek	Peruntukan 2022 (RM)	Status Aktiviti
10.	KPM	PEMBINAAN GANTIAN PENUH 18 BILIK DARJAH (PINDAH TAPAK) DAN (6 UNIT) RUMAH GURU DAN LAIN-LAIN KEMUDAHAN DI SEKOLAH KEBANGSAAN SUBA BUAN, BAU, SARAWAK	10,000,000.00	Iklan Perolehan Tender
11.	MINDEF	NAIK TARAF DAN PEMBINAAN UNIT LAPANG SASAR (ULS) SEMPADI, SARAWAK.	10,000,000.00	Pengesahan Brif Projek

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN MORDI BIMOL [MAS GADING]

SOALAN

TUAN MORDI BIMOL [MAS GADING] minta **PERDANA MENTERI** menyatakan apakah prosedur serta carta aliran bagi pelaksanaan projek infrastruktur Kerajaan Persekutuan yang telah diluluskan dalam Rancangan Malaysia untuk suatu kawasan Parlimen dari permulaan sehingga ke tarikh siap projek termasuk libat urus Kementerian, Kerajaan Negeri serta agensi pelaksana.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Dalam membuat pertimbangan ke atas permohonan projek-projek pembangunan Rancangan Malaysia, Kerajaan telah memperkenalkan pendekatan permohonan projek secara *Rolling Plan*. Melalui pendekatan ini, pihak Kementerian boleh mengemukakan permohonan projek sama ada projek baharu dan sambungan untuk pertimbangan Unit Perancang Ekonomi, Jabatan Perdana Menteri (EPU, JPM) pada setiap tahun. Bagi projek baharu, permohonan perlu dibuat berdasarkan keutamaan projek. Namun, kelulusan ke atas permohonan tersebut akan mengambil kira komitmen sedia ada dan kedudukan kewangan semasa Kerajaan.
2. Sebelum pihak Kementerian mengemukakan permohonan projek kepada EPU, JPM, pihak Kementerian perlu mengadakan perbincangan bersama Kerajaan Negeri terlebih dahulu bagi menentukan keutamaan projek di peringkat Negeri.
3. Seterusnya, pihak Kementerian akan menentukan keutamaan bagi setiap projek sebelum dimohon kepada EPU, JPM bagi tujuan kelulusan projek pada setiap *Rolling Plan*.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB TUAN MORDI ANAK BIMOL (MAS GADING)

SOALAN

TUAN MORDI BIMOL (MAS GADING) minta **MENTERI DALAM NEGERI** menyatakan berapa peruntukan penyelenggaraan yang disalurkan kepada Ibu Pejabat Polis Daerah (IPD) dan Balai Polis di kawasan Parlimen Mas Gading dari tahun 2018 sehingga tahun 2021. Apakah bentuk projek dan perbelanjaan yang telah dilaksanakan menerusi peruntukan tersebut.

JAWAPAN

Tuan Yang Di Pertua,

Kerajaan amat prihatin dan komited untuk menyediakan prasarana yang lebih baik kepada pegawai dan anggota Polis Diraja Malaysia (PDRM) dalam memastikan kebajikan, keselesaan dan keselamatan mereka dijamin.

Sejumlah RM505,000.00 peruntukan telah disalurkan kepada Ibu Pejabat Polis Daerah (IPD) dan Balai Polis di kawasan Parlimen Mas Gading dari tahun 2019 sehingga tahun 2021. Tiada peruntukan disalurkan bagi penyelenggaraan/pembaikan pada tahun 2018. Pada tahun 2019, sejumlah RM90,000.00 peruntukan telah disalurkan manakala pada tahun 2020 sejumlah RM215,000.00 dan pada tahun 2021 pula sejumlah RM200,000.00. Peruntukan disalurkan adalah melalui Peruntukan Mengurus (OE), Peruntukan Pembangunan (DE) dan Peruntukan Pemerkasa Tahun 2021.

Tuan Yang Dipertua,

Peruntukan yang disalurkan ini adalah bagi kerja-kerja pembaikan dan penyelenggaraan di Ibu Pejabat Polis Daerah (IPD) Bau dan Balai Polis Bau. Kerja-kerja yang dilaksanakan adalah kerja-kerja pembaikan am, pembaikan sistem penghawa dingin, pembaikan pendawaian elektrik serta penyelenggaraan saluran kumbahan bagi bangunan pentadbiran IPD dan balai polis, kuarters kediaman, stor barang kes dan lokap.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN MORDI BIMOL [MAS GADING]

SOALAN

YB TUAN MORDI BIMOL [MAS GADING] minta **MENTERI PERUMAHAN DAN KERAJAAN TEMPATAN** menyatakan jika ada penambahan peruntukan kepada Balai Bomba dan Penyelamat Bau bagi penyelenggaraan pili bomba di daerah Bau memandangkan ianya tidak mencukupi untuk penyelenggaraan 14 pili bomba di daerah Bau.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) sentiasa peka terhadap keperluan berkaitan penyelenggaraan peralatan kebombaan dalam memastikan ianya mampu berfungsi dengan baik seandainya berlaku sebarang insiden kebakaran atau kecemasan.

Berhubung isu yang dibangkitkan oleh Ahli Yang Berhormat, Kementerian melalui JBPM telah menyalurkan peruntukan bagi penyelenggaraan pili bomba kepada JBPM Negeri Sarawak berjumlah RM500,000.00 pada tahun 2022 berbanding peruntukan bagi tahun 2021 iaitu sebanyak RM321,000.00. Peruntukan sebanyak RM115,752.00 telah diagihkan ke Zon 1 Sarawak yang merangkumi kawasan Bau, Batu Lintang, Tabuan Jaya, Lundu dan Padungan bagi tujuan kerja-kerja penyelenggaraan kerosakan pili bomba. Peruntukan yang disalurkan di Zon 1 ini adalah lebih tinggi berbanding tahun 2021 iaitu sejumlah RM41,655.00. Kerja-kerja penyelenggaraan pili bomba di kawasan Bau melibatkan peruntukan sebanyak RM5,152.00 bagi tahun 2022.

Justeru, Kementerian melalui JBPM akan mengkaji dan mempertimbangkan pertambahan peruntukan pada tahun hadapan berdasarkan jumlah kerosakan pili bomba di daerah Bau.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN MUHAMMAD BAKHTIAR BIN
WAN CHIK (BALIK PULAU)**

SOALAN

TUAN MUHAMMAD BAKHTIAR BIN WAN CHIK (BALIK PULAU) minta **MENTERI TENAGA DAN SUMBER ASLI** menyatakan insentif buat pelancong asing yang menjalankan aktiviti sukarelawan apabila memasuki Taman Negara Pulau Pinang memandangkan fi yang kemasukan yang dikenakan terlalu tinggi.

JAWAPAN

Tuan Yang di-Pertua,

1. Untuk makluman Ahli Yang Berhormat, Taman Negara Pulau Pinang (TNPP) ditubuhkan pada 10 April 2003 dan merupakan satu-satunya Taman Negara yang diwartakan di bawah Akta Taman Negara 1980 [Akta 226]. Bagi memastikan kelestarian TNPP terus terpelihara, Kementerian Tenaga dan Sumber Asli (KeTSA) melalui Jabatan Perlindungan Hidupan Liar dan Taman Negara (PERHILITAN) telah menggubal Peraturan-Peraturan Taman Negara Pulau Pinang 2022 yang antaranya menggariskan peraturan-peraturan mengenai permohonan permit oleh pihak-pihak yang ingin memasuki TNPP dan kadar fi kemasukan.
2. Peraturan-Peraturan Taman Negara Pulau Pinang 2022 telah diwartakan pada 14 Januari 2022 (P.U.[A] 11) dan dikuatkuasakan pada 17 Januari 2022. Pada masa ini, Jabatan PERHILITAN masih dalam proses untuk mendapatkan kelulusan Kementerian Kewangan (MOF) bagi pelaksanaan bayaran fi serta hebahan kadar fi TNPP kepada masyarakat umum. Pengenaan kadar fi dijangka akan mula dikenakan sebelum akhir tahun ini selepas mendapat kelulusan MOF.
3. Kutipan fi masuk bertujuan untuk memupuk nilai konservasi alam semula jadi dan digunakan semula bagi tujuan konservasi TNPP. Kadar fi yang dikenakan adalah munasabah dan ditetapkan setelah melalui banyak sesi konsultasi dengan pihak berkepentingan sejak tahun 2017. Kadar fi bagi pelancong asing adalah seperti berikut:

JADUAL PERTAMA – FI KONSERVASI

	(1) Kategori Pelawat	(3) Bukan Warganegara (RM)
Bukan Masyarakat Setempat	Dewasa	50.00/orang
	Pelajar	20.00/orang
	Kanak-kanak (3-12 tahun)	15.00/orang
	Kanak-kanak (3 tahun ke bawah)	Percuma
	Warga Emas	Percuma
	OKU	Percuma

JADUAL KEDUA – FI AKTIVITI

Bil.	(1) Aktiviti	(3) Bukan Warganegara (RM)
1.	Profileman dan fotografi komersial	1,000.00/hari
2.	Kajian komersial	100.00/tahun
3.	Acara (per kumpulan)	1,000.00/hari
4.	Perkhemahan (per khemah)	15.00/malam
5.	Memancing (per rod)	10.00/masuk
6.	Titian Silara (a) Dewasa (b) Kanak-kanak (3-12 tahun) (c) Kanak-kanak (3 tahun ke bawah)	50.00/orang 20.00/orang Percuma

SOALAN NO : 313

4. KeTSA menyambut baik sebarang usaha murni oleh sukarelawan untuk menabur bakti bagi menjaga kelestarian TNPP. Walau bagaimanapun, ia tertakluk kepada syarat-syarat yang ditetapkan. Sukarelawan boleh mengemukakan permohonan secara rasmi kepada pihak pengurusan TNPP untuk pertimbangan selanjutnya.
5. Antara aktiviti sukarelawan yang boleh dilaksanakan di TNPP adalah seperti program tanam pokok (*tree planting*), pembersihan pantai (*beach cleaning*), pembersihan rentis (*trail cleaning*), pemasangan tanda arah dan pembaikan kemudahan pelancongan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN MUHAMMAD BAKHTIAR BIN
WAN CHIK [BALIK PULAU]**

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI PELANCONGAN, SENI DAN BUDAYA** menyatakan sama ada Kementerian bercadang untuk menambah baik kerjasama antaranya pihak penerbangan dalam usaha memulihkan subsektor pelancongan perubatan negara.

JAWAPAN

Tuan Yang di-Pertua,

1. Kementerian Pelancongan, Seni dan Budaya Malaysia (MOTAC) melalui Tourism Malaysia pada ketika ini banyak membentuk kerjasama dengan pelbagai pihak dalam mempromosikan Malaysia. Inisiatif ini turut meliputi kerjasama dengan syarikat-syarikat penerbangan tempatan mahupun antarabangsa. Antara syarikat penerbangan yang terlibat termasuklah Turkish Airlines, Emirates dan Qatar Airways.
2. MOTAC juga di dalam peringkat akhir memuktamadkan kerjasama untuk melaksanakan kerjasama promosi dengan beberapa syarikat-syarikat penerbangan lagi.
3. Melalui aktiviti promosi bersama yang telah dan akan dilaksanakan, ia akan turut menggalakkan syarikat-syarikat penerbangan tersebut untuk menambah kekerapan penerbangan ke Malaysia, atau menambah destinasi-destinasi penerbangan mereka yang menghubungkannya dengan beberapa bandar utama di Malaysia. Ini akan menggalakkan lagi kedatangan pelancong ke Malaysia, termasuk pelancong perubatan.
4. Antara bentuk kerjasama yang telah dan akan dilaksanakan bersama syarikat penerbangan ialah melalui perkongsian kos promosi seperti program Promosi Bersama (*Joint Promotion – JP*) antara Tourism Malaysia dengan syarikat penerbangan serta *Joint International Tourism Development Programme (JITDP)* yang melibatkan kerjasama di antara Tourism Malaysia, Malaysia Airport Holdings Berhad dan syarikat penerbangan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN MUHAMMAD BAKHTIAR BIN
WAN CHIK [BALIK PULAU]**

SOALAN

**TUAN MUHAMMAD BAKHTIAR BIN WAN CHIK [BALIK PULAU]
minta MENTERI PELANCONGAN, SENI DAN BUDAYA menyatakan :-**

- (a) senarai platform dan kesalinghubungan antara agensi bagi membantu usahawan kraf tempatan; dan
- (b) apakah data terkini kebolehcapaian produk kraf tempatan di peringkat global.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) menerusi Perbadanan Kemajuan Kraftangan Malaysia (Kraftangan Malaysia) telah melaksanakan pelbagai pelan tindakan bagi membangun dan memperkasakan usahawan kraf.
2. Antara platform yang dibangunkan oleh Kraftangan Malaysia melalui inisiatif pendigitalan kraf bagi membantu usahawan kraf tempatan adalah:

(i) E-Kraf Bazar (EKB)

- diperkenalkan pada 8 April 2020, inisiatif pemasaran dalam talian ini adalah untuk mempromosi dan memasarkan produk kraf tempatan dalam bidang tekstil, hasil rimba, hasil tanah, hasil logam dan aneka kraf menerusi platform *Facebook Group*.
- Sehingga 30 Jun 2022, seramai 17,725 orang telah berdaftar sebagai ahli EKB. Pada tahun 2022 sahaja, nilai jualan kraf yang dijana sehingga Jun 2022 adalah sebanyak RM11.5 juta melalui penglibatan 549 orang usahawan kraf.

(ii) MYCRAFTSHOPPE

- Platform yang dilancarkan pada 16 September 2021 ini menawarkan perkhidmatan jual-beli secara dalam talian (*online*) dan merupakan sebuah hab maklumat berkaitan industri kraf negara berkonsepkan *Global Reach Local Identity*.
- Sehingga 30 Jun 2022, platform ini berjaya menghimpunkan seramai 940 orang usahawan kraf dalam memasar dan mempromosikan sebanyak 29,003 *Stock Keeping Unit* (SKU) dengan nilai produk sebanyak RM7.6 juta.

(iii) CraftOnTheGo

- merupakan inisiatif pendigitalan secara geolokasi yang membolehkan pelancong dan orang awam mengakses terus ke lokasi usahawan melalui *Google Maps*.
- Aplikasi ini menyediakan perkhidmatan secara digital dalam bentuk *mobile app* kepada masyarakat bagi meningkatkan kebolehcapaian maklumat mengenai usahawan kraf di seluruh Malaysia. Sehingga 30 Jun 2022, seramai 1,464 orang usahawan kraf telah berdaftar di bawah COTG dan sebanyak 19,637 gambar produk telah dimuat naik menerusi aplikasi ini.

(iv) Google Arts and Culture (GAC)

- Google Arts and Culture (GAC) merupakan maklumat digital hasil kolaborasi antara Kraftangan Malaysia dan Google Malaysia bagi memastikan usaha-usaha pemeliharaan, pemuliharaan dan perlindungan produk kraf warisan diperkasakan.
- Kraftangan Malaysia berjaya memperkenalkan keunikan produk kraf warisan menerusi aplikasi GAC di bawah carian '*Kuala Lumpur Craft Museum*'. Sehingga kini, sebanyak 200 koleksi gambar produk berserta deskripsi telah dimuat naik dengan capaian sebanyak 38,651 views.

(v) Journify

- Kraftangan Malaysia telah menandatangani Memorandum Kerjasama bersama Malaysia Airlines Berhad (MAB) pada 4 April 2022 bagi mempromosi dan memasarkan produk kraf tempatan menerusi Journify. Kerjasama ini turut melibatkan Syarikat Pemasaran Karyaneka Sdn. Bhd. yang merupakan anak syarikat Kraftangan Malaysia sebagai rakan dagang terbaharu Journify.

SOALAN NO : 315

- Journify merupakan platform digital pelancongan dan gaya hidup sehenti milik Malaysia Aviation Group (MAG).

(vi) E-Dagang Karyaneka

- Selain mempunyai 10 *outlet* di seluruh Malaysia, Karyaneka turut memasarkan produk kraf tempatan melalui segmen E-Dagang yang merupakan pembelian secara dalam talian.
- Sehingga Jun 2022, E-Dagang Karyaneka mencatatkan jualan sebanyak lebih RM200 ribu.

3. Kraftangan Malaysia juga telah mewujudkan kerjasama dengan agensi-agensi lain bagi membantu usahawan kraf tempatan seperti:

(i) Institut Keusahawanan Negara (INSKEN)

Kursus Asas Perniagaan dan Keusahawanan serta Kursus Pengurusan Perniagaan anjuran INSKEN diberikan kepada usahawan dan komuniti kraf. Kursus-kursus ini meliputi latihan teknikal dalam menggunakan teknik '*close sales*' dan '*handling objection*' daripada prospek dan teknik kemahiran rundingan jualan serta penulisan *copywriting*.

(ii) Majlis Amanah Rakyat (MARA)

Taklimat mengenai Skim Pembiayaan Perniagaan yang ditawarkan oleh MARA kepada usahawan dan komuniti kraf dalam memastikan permohonan skim yang bersesuaian.

(iii) TEKUN Nasional

Usahawan dan komuniti kraf diberikan taklimat berkaitan inisiatif kemudahan Skim Pembiayaan Mikro yang ditawarkan oleh TEKUN. Menerusi taklimat ini, penerangan berkaitan proses permohonan dan penjadualan bayaran pinjaman serta kemudahan tawaran pembiayaan diberikan dalam membantu perniagaan usahawan kraf.

(iv) Pertubuhan Keselamatan Sosial (PERKESO)

Taklimat Skim Keselamatan Sosial Pekerjaan Sendiri (SKSPS) mengetengahkan faedah skim bencana pekerjaan yang disediakan oleh PERKESO kepada Orang Bekerja Sendiri (OBS) diberikan kepada usahawan dan komuniti kraf.

4. Untuk makluman, nilai jualan eksport barang kraf ke luar negara pada tahun 2021 ialah RM10.9 juta. Manakala bagi tahun 2022, sehingga 30 Jun 2022, nilai jualan eksport ke luar negara ialah RM4.7 juta. Antara produk kraf yang dieksport ke luar negara ialah produk seramik, tekstil batik, produk ukiran kayu dan produk kraf perak. Produk kraf ini dieksport ke negara seperti Singapura, Amerika Syarikat, Australia, Itali, China dan Jepun.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN MUHAMMAD BAKHTIAR BIN WAN
CHIK [BALIK PULAU]**

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI KANAN PENDIDIKAN** menyatakan langkah yang diambil bagi menangani isu 10,681 calon yang tidak menduduki SPM dan pelajar yang telah menamatkan persekolahan lebih awal agar angka ini dapat dikawal.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan pengurusan peperiksaan Sijil Pelajaran Malaysia (SPM) berjalan lancar dan teratur, termasuk aspek kehadiran calon berdaftar untuk menduduki peperiksaan.

Bagi SPM tahun 2021, seramai 10,681 calon berdaftar tidak hadir menduduki peperiksaan. Daripada jumlah tersebut, 9,037 orang atau 2.3 peratus adalah terdiri daripada calon sekolah KPM, calon sekolah agensi kerajaan, calon sekolah menengah agama negeri, calon sekolah swasta dan calon sekolah menengah agama rakyat manakala 1,644 orang atau 0.42 peratus lagi adalah calon persendirian.

Untuk makluman Ahli Yang Berhormat, KPM telah mengambil pendekatan proaktif dari peringkat awal bagi memastikan murid, termasuk calon SPM hadir ke sekolah dan seterusnya menduduki peperiksaan. Antara pendekatan yang telah diambil adalah seperti berikut:

- i. menyediakan perkhidmatan bimbingan dan sokongan psikososial melalui pelbagai kaedah seperti program motivasi, infografik pendidikan dan video inspirasi untuk meningkatkan motivasi murid untuk terus hadir ke sekolah. Sesi konsultasi antara Guru Bimbingan dan Kaunseling bersama-sama dengan guru mata pelajaran dan guru kelas dilaksanakan untuk mengenal pasti murid yang tidak mengikuti sesi pembelajaran. Intervensi berfokus dijalankan agar murid kembali ke sekolah dan berminat untuk mengikuti pembelajaran;
- ii. mengadakan perbincangan di antara pihak sekolah dengan ibu bapa/penjaga murid untuk mengenal pasti sebab dan langkah-langkah yang boleh diambil bagi menangani isu murid yang kurang berminat untuk belajar. Kerjasama ini penting untuk memastikan ibu bapa/penjaga murid dapat menyokong pembelajaran anak-anak semasa di rumah dan sekolah;

SOALAN NO : 316

- iii. melaksanakan intervensi murid risiko cicir pengajaran dan pembelajaran di peringkat jabatan pendidikan negeri (JPN) dan pejabat pendidikan daerah (PPD). Intervensi ini melibatkan Sektor Pengurusan Pembelajaran, Sektor Pengurusan Sekolah dan Sektor Pembangunan Murid. Intervensi ini juga melibatkan *focal person*, pelibatan Ibu Bapa, Komuniti dan Swasta (PIBKS) pada peringkat daerah dan negeri melalui aktiviti *outreach*;
- iv. menyediakan Garis Panduan Mengurus Murid Berisiko Cicir di sekolah sebagai rujukan JPN, PPD dan sekolah dalam mengendalikan isu murid cicir dengan sistematik, terancang dan berkesan. KPM telah membangunkan *Dashboard* Murid Berisiko Cicir bagi mengenal pasti murid berisiko cicir; dan
- v. menyediakan Manual Pengurusan Pencegahan dan Intervensi Murid Cicir: Serlahkan Keunggulan Diri (SUDI 2.0). Manual ini digunakan sebagai panduan kepada pihak sekolah untuk merancang dan menyediakan intervensi yang bersesuaian supaya murid kekal bersekolah sehingga tamat Tingkatan 5.

Untuk makluman Ahli Yang Berhormat, di sebalik usaha-usaha yang dilaksanakan oleh KPM, masih terdapat calon sekolah yang tidak menduduki peperiksaan SPM atas pelbagai faktor. Ini termasuk isu peribadi seperti tidak berminat untuk meneruskan persekolahan kerana telah bekerja.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN MUHAMMAD BAKHTIAR BIN WAN
CHIK (BALIK PULAU)**

SOALAN

TUAN MUHAMMAD BAKHTIAR BIN WAN CHIK (BALIK PULAU) minta **MENTERI DALAM NEGERI** menyatakan usaha Kementerian menangani isu hak proses permohonan kewarganegaraan yang berat sebelah seperti mana yang dikemukakan oleh Family Frontiers.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri (KDN) menghormati keputusan Mahkamah Tinggi pada 9 September 2021 berhubung isu ibu warganegara Malaysia yang berkahwin dengan lelaki bukan warganegara yang melahirkan anak di luar negara. Susulan itu, tindakan melaksanakan perintah tersebut telah dibuat oleh pihak Jabatan Pendaftaran Negara (JPN) dan permohonan yang diterima sedang diteliti dan diproses sewajarnya.

Setiap permohonan kewarganegaraan yang diterima oleh KDN melalui Jabatan Pendaftaran Negara (JPN) akan diproses dan diteliti dengan sewajarnya sebelum sesuatu keputusan dikeluarkan. Beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahteraan anak dan peraturan imigresen.

Penganugerahan kewarganegaraan Malaysia kepada individu bertaraf bukan warganegara merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum sebarang keputusan dikeluarkan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : **BUKAN LISAN**

DARIPADA : **DATUK SERI DR. MUJAHID BIN YUSOF RAWA [PARIT BUNTAR]**

TARIKH : **18 JULAI 2022 | ISNIN**

SOALAN

DATUK SERI DR. MUJAHID BIN YUSOF RAWA [PARIT BUNTAR] minta **PERDANA MENTERI** menyatakan usaha-usaha yang dilakukan oleh Kerajaan bagi menambah kuota haji Malaysia tahun 2022 setelah mengetahui pengurangan kuota haji Malaysia tahun 2022 berbanding tahun 2019.

JAWAPAN

**YB SENATOR DATUK HAJI IDRIS HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang Di-Pertua,

1. Untuk makluman Ahli Yang Berhormat, Kerajaan Arab Saudi telah menetapkan sejumlah 1 juta jemaah haji bagi tahun 2022 yang terdiri daripada 850 ribu jemaah luar negara dan 150 ribu warga negara dan rakyat tempatan.
2. Sehubungan itu, kuota rasmi haji bagi semua negara pada tahun ini telah ditetapkan pada 45 peratus daripada kuota asal. Kuota haji

Malaysia tahun 2022 adalah sebanyak 14,306 iaitu 45 peratus daripada kuota rasmi iaitu 31,600.

3. Malaysia akur dengan penetapan yang telah dibuat oleh Kerajaan Arab Saudi dengan mengambilkira situasi semasa wabak jangkitan Covid-19 di seluruh dunia yang masih belum pulih sepenuhnya. Kebenaran menunaikan haji pada tahun ini adalah satu berita baik buat umat Islam di Malaysia yang telah menunggu dua tahun dan ianya satu kesyukuran buat mereka yang telah terpilih.
4. Bagi tahun 1443 Hijrah, Kerajaan Malaysia telah membuat permohonan rasmi kepada Kerajaan Arab Saudi untuk mendapat kuota tambahan bagi membolehkan lebih ramai umat Islam menunaikan haji.
5. Usaha bagi membincangkan kuota tahun 1444 Hijrah juga telah dibuat di mana dua pertemuan dan perbincangan telah diadakan antara saya sebagai wakil Kerajaan Malaysia dan TYT Dr Tawfiq bin Fawzan Al-Rabiah, Menteri Haji dan Umrah Arab Saudi semasa Simposium Perdana Haji di Makkah dan semasa beliau melawat perkhemahan jemaah haji Malaysia di Mina pada musim haji yang baru lepas.
6. Namun, sebarang keputusan mengenai pemberian kuota rasmi mahupun kuota tambahan bagi musim haji tahun hadapan adalah tertakluk kepada kuasa mutlak Kerajaan Arab Saudi.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : JAWAB BUKAN LISAN

**DARIPADA : YB DATUK SERI DR. MUJAHID BIN YUSOF RAWA
[PARIT BUNTAR]**

SOALAN

Minta **PERDANA MENTERI** menyatakan jumlah kes pemalsuan logo halal Jakim yang berlaku pada tahun 2021 dan tahun 2022. Apakah pihak Kerajaan berhasrat menambah hukuman denda dan penjara lebih berat kepada pesalah kes pemalsuan logo halal Malaysia.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, berdasarkan undang-undang sedia ada, penggunaan logo halal Malaysia tanpa mempunyai Sijil Pengesahan Halal Malaysia (SPHM) yang sah merupakan satu kesalahan di bawah Akta Perihal Dagangan 2011 (APD 2011) yang dikuatkuasakan oleh Kementerian Perdagangan dalam Negeri dan Hal Ehwal Pengguna (KPDNHEP). Peruntukan undang-undang berkenaan menetapkan ia sebagai satu kesalahan yang boleh didenda sehingga RM100,000.00 atau penjara maksimum tiga tahun atau kedua-duanya bagi individu, atau sehingga RM200,000.00 bagi pertubuhan perbadanan.

2. Penguatkuasaan halal dilaksanakan berdasarkan peruntukan Akta Perihal Dagangan 2011 melalui tiga (3) Perintah yang dikeluarkan iaitu :

- (i) Perintah Perihal Dagangan 2011 (Takrif Halal) 2011;
- (ii) Perintah Perihal Dagangan 2011 (Perakuan dan Penandaan Halal) 2011; dan
- (iii) Perintah Perihal Dagangan 2011 (Fi Perakuan dan Penandaan Halal) 2011.

3. Oleh yang demikian, berdasarkan kepada peruntukan undang-undang tersebut, mana-mana individu yang membekal atau menawarkan makanan atau perkhidmatan dengan membuat apa-apa representasi atau perbuatan yang boleh memperdayakan atau mengelirukan bahawa makanan tersebut adalah halal atau boleh dimakan oleh orang Islam, maka ianya menjadi suatu kesalahan.

4. Perenggan 8 Perintah Perihal Dagangan (Perakuan dan Penandaan Halal) 2011 memperuntukkan penalti bagi kesalahan berkaitan penyalahgunaan logo halal atau ungkapan halal seperti berikut:

“8. Mana-mana orang yang—

- (a) *memperaku bahawa mana-mana makanan, barang-barang atau perkhidmatan yang berhubung dengan makanan atau barang-barang itu adalah halal; atau*
- (b) *membekalkan atau menawarkan untuk membekalkan apa-apa makanan, barang-barang atau perkhidmatan yang berhubung dengan makanan atau barang-barang itu, bertentangan dengan Perintah ini, melakukan suatu kesalahan dan boleh, apabila disabitkan—*
 - (a) *jika orang itu ialah suatu pertubuhan perbadanan, didenda tidak melebihi dua ratus ribu ringgit, dan bagi kesalahan yang kedua atau yang berikutnya, didenda tidak melebihi lima ratus ribu ringgit; atau*
 - (b) *jika orang itu bukan suatu pertubuhan perbadanan, didenda tidak melebihi satu ratus ribu ringgit atau dipenjarakan selama tempoh tidak melebihi tiga tahun atau kedua-*

duanya, dan bagi kesalahan yang kedua atau yang berikutnya, didenda tidak melebihi dua ratus lima puluh ribu ringgit atau dipenjarakan selama tempoh tidak melebihi lima tahun atau kedua-duanya.”

5. Pegawai di Jabatan Kemajuan Islam Malaysia (JAKIM) dan Majlis/ Jabatan Agama Islam Negeri-negeri (MAIN/ JAIN) telah dilantik oleh KPDNHEP sebagai Penolong Pengawal Perihal Dagangan untuk membantu menguatkuasakan undang-undang berkaitan halal di negara ini.
6. Berdasarkan maklumat yang diperolehi daripada Kementerian Perdagangan Dalam Negeri dan Hal Ehwal pengguna (KPDNHEP), jumlah kes yang berkaitan dengan penyalahgunaan logo halal Malaysia atau ungkapan halal, di bawah kesalahan Perenggan 8, Perintah Perihal Dagangan (Perakuan dan Penandaan Halal) 2011 bagi tahun 2021 adalah sebanyak 27 kes. Manakala pada tahun 2022 sehingga 12 Julai, sebanyak 17 kes direkodkan.
7. Dalam masa yang sama, bagi mencegah perlanggaran undang-undang berkaitan halal, JAKIM sentiasa komited menjalankan pemeriksaan-pemeriksaan berdasarkan aduan, pemeriksaan berkala ke atas premis yang bukan pemegang SPHM yang sah, dan pemeriksaan pemantauan ke atas pemegang SPHM. Dari tahun 2021 hingga Jun 2022, JAKIM telah menjalankan lebih 1400 pemeriksaan yang berkaitan.
8. Berhubung dengan persoalan mengenai cadangan untuk menambah hukuman yang lebih berat kepada mana-mana orang atau perbadanan yang menyalahguna atau memalsukan logo halal Malaysia, Kerajaan berpandangan bahawa hukuman yang sedia ada masih sesuai dengan situasi sekarang dan tiada keperluan untuk dipinda buat masa ini. Walau bagaimanapun, pihak Kerajaan akan membuat penelitian jika ada keperluan untuk menambah hukuman yang lebih berat pada masa akan datang.

9. Penggunaan undang-undang sedia ada seperti Akta Perihal Dagangan 2011 dan undang-undang subsidiari di bawahnya iaitu Perintah Perihal Dagangan (Perakuan dan Penandaan Halal) 2011 dan Perintah Perihal Dagangan (Takrif Halal) 2011 serta enakmen di negeri-negeri masih relevan dan memenuhi kehendak dan keperluan semasa.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB DATUK SERI DR. MUJAHID BIN YUSOF
RAWA (PARIT BUNTAR)**

SOALAN

DATUK SERI DR. MUJAHID BIN YUSOF RAWA (PARIT BUNTAR) minta **MENTERI DALAM NEGERI** menyatakan jumlah kes kemalangan yang melibatkan pemandu mabuk pada tahun 2021 dan 2022. Adakah berlaku pengurangan kes kemalangan melibatkan pemandu mabuk setelah Akta Pengangkutan Jalan Pindaan 2020 dikuatkuasakan.

JAWAPAN

Tuan Yang Di-pertua,

Statistik bagi kemalangan yang melibatkan pemandu yang memandu di bawah pengaruh alkohol bagi tahun 2021 dan 2022 adalah seperti dibawah:

TAHUN	MAUT	PARAH	RINGAN	KEMALANGAN ROSAK	JUMLAH KEMALANGAN
2021	21	18	14	100	153
2022 (Sehingga 25.05.2022)	12	10	9	61	92
JUMLAH	33	28	23	161	245

Bagi tahun 2021, sebanyak 153 kes kemalangan direkodkan melibatkan pemanduan di bawah pengaruh alkohol iaitu melibatkan sebanyak 21 kes maut, 18 kes kecederaan parah, 14 kes kecederaan ringan dan 100 kes kemalangan kerosakan.

Sebanyak 92 kes kemalangan direkodkan bagi tahun 2022 (Sehingga 25.05.2022) melibatkan pemanduan di bawah pengaruh alkohol iaitu 12 kes maut, 10 kes kecederaan parah, 9 kes kecederaan ringan dan 61 kes kemalangan kerosakan.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : JAWAB BUKAN LISAN

**DARIPADA : DATUK SERI DR. MUJAHID
BIN YUSOF RAWA [PARIT BUNTAR]**

SOALAN

Minta **Perdana Menteri** menyatakan bagaimanakah usaha Kerajaan menangani impak negatif yang sangat merugikan apabila para pendakwah dan ilmuan agama melakukan teguran dan kritikan sesama sendiri secara terbuka di media sosial tanpa menjaga adab-adab tertentu. Keadaan ini menjadi lebih parah apabila perlakunya balas-membalas terhadap pandangan dan kritikan tersebut.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, Kerajaan amat komited dan sentiasa berusaha memberikan pendedahan dan input secara teori mahupun amali kepada para pendakwah bagi melahirkan pendakwah yang mampu mempraktikkan strategi dan pendekatan dakwah yang berkesan sesuai dengan perkembangan semasa.
2. Para pendakwah dan ilmuan adalah duta agama yang berperanan dalam melebar risalah menyantuni ummah. Kerajaan juga telah

mengadakan beberapa sesi pertemuan dengan golongan pendakwah dan ilmuan Islam di antaranya ialah *Multaqa Daie* yang telah menghimpunkan para asatizah dalam negara ini. Program ini diadakan bertujuan untuk bertukar-tukar pandangan dan mengeratkan hubungan antara ulama dan umara ke arah Keluarga Malaysia Keluarga Sejahtera.

3. Selain itu, Kerajaan turut mengadakan sesi pertemuan bersama para ilmuan agama dan pendakwah selebriti bagi membincangkan kaedah yang sesuai untuk menjaga imej Islam dan golongan agamawan. Perhimpunan dan perjumpaan yang diadakan adalah merupakan salah satu medium yang diketangahahkan oleh pihak Kerajaan dalam menyampaikan mesej Kerajaan selain menjaga keharmonian dan nama baik golongan agamawan. Selain itu, pihak JAKIM juga telah mengaturkan beberapa siri pertemuan bersama para pendakwah seperti berikut:

- i. Usrah Anak Muda / 8 Feb 2022/ Matic KL
- ii. Usrah Anak Muda 2.0 / 26 Mei 2022/ Matic KL
- iii. Persidangan Ulama Asia Tenggara/ 30 Jun 2022/ Sunway Resort
- iv. Ijtimak Asatizah Malaysia 2022 anjuran YADIM /18 Jun/ Masjid Wilayah Persekutuan Kuala Lumpur

4. Di samping itu, JAKIM turut menyediakan pelbagai platform yang di siarkan melalui rancangan-rancangan agama di television. Ia bertujuan untuk memberikan teguran kepada semua pihak secara berhikmah melalui rangkaian program agama yang disiarkan di TV1 dan TV Okey. Antara program yang telah dan sedang dilaksanakan adalah Forum Perdana, Fikrah dan pelbagai lagi program agama yang bertujuan untuk menyatukan pendakwah serta memberi kefahaman kepada masyarakat.

5. Kerajaan melalui JAKIM juga telah menerbitkan bahan-bahan rujukan seperti penulisan artikel, poster dan memuatnaik status di media sosial bagi memberikan penjelasan terhadap kekeliruan sesuatu isu yang diperdebatkan dimedia sosial supaya masyarakat tidak

menyimpang daripada ajaran islam berdasarkan Ahli Sunnah wal-Jamaah.

6. Secara umumnya, sebagai pendakwah dan ilmuan islam yang memegang amanah dalam menyampaikan ajaran agama kepada masyarakat awam, adab dan disiplin ilmu perlu dijaga dengan sebaik mungkin. Ilmu yang disampaikan perlu mengambil kira realiti semasa dan keupayaan intelek masyarakat. Adab dalam menguruskan perbezaan pendapat dan perselisihan juga perlu diuruskan dengan baik, agar tidak menimbulkan keresahan dalam masyarakat yang akhirnya boleh menjaskan kesucian agama dan imej umat islam itu sendiri. Perkara ini bersesuaian dengan firman Allah dalam surah *An-Nahl* ayat 125 yang bermaksud:

“Serulah ke jalan Tuhan-mu dengan hikmah dan pelajaran yang baik dan debatlah mereka dengan cara yang baik.”

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK SERI DR. MUJAHID BIN YUSOF
RAWA [PARIT BUNTAR]**

SOALAN

DATUK SERI DR. MUJAHID BIN YUSOF RAWA [PARIT BUNTAR] minta **MENTERI KANAN PENDIDIKAN** menyatakan berapa perbezaan jumlah pelajar mengikut kaum yang gagal dalam subjek Sejarah berbanding pelajar yang gagal dalam subjek Bahasa Melayu dalam peperiksaan

Sijil Pelajaran Malaysia (SPM) tahun 2021. Apakah usaha Kementerian mengurangkan jumlah pelajar yang gagal dalam kedua-dua subjek tersebut.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan rekod Kementerian Pendidikan Malaysia (KPM), bilangan calon Sijil Pelajaran Malaysia (SPM) tahun 2021 yang gagal dalam mata pelajaran Bahasa Melayu adalah seramai 12,150 orang calon bersamaan dengan 3.2 peratus manakala, bagi mata pelajaran Sejarah pula seramai 39,470 orang calon bersamaan dengan 10.4 peratus.

KPM prihatin akan calon yang tidak lulus mata pelajaran Bahasa Melayu dan Sejarah. Justeru, bagi calon tersebut, mereka boleh menduduki peperiksaan SPM Ulangan (SPMU) yang dilaksanakan pada setiap tahun. SPMU menawarkan tiga mata pelajaran, iaitu Bahasa Melayu, Sejarah dan Matematik. Untuk tahun ini, SPMU akan dilaksanakan pada bulan September.

Selain daripada itu, calon juga boleh menduduki peperiksaan SPM sebagai calon persendirian pada tahun-tahun berikutnya. Keputusan peperiksaan ini boleh digabungkan dalam satu sijil peperiksaan sahaja melalui perkhidmatan *patching* sijil peperiksaan SPM. Calon yang telah memperoleh sijil SPM kali pertama mulai tahun 2009 layak untuk memohon perkhidmatan ini. Dengan cara ini, calon masih berpeluang untuk mendapatkan sijil SPM atau memperbaiki keputusan mereka.

Untuk makluman Ahli Yang Berhormat, bagi membantu calon menguasai mata pelajaran Bahasa Melayu dalam peperiksaan SPM, KPM telah melaksanakan Inisiatif Pemartabatan Pendidikan Bahasa Melayu. Melalui inisiatif tersebut, pelbagai program seperti Program Bijak Bahasa Melayu, Program Interaktif Bahasa Melayu, Program Pembelajaran Berasaskan Projek dan Program Kecemerlangan Bahasa Melayu SPM dijalankan.

Khusus bagi membantu calon menguasai mata pelajaran Sejarah dalam peperiksaan SPM, KPM memastikan kualiti pedagogi dan pengetahuan guru mata pelajaran Sejarah sentiasa dipertingkatkan melalui pembangunan profesionalisme yang berterusan. Di samping itu, KPM juga menyediakan pelbagai bahan sokongan dalam bentuk bercetak dan digital. Bahan yang boleh diakses melalui pelantar DELIMA dan repositori SumberKU adalah termasuk:

- i. nota komprehensif bagi setiap bab yang merangkumi ringkasan bab, nota penuh, latihan Kemahiran Berfikir Aras Tinggi (KBAT) berbentuk esei pendek, latihan objektif dan latihan struktur;
- ii. latihan pengukuhan bagi setiap bab yang lebih komprehensif merangkumi ringkasan bab, latihan KBAT (Esei Pendek), latihan objektif dan latihan struktur;
- iii. Modul Latihan Objektif Berpandu untuk mata pelajaran Sejarah bagi setiap bab Tingkatan 4 dan Tingkatan 5 berserta skema jawapan; dan
- iv. Modul Lonjakan SPM Sejarah merangkumi set soalan berformatkan SPM berserta skema jawapan.

Selain itu, KPM turut melaksanakan pelbagai usaha bagi meningkatkan penguasaan dan pencapaian murid dalam mata pelajaran Bahasa Melayu dan Sejarah seperti berikut:

- i. melaksanakan intervensi yang bersesuaian bagi murid dan calon SPM 2022 yang berprestasi rendah dalam mata pelajaran Bahasa Melayu dan Sejarah;
- ii. membimbing guru mata pelajaran Bahasa Melayu dan Sejarah daripada sekolah menengah terpilih dengan kerjasama *School Improvement Special Coach* bagi meningkatkan kualiti pengajaran dan pembelajaran (PdP);
- iii. memperkasa peranan Ketua Panitia di sekolah menengah terpilih yang memerlukan intervensi;
- iv. memperkasa peranan Guru Bimbingan dan Kaunseling di

SOALAN NO : 322

sekolah terpilih yang memerlukan intervensi bagi mengenal pasti murid yang memerlukan pendekatan pemulihan dan pengukuhan; dan

- v. melaksanakan intervensi berfokus kepada murid berprestasi rendah dalam mata pelajaran Bahasa Melayu dan Sejarah bagi menarik minat mereka terhadap kedua-dua mata pelajaran tersebut.

KPM akan terus mengukuhkan usaha dalam melaksanakan intervensi khusus bagi meningkatkan minat dan pemahaman murid dalam mata pelajaran Bahasa Melayu dan Sejarah.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : DATO' SERI UTAMA HAJI MUKHRIZ BIN TUN DR. MAHATHIR [JERLUN]

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI KOMUNIKASI DAN MULTIMEDIA** menyatakan apakah tahap keberkesanan Jabatan Perlindungan Data Peribadi dalam menjaga data peribadi rakyat. Mengapa tiada laporan berkenaan pencerobohan data, dapatan hasil siasatan, siapa penceroboh yang dikenalpasti, dan apa langkah-langkah mitigasi yang diambil oleh Kementerian untuk memperketatkan perlindungan data peribadi rakyat.

JAWAPAN

Tuan Yang di-Pertua,

Kementerian Komunikasi dan Multimedia Malaysia (K-KOMM) melalui Jabatan Perlindungan Data Peribadi (JPDP) sentiasa bekerjasama dengan agensi Kerajaan yang lain seperti Agensi Keselamatan Siber Negara (NACSA) serta Polis Diraja Malaysia (PDRM) untuk menangani insiden kebocoran data. JPDP bertanggungjawab mengawal selia pemprosesan data peribadi dalam transaksi komersial berdasarkan bidang kuasa yang termaktub di bawah Akta Perlindungan Data Peribadi 2010 [Akta 709].

Walaupun Akta 709 tidak terpakai untuk Kerajaan Persekutuan dan Kerajaan Negeri, Agensi Keselamatan Siber Negara (NACSA) di bawah Majlis Keselamatan Negara (MKN) adalah tanggungjawab untuk mengawal selia data Kerajaan yang merupakan Infrastruktur Maklumat Kritikal Nasional (*critical national information infrastructure - CNII*) melalui Arahan MKN 26. Dalam hal ini, insiden kebocoran data yang berunsurkan jenayah akan dirujuk kepada NACSA dan Polis Diraja Malaysia (PDRM).

Bagi transaksi komersial, kegagalan mematuhi prinsip-prinsip di bawah Akta Perlindungan Data Peribadi 2010 [Akta 709], jika disabitkan kesalahan, boleh membawa kepada denda tidak melebihi RM500,000 atau hukuman penjara tidak melebihi tiga tahun atau kedua-duanya sekali.

Pelbagai program *outreach* seperti Persidangan Perlindungan Data Peribadi, webinar, sesi konsultasi dan khidmat nasihat serta program kolaborasi di serata negara giat dilaksanakan termasuklah program di kawasan luar bandar bagi mendidik usahawan-usahawan tempatan untuk meningkatkan kefahaman mengenai kepentingan melindungi data peribadi.

Suruhanjaya Komunikasi dan Multimedia Malaysia (SKMM) juga mengeluarkan nasihat awam mengenai ancaman-ancaman terbaru yang perlu diberikan perhatian oleh orang ramai dan melaksanakan program

advokasi dan kesedaran pengguna. Antaranya seperti memastikan ciri-ciri keselamatan seperti menggunakan kata laluan yang sukar dibuka dan mengaktifkan pengesahan dua langkah (*2-Factor Authentication*).

JPDP juga turut melibatkan pihak industri dalam membangunkan Kod Tata Amalan (KTA) Perlindungan Data Peribadi yang perlu dipatuhi oleh pihak industri bagi memastikan kebolehlaksanaan dan kelancaran prosedur berkaitan pemprosesan data peribadi terutama dari sudut perundangan sedia ada satu-satu sektor dan seterusnya menjamin keselamatan data tersebut.

Pemeriksaan ke atas sistem data peribadi pengguna data seperti yang diperuntukkan di bawah Seksyen 101 dan Seksyen 48 Akta 709 juga dilaksanakan oleh JPDP selain menjalinkan kerjasama erat dengan agensi Kerajaan yang berkepentingan seperti NACSA dan PDRM bagi melaksanakan penguatkuasaan dan siasatan berterusan ke atas kes-kes kebocoran dan penjualan data peribadi.

Selain itu, laporan tahunan JPDP diterbitkan setiap tahun sejak 2014. Laporan keseluruhan dimuat naik di laman sesawang rasmi JPDP untuk kebolehcapaian umum. Laporan tersebut turut dicetak dan diedarkan kepada semua Kementerian.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' SERI UTAMA HAJI MUKHRIZ BIN TUN
DR. MAHATHIR [JERLUN]**

SOALAN

**DATO' SERI UTAMA HAJI MUKHRIZ BIN TUN DR. MAHATHIR
[JERLUN]** minta **MENTERI ALAM SEKITAR DAN AIR** menyatakan apakah perkembangan terkini berkenaan dengan migrasi negeri Kedah ke Pengurusan Aset Air Berhad. Adakah sudah dimuktamadkan pemindahan aset air Kedah sepenuhnya, dan berapa jumlah hutang berkaitan prasarana air dari Kedah yang telah dimaafkan oleh Kerajaan Persekutuan.

JAWAPAN

Tuan Yang Di-Pertua,

1. Penstrukturian semula industri perkhidmatan bekalan air Negeri Kedah telah dimuktamadkan pada 4 Mac 2021. Melalui penstrukturian ini, Kerajaan Persekutuan bersetuju melaksanakan hapus kira pinjaman bekalan air luar bandar berjumlah RM698.99 juta. Langkah ini telah mengurangkan pinjaman bekalan air Kerajaan Negeri Kedah daripada RM1.82 bilion kepada RM1.12 bilion. Baki pinjaman sebanyak RM1.12 bilion diambil alih oleh Pengurusan Aset Air Berhad (PAAB) dan pembayaran balik baki pinjaman air ini dilakukan melalui bayaran sewa pajakan yang dikenakan kepada Syarikat Air Darul Aman Sdn. Bhd. (SADA).
2. Sebagai melaksanakan aturan ini, Kerajaan Negeri Kedah perlu memindah milik aset air berjumlah RM1.12 bilion kepada PAAB untuk tempoh masa 45 tahun. Aset air ini akan dipajak kepada SADA untuk tempoh masa yang sama. Aset air ini akan diserahkan kembali kepada Kerajaan Negeri Kedah setelah baki pinjaman Kerajaan Persekutuan dijelaskan.
3. Pemberi milikan aset-aset air Negeri Kedah kepada PAAB perlu dilaksanakan mengikut terma serta syarat-syarat yang telah dipersetujui dalam Perjanjian - perjanjian Penstrukturian Semula Industri Perkhidmatan Bekalan Air Negeri Kedah. Proses beri milik sebanyak 53 tapak tanah sistem bekalan air melibatkan sejumlah 66 aset air kepada PAAB adalah di peringkat akhir untuk kelulusan Majlis Mesyuarat Kerajaan Negeri Kedah.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

SOALAN

Dato' Seri Utama Haji Mukhriz bin Tun Dr. Mahathir [Jerlun] minta **MENTERI LUAR NEGERI** menyatakan mengapa masih ramai Duta Besar belum dilantik untuk ditugaskan di negara-negara asing termasuk di negara yang penting dari segi hubungan ekonomi dan politik. Tidakkah ada pegawai-pegawai yang layak dari kalangan Kor Diplomatik Wisma Putra. Adakah amalan sekarang ialah untuk mengenepikan diplomat untuk dilantik orang politik ke jawatan-jawatan penting itu.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Jerlun atas pertanyaan yang dikemukakan.

2. Untuk makluman Dewan yang mulia ini, Malaysia kini mempunyai sebanyak 107 buah pejabat Perwakilan Diplomatik Malaysia yang aktif di seluruh dunia. Pejabat-pejabat Perwakilan ini diketuai oleh Ketua-ketua Perwakilan yang bertaraf Duta Besar, Pesuruhjaya Tinggi, Wakil Tetap, Konsul Jeneral, Konsul serta Presiden Pusat Persahabatan dan Perdagangan.

3. Daripada keseluruhan bilangan pejabat Perwakilan Malaysia tersebut, terdapat sebanyak dua puluh enam (26) jawatan Ketua Perwakilan bertaraf Duta Besar, Pesuruhjaya Tinggi dan Konsul Jeneral yang masih belum diisi. Kementerian Luar Negeri telah membuat

perancangan strategik dan pelan penggantian (*succession plan*) bagi menempatkan pegawai yang bersesuaian dan berkelayakan dari segi kekanan dalam perkhidmatan, pengalaman dan kompetensi bagi mengisi jawatan-jawatan tersebut.

4. Pada 12 Julai 2022 yang lalu, satu Istiadat Penerimaan Watikah Pelantikan dan Majlis Menghadap oleh bakal Ketua-ketua Perwakilan Malaysia ke luar negara yang baharu ke atas Kebawah Duli Yang Maha Mulia Seri Paduka Baginda Yang di-Pertuan Agong telah berlangsung di Istana Negara. Pelantikan ini melibatkan empat (4) orang Ketua Perwakilan Malaysia ke luar negara yang merupakan Pegawai-pegawai Kanan Kementerian Luar Negeri, sebagai Duta Besar ke Jepun, Republik Korea, Arab Saudi dan Republik Islam Iran.

5. Kementerian Luar Negeri mengambil maklum dan melihat dengan serius akan isu kekosongan Ketua Perwakilan yang masih belum diisi. Antara lain, proses pengisian jawatan tersebut sedikit sebanyak telah terjejas semasa tempoh penularan pandemik COVID-19 yang mana bilangan pelantikan atau pertukaran terpaksa dihadkan atas beberapa faktor berkaitan seperti penutupan sempadan disebabkan isu keselamatan. Lanjutan itu, Kementerian Luar Negeri ingin menyatakan komitmen untuk menyegerakan proses pengisian kekosongan jawatan Ketua Perwakilan sedia ada.

6. Lazimnya, proses pemilihan calon Ketua-ketua Perwakilan Malaysia ke luar negara ini dilaksanakan melalui dua (2) kaedah, iaitu : i) pelantikan pegawai berkarier diplomatik; atau ii) secara lantikan politik dari kalangan individu yang bukan berkarier diplomatik, termasuk ahli politik, bekas pegawai kanan Kerajaan, atau mana-mana individu yang mempunyai kepakaran dan kelayakan untuk dilantik sebagai Ketua Perwakilan. Calon-calon yang dikenal pasti tersebut hendaklah melepassi tapisan keutuhan oleh Suruhanjaya Pencegahan Rasuah Malaysia (SPRM) bagi memastikan mereka bebas daripada isu-isu integriti.

7. Pegawai berkarier diplomatik yang dilantik sebagai Duta Besar/ Pesuruhjaya Tinggi kebiasaannya terdiri daripada pegawai di Kementerian Luar Negeri yang berkhidmat sekurang-kurangnya selama

20 tahun dan mempunyai pengalaman ditempatkan di beberapa Pejabat Perwakilan di luar negara. Ia juga berdasarkan ketetapan minimum perjawatan Duta Besar/ Pesuruhjaya Tinggi mengikut negara adalah pada Gred M54 (setara dengan jawatan Setiausaha Bahagian di Kementerian).

8. Selain itu, Kerajaan pada hari ini melihat bahawa pelantikan Ketua Perwakilan secara lantikan politik merupakan langkah yang boleh dipertimbangkan. Antara faktor yang diambil kira ialah kebolehan calon tersebut menjalankan hubungan rapat dengan ahli badan legislatif serta memahami sistem politik di negara penerima (*receiving state*).
9. Pelantikan Ketua Perwakilan secara lantikan politik bukanlah suatu perkara asing yang mana ia telahpun dilaksanakan sejak beberapa tahun dahulu melibatkan beberapa Ahli Parlimen, bekas Menteri dan bekas pegawai kanan Kerajaan. Pelantikan tersebut merupakan satu langkah strategik bagi mengetengahkan agenda dan kepentingan negara dalam keadaan tertentu.
10. Ingin dijelaskan di sini bahawa pencalonan secara lantikan politik perlu mendapatkan persetujuan kolektif daripada Ahli Jemaah Menteri sebagai kriteria utama, sebelum proses pencalonan dilaksanakan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATO' SERI UTAMA HAJI MUKHRIZ
BIN TUN DR. MAHATHIR (JERLUN)**

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI SUMBER MANUSIA** menyatakan mengapa Syarikat Bestinet Sdn Bhd yang mempunyai kepentingan di dalam industri tenaga kerja melalui pegangan saham JR Joint Resources diberikan kontrak Sistem Pengurusan Pekerja Asing bernilai berbilion Ringgit tanpa melalui tender terbuka. Tidakkah tindakan ini akan memberi kelebihan yang tidak adil kepada JR Joint Resources untuk mengawal industri pembekalan pekerja asing ke Malaysia.

JAWAPAN

Tuan Yang di-Pertua,

Kerajaan telah menandatangani Surat Setuju Terima pada 12 Januari 2018 bagi pembangunan sistem holistik *Foreign Workers Centralized Management System* (FWCMS) oleh Syarikat Bestinet Sdn. Bhd. Kabinet telah bersetuju dengan pembangunan FWCMS sebagai sebuah sistem holistik bagi pengurusan pekerja asing secara dalam talian. Kabinet juga telah bersetuju supaya semua aspek pengambilan seperti permohonan, kelulusan dan pemantauan pekerja asing dari negara sumber menggunakan sistem sedia ada iaitu FWCMS.

Sehubungan itu, platform FWCMS akan berfungsi sebagai satu platform holistik bagi urusan penggajian pekerja asing. Manakala bagi aspek pengurusan dan proses permohonan penggajian pekerja asing adalah di bawah Kementerian Sumber Manusia dengan kerjasama agensi kawal selia yang berkaitan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATO' SERI UTAMA HAJI MUKHRIZ
BIN TUN DR. MAHATHIR (JERLUN)**

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI SUMBER MANUSIA** menyatakan bagaimana 25 syarikat telah dipilih untuk menguruskan kemasukan warga Bangladesh untuk bekerja di Malaysia. Adakah proses tender terbuka dilaksanakan. Apa syor yang boleh diberikan agar kes rasuah yang melibatkan pegawai Kerajaan dalam mengurus kemasukan pekerja asing ini tidak berulang lagi.

JAWAPAN

Tuan Yang di-Pertua,

Umum mengetahui bahawa pelaksanaan MoU baharu dengan Bangladesh adalah berbeza dengan MoU yang dimeterai pada tahun 2016. Sebelum ini, agensi pekerjaan Bangladesh yang dibenarkan dan dipersetujui oleh kedua-dua negara adalah sebanyak 10 agensi dan yang terbaharu, jumlah ini ditingkatkan kepada 25 agensi.

Didalam MoU ini, kedua-dua kerajaan telah setuju supaya Kerajaan Bangladesh mengemukakan senarai *Bangladeshi Recruitments Agency* sebanyak 1520 dan Kerajaan Malaysia boleh memilih daripada senarai tersebut. Kabinet juga bersetuju penggunaan 25 ejen sebagai penuduh cara dan senarai tersebut boleh ditambah dari masa ke masa mengikut keperluan kedua-dua negara bagi memastikan kelancaran proses kemasukan pekerja asing dari Bangladesh. Kementerian juga telah menujuhkan satu jawatankuasa pemilihan dan telah memilih *Bangladeshi Recruitments Agency* berdasarkan kriteria-kriteria yang telah ditetapkan.

Cadangan membenarkan hanya 25 agensi pekerjaan ini adalah untuk memudahkan Kerajaan memantau hak, kebijakan dan perlindungan ke atas pekerja asing yang dibawa masuk menerusi 25 agensi tersebut. Selain itu, untuk mengelakkan negara ini menjadi lambakan pekerja asing dan timbul isu buruh paksa. Saya yakin kaedah penetapan agensi ini dapat membantu pengurusan penggajian pekerja asing negara lebih cekap dan kemas.

Bagi memastikan tahap integriti tinggi di kalangan pegawai, Kementerian telah menyediakan garis panduan mengenai pengendalian *One Stop Centre*. Kerajaan juga akan sentiasa mengambil langkah proaktif bekerjasama dengan pihak berwajib dari aspek pemantauan bagi memastikan tiadanya ketirisan berlaku di kalangan penjawat awam dalam pengurusan penggajian pekerja asing di negara ini.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN NGA KOR MING [TELUK INTAN]

SOALAN

TUAN NGA KOR MING [TELUK INTAN] minta **MENTERI ALAM SEKITAR DAN AIR** menyatakan apakah kedudukan terkini semua projek tebatan banjir di kawasan Parlimen Teluk Intan dan mengapa Kementerian tidak menjemput ahli Parlimen untuk memberi maklum balas serta menyampaikan suara rakyat dalam penyediaan reka bentuk projek-projek rancangan awam tersebut.

JAWAPAN

Tuan Yang Di-Pertua,

1. Untuk makluman YB, Kementerian melalui Jabatan Pengairan dan Saliran (JPS) sedang melaksanakan Projek Pembangunan Lembangan Sungai Bersepadu (PLSB) Sungai Perak Fasa 1 di mana Rancangan Tebatan Banjir (RTB) Teluk Intan Zon A Fasa 2 merupakan salah satu daripada komponen projek tersebut. Projek ini dalam peringkat penyediaan reka bentuk terperinci dengan anggaran kos sebanyak RM80 juta. Projek ini dijangka akan dibuat proses perolehan dalam suku ketiga tahun 2023.
2. Setiap projek akan melalui sesi libat urus bersama pemegang taruh di mana ahli parlimen, agensi-agensi berkuasa tempatan dan wakil penduduk akan dijemput untuk diberi penerangan selepas pemilihan reka bentuk dibuat. Sesi ini akan meneliti dan membuat pertimbangan ke atas setiap ulasan yang diberikan oleh jemputan.
3. Untuk makluman YB juga, RTB Teluk Intan Zon A Fasa 1 telah siap dibina pada 18 April 2019.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS
DARIPADA : TUAN NGA KOR MING [TELUK INTAN]

SOALAN

TUAN NGA KOR MING minta **MENTERI KESIHATAN** menyatakan secara teliti apakah rancangan konkrit yang akan diambil oleh Kementerian untuk menyelesaikan masalah kekurangan tempat letak kereta di Hospital Besar Teluk Intan serta keperluan untuk membina theater pusat operasi yang baru.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa berusaha untuk mempertingkatkan kualiti penyampaian perkhidmatan kesihatan kepada masyarakat di seluruh negara termasuk daerah Teluk Intan, Perak. Hospital Teluk Intan merupakan sebuah hospital berpakar major, berkapasiti 548 katil dengan kelengkapan 6 dewan bedah. Kadar penggunaan katil hospital ini adalah 50% (2021).
2. Oleh yang demikian, pembinaan sebuah blok tambahan / theater pusat operasi baru adalah tidak mendesak dan memerlukan penelitian memandangkan hospital ini masih berupaya menampung keperluan penduduk.

Tuan Yang di-Pertua,

3. KKM sedia maklum mengenai isu tempat letak kereta di hospital-

SOALAN NO. 329

hospital KKM. Namun demikian, memandangkan peruntukan yang terhad, keutamaan KKM pada masa ini adalah kepada keperluan penyediaan perkhidmatan penjagaan Kesihatan dan perubatan berbanding penyediaan kemudahan tempat letak kereta di hospital. Oleh yang demikian, KKM sentiasa mengalu-alukan cadangan daripada syarikat swasta untuk mengadakan kerjasama bagi menyediakan tempat letak kereta tambahan di semua hospital KKM termasuk Hospital Teluk Intan.

4. Pada masa ini, jumlah TLK yang tersedia adalah sebanyak 695 lot di Hospital Teluk Intan. Bagi menangani masalah kekurangan tempat letak kereta (TLK), KKM menggalakkan orang awam menggunakan perkhidmatan *e-hailing*. Di samping itu, terdapat tambahan TLK sedia ada di Hospital Teluk Intan yang telah disediakan melalui projek berskala kecil bagi menampung anggaran 500 kenderaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN NGA KOR MING [TELUK INTAN]

SOALAN

TUAN NGA KOR MING minta **MENTERI KESIHATAN** menyatakan secara teliti berapa jumlah peruntukan akan diberi kepada projek pembinaan Hospital UTAR Kampar dan berapa jumlah peruntukan akan diberi untuk pembinaan hospital Kerajaan di daerah Kampar.

JAWAPAN

Tuan Yang di-Pertua,

1. Hospital UTAR bukannya hospital di bawah Kementerian Kesihatan Malaysia (KKM). Hospital ini merupakan milikan penuh oleh UTAR *Education Foundation* iaitu sebuah institusi bukan berdasarkan keuntungan dan pembinaan hospital tersebut ditanggung sepenuhnya oleh pihak UTAR. Kementerian Kesihatan Malaysia (KKM) dimaklumkan bahawa Hospital UTAR dijangka akan mula beroperasi secara berfasa dari awal tahun 2023.
2. Untuk makluman Yang Berhormat, sehingga kini Kementerian Kesihatan Malaysia (KKM) masih belum dapat memuktamadkan tapak cadangan bagi pembinaan Hospital Kampar yang baharu. Tapak-tapak yang dicadangkan sebelum ini tidak sesuai untuk dibangunkan projek berkenaan kerana merupakan bekas tanah lombong yang berpaya dan berpasir yang akan memberikan implikasi yang besar kepada kos pembinaan dan penyenggaraan kelak.

SOALAN NO. 330

3. KKM telah memohon kerjasama Kerajaan Negeri Perak bagi membantu mengenal pasti tapak yang sesuai dan akan mengemukakan permohonan bagi pelaksanaan projek ini di bawah *Rolling Plan* akan datang selepas urusan pemilihan tapak dan pemilikan tanah selesai bergantung kepada keperluan pada masa tersebut.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB TUAN NGA KOR MING (TELUK INTAN)

SOALAN

TUAN NGA KOR MING (TELUK INTAN) minta **MENTERI DALAM NEGERI** menyatakan jumlah bilangan :-

- (a) stateless children dalam negara kita dan jumlah kanak-kanak yang dilahirkan oleh ibu warganegara Malaysia tetapi bapa warga asing yang masih menunggu kerakyatan; dan
- (b) langkah-langkah yang perlu dilakukan oleh Kerajaan untuk menyelesaikan masalah tersebut di atas.

JAWAPAN

Tuan Yang Di Pertua,

Untuk makluman Ahli Yang Berhormat, istilah *stateless* secara umumnya adalah merujuk kepada seseorang pada masa ini ialah “**seseorang yang tidak bernegara**” iaitu beliau tidak memiliki kewarganegaraan mana-mana Negara. Berdasarkan kepada istilah tersebut, **tiada golongan yang berstatus *stateless* di Malaysia, ini kerana tanpa dokumen perjalanan yang sah mereka tidak akan dibenarkan masuk ke negara ini.**

Dalam hal ini, bagi mereka yang berada dalam negara, Kementerian Dalam Negeri (KDN) melalui Jabatan Pendaftaran Negara (JPN) hanya akan merekodkan status sama ada seseorang individu sebagai **warganegara** atau **bukan warganegara** sahaja berdasarkan kepada status perkahwinan dan taraf kewarganegaraan ibu bapa kandung individu berkenaan sewaktu kelahiran berlaku. Sehubungan itu, JPN **tidak merekodkan individu yang tidak memiliki taraf kewarganegaraan (*stateless*)** dan JPN tidak mempunyai maklumat mengenai jumlah kanak-kanak yang tiada kerakyatan (*stateless*).

Berdasarkan rekod JPN, sebanyak **2,484 permohonan** kewarganegaraan yang diterima bagi individu di bawah umur 21 tahun yang dilahirkan di luar negara oleh ibu bertaraf warganegara yang berkahwin dengan bapa bertaraf bukan warganegara dari tahun 2017 hingga 30 Jun 2022. Dari jumlah berkenaan, sebanyak **2,332 permohonan** yang masih diproses.

KDN dan JPN sentiasa berusaha dan mengambil tindakan proaktif membantu menyelesaikan masalah masyarakat khususnya mengenai isu pendaftaran dokumen pengenalan diri **individu yang berkelayakan** dengan mengadakan pelbagai program turun padang dan khidmat nasihat berterusan yang dilaksanakan oleh Jabatan seperti Program Menyemai Kasih Rakyat (MEKAR) JPN, Program Aspirasi Keluarga Malaysia dan Program Kita Demi Negara.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN NGA KOR MING [TELUK INTAN]

SOALAN

TUAN NGA KOR MING [TELUK INTAN] minta **PERDANA MENTERI** menyatakan apakah kedudukan terkini siasatan SPRM ke atas skandal penjualan tanah rizab lapangan terbang Seri Iskandar yang dianggarkan melibatkan tanah rizab melebihi 3,000 ekar dan apakah tindakan SPRM untuk membawa mereka yang terlibat ke muka pengadilan.

JAWAPAN

**YB DATO SERI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, isu ini masih dalam siasatan Suruhanjaya Pencegahan Rasuah Malaysia (SPRM). SPRM tidak dapat mendedahkan butiran siasatan tersebut.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATO' NGEH KOO HAM
[BERUAS]**

SOALAN:

minta **PERDANA MENTERI** menyatakan sama ada kod pakaian yang ditetapkan oleh jabatan-jabatan Kerajaan untuk orang ramai adalah sekadar satu nasihat sahaja atau mempunyai kuatkuasa undang-undang. Adakah orang ramai boleh dinafikan perkhidmatan oleh jabatan Kerajaan hanya atas alasan mereka gagal mematuhi kod pakaian yang ditetapkan oleh jabatan Kerajaan.

JAWAPAN

**DI JAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

1. Kod pakaian yang ditetapkan kepada orang ramai ketika berurusan di jabatan Kerajaan dilaksanakan selaras dengan prinsip Rukun Negara iaitu kesopanan dan kesusilaan. Penetapan etika berpakaian ini bukan sahaja diamalkan di negara ini malah turut dipraktikkan di jabatan Kerajaan di Jepun, United Kingdom, Australia serta negara-negara ASEAN seperti Filipina dan Thailand.
2. Penampilan yang baik mencerminkan masyarakat yang berakhlak dan bermoral. Sewajarnya semua pihak berganding bahu memupuk nilai-nilai murni agar semua rakyat terdidik terutamanya golongan muda untuk berpakaian sopan. Amalan dan etika berpakaian ini seharusnya dipraktikkan bukan sahaja di jabatan Kerajaan malah juga di sektor swasta.
3. Kerajaan pada setiap masa akan memastikan rakyat mendapat perkhidmatan yang disediakan dengan sebaiknya. Sekiranya etika berpakaian sukar dipatuhi, orang awam juga turut digalakkan untuk berurusan secara dalam talian melalui aplikasi dan portal yang disediakan. Walau bagaimana pun, Kerajaan tidak pernah menafikan hak untuk berurusan bagi keadaan-keadaan tertentu. Contohnya jika pesakit datang ke hospital dalam keadaan tidak terurus, mereka tetap akan dirawat, begitu juga gelandangan yang menerima bantuan Jabatan Kebajikan Masyarakat.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB DATO' NGEH KOO HAM (BERUAS)

SOALAN

DATO' NGEH KOO HAM [BERUAS] minta **MENTERI KANAN KERJA RAYA** menyatakan mengapa Kerajaan tidak berupaya membaiki lampu-lampu jalan di sepanjang jalan besar Pekan Ayer Tawar di kawasan Parlimen Beruas sungguhpun mereka sudah tidak bernyala lebih kurang 1 tahun.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya sentiasa berusaha memastikan Jalan Persekutuan disenggara secara optimum untuk memberikan keselesaan serta menjamin keselamatan semua pengguna jalan raya. Jalan Persekutuan di Pekan Ayer Tawar yang dimaksudkan oleh Yang Berhormat merupakan **Jalan Persekutuan Ipoh – Lumut FT05 dan Jalan Persekutuan Beruas – Ayer Tawar FT71.**

Memandangkan peruntukan yang diterima Kementerian ini adalah terhad, penyenggaraan lampu isyarat dan lampu jalan diprogramkan mengikut keutamaan serta tahap kritikal. Oleh itu, sebanyak **RM147,000.00** telah diperuntukkan **untuk Daerah Manjung** bagi melaksanakan **empat (4)** kerja penyenggaraan lampu jalan dan lampu isyarat iaitu di FT100 Jalan Teluk Muroh - Sungai Wangi (Persimpangan Venice), FT060 Jalan Changkat Jering - Sri Manjung - Kampung Koh, di FT3145 Simpang Lumut Port dan FT05 Jalan Kampung Kayan Setiawan iaitu di lokasi Jalan Persekutuan yang dimaksudkan oleh Yang Berhormat. Kerja-kerja penyenggaraan ini telah pun selesai pada 20 Jun 2022.

Secara keseluruhannya untuk tempoh tiga (3) tahun, peruntukan yang telah disalurkan bagi **kerja-kerja penyenggaraan Lampu Jalan dan Lampu Isyarat** di Jalan Persekutuan di dalam kawasan Daerah Manjung adalah berjumlah **RM216 ribu** untuk tahun 2020, **RM128 ribu** untuk tahun 2021 dan **RM147 ribu** untuk tahun 2022.

Untuk makluman Ahli Yang Berhormat juga, Kementerian Kerja Raya mengambil maklum terhadap baki kerosakan yang masih belum dibaiki. Anggaran kos penyenggaraan bagi kerja-kerja penyenggaraan lampu jalan yang diperlukan di Daerah Manjung, Perak pada tahun 2022 adalah sebanyak **RM3,960,000.00**.

Pelaksanaan kerja pembaikan akan dimulakan segera selepas **kelulusan peruntukan diterima dari pihak Kementerian Kewangan.**

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : DATO' NGEH KOO HAM [BERUAS]

SOALAN

DATO' NGEH KOO HAM [BERUAS] minta **MENTERI KOMUNIKASI DAN MULTIMEDIA** menyatakan sejauh manakah kawasan Parlimen Beruas sekarang mendapat liputan internet dan bilakah keseluruhan kawasan Parlimen Beruas akan mendapat liputan internet kelajuan tinggi sepenuhnya.

JAWAPAN

Tuan Yang di-Pertua,

Peratusan liputan 4G di kawasan berpenduduk di Parlimen Beruas, peratusan liputan jalur lebar 4G telah meningkat kepada 96.21% berbanding 98.04% sebelum pelaksanaan Pelan Jalinan Digital Negara (JENDELA).

Bagi menangani isu akses kepada internet berkualiti di kawasan luar bandar dan pedalaman di Perak dan Parlimen Beruas, perkembangan Pelan JENDELA Fasa 1, setakat suku pertama 2022 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
Negeri/Parlimen	Siap	Dalam Pelaksanaan	Siap	Dalam Pelaksanaan	Siap	Dalam Pelaksanaan	Siap	Dalam Pelaksanaan
Perak	64	128	1,998	184	214,989	96,188	73	0
Beruas	2	5	79	7	7,363	1,391	-	-

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaik taraf serta premis-premis yang mendapat akses gentian optik bagi memastikan keperluan rakyat sentiasa diutamakan.

Bagi membolehkan ketersediaan dan kebolehcapaian liputan rangkaian 4G di Malaysia berada pada tahap memberansangkan selain daripada pembinaan menara-menara telekomunikasi dan satelit, Kerajaan juga turut melaksanakan penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Secara keseluruhan, Fasa 1 bagi projek PoP ini akan melibatkan 630 lokasi berhampiran sekolah dan Fasa 2 pula akan melibatkan 3693 lokasi berhampiran sekolah di kawasan luar bandar di seluruh negara. Manakala jumlah PoP secara keseluruhan di Perak adalah sebanyak 507 dan daripada jumlah tersebut pula sebanyak 10 kawasan berhampiran sekolah luar bandar di Parlimen Beruas akan terlibat dengan pelaksanaan PoP Fasa 1 manakala bagi Fasa 2 pula sebanyak .

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATO' NGEH KOO HAM [BERUAS]

SOALAN

DATO' NGEH KOO HAM [BERUAS] minta **MENTERI KANAN PENDIDIKAN** menyatakan langkah-langkah yang akan diambil untuk membolehkan lebih ramai guru bukan Melayu layak mengikuti program Kelayakan Profesional Pemimpin Pendidikan (NPQEL) supaya calon-calon yang mencukupi boleh disediakan untuk menyandang jawatan pengetua di sekolah-sekolah mualigh dan Sekolah Menengah Jenis Kebangsaan (SMJK).

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam menyediakan peluang kepada guru yang layak untuk menyandang jawatan pengetua di sekolah bawah KPM, termasuk di sekolah mubaligh dan sekolah menengah jenis kebangsaan (SMJK).

Untuk makluman Ahli Yang Berhormat, bagi urusan penempatan ke jawatan pengetua, KPM telah mewajibkan calon untuk mengikuti dan lulus Program Kelayakan Profesional Pemimpin Pendidikan Kebangsaan (NPQEL) di bawah kendalian Institut Aminuddin Baki. Program ini bertujuan menilai kompetensi calon dalam aspek kepimpinan, pengurusan dan kewangan.

KPM melaksanakan pelbagai pendekatan untuk membolehkan lebih ramai guru, termasuk guru bukan Melayu yang layak mengikuti program NPQEL. Ini adalah bagi memastikan jumlah calon yang mencukupi dapat disediakan untuk menyandang jawatan pengetua di sekolah mubaligh dan SMJK.

Antara pendekatan yang dilaksanakan adalah:

- i. mengadakan promosi bagi menggalakan lebih ramai calon yang layak untuk mengikuti kursus NPQEL;
- ii. melaksanakan sesi jeyarawara NPQEL di peringkat jabatan pendidikan negeri (JPN) bagi memberi pemahaman yang lebih jelas di semua peringkat berkaitan pelaksanaan NPQEL; dan
- iii. mengadakan Sesi Perjumpaan/Runding Cara Bersama dengan lembaga pengelola sekolah (LPS) bagi membincangkan keperluan untuk menyediakan unjuran kekosongan dan pengisian jawatan pengetua dalam tempoh tiga hingga lima tahun serta mengenal pasti calon yang bersesuaian bagi mengikuti program NPQEL.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATO' NGEH KOO HAM [BERUAS]

SOALAN

DATO' NGEH KOO HAM [BERUAS] minta **MENTERI KEWANGAN** menyatakan jumlah hutang dan liabiliti selain hutang Kerajaan untuk tahun 2018, 2019, 2020, 2021 dan 2022 dan apakah unsur-unsur utama yang menyebabkan hutang dan liabiliti selain hutang Kerajaan naik setiap tahun untuk tempoh 2018 – 2022.

JAWAPAN

Tuan Yang di-Pertua,

Berikutan kedudukan kewangan negara masih mencatatkan defisit, Kerajaan perlu meminjam untuk keperluan perbelanjaan pembangunan dan ini akan meningkatkan kedudukan hutang. Sehingga akhir Mac 2022, hutang Kerajaan Persekutuan mencatat RM1,005.8 bilion atau 61.4% berbanding KDNK. Daripada jumlah ini, hutang statutori berjumlah RM949 bilion atau 57.9% berbanding KDNK, iaitu masih dalam lingkungan had statutori 65% daripada KDNK yang telah diluluskan oleh Parlimen pada Oktober yang lalu.

Selain daripada hutang Kerajaan Persekutuan, Kerajaan juga menanggung liabiliti lain seperti berikut:

- Pertama, komitmen jaminan iaitu hutang-hutang syarikat berkaitan Kerajaan yang mendapat jaminan Kerajaan serta diberi peruntukan untuk pelaksanaan pelbagai projek infrastruktur dan utiliti awam bagi kesejahteraan rakyat seperti Danalnfa Nasional Berhad (projek MRT dan Lebuhraya Pan Borneo Sarawak), Prasarana Malaysia Berhad (projek LRT) dan Malaysia Rail-Link Sdn Bhd (projek ECRL);
- Kedua, hutang prinsipal syarikat 1Malaysia Development Berhad (atau 1MDB) yang dianggarkan kira-kira RM32 bilion; dan
- Ketiga, liabiliti kewangan lain meliputi projek kerjasama awam swasta (atau PPP) termasuk pajakan serta projek di bawah inisiatif pembiayaan swasta (atau PFI) dan PBLT Sdn. Bhd.

Secara keseluruhannya, kedudukan pendedahan hutang dan liabiliti Kerajaan dianggarkan berjumlah RM1.39 trilion atau 84.9% berbanding KDNK pada akhir Mac 2022.

Kedudukan pendedahan hutang dan liabiliti Kerajaan meningkat daripada RM1.09 trilion pada tahun 2018 kepada RM1.17 trilion pada

tahun 2019. Pada tahun 2020, kedudukan ini dianggarkan berjumlah RM1.26 trillion dan RM1.36 trillion pada 2021. Unsur utama peningkatan pada setiap tahun tersebut adalah disebabkan oleh komponen hutang Kerajaan Persekutuan dan komitmen jaminan.

Sejak krisis pandemik COVID-19 bermula, keutamaan Kerajaan adalah memastikan negara dapat menangani kesan krisis dan seterusnya kembali kepada landasan pertumbuhan seperti sebelum krisis melalui bajet mengembang. Walaupun Kerajaan terpaksa meningkatkan hutangnya untuk membiayai pakej bantuan dan rangsangan ekonomi serta program vaksinasi, ia masih mampu dan tidak pernah ketinggalan daripada memenuhi obligasi bayaran khidmat hutangnya setakat ini.

Tuan Yang di-Pertua,

Walau bagaimanapun, dengan negara sudah mula beralih ke fasa endemik dan ekonomi mula menunjukkan tanda pemulihan, Kerajaan komited untuk memperbaiki kedudukan fiskal negara dalam jangka sederhana dan memastikan kemampunan fiskal dalam jangka panjang.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

**DARIPADA : TUAN NIK MOHAMAD ABDUH BIN NIK
ABDUL AZIZ (BACHOK)**

SOALAN

TUAN NIK MOHAMAD ABDUH BIN NIK ABDUL AZIZ (BACHOK)
minta **MENTERI PERTANIAN DAN INDUSTRI MAKANAN** menyatakan
pelan jangka panjang dan pendek bagi mengelak krisis makanan
berlaku dalam negara.

JAWAPAN:

Tuan Yang di-Pertua,

Untuk makluman ahli yang berhormat, negara belum berhadapan dengan krisis makanan, namun Kementerian Pertanian dan Industri Makanan (MAFI) sentiasa bersedia untuk menghadapi sebarang kemungkinan berlakunya krisis makanan.

Susulan itu, MAFI telah mengenal pasti beberapa intervensi langkah pendek bertujuan untuk memastikan bekalan makanan negara yang mencukupi dengan harga berpatutan kepada rakyat, antaranya:

- (i). melaksanakan sekatan eksport ayam berkuat kuasa 1 Jun 2022 melibatkan bekalan ayam sebanyak 3.6 juta ekor sebulan;
- (ii). mewujudkan stokpail ikan melibatkan 1000 tan metrik oleh Lembaga Kemajuan Ikan Malaysia untuk menjamin kesinambungan bekalan ikan semasa musim tengkujuh dan perayaan;
- (iii). mempermudah proses pembayaran tuntutan subsidi harga ayam dengan membenarkan bayaran pendahuluan tuntutan;
- (iv). mewujudkan insurans tanaman iaitu Skim Takaful Agromakanan yang akan dilancarkan pada suku ketiga 2022 dengan memanfaatkan seramai 189,500 pesawah padi;
- (v). melaksanakan moratorium penguatkuasaan bagi pengambilan pekerja asing dalam industri penternakan ayam supaya produktiviti di tahap optimum; dan
- (vi). melaksanakan advokasi berteraskan kehilangan lepas tuai dan pembaziran makanan secara berterusan untuk mengoptimumkan sumber dalam sistem makanan.

Selain itu, beberapa strategi jangka sederhana dan panjang juga telah dikenal pasti untuk memastikan kestabilan dan kemampuan sistem makanan negara terpelihara, antara lain usaha untuk:

- (i). mengkaji mekanisme untuk mengurangkan kos minyak sawit mentah kepada syarikat pengilangan makanan ternakan sebagai inisiatif untuk mengurangkan kos makanan ternakan;

- (ii). mewujudkan *One Stop Quarantine Centre* (OSQC) yang bertujuan untuk menambahbaik pemeriksaan biosekuriti negara melibatkan tujuh (7) perkhidmatan merentasi lapan (8) kementerian. OSQC akan meningkatkan kadar pemeriksaan sehingga 50% serta memberi jaminan dari aspek keselamatan makanan;
- (iii). memberi galakan insentif cukai bersasar kepada 1,000 syarikat yang terlibat dalam aktiviti pertanian melalui pelanjutan tempoh pelepasan cukai pendapatan daripada 10 tahun kepada 15 tahun;
- (iv). memperkuuhkan industri input pertanian menerusi penggantian sumber protein yang diimport, pembangunan aditif makanan ternakan dan penambahbaikan formulasi makanan ternakan; dan
- (v). pemerkasaan Program Kebuniti Keluarga Malaysia bagi menggalakkan pertanian bandar ke arah meningkatkan keupayaan penduduk untuk menghasilkan tanaman untuk makanan sendiri.

MAFI yakin pelaksanaan usaha-usaha ini akan dapat memperkuuh sistem makanan untuk agar kekal berdaya tahan dalam apa jua keadaan, termasuklah ancaman krisis makanan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

SOALAN

TUAN NIK MOHAMAD ABDUH BIN NIK ABDUL AZIZ [BACHOK] minta **MENTERI KANAN PENDIDIKAN** menyatakan apakah perancangan Kementerian bagi memastikan kurikulum pra sekolah dapat diseragamkan dan menitik beratkan soal jati diri kanak-kanak.

JAWAPAN

Tuan Yang di-Pertua,

Kementerian Pendidikan Malaysia (KPM) telah membangunkan Kurikulum Standard Prasekolah Kebangsaan (KSPK) pada tahun 2010 dan disemak pada tahun 2017 untuk dilaksanakan oleh semua prasekolah agensi awam serta tadika yang berdaftar di bawah KPM.

Untuk makluman Ahli Yang Berhormat, KSPK (Semakan 2017) bertujuan untuk memperkembangkan potensi murid berumur empat hingga enam tahun secara menyeluruh dan bersepada dalam aspek jasmani, emosi, rohani, intelek dan sosial. Ia dilaksanakan melalui persekitaran pembelajaran yang selamat, menyeronokkan, kreatif dan bermakna. Selain itu, ia juga bertujuan untuk meningkatkan kemahiran dan membina keyakinan murid untuk mengikuti pembelajaran seterusnya.

Pelaksanaan KSPK merupakan salah satu mekanisme untuk memastikan keseragaman penyampaian pengetahuan, kemahiran dan nilai dalam kalangan murid prasekolah awam dan tadika swasta. KSPK ini merangkumi enam tunjang pembelajaran, iaitu:

- i. komunikasi;
- ii. kerohanian, sikap dan nilai;
- iii. kemanusiaan;
- iv. sains dan teknologi;
- v. perkembangan fizikal dan estetika; dan
- vi. ketramplinan diri.

Tunjang kemanusiaan di dalam KSPK (Semakan 2017) diberi penekanan kepada murid untuk mengenali dan menghargai diri sendiri, komuniti setempat, alam sekitar, negara Malaysia dan global. Pengetahuan, kemahiran dan nilai yang dipelajari melalui tunjang ini dapat menyediakan murid yang mempunyai jati diri serta menjadi warganegara yang lebih prihatin dan bertanggungjawab terhadap kesejahteraan diri, masyarakat dan negara.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

SOALAN

Tuan Nik Mohamad Abduh bin Nik Abdul Aziz [Bachok] minta **MENTERI LUAR NEGERI** menyatakan bentuk penyaluran bantuan kemanusiaan gempa bumi di negara Afghanistan yang mengakibatkan angka korban yang besar.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Bachok atas pertanyaan yang dikemukakan.

Tuan Yang di-Pertua,

2. Sepertimana Yang Berhormat sedia maklum, gempa bumi berukuran 5.9 pada skala Richter telah melanda wilayah Paktika dan Khost, Afghanistan pada 22 Jun 2022. Bencana tersebut telah memusnahkan kedua-dua wilayah tersebut. Ia melanda kira-kira 44 km dari tenggara bandar Khost, berhampiran sempadan Pakistan.

3. Pertubuhan Bangsa-bangsa Bersatu, melalui OCHA, membuat rayuan segera kepada masyarakat antarabangsa untuk mengumpulkan sumbangan sebanyak USD 110.3 juta bagi misi kontigensi menyelamat dan pemulihan bagi tempoh Julai hingga September 2022. Sumbangan tersebut akan dapat membantu menyelamatkan lebih daripada 360,000 rakyat Afghanistan.

4. Sehubungan ini, Kementerian Luar Negeri telah menyediakan dana sebanyak USD100 ribu sebagai salah satu usaha untuk membantu Afghanistan yang dilanda bencana gempa bumi.
5. Selain daripada itu, bentuk bantuan yang diberikan oleh Kementerian Luar Negeri juga meliputi memudahcara urusan bantuan kemanusiaan oleh pertubuhan-pertubuhan bukan kerajaan (NGO) serta pertubuhan masyarakat madani (CSO) kepada mangsa gempa bumi dengan membantu memudahkan serta melancarkan perjalanan mereka ke Afghanistan.
6. Di samping itu, kerajaan sedang meneliti bentuk bantuan yang boleh disalurkan kepada rakyat Afghanistan secara keseluruhan pasca bencana gempa bumi ini, khususnya dalam sesi libat urus berkaitan usaha membangun semula negara tersebut.
7. Langkah bantuan kemanusiaan ini akan meneruskan momentum dasar luar Malaysia terhadap Afghanistan dengan mengambil kira *goodwill* dan imej negara yang baik di Afghanistan, sungguhpun isu pengiktirafan kerajaan sementara Afghanistan belum mencapai kata putus di peringkat antarabangsa.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : TUAN NIK MOHAMAD ABDUH BIN NIK
ABDUL AZIZ (BACHOK)**

SOALAN

TUAN NIK MOHAMAD ABDUH BIN NIK ABDUL AZIZ (BACHOK)
minta **MENTERI PERTANIAN DAN INDUSTRI MAKANAN**
menyatakan usaha Kementerian bagi memastikan penyelarasan MAFI
dan KPKT dalam usaha membantu industri ternakan ayam untuk
mendapat kelulusan yang membantu peningkatan pengeluaran ayam.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) melaksanakan libaturus dengan pelbagai pihak berkepentingan (*stakeholders*) dalam industri ternakan ayam bagi meningkatkan pengeluaran. Ini termasuk penyelarasan dengan Kementerian Perumahan dan Kerajaan Tempatan (KPKT) untuk memudahkan pihak industri dalam urusan untuk beralih kepada sistem reban tertutup seperti berikut:

- (i) penyeragaman proses kelulusan penternakan ayam melalui penyediaan garis panduan yang seragam di Pihak Berkuasa Tempatan (PBT) oleh PLANMalaysia dengan kerjasama Jabatan Perkhidmatan Veterinar (DVS);
- (ii) pembangunan prosedur operasi standard (SOP) bagi:
 - (a) mempermudah proses mendapatkan Kebenaran Merancang (KM);
 - (b) pengekalan syarat nyata tanah; dan
 - (c) pengekalan tarif pertanian dalam peternakan ayam.

Pelaksanaan SOP ini mengambil kira Enakmen Perladangan Unggas di setiap negeri dan peraturan lain yang berkuatkuasa seperti *Guidelines for Siting and Zoning of Industry and Residential Areas 2012* (SZIRA 2012) oleh Jabatan Alam Sekitar berkaitan jarak zon penampang.

MAFI berharap kerjasama yang dilaksanakan dapat meningkatkan kecekapan dan produktiviti ladang, mengurangkan risiko kepada jangkitan penyakit mengelakkan pencemaran.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN NIK MOHAMAD ABDUH BIN
NIK ABDUL AZIZ (BACHOK)**

SOALAN

TUAN NIK MOHAMAD ABDUH BIN NIK ABDUL AZIZ (BACHOK) minta **MENTERI PEMBANGUNAN LUAR BANDAR** menyatakan perancangan Kementerian bagi memastikan anak-anak Orang Asli yang cemerlang dalam peperiksaan SPM tidak akan tercicir untuk meneruskan pembelajaran.

JAWAPAN

Untuk makluman Yang Berhormat, Pihak kementerian melalui Jabatan Kemajuan Orang Asli (JAKOA) dengan kerjasama Kementerian Pelajaran Malaysia (KPM) serta Kementerian Pelajaran Tinggi termasuk Unit Pusat Universiti (UPU) telah mengadakan 6 siri program hala tuju lepasan SPM sebelum 28 Jun 2022, iaitu tarikh akhir pendaftaran UPU dan institut-institut pengajian tinggi yang lain.

Selain itu, JAKOA juga telah mengadakan Majlis Anugerah Pelajar Orang Asli di Hotel Tenera pada 15 Julai 2022 yang mana pihak JAKOA mengumpulkan pelajar cemerlang dan mengadakan sesi taklimat serta pameran bersama agensi di bawah KPT serta agensi di bawah KPLB. Seramai 76 orang pelajar terlibat dengan program ini.

Pihak JAKOA juga akan merancang mengadakan sesi hala tuju pelajar ini dan pelajar sederhana cemerlang yang melibatkan universiti-universiti atau kolej-kolej yang mempunyai autonomi untuk pemilihan masuk ke universiti seperti UiTM untuk kursus pra diploma ke atas. Selain itu pekeliling Kementerian Kewangan pada 8 Mac 2022 membenarkan bantuan kewangan diberikan kepada pelajar cemerlang melalui universiti bawah KPLB seperti Universiti Kuala Lumpur (UNiKL), Kolej Universiti Agrosains Malaysia (UCAM) dan kolej-kolej dibawah KPLB. Ini secara tidak langsung membuka banyak lagi pilihan kepada pelajar cemerlang untuk menyambung pelajaran.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

SOALAN

TUAN NIK NAZMI BIN NIK AHMAD [SETIAWANGSA] minta **MENTERI KANAN PENDIDIKAN** menyatakan pecahan calon pelajar STPM Bumiputera dan bukan Bumiputera setiap tahun antara 2011 hingga 2020.

JAWAPAN

Tuan Yang di-Pertua,

Untuk makluman Ahli Yang Berhormat, bilangan calon Sijil Tinggi Persekolahan Malaysia (STPM) mengikut kategori Bumiputera dan bukan Bumiputera pada tahun 2011 hingga 2020 adalah seperti berikut.

Tahun	Bumiputera	Bukan Bumiputera	Jumlah Keseluruhan
2011	34,309	16,352	50,661
2012	34,855	16,842	51,697
2013	37,744	17,510	55,254
2014	28,654	14,214	42,868
2015	28,676	13,261	41,937
2016	29,461	13,796	43,257
2017	30,773	12,285	43,058
2018	31,397	11,457	42,854
2019	32,041	12,793	44,834
2020	32,428	10,671	43,099

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

**PERTANYAAN : BERTULIS
DARIPADA : TUAN NIK NAZMI BIN NIK AHMAD
[SETIAWANGSA]**

SOALAN

Tuan Nik Nazmi bin Nik Ahmad [Setiawangsa] minta MENTERI PERDAGANGAN DALAM NEGERI DAN HAL EHWAL PENGGUNA menyatakan sejak Suruhanjaya Persaingan Malaysia ditubuhkan:-

- (a) Berapa tindakan penguatkuasaan yang diambil oleh MyCC setiap tahun; dan
 - (b) Berapa wang yang dikutip daripada denda dan kompaun oleh MyCC setiap tahun.

JAWAPAN

Tuan Yang di-Pertua,

Untuk makluman Ahli Yang Berhormat, Akta Persaingan 2010 (Akta 712) telah mula dikuatkuasakan Suruhanjaya Persaingan Malaysia (MyCC) pada 1 Januari 2012 dengan tujuan bagi menggalakkan dan melindungi proses persaingan di Malaysia dan dengan demikian itu melindungi kepentingan pengguna. Dalam mencapai tujuan itu, penguatkuasaan undang-undang persaingan yang efektif boleh dicapai menerusi aktiviti penyiasatan serta tindakan mengenakan penalti terhadap kegiatan kartel dan penyalahgunaan syarikat dominan atau monopoli. Aktiviti tersebut juga disokong oleh program advokasi, nasihat dasar atau ekonomi kepada Kerajaan dan kajian pasaran supaya penguatkuasaan akan lebih menyeluruh.

Dari tahun 2012 sehingga Jun 2022, MyCC telah menerima sebanyak 1124 aduan. Dari kesemua aduan tersebut, MyCC menutup hampir 75% jumlah aduan atas sebab bukan bawah bidangkuasa atau tiada isu persaingan atau isu kepenggunaan atau kontakual dan sebagainya. Dari aduan-aduan itu juga, MyCC telah membuka kertas-kertas penyiasatan lalu mengeluarkan-

- (a) 12 Keputusan Pelanggaran di bawah Seksyen 40 AKTA 712;
- (b) 10 Keputusan Tiada Pelanggaran di bawah Seksyen 39 AKTA 712;
- (c) 13 Keputusan Cadangan di bawah Seksyen 36 AKTA 712 (yang mana 12 telah dimuktamadkan sebagai keputusan pelanggaran di bawah Seksyen 40 AKTA 712); dan
- (d) 9 Aku Janji di bawah Seksyen 43 AKTA 712.

Berikut adalah jadual keputusan-keputusan serta aku janji oleh MyCC mengikut tahun-

Tindakan	2012	2013	2014	2015	2016	2017	2018	2019	2020	2021	2022
12 Keputusan Pelanggaran	1	-	1	2	2	-	1	-	1	3	1

10 Keputusan Tiada Pelanggaran	-	-	-	6	1	2	-	1	-	-	-
13 Keputusan Cadangan	1	1	2	3	-	1	1	2	2	-	-
9 Aku Janji	-	-	3	1	1	1	-	1	-	2	-

Pada masa yang sama, MyCC sedang aktif menjalankan 22 penyiasatan dan 68 inkuiri yang melibatkan lebih dari 500 syarikat. Majoriti penyiasatan adalah berkenaan isu tipuan bida yang melibatkan perolehan awam.

Untuk mempertingkatkan lagi pematuhan serta penguatkuasaan undang-undang serta dasar persaingan, MyCC juga telah menjalankan aktiviti-aktiviti berikut:

- (a) Melaksanakan 326 program advokasi untuk meningkatkan kesedaran tentang AKTA 712 di antara tahun 2012 dan 2022;
- (b) Mengeluarkan 72 nasihat dasar dan 20 nasihat ekonomi bagi memastikan dasar Kerajaan sejajar dengan objektif perundungan persaingan; dan
- (c) Mulai 2013 sehingga 2021, MyCC telah menjalankan 7 kajian pasaran berikut-
 - (i) Kajian Semula Pasaran Daging Ayam Daging (2013);
 - (ii) Kajian Berkenaan Penetapan Harga/Fi oleh Badan Profesional (2014);
 - (iii) Kajian Semula Pasaran Farmaseutikal (2016);
 - (iv) Kajian Semula Pasaran Bahan Binaan dalam Industri Pembinaan (2017);
 - (v) Kajian Semula Pasaran Sektor Makanan (2019);
 - (vi) Kajian Semula Pasaran Sektor Perkhidmatan (Borong dan Runcit untuk Produk Terpilih) (2020); dan
 - (vii) Kajian Semula Pasaran Sektor Pengangkutan (2021).

Untuk makluman Ahli Yang Berhormat, MyCC diberi kuasa untuk mengenakan penalti kewangan perusahaan-perusahaan yang didapati melanggar Akta Persaingan 2010 melalui setiap keputusan pelanggaran yang dikeluarkannya selaras dengan Seksyen 40 Akta 712 sahaja. Berdasarkan kepada seksyen yang sama, penalti kewangan yang boleh dikenakan adalah tidak boleh melebihi sepuluh (10%) peratus daripada pusing ganti seluruh dunia (*worldwide turnover*) suatu perusahaan itu sepanjang tempoh suatu pelanggaran berlaku. Semenjak tahun 2012 sehingga sekarang, MyCC telah mengenakan penalti kewangan berjumlah RM176,150,258.84.

Berikut adalah pecahan penalti kewangan yang dikenakan oleh MyCC serta statusnya:-

NO.	TAHUN	KES	PENALTI KEWANGAN	STATUS KUTIPAN PENALTI
1	2013	Kes Kartel - <i>Cameron Highland Floriculturist Association</i>	Tidak dikenakan kerana ia adalah kes MyCC yang pertama	-
2	2014	Kes Kartel - <i>Malaysia Airlines</i>	RM10,000,000.00	Tidak dapat dikutip lagi kerana masih dalam peringkat rayuan
		Kes Kartel - <i>AirAsia & AirAsia X</i>	RM10,000,000.00	
3	2015	Kes Kartel - <i>Tube Ice Manufacturers</i> melibatkan 24 perusahaan	RM252,250.00	Telah dikutip sepenuhnya
4	2015	Kes Kartel - <i>Sibu Confectionary and Bakers Association</i> melibatkan 15 perusahaan	RM247,730.00	Telah dikutip sepenuhnya
5	2016	Kes Kartel - <i>CDO Penang</i> melibatkan 5 perusahaan	RM645,774.00	Telah dikutip sepenuhnya
6	2016	Kes Monopoli - <i>MyEG Services Berhad</i>	RM9,644,700.00	Telah dikutip sepenuhnya
7	2018	Kes Kartel - <i>Daycare & Tuition Centre</i> melibatkan 7 perusahaan	RM33,068.85	Telah dikutip sepenuhnya
8	2020	Kes Kartel - Kes <i>PIAM & 22 Members</i> melibatkan 23 Perusahaan	RM130,241,474.74	Tidak dapat dikutip lagi kerana masih dalam peringkat rayuan

NO SOALAN : 344

NO.	TAHUN	KES	PENALTI KEWANGAN	STATUS KUTIPAN PENALTI
9	2021	Kes Monopoli - <i>Dagang Net Technologies Sdn. Bhd</i>	RM10,302,475.97	Telah dikutip sepenuhnya walaupun kes masih dalam peringkat rayuan.
10	2021	Kes Kartel – <i>Warehouse</i> melibatkan 7 perusahaan	RM1,043,012.52	Tidak dapat dikutip lagi kerana masih dalam peringkat rayuan
11	2021	Kes Kartel - Langkawi RoRo melibatkan 5 perusahaan	RM2,191,580.41	Tidak dapat dikutip lagi sepenuhnya kerana perusahaan diberi peluang untuk membayar penalty secara ansuran.
12	2022	Kes Kartel – IT Projects under ASWARA melibatkan 8 perusahaan	RM1,548,192.35	Tidak dapat dikutip lagi kerana kesemua perusahaan masih mempunyai masa untuk merayu atau tidak
JUMLAH			RM176,150,258.84	

Sekian, Terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

SOALAN

TUAN NIK NAZMI BIN NIK AHMAD [SETIAWANGSA] minta **MENTERI KANAN PENDIDIKAN** menyatakan butiran sekolah-sekolah yang dirancang untuk dibina dan dinaik taraf di Kuala Lumpur dan Selangor antara 2022-2025 bagi menampung peningkatan pesat penduduk di sini.

JAWAPAN

Tuan Yang di-Pertua,

Untuk makluman Ahli Yang Berhormat, dalam Rancangan Malaysia Ke-12 (RMKe-12), *Rolling Plan* 1 tahun 2021 dan *Rolling Plan* 2 tahun 2022, Kementerian Pendidikan Malaysia (KPM) telah diluluskan peruntukan pembinaan sekolah baharu dan bangunan tambahan seperti berikut:

- i. sebanyak enam buah sekolah baharu dan lima bangunan tambahan di sekolah sedia ada di Selangor; dan
- ii. sebuah kompleks pendidikan yang merangkumi sebuah sekolah rendah dan sebuah sekolah menengah baharu serta empat bangunan tambahan di sekolah sedia ada akan dibina di Wilayah Persekutuan Kuala Lumpur.

Untuk tahun 2023, KPM telah mengemukakan permohonan pembinaan sekolah baharu dan bangunan tambahan dalam RMKe-12 *Rolling Plan* 3 tahun 2023 untuk pertimbangan dan kelulusan agensi pusat. Permohonan ini melibatkan:

- i. sebanyak enam buah sekolah baharu dan lapan bangunan tambahan di sekolah sedia ada di negeri Selangor; dan
- ii. sebanyak dua buah sekolah harian baharu yang merangkumi sebuah sekolah rendah dan sebuah sekolah menengah baharu serta sebuah sekolah menengah kebangsaan agama (SMKA) baharu dan sebuah bangunan tambahan di sekolah sedia ada juga telah dirancang pembinaannya di Wilayah Persekutuan Kuala Lumpur.

Kelulusan permohonan ini adalah tertakluk kepada keutamaan dan kedudukan kewangan semasa kerajaan. KPM akan terus mengenal pasti keperluan dan keutamaan projek pembangunan di negeri Selangor dan Wilayah Persekutuan Kuala Lumpur bagi tahun 2024 dan 2025 untuk diangkat permohonan dalam Rancangan Malaysia Lima Tahun (RMLT).

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

SOALAN

TUAN NIK NAZMI BIN NIK AHMAD [SETIAWANGSA] minta **MENTERI KANAN PENDIDIKAN** menyatakan butiran berapa bilangan pegawai pendidikan DG41 yang diambil secara 'one-off' pada Jun 2021 bukan pemegang sijil ikhtisas pendidikan.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* pada 20 Jun 2021 bagi mengisi kekosongan guru di sekolah KPM seluruh negara. Ini merupakan inisiatif yang diambil oleh KPM bagi mengatasi isu kekosongan guru yang telah berlarutan sekian lama.

Urusan pengambilan khas guru baharu ini telah selesai dilaksanakan sepenuhnya oleh Suruhanjaya Perkhidmatan Pendidikan (SPP). Seramai 16,381 orang guru telah dilantik dan ditempatkan di sekolah bawah KPM. Daripada jumlah tersebut seramai 2,349 orang atau 15 peratus adalah calon bukan graduan ikhtisas pendidikan.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

SOALAN

Minta **MENTERI PENGAJIAN TINGGI** menyatakan butiran kegagalan pembayaran hutang PTPTN setiap tahun antara 2015 hingga 2021 dari segi jumlah kewangan dan bilangan peminjam.

JAWAPAN

Tan Sri Yang di-Pertua,

Secara kumulatifnya bagi tempoh sehingga 31 Disember 2021, PTPTN telah menerima bayaran balik daripada 1.94 juta peminjam dengan jumlah sebanyak RM16.24 bilion. Selain itu, seramai 716,482 peminjam telah membuat bayaran balik secara tidak konsisten dengan jumlah tunggakan sebanyak RM4.23 bilion, manakala 504,311 peminjam tidak pernah membuat bayaran balik dengan jumlah tunggakan sebanyak RM9.27 bilion.

Dalam hal ini, PTPTN sentiasa bersifat mesra peminjam dan sentiasa bersedia untuk berbincang bagi membantu peminjam membuat bayaran balik mengikut keupayaan kewangan masing-masing.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN NOOR AMIN BIN AHMAD
[KANGAR]

SOALAN

TUAN NOOR AMIN BIN AHMAD [KANGAR] minta **MENTERI KEWANGAN** menyatakan apakah rancangan Kerajaan bagi mengurangkan hutang isi rumah rakyat Malaysia yang merupakan hutang isi rumah tertinggi di Asia kini.

JAWAPAN

Tuan Yang di-Pertua,

Dakwaan mengenai paras hutang isi rumah Malaysia merupakan yang tertinggi di Asia adalah tidak benar. Berdasarkan data yang diterbitkan oleh *Bank for International Settlements* (BIS), Australia (119%), Korea Selatan (106.6%), Hong Kong (93.1%) dan Thailand (91%) mencatatkan paras nisbah hutang isi rumah kepada KDNK yang lebih tinggi daripada Malaysia di rantau Asia Pasifik.

Nisbah hutang isi rumah kepada KDNK adalah terkawal dan berada pada tahap 87.1% di peringkat agregat nasional pada suku pertama 2022. Hutang isi rumah dengan jumlah RM1,391.6 bilion telah meningkat pada kadar 4.6% secara tahunan, didorong terutamanya oleh pinjaman perumahan (susulan pelbagai insentif pemilikan rumah yang ditawarkan oleh pihak Kerajaan dan sektor swasta) serta pinjaman kenderaan (berikutan insentif Cukai Jualan dan Perkhidmatan (SST) bagi pembelian kenderaan bermotor).

Namun demikian, hutang isi rumah disokong pembelian aset seperti harta tanah kediaman (58.1% daripada jumlah hutang isi rumah), harta tanah bukan kediaman (5.7% daripada jumlah hutang isi rumah) dan pembelian sekuriti (5.3% daripada jumlah hutang isi rumah). Tambahan pula, aset kewangan isi rumah berjumlah RM2,976.9 billion terus mengatasi hutang isi rumah dengan nisbah aset kewangan kepada hutang isi rumah berada pada paras 213.9%.

Tuan Yang di-Pertua,

Kerajaan sedar mengenai risiko sekiranya hutang isi rumah terus meningkat. Peminjam yang berhutang secara berlebihan lebih mudah menghadapi kesukaran kewangan di bawah senario tekanan. Pengumpulan hutang berlebihan boleh mengekang pertumbuhan ekonomi pada masa hadapan akibat sebahagian pendapatan isi rumah perlu disalurkan untuk pembayaran hutang. Hal ini boleh mengurangkan

pendapatan boleh guna, seterusnya menyebabkan perbelanjaan barang dan perkhidmatan isi rumah yang lebih rendah.

Sehubungan itu, Kerajaan telah melaksanakan pelbagai langkah untuk mengawal tahap keberhutangan isi rumah menerusi pendekatan yang berhemat dan berhati-hati bagi mengelakkan kesan negatif terhadap para peminjam, ekonomi makro dan kestabilan sistem kewangan negara. Sebahagian daripada usaha yang berterusan untuk mengukuhkan daya tahan isi rumah adalah seperti berikut:

Pertama, melaksanakan Garis Panduan Pembiayaan Bertanggungjawab (*Guidelines on Responsible Financing*) sejak 2012, untuk memastikan individu meminjam mengikut kemampuan membayar balik pinjaman masing-masing dalam tempoh yang telah ditetapkan bagi mengelakkan bebanan hutang yang berlebihan. Hasilnya, keseluruhan isi rumah masih meminjam mengikut kemampuan mereka dengan nisbah khidmat hutang (*Debt Service Ratio*) (DSR) kekal dalam lingkungan paras berhemat dengan median DSR pinjaman terkumpul pada paras 35%.

Kedua, menggalakkan isi rumah yang mempunyai masalah pengurusan kewangan dan hutang untuk mendapatkan nasihat dan perkhidmatan penyusunan semula hutang daripada institusi kewangan masing-masing dan Agensi Kaunseling dan Pengurusan Kredit (AKPK); dan

Ketiga, meningkatkan tahap kesedaran dan celik kewangan rakyat menerusi Jaringan Pendidikan Kewangan (*Financial Education Network*) (FEN) supaya pengguna perkhidmatan kewangan berupaya dan berkeyakinan untuk membuat keputusan kewangan yang baik.

Melangkah ke hadapan, Kerajaan akan terus memantau tahap keberhutangan isi rumah dan mengambil langkah yang bersesuaian untuk memastikan pertumbuhan paras hutang isi rumah tidak berlebihan dan adalah selaras dengan kemampuan peminjam.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN NOOR AMIN BIN AHMAD [KANGAR]

SOALAN

TUAN NOOR AMIN BIN AHMAD [KANGAR] minta **MENTERI KANAN PENDIDIKAN** menyatakan mengapa terdapat begitu ramai pelajar memilih untuk tidak menduduki Sijil Pelajaran Malaysia (SPM). Berapa ramaikah yang gagal.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan pengurusan peperiksaan Sijil Pelajaran Malaysia (SPM) berjalan lancar dan teratur, termasuk aspek kehadiran calon berdaftar untuk menduduki peperiksaan.

Untuk makluman Ahli Yang Berhormat, bagi SPM tahun 2021, seramai 10,681 calon berdaftar tidak hadir menduduki peperiksaan. Daripada jumlah tersebut, 9,037 orang atau 2.3 peratus adalah terdiri daripada calon sekolah KPM, calon sekolah agensi kerajaan, calon sekolah menengah agama negeri, calon sekolah swasta dan calon sekolah menengah agama rakyat manakala 1,644 orang atau 0.42 peratus lagi adalah calon persendirian.

Di sebalik usaha-usaha yang dilaksanakan oleh KPM bagi memastikan calon SPM hadir untuk menduduki peperiksaan, masih terdapat calon sekolah yang tidak menduduki peperiksaan SPM atas pelbagai faktor. Ini termasuk isu peribadi seperti tidak berminat untuk meneruskan persekolahan kerana telah bekerja.

Untuk makluman Ahli Yang Berhormat, seramai 45,526 orang calon yang menduduki peperiksaan SPM 2021 tidak layak mendapat sijil kerana gagal mata pelajaran Bahasa Melayu atau Sejarah atau kedua-duanya.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN NOOR AMIN BIN AHMAD
[KANGAR]**

SOALAN

YB TUAN NOOR AMIN BIN AHMAD [KANGAR] minta **MENTERI PERUMAHAN DAN KERAJAAN TEMPATAN** menyatakan apakah langkah-langkah yang diambil bagi membantu pembeli-pembeli yang teraniaya kerana rumah yang telah dibeli gagal disiapkan pada tempohnya.

JAWAPAN

Tuan Yang di-Pertua,

Untuk makluman Ahli Yang Berhormat, Mesyuarat *War Room* Pemantauan Pemajuan Projek Perumahan Swasta diadakan oleh Kementerian Perumahan dan Kerajaan Tempatan (KPKT) bagi menyelesaikan sebarang isu kelewatan projek perumahan. Mesyuarat ini berperanan sebagai satu platform untuk melaporkan status projek perumahan swasta sakit dan terbengkalai serta mencadangkan langkah-langkah pemulihan bagi projek berkenaan. Selain itu, penubuhan *war room* adalah untuk membincangkan permasalahan, mengenal pasti kaedah penyelesaian, penyelarasan pelaksanaan dan pelan tindakan kepada isu-isu berkaitan pemajuan perumahan swasta.

Bagi membantu meringankan bebanan para pembeli yang terkesan dengan projek perumahan swasta terbengkalai, Kementerian mengambil inisiatif seperti berikut:

- i. mengeluarkan surat pengesahan projek perumahan swasta terbengkalai kepada pembiaya akhir (*end-financier*) bagi unit rumah berkaitan. Melalui surat pengesahan ini, para pembeli boleh mendapatkan pertimbangan daripada institusi perbankan bagi sebarang permohonan pengurangan kadar faedah dan penstrukturkan semula pinjaman perumahan;
- ii. memohon pertimbangan daripada Kumpulan Wang Simpanan Pekerja (KWSP) bagi permohonan pengeluaran kali kedua;
- iii. bagi pembeli yang membuat pinjaman perumahan, permohonan boleh dibuat bagi:

- a. membatalkan pinjaman sedia ada dan diberi peluang untuk memohon pinjaman baharu iaitu pinjaman penuh seperti pinjaman pada kali pertama; atau
- b. pengecualian pengenaan faedah pinjaman pada kadar 4% sepanjang tempoh projek dipulihkan atau selama lima (5) tahun (mana-mana yang terdahulu).

Walau bagaimanapun, semua perkara di atas adalah tertakluk kepada penilaian institusi pembiaya ke atas peminjam-peminjam berdasarkan merit setiap kes;

- iv. Kerajaan juga telah melanjutkan pengecualian duti setem ke atas perjanjian pinjaman dan surat cara pindah milik kepada pembeli asal projek perumahan swasta terbengkalai sehingga 31 Disember 2025. Inisiatif ini telah diperkenalkan sejak tahun 2013 bagi membantu meringankan bebanan para pembeli yang terkesan dengan projek perumahan swasta terbengkalai;
- v. Kerajaan melalui Lembaga Pembiayaan Perumahan Sektor Awam (LPPSA) telah memperkenalkan Skim Bantuan Khas iaitu penangguhan bayaran balik ansuran bulanan selama enam (6) bulan kepada peminjam LPPSA yang layak. Permohonan untuk mendapatkan Skim Bantuan Khas ini dibuka sehingga 31 Disember 2022 dan boleh dimohon melalui portal LPPSA; dan
- vi. KPKT telah membuat pindaan kepada Akta Pemajuan Perumahan (Kawalan dan Pelesenan) 1966 (Akta 118) yang telah dikuatkuasakan bersekali dengan Akta Pengurusan Strata 2013 (Akta 757) dan Akta Hak Milik Strata (Pindaan) 2013 (Akta 318) bermula 1 Jun 2015 untuk mengelakkan projek perumahan swasta daripada terbengkalai.

Antara pindaan kepada Akta 118 dan peraturan-peraturan di bawahnya adalah seperti berikut:

a. **Seksyen 6**

Deposit lesen pemajuan perumahan dipinda dari RM200,000 kepada 3.0% daripada anggaran kos pembinaan termasuk kos yuran profesional tetapi tidak termasuk kos tanah.

b. **Seksyen 8A**

Pembeli boleh secara individu memohon untuk menamatkan perjanjian jual beli pada bila-bila masa sekiranya tiada kemajuan pembinaan secara berterusan di tapak pembinaan selama enam (6) bulan atau lebih selepas perjanjian ditandatangani dengan syarat perlu mendapat perakuan daripada Pengawal Perumahan dan mendapat persetujuan bertulis daripada pihak pembiaya.

c. **Subseksyen 24(2)(g) [kuasa untuk membuat peraturan-peraturan]**

Menaikkan kadar penalti maksimum terhadap pemaju bagi kesalahan di bawah peraturan daripada RM20,000 kepada RM50,000.

d. **Seksyen 18A (Fasal Baharu)**

Tindakan pendakwaan terhadap pemaju perumahan berlesen yang menyebabkan projek perumahan terbengkalai mulai Jun 2015.

Sekian, terima kasih.

SOALAN NO: 350

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN NOOR AMIN BIN AHMAD [KANGAR]

SOALAN NO. 351

Tuan Noor Amin bin Ahmad [Kangar] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan nyatakan langkah-langkah yang telah, sedang dan akan diambil untuk mengawal aktiviti pencatutan sejak Mac 2020.

JAWAPAN

Yang di-Pertua,

Antara usaha-usaha yang telah, sedang dan akan dipertingkatkan adalah:

1. Melaksanakan penguatkuasaan tegas di bawah Akta Kawalan Harga dan Antipencatutan (AKHAP) 2011 iaitu:

- i. Penguatkuasaan terhadap pencatutan atau pengambilan untung secara tidak munasabah oleh peniaga di bawah Peraturan-Peraturan Kawalan Harga dan Antipencatutan (Mekanisme Untuk Menentukan Keuntungan Tinggi Yang Tidak Munasabah) 2018;
- ii. Pemantauan dan penguatkuasaan yang lebih agresif meliputi seluruh rantaian pengedaran barang dan perkhidmatan di seluruh negara di bawah Ops Catut, Ops Rantai dan Ops Pasar. Operasi ini telah menggerakkan semua anggota penguatkuasa

Kementerian seluruh negara bagi membendung isu kenaikan harga barang di pasaran;

- iii. Pengeluaran Notis bertulis di bawah Seksyen 21 AKHAP 2011 ke atas mana-mana pihak yang didapati menaikkan harga secara mendadak dan ketara;
 - iv. Mengadakan program libat urus untuk memberi penjelasan, khidmat nasihat dan kerjasama bersama peniaga dalam memahami dan mematuhi undang-undang yang dikuatkuasakan;
2. Melaksanakan langkah kolaborasi bersama agensi Kerajaan yang berkaitan seperti Kementerian Pertanian dan Industri Asas Tani (MAFI) untuk memastikan bekalan mencukupi dan ditawarkan pada harga yang munasabah di bawah Majlis Tindakan Sara Hidup Negara.
3. Meningkatkan keberadaan (*omnipresence*) pegawai-pegawai penguatkuasa di lokasi yang menjadi tumpuan pengguna bagi mewujudkan persekitaran perniagaan yang selamat dan beretika.
4. Menyediakan pelbagai medium penyaluran aduan bagi memudahkan rakyat mengemukakan aduan berkaitan isu pencatutan untuk diambil tindakan oleh Kementerian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : TUAN NOOR AMIN BIN AHMAD
[KANGAR]**

SOALAN

TUAN NOOR AMIN BIN AHMAD minta **MENTERI KESIHATAN** menyatakan corak dan status perebakan wabak COVID-19 sejak tiga bulan lalu.

JAWAPAN

Tuan Yang di-Pertua,

1. Dari 1 April 2022 sehingga 20 Julai 2022, secara kumulatif sebanyak 96 kluster COVID-19 telah dilaporkan ke *Crisis, Preparedness and Response Center* (CPRC) Kebangsaan, Kementerian Kesihatan (KKM). Daripada jumlah tersebut, sebanyak 83 kluster telah pun tamat dan 13 kluster lagi masih aktif.
2. Seterusnya, 96 kluster yang dilaporkan ini melibatkan sejumlah 4,807 kes COVID-19 – di mana 2,416 kes (50.3%) tersebut adalah bergejala.
3. Tiga (3) kategori kluster yang merekodkan jumlah kes yang tertinggi adalah seperti berikut:
 - i. Kluster dari kategori institusi pendidikan: 70 kluster (72.9%) melibatkan 4,076 kes;

SOALAN NO. 352

- ii. Kluster dari kategori kumpulan berisiko tinggi : 15 kluster (15.6%) melibatkan 311 kes. Adalah dimaklumkan kumpulan berisiko tinggi antaranya meliputi petugas kesihatan, warga emas, kanak-kanak dan sebagainya. Oleh itu, kluster-kluster ini berlaku di rumah jagaan warga emas atau rumah perlindungan kanak-kanak atau klinik/ hospital; dan
- iii. Kluster dari kategori tempat kerja: 8 kluster (8.3%) melibatkan 327 kes.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : PUAN NOORITA BINTI SUAL (TENOM)

SOALAN

PUAN NOORITA BINTI SUAL (TENOM) minta MENTERI PEMBANGUNAN LUAR BANDAR menyatakan apakah status terkini naik taraf pembinaan jalan raya Kampung Tumantalik-Binsilon.

JAWAPAN

Untuk makluman Yang Berhormat, projek yang dinyatakan oleh Yang Berhormat adalah merujuk kepada Projek Menaiktaraf Jalan Tumantalik, Tenom, Sabah dan telah diluluskan di bawah Rancangan Malaysia Kesebelas, Rolling Plan Keempat (RMKe-11, RP4) Tahun 2020 dengan skop naik taraf jalan sepanjang 8.0 km dengan spesifikasi JKR R2. Status terkini projek adalah di peringkat rekabentuk oleh perunding dan dijangka tender pada Ogos 2022.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : PUAN NOORITA BINTI SUAL [TENOM]

SOALAN

PUAN NOORITA BINTI SUAL [TENOM] minta **MENTERI KOMUNIKASI DAN MULTIMEDIA** menyatakan apakah status terkini mengenai Perlaksanaan Projek JENDELA bagi Parlimen Tenom. Menurut jawapan daripada Kementerian yang diterima oleh pihak saya, setakat 31 Ogos 2021 belum ada satu pun menara baru yang siap dan bagi projek naik taraf stesen pemancar hanya 20 daripada 66 yang telah dirancangkan, walhal projek ini telah pun diluluskan pada tahun 2018, dan senarai lengkap semua kawasan atau kampung-kampung yang telah dan akan mendapatkan kemudahan ini.

JAWAPAN

Tuan Yang di-Pertua,

Kementerian melalui Suruhanjaya Komunikasi dan Multimedia Malaysia (SKMM) sentiasa cakna dan prihatin akan kualiti perkhidmatan internet jalur lebar di Sabah di samping meletakkan perkhidmatan internet jalur lebar sebagai keutamaan dalam memastikan pelaksanaan dan pembinaan teknologi di Sabah berjalan lancar. Antara perkara yang sering diberi tumpuan dan giat ditambah baik termasuklah meliputi aspek perkhidmatan yang lemah, kelajuan internet yang perlahan, penggunaan teknologi satelit dan titik buta susulan kedudukan geografi Sabah.

Perkembangan Pelan Jalinan Digital Negara (JENDELA) Fasa 1, setakat suku pertama 2022 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Negeri/Parlimen	Siap	Dalam Pelaksanaan	Siap	Dalam Pelaksanaan	Siap	Dalam Pelaksanaan	Siap
Sabah	125	482	3,395	344	122,707	128,458	104	34
Tenom	8	20	51	13	1,597	896	1	1

Menara-menara baharu yang telah dirancang akan siap secara berperingkat menjelang penghujung 2023. Kawasan-kawasan yang akan mendapat menara baharu adalah seperti di Kg. Korolok, Kg. Makanitom, Taman Pertanian Tenom, Sk Sungai Api, Kg. Alutok, Kg. Kapulu, Sk Simpang, Kg. Rundum, Kg. Mantailang, Kg. Bubuntungan, Kg. Kungkular, Kg. Makakumpai, Kg. Saga, Kg. Cinta Mata, Jalan Tenom Keningau dan Kg. Paal Seberang.

Peratusan liputan 4G di kawasan berpenduduk di Sabah telah meningkat kepada 86.92% pada suku pertama 2022 berbanding 73.41% sebelum pelaksanaan JENDELA, manakala di Parlimen Tenom, peratusan liputan jalur lebar 4G telah meningkat kepada 61.05% berbanding 41.85% sebelum pelaksanaan JENDELA. Usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS (2022)**

PERTANYAAN : BUKAN LISAN

DARIPADA : PUAN NOORITA BINTI SUAL [TENOM]

YB PUAN NOORITA BINTI SUAL [TENOM] minta **MENTERI PERUMAHAN DAN KERAJAAN TEMPATAN** menyatakan apakah status terkini pembinaan rumah Program Perumahan Rakyat (PPR) Melalap, di dalam daerah Tenom.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah membina sebanyak 38 buah Program Perumahan Rakyat (PPR) di negeri Sabah. Daripada jumlah tersebut, 33 projek telah siap dibina manakala lima (5) projek PPR masih dalam pembinaan iaitu PPR Pitas, PPR Jalan Tungku, Lahad Datu, PPR Tagasan, PPR Kiansom dan PPR Gayang II, Tuaran.

Untuk makluman Ahli Yang Berhormat juga, KP KT telah mengemukakan permohonan cadangan projek PPR di Pekan Baru Melalap, Tenom kepada Unit Perancang Ekonomi (UPE, JPM) sebagai salah satu cadangan projek baharu untuk dilaksanakan di bawah *Rolling Plan 1* (RP1), Rancangan Malaysia ke-12 (RMKe-12) bagi tahun 2021. Walau bagaimanapun, berdasarkan kepada pertimbangan UPE, JPM dan Kementerian Kewangan Malaysia, permohonan cadangan projek ini tidak diluluskan bagi tahun tersebut.

Pada masa ini, KP KT tidak mempunyai sebarang projek yang sedang dalam pembinaan atau dalam peringkat perancangan di kawasan Parlimen Tenom. Namun begitu, KP KT telah membina PPR Taman Anggerik, Keningau, Sabah pada tahun 2014 yang terletak dalam jarak 36km daripada Pekan Tenom dengan jumlah unit sebanyak 300 unit.

Untuk makluman Ahli Yang Berhormat juga, KP KT sentiasa bersedia mempertimbangkan sebarang cadangan pembangunan PPR yang diterima daripada kerajaan negeri. Cadangan tersebut akan diteliti oleh KP KT berdasarkan kepada keutamaan yang dicadang oleh kerajaan negeri, kesesuaian tapak dan keperluan penduduk setempat. Namun, kelulusan bagi projek-projek ini adalah tertakluk kepada kedudukan dan keupayaan kewangan Kerajaan Persekutuan.

Sekian, terima kasih.

SOALAN NO: 355

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : PUAN NOORITA BINTI SUAL [TENOM]

SOALAN

PUAN NOORITA BINTI SUAL [TENOM] minta **MENTERI KANAN PENDIDIKAN** menyatakan apakah langkah penyelesaian yang telah diambil oleh Kementerian bagi mengatasi masalah kesesakan pelajar/kelas dua sesi SMK Kemabong Tenom. Apakah status terkini cadangan pembinaan sekolah menengah baru di kawasan Kemabong Tenom bagi mengatasi masalah ini.

JAWAPAN

Tuan Yang di-Pertua,

Kementerian Pendidikan Malaysia (KPM) menyedari bahawa enrolmen murid di SMK Kemabong telah melepas tahap optimum. Oleh yang demikian, sekolah telah beroperasi secara dua sesi bagi mengatasi masalah kesesakan di SMK Kemabong.

Untuk makluman Ahli Yang Berhormat, KPM telah mengenal pasti cadangan awal tapak bagi pembinaan sekolah menengah baharu sebagai langkah proaktif untuk menyelesaikan masalah kesesakan di sekolah tersebut. Pada masa ini, KPM dalam proses penyediaan dokumen untuk mendapatkan ulasan daripada agensi teknikal dan pihak berkuasa tempatan bagi pemilikan tapak tersebut. KPM akan mengemukakan permohonan kepada agensi pusat bagi pembinaan sekolah menengah baharu dalam Rancangan Malaysia Lima Tahun (RMLT) setelah selesai pemilikan tapak tersebut. Kelulusan permohonan ini adalah tertakluk kepada keutamaan dan kedudukan kewangan semasa Kerajaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : PUAN NOORITA BINTI SUAL [TENOM]

SOALAN

PUAN NOORITA BINTI SUAL [TENOM] minta **MENTERI KEWANGAN** menyatakan apakah langkah penyelesaian yang telah diambil oleh Kementerian bagi membantu masyarakat di daerah kecil Kemabong dalam menyelesaikan masalah ketiadaan kemudahan perbankan di daerah tersebut. Adakah Kementerian bercadang untuk mewujudkan Kemudahan Bank Bergerak di kawasan tersebut.

JAWAPAN

Tuan Yang di-Pertua,

Pihak Bank Negara Malaysia (BNM) mengambil maklum tentang kekurangan pusat akses kewangan terutamanya di kawasan luar bandar dan peka terhadap kesukaran mendapatkan akses kepada perkhidmatan perbankan. Pada masa ini, terdapat dua cawangan bank, satu lokasi mesin ATM dan enam ejen bank di dalam kawasan DUN Kemabong.

Pihak BNM akan terus bekerjasama dengan institusi kewangan bagi menyokong dan meningkatkan penyampaian kemudahan asas perkhidmatan perbankan di kawasan luar bandar dan akan mempertimbangkan penyediaan kemudahan bank bergerak, tertakluk kepada infrastruktur, capaian internet dan faktor-faktor lain yang berkaitan. Institusi kewangan juga digalakkan untuk terus memperluaskan pelantikan ejen bank di kawasan luar bandar.

Ejen bank merupakan saluran alternatif yang disediakan oleh institusi kewangan bagi menyokong dan meningkatkan penyampaian perkhidmatan perbankan asas di kawasan luar bandar seperti penyimpanan dan pengeluaran deposit, khidmat pemindahan dana, pembukaan akaun, pembayaran balik pembiayaan dan pembayaran bil utiliti. Ejen bank terdiri daripada entiti perniagaan seperti kedai runcit, stesen minyak, pejabat pos, dan koperasi yang dilantik oleh pihak institusi perbankan untuk menyediakan perkhidmatan perbankan asas.

Di samping itu, pihak BNM juga menggalakkan rakyat untuk melakukan urusan perbankan secara digital, termasuk menerima bayaran bantuan Kerajaan melalui akaun bank di mana transaksi perbankan boleh dilakukan di mana-mana dan pada bila-bila masa sahaja secara selamat. Perbankan digital juga diharap akan dapat meluaskan jangkauan perkhidmatan kewangan kepada kawasan-kawasan luar bandar, agar pengguna di seluruh Malaysia boleh mendapat manfaat daripada akses dan penggunaan perkhidmatan kewangan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : PUAN NOR AZRINA BINTI SURIP
[MERBOK]**

SOALAN

PUAN NOR AZRINA BINTI SURIP minta **MENTERI KESIHATAN** menyatakan apakah perancangan Kementerian untuk memastikan kanak-kanak bukan warganegara Malaysia tetapi ibu atau bapanya adalah warganegara Malaysia diberikan akses kepada Program Imunisasi Kebangsaan pada kadar yang sama seperti yang diberikan kepada kanak-kanak berwarganegara Malaysia.

JAWAPAN

Tuan Yang di-Pertua,

1. Adalah menjadi dasar Kementerian Kesihatan memberikan perkhidmatan imunisasi kepada semua kanak-kanak yang berada di Malaysia tanpa mengira status kewarganegaraan sebagai langkah pencegahan penyakit cegahan vaksin.
2. Bagi memastikan akses vaksin lebih meluas, maka sejak 6 Januari 2022, pengecualian caj perkhidmatan imunisasi bagi vaksin polio diberikan kepada semua kanak-kanak bukan warganegara berumur 7 tahun ke bawah, sebagai langkah pencegahan wabak polio daripada berulang. Memandangkan vaksin polio di fasiliti kesihatan Kementerian Kesihatan adalah dalam bentuk vaksin kombinasi enam serangkai (*difteria-tetanus-pertussis-polio-Hepatitis B-Haemophilus influenzae type b*), maka kanak-kanak yang menerima suntikan vaksin polio turut

SOALAN NO. 358

terlindung dari risiko jangkitan difteria, tetanus, pertussis, Hepatitis B dan Haemophilus influenzae Type b. Kanak-kanak bukan warganegara Malaysia tetapi ibu atau bapanya adalah warganegara Malaysia turut layak mendapat pengecualian caj perkhidmatan imunisasi bagi vaksin polio ini yang melindungi mereka dari 6 jenis penyakit cegahan vaksin.

3. Selain itu, pengurangan sebanyak 50% caj perkhidmatan imunisasi diberikan kepada kanak-kanak bukan warganegara yang berdaftar secara sah dengan *United Nation High Commissioner for Refugees* (UNHCR).
4. Kanak-kanak warga asing yang berumur 12 tahun ke bawah yang memegang sijil kelahiran Malaysia dan bapa atau ibunya adalah warganegara atau pemastautin tetap akan dikenakan caj RM1.00 untuk pendaftaran dan RM5.00 untuk suntikan imunisasi sekiranya mendapatkan perkhidmatan imunisasi di fasiliti KKM bagi lain-lain jenis imunisasi yang tidak disenaraikan untuk pengecualian caj.
5. Tanpa pengecualian yang diberikan, kadar caj yang dikenakan untuk kanak-kanak bukan warganegara Malaysia bagi perkhidmatan imunisasi adalah RM40 bagi pendaftaran dan RM40 bagi suntikan vaksin seperti mana yang ditetapkan di bawah Perintah Fi (Perubatan) (Kos Perkhidmatan) 2014.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB PUAN NOR AZRINA BINTI SURIP (MERBOK)

SOALAN

PUAN NOR AZRINA BINTI SURIP (MERBOK) minta **MENTERI DALAM NEGERI** menyatakan sama ada Kerajaan membuat penilaian dan kajian semula dasar yang lebih holistik dalam usaha-usaha pencegahan dadah dan apakah usaha drastik menangani isu dadah sintetik yang semakin berleluasa.

JAWAPAN

Tuan Yang Di Pertua,

Kementerian Dalam Negeri (KDN) melalui Agensi Antidadah Kebangsaan (AADK) sentiasa memastikan dasar dan polisi Kerajaan dalam menangani permasalahan dadah disesuaikan dengan perubahan semasa berdasarkan bukti saintifik (*evidence-based*) dan amalan terbaik yang dilaksanakan di dalam dan luar negara. Dasar Dadah Negara (DDN) yang telah digubal kali pertama pada tahun 1996 telah dikemaskini dan diluluskan semula pada tahun 2017 dengan mengambil kira ancaman semasa serta *trend* penagihan dan penyalahgunaan yang telah berubah daripada dadah jenis tradisional kepada dadah sintetik.

Selain itu, Pelan Strategik Kementerian Dalam Negeri 2021-2025 turut mensasarkan penghijauan 155 buah Kawasan Berisiko Tinggi (KBT) di seluruh negara. KBT bermaksud kawasan tumpuan yang menghadapi masalah penagihan dadah berdasarkan 60% populasi klien dalam komuniti seluruh negara. Fokus utama KBT adalah mengurangkan faktor risiko yang menyumbang kepada isu penyalahgunaan dadah dan bahan, pelencongan sosial dan meningkatkan faktor pelindung.

Program Penghijauan KBT ini melibatkan 4 fasa iaitu fasa 1 (pembersihan), fasa 2 (intervensi), fasa 3 (pengukuhan) dan fasa 4 (pengekalan). Sehingga Mac 2022, sebanyak 19 daripada 23 KBT yang disasarkan pada tahun ini telah berjaya mencapai status hijau seperti yang telah ditetapkan.

SOALAN NO : 360

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : PUAN NOR AZRINA BINTI SURIP
(MERBOK)**

SOALAN

PUAN NOR AZRINA BINTI SURIP (MERBOK) minta MENTERI PEMBANGUNAN LUAR BANDAR menyatakan status kebolehlaksanaan peruntukan sebanyak RM10.53 Bilion kepada Kementerian dalam Bajet 2022 yang lalu dalam memastikan usaha pemulihan negara khususnya masyarakat di luar bandar.

JAWAPAN

Untuk makluman Yang Berhormat, Kementerian telah menerima peruntukan sejumlah RM10.5 bilion merangkumi Bajet Mengurus RM3.52 bilion (33.4%) dan Bajet Pembangunan RM7.01 bilion (66.6%) untuk tahun 2022.

Bajet Mengurus KPLB yang diperuntukkan pada tahun 2022 meliputi perbelanjaan emolumen, perkhidmatan dan bekalan, aset, pemberian dan kenaan tetap serta perbelanjaan lain. Perbelanjaan pengoperasian tersebut selaras dengan konsep *zero-based budgeting* yang memfokuskan kecekapan dan ketepatan berbelanja.

Sehingga 11 Julai 2022, prestasi perbelanjaan mengurus KPLB adalah berjumlah RM1.718 bilion atau 48.30%. Kementerian komited untuk membelanjakan kesemua peruntukan mengurus yang diperuntukkan melalui pelaksanaan program/aktiviti yang telah dirancang dan seterusnya memastikan kumpulan sasar khususnya, masyarakat di luar bandar mendapat manfaatnya.

Manakala untuk Bajet Pembangunan, terdapat peningkatan peruntukan sebanyak RM358 juta (5.38%) berbanding peruntukan tahun 2021 (RM6.65 bilion). Peruntukan Pembangunan yang diterima oleh Kementerian ini merupakan peruntukan ketiga tertinggi selepas Kementerian Kewangan Malaysia dan Jabatan Perdana Menteri.

Kementerian mempunyai mekanisma yang sistematik dalam melaksanakan aktiviti pemantauan ke atas setiap program/ projek sehingga siap pelaksanaan dan selesai perbelanjaan. Kementerian komited untuk memastikan masyarakat luar bandar khususnya menerima manfaat ini demi memenuhi tuntutan pembangunan sosio-ekonomi terlibat di kawasan luar bandar.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : PUAN NOR AZRINA BINTI SURIP
[MERBOK]

SOALAN

PUAN NOR AZRINA BINTI SURIP [MERBOK] minta **MENTERI KEWANGAN** menyatakan apakah Kementerian mempunyai perancangan untuk mengenakan cukai khas ke atas semua pekerja asing yang bekerja di dalam negara ini selain bayaran permit dan levi untuk memasuki negara ini.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan tidak bercadang untuk memperkenalkan cukai khas ke atas pekerja asing yang bekerja di dalam negara pada masa ini kerana warga asing berstatus individu pemastautin yang bekerja di Malaysia juga tertakluk kepada cukai pendapatan dan turut dikenakan cukai kepenggunaan seperti cukai jualan dan cukai perkhidmatan.

Sekiranya cukai khas yang baharu dikenakan ke atas warga asing, ianya akan mewujudkan situasi cukai berganda (*double taxation*) ke atas pendapatan yang mereka terima serta dilihat sebagai layanan tidak adil dan saksama di kalangan pembayar cukai individu pemastautin.

Selain itu, pengenaan bayaran permit dan levi sedia ada adalah merupakan satu bentuk kutipan hasil khusus bagi pengambilan pekerja asing selain dari cukai pendapatan yang dikenakan ke atas gaji mereka. Sebarang cukai baharu akan menjelaskan minat pekerja asing untuk mengisi keperluan tenaga kerja di Malaysia pada masa ini yang sememangnya kritikal untuk merancakkan semula sektor-sektor yang terkesan dengan situasi ekonomi semasa.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : PUAN NOR AZRINA BINTI SURIP
[MERBOK]**

SOALAN

YB PUAN NOR AZRINA BINTI SURIP [MERBOK] minta **MENTERI PERUMAHAN DAN KERAJAAN TEMPATAN** menyatakan status terkini penjenamaan semula Program Perumahan Rakyat (PPR) kepada Program Perumahan Malaysia (PPM) dan apakah konsep baharu PPR ini meningkatkan pemilikan rumah mampu milik atau kediaman khususnya kepada golongan berpendapatan rendah B40.

JAWAPAN

Tuan Yang di-Pertua,

Untuk makluman Ahli Yang Berhormat, Projek PPR telah dimulakan sejak tahun 1982 melalui program yang dikenali sebagai Perumahan Awam Kos Rendah. Sejak 40 tahun lalu, program ini telah melalui pelbagai peringkat penambahbaikan oleh Kerajaan Persekutuan mengikut arus pembangunan negara menerusi siri-siri Rancangan Malaysia. Sehingga kini, sebanyak 156 projek dengan 98,196 unit rumah telah berjaya disiapkan dan dihuni oleh golongan sasar daripada kumpulan B40. Pada masa yang sama, sebanyak 25 projek PPR dengan 10,062 unit sedang dalam pembinaan.

Selepas Pilihanraya Umum Ke-14, Jemaah Menteri pada 8 Januari 2020 telah bersetuju supaya Program PPR dijenamakan semula sebagai Rumah Malaysia di mana tiada lagi projek perumahan PPR dibina menggunakan peruntukan Perbelanjaan Pembangunan. Sebaliknya, Kerajaan akan menyediakan tanah dan pembinaan projek baharu akan dilaksanakan melalui kaedah *Request for Proposal* (RFP) dengan harga jualan ditetapkan di bawah RM300,000. Walau bagaimanapun, pada 20 Mei 2020, Jemaah Menteri bersetuju projek pembangunan Rumah Malaysia (Disewa) dibina dengan peruntukan Perbelanjaan Pembangunan Kerajaan Persekutuan manakala Rumah Malaysia (Dimiliki) diteruskan dengan menggunakan kaedah RFP.

KPKT berpandangan bahawa ketiadaan projek pembangunan perumahan PPR sejak 2020 telah menyebabkan kesukaran kepada golongan B40 untuk mendiami rumah sama ada secara pemilikan atau sewaan dengan harga yang mampu dibayar. Justeru, Program PPR diwujudkan semula melalui Memorandum Jemaah Menteri (MJM) bertajuk Hala Tuju Program Perumahan Rakyat di bawah KPKT untuk membantu golongan ini mendiami perumahan yang selesa dan berdaya huni.

SOALAN NO: 362

Bagi menyokong perkara ini, KPKT sedang menyediakan Dasar Hala Tuju Baharu PPR dengan hasrat untuk menambah keselesaan dan meningkatkan Indeks Daya Huni program perumahan tersebut.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : PUAN NURUL IZZAH BINTI ANWAR
(PERMATANG PAUH)**

SOALAN

PUAN NURUL IZZAH BINTI ANWAR (PERMATANG PAUH) minta **MENTERI PEMBANGUNAN WANITA, KELUARGA DAN MASYARAKAT** menyatakan status dana geran pengurusan Program Pemulihan Dalam Komuniti (PPDK) Kampung Pertama bagi tahun 2022 memandangkan mereka terpaksa menutup operasi semenjak Februari 2022 kerana ketiadaan dana walaupun pengurusan sudah menyelesaikan isu tadbir urus pasca siasatan SPRM.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) telah menerima laporan penyelewengan wang awam oleh Pertubuhan Pemulihan Dalam Komuniti (PDK) Kg. Pertama yang berlaku dari tahun 2014 sehingga 2017. Susulan itu, Jawatankuasa Siasatan telah ditubuhkan bagi menyiasat kes tersebut dan Laporan Akhir Kehilangan Wang Awam di Pemulihan Dalam Komuniti (PDK) Kg. Pertama Seberang Perai Tengah, Pulau Pinang bertarikh 14 Oktober 2021 telah dikemukakan kepada Kementerian Kewangan bagi mendapatkan keputusan.

Untuk makluman Tuan Yang di-Pertua, dalam hal berkaitan kehilangan wang awam, merujuk kepada Pekeliling Perbendaharaan WP 10.3 ‘Pengurusan Kehilangan dan Hapus Kira Wang Awam’ hanya Menteri Kewangan yang mempunyai kuasa untuk meluluskanhapus kira bagi kehilangan wang awam yang telah berlaku. KPWKM memandang serius isu penyelewengan ini dan dengan mengambil kira kemaslahatan wang awam, penyaluran bantuan kewangan kepada PDK Kampung Pertama ditangguhkan ke suatu tempoh yang akan ditetapkan kemudian dan akan disemak semula tertakluk kepada keputusan Kementerian Kewangan.

Dalam aspek tindakan jenayah pula, pihak Suruhanjaya Pencegahan Rasuah Malaysia (SPRM) melalui surat rujukan bertarikh 28 April 2022 memaklumkan bahawa siasatan kes di PDK Kampung Pertama, Seberang Perai Tengah telah selesai dan sedang dalam penelitian pihak Timbalan Pendakwa Raya, SPRM Pulau Pinang untuk keputusan.

Sekatan ke atas dana geran pengurusan Program Pemulihan Dalam Komuniti (PPDK) Kampung Pertama dilaksanakan berdasarkan syor daripada Jawatankuasa Siasatan, KPWKM yang menetapkan beberapa tindakan yang perlu diambil sekiranya berlaku penyelewengan seperti berikut:

- 1) individu terlibat (penyelia atau petugas) hendaklah ditamatkan perkhidmatan oleh pertubuhan;
- 2) individu terlibat/bertanggungjawab pada masa kejadian (pengerusi atau ahli jawatankuasa) hendaklah meletakkan jawatan dan pertubuhan dibubarkan; atau
- 3) komuniti boleh membentuk satu jawatankuasa pengelola yang berhasrat untuk melaksanakan program PDK dan mengadakan Mesyuarat Agong serta membuat lantikan jawatankuasa baharu dan mengemukakan senarai jawatankuasa baharu kepada Jabatan dan pihak Pendaftaran Pertubuhan (ROS);

SOALAN NO: 363

- 4) mengemukakan permohonan Bantuan Kewangan Kepada Pertubuhan Yang Melaksanakan Program Pemulihan Dalam Komuniti kepada Pengarah Jabatan Kebajikan Masyarakat Negeri sekiranya memerlukan peruntukan untuk diangkat kepada Jawatankuasa Pertimbangan Bantuan Kewangan Kepada Pertubuhan yang Melaksanakan Program PDK di ibu pejabat;
- 5) pertimbangan bantuan adalah berdasarkan keperluan dan baki peruntukan; dan
- 6) Pertubuhan PDK atau mana-mana Pertubuhan Bukan Kerajaan (NGO) yang masih dalam siasatan akibat penyelewengan peruntukan Kerajaan ditangguhkan pemberian sebarang bantuan kewangan sehingga kes selesai.

Walaupun pihak pengurusan PPDK Kg Pertama telah mengambil langkah membubarkan jawatankuasa lama dan menubuhkan jawatankuasa baharu selepas siasatan SPRM, Bendahari daripada jawatankuasa lama telah dilantik semula sebagai Pengerusi di dalam jawatankuasa baharu. Berdasarkan Laporan akhir Penyiasatan SPRM di bawah WP 10.3 “Pengurusan Kehilangan dan Hapus Kira Wang Awam”, syor yang dikemukakan adalah JKM Negeri Pulau Pinang dan Pejabat Kebajikan Masyarakat Daerah (PKMD) Seberang Perai Tengah menasihati Pengerusi Pertubuhan PDK Kampung Pertama yang masih berkhidmat di dalam jawatankuasa baharu agar meletakkan jawatan sebagai Pengerusi kerana beliau mempunyai sejarah lampau hilang kredibiliti dan integriti dalam mengurus dana awam sepanjang beliau menjalankan tugasnya sebagai Bendahari PDK Kampung Pertama pada tahun 2015 – 2017 sehingga berlakunya kehilangan wang awam yang diseleweng.

Bagi memastikan isu penyelewangan wang awam ini tidak berulang, pihak JKM sentiasa memantau pengoperasian PPDK melalui tenaga kerja di peringkat PKMD, JKM Negeri dan Ibu Pejabat JKM. Pihak PPDK juga dikehendaki menghantar laporan program dan laporan kewangan beraudit bagi tujuan permohonan semula geran baharu.

SOALAN NO: 363

Bagi menjamin kebajikan pelatih-pelatih yang terlibat dengan penutupan operasi PDK Kg.Pertama, JKM Negeri Pulau Pinang telah mempelawa keluarga-keluarga pelatih untuk menghantar anak-anak ke PDK yang berdekatan bagi meneruskan program pemulihan. Hebahan pelawaan ini dibuat melalui Penyelia Pertubuhan PDK Kg Pertama kepada semua ibu bapa pelatih yang terlibat. PPDK berdekatan yang dicadangkan adalah seperti berikut:

BIL	NAMA	JARAK DARIPADA PPDK KG PERTAMA
1.	PPDK Permata Intan, Permatang Rawa, Bukit Mertajam	4 km
2.	PPDK Seberang Jaya, P.Pinang	5 km
3.	PPDK Perai, Taman Perai Utama, Perai	8 km
4.	PPDK Bukit Minyak, Taman Bukit Minyak	10 km

KPWKM amat mengambil berat tentang kepentingan serta hak pelatih-pelatih di PPDK Kg Pertama dan akan mengambil tindakan sewajarnya setelah keputusan daripada Kementerian Kewangan dan SPRM Pulau Pinang diterima.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : PUAN NURUL IZZAH BINTI ANWAR
[PERMATANG PAUH]**

SOALAN

Puan Nurul Izzah binti Anwar [Permatang Pauh] minta **MENTERI ALAM SEKITAR DAN AIR menyatakan:**

1. jumlah diperuntukkan kepada operator bekalan air Semenanjung daripada jumlah subsidi RM5.8 billion; dan
2. status penubuhan Ulu Muda Basin Authority bagi menjamin kelestarian kawasan tadahan Empangan Ahning, Pedu, kawasan tadahan Muda dan Beris, Limbangan Sg. Kedah dan Sg. Muda.

JAWAPAN

Tuan Yang Di-Pertua,

1. Untuk makluman Tuan Yang Berhormat, subsidi berjumlah RM 5.8 bilion yang diumumkan oleh YAB Perdana Menteri pada 24 Jun 2022 adalah bagi menampung surcaj elektrik berikutan keputusan untuk tidak menaikkan kadar tarif elektrik. Kerajaan Persekutuan belum membuat sebarang ketetapan berhubung pemberian subsidi kepada operator air.
2. Bagi cadangan penubuhan *Ulu Muda Basin Authority*, Kementerian telah membuat semakan perundangan terhadap cadangan tersebut dan mendapati bahawa:
 - a. kawasan tanah yang terlibat adalah terletak sepenuhnya dalam Negeri Kedah. Dalam hal ini, Kerajaan Negeri Kedah merupakan pihak yang mempunyai bidang kuasa bagi mengawal selia isu-isu tanah, hutan dan sumber air di Lembangan Ulu Muda;
 - b. Kerajaan Persekutuan tidak mempunyai punca kuasa di bawah Perlembagaan Persekutuan untuk menggubal Akta Air dan menubuhkan UMBA. Hal ini kerana, perkara yang hendak dikawal selia oleh UMBA sebagaimana yang dicadangkan melibatkan tanah, sumber air dan hutan yang terletak di bawah kuasa perundangan dan eksekutif Negeri; dan
 - c. tindakan bersepadau antara Kerajaan-kerajaan Negeri yang terlibat sewajarnya dilaksanakan bagi menguruskan khazanah yang berharga dan menangani sebarang isu yang timbul berkaitan dengan Lembangan Ulu Muda melalui meja rundingan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : PUAN NURUL IZZAH BINTI ANWAR
(PERMATANG PAUH)**

SOALAN

PUAN NURUL IZZAH BINTI ANWAR (PERMATANG PAUH) minta **MENTERI TENAGA DAN SUMBER ASLI** menyatakan butir-butir pembelanjaan peruntukan bagi *Ecological Fiscal Transfer (EFT)* bagi tahun 2018-2021 dan pecahan mengikut negeri-negeri yang menerima EFT tersebut.

JAWAPAN

Tuan Yang di-Pertua,

1. Untuk makluman Ahli Yang Berhormat, *Ecological Fiscal Transfer for Biodiversity Conservation (EFT)* diperkenalkan pada tahun 2019 sebagai satu bentuk insentif kepada Kerajaan-kerajaan Negeri bagi melindungi dan memulihara kawasan perlindungan (*protected areas - PA*).
2. Kementerian Kewangan (MOF) telah menyediakan peruntukan sebanyak RM60 juta pada tahun 2019 dan RM70 juta pada tahun 2021 yang diagihkan kepada Kerajaan-kerajaan Negeri melalui Pemberian Berdasarkan Tahap Pembangunan Ekonomi, Infrastruktur dan Kesejahteraan Hidup (TAHAP). MOF juga telah membangunkan Garis Panduan Pemberian TAHAP yang menetapkan sembilan (9) skop bagi perbelanjaan peruntukan EFT.

3. Pecahan pengagihan peruntukan EFT kepada negeri adalah seperti berikut:

Bil	Negeri	Pengagihan (RM juta)	
		2019	2021
1	Sabah	12,180,000.00	12,997,800.00
2	Kelantan	5,810,000.00	5,938,200.00
3	Terengganu	4,260,000.00	6,893,100.00
4	Kedah	5,830,000.00	4,408,900.00
5	Pahang	5,820,000.00	8,498,900.00
6	Perlis	4,920,000.00	1,401,000.00
7	Sarawak	3,240,000.00	13,256,900.00
8	Perak	2,840,000.00	6,253,900.00
9	Johor	3,240,000.00	2,691,800.00
10	Melaka	4,260,000.00	500,100.00
11	Negeri Sembilan	2,680,000.00	2,699,400.00
12	Selangor	2,470,000.00	3,665,700.00
13	Pulau Pinang	2,450,000.00	794,300.00
Jumlah		60,000,000.00	70,000,000.00

4. Bermula tahun 2022, pelaksanaan EFT telah diletakkan di bawah seliaan Kementerian Tenaga dan Sumber Asli (KeTSA) selaras keputusan Mesyuarat Majlis Kewangan Negara Tahun 2021.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB PUAN NURUL IZZAH BINTI ANWAR

SOALAN

**PUAN NURUL IZZAH BINTI ANWAR (PERMATANG PAUH) minta
MENTERI DALAM NEGERI menyatakan :-**

- (a) bilangan kanak-kanak di Pusat Tahanan Imigresen atau Depot Imigresen mengikut pecahan warganegara pada 2021 dan 2022; dan
- (b) pecahan bilangan remaja yang masih dalam tahanan atau reman di bawah POCA, SOSMA, POTA dan Akta Dadah Berbahaya 1985 (Langkah-langkah Pencegahan Khas).

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri melalui Jabatan Imigresen Malaysia (JIM) komited dalam memastikan kebajikan dan keselamatan semua tahanan depot imigresen termasuk kanak-kanak. Pada masa ini, JIM menguruskan 18 buah depot imigresen dan tiga (3) buah depot imigresen sementara dengan kapasiti keseluruhan berjumlah 21,150 orang.

Sepanjang tahun 2021, seramai 1,923 orang kanak-kanak berada di depot-depot imigresen seluruh negara meliputi 657 orang warganegara Filipina, 498 orang warganegara Myanmar, 424 orang warganegara Indonesia, 60 orang warganegara Thailand, 47 orang warganegara Vietnam dan 237 orang lain-lain warganegara.

Manakala sehingga 12 Julai 2022, terdapat 1,494 orang kanak-kanak yang ditahan di semua depot imigresen seluruh negara yang terdiri daripada 670 orang warganegara Myanmar, 397 orang warganegara Indonesia, 244 orang warganegara Filipina, 80 orang warganegara Thailand, 21 orang warganegara Vietnam dan lain-lain warganegara seramai 82 orang.

Merujuk kepada remaja kategori remaja ditahan atau direman di bawah POCA, POTA dan Akta Kesalahan Keselamatan (Langkah-Langkah Khas) SOSMA 2012 (Akta 747) bagi tempoh 2021 hingga 202 pula, tiada individu yang ditahan di bawah akta tersebut.

Walau bagaimanapun, bilangan remaja yang masih dalam tahanan atau reman sehingga Jun 2022 di bawah Akta Dadah Berbahaya 1985 (Langkah-langkah Pencegahan Khas) adalah melibatkan 18 orang remaja.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

SOALAN

**PUAN NURUL IZZAH BINTI ANWAR [PERMATANG PAUH] minta
MENTERI SUMBER MANUSIA menyatakan :-**

- (a) bilakah pindaan Akta Kerja 1955 akan dikuatkuasa termasuk pemanjangan cuti materniti kepada 98 hari, dan 7 hari cuti paterniti; dan
- (b) jika pindaan berkuatkuasa 1 September 2022, adakah pekerja hamil hanya berhak mendapat 98 hari jika bersalin mulai 1 September.

JAWAPAN

Tuan Yang di-Pertua,

Pindaan Akta Kerja 1955 yang telah diluluskan di Parlimen pada 29 Mac 2022 telah mendapat perkenan Yang di-Pertuan Agong dan diwartakan pada 10 Mei 2022. Pindaan-pindaan yang telah diluluskan ini telah diangkat untuk pertimbangan YB Menteri Sumber Manusia dan dicadang dikuatkuasakan pada 1 September 2022.

Bagi pekerja hamil, mereka hanya berhak menerima faedah cuti bersalin sebanyak 98 hari berbanding hanya 60 hari sebelum ini jika bersalin mulai tarikh kuat kuasa pindaan tersebut iaitu 1 September 2022.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB BUKAN LISAN

DARIPADA : DR. ONG KIAN MING (BANGI)

SOALAN

DR. ONG KIAN MING (BANGI) minta **MENTERI TENAGA DAN SUMBER ASLI** menyatakan jumlah keluasan dan peratusan hutan simpan kekal yang telah dinyahwartakan (“*degazetted*”) di setiap negeri, serta jumlah kawasan tersebut yang telah diganti bagi setiap negeri. Nyatakan bagaimana hutan simpan kekal yang telah dinyahwartakan (“*degazetted*”) akan diganti.

JAWAPAN

Tuan Yang di-Pertua,

1. Untuk makluman Ahli Yang Berhormat, berdasarkan rekod yang dikemukakan oleh Jabatan Perhutanan Semenanjung Malaysia (JPSM), jumlah keluasan Hutan Simpanan Kekal (HSK) di Semenanjung yang diwarta keluar bagi tempoh tahun 2017 hingga 2021 adalah 0.95 peratus atau 45,473 hektar, manakala jumlah keluasan HSK yang diwarta masuk bagi tempoh yang sama adalah 1.57 peratus atau 75,637.40 hektar.

2. Kesemua pewartaan keluar kawasan HSK di Semenanjung Malaysia kecuali negeri Selangor adalah tanpa konsultasi atau siasatan awam (*public hearing*). Di Semenanjung, Pihak Berkuasa Negeri (PBN) hendaklah menggantikan kawasan tanah yang dikeluarkan daripada HSK di bawah seksyen 11, Akta 313 dengan sesuatu kawasan tanah yang lebih kurang sama luasnya sebagai HSK baharu. Manakala di Selangor, terdapat sedikit perbezaan di mana PBN perlu mengadakan siasatan awam sebelum sesuatu kawasan HSK diwarta keluar dan HSK

yang telah diwarta keluar perlu digantikan dengan suatu kawasan tanah yang sama luas atau lebih besar selaras dengan pindaan Enakmen (Pemakaian) Akta Perhutanan Negeri Selangor 1985 yang telah dilaksanakan oleh Kerajaan Negeri pada tahun 2011.

3. Kementerian Tenaga dan Sumber Asli (KeTSA) melalui Jabatan Perhutanan Semenanjung Malaysia (JPSM) sedang melaksanakan pindaan ke atas Akta 313. Rang Undang-Undang (RUU) Perhutanan Negara (Pindaan) 2022 telah dibentangkan bagi bacaan pertama di Dewan Rakyat pada 3 Mac 2022. Pindaan yang dicadangkan kepada Akta 313 pada kali ini meliputi:

- (i) keperluan untuk mengadakan siasatan awam (*public hearing*) sebelum sesuatu kawasan HSK diwarta keluar; dan
- (ii) keperluan penggantian serentak HSK yang diwarta keluar dengan suatu kawasan tanah yang sama luas atau lebih besar.

4. Cadangan pindaan ini bertujuan memperketatkan proses pewartaan keluar HSK dan dalam masa yang sama akan mengurangkan tekanan pembangunan ke atas kawasan HSK sedia ada. Melalui pindaan ini juga, pewartaan keluar HSK bagi tujuan pembangunan akan merupakan pilihan terakhir yang diambil oleh Pihak Berkuasa Negeri setelah semua aspek *due-diligence* dengan izin, dilaksanakan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. DR. ONG KIAN MING
[BANGI]

SOALAN

DR. ONG KIAN MING [BANGI] minta **PERDANA MENTERI** menyatakan bilangan banduan yang telah tamat hukuman penjara dan telah dibebaskan yang telah didaftarkan semula sebagai pemilih di bawah program daftar pemilih automatik yang dilaksanakan baru-baru ini.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, umur kelayakan pengundi 18 tahun dan pendaftaran pemilih secara automatik telah berkuatkuasa mulai pada 15 Disember 2021. Selaras dengan penguatkuasaan tersebut, Suruhanjaya Pilihan Raya Malaysia (SPR) telah **mewartakan Daftar Pemilih Tambahan Bulan Mei Tahun 2022 (DPT BLN5/2022)** pada **16 Jun 2022**. Sehingga pewartaan DPT BLN5/2022 ini, seramai **2,400 orang** telah dibebaskan daripada tahanan penjara dan didaftarkan sebagai pemilih secara automatik.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DR. ONG KIAN MING [BANGI]

SOALAN

DR. ONG KIAN MING [BANGI] minta **MENTERI KANAN PENDIDIKAN** menyatakan status terkini rancangan pembinaan sekolah rendah di Taman Sutera, Kajang.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah diluluskan projek Sekolah Kebangsaan Taman Sutera, Kajang dalam Rancangan Malaysia Ke-10 (RMKe-10) tahun 2012 dengan kos projek berjumlah RM24 juta. Skop projek meliputi satu blok pentadbiran dan akademik tiga tingkat, satu blok prasekolah satu tingkat dan kemudahan berkaitan. Pelaksanaan projek ini tidak dapat diteruskan pada tahun 2012 kerana terdapat peningkatan kos berikutan pelaksanaan kerja-kerja pelarasan tanah akibat daripada pembuangan sisa binaan pemaju di tapak projek. Keperluan perubahan rekabentuk kerja-kerja tanah ini turut memerlukan kelulusan semula Kebenaran Merancang (KM) dari Majlis Perbandaran Kajang (MPKJ) dan melibatkan peningkatan kos projek yang tinggi.

Projek ini berada di peringkat prabina dan dalam peringkat akhir kelulusan untuk Kebenaran Merancang (KM) oleh MPKJ. Projek ini juga akan dinilai semula berikutan pertambahan kos berbanding perancangan asal pada tahun 2012. Peningkatan kos bagi projek ini akan dikemukakan untuk kelulusan agensi pusat.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DR. ONG KIAN MING (BANGI)

SOALAN

DR. ONG KIAN MING (BANGI) minta **MENTERI TENAGA DAN SUMBER ASLI** menyatakan jumlah pampasan yang akan dibayar kepada setiap keluarga yang terpaksa berpindah akibat pembinaan Loji Tenaga Hidro Nenggiri di Kelantan dan lokasi mana keluarga tersebut akan ditempatkan, dipindahkan dan jenis perumahan yang akan diberikan.

JAWAPAN

Tuan Yang Dipertua,

Untuk Makluman Ahli Yang Berhormat,

1. Pakej pampasan dan penempatan semula Orang Asli yang terkesan oleh Projek Hidroelektrik Nenggiri telah diluluskan oleh pihak Kerajaan Negeri Kelantan, tertakluk kepada jumlah sebenar kerugian harta-benda mereka. Pakej ini akan melibatkan pampasan secara wang tunai dan secara gantian (*replacement in kind*).
2. Penempatan semula akan dilaksanakan adalah hanya kepada penduduk Orang Asli di Pos Tohoi, Pos Pulat dan Kg. Kuala Wias kerana penempatan mereka pada masa sekarang akan ditenggelamkan. Bagi penduduk yang terlibat daripada tiga kawasan penempatan ini, pihak TNB akan membina penempatan baharu di tapak yang dipilih sendiri oleh Orang Asli yang terlibat. Dua kawasan yang telah dipilih oleh Orang Asli tersebut adalah berhampiran dengan lokasi perkampungan mereka sekarang dan ia telah pun diluluskan oleh Kerajaan Negeri Kelantan melalui Jawatankuasa Kawal Selia Merancang dan Menyelaras Aktiviti-aktiviti Pemajuan Projek Pembangunan (JKMPPP) pada 18 September 2019.
3. Setiap Ketua Isi Rumah (KIR) Orang Asli akan menerima sebuah rumah ganti bersaiz 800 kaki persegi (rumah berkembar dengan 3 bilik tidur, 1 ruang tamu, 1 dapur dan 2 bilik air) dengan tapak lot rumah bersaiz setengah ekar untuk setiap keluarga, lengkap dengan segala infrastruktur dan fasiliti moden yang lebih baik berbanding penempatan lama mereka. Bagi setiap keluarga, pihak TNB juga akan membangunkan ladang getah seluas lebih lima ekar dan menyediakan tapak kebun seluas setengah ekar. **Selepas perpindahan** yang dijadualkan pada pertengahan tahun 2025, pihak TNB akan menyediakan bantuan sara hidup sebanyak RM683/ Ketua Isi Rumah (KIR) untuk menampung **kos sara hidup asas** mereka, sementara menunggu ladang getah mengeluarkan hasil. Pokok getah dijangka

akan mengeluarkan hasil apabila berumur lebih lima (5) tahun dengan penjagaan dan pembajaan yang baik.

4. Bagi nilai pampasan untuk setiap keluarga yang terlibat, ia akan dimuktamadkan selepas sesi rundingan dengan Orang Asli. Satu perjanjian juga akan dimeterai di antara TNB dan setiap KIR terlibat. Perjanjian ini dijangka akan dapat dimuktamadkan pada penghujung tahun 2022. Nilai pampasan adalah berdasarkan kepada kadar yang diperolehi daripada Jabatan Penilaian & Perkhidmatan Harta (JPPH).

5. Secara amnya setiap Orang Asli yang terlibat akan menerima kemudahan seperti di jadual berikut:

Individu (per KIR)	Fasiliti Awam (di setiap lot)	Infrastruktur Asas
<ul style="list-style-type: none">• Tapak rumah• Rumah• Tapak Dusun• Ladang Getah	<ul style="list-style-type: none">• Sekolah rendah• Asrama• Kuarters guru• Dewan serbaguna• Balai Rawatan• Tadika KEMAS• Rumah Guru Tadika• Surau• Rumah Imam• Lot kedai• Pejabat JAKOA/JKKK• Rumah rehat JAKOA/JKKK	<ul style="list-style-type: none">• Bekalan elektrik• Bekalan air bersih• Jalan dalaman• Jalan masuk• Jambatan• Telekomunikasi• Paip bomba• Sistem perparitan• Sistem pembentungan• Kawasan perkuburan• Gelanggang sepaktakraw• Padang dan taman permainan kanak-kanak• Pintu masuk kawasan kampung berlanskap• Pondok pengawal

6. Jumlah KIR yang telah dikenal-pasti adalah dianggarkan seramai 284. Sejumlah RM216 juta telah diperuntukkan oleh TNB untuk pembinaan penempatan semula beserta kemudahan infrastruktur dan fasiliti, pampasan tanaman, saguhati dan latihan kemahiran kepada Orang Asli yang terlibat.
7. Untuk makluman, pampasan tanaman dan saguhati, jika ada, akan hanya dibayar kepada Orang Asli yang terkesan apabila tanaman dan harta mereka diambil alih oleh pihak TNB dan ini bergantung kepada kemajuan kerja pembinaan projek ini. Selain itu, kerja-kerja pembersihan kawasan (*land clearing*) untuk kerja-kerja penempatan semula ini telah pun bermula sejak 1 Mac 2022 dan dijangka penduduk Orang Asli yang terlibat akan dapat berpindah ke penempatan baharu mereka pada pertengahan tahun 2025.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DR. ONG KIAN MING
[BANGI]**

SOALAN

Minta **MENTERI PENGAJIAN TINGGI** menyatakan hutang terkini PTPTN, jumlah pinjaman yang dijangka akan dipinjam oleh PTPTN pada tahun 2022 dan rancangan PTPTN untuk menaikkan kadar bayaran balik pinjaman tertunggak pada tahun 2022.

JAWAPAN

Tan Sri Yang di-Pertua,

Sehingga 30 Jun 2022, kedudukan pinjaman serta penerbitan sukuk PTPTN adalah berjumlah RM39.00 bilion. Untuk tahun 2022, PTPTN dijangka akan membuat pembiayaan/penerbitan sukuk baharu berjumlah RM1.0 bilion pada September 2022 untuk menampung pembiayaan pelajar.

PTPTN sentiasa bertindak secara proaktif dalam memastikan bayaran balik pinjaman yang berterusan diterima daripada peminjam. Selain daripada dasar serta pendekatan sedia ada, PTPTN telah melancarkan aplikasi mudah alih (*mobile apps*) **myPTPTN** bagi memudahkan peminjam untuk membuat bayaran balik pada bila-bila masa dan di mana-mana sahaja.

Selain itu, PTPTN juga telah mengambil pendekatan awal untuk sesi atau program libat urus (*engagement*) dengan peminjam-peminjam tahun akhir di IPTA bagi memberikan penerangan serta kesedaran mengenai pengurusan kewangan serta kepentingan untuk membuat bayaran balik pinjaman pendidikan PTPTN.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BERTULIS
DARIPADA : Y.B. TUAN OSCAR LING CHAI YEW
[SIBU]

SOALAN NO. 373

Tuan Oscar Ling Chai Yew [Sibu] minta **KEMENTERIAN PERDAGANGAN ANTARABANGSA DAN INDUSTRI** menyatakan status kerjasama strategik antara Proton dan Geely dari segi pemindahan teknologi, penerokaan pasaran antarabangsa, pengurusan, peningkatan kualiti dan keselamatan kereta Proton.

JAWAPAN

Tuan Yang di-Pertua,

Perjanjian strategik di antara DRB-HICOM dan Geely dalam PROTON yang telah dimeterai pada 29 September 2017 terus membawa perkembangan positif kepada prestasi PROTON. Walaupun prestasi industri automotif tempatan telah terjejas disebabkan wabak COVID-19, PROTON masih mampu merekodkan peningkatan prestasi jualan pada tahun 2021 dengan peningkatan 114,700 unit kenderaan daripada 109,700 unit pada tahun 2020.

Melalui sokongan DRB-HICOM dan Geely, PROTON terus memberikan fokus pada inisiatif pemulihan prestasi melalui pendekatan memperkenalkan teknologi baharu serta membawa pembaharuan operasi perniagaannya.

Status perjanjian strategik DRB-HICOM dan Geely adalah seperti berikut:

a. **Teknologi dan Kejuruteraan**

Proton telah dapat meningkatkan keupayaan pengeluarannya di kilang dengan aplikasi teknologi seperti robotik. Contohnya, model X50 yang telah dilancarkan pada Oktober 2020 mengaplikasikan teknologi canggih yang memberikan manfaat optimal kepada pengguna dalam aspek **prestasi** (*enjin Turbo Direct Injection* dan *Dual Clutch Transmission*), **keselamatan** (*Advanced Driver Assistance System (ADAS) Level 2*) dan **keselesaan** (ciri-ciri arahan suara (*voice command*) dan kemasan dalaman yang menarik). Dalam mempelajari teknologi **smart car** pula, PROTON dan Smart Automotive Company (“smart”) menandatangani Memorandum Perjanjian bagi pengedaran kenderaan elektrik (*electric vehicle - EV*) di Malaysia dan Thailand. Syarikat “smart” adalah kerjasama strategik di antara Kumpulan Zhejiang Geely Holdings dan

Mercedes-Benz bagi membangunkan EV untuk pasaran global. PROTON berhasrat memanfaatkan kerjasama ini dalam usaha menceburi perniagaan EV.

Dari segi **kejuruteraan**, PROTON turut meningkatkan keupayaan teknikal dan daya-saing pasaran, seperti suntikan ciri-ciri keselesaan, sistem keselamatan serta rekabentuk yang diperbaharui dan penggunaan enjin cekap tenaga (*energy-efficient engine*) yang berprestasi tinggi; serta enjin yang dikeluarkan secara tempatan hasil kerjasama dengan *Geely Powertrain Research Institute* serta 19 syarikat pembekal tempatan bagi pembangunan 72 komponen eksklusif. Pelaburan dalam pembuatan enjin tempatan ini dijangka akan mencetuskan pertumbuhan dan memacu peningkatan kandungan tempatan, pekerjaan dan keupayaan teknikal dalam ekosistem automotif tempatan.

b. Penerokaan Pasaran Antarabangsa

Bagi tempoh enam bulan pertama (**Januari – Jun tahun 2022**), PROTON telah mengeksport sejumlah 2,722 unit iaitu **peningkatan sebanyak 81%** berbanding tempoh yang sama pada tahun 2021. Jumlah ini akan meningkat melalui pengeksportan model X50, X70 dan Saga yang dijangka tiba di **Afrika Selatan** pada bulan Julai tahun ini. Selain itu, PROTON juga mempunyai rakan tempatan di **Pakistan** dan **Kenya** yang menjalankan aktiviti pemasangan bagi tujuan pasaran domestik di negara-negara tersebut.

c. Pengurusan

Pihak pengurusan PROTON telah melaksanakan aktiviti-aktiviti utama berpandukan **teras strategik** yang merangkumi **rantaian nilai utama** iaitu produk, kapasiti pembuatan, perolehan dan kandungan tempatan, keberkesanan kos,

pencapaian kualiti secara konsisten, perkhidmatan berorientasikan pelanggan dan pembangunan modal insan. Pendekatan secara **konsisten** ini sentiasa memfokuskan usaha bagi mencapai sasaran yang ditetapkan, terutamanya dalam aspek **pemulihan prestasi syarikat** secara keseluruhan, **kepuasan pengguna** serta **kesejahteraan pekerja**.

d. Peningkatan Kualiti dan Keselamatan

PROTON telah berjaya meningkatkan kualiti dan ciri-ciri keselamatan produk terkini berbanding produk-produk terdahulu. Sebagai contoh, model-model keluaran PROTON kini dilengkapi dengan ciri-ciri keselamatan seperti **beg udara**, **Anti-Lock Braking System** dan **Electronic Stability Control**. Tawaran ciri-ciri keselamatan ini telah membantu meningkatkan permintaan ke atas produk PROTON kerana setaraf dengan tren yang ditawarkan oleh pesaing-pesaing PROTON.

PROTON kini sedang menggiatkan program pembangunan model-model baharu yang selaras dengan halatuju strategik ditetapkan dalam Dasar Automotif Nasional (*National Automotive Policy - NAP*) 2020. Kerajaan akan terus memastikan program kerjasama PROTON-Kumpulan Geely akan memanfaatkan syarikat pembekal komponen automotif tempatan dan meningkatkan keupayaan PROTON sebagai pengeluar kereta tempatan yang lebih berdaya saing.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)
DARIPADA : TUAN OSCAR LING CHAI YEW [SIBU]
TARIKH : JULAI-OGOS 2022

SOALAN

Tuan Oscar Ling Chai Yew [Sibu] minta **MENTERI PENGANGKUTAN** menyatakan jumlah penjualan kereta pengorek (excavator) pada tahun 2016, 2017, 2018, 2019, 2020, 2021 dan 2022.

JAWAPAN

Tuan Yang Di Pertua,

Untuk makluman Ahli Yang Berhormat, jumlah kenderaan jenis kereta pengorek (excavator) yang didaftarkan adalah seperti berikut:

TAHUN	JUMLAH
2016	37
2017	33
2018	34
2019	34
2020	32
2021	27
2022 (sehingga 30 Jun 2022)	22

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN OSCAR LING CHAI YEW [SIBU]

SOALAN

TUAN OSCAR LING CHAI YEW [SIBU] minta **MENTERI KEWANGAN** menyatakan faktor-faktor penyumbang kepada penambahan defisit Persekutuan dan pecahan butiran-butiran hutang Persekutuan dari tahun 2020 hingga kini.

JAWAPAN

Tuan Yang di-Pertua,

Bagi menangani krisis COVID-19 yang bermula pada 2020, Kerajaan telah mengambil langkah sistematik dengan melaksanakan perintah kawalan pergerakan dan menyediakan sokongan fiskal bagi melindungi rakyat, perniagaan dan ekonomi. Secara keseluruhan lapan pakej bantuan dan rangsangan ekonomi berjumlah RM530 bilion dengan suntikan fiskal hampir RM90 bilion telah diperkenalkan. Justeru, paras defisit fiskal berbanding KDNK telah meningkat daripada 3.4% pada 2019 kepada 6.2% pada tahun 2020 dan 6.4% pada tahun 2021. Pada 2022, Kerajaan mensasarkan paras defisit berkurang kepada 6.0% berbanding KDNK selari dengan unjuran pemulihan ekonomi.

Sehingga akhir-Jun 2022, jumlah keseluruhan hutang Kerajaan Persekutuan adalah sebanyak RM1,045.0 bilion atau 63.8% kepada KDNK berbanding pada akhir 2020 sebanyak RM879.6 bilion atau 62.0% kepada KDNK. Jumlah hutang Kerajaan Persekutuan terdiri daripada hutang domestik dan pinjaman luar pesisir. Hutang domestik meliputi Sekuriti Kerajaan Malaysia (MGS), Terbitan Pelaburan Kerajaan Malaysia (MGII), bil perbendaharaan dan Sukuk Perumahan Kerajaan (SPK) manakala pinjaman luar pesisir pula merangkumi pinjaman pasaran dan projek.

Tuan Yang di-Pertua,

Untuk jangka sederhana dan panjang, Kerajaan akan melaksanakan inisiatif pembaharuan fiskal seperti pengenalan Akta Tanggungjawab Fiskal (FRA), Strategi Hasil Jangka Sederhana (MTRS) dan semakan semula perbelanjaan awam termasuk menambah baik program subsidi bersasar bagi memastikan kecekapan dan keberkesanan perbelanjaan Kerajaan. Semua inisiatif ini adalah penting bagi memastikan kedudukan kewangan Kerajaan kekal kukuh, seterusnya menyediakan ruang fiskal yang mencukupi bagi menghadapi sebarang krisis pada masa hadapan.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN OSCAR LING CHAI YEW
(SIBU)**

SOALAN

TUAN OSCAR LING CHAI YEW (SIBU) minta MENTERI KOMUNIKASI DAN MULTIMEDIA menyatakan sama ada FINAS memainkan fungsinya dengan baik dan berjaya, apabila industri filem kita masih ketinggalan berbanding dengan negara jiran, adakah Kementerian menimbangkan pembubaran FINAS dan menggantikannya dengan satu agensi yang terdiri daripada pemain industri filem supaya ia lebih kondusif dalam membantu membangunkan industri filem kita.

JAWAPAN

Tuan Yang di-Pertua,

Akta Perbadanan Kemajuan Filem Nasional Malaysia 1981 telah dikuatkuasakan pada 1 Mei 1981 (Akta 244) dengan tujuan untuk menggalak, memelihara dan memudahkan kemajuan industri perfileman Malaysia dengan penumpuan kepada tiga aktiviti utama iaitu pengeluaran filem, pengedaran filem dan pemameran filem. Justeru, Perbadanan Kemajuan Filem Nasional Malaysia (FINAS) telah ditubuhkan secara rasmi pada 1 Jun 1981 bagi mencapai objektif tersebut.

Kementerian melalui FINAS telah dan sedang melaksanakan pelbagai inisiatif untuk memacu ekosistem dan meningkatkan sumbangan ekonomi industri kandungan kreatif negara. Antaranya adalah seperti berikut:

- (i) sebanyak 30 ribu lesen telah diluluskan mulai tahun 2017 untuk membolehkan syarikat-syarikat penerbitan menjalankan aktiviti pengeluaran, pengedaran dan pemameran filem sekali gus merancakkan ekonomi negara melalui rantaian bekalan (*supply chain*);
- (ii) program pemerksaan kemahiran dan professional seperti Komuniti@FINAS (KoFi) dan Program *Creativity Never Stops* (CNS). Setakat ini, sebanyak 245 program CNS telah dilaksanakan dengan pembabitan seramai 3,885 orang peserta. Manakala, sebanyak tiga program KoFi telah dilaksanakan di negeri Pahang, Perlis dan Kelantan pada tahun 2021 dan berjaya mencungkil 450 orang bakat baru. Selain itu, Program Peningkatan Kapasiti Kreatif Malaysia (MyCAP) turut dibangunkan untuk mengenal pasti kelayakan dan kapasiti pencapaian individu terutamanya bagi penggiat industri di belakang tabir;
- (iii) menyediakan prasarana dan infrastruktur sebagai kemudahan kepada penggiat industri filem menghasilkan karya kandungan kreatif berkualiti dengan teknologi yang terkini seperti Studio Digital Mixstage, Studio Sound Stage dan Pusat Pasca

Produksi di Kompleks Studio Merdeka FINAS, Cawangan di Petaling Jaya, Selangor dan Kompleks Perfileman FINAS Cawangan Sarawak. Kompleks baharu FINAS yang akan dilengkapi dengan infrastruktur dan teknologi yang terkini sedang dibangunkan di Damansara, Selangor;

- (iv) memudah cara dan membantu meningkatkan keupayaan penggiat industri melalui pemberian modal dan insentif seperti Dana Kandungan Digital (DKD), Insentif Penerbitan Filem di Malaysia (FIMI), Insentif Tayangan Filem Cerek (ITFC) dan Perjanjian Usahasama Filem (*Co-Production Treaty*). Inisiatif ini juga telah mewujudkan 38 ribu pekerjaan. Antara filem yang telah menerima manfaat DKD ialah Mat Kilau Kebangkitan Pahlawan, *The Assistant*, *Barbarian Invasion* dan *Poochandi*;
- (v) melalui FIMI pula, tawaran 30% rebat tunai dan tambahan 5% rebat bagi kriteria elemen kebudayaan Malaysia telah memberikan pulangan sebanyak RM900 juta nilai pelaburan ke dalam negara daripada produksi filem asing dan tempatan melalui penerbitan Filem dan TV yang menjalankan aktiviti perfileman di Malaysia.

FINAS juga giat meneruskan aktiviti galakkan promosi dan pemasaran filem tempatan di pasaran filem antarabangsa seperti Marche Du Film dan MIPCOM, Perancis, *Asia TV and Film Market*, Singapura, Hong Kong Filmart dan lain-lain. Dari tahun 2016 sehingga tahun 2021, sebanyak RM360 juta nilai hasil jualan kandungan kreatif tempatan di program pasaran antarabangsa telah berjaya diperoleh.

Peraturan Kemajuan Filem Nasional Malaysia (Skim Wajib Tayang) 2005 juga telah diperkenalkan pada tahun 2005 untuk memastikan filem-filem tempatan ditayangkan di pawagam dalam negara. Pemilik pawagam yang diluluskan lesen pemameran filem diwajibkan menayangkan filem tempatan atau filem usaha sama bagi suatu tempoh yang ditetapkan.

Secara keseluruhan dari penubuhan pada tahun 1981 hingga sekarang Finas sudah berjaya membantu hampir 70 ribu syarikat yang terlibat dalam tiga sektor utama industri perfileman Malaysia, iaitu

SOALAN NO: 376

pengeluaran, pengedaran dan pemameran serta memperkembangkan industri kreatif dan filem melibatkan hampir 500 ribu rakyat malaysia dari segi bakat baru dan penambahan peluang pekerjaan secara amnya.

Oleh itu, pembangunan ekosistem perfileman di bawah teraju FINAS kekal relevan dalam memacu industri ini sebagai antara penyumbang penting dalam sektor industri kreatif dan KDNK.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN OSCAR LING CHAI YEW [SIBU]

TARIKH : JULAI – OGOS 2022

SOALAN

TUAN OSCAR LING CHAI YEW [SIBU] minta **MENTERI PENGANGKUTAN** menyatakan komposisi dalam MAVCOM. Nyatakan sama ada terdapat wakil dari Sabah dan Sarawak dalam lembaga pengurusan MAVCOM dan sebabnya kalau tiada dan nyatakan sebab harga tiket penerbangan yang mahal dari Sabah, Sarawak ke Semenanjung, dan juga senarai kos operasi MAVCOM pada tahun 2016 - 2021.

JAWAPAN:

Tuan Yang Di Pertua,

1. Komposisi MAVCOM adalah berdasarkan Seksyen 5, Bahagian II, Akta Suruhanjaya Penerbangan Awam Malaysia 2015 seperti berikut:

5. (1) *Suruhanjaya hendaklah terdiri daripada anggota yang berikut:*
- a. *Pengerusi Eksekutif yang hendaklah dilantik oleh Perdana Menteri;*
 - b. *dua orang wakil Kerajaan Persekutuan yang terdiri daripada—*
 - (i) *Ketua Setiausaha Kementerian Pengangkutan; dan*
 - (ii) *Ketua Pengarah Unit Perancang Ekonomi Jabatan Perdana Menteri; dan*
 - c. *tidak kurang daripada empat tetapi lebih daripada enam orang anggota lain yang hendaklah dilantik oleh Menteri selepas berunding dengan Perdana Menteri, dan yang, pada pendapat Menteri, mempunyai pengalaman atau menunjukkan keupayaan dan profesionalisme dalam perkara yang berhubungan dengan ekonomi, kewangan, penerbangan, perniagaan, pentadbiran, undang-undang atau apa-apa perkara lain yang berkaitan dengan fungsi Suruhanjaya.*

2. Berdasarkan Seksyen 5, Bahagian II, Akta Suruhanjaya Penerbangan Awam Malaysia 2015, tiada penetapan yang dibuat berhubung wakil dari Sabah dan Sarawak dalam lembaga pengurusan MAVCOM. Walau bagaimanapun, ahli yang dilantik perlulah mempunyai pengalaman atau menunjukkan keupayaan dan profesionalisme dalam perkara yang berhubungan dengan ekonomi, kewangan, penerbangan, perniagaan, pentadbiran, undang-undang atau apa-apa perkara lain yang berkaitan dengan fungsi Suruhanjaya.
3. Sebagai makluman, kos operasi tahunan MAVCOM adalah sebanyak RM35.6 juta bagi tahun 2016, RM23.0 juta bagi tahun 2017, RM25.7 juta bagi tahun 2018, RM28.9 juta bagi tahun 2019, RM24.4 juta bagi tahun 2020 dan RM14.3 juta bagi tahun 2021.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN PANG HOK LIONG (LABIS)

SOALAN

TUAN PANG HOK LIONG (LABIS) minta **MENTERI PEMBANGUNAN LUAR BANDAR** menyatakan bilakah Kerajaan akan meminda Akta Orang Asli 1954 (Akta 134) Pindaan 1974 untuk membenarkan Orang Asli memiliki tanah secara peribadi.

JAWAPAN

Tuan Yang Di Pertua,

Untuk makluman Yang Berhormat, hak bagi masyarakat Orang Asli untuk memiliki tanah tidak memerlukan pindaan kepada Akta Orang Asli 1954 (Akta 134). Ini kerana masyarakat Orang Asli boleh memohon serta memilih tanah secara peribadi seperti mana warganegara Malaysia yang lain. Pada ketika ini terdapat ramai Orang Asli memiliki tanah secara peribadi.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS (2022)**

PERTANYAAN : BUKAN LISAN

DARIPADA : TUAN PANG HOK LIONG [LABIS]

SOALAN

minta **PERDANA MENTERI** menyatakan secara terperinci nama menteri-menteri dan negara yang mereka pergi bercuti dan jumlah yang telah dibelanjakan bagi tempoh dari 1 September 2021 sehingga bulan Mei 2022.

JAWAPAN

**DI JAWAB OLEH YB DATUK DR. ABD LATIFF BIN AHMAD MENTERI
DI JABATAN PERDANA MENTERI (TUGAS-TUGAS KHAS)**

Tuan Yang Di-Pertua,

1. Untuk makluman Yang Berhormat, Akta Ahli Parlimen (Saraan) 1980 (Akta 237) mengenai Ketentuan Elaun dan Keistimewaan Bagi Menteri Persekutuan menetapkan kemudahan Cuti Seberang Laut kepada Anggota Pentadbiran diperuntukkan sekali dalam satu tahun, setelah perkhidmatan genap satu tahun.
2. Kemudahan cuti Anggota Pentadbiran ini merupakan kelaziman dalam mana-mana Kerajaan dan berdasarkan kepada pematuhan akta atau pun pekeliling sedia ada. Namun demikian, Anggota Pentadbiran tidak layak menggunakan kemudahan Cuti Seberang Laut sekiranya kemudahan Cuti Dalam Negeri Bagi Menggantikan Cuti Seberang Laut telah diguna pakai.
3. Anggota Pentadbiran telah diberi pilihan untuk membuat tuntutan wang tunai yang senilai dengan jumlah harga tambang kapal terbang kelas satu bagi Anggota Pentadbiran serta isteri/suami dan kelas ekonomi bagi tiga (3) orang anak yang masih dalam tanggungan, dikira tidak melebihi tambang untuk perjalanan pergi balik di antara Kuala Lumpur – London pada tahun 2021 serta 2022.
4. Dalam hal ini, bagi 1 September 2021 sehingga bulan Mei 2022 sebanyak RM6,281,031.00 telah digunakan bagi tujuan menampung tuntutan perbelanjaan kemudahan bercuti Anggota Pentadbiran yang berkelayakan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN PANG HOK LIONG [LABIS]

SOALAN

TUAN PANG HOK LIONG [LABIS] minta **MENTERI KEWANGAN** menyatakan alasan Kerajaan membenarkan pihak Lembaga syarikat GLC dan GLIC untuk menaikkan gaji atau elaun Penggerusi dan/atau ahli-ahli Lembaga sedangkan negara mengalami kemerosotan ekonomi dengan teruk.

JAWAPAN

Tuan Yang di-Pertua

Untuk makluman Yang Berhormat, penetapan gaji dan elaun di dalam syarikat berkaitan Kerajaan (GLC) dan syarikat pelaburan berkaitan Kerajaan (GLIC) adalah berdasarkan beberapa kriteria utama seperti saiz syarikat, jenis perniagaan, status syarikat (tersenarai atau tidak tersenarai), kompleksiti tugas dan tanggungjawab serta lain-lain kriteria lagi. Selain itu, Kerajaan turut mengambil kira faktor kajian pasaran bagi memastikan gaji dan elaun yang ditetapkan berpadanan atau *mark-to-market*. Perkara ini penting bagi memastikan syarikat-syarikat berkenaan dapat mengekalkan bakat dan kemahiran kakitangan (*right talent and skill set*) selain dapat menarik bakat yang terbaik daripada pasaran untuk menyertai syarikat. Perkara ini penting bagi memastikan syarikat-syarikat berkaitan Kerajaan kekal berdaya saing terutamanya dalam mengharungi keadaan ekonomi ketika ini.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN PANG HOK LIONG (LABIS)

SOALAN

Minta **MENTERI PENGAJIAN TINGGI** menyatakan sama ada Kementerian mempunyai rancangan untuk menyediakan sebuah IPT di kawasan Parlimen Labis sebagai salah satu langkah untuk memajukan kawasan luar bandar.

JAWAPAN

Tan Sri Yang di-Pertua,

Keputusan untuk menubuhkan sesebuah Universiti Awam (UA), Politeknik atau Kolej Komuniti mengambil kira pelbagai aspek termasuklah pertumbuhan ekonomi, strategi pembangunan negara dan wilayah serta keperluan guna tenaga.

Untuk makluman Yang Berhormat, terdapat tujuh (7) buah Universiti Awam, tiga (3) buah Politeknik dan 14 buah Kolej Komuniti di negeri Johor. Manakala, institut pendidikan tinggi yang berada berhampiran dengan kawasan Parlimen Labis ialah Universiti Teknologi MARA Segamat dan Kolej Komuniti Segamat. Kesemua institusi pendidikan ini menawarkan pelbagai program akademik yang berdaya saing, merangkumi bidang seperti keusahawanan, kejuruteraan, teknologi, perdagangan, pemasaran, pelancongan, perkhidmatan dan pendidikan.

Justeru, cadangan pembinaan institusi pendidikan tinggi di Johor, khususnya di Parlimen Labis adalah tertakluk kepada kedudukan kewangan semasa Kerajaan. Walau bagaimanapun, pihak KPT akan sentiasa mengkaji perkara ini dari semasa ke semasa seiring dengan perubahan dan keperluan persekitaran yang berlaku.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN PANG HOK LIONG [LABIS]

SOALAN

Minta **MENTERI PENGAJIAN TINGGI** menyatakan menyatakan bahawa pada tahun 2021 Malaysia telah menjadi bahan ketawa di mata dunia apabila seramai 8,000 graduan telah diberikan PhD dan pada tahun ini mungkin seramai 6,000 graduan akan diberikan PhD. Apakah sistem atau langkah yang sedia ada untuk memastikan keluaran jumlah PhD adalah bertaraf antarabangsa sebelum isu ini teruk menjadi bahan ketawa dunia.

JAWAPAN

Tan Sri Yang Dipertua,

Kementerian Pengajian Tinggi (KPT) sememangnya amat menekankan aspek peningkatan kualiti dan mutu program pengajian yang ditawarkan oleh Institusi Pendidikan Tinggi (IPT). Oleh itu, KPT melalui Agensi Kelayakan Malaysia (MQA) melaksanakan proses jaminan kualiti program pengajian tinggi berdasarkan pematuhan kepada Kerangka Kelayakan Malaysia (*Malaysia Qualifications Framework*, MQA) dan standard program yang berkaitan.

Dalam hal ini, program Kedoktoran atau PhD yang melalui penilaian jaminan kualiti MQA perlu mematuhi Standard Ijazah Sarjana dan Kedoktoran yang merupakan dokumen rujukan dalam menawarkan program pascasiswazah di Malaysia. Antara keperluan standard yang khusus bagi program Ijazah Kedoktoran adalah:

- i. Keperluan untuk memenuhi tempoh lazim pengajian antara tiga (3) hingga empat (4) tahun;
- ii. Penghasilan tesis dinilai oleh sekurang-kurangnya dua (2) orang pemeriksa dalam bidang penyelidikan berkaitan yang mana salah satunya ialah pemeriksa luar;
- iii. Penghasilan tesis memenuhi hasil pembelajaran program bagi tahap Kedoktoran (Tahap 8 MQF);
- iv. IPT yang menawarkan program Ijazah Kedoktoran perlu menyedia garis panduan dan prosedur berkaitan struktur dan format penyediaan tesis berdasarkan keperluan standard program yang berkaitan; dan
- v. Pelantikan penyelia yang berkelayakan dan mencukupi serta mematuhi nisbah penyelia kepada pelajar seperti yang dikehendaki dalam standard program.

Kesemua perkara yang dinyatakan tertakluk kepada proses verifikasi dan audit pematuhan oleh MQA. Pihak kementerian juga sentiasa memantau kualiti pengajian tinggi bagi memastikan program yang ditawarkan oleh IPT tempatan mencapai piawaian yang ditetapkan agar graduan Ijazah Kedoktoran yang dihasilkan adalah berkualiti.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN PRABAKARAN A/L M
PARAMESWARAN [BATU]**

SOALAN

TUAN PRABAKARAN A/L M PARAMESWARAN [BATU] minta **MENTERI LUAR NEGERI** menyatakan langkah Kerajaan dalam menyelesaikan tuntutan Pulau Batu Puteh.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Batu atas pertanyaan yang diajukan.

Tuan Yang di-Pertua,

2. Kementerian Luar Negeri ingin menekankan kepada semua ahli dewan bahawa terma rasmi yang digunakan oleh Kerajaan dalam sebarang rujukan adalah "Batu Puteh". Kerajaan Malaysia berpendirian fitur tersebut adalah sebuah "batuan", dan bukan sebuah "pulau", memandangkan ia tidak memenuhi syarat sebagai sebuah pulau menurut Artikel 121 kepada Konvensyen Pertubuhan Bangsa-Bangsa Bersatu (PBB) berkenaan Undang-Undang Laut (KUUL 1982).

3. Sepertimana Yang Berhormat sedia maklum, pada 23 Mei 2008, Mahkamah Keadilan Antarabangsa (ICJ) telah membuat keputusan ke atas Kes Kedaulatan Ke Atas Batu Puteh, Batuan Tengah dan Tubir Selatan di antara Malaysia dan Singapura di mana ia telah memberi penghakiman bahawa kedaulatan ke atas Batu Puteh adalah berpihak

kepada Singapura; manakala kedaulatan ke atas Batuan Tengah adalah berpihak kepada Malaysia.

4. Berikutan keputusan tersebut, Kerajaan Malaysia dan Kerajaan Singapura telah membentuk mekanisme khusus untuk melaksanakan penghakiman ICJ berhubung kes tersebut dan juga untuk menangani isu-isu lain yang berkaitan, iaitu menerusi *Malaysia-Singapore Joint Technical Committee on the Implementation of the International Court of Justice Judgement on Pedra Branca, Middle Rocks and South Ledge* (“MSJTC”).

5. Beberapa jawatankuasa kecil telah ditubuhkan di bawah MSJTC untuk membincangkan isu-isu berkaitan secara spesifik. Jawatankuasa Kecil tersebut adalah, (i) *Sub-Committee on the Joint Survey Works in and around Pedra Branca, Middle Rocks and South Ledge*; (ii) *Sub-Committee on Maritime and Airspace Management and Fisheries*; (iii) *Sub-Committee on Maritime Boundary Delimitation on Pedra Branca, Middle Rocks and South Ledge*. Kedua-dua negara sedang berada di dalam proses rundingan pembatasan persempadanan maritim buat masa ini.

6. Kementerian Luar Negeri akan terus berusaha agar momentum positif rundingan diteruskan dan dalam masa yang sama, sentiasa memastikan kedaulatan dan kepentingan negara terpelihara.

7. Yang Berhormat juga maklum bahawa satu Pasukan Petugas Khas juga telah ditubuhkan pada 29 Oktober 2021 untuk meneliti semula undang-undang berkenaan semakan dan pentafsiran berkenaan kes Batu Puteh secara menyeluruh. Perkara ini adalah di bawah seliaan Bahagian Hal Ehwal Undang-Undang, Jabatan Perdana Menteri.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

**DARIPADA : YB DATO' RAMLI BIN DATO' MOHD NOR
(CAMERON HIGHLANDS)**

SOALAN

DATO' RAMLI BIN DATO' MOHD NOR [CAMERON HIGHLANDS] minta **MENTERI KANAN KERJA RAYA** menyatakan adakah pihak Kementerian berhasrat untuk menaik taraf jalan asas di kawasan Parlimen Cameron Highlands iaitu dari Kea Farm ke Kuala Terla kerana jalan raya di kawasan tersebut dilihat tidak sesuai untuk dilalui oleh kenderaan biasa.

JAWAPAN

Tuan Yang DiPertua,

Untuk makluman Ahli Yang Berhormat, Kementerian Kerja Raya amat prihatin terhadap isu kesesakan di Cameron Highlands. Kajian Kesesakan Lalulintas Cameron Highlands, Pahang telah dibentangkan kepada Unit Perancang Ekonomi, Jabatan Perdana Menteri (UPE, JPM) pada 9 Disember 2021 yang lalu. Antara skop cadangan adalah seperti berikut:

1. Fasa 1A : *One Way Loop* di Kea Farm sepanjang 3km dan Menaiktaraf Jalan dari Bulatan McDonald ke Brinchang / Time Tunnel sepanjang 1km;
2. Fasa 1B : Jalan alternatif dari Habu ke Tanah Rata sepanjang 4.6km;
3. Fasa 2 : Jalan alternatif dari Kuala Terla ke Persimpangan FT185 sepanjang 6.8km;
4. Fasa 3 : Jalan alternatif dari Tringkap ke persimpangan Kuala Terla sepanjang 8.1km;
5. Fasa 4 : Jalan alternatif dari persimpangan Tanah Rata ke persimpangan Tringkap sepanjang 6.2km dan terowong sepanjang 3.5km; dan
6. Fasa 5 : Jalan alternatif dari Ringlet ke Habu sepanjang 4.4km.

Untuk makluman Ahli Yang Berhormat, **cadangan untuk menaik taraf jalan asas dari Kea Farm ke Kuala Terla** tidak termasuk di dalam skop yang dicadangkan dalam kajian. Namun demikian, hasil kajian mencadangkan jalan alternatif dari Tringkap ke Kuala Terla untuk dilaksanakan pada fasa ketiga. Lanjutan itu, sebagai langkah permulaan untuk menyelesaikan isu kesesakan di Cameron Highlands serta

mengambil kira agihan peruntukan kepada negeri-negeri yang lain, Fasa 1A dicadangkan untuk dilaksanakan terlebih dahulu.

Untuk makluman Ahli Yang Berhormat, sukacita saya ingin memaklumkan bahawa Unit Perancang Ekonomi, Jabatan Perdana Menteri (UPE, JPM) telah meluluskan pelaksanaan fasa pertama iaitu **Projek Menaik Taraf Jalan dari Bulatan McDonald ke Persimpangan Brinchang / Time Tunnel dan membina One Way Loop di Kea Farm, Cameron Highlands, Pahang** dalam tempoh *Rolling Plan 2*, Rancangan Malaysia Kedua Belas (RP2, RMKe-12) tahun 2022.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' RAMLI BIN DATO' MOHD NOR
(CAMERON HIGHLANDS)**

SOALAN

DATO' RAMLI BIN DATO' MOHD NOR (CAMERON HIGHLANDS) minta **MENTERI PEMBANGUNAN LUAR BANDAR** menyatakan adakah pihak Kementerian berhasrat untuk memberikan kemudahan jalan asas bagi Kampung Nging dan Kampung Banda, Pos Lenjang.

JAWAPAN

Untuk makluman Yang Berhormat, pada ketika ini Kementerian melalui JAKOA sedang melaksanakan projek Membina Jalan Perhubungan Desa (JPD) Dari KOA Simoi Lama – Pos Lenjang, Lipis, Pahang sepanjang 27 kilometer yang dijangka akan siap pada 14 Jun 2024.

Jajaran JPD berkenaan merupakan jajaran jalan utama yang akan turut memberi manfaat kepada penduduk di Kampung Ngening dan Kampung Bandar dimana jarak kampung berkenaan dengan jajaran ini adalah dalam 7 kilometer melalui jalan tidak berturap.

Justeru Kementerian akan mempertimbangkan mengenai perancangan dan mengemukakan permohonan Rancangan Malaysia akan datang kepada Kerajaan Pusat melalui Unit Perancang Ekonomi, Jabatan Perdana Menteri (UPE, JPM) untuk membina jalan luar bandar di kedua-dua buah kampung ini sebagai kesinambungan kepada projek JPD KOA Simoi Lama – Pos Lenjang sedia ada.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' RAMLI BIN DATO' MOHD NOR
(CAMERON HIGHLANDS)**

SOALAN

DATO' RAMLI BIN DATO' MOHD NOR (CAMERON HIGHLANDS) minta **MENTERI PEMBANGUNAN LUAR BANDAR** menyatakan berapa jumlah terkini pelajar Orang Asli di seluruh IPTA dan IPTS yang masih belajar serta apakah senarai-senarai bantuan yang diberikan oleh Kementerian kepada para pelajar Orang Asli yang sedang menuntut di IPTA dan IPTS.

JAWAPAN

Untuk makluman Yang Berhormat, sehingga 30 Jun 2022 seramai 984 pelajar Orang Asli telah berjaya melanjutkan pengajian ke Institut Pengajian Tinggi Awam/Swasta (IPTA/IPTS) di bawah tajaan Jabatan Kemajuan Orang Asli (JAKOA). Pelajar Orang Asli yang berjaya melanjutkan pengajian ke Institut Pengajian Tinggi (IPT) dan layak menerima bantuan JAKOA adalah bermula dari peringkat Sijil sehingga Ijazah Sarjana Muda.

Antara bantuan yang diberikan oleh JAKOA kepada para pelajar Orang Asli yang melanjutkan pengajian ke IPT ialah bantuan kewangan pendidikan yang merangkumi yuran pengajian dan perbelanjaan sara diri sepanjang pengajian. Selain itu, pihak JAKOA juga menyediakan tiket penerbangan bagi pelajar yang menuntut di Universiti Malaysia Sabah (UMS) dan Universiti Malaysia Sarawak (UNIMAS). Namun begitu, pelajar yang berjaya melanjutkan pengajian ke UMS dan UNIMAS hanya layak menerima bantuan tiket penerbangan semasa pendaftaran pada semester pertama dan pulang ketika tamat pengajian. Selain itu, pelajar juga layak menerima bantuan dari Yayasan-Yayasan Negeri, Yayasan Universiti serta pinjaman boleh ubah dari pihak Majlis Amanah Rakyat (MARA) mengikut senarai kursus dan universiti yang diiktiraf di bawah *Tertiary Education Sponsorship Programme* (TESP).

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' RAMLI BIN DATO' MOHD NOR
[CAMERON HIGHLANDS]**

SOALAN

DATO' RAMLI BIN DATO' MOHD NOR [CAMERON HIGHLANDS] minta **MENTERI KANAN PENDIDIKAN** menyatakan usaha kerjasama di antara pihak Kementerian bersama Jabatan Kemajuan Orang Asli (JAKOA) dalam usaha merealisasikan Pelan Pembangunan Pendidikan Malaysia (2013-2025) di bawah Transformasi Pendidikan Orang Asli dan peribumi.

JAWAPAN

Tuan Yang di-Pertua,

Kementerian Pendidikan Malaysia (KPM) dan Jabatan Kemajuan Orang Asli (JAKOA) sentiasa bekerjasama dalam usaha memastikan murid Orang Asli mendapat akses pendidikan yang berkualiti selaras dengan matlamat Inisiatif Transformasi Pendidikan Orang Asli dan Peribumi dalam Pelan Pembangunan Pendidikan Malaysia (PPPM) 2013-2025.

Untuk makluman Ahli Yang Berhormat, KPM dengan kerjasama JAKOA telah memperkenalkan Program Jom Belajar yang merangkumi Program Khas Murid Orang Asli (ProKhas) dan *Chup Badui Sikulah* (CBS) pada tahun 2020. Program ini bertujuan untuk menyediakan pendidikan asas serta memantapkan penguasaan kemahiran asas membaca, menulis dan mengira (3M) kepada murid Orang Asli yang tidak pernah bersekolah dan menggalakkan interaksi dengan murid arus perdana. ProKhas adalah program yang menempatkan kelas di luar premis sekolah dengan guru melaksanakan sesi pengajaran dan pembelajaran (PdP) di lokasi. ProKhas telah dilaksanakan di Kampung Aring dan Kuala Koh Gua Musang,

Kelantan. Manakala CBS pula merupakan program khas kepada murid yang tidak pernah bersekolah atau sukar bergaul dengan murid di arus perdana. Sesi PdP dilaksanakan dalam sekolah contohnya di SK Kuala Tahan, Jerantut, Pahang.

Selain itu, program pendidikan di Pusat Pendidikan Komuniti (PPK) perkampungan Orang Asli yang terletak di kawasan pedalaman turut dilaksanakan. Melalui program ini, KPM memberi pendedahan atas pedagogi kepada tenaga pengajar yang dilantik dalam kalangan komuniti Orang Asli. Kanak-kanak Orang Asli yang terlibat didedahkan dengan kemahiran asas membaca, menulis dan mengira (3M) untuk memupuk minat ingin belajar dan sebagai pendedahan awal kepada alam persekolahan. Manakala pihak JAKOA pula menyediakan kemudahan bilik darjah, memberikan bantuan peralatan pembelajaran dan membekalkan makanan untuk kanak-kanak Orang Asli yang belajar di PPK.

KPM juga berkolaborasi dengan JAKOA dalam melaksanakan program kesedaran pendidikan kepada komuniti Orang Asli. Antara program yang dilaksanakan adalah Program Ziarah Kasih. Program ini bertujuan untuk menyantuni ibu bapa dan murid yang tidak bersekolah dan berisiko cicir. Ini bagi memastikan anak Orang Asli hadir ke sekolah dan terus kekal dalam sistem pendidikan. Sebagai galakan kepada murid untuk hadir ke sekolah, JAKOA turut menyediakan kemudahan pengangkutan bagi murid Orang Asli dan pemberian insentif wang saku.

KPM sentiasa komited untuk bekerjasama dengan JAKOA bagi merealisasikan Inisiatif Transformasi Pendidikan Orang Asli dan Peribumi di bawah PPPM (2013-2025) khususnya dalam menyediakan pendidikan yang terbaik kepada murid Orang Asli.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' RAMLI BIN DATO' MOHD NOR
(CAMERON HIGHLANDS)**

SOALAN

DATO' RAMLI BIN DATO' MOHD NOR [CAMERON HIGHLANDS]
minta **MENTERI PERTANIAN DAN INDUSTRI MAKANAN**
menyatakan adakah pihak Kementerian bercadang untuk mewujudkan
satu pelan strategik, pengurusan dan pembangunan pertanian yang
mampan serta inklusif di kawasan Parlimen Cameron Highlands
supaya permasalahan pertanian di kawasan tersebut dapat
diselesaikan.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan Pahang telah menubuhkan Perbadanan Kemajuan Cameron Highlands (PKCH) pada 1 Januari 2020. Penubuhan PKCH bertujuan untuk merancang pembangunan yang mampan dan lestari di Cameron Highlands. Aktiviti pertanian yang dijalankan di Cameron Highlands juga tertakluk di bawah peruntukan undang-undang yang dikuatkuasa oleh PKCH. Dalam konteks ini Kementerian Pertanian dan Industri Makanan (MAFI) melalui Jabatan Pertanian (DOA) Negeri Pahang bekerjasama dengan PKCH dalam memberi cadangan dan pengesyoran kaedah pelaksanaan pembangunan pertanian yang mampan dan lestari.

MAFI melalui DOA juga telah mengeluarkan “Garis Panduan Pembangunan Pertanian di Tanah Bercerun” pada tahun 2020. Ia merupakan rujukan dalam melaksanakan projek pertanian disamping mengelak kejadian hakisan tanah akibat aktiviti pertanian di tanah bercerun. Selain itu, DOA juga menggalakkan para peserta menjalankan aktiviti pertanian berlandaskan Amalan Pertanian Baik yang ditetapkan menerusi Skim Amalan Pertanian Baik Malaysia (myGAP) dan Skim Pensijilan Organik Malaysia (myOrganic). Dalam memastikan petani menjalankan Amalan Pertanian Baik, Kerajaan Negeri Pahang telah mengambil inisiatif dengan menetapkan syarat kepada 1,018 orang petani Cameron Highlands bagi pembaharuan lesen TOL perlu mendapatkan sijil myGAP.

Di samping itu, MAFI melalui MARDI sedang menaiktaraf stesen MARDI Cameron Highland sebagai Pusat Kecemerlangan Penyelidikan (COE) Pertanian Hijau yang berperanan sebagai Taman Agro Teknologi MARDI (TATM) bagi menyokong sektor pelancongan di Cameron Highlands, selari dengan matlamat ke arah pertanian mampan dan lestari.

Model ladang organik bersepadu di Tanah Tinggi Cameron bersama pakej pengurusan nutrien bersepadu bagi sayuran buahan

SOALAN NO : 388

secara organik turut dibangunkan di bawah Projek Pembangunan RMke-12 bagi meningkatkan pengeluaran pertanian organik melalui pakej penanaman dan pengurusan ladang yang mampan dan efisyen. Teknik mitigasi hakisan tanah yang efektif dan kos efektif turut dibangunkan oleh Agensi Penyelidikan dan Pembangunan di bawah MAFI bagi pembangunan strategi dan pengesyoran kaedah kawalan hakisan dan larian air permukaan secara efektif di kawasan pertanian tanah tinggi menjelang tahun 2025.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATO' SRI HAJAH ROHANI BINTI HAJI
 ABDUL KARIM [BATANG LUPAR]**

SOALAN

Minta **MENTERI PENGAJIAN TINGGI** menyatakan apakah dengan penubuhan Majlis TVET Negara (MTVET) dapat memastikan bahawa bilangan pelajar dalam pengkhususan vokasional dan teknikal di negara ini adalah tinggi, sebagaimana di Jerman apabila TVET dianggap salah satu sistem pendidikan utama sehingga 70 peratus pelajarnya memasuki aliran tersebut.

JAWAPAN

Tan Sri Yang di-Pertua,

Kerajaan telah merangka agenda pemerkasaan TVET Nasional melalui penubuhan Majlis TVET Negara (MTVET) yang telah diluluskan pada 18 Disember 2020. MTVET berperanan sebagai badan tertinggi pembuat keputusan berkaitan hala tuju TVET negara serta menyelaras ekosistem TVET merentasi Kementerian, penyedia TVET awam dan swasta serta industri. Ini turut memperkuuh usaha Kerajaan untuk mencapai 60% pelajar lepasan SPM menyertai bidang TVET menjelang 2030, seperti yang dinyatakan dalam Wawasan Kemakmuran Bersama 2030 (WKB 2030).

Hakikatnya, penetapan sasaran 225,000 pelajar lepasan SPM menyambung pengajian dalam bidang TVET telah diperkenalkan dalam Rancangan Malaysia Ke-11 (RMKe-11). Jumlah ini adalah berdasarkan bilangan lepasan SPM yang dianggarkan sebanyak 389,500 pada tahun 2019. Berdasarkan laporan pencapaian RMKe-11, pada tahun 2020, seramai 202,280 (pencapaian 51.93%) pelajar lepasan SPM telah menyertai bidang TVET.

Justeru, Kerajaan telah menetapkan sasaran baharu dalam Rancangan Malaysia Ke-12 (RMKe-12), iaitu sebanyak 55% pelajar lepasan SPM menyertai bidang TVET. Pencapaian yang memberangsangkan serta sasaran baharu ini menjadi titik perubahan kepada perspektif dan tanggapan yang lebih positif berkaitan bidang TVET kepada orang ramai.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB DATO' SRI HAJAH ROHANI BINTI HAJI
 ABDUL KARIM (BATANG LUPAR)**

SOALAN

DATO' SRI HAJAH ROHANI BINTI HAJI ABDUL KARIM (BATANG LUPAR) minta **MENTERI DALAM NEGERI** menyatakan apakah tindakan untuk menambah baik sistem permohonan atas talian Jabatan Imigresen yang menjadi rungutan rakyat ketika ini untuk permohonan pembaharuan Pasport Malaysia Antarabangsa bagi mengelakkan kesesakan di kaunter.

JAWAPAN

Tuan Yang Di Pertua,

Untuk makluman Ahli Yang Berhormat, permasalahan pembaharuan Pasport Malaysia Antarabangsa (PMA) yang berlaku baru-baru ini adalah bersifat sementara. Peningkatan jumlah permohonan yang tinggi menyebabkan kesesakan semasa permohonan. Walau bagaimanapun permasalahan tersebut telah dapat diatasi dengan efektif melalui inisiatif Jabatan Imigresen Malaysia iaitu permohonan pasport baharu secara atas talian.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATO' SRI HAJAH ROHANI BINTI HAJI
ABDUL KARIM (BATANG LUPAR)**

SOALAN

DATO' SRI HAJAH ROHANI BINTI HAJI ABDUL KARIM (BATANG LUPAR) minta **MENTERI PERTANIAN DAN INDUSTRI MAKANAN** menyatakan bagaimana Kementerian menyelesaikan masalah kekurangan bekalan ikan untuk jangka masa panjang disebabkan berlakunya amalan penangkapan ikan yang tidak mampan dan perubahan iklim.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) komited memastikan bekalan ikan negara sentiasa mencukupi. MAFI memandang serius berkenaan amalan penangkapan ikan yang tidak mampan oleh sesetengah pihak yang boleh menjaskan sumber dan alam sekitar, serta kesan perubahan iklim terhadap pengeluaran perikanan negara. Antara usaha dan langkah yang diambil oleh MAFI dalam mengatasi masalah kekurangan bekalan ikan untuk jangka panjang adalah seperti berikut:

1. Mewujudkan stokpail ikan;
2. Melaksanakan Dasar Penstrukturran Pukat Tunda Bagi Penangkapan Ikan Di Zon B;
3. Bertukar peralatan ataupun berpindah kawasan operasi tangkapan;
4. Program Pemodenan Vesel dan Mekanisasi Peralatan bagi Vesel Zon A dan Zon B.
5. Membangunkan Sistem Pengurusan Sumber Perikanan Baharu melalui penstrukturran semula sistem pengurusan konvensional;
6. Menubuhkan Jawatankuasa Kebangsaan Stok Perikanan Negara (JKSPN);
7. Meningkatkan penguatkuasaan serta mengambil tindakan di bawah Akta Perikanan 1985; dan
8. Meminda Akta Perikanan 1985 (Akta 317) dengan menaikkan kadar denda dan kompaun.

Sekian dan terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATO' SRI HAJAH ROHANI BINTI HAJI
ABDUL KARIM [BATANG LUPAR]**

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan intervensi jangka panjang yang akan dilaksanakan bagi memastikan isu manipulasi penetapan harga barang tidak berlaku bagi melindungi golongan berpendapatan rendah dalam menghadapi masalah kenaikan harga.

JAWAPAN

Yang di-Pertua,

Harga yang stabil adalah berpunca daripada bekalan yang stabil. Oleh itu kerajaan melaksanakan pemantauan bekalan dan intervensi ke atas bekalan jika berlaku isu dan masalah. KPDNHEP sentiasa memantau rapat perkembangan bekalan dan harga dengan pelbagai pihak melalui sesi libat urus terutama bersama MAFI, pengimport, pengeluar, pemborong dan peruncit. Pemantauan berkala itu dapat mengesan sebarang gangguan bekalan walaupun di peringkat negara pengeluar. Melalui usaha-usaha tersebut, kerajaan telah pun melakukan intervensi ke atas bekalan dan membuat keputusan bagi mencari sumber alternatif

Manipulasi harga yang berlaku akan dipantau oleh Kementerian dalam melaksanakan mekanisme anti pencatutan, pemantauan bekalan dan harga secara harian, siasatan ke atas peniaga yang disyaki melakukan kesalahan, pendakwaan ke atas peniaga yang didapati bersalah serta lain-lain tugas penguatkuasaan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : DATO' SRI HAJAH ROHANI BINTI HAJI
ABDUL KARIM (BATANG LUPAR)**

SOALAN

**DATO' SRI HAJAH ROHANI BINTI HAJI ABDUL KARIM
(BATANG LUPAR)** minta **MENTERI PEMBANGUNAN WANITA,
KELUARGA DAN MASYARAKAT** menyatakan apakah langkah yang akan diambil bagi memperbaiki kedudukan Malaysia menerusi Laporan Berkala Konvensyen Penghapusan Segala Bentuk Diskriminasi Terhadap Wanita (CEDAW) Keenam yang telah dikemukakan kepada Jawatankuasa CEDAW, Pertubuhan Bangsa-Bangsa Bersatu (PBB) pada 25 April 2022 yang lalu terutama dalam menghapuskan diskriminasi terhadap wanita.

JAWAPAN

Tuan Yang di-Pertua,

Konvensyen Penghapusan Segala Bentuk Diskriminasi Terhadap Wanita (CEDAW) merupakan satu perjanjian antarabangsa yang bertujuan untuk memberikan hak yang sama rata kepada wanita dengan cara menghapuskan diskriminasi jantina, menamatkan keganasan terhadap wanita dan memperkuuh hak wanita.

Malaysia telah menyerahkan laporan berkala keenam negara kepada Jawatankuasa CEDAW pada 25 April 2022. Ia meliputi kemajuan yang dicapai oleh Malaysia dari tahun 2017 hingga 2021 bagi menghapuskan diskriminasi ke atas wanita. Penyediaan laporan tersebut yang diterajui oleh Kementerian Pembangunan Wanita, Keluarga dan Masyarakat (KPWKM) merupakan hasil daripada konsultasi bersama pelbagai pihak terutamanya Kementerian dan agensi Kerajaan yang berkaitan termasuk pertubuhan bukan kerajaan bagi memastikan laporan tersebut memberi maklum balas terhadap saranan Jawatankuasa CEDAW.

Malaysia telah menunjukkan pencapaian yang berterusan dalam usaha memastikan pelaksanaan peruntukan Konvensyen meskipun negara menghadapi pelbagai cabaran termasuk untuk kembali pulih daripada pandemik COVID-19 pada tahun 2020 dan 2021. Seiring dengan peruntukan konvensyen, Malaysia telah memperhalusi dasar domestiknya termasuk dari segi perundangan, peluang ekonomi, penyertaan politik dan sosial termasuk perhatian khusus terhadap inisiatif Kerajaan semasa pandemik COVID-19.

Bagi memastikan hak dan kebajikan wanita terus terpelihara, langkah penampaikan daripada aspek perundangan telah dibuat antaranya penggubalan Rang Undang-undang Antigangguan Seksual, Akta Kesalahan-Kesalahan Seksual Terhadap Kanak-Kanak dan Akta Keselamatan Sosial Pekerjaan Sendiri. Di samping itu, Kerajaan juga telah meminda beberapa Akta sedia ada antaranya Akta Keganasan Rumah Tangga (Pindaan) 2017 [Akta A1538] dan Akta Membaharui Undang-Undang (Perkahwinan dan Perceraian) 1976 [Akta 164].

Dari segi peluang ekonomi dan penyertaan dalam pembangunan negara, Kerajaan melalui Rancangan Malaysia Kesebelas (2016-2020), Rancangan Malaysia Kedua Belas, (2021-2025) dan Wawasan Kemakmuran Bersama 2030 (2021-2030) telah menggariskan secara komprehensif pelbagai inisiatif untuk memastikan pembangunan yang lebih inklusif untuk wanita.

Kerajaan juga mengguna pakai pendekatan bersepadu untuk mengarus perdana gender melalui kerjasama erat dengan pihak berkepentingan dalam persediaan, pelaksanaan dan pemantauan semua dasar dan program Kerajaan melalui pembentukan *Gender Focal Team* (GFT) yang diketuai oleh *Gender Focal Point* (GFP). Kerajaan melalui Kementerian Kewangan juga telah menggerakkan semula inisiatif Bajet Responsif Gender (GRB) bagi memastikan pelaksanaan belanjawan negara turut mengambil kira perspektif gender. Selain itu, Kerajaan turut meluluskan penubuhan Majlis Wanita Negara, Jawatankuasa Eksekutif Wanita Negara dan Jawatankuasa Kerja Wanita Negeri sebagai mekanisme pemerkasaan wanita yang lebih meluas yang melibatkan semua pihak yang berkepentingan di peringkat Kerajaan Persekutuan dan Kerajaan Negeri serta badan bukan kerajaan (NGO).

KPWKM komited dalam menjalankan usaha berterusan bagi memastikan persekitaran kondusif untuk wanita maju dan mencapai potensi penuh mereka tanpa didiskriminasi selain menggunakan pendekatan bersepadu untuk memperkasa wanita dan mengarus perdana gender. Usaha-usaha kerajaan ini adalah bukti komitmen negara dalam melaksanakan peruntukan CEDAW selaras dengan Perlembagaan Persekutuan, perundangan dan dasar negara dalam mendukung hak wanita.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

**DARIPADA : YB DATUK ROZMAN BIN DATUK HAJI ISLI
(LABUAN)**

SOALAN

DATUK ROZMAN BIN DATUK HAJI ISLI [LABUAN] minta **MENTERI KANAN KERJA RAYA** menyatakan jumlah kontraktor Bumiputera yang tidak lagi memperbaharui Sijil Perakuan Pendaftaran Kontraktor (SPPK) CIDB dan apakah isu, halangan dan cabaran yang dihadapi oleh kontraktor Bumiputera ketika ini.

JAWAPAN

Tuan Yang Di-Pertua,

Untuk makluman Ahli Yang Berhormat, berdasarkan Akta Lembaga Pembangunan Industri Pembinaan 19 (**Akta 520**), seseorang kontraktor adalah wajib memiliki Sijil Pendaftaran Perakuan Kontraktor (SPPK) dan Sijil Pendaftaran Kerja Kerajaan (SPKK) untuk terlibat di dalam perolehan kerajaan dan melaksanakan projek pembinaan. Statistik daripada Lembaga Pembangunan Industri Pembinaan (CIDB) menunjukkan bahawa semenjak tahun 2020 sehingga 30 Jun 2022, sebanyak **12,377 syarikat kontraktor G1 bumiputera tidak memperbaharui Sijil Perakuan Pendaftaran Kontraktor (SPPK) dan Sijil Perolehan Kerja Kerajaan (SPKK)**.

Untuk makluman Ahli Yang Berhormat, sektor pembinaan telah mengalami masalah kenaikan harga bahan binaan bermula dari suku kedua tahun 2020 sehingga kini. Pandemik yang melanda seluruh dunia telah menjasaskan keseluruhan rantai bekalan termasuk sektor pembinaan. Selain itu, faktor luar jangka seperti konflik yang berterusan antara Russia dan Ukraine turut menyumbang kepada kenaikan harga bahan binaan.

Kementerian Kerja Raya (KKR) bersama agensi dibawahnya sentiasa melaksanakan pemantauan secara berterusan ke atas harga bahan binaan. Berdasarkan pemantauan tersebut, harga bahan binaan utama seperti besi tetulang, simen, bitumen gred 60/70, pasir sungai dan konkrit siap bancuh telah menunjukkan berlakunya peningkatan.

Justeru itu, beberapa tindakan **telah diambil bagi menangani kenaikan harga bahan binaan** antaranya seperti berikut:

1. KKR bersama-sama agensi di bawahnya sentiasa mengadakan kerjasama dengan agensi Kerajaan yang berkaitan dan pihak industri

seperti pengeluar dan pengedar bahan binaan utama serta wakil kontraktor dalam memantau pergerakan harga bahan binaan. Beberapa sesi perbincangan dilaksanakan bagi mengenalpasti isu, punca dan cabaran yang dihadapi serta membincangkan penyelesaian ke atas cabaran berkenaan. Pihak industri telah mengemukakan cadangan berikut bagi menangani isu kenaikan bahan binaan:

(i) Senarai bahan binaan yang tertakluk dibawah VOP diperluaskan kepada semua bahan binaan tersenarai dalam Siaran Khas 1, 2 dan 3 yang diterbitkan oleh Jabatan Perangkaan Malaysia (DOSM).

(ii) Tempoh pelaksanaan VOP dilanjutkan sehingga 30 Jun 2023.

2. KKR turut mengangkat Isu dan Cabaran Pelaksanaan Projek dalam Sektor Pembinaan untuk dibincangkan bersama pakar dan badan penasihat berkaitan di peringkat lebih tinggi seperti di Majlis Tindakan Ekonomi (MTE) dan Majlis Pemulihan Negara (MPN). Pembentangan telah dilaksanakan di mesyuarat MTE pada 9 Ogos 2021 dan MPN pada 8 Februari 2022. Antara isu yang dinyatakan adalah mengenai kenaikan harga bahan binaan. Cadangan bagi menangani isu yang dikemukakan adalah seperti berikut:

(i) Memperluaskan VOP bagi item dan komponen lain yang turut mengalami kenaikan harga. VOP yang dikuatkuasakan hanya terhad kepada 4 bahan binaan sahaja.

(ii) Menggalakkan pelaksanaan VOP dalam projek swasta.

Kedua-dua mesyuarat telah bersetuju dengan cadangan yang dikemukakan.

3. KKR juga telah memohon supaya Pekeliling Perbendaharaan Malaysia PK 2.4. Pelaksanaan Syarat Perubahan Harga (Variation Of Price – VOP) dalam Kontrak Kerja ditambah baik agar lebih banyak

manfaat dirasai oleh pihak industri bagi meringankan beban pelaksanaan projek pembinaan. Pindaan pekeliling pada 1 Januari 2022 menyatakan, penguatkuasaan pekeliling dilanjutkan sehingga 30 Jun 2022. Untuk meringankan lagi bebanan kewangan pemain industri binaan, Kerajaan juga telah menambahkan sebelas (11) bahan binaan yang menjadikan jumlah keseluruhan bahan binaan sebanyak lima belas (15) yang antaranya termasuk simen, batu bata dan dinding, kaca, batu baur, bahan siling serta bahan bumbung dalam pelaksanaan syarat VOP.

4. Dalam membantu kontraktor G1 bertaraf Bumiputra memperolehi kerja agensi awam, **Kerajaan melalui Arahan Perpendaharaan P.K 2.2 Tahun 2022 telah mewajibkan kontraktor G1 memiliki Sijil Taraf Bumiputra (STB)** dalam perolehan kerja kerajaan sehingga RM 20,000.00.

5. KKR melalui CIDB telah melaksanakan program Contractor Continuous Development (CCD) bagi tujuan pembangunan kontraktor secara berterusan untuk semua kontraktor yang berdaftar dengan CIDB. CCD adalah pengiktirafan oleh CIDB terhadap penyertaan/sumbangan kontraktor dalam acara/program berkaitan bidang pembinaan yang boleh memberi nilai tambah kepada profesion mereka sebagai kontraktor. Melalui penyertaan dalam pelbagai aktiviti CCD, kontraktor G1 boleh membina *networking* dengan pelbagai lapisan kontraktor, pembekal, konsultan dan sebagainya yang boleh membuka ruang serta peluang untuk mereka meluaskan rantaian perniagaan. CCD tidak hanya terbatas kepada aktiviti latihan dan kursus semata-mata, malahan sumbangan atau pun pelaksanaan tanggungjawab social korporat syarikat (CSR) juga akan mendapat pengiktirafan oleh CIDB. Aktiviti berpersatuan juga boleh memberi nilai tambah kepada kontraktor G1 di mana kontraktor G1 melalui mesyuarat atau lain-lain sesi perjumpaan akan membuka minda dan memberi anjakan paradigma kepada kontraktor G1 dalam menghadapi industri pembinaan yang kian mencabar. CCD dikuatkuasakan sebagai salah satu syarat semasa pembaharuan

pendaftaran kontraktor bagi semua gred G1 hingga G7 bermula Januari 2010 sehingga kini.

6. KKR melalui CIDB sentiasa melaksanakan **aktiviti pemantauan harga purata bulanan** berterusan semenjak tahun 2002. Data harga diterbitkan melalui Portal National Construction Cost Centre (N3C) dan boleh diakses oleh orang ramai. Penerbitan ini membolehkan pemantauan dibuat terhadap trend harga. Harga bahan binaan ini dikumpulkan melalui kerjasama dengan beberapa persatuan berkaitan pembinaan yang diperolehi daripada kontraktor, pembekal dan peruncit

Tuan Yang Di-Pertua,

Untuk makluman Ahli Yang Berhormat juga, pada masa kini, tiada keperluan AP ditetapkan bagi mengimport bahan binaan besi sejak tahun 2008, tiada duti import dikenakan, selain prosedur import besi yang minima. KKR tidak mempunyai kuasa untuk mengawal harga bahan binaan ini. Namun, KKR sentiasa berkerjasama sepenuhnya dengan Kementerian Perdagangan Dalam Negeri Dan Hal Ehwal Pengguna (KPDNHEP) untuk pelaksanaan pemantauan harga bahan binaan dalam negara. Dalam hal ini, Kerajaan melalui KPNHEP akan mengambil tindakan undang undang berdasarkan Akta Kawalan Harga dan Anti Pencatutan 2011 (AKHAP 2011) dan Peraturan-Peraturan Kawalan Harga dan Antipencatutan (Mekanisme Untuk Menentukan Keuntungan Tinggi Yang Tidak Munasabah) 2018 terhadap perniaga yang memanipulasi harga bahan binaan untuk keuntungan yang tidak munasabah.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DATUK ROZMAN BIN ISLI [LABUAN]

SOALAN

DATUK ROZMAN BIN ISLI [LABUAN] minta **MENTERI ALAM SEKITAR DAN AIR** menyatakan jumlah dan kos projek tebatan banjir yang telah dilaksanakan tahun ini di seluruh negara khususnya di Sabah dan adakah ianya mengikut jadual.

JAWAPAN

Tuan Yang Di-Pertua,

1. Kerajaan telah meluluskan projek tebatan banjir dalam RMKe-11 sebanyak tujuh belas (17) di Negeri Sabah dengan peruntukan sebanyak RM749 Juta. Sebanyak tiga belas (13) projek di dalam peringkat pelaksanaan ditapak manakala empat (4) projek di dalam peringkat awalan. Kesemua projek RMKe-11 masih diteruskan di dalam RMKe-12.
2. Manakala dalam tempoh RMKe-10 dan RMKe-11, sebanyak lima (5) buah projek telah berjaya disiapkan dengan kos sebanyak RM53,000,000.00 untuk Negeri Sabah. Projek ini telah memberi manfaat kepada 12,500 orang penduduk disekitar kawasan projek.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DATUK ROZMAN BIN ISLI [LABUAN]

SOALAN

Datuk Rozman bin Isli [Labuan] minta **MENTERI ALAM SEKITAR DAN AIR** menyatakan jumlah kolam takungan banjir di Sabah dan jumlah yang akan ditambah sepanjang Rancangan Malaysia ke-12 (RMK-12).

JAWAPAN

Tuan Yang Di-Pertua,

1. Untuk makluman YB, sehingga kini terdapat sebanyak 127 buah kolam takungan di bawah pemilikan Pihak Berkuasa Tempatan (PBT) seluruh Sabah yang telah didaftarkan dalam senarai maklumat kolam takungan banjir JPS Malaysia.
2. Sepanjang Rancangan Malaysia ke-12 sebanyak empat (4) buah kolam takungan banjir yang baharu akan dibina oleh pihak JPS Negeri Sabah. Empat (4) buah kolam takungan banjir baharu tersebut termasuk dalam komponen projek seperti berikut:
 - i. 1 kolam untuk Rancangan Tebatan Banjir Persekutaran Kawasan Lido Bandaraya Kota Kinabalu Sabah;
 - ii. 2 kolam untuk Pembangunan Lembangan Sungai Bersepadu Sungai Moyog, Sabah melibatkan Kerja-Kerja Pembinaan Ban, Menaik Taraf Sungai Moyog dan Kerja-Kerja Berkaitan (Pakej 2A Dan Pakej 4), Sabah; dan
 - iii. 1 kolam untuk Rancangan Tebatan Banjir Sungai Likas, Bandaraya Kota Kinabalu, Sabah.
3. Dengan kepesatan pembangunan fizikal, kawasan bandar dan penempatan semakin terdedah kepada ancaman banjir yang berpunca daripada peningkatan air larian permukaan. Justeru itu, kolam takungan banjir merupakan fasiliti yang paling efektif untuk mengawal peningkatan kadar alir yang banyak dalam tempoh masa yang singkat.
4. Fasiliti kolam takungan banjir ini berfungsi dengan menyimpan air secara sementara sebelum dilepaskan secara terkawal ke saliran utama / sungai. Selain itu, kolam takungan ini juga boleh digunakan untuk tujuan merawat air, memberi nilai tambah dan tarikan kepada komuniti sebagai kawasan riadah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : DATUK ROZMAN BIN ISLI [LABUAN]

TARIKH : JULAI – OGOS 2022

SOALAN

DATUK ROZMAN BIN ISLI [LABUAN] minta **MENTERI PENGANGKUTAN** menyatakan adakah Kerajaan akan membenarkan pengusaha feri kenderaan dan penumpang Labuan-Menumbok-Labuan menaikkan harga tambang atau memberikan bantuan berbentuk subsidi bahan api dalam memastikan perkhidmatan pengangkutan utama penduduk Labuan tidak terjejas.

JAWAPAN

Tuan Yang Di Pertua,

1. Untuk makluman Ahli Yang Berhormat, kadar tambang feri di laluan perairan domestik negara dikawal selia melalui syarat pelesenan di bawah Lembaga Pelesenan Perkapalan Dalam Negeri (LPPDN) di bawah Seksyen 65D (d), Ordinan Perkapalan Saudagar 1952 yang memperuntukkan kuasa kepada YB Menteri Pengangkutan untuk meluluskan peraturan yang digubal berkaitan penetapan kadar dan caj pengangkutan yang membawa penumpang atau kargo.
2. Walau bagaimanapun, peruntukan 65D ini tidak terpakai bagi kapal-kapal di Sabah dan Sarawak. Pelesenan dan penetapan kadar tambang dan fi bagi kapal/ bot di bawah 15 *net registered tonnage* (NRT) di Negeri Sabah adalah di bawah kuasa perundangan Kerajaan Negeri di bawah Enakmen Pelabuhan dan Dermaga 2002.
3. Untuk makluman Ahli Yang Berhormat juga, laluan Labuan-Menumbok-Laluan merupakan sektor laluan feri yang menerima Subsidi Tambang Feri daripada Kerajaan. Pemberian subsidi sebanyak 50% tambang kepada penumpang feri dan bot telah bermula sejak tahun 2014 bertujuan untuk mengurangkan kos perjalanan pengangkutan laut yang ditanggung oleh rakyat Malaysia ke destinasi yang menghubungkan Labuan dengan Tanah Besar Sabah dan Sarawak.
4. Bagi isu subsidi bahan api pula, operator boleh memohon subsidi diesel dari Kementerian Perdagangan Dalam Negeri dan Hal Ehwal Pengguna (KPDNHEP) dan kelulusan dipertimbangkan secara *case-by-case* dalam Mesyuarat Jawatankuasa Subsidi Diesel yang dipengerusikan oleh Ketua Setiausaha KPDNHEP.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATUK ROZMAN BIN ISLI (LABUAN)

SOALAN

DATUK ROZMAN BIN ISLI (LABUAN) minta **MENTERI TENAGA DAN SUMBER ASLI** menyatakan pecahan penggunaan elektrik bagi pengguna domestik dan komersial dan industri bagi tahun 2020, 2021, Januari – Jun 2022.

JAWAPAN

Tuan Yang di-Pertua,

Untuk makluman Ahli Yang Berhormat,

1. Jumlah jualan elektrik bagi tahun 2020 adalah sebanyak 110,879,251 Mega-Watt jam (MWj) dengan pecahan jualan mengikut kategori seperti berikut:
 - a) Domestik sebanyak 29,960,590 MWj (27%);
 - b) Perdagangan sebanyak 35,831,498 MWj (32.4%);
 - c) Perindustrian sebanyak 42,789,848 MWj (38.6%); dan
 - d) Lain-lain sebanyak 2,297,315 MWj (2%).
2. Manakala, jualan elektrik bagi tahun 2021 adalah sebanyak 111,858,008 MWj iaitu peningkatan sebanyak 0.88% berbanding tahun 2020 dengan pecahan jualan mengikut kategori seperti berikut:
 - a) Domestik sebanyak 31,485,409 MWj (28.2%);
 - b) Perdagangan sebanyak 34,059,704 MWj (30.5%);
 - c) Perindustrian sebanyak 43,966,976 MWj (39.3%); dan
 - d) Lain-lain sebanyak 2,345,919 MWj (2%).
3. Jualan elektrik bagi tempoh Januari hingga Mei 2022 adalah sebanyak 49,116,504 MWj dengan pecahan jualan mengikut kategori seperti berikut:
 - a) Domestik sebanyak 13,258,152 MWj (27%);
 - b) Perdagangan sebanyak 16,053,536 MWj (32.7%);
 - c) Perindustrian sebanyak 18,815,021 MWj (38.3%); dan
 - d) Lain-lain sebanyak 989,795 MWj (2%)

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK HAJAH RUBIAH BINTI HAJI
WANG [KOTA SAMARAHAN]

SOALAN

DATUK HAJAH RUBIAH BINTI HAJI WANG [KOTA SAMARAHAN]
minta **MENTERI KEWANGAN** menyatakan status cadangan mewujudkan Pusat Transformasi Bandar (UTC) di Kota Samarahan.

JAWAPAN

Tuan Yang di-Pertua,

Pusat Transformasi Bandar (UTC) ialah inisiatif Kerajaan bagi menyediakan **saluran tambahan kepada perkhidmatan sedia ada** agensi Kerajaan kepada rakyat. UTC beroperasi melangkaui waktu operasi biasa pejabat Kerajaan bagi membolehkan rakyat mendapatkan perkhidmatan secara fizikal daripada agensi Kerajaan Persekutuan, Negeri, Badan Berkanun serta sektor swasta di bawah satu bumbung.

UTC dibangunkan di **bangunan sedia ada milik Kerajaan yang tidak digunakan secara optimum**, terletak di ibu negeri atau bandar dengan kepadatan penduduk yang tinggi dan lokasi yang strategik serta boleh diakses menggunakan pengangkutan awam.

Pada ketika ini, terdapat sebanyak 23 buah UTC di seluruh negara termasuklah 3 buah UTC yang beroperasi di Negeri Sarawak iaitu UTC Sarawak di Kuching, UTC Sibu dan UTC Miri. Berdasarkan kedudukan semasa kewangan kerajaan, Kementerian Kewangan (MOF) **tidak mempunyai perancangan** untuk membangunkan sebarang UTC baharu buat masa ini.

Sekian, terima kasih.

**PEMBERITAHUAN PERTANYAAN LISAN DEWAN NEGARA
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK HAJAH RUBIAH BINTI HAJI WANG
[KOTA SAMARAHAN]**

SOALAN

DATUK HAJAH RUBIAH BINTI HAJI WANG [KOTA SAMARAHAN] minta **PERDANA MENTERI** menyatakan situasi semasa ekonomi negara (inflasi, kadar pengangguran, pertumbuhan ekonomi dan pencapaian sektor ekonomi negara) serta pencapaian Sarawak.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang Di Pertua,

1. Ekonomi Malaysia telah berkembang sebanyak 3.1% pada tahun 2021 berbanding dengan penguncutan sebanyak -5.5% pada tahun 2020. Meskipun berhadapan dengan persekitaran ekonomi dan perdagangan global yang mencabar terutamanya disebabkan oleh pandemik COVID-19 dan konflik Rusia-Ukraine, keluaran dalam negeri kasar (KDNK) Malaysia masih mencatatkan pertumbuhan 5.0% pada suku pertama tahun 2022 berbanding -0.5% pada tempoh yang sama tahun 2021.

2. Sektor perkhidmatan merupakan sektor terbesar yang menyumbang kepada ekonomi negara dengan sumbangan sebanyak 57.0% kepada KDNK pada tahun 2021. Sektor kedua

terbesar adalah sektor pembuatan yang menyumbang sebanyak 24.3% kepada KDNK. Seterusnya, sektor pertanian, perlombongan dan pengkuarian serta pembinaan masing-masing menyumbang sebanyak 7.1%, 6.7% dan 3.7% kepada KDNK.

3. Dari segi inflasi, kadar inflasi yang diukur oleh Indeks Harga Pengguna (IHP) telah meningkat sebanyak 2.5% pada tahun 2021 berbanding deflasi -1.2% pada tahun 2020. Kadar inflasi Malaysia pada Mei 2022 adalah 2.8% (April 2022: 2.3%) didorong oleh peningkatan dalam kumpulan makanan dan minuman bukan alkohol (5.2%) dan pengangkutan (3.9%). Inflasi makanan terus meningkat ke paras baharu tertinggi sejak November 2011 dengan merekodkan kenaikan sebanyak 93% item dalam kumpulan ini. Kedudukan inflasi di Malaysia masih terkawal walaupun peningkatan harga barang di pasaran berlaku. Hal ini kerana, pelbagai inisiatif Kerajaan telah dilaksanakan seperti kawalan harga bagi produk makanan terpilih dan bantuan subsidi.
4. Manakala, pengangguran menunjukkan perubahan yang positif daripada 649.3 ribu orang pada April 2022 (3.9%) kepada 637.7 ribu orang pada Mei 2022 (3.9%). Sementara itu, kadar pengangguran belia turut bertambah baik kepada 12.5% pada Mei 2022 berbanding 12.8% pada April 2022 . Pemulihan pasaran buruh pada bulan Mei 2022 terus stabil seiring dengan pengoperasian penuh kesemua aktiviti ekonomi. Pasaran buruh semakin berkembang susulan lebih banyak permintaan dan penawaran berlaku dalam pasaran bagi menampung keperluan aktiviti ekonomi yang semakin meningkat.

Tuan Yang Di Pertua,

5. Bagi negeri Sarawak, ia kekal menjadi salah sebuah penyumbang utama kepada ekonomi negara iaitu sebanyak 9.5% kepada KDNK nasional pada tahun 2021. Pertumbuhan KDNK Sarawak meningkat pada tahun 2021 kepada 2.9% berbanding -6.8% pada tahun sebelumnya. Pertumbuhan ekonomi negeri Sarawak didominasi oleh sektor perkhidmatan diikuti oleh sektor pembuatan dan sektor

perlombongan dan pengkuarian yang terjejas disebabkan harga minyak mentah, minyak sawit dan getah yang rendah dan juga pandemik COVID-19 pada tahun 2020 telah kembali pulih dengan peningkatan dalam beberapa sektor. Sektor pembuatan sebagai contoh, kembali pulih kepada 11.2% berbanding -8.6% pada tahun 2020. Pemulihan ini dipacu oleh produk petroleum, kimia, getah dan plastik.

6. Dari sudut KDNK per kapita, prestasi Sarawak meningkat daripada RM48,785 pada tahun 2020 kepada RM57,635 dan ia merupakan antara negeri yang mencatatkan KDNK per kapita melebihi paras nasional (RM47,324) pada tahun 2021. Kadar pengangguran di Sarawak pula meningkat naik kepada 4.5% pada tahun 2021 berbanding 4.3% pada tahun 2020, namun masih lebih baik daripada prestasi nasional (2021: 4.6%). Selain itu, inflasi di Sarawak sebanyak 2.4% juga adalah lebih baik berbanding nasional sebanyak 2.8% pada Mei 2022.
7. Dengan peningkatan prestasi Sarawak dalam beberapa sektor berbanding tahun sebelum ini, dijangkakan prestasi ekonomi negeri ini terus meningkat susulan pengisytiharan pembukaan sempadan negara yang kembali merancakkan sektor ekonomi walaupun dihimpit dengan pelbagai krisis utama seperti krisis Ukraine-Rusia dan juga krisis inflasi global.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : PUAN RUSNAH BINTI ALUAI
[TANGGA BATU]**

SOALAN

PUAN RUSNAH BINTI ALUAI minta **MENTERI KESIHATAN** menyatakan :-

- (a) mengapa Hospital Besar Melaka masih menggunakan sistem rekod kesihatan secara manual; dan
- (b) sekiranya kakitangan Kerajaan di Hospital Besar Melaka tidak mampu untuk menguruskan peralihan kepada sistem berkomputer, mengapakah tidak dilantik ‘outsource’ khusus untuk menguruskannya.

JAWAPAN

Tuan Yang di-Pertua,

1. Matlamat pendigitalan sistem kesihatan Kementerian Kesihatan Malaysia (KKM) adalah berteraskan kepada Pelan Strategik Pendigitalan KKM 2021-2025 mengikut Teras Strategik I iaitu Pemerkasaan Perkhidmatan Kesihatan Digital Bersepadu dan Inklusif. Ini termasuk penggunaan aplikasi digital sebagai *Electronic Medical Record* (EMR) serta integrasi sistem-sistem dalam fasiliti kesihatan secara bersepadu melalui platform seperti *Hospital Information System* (HIS) dan *Health Information Exchange* (HIE).

SOALAN NO. 401

2. Projek rintis EMR negara dilaksanakan di Negeri Sembilan dengan menggabungkan empat komponen projek iaitu *Hospital Information System* (HIS) bagi hospital, TPC-OHCIS bagi klinik kesihatan, *Virtual Clinic* dan *Health Information Exchange* (HIE). Perancangan peluasan EMR ke seluruh negara akan dilaksanakan secara berperingkat.
3. KKM sedang memperhalusi kaedah peralihan kepada sistem berkomputer, termasuklah opsyen lantikan *outsource*. Pelbagai faktor perlu diambil kira dalam kaedah peralihan kepada sistem berkomputer seperti ketersediaan infrastruktur ICT di fasiliti, bekalan elektrik dan rangkaian komunikasi, status kewangan negara dan strategi pelaburan jangka masa panjang.
4. Bagi Hospital Melaka, permohonan bajet keperluan pelaksanaan sistem maklumat hospital telah dikemukakan untuk kelulusan bagi *Rolling Plan Ketiga* (RP3) Rancangan Malaysia Ke-12 (RMK12). Hospital Melaka juga sedang dalam proses menaiktaraf kapasiti elektrif bagi membolehkan pelaksanaan sistem maklumat hospital kelak. Projek naik taraf ini dijangka disiapkan pada September 2022.

Sekian, terima kasih.

SOALAN : 402

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB PUAN RUSNAH BINTI ALUAI

SOALAN

PUAN RUSNAH BINTI ALUAI (TANGGA BATU) minta **MENTERI DALAM NEGERI** menyatakan adakah Kementerian bercadang untuk meneruskan Program Pemutihan untuk mengawal jumlah kemasukan pekerja warga asing baharu sebagai usaha menampung kekurangan serius tenaga kerja sektor 3D di Malaysia.

JAWAPAN

Tuan Yang Di Pertua,

Untuk makluman Ahli Yang Berhormat, Kerajaan telah melaksanakan Pelan Rekalibrasi Pendatang Asing Tanpa Izin (PATI) merangkumi dua komponen utama iaitu Program Rekalibrasi Pulang dan Program Rekalibrasi Tenaga Kerja. Program Rekalibrasi Pulang membentarkan PATI untuk pulang secara sukarela ke negara asal tanpa melalui proses pendakwaan dan hukuman. Manakala bagi Program Rekalibrasi Tenaga Kerja, majikan dibenarkan meregularisasikan PATI dan mengajikan mereka secara sah. Pelan Rekalibrasi PATI ini telah dilaksanakan bermula 16 November 2020 hingga 30 Jun 2022 oleh Jabatan Imigresen Malaysia dengan kerjasama strategik dengan agensi-agensi Kerajaan yang lain tanpa penglibatan vendor atau pihak ketiga.

Sehingga 30 Jun 2022, seramai 293,907 orang PATI telah berdaftar untuk Program Rekalibrasi Pulang dan 418,528 orang PATI telah berdaftar untuk Program Rekalibrasi Tenaga Kerja. Ini menjadikan jumlah keseluruhan PATI direkodkan oleh Kerajaan adalah seramai 712,435 orang. Merujuk kepada pelaksanaan Program Rekalibrasi Kerja, Kementerian Dalam Negeri melalui Jabatan Imigresen Malaysia telah meluluskan sebanyak 114,121 Pas Lawatan Kerja Sementara (PLKS) bagi PATI yang telah melalui proses regularisasi.

Memandangkan Kerajaan baru sahaja selesai melaksanakan Pelan Rekalibrasi PATI, pada masa ini Kerajaan akan memberikan fokus kepada pasca pelaksanaan Pelan Rekalibrasi PATI terutamanya melibatkan pemantauan terhadap kelulusan yang diberikan, penguatkuasaan terhadap majikan yang ingkar masih mengajikan PATI serta penguatkuasaan kepada baki PATI yang ingkar kepada peluang yang telah diberikan oleh Kerajaan sebelum ini.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : PUAN RUSNAH BINTI ALUAI
[TANGGA BATU]**

SOALAN

PUAN RUSNAH BINTI ALUAI minta **MENTERI KESIHATAN** menyatakan apakah perancangan Kementerian untuk kegunaan aplikasi MySejahtera setelah bermulanya fasa endemik dan tidak digunakan lagi.

JAWAPAN

Tuan Yang di-Pertua,

1. Kerajaan dan Kementerian Kesihatan melihat platform aplikasi MySejahtera mempunyai potensi yang tiada batas. Kini, fungsi MySejahtera semakin berkembang dengan menambah pelbagai fungsi dan modul yang terbahagi kepada pengembara serta pengesahan penyakit berjangkit survelan dan pengesanan kontak, vaksinasi, kuarantin, eCOVID, serta informasi berkaitan kesihatan kendiri. Oleh itu aplikasi ini dapat dilihat sebagai salah satu aplikasi penting untuk kesihatan awam.
2. Selaras dengan usaha kerajaan dalam fasa peralihan ke endemik, KKM sedang dalam proses memperluaskan aplikasi MySejahtera daripada aplikasi berkaitan pengurusan pandemik COVID-19 (termasuklah program vaksinasi) kepada aplikasi kesihatan awam. Ini juga adalah sebahagian daripada usaha Kementerian Kesihatan untuk menggunakan teknologi digital dan inisiatif yang lebih inovatif dalam menjalankan tanggungjawabnya bukan sahaja untuk merawat pesakit, tetapi untuk kesihatan dan kesejahteraan sebagai usaha penting dalam memastikan Malaysia kekal sihat. Sudah pastinya, penggunaan

MySejahtera sebagai aplikasi yang mempunyai lebih 30 juta pengguna (termasuk tanggungan) yang didaftarkan, boleh dioptimumkan untuk menyokong pelbagai usaha Kementerian dalam perkara ini.

3. Sebagai permulaan, dua (2) modul baharu iaitu modul Program Imunisasi Kebangsaan [National Immunisation Programme (NIP)] dan modul saringan kesihatan sempena Inisiatif Saringan Kesihatan Kebangsaan [*National Health Screening Initiative*, NHSI] telah dilaksanakan. NIP merupakan satu usaha pendigitalan rekod kesihatan imunisasi bayi dan kanak-kanak yang akan memudahkan pengguna dan fasiliti kesihatan untuk mengesan rekod imunisasi dan menyeragamkan rekod kesihatan pengguna. Modul saringan kesihatan pula membolehkan pengguna MySejahtera menjalani saringan kesihatan dan dapat menyimpan rekod kesihatan mereka di dalam aplikasi masing-masing. Pengguna juga boleh melakukan saringan kesihatan kendiri di melalui aplikasi MySejahtera.
4. Kementerian juga kini sedang giat untuk melihat beberapa perkara lagi yang boleh dilaksanakan di aplikasi MySejahtera dalam masa terdekat ini yang akan diumumkan dari masa ke masa. Semua ini bakal membantu kerajaan untuk mencapai objektif yang dinyatakan di atas dan bagi Kerajaan menyampaikan perkhidmatan yang lebih mudah, efisien dan cekap melalui proses pendigitalan perkhidmatan dan servis kesihatan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

**DARIPADA : YB PUAN RUSNAH BINTI ALUAI
(TANGGA BATU)**

SOALAN

YB PUAN RUSNAH BINTI ALUAI (TANGGA BATU) minta **MENTERI PERTANIAN DAN INDUSTRI MAKANAN** menyatakan apakah langkah-langkah yang diambil oleh Kementerian untuk menaik taraf sistem pengairan di kawasan jelapang padi di kawasan Parlimen Tangga Batu terutamanya di jelapang padi Kampung Pinang.

JAWAPAN

Tuan Yang di-Pertua,

Untuk makluman Yang Berhormat, pihak MAFI sentiasa berusaha untuk meningkatkan hasil tanaman padi negara dengan pelbagai kaedah, termasuklah usaha untuk memastikan air ke sawah mencukupi walaupun pada musim kemarau.

Dengan objektif tersebut, pihak MAFI telah melaksanakan secara berfasa projek membina infrastruktur pengairan dan saliran serta kerja-kerja lain yang berkaitan di Skim Pengairan Bukit Rambai, Tangga Batu, Daerah Melaka Tengah, Melaka.

Skim Pengairan Bukit Rambai ini dengan anggaran luas keseluruhan 815 hektar, terdiri daripada 4 buah kampung iaitu Kampung Pinang, Kampung Batang Tiga, Kampung Bukit Rambai dan Kampung Setulang Daeng.

Fasa 1 projek Skim Pengairan Bukit Rambai telah disiapkan pada tahun 2016. Manakala Fasa 2 Pakej 1 projek ini telah diluluskan untuk pelaksanaan dalam tempoh RMKe-12 (2021-2025) dengan peruntukan sebanyak RM29.4juta. Pakej 1 ini melibatkan pembinaan infrastruktur sistem pengairan dan saliran pertanian, jalan ladang dan infrastruktur lain yang berkaitan.

Projek ini kini dalam proses pengambilan tanah (LA) yang mana ianya dijangka selesai pada Jun 2023. Kerja-kerja pembinaan dan menaiktaraf projek Skim Pengairan Bukit Rambai pula dijangka bermula pada September 2023.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : PUAN RUSNAH BINTI ALUAI
[TANGGA BATU]**

SOALAN

PUAN RUSNAH BINTI ALUAI [TANGGA BATU] minta **MENTERI KANAN PENDIDIKAN** menyatakan adakah kes buli di kalangan pelajar semakin meningkat ataupun semakin berkurang dan nyatakan statistik kes buli di kalangan pelajar mengikut peringkat tahap pendidikan seperti tadika, sekolah rendah, sekolah menengah, sekolah rendah agama, sekolah menengah agama, IPTA dan IPTS.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memandang serius isu buli yang melibatkan murid sekolah bawah KPM serta mengambil langkah dan inisiatif yang sewajarnya.

Untuk makluman Ahli Yang Berhormat, berdasarkan data Sistem Sahsiah Diri Murid (SSDM), bagi tempoh Januari hingga Jun 2022, peratus murid yang direkod melakukan salah laku buli di sekolah adalah sebanyak 0.02%.

Bagi tahun 2020 dan 2021, peratus murid yang melakukan kesalahan buli adalah masing-masing sebanyak 0.05% dan 0.01%. Memandangkan sekolah tidak beroperasi secara bersemuka sepenuhnya pada tahun 2020 dan 2021, maka kadar peratusan tersebut tidak wajar dibandingkan dengan tahun-tahun sebelumnya.

KPM yakin dengan pendekatan menyeluruh yang dilaksanakan dapat menangani isu buli di sekolah.

Sekian, terima kasih.

**PEMBERITAHUAN PERTANYAAN BUKAN LISAN
MESYUARAT KEDUA, PENGGAL KELIMA,
PARLIMEN KEEMPAT BELAS
TAHUN 2022**

DARIPADA : TUAN SABRI BIN AZIT (JERAI)

TARIKH :

SOALAN

TUAN SABRI BIN AZIT (JERAI) minta **MENTERI SUMBER MANUSIA** menyatakan apakah usaha yang telah dilakukan bagi menggalakkan anak muda menyertai industri kemahiran perladangan dan pertanian yang mengalami kekurangan pekerja tetapi menawarkan pulangan gaji tinggi.

JAWAPAN

Bagi menggalakkan anak muda menyertai industri kemahiran perladangan dan pertanian, Kementerian Sumber Manusia telah membangunkan sebanyak seratus tiga belas (113) Standard Kemahiran Pekerjaan Kebangsaan (SKPK) berdasarkan industri pertanian dan perladangan. Selain menyenaraikan keperluan kompetensi, SKPK juga secara jelas memperincikan potensi dan laluan kerjaya dalam sektor perladangan dan pertanian ini yang dapat dijadikan rujukan oleh golongan ini.

Selain itu, Kementerian ini juga menyediakan kemudahan pinjaman dan pembiayaan kepada golongan yang berminat untuk menyertai program latihan kemahiran dalam sektor ini. Kemudahan pembiayaan ini merangkumi elemen yuran latihan, elaun sara hidup, elaun penginapan, pinjaman komputer, dan elaun pengangkutan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

DARIPADA : TUAN SABRI BIN AZIT (JERAI)

SOALAN

TUAN SABRI BIN AZIT (JERAI) minta **MENTERI PERTANIAN DAN INDUSTRI MAKANAN** menyatakan apakah bentuk bantuan dan pulangan yang akan diperoleh sekiranya pekebun kecil ingin menceburि bidang tanaman jagung bijirin untuk makanan haiwan ternakan.

JAWAPAN

Tuan Yang di-Pertua,

Untuk makluman Ahli Yang Berhormat, dalam memperkasakan industri input kepada makanan ternakan terutamanya jagung bijian, Kementerian Pertanian dan Industri Makanan (MAFI) melalui Jabatan Pertanian menyediakan insentif dalam bentuk *in-kind* bagi pekebun kecil yang ingin terlibat dengan penanaman jagung bijian, seperti pembangunan kawasan, infrasruktur ladang, input pertanian dan perkhidmatan jentera dan mekanisasi berjumlah RM 20,000 per hektar dengan keluasan minimum 10 hektar. Keluasan 10 hektar merupakan keluasan ekonomik yang disyorkan bagi menjamin pulangan hasil kepada pengusaha kerana kos pembangunan yang tinggi dan memerlukan penggunaan jentera bagi tujuan perataan, penanaman dan penuaian.

Selain itu, MAFI melalui Lembaga Pertubuhan Peladang juga menyediakan bentuk bantuan seperti kerja-kerja penyediaan tapak (pembersihan tapak), pembajakan dan perataan tanah, sistem pengairan, input pertanian (baja, racun dan benih) serta perkhidmatan kejenteraan untuk kerja-kerja khidmat kejenteraan yang diperlukan dari mula penanaman sehingga penuaian.

MAFI melalui MARDI juga turut menyediakan khidmat nasihat teknikal dan teknologi yang dijana merangkumi mekanisasi ladang yang cekap, pengurusan agronomi tanaman, pembajaan dan pengurusan perosak, serta pengurusan lepas tuai bagi menjamin standard dan kualiti jangung bijian yang dihasilkan menepati piawaian pengilang makanan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN SABRI BIN AZIT [JERAI]

SOALAN

YB TUAN SABRI BIN AZIT [JERAI] minta **MENTERI PERUMAHAN DAN KERAJAAN TEMPATAN** menyatakan apakah kawalan yang dilakukan bagi mengekang kenaikan harga rumah yang semakin melonjak dan dijangka naik sehingga RM400,000 minima menjelang tahun 2025.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah mengadakan Mesyuarat Majlis Perumahan Mampu Milik Negara (MPMMN) Bilangan 1 Tahun 2022 yang dipengerusikan oleh YAB Perdana Menteri pada 10 Februari 2022. Isu harga rumah dan pemilikan perumahan telah dibincangkan dalam mesyuarat tersebut.

Untuk makluman Ahli Yang Berhormat juga, walaupun terdapat isu kenaikan kos dalam pembinaan perumahan, ini tidak akan menghalang Kerajaan untuk meneruskan sasaran di bawah Rancangan Malaysia Ke-12 (RMKe-12), iaitu untuk menyediakan sebanyak 500,000 unit Rumah Mampu Milik (RMM). Kerajaan berpandangan usaha ini boleh dicapai dengan bantuan dan gandingan tenaga daripada semua pihak. Untuk merealisasikan hasrat ini, seperti yang diputuskan dalam mesyuarat MPMMN, Kerajaan Persekutuan akan memberi subsidi dan Kerajaan Negeri pula menyediakan tanah bagi pembangunan RMM manakala pihak bank telah diminta untuk mempermudahkan pembiayaan bagi memastikan Program Perumahan Rakyat (PPR) dan RMM dapat dijual atau dibeli dengan harga yang berpatutan.

Pada masa yang sama, KP KT sedang meneliti mekanisme pelaksanaan PPR yang baharu dari aspek reka bentuk, kemudahan dan fasiliti serta bahan-bahan binaan yang akan digunakan semasa pembinaan bagi memastikan pembinaannya lebih efisien dan *value for money* kepada Kerajaan. Di dalam meneliti perkara ini, KP KT dibantu oleh Panel Berkepakaran (*Panel of Experts*, POE) merangka strategi pendekatan aksesibiliti perumahan ideal yang praktikal dan mampan agar pembangunan perumahan dapat mengekalkan harga yang mampu milik.

Bagi meningkatkan aksesibiliti perumahan oleh rakyat, KP KT telah mengambil tindakan seperti berikut:

- (i) melaksanakan Program Pemilikan Kediaman atau *Home Ownership Programme* (HOPE) bagi melihat ekosistem keseluruhan perumahan menerusi empat (4) komponen utama iaitu penyediaan perumahan, pembiayaan, promosi dan polisi;
- (ii) di bawah HOPE, KPKT memperkenalkan Inisiatif Pembiayaan Perumahan Malaysia atau i-Biaya seperti Skim Rumah Pertamaku (SRP) di bawah Cagamas Berhad, Skim Jaminan Kredit Perumahan di bawah Syarikat Jaminan Kredit Perumahan Berhad (SJKP) dan Rent-to-Own (RTO) PR1MA dengan kerjasama institusi kewangan yang terpilih agar dapat menarik minat pembeli khususnya golongan B40 dan M40 serta golongan belia untuk memudahkan pembiayaan bagi memiliki rumah. Pencapaian skim-skim tersebut sehingga kini adalah seperti berikut:

a. **Skim Rumah Pertamaku (SRP) di bawah Cagamas Berhad**

SRP membolehkan individu berumur 40 tahun dan ke bawah memperoleh nisbah pinjaman kepada nilai (*loan-to-value*, LTV) sehingga 110% untuk membeli hartanah yang berharga sehingga RM500,000. Ini membolehkan peminjam memiliki rumah tanpa perlu membayar wang muka. Skim ini dijamin oleh Cagamas Berhad yang akan menanggung sebarang kerugian untuk pembiayaan dengan nisbah LTV melebihi paras 90%.

b. **Skim Jaminan Kredit Perumahan oleh Syarikat Jaminan Kredit Perumahan Berhad (SJKP)**

Skim ini membolehkan individu memperoleh pembiayaan sehingga 100% daripada institusi kewangan kepada mereka yang berpendapatan dan tidak tetap untuk membeli hartanah yang berharga sehingga RM300,000. SJKP ditawarkan menerusi bank

– bank terpilih oleh Syarikat Jaminan Kredit Perumahan Berhad.

c. Rent-to-Own (RTO) PR1MA

Sehingga 15 Jun 2022, sebanyak lapan (8) unit telah ditempah bagi pembiayaan menerusi RTO ini dengan nilai keseluruhan pembiayaan berjumlah RM2,444,148.

- (iii) YAB Perdana Menteri semasa Majlis Pelancaran HOPE dan KJBR pada 15 Julai 2022 telah mengumumkan Inisiatif Pemilikan Perumahan Keluarga Malaysia atau i-MILIKI yang melibatkan pemberian insentif pengecualian duti setem ke atas surat cara pindah milik dan perjanjian pinjaman bagi pembelian rumah pertama secara peringkat atau tier harga rumah iaitu:
- a. bagi rumah berharga RM500,000 dan ke bawah, insentif pengecualian duti setem adalah sebanyak 100%; dan
 - b. bagi rumah berharga melebihi RM500,000 sehingga RM1 juta, insentif pengecualian sebanyak 50%.

Pengecualian ini adalah bagi perjanjian jual beli yang disempurnakan dalam tempoh mulai 1 Jun 2022 sehingga Disember 2023.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN SABRI BIN AZIT [JERAI]

SOALAN

TUAN SABRI BIN AZIT [JERAI] minta **MENTERI KANAN PENDIDIKAN** menyatakan adakah terdapat usaha bagi memberi kesedaran dan dorongan kepada pelajar sekolah yang akan menjadi pengundi 18 agar keluar mengundi.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan pelbagai usaha penambahbaikan kurikulum pendidikan dan literasi mengenai politik selaras dengan pelaksanaan Undi 18 kepada murid sekolah melalui mata pelajaran Sejarah. Kurikulum Sejarah memberi fokus kepada pengetahuan, kemahiran dan nilai yang berkaitan dengan pendidikan politik. Ini bertujuan untuk membina karakter yang positif supaya murid boleh berfikir dan bertindak bijak dalam mentafsir sesuatu isu dan peristiwa serta membuat keputusan yang rasional. Selain itu, murid dapat memahami dan menghayati kepentingan pendidikan politik serta tanggungjawab sebagai warganegara yang cinta akan negara. Komponen tersebut disusun berdasarkan tema dan tajuk khusus serta sisipan secara kronologi yang berkaitan dengan pendidikan politik.

Untuk makluman Ahli Yang Berhormat, pada peringkat sekolah rendah, pendidikan politik dipelajari secara sisipan melalui tema “Sejarah Awal Negara, Kedaulatan Negara dan Kemakmuran Negara Kita” yang menerangkan tentang 158 latar belakang, perkembangan dan peristiwa yang berkaitan dengan pendidikan politik dalam mata pelajaran Sejarah.

SOALAN NO : 409

Pada peringkat sekolah menengah pula, pendidikan politik dihuraikan secara sisipan di bawah tema “Sejarah Kita dan Dunia, Warisan Negara, Kedatangan Kuasa Asing, Pembinaan Negara, Malaysia dan Masa Hadapan”. Melalui tema ini, murid memahami kepentingan memperkuuhkan pengetahuan dan kefahaman tentang pendidikan politik bagi mempersiapkan murid untuk melaksanakan hak dan tanggungjawab sebagai pengundi. Bagi murid Tingkatan Enam, pendidikan politik dipelajari melalui mata pelajaran Pengajian Am dan Sejarah.

Selain pengajaran dan pembelajaran dalam bilik darjah, pemerksaan pendidikan politik juga disokong dengan aktiviti kokurikulum di luar bilik darjah seiring dengan penguatkuasaan Undi 18. KPM bekerjasama dengan agensi Kerajaan seperti Jabatan Penerangan Malaysia, Akademi Pilihan Raya serta Jabatan Perpaduan Negara dan Integrasi Nasional (JPNIN) dalam memantapkan pengetahuan, kemahiran dan nilai berkaitan Undi 18.

KPM yakin kandungan kurikulum dan kokurikulum berkaitan pendidikan politik dapat mempersiapkan murid untuk melaksanakan hak dan tanggungjawab mereka sebagai pengundi.

Sekian, terima kasih.

SOALAN NO: 410

**PEMBERITAHUAN PERTANYAAN BUKAN LISAN DEWAN
RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : TUAN SABRI BIN AZIT
(JERAI)**

SOALAN

TUAN SABRI BIN AZIT (JERAI) minta **MENTERI PERTANIAN DAN INDUSTRI MAKANAN** menyatakan apakah kajian terkini MARDI dalam penghasilan baja yang menggunakan bahan asas yang lebih mudah diperoleh agar NAFAS lebih mudah untuk menghasilkan baja mengikut waktu yang ditetapkan.

JAWAPAN

Tuan Yang di-Pertua,

Untuk makluman Ahli Yang Berhormat, secara umumnya, baja merupakan antara elemen utama dalam pengeluaran tanaman makanan. Bahan mentah bagi penghasilan baja yang digunakan adalah dari ammonium sulfat, asid phosphorus dan urea yang kebanyakannya diimport dari luar negara.

Kementerian melalui Institut Penyelidikan Dan Kemajuan Pertanian Malaysia (MARDI) melaksanakan kajian bagi mencari sumber bahan mentah dari dalam negara yang sesuai dijadikan sumber alternatif untuk digunakan serta lebih cepat diperolehi. Antara sumber tempatan yang berpotensi adalah sisa pertanian dan industri. Walaupun kandungan makronutrien sedikit rendah, namun sumber ini masih boleh dijadikan sebagai sumber alternatif serta dapat mengurangkan peratusan bahan mentah import dalam baja sebatian NAFAS.

Kementerian juga melaksanakan pengurusan pembajaan untuk tanaman padi diintegrasikan bersama baja bio kerana berdasarkan kajian, amaun baja kimia dapat dikurangkan jika baja bio juga turut digunakan. Kajian membuktikan bahawa penggunaan baja lepas perlahan (*Control Release Fertilizer*) dapat mengurangkan amaun baja sebatian kerana pelepasan nutrien berlaku dalam keadaan terkawal dan dapat diambil secara optimum oleh tanaman dan tidak membazir ke persekitaran. Dengan langkah ini, dijangkakan isu bekalan bahan mentah tidak mencukupi dapat dielakkan kerana keperluan di lapangan yang telah dikurangkan.

Disamping itu juga, Kementerian turut membangunkan teknologi baja yang menggunakan gabungan bahan mentah tempatan dan import. Penyelidikan dan pembangunan produk baja yang dijalankan ini adalah berkenaan formulasi baja pintar (substrat,

SOALAN NO: 410

salutan polimer: pelepasan nutrien terkawal masa) dan bio (mikrob bermanfaat) bagi meningkatkan kecekapan serapan nutrien oleh tanaman sekaligus mengurangkan kehilangan nutrien ke persekitaran dan kawalan penyakit. Setakat ini sekurang-kurangnya 12 teknologi baja dengan 7 teknologi telah berjaya dikomersilkan seperti Baja Biorichar, Baja Growpine 1, 2 dan 3 serta Baja Yanora.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : JAWAB BUKAN LISAN

**DARIPADA : DATUK SERI SAIFUDDIN NASUTION BIN ISMAIL
[KULIM BANDAR BAHRU]**

SOALAN

Minta **Perdana Menteri** menyatakan kemajuan terkini dan status ‘Rang Undang-undang 355’ serta bilakah Kerajaan akan membentangkannya di Parlimen.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Penggubalan pindaan kepada Akta Mahkamah Syariah (Bidang Kuasa Jenayah) 1965 [Akta 355] sentiasa berada dalam agenda Kerajaan dan pindaan tersebut merupakan sebahagian daripada Pelan Pemerksaan Undang-Undang Syariah bagi tempoh 5 tahun iaitu dari tahun 2020 hingga 2025.
2. Untuk makluman Ahli Yang Berhormat, Rang Undang-Undang Mahkamah Syariah (Bidang Kuasa Jenayah) 1965 (Pindaan) (RUU 355) telah melalui beberapa siri perbincangan yang mana pelbagai aspek khususnya aspek perlembagaan, undang-undang dan hukum Syarak telah diteliti dan diperhalusi agar RUU 355 tersebut lebih komprehensif

dan seterusnya dapat memperkasa bidang kuasa jenayah mahkamah Syariah.

3. RUU 355 tersebut juga telah dibentangkan kepada negeri-negeri dalam Persidangan Penyelarasan Undang-Undang Syarak dan Sivil ke-27 pada 11 dan 12 Oktober 2021 yang lepas. Input dan pandangan yang diperoleh daripada negeri-negeri dalam persidangan tersebut telah dibincangkan dan dimuktamadkan dalam mesyuarat Jawatankuasa Teknikal pada 29 Mac 2022.

4. Pada masa ini, JAKIM sedang dalam tindakan menyediakan Memorandum Jemaah Menteri mengenai cadangan dasar penggubalan RUU 355 untuk diedarkan kepada agensi-agensi berkaitan untuk mendapatkan ulasan agensi-agensi tersebut secara dasar untuk meminda Akta 355 bagi meningkatkan bidang kuasa jenayah mahkamah Syariah. Tindakan selanjutnya akan diambil setelah ulasan daripada agensi berkaitan diperoleh.

5. Dalam pada masa yang sama, Kerajaan sedang dalam usaha untuk memberikan penerangan kepada orang ramai berkenaan dengan tujuan sebenar Akta 355 ini dipinda. Ini bagi mengelakkan berlaku salah faham dan menimbulkan polemik yang tidak berkesudahan berhubung dengan perkara tersebut apabila dibentangkan di Parlimen kelak.

6. Setelah penggubalan RUU 355 dimuktamadkan kelak, taklimat atau penerangan berhubung dengan RUU 355 tersebut akan diberikan kepada semua ahli Parlimen sebelum dibentangkan dalam Dewan yang Mulia ini.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DATUK SERI SAIFUDDIN NASUTION BIN ISMAIL [KULIM BANDAR BAHARU]

SOALAN

DATUK SERI SAIFUDDIN NASUTION BIN ISMAIL [KULIM BANDAR BAHARU] minta **MENTERI ALAM SEKITAR DAN AIR** menyatakan darihal pemberian awan di utara Semenanjung akibat musim kemarau bertujuan mengelakkan kawasan tadahan mengalami paras kapasiti yang menurun ke tahap kritikal. Kawasan tadahan mana yang terlibat dan berapa kos yang dibiayai.

JAWAPAN

Tuan Yang Di-Pertua,

1. Untuk makluman Ahli Yang Berhormat, Jabatan Meteorologi Malaysia (MET Malaysia) adalah sebuah agensi di bawah Kementerian Alam Sekitar Dan Air (KASA) yang dipertanggungjawabkan untuk menjalankan Operasi Pembernihian Awan (OPA) bersama-sama dengan beberapa agensi kerajaan yang lain seperti Agensi Pengurusan Bencana Negara (NADMA) dan Tentera Udara Diraja Malaysia (TUDM) sekiranya terdapat keperluan operasi tersebut. Pada 18hb dan 19hb Jun 2022 yang lalu, OPA telah dilaksanakan di kawasan tадahan Empangan Bukit Merah, Semanggol, Perak. OPA ini membabitkan kawasan sawah seluas 19,058 hektar di Kawasan Pembangunan Pertanian Bersepadu (IADA) Kerian dan 1,267 hektar Kawasan IADA Pulau Pinang. OPA pada kali ini telah diselaraskan oleh NADMA dan telah dilaksanakan hasil kerjasama TUDM dengan MET Malaysia.

2. Kos yang terlibat berhubung penggunaan pesawat C130 TUDM adalah ditanggung Kementerian Pertanian dan Industri Makanan (MAFI), manakala kos pengurusan operasi untuk tempoh dua hari bagi petugas – petugas yang terlibat dari TUDM dan MET Malaysia adalah di bawah tanggungan MET Malaysia. Kos yang ditanggung oleh MET Malaysia selama dua hari tersebut adalah sebanyak RM6,760. Manakala kos yang ditanggung oleh MAFI adalah RM80,000.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DATUK SERI SAIFUDDIN NASUTION BIN ISMAIL [KULIM BANDAR BAHARU]

SOALAN

DATUK SERI SAIFUDDIN NASUTION BIN ISMAIL [KULIM BANDAR BAHARU] minta **MENTERI ALAM SEKITAR DAN AIR** menyatakan langkah Kementerian untuk membantu operator bekalan air setelah Kerajaan baru-baru ini mengumumkan untuk tidak menaikkan tarif air.

JAWAPAN

Tuan Yang Di-Pertua,

1. Kerajaan Persekutuan mengambil berat dan prihatin dengan cabaran dan bebanan yang dihadapi rakyat susulan peningkatan kos sara hidup pada masa ini. Oleh itu, Mesyuarat Jemaah Menteri pada 22 Jun 2022 telah bersetuju untuk menangguhkan pelarasan kadar tarif air bagi Kategori Domestik (premis kediaman) serta mengekalkan kadar tarif sedia ada.
2. Namun begitu, bagi memastikan kelangsungan perkhidmatan bekalan air yang berterusan dan berkualiti kepada rakyat, Jemaah Menteri juga telah bersetuju ke atas pelarasan kadar tarif air bagi Kategori Bukan Domestik dan Kategori Khas di Semenanjung Malaysia dan Wilayah Persekutuan Labuan mulai 1 Ogos 2022.
3. Pelaksanaan pelarasan tarif bukan domestik dijangka dapat membantu meningkatkan pendapatan keseluruhan operator-operator air di Semenanjung Malaysia dan Wilayah Persekutuan Labuan sebanyak

SOALAN NO: 413

RM800 juta setahun. Penyelarasan tarif akan memulihkan kedudukan kewangan operator air serta membolehkan operator-operator air menyediakan perkhidmatan yang lebih baik untuk kesejahteraan rakyat. Penangguhan pelaksanaan pelarasan tarif domestik akan menyebabkan operator-operator air kehilangan pendapatan sebanyak RM493.5 juta setahun.

Tuan Yang Di-Pertua,

4. Sebagai langkah untuk membantu operator air susulan penangguhan pelaksanaan tarif bagi Kategori Domestik, Kementerian Alam Sekitar dan Air akan mengadakan perbincangan bersama Suruhanjaya Perkhidmatan Air Negara, Pengurusan Aset Air Berhad dan Kementerian Kewangan bagi membincangkan mengenai langkah-langkah dan mekanisme yang boleh membantu operator-operator air.
5. Pelarasan kadar tarif secara menyeluruh termasuk Kategori Domestik adalah penting bagi membolehkan industri perkhidmatan air negara mencapai kemapanan jangka masa panjang agar rakyat dapat menikmati bekalan air yang berkualiti tanpa gangguan. Oleh itu, pelarasan tarif bagi Kategori Domestik akan dilihat semula selepas kitaran semakan tarif seterusnya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : DATUK SERI SAIFUDDIN NASUTION BIN ISMAIL [KULIM BANDAR BAHARU]

SOALAN

DATUK SERI SAIFUDDIN NASUTION BIN ISMAIL [KULIM BANDAR BAHARU] minta **MENTERI ALAM SEKITAR DAN AIR** menyatakan status terkini yang memerlukan kelulusan berkaitan di bawah bidang kuasa Kementerian ini ke atas cadangan projek Kompleks Lapangan Terbang Kulim (KXP) terutama terkait pelepasan sisa kumbahan industri ke Sungai Muda melalui Sungai Jerong.

JAWAPAN

Tuan Yang Di-Pertua,

1. Cadangan projek Pembangunan Lapangan Terbang Antarabangsa Kulim (KXP) dan Kedah Aerotropolis, Mukim Sidam Kiri, Daerah Kuala Muda, Kedah Darul Aman adalah tertakluk di bawah Seksyen 34A Akta Kualiti Alam Sekeliling 1974 (Akta 127). Pihak penggerak projek dikehendaki mengemukakan Laporan Kajian Penilaian Kesan Kepada Alam Sekeliling (*Environmental Impact Assessment, EIA*) kepada Jabatan Alam Sekitar (JAS).
2. Cadangan projek tersebut tertakluk di bawah Perintah Kualiti Alam Sekeliling (Aktiviti yang Ditetapkan) (Penilaian Kesan kepada Alam Sekeliling) 2015 bagi aktiviti seperti berikut:

Jadual Kedua

Aktiviti 2: Aerodrom

- a) Pembinaan aerodrom baharu yang melibatkan landasan terbang sepanjang 1000-meter atau lebih.

Jadual Pertama

Aktiviti 11: Penjanaan dan pemancaran kuasa

- c) Pembinaan talian pemancar di kawasan sensitif alam sekitar.

Jadual Pertama

Aktiviti 14: Pengolahan dan pelupusan buangan

- c) Kumbahan
 - i. Pembinaan loji pengolahan kumbahan dengan 20,000 kesetaraan populasi atau lebih.
 - ii. Kemudahan rawatan enap cemar.

Jadual Pertama

Aktiviti 17: Pembangunan Estet Industri

- c) Pembangunan estet perindustrian yang meliputi kawasan 20 hektar atau lebih.

Jadual Pertama

Aktiviti 18: Bandar baharu

Pembinaan bandar baharu yang terdiri daripada 2000-unit kediaman atau lebih yang meliputi kawasan seluas 100 hektar atau lebih.

3. Pihak penggerak projek telah mengemukakan Laporan EIA kali pertama kepada JAS pada 15 Julai 2021 dan laporan EIA tersebut tidak diluluskan pada 7 Oktober 2021 kerana terdapat pelbagai maklumat yang tidak lengkap dan isu berkaitan dasar yang tidak selaras. Sehingga kini, pihak JAS belum menerima Laporan EIA baharu bagi cadangan projek ini daripada penggerak projek.
4. Bagi isu yang melibatkan pelepasan kumbahan dan efluen perindustrian, JAS telah menyatakan supaya kajian EIA perlu mengambilkira impak kepada Sungai Muda. Kajian pemodelan kualiti air dan hidrologi hendaklah dilaksanakan untuk mengkaji impak daripada pelaksanaan cadangan projek ini kepada Sungai Jerong dan Sungai Muda. Langkah-langkah kawalan yang bersesuaian hendaklah dikenalpasti dan dicadangkan dalam kajian EIA termasuk mengenalpasti kaedah pengurusan kumbahan dan efluen perindustrian terbaik yang boleh dilaksanakan bagi mengurangkan impak kepada Sungai Jerong dan Sungai Muda.
5. Penggerak projek juga dikehendaki untuk melaksanakan libat urus dengan pihak-pihak berkepentingan untuk mendapatkan input dan pandangan terhadap penemuan kajian dan cadangan langkah-langkah kawalan yang akan dilaksanakan. Laporan EIA yang lengkap hendaklah dikemukakan semula kepada JAS untuk pertimbangan selanjutnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : DATUK SERI SAIFUDDIN NASUTION BIN ISMAIL [KULIM BANDAR BAHARU]

SOALAN

Datuk Seri Saifuddin Nasution bin Ismail [Kulim Bandar Baharu] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan secara komprehensif langkah Kerajaan melegakan bebanan rakyat dalam isu kos sara hidup.

JAWAPAN

Yang di-Pertua,

Pasukan Khas Jihad Tangani Inflasi yang telah diumumkan pada 30 Jun 2022, diketuai oleh YB Menteri Komunikasi dan Multimedia adalah bertujuan untuk meneliti, memantau serta mencadangkan kepada Kerajaan langkah-langkah segera bersifat jangka pendek dan sederhana untuk dilaksanakan bagi menangani isu inflasi.

Bagi pelaksanaan inisiatif yang melibatkan implikasi dasar, maka ia akan diangkat kepada Majlis Tindakan Sara Hidup Negara (NACCOL) dan Jemaah Menteri.

Pasukan Khas Jihad Tangani Inflasi ini bersidang 2 kali seminggu dan keahlian di peringkat Menteri adalah seperti berikut:

- (i) Menteri Komunikasi dan Multimedia (K-KOMM)-Pengerusi;
- (ii) Menteri Kewangan (MOF);
- (iii) Menteri Pertanian dan Industri Makanan (MAFI);
- (iv) Menteri Perdagangan Dalam Negeri dan Hal Ehwal Pengguna (KPDNHEP);
- (v) Menteri di Jabatan Perdana Menteri (Ekonomi);
- (vi) Menteri Wilayah Persekutuan (KWP);
- (vii) Menteri Pembangunan Usahawan dan Koperasi (KUSKOP); dan
- (viii) Ketua Setiausaha Negara (KSN).

Pasukan Khas ini turut dianggotai oleh 11 orang pegawai kanan kerajaan termasuk dari Majlis Keselamatan Negara (MKN), Bank Negara Malaysia (BNM), Jabatan Perangkaan (DOSM) dan Polis Diraja Malaysia (PDRM).

Ahli Pasukan Khas Jihad Tangani Inflasi (JIHAD) tidak menerima sebarang elauan khas. Lain-lain kementerian boleh dipanggil sekiranya terdapat isu timbul terutamanya melibatkan kemaslahatan rakyat. Pasukan Khas JIHAD ini adalah bersifat *action-oriented*, justeru ia akan mengutamakan penyelesaian segera sesuatu masalah yang boleh menyebabkan kenaikan barang dan perkhidmatan.

Pasukan Khas Jihad Tangani Inflasi memberi penekanan dan tumpuan

terhadap strategi yang memberi impak segara bagi mengubah persepsi dan jangkaan (*expectation*) rakyat. Sepanjang penubuhan pasukan ini, beberapa keputusan penting telah diambil seperti berikut:

- (i) Pelaksanaan operasi bersepada KPDNHEP bersama Polis Diraja Malaysia (PDRM), Jabatan Kastam Diraja Malaysia (Kastam), Jabatan Perkhidmatan Kuarantin dan Pemeriksaan Malaysia (MAQIS) dan Jabatan Sukarelawan Malaysia (RELA) bagi menangani ketirisan minyak masak bersubsidi ke luar negara;
- (ii) Memperkenalkan Bakul Makanan Siswa Keluarga Malaysia berharga RM3.50 sepinggan di universiti-universiti;
- (iii) Peluasan Program Jualan Keluarga Malaysia (PJKM) ke 600 kawasan Dewan Undangan Negeri (DUN) di seluruh negara hingga akhir tahun 2022;
- (iv) pewartaan larangan eksport minyak sawit tulen dalam bungkusan polibeg; dan
- (v) Mekanisme penetapan harga siling minyak masak botol tidak bersubsidi ditentukan secara bulanan untuk seluruh Malaysia mengikut harga purata minyak sawit mentah (CPO) bagi satu tan metrik di pasaran dunia pada bulan sebelumnya. Harga siling minyak sawit botol 5kg untuk Sabah, Sarawak dan Labuan ditetapkan pada paras RM34.70 sama seperti di Semenanjung, berkuatkuasa pada 8 Ogos ini. Turut ditentukan adalah harga siling minyak masak tidak bersubsidi kemasan botol seperti berikut:
 - (a) 1kg iaitu RM7.70;
 - (b) 2kg iaitu RM14.70; dan
 - (c) 3kg iaitu RM 21.70.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK SERI HAJI SALAHUDDIN BIN AYUB
[PULAI]**

SOALAN

DATUK SERI HAJI SALAHUDDIN BIN AYUB [PULAI] minta **PERDANA MENTERI** menyatakan apakah mekanisme utama yang digunakan dalam Projek Pembasmian Kemiskinan Tegar Keluarga Malaysia (BMTKM) yang membabitkan sekitar 5,000 ketua isi rumah (KIR).

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Rancangan Malaysia Kedua Belas (RMKe-12), 2021-2025 telah memberikan tumpuan untuk menangani kemiskinan dan ketidaksamarataan dalam pendapatan dan pembangunan. Agenda ini telah diperincikan di bawah dasar dan strategi Pemacu Perubahan VI, Mentransformasi Pendekatan bagi Membasmi Kemiskinan Tegar dan Bab 5, Menangani Kemiskinan dan Membangunkan Masyarakat Inklusif. Bagi tujuan ini, program khusus untuk menangani kemiskinan tegar perlu dilaksana bagi mencapai sasaran kemiskinan tegar sifar pada akhir tahun 2025.

2. Unit Perancang Ekonomi (EPU) dan Unit Penyelarasan Pelaksanaan (ICU), Jabatan Perdana Menteri (JPM) telah dipertanggungjawab untuk menyelaras dan memudahcara pelaksanaan program ini.
3. Program Pembasmian Kemiskinan Tegar Keluarga Malaysia atau BMTKM akan memberi tumpuan kepada pembasmian kemiskinan tegar di seluruh negara serta menjadi pelengkap kepada program sedia ada untuk menangani isu kemiskinan dalam kalangan B40. Kumpulan sasar miskin tegar ini merentasi pelbagai kumpulan etnik merangkumi Bumiputera, Cina, India, Anak Negeri Sabah, Bumiputera Sarawak dan masyarakat Orang Asli.
4. Program pembasmian kemiskinan bukan sesuatu yang baharu. Ia telah mula sejak kemerdekaan dan dipergiatkan pada tahun 1970-an melalui Dasar Ekonomi Baru. Walau bagaimanapun, di bawah BMTKM, kaedah dan pendekatan dalam membasmi kemiskinan tegar adalah berbeza dan lebih holistik. Ini termasuk:
 - i. Menubuhkan Unit Kemiskinan khusus pada peringkat Persekutuan, Negeri dan Daerah;
 - ii. Mengguna pakai pendekatan keseluruhan negara atau *whole-of-nation approach* dengan izin dan berdasarkan masalah setempat dan bukannya *one size fits all*;
 - iii. Penglibatan pelbagai pihak merangkumi universiti awam, sektor swasta dan industri, syarikat berkaitan kerajaan serta pertubuhan masyarakat sivil dan organisasi berdasarkan komuniti; dan
 - iv. Memperkenalkan dasar pemisah selepas tempoh dua hingga tiga tahun pelaksanaan.
5. BMTKM akan dilaksanakan di 1,000 lokaliti dalam tempoh tiga tahun enam bulan. Fasa 1 telah mula dilaksanakan pada bulan Jun 2022 melibatkan 80 lokaliti secara rintis. Manakala Fasa 2 akan dilaksanakan

pada bulan September dan diikuti Fasa 3 pada bulan Disember tahun 2022.

6. Pemilihan isi rumah miskin tegar bagi pelaksanaan program BMTKM adalah berdasarkan senarai dalam Bank Data Kemiskinan Nasional (eKasih). Manakala, pemilihan isi rumah miskin tegar dalam kalangan Orang Asli dilaksanakan melalui sistem Data Pengurusan Maklumat Orang Asli (iDAMAK).

7. BMTKM memberi tumpuan kepada pelaksanaan aktiviti peningkatan pendapatan, pembangunan kapasiti dan kapabiliti serta minda yang sesuai berdasarkan potensi lokaliti serta profil KIR dan AIR miskin tegar.

8. Program yang akan dilaksanakan adalah untuk meningkatkan pendapatan yang merangkumi projek-projek pertanian, penternakan, keusahawanan, pemasaran serta pembangunan minda dan motivasi. Anggaran pendapatan tambahan yang akan dijana adalah di antara RM300 hingga RM1,000 sebulan.

9. Bagi memastikan kejayaan BMTKM, Jawatankuasa Pemantauan Peringkat Daerah dan Cawangan bertanggungjawab untuk memantau dan membuat laporan bulanan serta mengambil tindakan intervensi sekiranya perlu.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

**DARIPADA : DATUK SERI HAJI SALAHUDDIN BIN AYUB
(PULAI)**

SOALAN

DATUK SERI HAJI SALAHUDDIN BIN AYUB (PULAI) minta **MENTERI PERTANIAN DAN INDUSTRI MAKANAN** menyatakan apakah pelan Kementerian untuk memperkasakan sistem pertanian pintar *smart-agro* bagi meningkatkan produktiviti dan kapasiti pengeluaran, misalnya melalui teknologi dalam pertanian moden seperti penggunaan dron dan automasi, serta teknologi satelit sebagai kaedah baru dalam sektor pertanian.

JAWAPAN

Tuan Yang di-Pertua,

Untuk makluman Ahli Yang Berhormat, pertanian pintar merupakan antara strategi yang dikenal pasti dalam Rancangan Malaysia Kedua Belas (RMKe-12) sebagai aktiviti strategik dan berimpak tinggi yang dapat menjana semula pertumbuhan ekonomi negara. Sejakar dengan itu, Kementerian Pertanian dan Industri Makanan (MAFI) telah melancarkan Dasar Agromakanan Negara 2021-2030 (DAN 2.0) yang menggariskan pelan tindakan yang perlu diambil oleh kementerian berkaitan penggunaan teknologi seperti sistem pertanian pintar bagi meningkatkan produktiviti.

Antara program MAFI yang menggalakkan penggunaan sistem pertanian pintar adalah Program Ladang e-Satelit oleh Lembaga Pertubuhan Peladang (LPP) dengan peruntukan RM10 juta berbentuk geran padanan dengan nisbah 70 peratus oleh Kerajaan dan 30 peratus oleh peserta dengan had maksimum RM30,000 bagi menggalakkan petani menggunakan teknologi terkini seperti sistem Internet of Things (IoT) dan dron. Ia telah memberi manfaat kepada seramai 394 petani di seluruh negara.

Penggunaan teknologi juga dapat dilihat keberkesanannya bagi meningkatkan produktiviti dalam industri padi dan beras. Sebagai contoh, penggunaan dron oleh Syarikat FGV Integrated Farming (FGVIF) Holdings Sdn. Bhd. di IADA Barat Laut Selangor untuk tujuan pembajaan di sawah padi telah berjaya meningkatkan kecekapan dan mengurangkan kebergantungan kepada tenaga buruh. Selain itu, teknologi pemusatan data kesuburan tanah dan pemeriksaan nutrien tanah secara *in-situ* akan diperkenalkan. Data ini akan digunakan untuk program pembajaan berdasarkan kandungan nutrien tanah bagi mengelakkan pembaziran.

SOALAN NO : 417

Dari segi penggunaan teknologi satelit, Jabatan Pertanian telah bekerjasama dengan Agensi Angkasa Malaysia (MYSA) di bawah Kementerian Sains, Teknologi dan Inovasi untuk membangunkan sistem Maklumat Geospatial Tanaman Padi (MakGeo Padi) yang menggunakan data imej radar satelit *remote sensing* bagi mengesan perubahan guna tanah, memantau status aktiviti tanaman padi serta mengesan lot sawah padi yang bermasalah termasuk pemantauan kawasan banjir.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

**DARIPADA : YB TUAN SANISVARA NETHAJI RAYER A/L
RAJAJI (JELUTONG)**

SOALAN

**TUAN SANISVARA NETHAJI RAYER A/L RAJAJI [JELUTONG] minta
MENTERI KANAN KERJA RAYA menyatakan :-**

- (a) apakah langkah-langkah yang diambil oleh PLUS (Projek Lebuh Raya Utara Selatan) untuk memastikan keselamatan pengguna lebuh raya terjamin pada setiap masa; dan
- (b) adakah rondaan dijalankan setiap masa untuk mengalihkan objek-objek besar yang tertinggal di atas lebuh raya akibat kemalangan ataupun tercabut dari kenderaan supaya objek-objek tersebut tidak menjadi punca kemalangan lain.

NOTA:DITERIMA DARIPADA KEMENTERIAN PENGANGKUTAN

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya, Lembaga Lebuhraya Malaysia (LLM) serta pengendali Lebuhraya Utara-Selatan iaitu PLUS Malaysia Berhad (PLUS) sentiasa memandang serius dan mengutamakan aspek keselamatan pengguna lebuh raya serta tidak berkompromi terhadap sebarang isu yang boleh mendatangkan kebimbangan atau menjadikan keselamatan pengguna lebuh raya.

Untuk makluman Ahli Yang Berhormat juga, PLUS telah mengambil pendekatan

3E

iaitu *Enforcement* (Penguatkuasaan), *Engineering* (Kejuruteraan), dan *Education* (Pendidikan) untuk meningkatkan lagi tahap keselamatan di lebuh raya kendaliannya. Pendekatan ini merupakan strategi dan komitmen PLUS dalam memastikan keselamatan dan keselesaan pengguna lebuh raya selaras dengan Pelan Keselamatan Jalan Raya Malaysia 2022-2030 yang mensasarkan pengurangan bilangan kematian akibat naas jalan raya sekurang-kurangnya 50 peratus menjelang tahun 2030.

PLUS secara berterusan menjalankan inisiatif bersama pihak berkuasa untuk membantu meningkatkan lagi tahap keselamatan di lebuh raya. Antaranya dengan berkolaborasi bersama agensi penguatkuasaan dengan mengadakan operasi antaranya Ops Halangan dan Ops Bersepadu bersama pihak Polis Diraja Malaysia, Jabatan Pengangkutan Jalan serta lain-lain agensi berkaitan di lebuh raya dari masa ke masa.

Selain itu, PLUS juga turut berkolaborasi bersama PDRM dan JPJ dengan menyumbang kenderaan rondaan dan stesen penguatkuasa untuk membantu pihak berkuasa terbabit menjalankan penguatkuasaan undang-undang, pemantauan dan rondaan dengan lebih efektif di lebuh raya. Ia juga untuk memastikan aspek keselamatan serta sebarang aktiviti jenayah

dan pelanggaran kesalahan lalulintas dapat dikurangkan di lebuh raya.

Untuk makluman Ahli Yang Berhormat juga, PLUS sentiasa mengambil inisiatif dengan membuat penambahbaikan untuk meningkatkan aspek keselamatan di jalan raya. Antaranya dengan mengenalpasti lokasi kerap berlaku kemalangan, melaksanakan pemasangan perabot lebuh raya seperti papan-papan tanda amaran dan pematuhan lalulintas, menaiktaraf lampu jalan, penambahbaikan turapan jalan dan lain-lain.

Untuk makluman Ahli Yang Berhormat juga, Kira-kira 500 anggota pasukan PLUSRonda ditugaskan secara berpasukan 24-jam sehari sepanjang lebuh raya untuk menjalankan pemantauan dan memastikan keselamatan di lebuh raya. Pasukan PLUSRonda ini juga membantu pengguna lebuh raya yang menghadapi sebarang insiden, kerosakan kenderaan atau kecemasan selain mengadakan pengurusan trafik dan pengurusan kemalangan di lebuh raya termasuk mengalihkan objek-objek yang jatuh atau tertinggal di atas lebuhraya. Kementerian Kerja Raya sentiasa komited dalam memastikan keselamatan dan keselesaan pengguna lebuh raya bukan sahaja di lebuhraya PLUS tetapi juga di semua lebuhraya-lebuhraya lain. Kerjasama daripada semua pihak juga mampu menyumbang ke arah meningkatkan keselamatan di jalan raya.

Sekian. terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : TUAN SANISVARA NETHAJI RAYER A/L RAJAJI
(JELUTONG)**

SOALAN

TUAN SANISVARA NETHAJI RAYER A/L RAJAJI (JELUTONG) minta **MENTERI DALAM NEGERI** menyatakan apakah jumlah perbelanjaan yang akan dibelanjakan oleh Kerajaan untuk membina penjara terbesar di Ketereh, Kelantan.

JAWAPAN

Tuan Yang Di Pertua,

Untuk makluman Ahli Yang Berhormat, Jabatan Penjara Malaysia melalui Kementerian Dalam Negeri telah memohon peruntukan di bawah Rancangan Malaysia ke Dua Belas (RMK-12) RP3 Tahun 2023 bagi tujuan pembelian tanah di Negeri Kelantan. Status kelulusan bagi permohonan peruntukan tersebut dijangka akan diketahui selepas daripada pembentangan Belanjawan Negara bagi tahun 2023.

Buat masa ini cadangan pembinaan penjara tambahan di Negeri Kelantan masih di peringkat cadangan penyediaan pernyataan keperluan (*needs statement*) dan rekabentuk. Kos pembinaan akan diketahui setelah pernyataan keperluan (*needs statement*) dan rekabentuk dimuktamadkan.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN
**DARIPADA : TUAN SANISVARA NETHAJI RAYER A/L
RAJAJI [JELUTONG]**

SOALAN

YB TUAN SANISVARA NETHAJI RAYER A/L RAJAJI [JELUTONG]
minta **MENTERI PERUMAHAN DAN KERAJAAN TEMPATAN**
menyatakan adakah Kementerian bercadang untuk meningkatkan bantuan
kewangan kepada Kerajaan-Kerajaan Negeri untuk menampung tabung
penyelenggaraan bagi menyelenggara rumah-rumah pangsa kos rendah
dan sederhana rendah.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan melalui Rancangan Malaysia Ke-12 (RMKe-12) telah meluluskan sejumlah RM250 juta untuk Tabung Penyelenggaraan Perumahan Malaysia (TPPM) dan RM250 juta bagi Program Penyenggaraan Perumahan Malaysia (PPP) untuk dilaksanakan di seluruh negara. Program TPPM dan PPP merupakan inisiatif Kerajaan Persekutuan bagi membantu penghuni perumahan berstrata kos rendah serta kos sederhana rendah awam dan swasta untuk membaik pulih dan menyelenggara harta bersama.

Program baik pulih dan penyelenggaraan yang dilaksanakan di bawah kedua-dua program ini merangkumi pelbagai skop seperti membaiki atau mengganti lif, tangki air, bumbung, cat dan lain-lain lagi. Pihak Berkuasa Tempatan (PBT) dan Jabatan / Agensi di bawah Kerajaan Negeri merupakan agensi pelaksana dan dipantau oleh Jabatan Perumahan Negara (JPN).

Buat masa ini, inisiatif bantuan penyelenggaraan rumah pangsa kos rendah dan sederhana rendah awam dan swasta dilaksanakan dengan pertimbangan kelulusan peruntukan berdasarkan tahap kerosakan yang lebih kritikal dan mendesak agar dapat meningkatkan tahap daya huni, keselamatan dan kualiti hidup penduduk. Cadangan untuk meningkatkan peruntukan bagi program penyelenggaraan dijangka akan dikemukakan untuk pertimbangan di bawah Rancangan Malaysia Ke-13 (RMKe-13) dengan mengambil kira pelbagai faktor seperti kapasiti agensi pelaksana, peningkatan kos penyelenggaraan (tenaga buruh, bahan mentah dan lain-lain) serta kemampuan kewangan Kerajaan.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN
DARIPADA : TUAN SANISVARA NETHAJI RAYER A/L
RAJAJI (JELUTONG)

SOALAN

TUAN SANISVARA NETHAJI RAYER A/L RAJAJI (JELUTONG)
minta **MENTERI DALAM NEGERI** menyatakan apakah langkah-langkah
yang diambil oleh Kerajaan untuk memastikan kejadian-kejadian
kematian dalam tahanan tidak berlaku lagi.

JAWAPAN

Tuan Yang Dipertua,

Untuk makluman Ahli Yang Berhormat, berasaskan kepada prosedur yang ditetapkan oleh Jabatan Penjara, kesemua kejadian kematian di bawah jagaan Jabatan Penjara akan dilaporkan kepada pihak polis. Laporan juga akan dibuat kepada hakim *coroner* untuk dilaksanakan *coroner visit* bagi tujuan arahan pelaksanaan bedah siasat. Siasatan dalaman oleh Jabatan Penjara juga dibuat bagi kejadian yang diklasifikasikan sebagai kejadian luar biasa dan dimaklumkan kepada ahli keluarga atau kedutaan.

Keselamatan banduan sememangnya merupakan antara tanggungjawab utama Jabatan Penjara. Oleh itu langkah-langkah kawalan, pemeriksaan, pengasingan penempatan, ujian psikologi, risikan maklumat, pemantauan rapi serta kemudahan kesihatan sentiasa dilakukan untuk mengelakkan sebarang ancaman luar jangka. Malah Jabatan Penjara mempunyai standard prosedur kerja atau perintah tetap Komisioner Jeneral Penjara bagi tujuan pengurusan semua aspek banduan termasuklah keselamatan.

Langkah-langkah pencegahan proaktif yang diambil untuk meningkatkan kemudahan kesihatan dan mengurangkan kematian di penjara ialah;

- i. Meningkatkan klinik, perkhidmatan dan kemudahan kesihatan di penjara dengan mewujudkan penjawatan Pegawai Perubatan sebagai kader di seluruh institusi Penjara;
- ii. Mewajibkan pemeriksaan kesihatan semasa banduan masuk ke penjara dan dari masa ke semasa apabila wujud keperluan;
- iii. Menjalankan ujian KYKO, DASS dan BDI (*Beck Depression Inventory*) semasa kemasukan sebagai langkah mencegah tindakan mencederakan diri atau membunuh diri;

SOALAN : 421

- iv. Menyediakan Perintah Tetap Komisioner Jeneral Penjara bagi mempercepatkan tindakan penghantaran banduan yang sakit untuk menerima rawatan di klinik penjara maupun hospital di luar penjara;
- v. Menyediakan kemudahan kenderaan dan kakitangan *standby* 24 jam bagi tujuan melaksanakan pengiringan segera banduan yang sakit ke hospital luar untuk rawatan lanjut
- vi. Menyediakan kemudahan klinik di dalam penjara yang dilengkapi fasiliti asas beserta doktor panel dan pembantu perubatan untuk memberi perkhidmatan rawatan segera sementara mendapatkan rawatan selanjutnya oleh pihak hospital luar sekiranya perlu.
- vii. Penempatan berasingan untuk banduan yang mempunyai penyakit berjangkit;
- viii. Bekerjasama dengan pihak universiti dan SUHAKAM bagi tujuan kajian mempertingkatkan kemudahan kesihatan di penjara;
- ix. Merancang pembinaan penjara perubatan mengikut zon bagi tujuan menempatkan penghuni yang memerlukan rawatan berterusan; dan
- x. Penambahbaikan fizikal sel dan dormitori penempatan penghuni bagi memudahkan kawalan dan pemantauan oleh kakitangan bertugas.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : TUAN SANISVARA NETHAJI RAYER
A/L RAJAJI [JELUTONG]**

SOALAN

TUAN SANISVARA NETHAJI RAYER A/L RAJAJI minta **MENTERI KESIHATAN** menyatakan adakah Kementerian bercadang untuk membina sebuah hospital besar yang baharu dengan kemudahan-kemudahan yang moden termasuk tempat letak kereta yang mencukupi di negeri Pulau Pinang.

JAWAPAN

Tuan Yang di-Pertua,

1. Penduduk di Pulau Pinang menerima perkhidmatan kesihatan di enam (6) buah hospital iaitu Hospital Pulau Pinang, Hospital Balik Pulau, Hospital Seberang Jaya, Hospital Bukit Mertajam, Hospital Kepala Batas dan Hospital Sungai Bakap. Di samping itu, terdapat 17 buah hospital swasta di keseluruhan negeri Pulau Pinang
2. Terdapat lima (5) projek utama yang telah diluluskan pelaksanaannya dan dijangka akan dapat menampung perkembangan perkhidmatan, iaitu:
 - (i) Blok Wanita dan Kanak-Kanak Hospital Pulau Pinang (dengan 329 katil). Projek kini di dalam fasa pembangunan reka bentuk dan dijangka siap pada suku pertama tahun 2025;

SOALAN NO. 422

- (ii) Blok Pakar dan Wad Hospital Pulau Pinang dengan (216 katil). Projek ini dijangka akan ditender pada pertengahan tahun 2022;
- (iii) Blok Pusat Perkhidmatan Stem Sel Hospital Pulau Pinang. Projek ini dalam proses tender;
- (iv) Pembinaan *Multi-Storey Block*, Hospital Seberang Jaya. Projek ini dijangka siap pada suku ketiga 2023; dan
- (v) Naik taraf Jabatan Kecemasan dan Pesakit Luar Hospital Balik Pulau. Projek ini dalam proses penyerahan.

3. Pembangunan sebuah hospital awam baharu di Pulau Pinang tidak diperlukan memandangkan 6 buah hospital-hospital awam sedia ada masih berupaya menampung keperluan penduduk dan terletak dalam lingkungan 20 km antara satu sama lain.

4. KKM akan memberi fokus untuk menaik taraf hospital sedia ada bagi memantapkan penyampaian perkhidmatan dan menyokong program kluster.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK HAJI SHABUDIN BIN YAHAYA
[TASEK GELUGOR]**

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI ALAM SEKITAR DAN AIR** menyatakan apakah langkah atau persediaan awal yang diambil bagi menghadapi musim tengkujuh tahun ini. Nyatakan juga pelan strategik bagi mengelakkan kejadian seperti penghujung tahun lalu berulang.

JAWAPAN

Tuan Yang Di-Pertua,

1. Bagi menghadapi musim tengkujuh, KASA melalui JPS sentiasa peka dengan keadaan perubahan iklim dan berikut adalah antara persediaan yang telah dan sedang dilaksanakan oleh Jabatan Pengairan dan Saliran (JPS):

i. Memantau Status Semasa Curahan Hujan Dan Aras Air Sungai Utama Seluruh Malaysia

Pusat Ramalan dan Amaran Banjir Negara (PRABN) memantau secara online status semasa curahan hujan dan aras air sungai utama seluruh Malaysia melalui laman sesawang <https://publicinfobanjir.water.gov.my>.

Pemantauan secara langsung ini dengan kerjasama daripada lain-lain agensi seperti MetMalaysia, Agensi

SOALAN NO: 423

Pengurusan Bencana Negara (NADMA) serta JPS Negeri akan dapat meningkatkan keupayaan hebahan supaya dapat memberi tempoh masa yang mencukupi untuk penduduk dan agensi yang bertanggungjawab melaksanakan tindakan dan persediaan awal dalam menghadapi banjir.

ii. Program Ramalan dan Amaran Banjir (PRAB)

Melaksanakan Program Ramalan dan Amaran Banjir (PRAB) – PRAB Fasa 1 melibatkan 3 lembangan sungai iaitu Sungai Kelantan, Sungai Terengganu dan Sungai Pahang. Projek PRAB Fasa 1 telah beroperasi dan dalam proses mengemaskini data-data hidrologi dan data-data berkaitan bagi kegunaan model-model ramalan yang dibangunkan. Manakala PRAB Fasa 2 sedang dalam pelaksanaan untuk 38 lembangan sungai seluruh Malaysia dan dijangka siap secara berperingkat sehingga tahun 2025.

PRAB membolehkan agensi penyelamat dan orang ramai membuat persediaan awal sebelum kejadian banjir berlaku bagi mengurangkan risiko kerosakan harta benda dan kehilangan nyawa. Dengan siapnya PRAB ini simulasi banjir akan dapat dilakukan 7 hari awal manakala amaran banjir akan diberikan 2 hari awal sebelum banjir dijangka berlaku kepada pihak NADMA dan JPS Negeri untuk tindakan selanjutnya di peringkat daerah, negeri dan pusat.

PRAB merupakan program jangka panjang dan menyeluruh yang akan dijalankan bermula tahun 2015 yang meliputi seluruh Negara dengan kawasan fokus di 41 lembangan sungai. Keseluruhan program ini dijangka akan disiapkan dilaksanakan di dalam RMKe-12. Empat (4) komponen utama PRAB merangkumi komponen Pengesanan, Pusat Data Ramalan, Pemodelan Ramalan dan Hebahan Amaran.

SOALAN NO: 423

2. Bagi kawasan-kawasan yang mungkin terkesan dengan banjir genang, JPS akan mengaturkan persiapan pam dan bersedia untuk membawa pam JPS ke kawasan banjir sekiranya diperlukan.
3. JPS juga sentiasa memberikan maklumat terkini situasi banjir semasa, tinjauan keadaan hidrologi dan persediaan JPS menghadapi bencana banjir dalam Mesyuarat Jawatankuasa Pengurusan Bencana Pusat. Selain itu, JPS melalui Pusat Ramalan dan Amaran Banjir Negara (PRABN) sentiasa bekerjasama dengan Agensi Pengurusan Bencana Negara (NADMA) untuk memberikan amaran awal banjir.
4. JPS melalui laman sesawang PublicInfobanjir senantiasa memantau keadaan hujan dan aras air di seluruh Malaysia. Apabila data hujan atau data aras air telah melebihi nilai ambang tertentu, amaran akan dikeluarkan di dalam laman sesawang PublicInfobanjir untuk dirujuk oleh pengguna. Laman sesawang ini juga sering menjadi rujukan utama kepada agensi pengurusan bencana untuk membuat persiapan menghadapi situasi banjir.
5. Pengguna dan orang awam juga boleh menggunakan aplikasi mudah alih iaitu MyPublic Infobanjir untuk mendapatkan maklumat amaran banjir, status aras air sungai dan hujan di seluruh negara.
6. Untuk meningkatkan kecekapan penyampaian hebahan amaran banjir MCMC, NADMA, JPS dan MET Malaysia telah menambah baik hebahan amaran bencana banjir menggunakan kaedah flash broadcast kepada pengguna telefon di kawasan yang terlibat untuk membolehkan amaran banjir dihebahkan secara meluas.
7. Bagi mengelakkan kejadian seperti penghujung tahun lalu berulang, pelan strategik melalui pendekatan secara struktur dan bukan struktur telah dilaksanakan oleh JPS seperti berikut:
 - i. Membangunkan struktur dan rekabentuk berkonseptkan *make room for water* seperti menaik taraf sistem pengurusan banjir, pantai dan sungai-sungai utama serta menaik taraf benteng / ban pantai / sungai dengan meningkatkan tahap perlindungan (kala purata ulangan - Average Recurrence

SOALAN NO: 423

Interval [ARI]) reka bentuk infrastruktur saliran dan pantai daripada 100 tahun ARI kepada 200 tahun ARI;

- ii. Menekankan penggunaan pelan-pelan dan garis panduan Manual Saliran Mesra Alam (MSMA) dan Pelan Induk Saliran Mesra Alam (PISMA) oleh Kerajaan Negeri dan Pihak Berkuasa Tempatan (PBT), dan memperkasa pematuhan Pelan Hakisan dan Kelodak (ESCP);
- iii. Meningkatkan kesedaran awam dengan pelaksanaan Public Outreach Programme (POP) dan kempen kesedaran alam sekitar melalui pendekatan *Communication, Education and Public Awareness* (CEPA). Salah satu pendekatan yang akan diperkenalkan adalah inisiatif pelaksanaan latihan menghadapi banjir (*flood drills*). Pelaksanaan latihan ini akan diterapkan di peringkat sekolah dan masyarakat melalui rukun tetangga untuk meningkatkan kesedaran rakyat menghadapi amaran banjir dan langkah yang perlu diambil jika berdepan ancaman ini; dan
- iv. Menaik taraf penggunaan teknologi terkini sistem ramalan dan amaran banjir. KASA akan membangunkan sistem siren dan amaran banjir secara bersepadu yang dikoordinasikan oleh JPS. Sistem ini bertujuan memantapkan ramalan dan amaran banjir di mana amaran akan dikeluarkan oleh JPS kepada kawasan-kawasan yang bakal terjejas. Pembangunan sistem amaran ini akan dilengkapi dengan sistem pemantauan banjir berdasarkan kamera (*camera-based flood disaster monitoring system*), di mana amaran banjir akan dikeluarkan bersama-sama dengan foto yang memaparkan keadaan terkini aliran air bagi meningkatkan kewaspadaan orang ramai.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI KANAN PENDIDIKAN** menyatakan apakah langkah bagi mengatasi keluhan guru berkaitan silibus mata pelajaran yang tidak menjangkau pemikiran anak-anak di sekolah. Adakah proses pelaksanaan silibus akan melibatkan guru-guru di lapangan.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memastikan kurikulum yang dilaksanakan adalah sesuai dan sepadan dengan peringkat umur serta aras pemikiran murid.

Untuk makluman Ahli Yang Berhormat, KPM melaksanakan penjelasan dan bimbingan berkaitan kandungan Dokumen Standard Kurikulum dan Pentaksiran (DSKP) melalui pelbagai medium bagi membantu guru mengajar subjek atau silibus kepada murid dengan lebih berkesan.

Antara usaha yang dilaksanakan adalah memberi penjelasan DSKP melalui aktiviti libat urus, bimbingan dan konsultasi bersama *School Improvement Specialist Coach* (SISC+) serta guru pakar yang berpengalaman bagi meningkatkan pemahaman dan kualiti pengajaran guru. Selain itu, aktiviti Komuniti Pembelajaran Profesional atau dikenali sebagai *Professional Learning Community* (PLC) berkaitan pemahaman terhadap silibus turut dilakukan oleh pihak sekolah bersama pembimbing

yang mahir dan berpengalaman.

KPM turut membantu guru melaksanakan kurikulum dalam bilik darjah dengan menyediakan pelbagai bahan sokongan yang sesuai mengikut keupayaan murid. Bahan sokongan yang disediakan adalah berbentuk buku panduan yang mengandungi contoh pengajaran dan pembelajaran (PdP) serta video penerangan. Semua bahan ini boleh dicapai melalui pautan bpk.moe.gov.my dan Repositori SumberKu (sumberku.moe-dl.edu.my).

Untuk makluman Ahli Yang Berhormat, setiap peringkat penggubalan kurikulum melibatkan guru dan pihak berkepentingan seperti pensyarah universiti, pensyarah institut pendidikan guru (IPG) dan SISC+ mengikut bidang kepakaran masing-masing. Turut dilibatkan adalah organisasi lain seperti Bank Negara Malaysia, Dewan Bahasa dan Pustaka serta Kesatuan Perkhidmatan Perguruan Kebangsaan Malaysia (National Union of the Teaching Profession) mengikut keperluan mata pelajaran.

KPM yakin usaha penerangan dan bimbingan yang dilaksanakan ini dapat membantu guru meningkatkan kualiti pengajaran kepada murid.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

**DARIPADA : YB DATUK HAJI SHABUDIN BIN YAHDAYA
(TASEK GELUGOR)**

SOALAN

DATUK HAJI SHABUDIN BIN YAHDAYA [TASEK GELUGOR] minta **MENTERI KANAN KERJA RAYA** menyatakan adakah terdapat cadangan untuk memasang tembok penghadang bagi mengelakkan kejadian terjun di Jambatan Pulau Pinang berterusan.

JAWAPAN

Tuan Yang Di-Pertua,

Untuk makluman Ahli Yang Berhormat, Lembaga Lebuhraya Malaysia (LLM) sedia maklum dan bimbang terhadap peningkatan statistik cubaan bunuh diri di Jambatan Pulau Pinang. Berdasarkan semakan rekod, lokasi hentian kecemasan yang ada di laluan Jambatan Pulau Pinang ini telah dikenalpasti sebagai lokasi tumpuan (hotspot) bagi tujuan tersebut.

Sebagai langkah proaktif, LLM telah mengambil tindakan meletakkan penghadang di lokasi-lokasi hentian kecemasan di atas jambatan tersebut bagi membantu mengekang cubaan bunuh diri ini selain meningkatkan pemantauan untuk mengesan sebarang potensi kejadian daripada terus berlaku.

Bagi membantu intervensi menangani kes cubaan bunuh diri, pihak PLUS akan menggunakan teknologi *artificial intelligence* (AI) melalui kamera beresolusi tinggi sediada di Jambatan Pulau Pinang. Penggunaan teknologi AI ini akan membolehkan pihak PLUS untuk mengenalpasti sebarang kelakuan yang mencurigakan dan kecenderungan mana-mana individu untuk membuat cubaan bunuh diri untuk dihalang dengan tindakan yang lebih responsif. Ujian AI ini sedang dijalankan di lokasi dan dijangka akan diaplikasikan di lokasi tumpuan menjelang akhir Julai 2022.

Selain itu, beberapa siri perbincangan telah diadakan bersama agensi tertentu bagi mengenalpasti pendekatan terbaik bagi mengatasi masalah ini termasuk mengkaji kesesuaian pemasangan pagar atau tembok penghadang dengan mengambilkira aspek kejuruteraan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

SOALAN

DATUK HAJI SHABUDIN BIN YAHAYA [TASEK GELUGOR] minta **MENTERI KANAN PENDIDIKAN** menyatakan apakah langkah yang diambil bagi mengelakkan trend guru bersara awal yang semakin membimbangkan sehingga dianggarkan lebih 10,000 guru bersara awal setiap tahun.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memantau keperluan dan pengisian jawatan Pegawai Perkhidmatan Pendidikan (PPP) di sekolah bawah KPM.

Untuk makluman Ahli Yang Berhormat, jumlah 10,000 orang guru yang bersara awal setiap tahun yang dinyatakan adalah tidak tepat. Berdasarkan rekod KPM, jumlah guru yang bersara awal pada tahun 2021 adalah seramai 4,389 orang. Ini merupakan 1.06 peratus daripada jumlah keseluruhan pengisian guru pada 1 Januari 2021. Untuk makluman Ahli Yang Berhormat, purata peratusan guru yang bersara pilihan untuk tahun 2017 hingga 2021 adalah 0.99 peratus daripada jumlah keseluruhan pengisian guru pada 1 Januari tahun-tahun tersebut.

Dalam konteks pembangunan kerjaya, KPM menyediakan peluang pembangunan profesionalisme kepada guru bagi memastikan guru sentiasa bersedia serta bermotivasi dalam menjalankan tugas dan berusaha meningkatkan kualiti perkhidmatan masing-masing. Ini termasuk memberi pendedahan tentang deskripsi tugas guru akademik di sekolah serta latihan dan bimbingan yang berterusan kepada guru dalam mendukung pelaksanaan dasar pendidikan semasa, termasuk melengkapkan guru dengan kemahiran dalam aspek pendigitalan pendidikan bagi mendepani sistem pendidikan abad ke-21.

Di samping itu, KPM juga menyediakan latihan dalam meningkatkan kesejahteraan psikologi untuk memberikan kemahiran pengurusan emosi, kawalan diri dan amalan harian yang positif berdasarkan tahap kesejahteraan psikologi yang dinilai melalui Inventori Kesejahteraan Psikologi (IKPsi).

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : TUAN SHAHARIZUKIRNAIN BIN ABD.
KADIR (SETIU)**

SOALAN

TUAN SHAHARRIZUKIRNAIN BIN ABD. KADIR (SETIU) minta **MENTERI PEMBANGUNAN WANITA, KELUARGA DAN MASYARAKAT** menyatakan sejauh mana kempen JomDaftar mendapat sambutan dan inisiatif lain yang sedang dan telah diusahakan bagi meningkatkan pendaftaran Taman Asuhan Kanak-Kanak (TASKA) di seluruh negara.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) memandang serius isu TASKA tidak berdaftar kerana melibatkan keselamatan dan perkembangan kanak-kanak di TASKA.

KPWKM melalui Jabatan Kebajikan Masyarakat (JKM) sentiasa giat menggerakkan usaha pendaftaran TASKA dengan memperkenalkan Kempen Jom Daftar yang bertujuan meningkatkan kesedaran ibu bapa dan masyarakat tentang kepentingan TASKA berdaftar.

Kempen Jom Daftar ini memberi peluang kepada pengusaha TASKA yang belum berdaftar untuk mendapatkan khidmat nasihat berhubung pendaftaran TASKA daripada JKM dan agensi teknikal yang terlibat iaitu Jabatan Bomba dan Penyelamat, Pihak Berkuasa Tempatan dan Jabatan Kesihatan. Kempen Jom Daftar ini telah banyak membantu pengusaha dalam mendapatkan maklumat bagi proses pendaftaran TASKA. Purata

pendaftaran baharu TASKA juga meningkat kepada 200 TASKA pada setiap tahun sejak kempen ini dijalankan. Sehingga Jun 2022, sebanyak sembilan (9) Kempen Jom Daftar telah dilaksanakan di seluruh negara.

Kerajaan telah menyediakan pelbagai insentif bagi menggalakkan pendaftaran TASKA. Antara insentif yang telah disediakan dan sedang dilaksanakan adalah seperti berikut:

- i. Elaun Bangunan Industri pada kadar 10% untuk ubah suai, penyenggaraan dan pemilikan bangunan untuk TASKA bagi pengusaha TASKA merujuk kepada Perenggan 80 Jadual Akta Cukai Pendapatan 1967. Insentif ini hanya terpakai kepada pemilik bangunan yang menjalankan perniagaan TASKA yang berdaftar dengan JKM;
- ii. Subsidi Yuran Pengasuhan kepada kanak-kanak di TASKA berdaftar sebanyak RM180 sebulan kepada seorang kanak-kanak sekiranya memenuhi syarat kelayakan utama yang ditetapkan ke atas ibu bapa/penjaga serta pengusaha TASKA;
- iii. Pengecualian cukai pendapatan bagi tempoh lima (5) tahun diberi kepada majikan yang menyediakan TASKA. Peruntukan ini bermula pada tahun taksiran 2013 merujuk kepada Ketetapan Umum No. 5/2016 dan Akta Cukai Pendapatan 1967;
- iv. Potongan Cukai dua (2) kali ke atas majikan yang menyediakan elaun atau subsidi kepada pekerja dan perbelanjaan penyelenggaraan kemudahan TASKA dan pusat jagaan kanak-kanak'
- v. Program Galakan Pendaftaran TASKA dengan JKM melalui Pemberian Diskaun Bil Elektrik sebanyak 20 peratus kepada pengusaha/pemilik TASKA yang berdaftar dengan JKM di Semenanjung Malaysia dari 1 November 2019 hingga 31 Disember 2020; dan

- vi. Pelepasan cukai pendapatan dari RM2,000 kepada RM3,000 kepada pembayar cukai individu yang menghantar anak ke TASKA yang berdaftar dengan JKM bagi tahun taksiran 2021 dan 2022 melalui Pelan Jana Semula Ekonomi Negara (PENJANA).

Kerajaan juga sangat prihatin dengan TASKA-TASKA yang berdaftar yang terkesan dengan Perintah Kawalan Pergerakan akibat penularan COVID-19 dengan menyediakan bantuan-bantuan berikut:

- i. Bantuan Khas secara *one-off* kepada TASKA Komuniti sebanyak RM5,000;
- ii. Pada tahun 2020, Bantuan Khas di bawah insentif PENJANA sebanyak RM5,000 kepada TASKA Institusi dan TASKA di Tempat Kerja dan RM1,500 bagi setiap TASKA di Rumah yang berdaftar; dan
- iii. Pada tahun 2021, Bantuan Khas di bawah insentif Pakej Perlindungan Rakyat Dan Pemulihan Ekonomi (PEMULIH) sebanyak RM3,000 kepada TASKA Institusi, TASKA Komuniti dan TASKA di Tempat Kerja serta RM800 kepada setiap TASKA di Rumah yang berdaftar dengan JKM.

KPWKM melalui JKM sentiasa komited dalam memastikan keselamatan dan kesejahteraan kanak-kanak di TASKA terjamin. Sehubungan dengan itu, JKM sentiasa meneliti keperluan semasa yang boleh ditambah baik bagi memastikan TASKA-TASKA di seluruh negara berdaftar.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : TUAN SHAHARIZUKIRNAIN BIN
ABD. KADIR (SETIU)**

SOALAN

TUAN SHAHARIZUKIRNAIN BIN ABD. KADIR (SETIU) minta **MENTERI PEMBANGUNAN WANITA, KELUARGA DAN MASYARAKAT** menyatakan faktor-faktor yang menyumbang kepada lebih 20,000 lelaki mendapatkan khidmat kaunseling daripada Lembaga Penduduk dan Pembangunan Keluarga Negara (LPPKN).

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) melalui Lembaga Penduduk dan Pembangunan Keluarga Negara (LPPKN) menyediakan perkhidmatan kaunseling keluarga dan perkahwinan yang memberi fokus kepada isu-isu dalam perkahwinan dan kekeluargaan. Melalui perkhidmatan kaunseling individu dan kelompok ini, ahli keluarga dapat dibantu dalam menangani masalah seperti perceraian, keganasan rumah tangga, tekanan, kewangan, komunikasi, kerjaya, personaliti dan pelbagai isu berkaitan kekeluargaan.

Sejak 2019 sehingga 31 Mei 2022, LPPKN telah menerima 76,626 klien bagi perkhidmatan kaunseling, dengan sejumlah 22,662 orang terdiri daripada individu lelaki. Daripada jumlah lelaki yang mendapatkan kaunseling, sebanyak 39.5 peratus masalah melibatkan kesihatan mental, 19.7 peratus masalah melibatkan isu keluarga seperti pra-perkahwinan, perkahwinan, hubungan anak dan ibu bapa, komunikasi dan perceraian. Seterusnya 15.5 peratus masalah berkaitan personaliti;

10.5 peratus berkaitan berkaitan kerjaya; 6.2 peratus berkaitan ketagihan; 0.6 peratus berkaitan kesihatan; dan 8 peratus dikategorikan sebagai lain-lain masalah.

Faktor-faktor yang menyumbang kepada penyertaan kaum lelaki untuk mendapatkan perkhidmatan ini, serta strategi yang telah digunakan adalah seperti berikut :

- 1) Kesedaran umum tentang kepentingan kesejahteraan lelaki dari segi mental dan jasmani ditingkatkan melalui pelbagai hebahan advokasi di media arus perdana dan media sosial;
- 2) Kebolehpercayaan kepada Kaunselor Berdaftar yang sentiasa menjaga etika profesional Kaunselor dan menjaga kerahsiaan klien;
- 3) Menangani ego dan sifat malu melalui kaedah serta teknik kaunseling yang bersesuaian seperti kaunseling kelompok sesama kumpulan lelaki yang mempunyai masalah yang sama; dan
- 4) Aksesibiliti kepada khidmat kaunseling lebih mudah dicapai klien melalui panggilan telefon dan runding cara secara maya dalam talian.

Kementerian mengharapkan agar rakyat Malaysia terus memanfaatkan perkhidmatan kaunseling yang disediakan oleh LPPKN demi kesejahteraan keluarga Malaysia.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : TUAN SHAHARIZUKIRNAIN BIN ABD.
KADIR (SETIU)**

SOALAN

TUAN SHAHARIZUKIRNAIN BIN ABD. KADIR (SETIU) minta **MENTERI PEMBANGUNAN WANITA, KELUARGA DAN MASYARAKAT** menyatakan sejauh mana kajian yang telah dibuat bagi meminda Akta Kanak-Kanak serta Akta Taman Asuhan Kanak-Kanak kerana nilai denda sedia ada tidak lagi relevan.

JAWAPAN

Tuan Yang di-Pertua,

Kerajaan adalah bertanggungjawab untuk memastikan penyertaan, perkembangan, perlindungan dan kelangsungan hidup kanak-kanak terjamin selaras dengan obligasi Malaysia sebagai Negara Pihak kepada Konvensyen Mengenai Hak Kanak-Kanak (CRC). Justeru, Kerajaan telah membuat penambahbaikan terhadap Akta Kanak-Kanak 2001 melalui pindaan pada tahun 2016 yang berkuatkuasa pada Januari 2017. Ini merupakan langkah proaktif Kerajaan dalam memastikan supaya kanak-kanak di negara ini terus diberi keutamaan dari segi perlindungan dan pemeliharaan.

Penambahbaikan tersebut merangkumi empat (4) peruntukan utama iaitu peningkatan penalti bagi kesalahan di bawah Akta; Perintah Khidmat Masyarakat; penjagaan berdasarkan keluarga; dan mewujudkan Daftar Kanak-kanak. Selain daripada itu, penambahbaikan turut melibatkan kenaikan hukuman sedia ada di bawah Seksyen 31 yang berkaitan penganiayaan, pengabaian atau pendedahan kanak-kanak iaitu peningkatan tempoh maksimum pemenjaraan daripada 10 tahun kepada 20 tahun, denda daripada RM20,000 kepada RM50,000, atau kedua-duanya dengan Perintah Khidmat Masyarakat (*Community Service Order - CSO*) sebagai hukuman mandatori.

Terkini, Kementerian Pembangunan Wanita, Keluarga dan Masyarakat (KPWKM) telah mengadakan kerjasama dengan *United Nation Children's Fund (UNICEF)* dan Pejabat Pesuruhjaya Kanak-Kanak (OCC) SUHAKAM dalam usaha untuk mengkaji keperluan pindaan semula Akta Kanak-Kanak 2001 (pindaan 2016) dengan mengenal pasti kelompongan (loopholes) melalui satu kajian yang akan dimuktamad dan diselaraskan dengan semakan semula Dasar Kanak-Kanak Negara serta Pelan Tindakan yang dijangka siap pada tahun 2023.

Dalam hal ini, Kementerian sentiasa menyokong sesi konsultasi atau libat urus yang diadakan oleh UNICEF dan OCC bersama-sama pertubuhan-pertubuhan bukan Kerajaan (NGO), individu profesional, aktivis kanak-kanak dan ahli akademik bagi memastikan pandangan semua pihak diambil

perhatian. Fasa ini adalah amat penting dalam proses kajian semula Akta Kanak-Kanak 2001 agar ianya lebih menyeluruh dan menepati keperluan semua aspek meliputi perlindungan, pemeliharaan dan pemulihan kanak-kanak di Malaysia.

Jabatan Kebajikan Masyarakat (JKM) juga sedang meneliti pindaan terhadap Akta Taman Asuhan Kanak-Kanak (TASKA) 1984 dan Peraturan-Peraturan Taman Asuhan Kanak-Kanak 1984. Pindaan Akta TASKA 1984 akan mengambilkira isu semasa termasuk perkara yang melibatkan pendaftaran, pengawalan dan pemeriksaan di TASKA.

Tuan Yang di-Pertua,

Pada masa yang sama, KPWKM akan terus mempergiat program literasi undang-undang dan penguatkuasaan peruntukan Akta sedia ada untuk memberi kesedaran kepada umum bahawa memelihara dan melindungi kanak-kanak di negara ini merupakan tanggungjawab bersama.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI KANAN PENDIDIKAN** menyatakan faktor-faktor utama yang menyumbang kepada keputusan peperiksaan SPM pada tahun 2020 yang diumumkan sebagai keputusan terbaik dalam tempoh 5 tahun serta adakah ia memadai untuk dijadikan kayu ukur kepada keberkesanan pembelajaran dalam talian.

JAWAPAN

Tuan Yang di-Pertua,

Kementerian Pendidikan Malaysia (KPM) ingin menegaskan bahawa kejayaan pencapaian keseluruhan calon Sijil Pelajaran Malaysia (SPM) 2020 merupakan hasil usaha yang berterusan dan komitmen padu daripada semua pihak yang terlibat termasuk calon, guru, pentadbir sekolah, ibu bapa, persatuan ibu bapa dan guru, serta masyarakat. Walaupun berdepan dengan situasi pandemik COVID-19 yang sangat mencabar dan sekolah terpaksa ditutup, kelangsungan pembelajaran calon peperiksaan SPM 2020 diberi keutamaan agar pengajaran dan pembelajaran (PdP) dapat diteruskan dan persediaan rapi secara intensif juga dapat dilaksanakan.

Untuk makluman Ahli Yang Berhormat, KPM telah melaksanakan pelan komprehensif bagi membantu calon bersedia sepenuhnya sebelum menduduki peperiksaan SPM 2020. KPM telah membuat pindaan pada Takwim Penggal dan Cuti Persekolahan Tahun 2020 dengan memaksimumkan tempoh hari persekolahan. Apabila sekolah dibuka pada 24 Jun 2020, calon peperiksaan SPM telah diberi keutamaan hadir ke sekolah untuk PdP secara bersemuka. Begitu juga apabila sekolah dibuka semula pada 20 Januari 2021.

Selain itu, tarikh peperiksaan SPM 2020 yang asalnya dijadualkan pada Oktober 2020 telah dijadualkan semula sebanyak tiga kali sebelum peperiksaan akhirnya dilaksanakan dalam dua sesi, iaitu sesi pertama pada 22 Februari hingga 25 Mac 2021 dan sesi kedua pada 6 hingga 23 April 2021. Pelanjutan sesi persekolahan dan penjadualan semula tarikh peperiksaan telah memberi ruang dan peluang kepada calon untuk membuat persediaan rapi termasuk dalam aspek emosi bagi memastikan calon dapat menduduki peperiksaan dalam keadaan bersedia dan tenang.

Bagi memastikan kelangsungan PdP dalam kalangan calon peperiksaan semasa sekolah ditutup, KPM telah melaksanakan pengajaran dan pembelajaran di rumah (PdPR) melalui tiga pendekatan, iaitu secara dalam talian, luar talian dan off-site mengikut kesesuaian guru dan murid. KPM turut menyediakan pelantar *Digital Educational Learning Initiative* Malaysia (DELIMa) sebagai pusat rujukan sehenti untuk calon dan guru mendapatkan pelbagai bahan sokongan agar calon dapat memperkuuh pemahaman dalam kandungan mata pelajaran yang perlu dipelajari.

Selain itu, KPM menyediakan rancangan TV Pendidikan melalui saluran DidikTV KPM, TV Okey RTM dan Tutor TV Astro. Antara rancangan khusus untuk calon SPM 2020 adalah seperti *Road to Success* dan SUKSES SPM 2020 yang memfokuskan kepada kandungan mata pelajaran Tingkatan Lima bagi membantu calon menguasai kandungan kurikulum sebelum menduduki peperiksaan SPM 2020.

KPM juga sentiasa memberi keutamaan dalam aspek keselamatan warga pendidikan, termasuk calon dan juga petugas peperiksaan. Bagi membolehkan peperiksaan SPM 2020 dilaksanakan secara teratur dan lancar serta mengambil kira keselamatan murid, guru serta petugas peperiksaan, KPM telah mengeluarkan Garis Panduan Pengurusan dan Pengoperasian Sekolah Dalam Norma Baharu. Garis panduan ini turut merangkumi panduan pengurusan pentaksiran pusat dan peperiksaan awam bagi memastikan peperiksaan dapat dikendalikan dalam keadaan selamat.

Secara keseluruhan, KPM yakin bahawa semua inisiatif dan usaha yang dilakukan secara berterusan ini telah membantu calon membuat persediaan rapi dan mencapai kejayaan mengikut kemampuan masing-masing. Kejayaan pencapaian terbaik SPM 2020 ini melibatkan pendekatan yang menyeluruh dan tidak hanya bergantung kepada pelaksanaan pembelajaran secara dalam talian sahaja.

Sekian, terima kasih.

SOALAN NO : 430

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN SHAHARIZUKIRNAIN BIN ABD
KADIR [SETIU]

SOALAN

TUAN SHAHARIZUKIRNAIN BIN ABD KADIR [SETIU] minta **MENTERI KEWANGAN** menyatakan kekangan yang dihadapi oleh Kementerian untuk mengeluarkan laporan belanjawan tahunan secara berkala seperti mana laporan Pakej Rangsangan Ekonomi (LAKSANA).

JAWAPAN

Tuan Yang di-Pertua,

Untuk makluman Yang Berhormat, Kementerian Kewangan telah menerbitkan Laporan Kewangan Rakyat (LKR) yang merupakan kesinambungan Laporan LAKSANA secara mingguan sejak April 2020. Setakat ini, Kementerian Kewangan telah menerbitkan sebanyak 105 edisi LKR secara mingguan. Secara amnya, LKR membentangkan status pelaksanaan pakej-pakej rangsangan ekonomi bernilai RM530 bilion yang telah diumumkan Kerajaan bermula dari Pakej PRIHATIN sehingga Pakej PEMULIH.

Bagi memastikan laporan yang diterbitkan ini bersifat menyeluruh dan komprehensif, LKR turut melaporkan status pelaksanaan beberapa inisiatif utama di bawah Bajet 2022 antaranya Program Jamin Kerja yang bernilai RM4.8 bilion dalam hasrat menyediakan peluang pekerjaan kepada rakyat. Isu-isu semasa yang berkait dengan Kementerian Kewangan juga turut dilaporkan bagi memberikan penerangan yang lebih jelas terutamanya berhubung keadaan ekonomi semasa.

Selain itu, Kementerian Kewangan juga melalui Jawatankuasa Induk Pemantauan Bajet yang dipengerusikan oleh YAB Perdana Menteri turut melaporkan status pelaksanaan 282 inisiatif strategik di bawah Bajet 2022 secara berkala.

Kementerian Kewangan juga menerbitkan Laporan Ekonomi setiap Suku Tahun yang mengandungi antara lain prestasi perbelanjaan Kerajaan, kedudukan fiskal dan perkembangan ekonomi. Untuk tahun 2022, Kementerian Kewangan juga bercadang untuk membentangkan Kajian Separuh Tahun Bajet (*Mid Year Review*).

Memahami keperluan Kerajaan dalam penyampaian maklumat secara menyeluruh dan lebih holistik, Kementerian Kewangan terbuka untuk sentiasa menambah baik kaedah pelaporan pemantauan dan pelaksanaan Bajet tahunan. Saya sangat menghargai dan mengucapkan terima kasih atas keprihatinan dan sokongan Yang Berhormat terhadap pelaporan Bajet tahunan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BERTULIS
DARIPADA : Y.B. DATO' DR. SHAMSUL ANUAR BIN
HAJI NASARAH
[LENGGONG]

SOALAN NO. 432

Dato' Dr. Shamsul Anuar bin Haji Nasarah [Lenggong] minta KEMENTERIAN PERDAGANGAN ANTARABANGSA DAN INDUSTRI menyatakan statistik terkini pelaburan di Malaysia berdasarkan negara dan sektor serta berapa jumlah peluang pekerjaan yang berjaya dicipta.

JAWAPAN

Tuan Yang di-Pertua,

Bagi tempoh Januari hingga Mac 2022, jumlah keseluruhan pelaburan yang diluluskan dalam pelbagai sektor ekonomi merangkumi sektor perkilangan, perkhidmatan dan utama adalah berjumlah RM42.8 bilion, melibatkan 910 projek dan dijangka dapat menjana 24,906 peluang pekerjaan baharu.

Pelaburan langsung asing (*foreign direct investment – FDI*) kekal sebagai penyumbang utama, sebanyak 65 peratus atau RM27.8 bilion manakala pelaburan domestik (*domestic direct investment – DDI*) menyumbang 35 peratus (RM15 bilion). Lima negara sumber FDI utama antaranya adalah Jerman dengan pelaburan sebanyak RM8.9 bilion (32 peratus), diikuti Brunei (RM5.1 bilion atau 18.3 peratus), Amerika Syarikat (RM3.9 bilion atau 14 peratus), Hong Kong (RM3.3 bilion atau 11.9 peratus) dan Jepun (RM3.2 bilion atau 11.5 peratus). Kesemua 5 negara utama ini menyumbang sebanyak RM24.4 bilion (87.8%) daripada jumlah pelaburan asing yang diluluskan bagi tempoh Januari hingga Mac 2022.

Sektor perkilangan terus memainkan peranan penting dalam memacu pemulihan ekonomi negara dengan menyumbang 70.1 peratus atau RM30 bilion daripada jumlah pelaburan yang diluluskan. Sejumlah 184 projek perkilangan telah diluluskan dan ianya akan menyumbang kepada penciptaan 21,666 peluang pekerjaan baharu.

Industri-industri utama yang menarik pelaburan tinggi dalam sektor perkilangan termasuklah elektrikal dan elektronik dengan pelaburan sebanyak RM18.6 bilion, petroleum termasuk petrokimia (RM5.1 bilion), produk galian bukan logam (RM1.9 bilion) dan kimia dan produk kimia (RM1.1 bilion).

Sektor perkhidmatan menyumbang RM12.7 bilion melalui 720 projek. Pelaburan ini dijangka akan mewujudkan 3,219 peluang pekerjaan baharu. Sektor utama pula menyumbang RM0.1 bilion menerusi 6 projek dan akan menyediakan 21 peluang pekerjaan baharu.

Walaupun negara berhadapan krisis kesihatan dan keselamatan awam akibat penularan pandemik COVID-19 pada tahun 2020 dan 2021, ianya tidak menghalang minat pelabur domestik dan asing untuk terus melabur di Malaysia. Keberkesanan usaha-usaha Kerajaan dalam menarik pelabur turut diiktiraf di peringkat antarabangsa melalui Laporan 2022 *Milken Country Institute Global Opportunity Index* (GIO), di mana Malaysia mendahului sebagai negara paling menarik di rantau ini untuk pelaburan asing berbanding dengan negara-negara Asia Tenggara yang lain. Ini jelas menunjukkan keyakinan para pelabur terhadap kestabilan ekonomi dan ketersediaan ekosistem pelaburan yang mesra perniagaan serta penawaran pakej insentif yang menarik oleh Kerajaan.

Kerajaan sentiasa komited dalam menggembungkan usaha dan strategi untuk menggalakkan pelaburan berkualiti, bernilai dan berimpak tinggi ke dalam negara bagi mempercepatkan pemulihan, meningkatkan pertumbuhan ekonomi negara, memberi manfaat yang signifikan kepada rakyat serta memastikan Malaysia kekal sebagai destinasi pilihan pelabur.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATUK SERI DR. SHAMSUL ANUAR BIN HAJI NASARAH [LENGGONG]

SOALAN :

Datuk Seri Dr. Shamsul Anuar bin Haji Nasarah [Lenggong] minta MENTERI PERUSAHAAN PERLADANGAN DAN KOMODITI menyatakan apakah faktor kejatuhan aliran harga buah tandan segar (BTS) pada ketika ini dan apakah strategi pihak Kementerian untuk menstabilkan semula harga buah tandan segar (BTS) ini.

JAWAPAN

Tuan Yang Di-Pertua,

- Harga buah tandan segar sawit (BTS) ditentukan oleh pergerakan harga pasaran minyak sawit mentah (MSM) yang sentiasa berubah-ubah berdasarkan kepada faktor asas dan sentimen pasaran semasa. Harga MSM telah mula menunjukkan trend peningkatan yang ketara bermula pada pertengahan tahun 2020 dan telah beberapa kali memecahkan rekod harga tertinggi dalam sejarah industri sawit negara pada Januari 2021 hingga Mei 2022.
- Namun begitu, trend kejatuhan harga MSM telah bermula pada Jun 2022 yang mana harganya telah jatuh sebanyak 11.2% kepada RM6,106.00 satu tan berbanding RM6,873.00 satu tan pada Mei 2022. Harga harian MSM terus merosot ke paras terendah RM4,765.50 satu tan pada 24 Jun 2022 atau telah menurun sebanyak 29.6% daripada paras tertinggi RM6,771.00 satu tan pada 3 Jun 2022. Kejatuhan harga MSM ini telah menyebabkan harga BTS

turut merosot di pasaran. Faktor utama yang menyumbang kepada penurunan harga MSM ketika ini adalah disebabkan oleh kejatuhan harga minyak mentah petroleum (BCO) dan minyak kacang soya (SBO) di pasaran dunia.

- Kejatuhan harga BCO adalah disebabkan oleh keimbangan berlakunya krisis ekonomi di Amerika Syarikat yang boleh menyebabkan kejatuhan permintaan terhadap penggunaan BCO yang disebabkan oleh tindakan agresif kerajaannya yang telah meningkatkan kadar faedah. Sentimen pasaran ini telah menyebabkan kejatuhan harga BCO di pasaran dunia yang berhubung secara positif dengan harga SBO dan MSM.
- Harga BCO telah menurun kepada US\$115.33 setong pada 5 Julai 2022 berbanding paras tertingginya pada US\$139.85 setong pada 8 Mac 2022 atau penurunan sebanyak 17.5%. Harga SBO pula telah menurun kepada US\$1,561 satu tan pada 5 Julai 2022 berbanding harga tertingginya iaitu US\$2,088 satu tan pada 29 April 2022 atau berlaku penurunan sebanyak 25.2%.
- Selain itu, kelemahan permintaan eksport ke China juga telah menyumbang kepada kelemahan harga minyak sayuran dunia termasuk MSM. Kerajaan China telah melaksanakan tempoh berkurung selama dua (2) bulan ketika ini bagi menangani masalah penularan COVID-19 di negaranya. Faktor ini telah menyebabkan permintaan terhadap penggunaan minyak sayuran telah berkurangan di China.
- Selain itu, tindakan Kerajaan Indonesia melaksanakan penarikan semula larangan eksport terhadap minyak sawit pada 23 Mei 2022 dan mengurangkan kadar levi untuk eksport MSM kepada US\$200 satu tan daripada US\$375 satu tan bermula 14 Jun 2022 sehingga 31 Julai 2022 telah menyumbang kepada lambakan minyak sawit di pasaran dunia. Tindakan ini dilaksanakan oleh Kerajaan Indonesia bagi meningkatkan eksport minyak sawitnya dan seterusnya mengurangkan masalah lambakan stok minyak sawit yang tinggi di

dalam negaranya. Sentimen pasaran ini juga telah turut menyumbang kepada penurunan harga MSM di pasaran ketika ini.

- Bagi memastikan harga BTS dan MSM stabil, Kementerian telah dan akan terus mengambil langkah-langkah strategik seperti berikut:
 - a) Meningkatkan permintaan terhadap minyak sawit dan lain-lain produk berasaskan sawit melalui pengukuhan pasaran sedia ada seperti di Pakistan, Turki, negara-negara ASEAN dan sebagainya serta penerokaan pasaran baharu seperti ke Benua Afrika, negara Timur Tengah dan Benua Amerika;
 - b) Memperkuuh kerjasama strategik bersama Indonesia menerusi Majlis Negara-Negara Pengeluar Minyak Sawit (*Council of Palm Oil Producing Countries* atau CPOPC) bagi memantapkan lagi amalan persekitaran mampan, pengurusan bekalan, aktiviti promosi dan pembangunan pekebun-pekebun kecil. Selain itu, kerjasama ini membolehkan perancangan dan pelaksanaan pelbagai aktiviti untuk memperkuuhkan harga; dan
 - c) Pelaksanaan secara mandatori Skim Pensijilan Minyak Sawit Mampan Malaysia (MSPO). Pensijilan ini memberi penekanan dalam mempraktikkan amalan pertanian baik (GAP), penjagaan keselamatan dan kesihatan pekerja, pematuhan undang-undang serta melindungi alam sekitar. Ia bagi memastikan minyak sawit terus berdaya saing dari segi tahap kualiti dan kelestarian dengan minyak sayuran lain dunia.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATUK SERI DR. SHAMSUL ANUAR
BIN HAJI NASARAH [LENGGONG]**

SOALAN

DATUK SERI DR. SHAMSUL ANUAR BIN HAJI NASARAH minta **MENTERI KESIHATAN** menyatakan apakah perkembangan terkini perbincangan dengan Pejabat Peguam Negara (AGC) berhubung pindaan Seksyen 309 Kanun Keseksaan bagi kesalahan cubaan bunuh diri.

JAWAPAN

Tuan Yang di-Pertua,

1. Kementerian Kesihatan Malaysia (KKM) melaksanakan libat urus bersama pihak Jabatan Peguam Negara (JPN) berkaitan menyahjenayahkan cubaan membunuh diri (*decriminalising suicide*). Berdasarkan maklumat daripada pihak Jabatan Peguam Negara (JPN), kajian berkaitan pindaan atau pemansuhan Seksyen 309 Kanun Keseksaan telah hampir selesai (90%) namun begitu masih menunggu kelulusan daripada pihak pengurusan tertinggi JPN dan pihak JPN menasarkan akan membentangkan Memorandum Jemaah Menteri Pemansuhan / Pindaan Seksyen 309 Kanun Keseksaan bagi kesalahan cubaan bunuh diri di Parlimen dalam waktu terdekat pada tahun ini.

2. Sementara itu, pihak KKM telah pun menyediakan draf Memorandum Jemaah Menteri berhubung Moratorium terhadap Kesalahan Percubaan Bunuh Diri di bawah Seksyen 309 Kanun Keseksaan [Akta 574] dan telah dibentangkan oleh YB Menteri Kesihatan di dalam Majlis Jemaah Menteri pada 26 September 2021. Walau bagaimanapun, keputusannya adalah moratorium ini ditangguhkan sehingga kajian oleh pihak Jabatan Peguam Negara selesai.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

**DARIPADA : DATUK SERI DR. SHAMSUL ANUAR BIN HAJI
NASARAH [LENGGONG]**

TARIKH : JULAI – OGOS 2022

SOALAN

DATUK SERI DR. SHAMSUL ANUAR BIN HAJI NASARAH [LENGGONG] minta **MENTERI PENGANGKUTAN** menyatakan apakah tindakan yang akan diambil terhadap syarikat penerbangan tambang murah yang bertindak sesuka hati menjadualkan semula penerbangan yang ditempah oleh pengguna sehingga mengakibatkan kerugian serta tidak bertanggungjawab untuk memulangkan semula bayaran yang telah dibuat.

JAWAPAN

Tuan Yang Di Pertua,

1. Kod Perlindungan Pengguna Penerbangan Malaysia 2016 (*Malaysian Aviation Consumer Protection Code 2016*, MACPC) telah dikuatkuasakan oleh Suruhanjaya Penerbangan Malaysia (MAVCOM) mulai 1 Julai 2016. Kod ini bertujuan untuk melindungi hak dan kepentingan pengguna dengan memastikan semua aduan terhadap syarikat-syarikat penerbangan diambil tindakan dan diselesaikan.
2. Syarikat penerbangan yang menunda penerbangan atas faktor di bawah kawalan syarikat penerbangan seperti masalah operasi,

komersial atau teknikal adalah diwajibkan untuk menawarkan pampasan dan penjagaan kepada penumpang sepetimana yang diperuntukkan di dalam MACPC.

3. Suruhanjaya Penerbangan Malaysia (MAVCOM) telah menjalankan siasatan awal dan kini sedang menjalankan siasatan secara mendalam terhadap syarikat-syarikat penerbangan termasuk syarikat penerbangan tambang murah berhubung dengan penundaan penerbangan semasa tempoh perjalanan Hari Raya Aidilfitri 2022. Tindakan selanjutnya akan diambil selepas proses siasatan selesai dijalankan.
4. Sekiranya syarikat penerbangan gagal mematuhi **MACPC**, MAVCOM boleh mengenakan penalti kewangan sebanyak amaun yang tidak melebihi RM200,000, dan ketidakpatuhan kedua atau berikutnya, amaun sepuluh kali daripada penalti kewangan yang dikenakan bagi ketidakpatuhan yang pertama. Dari tahun 2018 sehingga 2020, MAVCOM telah mengenakan penalti sebanyak RM4.72 juta ke atas kegagalan syarikat penerbangan dalam mematuhi Pelbagai kesalahan di bawah MACPC.
5. Bagi pembatalan penerbangan, peraturan 12 dan 12(A) dalam MACPC menetapkan kewajipan bagi syarikat penerbangan untuk menawarkan pembayaran balik bagi pembatalan sesuatu penerbangan, pemberhentian laluan dan penjadualan semula penerbangan.
6. MAVCOM sedang dalam proses penambahbaikan MACPC di mana perkara berkaitan penundaan penerbangan akan turut ditambahbaik bagi melindungi pengguna. Proses penambahbaikan ini dijangka akan selesai pada Disember 2022.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI SHAMSUL ISKANDAR @ YUSRE
BIN MOHD AKIN [HANG TUAH JAYA]**

SOALAN

Datuk Seri Shamsul Iskandar @ Yusre bin Mohd Akin [Hang Tuah Jaya] minta **MENTERI ALAM SEKITAR DAN AIR** menyatakan apakah ikhtiar yang telah dibuat Kementerian dalam memastikan sasaran penyahkarbonan negara dapat dicapai bagi menangani isu mitigasi perubahan iklim secara mampan dan efektif.

JAWAPAN

Tuan Yang Di-Pertua,

1. Seperti mana Ahli Yang Berhormat sedia maklum, pada tahun 2021 Malaysia telah mengumumkan aspirasi untuk mencapai pelepasan GHG sifar bersih seawalnya pada tahun 2050. Bagi mencapai aspirasi ini, Malaysia perlu merangka pelbagai strategi dan inisiatif yang akan menyumbang kepada usaha penyahkarbonan negara dalam jangka masa panjang. Usaha penyahkarbonan jangka masa panjang negara akan dilaksanakan melalui pendekatan ‘whole of nation’ di mana usaha ini akan digembung melalui pelaksanaan tindakan secara bersama oleh entiti dalam negara (in-country cooperation) seperti kerajaan, pihak swasta dan organisasi bukan kerajaan serta melalui kerjasama antarabangsa (international cooperation). Selain itu juga, pendekatan ‘environmental, social, and governance - ESG’ yang menjadi tunjang utama pihak swasta juga akan ditambah baik dan diperkuuhkan bagi menyokong pencapaian aspirasi tersebut.
2. Bagi menyokong ketetapan dasar bagi mencapai aspirasi pelepasan sifar bersih negara, Kementerian Alam Sekitar dan Air (KASA) sedang membangunkan Strategi Jangka Masa Panjang Pembangunan Rendah Karbon (*Long Term - Low Emission Development Strategies - LT-LEDS*) di bawah Rancangan Malaysia Ke-12. Melalui strategi LT-LEDS, kerajaan akan mengenal pasti tindakan penyahkarbonan yang merangkumi pelbagai sektor penting seperti sektor tenaga, pengangkutan, sisa pepejal, proses industri dan pertanian. Dalam masa yang sama, negara juga akan mengenal pasti tindakan-tindakan penyahkarbonan baru yang berpotensi untuk dilaksanakan pada masa hadapan.
3. Pelaksanaan tindakan penyahkarbonan juga bukan sahaja memerlukan strategi yang tuntas dan berkesan, namun aspek tadbir urus dan pembangunan dasar juga adalah penting. Untuk makluman Ahli aspek perubahan iklim, kemampanan, pertumbuhan hijau dan pembangunan berdaya tahan iklim telah menjadi salah satu asas utama bagi pelaksanaan Rancangan Malaysia ke-12. Bagi pelaksanaan

SOALAN NO: 436

agenda perubahan iklim negara pula, KASA telah mengukuhkan tadbir urus perubahan iklim negara melalui pembentukan Majlis Tindakan Perubahan Iklim Negara (MyCAC) yang dipengerusikan oleh YAB Perdana Menteri, membangunkan kerangka undang-undang perubahan iklim negara, membuat semakan ke atas Dasar Perubahan Iklim Negara, membangunkan dasar-dasar yang akan menyokong pelaksanaan agenda perubahan iklim negara seperti dasar pasaran karbon negara, pelan hala tuju NDC negara, menubuhkan pusat GHG kebangsaan dan lain-lain lagi.

4. Bagi usaha penyahkarbonan dari aspek kerjasama antarabangsa pula, ianya akan dilaksanakan melalui kaedah kerjasama dua hala (bilateral) atau pelbagai hala (multilateral). Bagi kerjasama dua hala, Malaysia telah memeterai memorandum persefahaman (MoU) mengenai kerjasama tindakan perubahan iklim dengan kerajaan United Kingdom (UK). Dalam masa yang sama, Malaysia juga sedang dalam fasa awal bagi memeterai MoU dua hala berkaitan perubahan iklim dengan negara lain seperti Singapura, Indonesia dan Mesir. Dari aspek kerjasama pelbagai hala pula, Malaysia komited untuk melaksanakan dan menyertai inisiatif dan proses antarabangsa yang dipersetujui di bawah UNFCCC. Selain itu juga, Malaysia juga telah bersetuju untuk menyertai inisiatif pelbagai hala berkaitan perubahan iklim seperti Glasgow Leaders Declaration on Forestry and Land Use anjuran kerajaan UK dan Global Methane Pledge anjuran kerajaan Amerika Syarikat.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : DATUK SERI HAJI SHAMSUL ISKANDAR
@ YUSRE BIN MOHD AKIN [HANG TUAH
JAYA]

SOALAN

DATUK SERI HAJI SHAMSUL ISKANDAR @ YUSRE BIN MOHD AKIN [HANG TUAH JAYA] minta **MENTERI KEWANGAN** menyatakan sama ada Kementerian mempunyai rancangan peruntukan undang-undang cukai khas yang boleh membantu pembayar cukai dan perniagaan untuk memulihkan kewangan daripada kesan bencana (*Tax Relief in Disaster Situations*).

JAWAPAN

Tuan Yang di-Pertua,

Untuk makluman Ahli Yang Berhormat, buat masa ini, Kerajaan tidak bercadang memperkenalkan potongan cukai atau *tax relief* bagi kawasan bencana. Kerajaan amat memahami beban kewangan yang terpaksa ditanggung oleh individu dan perniagaan yang dilanda bencana. Namun demikian, Kerajaan berpandangan rakyat dan perniagaan yang terjejas akibat banjir lebih wajar diberi bantuan secara langsung.

Sehubungan itu, untuk Banjir Monsun Timur Laut 2021/2022, sehingga kini, Kerajaan telah memperuntukkan lebih RM2.03 bilion bagi membantu meringankan beban kewangan rakyat yang terjejas susulan bencana banjir melalui Bantuan Banjir Keluarga Malaysia. Ini termasuk bantuan tunai, pembiayaan dengan kadar 0% dan baucar membaiki kenderaan yang rosak bagi membantu rakyat terkesan membina semula kehidupan dengan segera, demi kesejahteraan Keluarga Malaysia. Kerajaan juga akan terus komited dalam menyediakan peruntukan yang sewajarnya untuk perkara ini bagi memastikan kebajikan dan keselamatan pihak yang terjejas akibat bencana. Sebagai contoh bencana yang melanda negara baru-baru ini di Baling, Kedah. Kerajaan telah menyediakan bantuan awal kepada Ketua Isi Rumah (KIR) kepada semua mangsa banjir yang terlibat seperti berikut:

- i. Bantuan Wang Ihsan (BWI) sebanyak RM1,000;
- ii. Bantuan Barang Keperluan Asas sebanyak RM2,500;
- iii. Bantuan Barang Elektrik sebanyak RM500; dan
- iv. Pembaikan rumah.

Kerajaan juga turut menyediakan bantuan yang komprehensif kepada perniagaan yang terkesan akibat bencana terutamanya Perusahaan Mikro, Kecil dan Sederhana (PMKS) di mana bantuan ini telah ditambahbaik seperti berikut:

NO SOALAN :437

- i. Geran bernilai RM3,000 melalui TEKUN Nasional kepada setiap perniagaan mikro dan informal yang terjejas akibat banjir dengan peruntukan disediakan sebanyak RM50 juta;
- ii. Skim Pembiayaan Informal dan Mikro (SPIM) di bawah TEKUN Nasional khusus untuk perniagaan mikro dan informal sehingga RM10,000 tanpa faedah di mana tempoh bayar balik adalah 5 tahun dengan moratorium 12 bulan;
- iii. Dana sebanyak RM100 juta akan disediakan melalui Program SME Emergency Fund (SMEEF) di bawah SME Corp untuk PKS terjejas; dan
- iv. Bantuan tambahan kepada pengusaha Agromakanan yang terjejas banjir melalui suntikan dana sebanyak RM20 juta untuk Tabung Bencana Tanaman Padi (TBTP) menerusi Kementerian Pertanian dan Industri Makanan (MAFI).

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI SHAMSUL ISKANDAR @
YUSRE BIN MOHD AKIN
(HANG TUAH JAYA)**

SOALAN

**DATUK SERI SHAMSUL ISKANDAR @ YUSRE BIN MOHD AKIN
(HANG TUAH JAYA)** minta **MENTERI PEMBANGUNAN LUAR
BANDAR** menyatakan kajian yang telah dibuat mengenai jumlah pendapatan terkini penduduk luar bandar yang sebelum ini dilaporkan sebanyak RM5,004 pada tahun 2019, iaitu sebelum pandemik COVID-19 serta usaha-usaha yang telah dan akan dilakukan oleh Kementerian secara berkesan untuk mengurangkan golongan miskin serta miskin tegar di luar bandar.

JAWAPAN

Untuk makluman Yang Berhormat, purata pendapatan bulanan penduduk luar bandar pada tahun 2019 berjumlah RM5,004 diperoleh daripada Laporan Survei Pendapatan Isi Rumah dan Kemudahan Asas 2019 yang diterbitkan oleh Jabatan Perangkaan Malaysia (DOSM). Laporan tersebut diterbitkan setiap dua tahun dan Kementerian Pembangunan Luar Bandar masih lagi menunggu laporan terkini daripada pihak DOSM untuk mendapatkan maklumat purata pendapatan bulanan penduduk luar bandar yang terkini.

Laporan Survei Pendapatan Isi Rumah dan Kemudahan Asas 2019 tersebut juga telah menyatakan kadar kemiskinan luar bandar pada tahun 2019 adalah pada 12.4% berdasarkan Pendapatan Paras Garis Kemiskinan yang baharu iaitu RM2,208. Dalam hal ini Kementerian Pembangunan Luar Bandar akan meneruskan program-program pembasmian kemiskinan yang dilaksanakan sebelum ini selaras dengan objektif Dasar Pembangunan Luar Bandar 2030 (DPLB 2030) iaitu untuk meningkatkan kesejahteraan penduduk luar bandar dari segi ekonomi, sosial, budaya dan persekitaran.

Bagi meningkatkan pendapatan penduduk luar bandar, Kementerian telah melaksanakan program khusus untuk membantu penduduk luar bandar di dalam kategori miskin dan miskin tegar seperti Program Perumahan Rakyat Termiskin (PPRT) dengan peruntukan sebanyak RM361.1 juta yang melibatkan 11,000 orang golongan sasar, Program Peningkatan Pendapatan dengan peruntukan sebanyak RM10 juta dengan sasaran peserta seramai 700 orang, Program Latihan Kemahiran dan Kerjaya dengan peruntukan RM10 juta dengan sasaran peserta seramai 1,200 orang. Selain itu, KPLB dan agensi di bawah agensi KPLB seperti KEMAS, MARA, Lembaga Kemajuan Wilayah (LKW), FELCRA dan Pihak Berkuasa Kemajuan Pekebun Kecil Perusahaan Getah (RISDA) turut melaksanakan

SOALAN NO : 438

program-program keusahawanan termasuk bagi membantu meningkatkan pendapatan isi rumah penduduk di luar bandar.

Agensi-agensi di bawah KPLB juga turut melaksanakan program-program berasaskan pertanian bagi meningkatkan pendapatan penduduk luar bandar serta memperkuuh jaringan keselamatan makanan negara. Antara bentuk program yang dilaksanakan adalah pemadanan pemilik tanah dengan pengusaha pertanian, pajakan atau sewaan tanah kepada pengusaha tanaman, latihan kemahiran dan bantuan input tanaman. Selain itu, RISDA turut melaksanakan Program Agromakan RISDA untuk pekebun kecil RISDA terutamanya yang sedang melaksanakan aktiviti tanam semula bagi membolehkan pekebun kecil ini menjana pendapatan dalam tempoh tersebut. Kadar maksimum bantuan ini adalah tidak melebihi RM20,000. Untuk tahun 2022, sebanyak RM20 juta diperuntukkan untuk program ini dan boleh memanfaatkan 1,000 pekebun kecil.

KPLB juga akan meneliti program-program lain yang bersesuaian yang boleh dilaksanakan untuk membasi kemiskinan di kawasan luar bandar.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK SERI SHAMSUL ISKANDAR @ YUSRE
 BIN MOHD AKIN [HANG TUAH JAYA]**

SOALAN

Datuk Seri Shamsul Iskandar @ Yusre bin Mohd Akin [Hang Tuah Jaya] minta **MENTERI ALAM SEKITAR DAN AIR** menyatakan perancangan Kementerian dalam penyediaan Laporan Kualiti Alam Sekitar (EQR) yang dilihat gagal memberikan laporan mengikut garis masa sebenar bagi tujuan kesedaran orang awam dan agensi-agensi berkaitan untuk tindakan proaktif pada waktu yang sepatutnya dan apakah tindakan segera Kementerian terhadap insiden kejadian tebing runtuh di Taman Muzaffar Shah, Ayer Keroh yang berkemungkinan membahayakan penduduk di 80 buah rumah serta menara tangki air.

JAWAPAN

Tuan Yang Di-Pertua,

1. Laporan Kualiti Alam Sekeliling (*Environmental Quality Report - EQR*) adalah suatu laporan yang diterbitkan oleh Jabatan Alam Sekitar selaras dengan peruntukan di bawah Seksyen 3(1)(i) Akta Kualiti Alam Sekeliling 1974 (AKAS 1974) yang mengandungi laporan berkaitan kualiti udara, kualiti air sungai, kualiti air tanah, kualiti air marin dan pulau-pulau serta inventori punca pencemaran. Laporan Kualiti Alam Sekeliling 2020 telah disiarkan mengikut garis masa sebenar iaitu pada 30 September 2021.
2. Seksyen 3 (1)(i) AKAS 1974 menyatakan antara kewajipan dan tugas-tugas Ketua Pengarah Kualiti Alam Sekeliling adalah “menyiarkan suatu laporan tahunan mengenai kualiti alam sekeliling tidak lewat daripada 30 September dalam tahun berikutnya dan apa-apa laporan dan maklumat lain berkenaan dengan apa-apa aspek perlindungan alam sekeliling”.
3. Berkaitan dengan kejadian tebing runtuh, tindakan segera yang telah diambil adalah seperti berikut:
 - i. pemasangan *soil nailing* dan *L-shape wall* bagi pengukuhan tebing; dan
 - ii. kerja-kerja pemasangan *soil nailing* telah mencapai 15% iaitu 45 meter siap dipasang daripada 300 meter keseluruhannya, manakala pemasangan *L-shape wall* telah mencapai 20 meter siap dipasang daripada 100 meter keseluruhannya.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN
**DARIPADA : DATUK SERI SHAMSUL ISKANDAR @
YUSRE BIN MOHD AKIN
[HANG TUAH JAYA]**

SOALAN

**YB DATUK SERI SHAMSUL ISKANDAR @ YUSRE BIN MOHD AKIN
[HANG TUAH JAYA]** minta **MENTERI PERUMAHAN DAN KERAJAAN
TEMPATAN** menyatakan apakah garis panduan terkini yang telah ditetapkan oleh Kementerian kepada pihak berkuasa tempatan berkaitan dengan penukaran zon kegunaan tanah dan apakah Kementerian telah dimaklumkan mengenai bantahan rakyat di kawasan perbandaran Hang Tuah Jaya, secara khususnya di Lot 26150, Mukim Bukit Baru, berkaitan cadangan penukaran zon kegunaan tanah daripada zon lapang dan rekreasi kepada perniagaan yang boleh mengakibatkan pengurangan kawasan hijau, implikasi banjir kilat dan kesesakan lalu lintas yang melampau.

JAWAPAN

Tuan Yang di-Pertua,

Untuk makluman Ahli Yang Berhormat, Seksyen 16, Akta Perancangan Bandar dan Desa (Akta 172) - Pengubahan pembatalan dan penggantian rancangan tempatan (RT), memperuntukkan Pihak Berkuasa Perancang Tempatan (PBPT) boleh pada bila-bila masa membuat cadangan untuk mengubah, membuat pembatalan, atau membuat penggantian suatu Rancangan Tempatan (RT). Pihak Berkuasa Tempatan (PBT) perlu membuat cadangan untuk mengubah, membuat pembatalan, atau membuat penggantian suatu RT sekiranya terdapat arahan dari Jawatankuasa Perancang Negeri (JPN).

Kementerian Perumahan dan Kerajaan Tempatan (KPKT) melalui PLANMalaysia telah mengeluarkan Manual Rancangan Tempatan Edisi 2020 dengan mengambil kira pindaan Akta 172 dan Kaedah-Kaedah Rancangan Tempatan 2019. Manual ini penting sebagai garis panduan dan rujukan kepada semua PBPT, PLANMalaysia Negeri dan Pejabat Projek Zon PLANMalaysia untuk membantu membuat RT dengan lebih teratur dan sistematik.

Adalah menjadi tanggungjawab PBT untuk membuat publisiti berkaitan penyediaan draf RT dan melibatkan penyertaan awam bagi menghebahkan cadangan permohonan pengubahan/ penggantian atau pindaan RT. Hal ini merujuk kepada perubahan zon guna tanah yang mempunyai kepentingan awam mengikut keperluan pembangunan semasa bagi menyediakan rancangan pembangunan yang mampan. Menjadi tanggungjawab masyarakat untuk mengambil tahu pengumuman atau siaran yang dibuat oleh PBT (notis di akhbar, laman web, media sosial dan lain-lain) terutamanya hebahan draf RT yang memerlukan pendapat dan pandangan awam yang terlibat di kawasan PBT tersebut.

Bagi Lot 26150, Mukim Bukit Baru, berkaitan cadangan penukaran zon kegunaan tanah daripada zon lapang dan rekreasi kepada perniagaan,

SOALAN NO: 440

semakan dengan Majlis Perbandaran Hang Tuah Jaya (MPHTJ) mendapati lot yang terlibat dengan pindaan zon gunatanah adalah Lot 26650 dan bukannya Lot 26150. Pada 21 Jun 2022, satu sesi pendengaran awam khas anjuran MPHTJ antara wakil penduduk dan pemilik tanah bagi cadangan penukaran zoning di Lot 26650 telah diadakan sebagai pemakluman awal kepada penduduk. Susulan daripada sesi tersebut, segala pendapat, pandangan dan maklum balas yang disuarakan direkod dan dilaporkan kepada Jawatankuasa Perancang Negeri.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB DATUK DR SHAHRUDDIN B. SALLEH (SRI
GADING)**

SOALAN

**DATUK DR. SHAHRUDDIN BIN MD. SALLEH (SRI GADING) minta
MENTERI DALAM NEGERI menyatakan :-**

- (a) statistik terkini bilangan ekspatriat yang berkhidmat di negara ini; dan**
- (b) adakah Kerajaan akan menyemak semula gaji dan dasar berkaitan ekspatriat bagi memberi keseimbangan antara pengambilan tenaga buruh asing dan tempatan.**

JAWAPAN

Tuan Yang Di Pertua,

Untuk makluman Ahli Yang Berhormat, sehingga 30 Jun 2022 terdapat seramai 86,023 pemegang Pas Penggajian dan Pas Kerja di Sabah dan Sarawak.

Kementerian Dalam Negeri (KDN) dalam proses meneliti hasil kajian berkaitan dasar penggajian ekspatriat bagi merangka penambahbaikan dasar dan memastikan dasar baharu yang akan dilaksanakan kelak memenuhi keperluan industri, disokong oleh data yang kukuh dan dapat memberi keseimbangan dalam pengambilan tenaga kerja warganegara asing dan tempatan. Kajian yang telah dijalankan merangkumi perkara-perkara seperti tangga gaji ekspatriat, syarat kelayakan majikan dan calon ekspatriat, pelan penggantian kepada tenaga kerja tempatan dan sebagainya.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATUK DR. SHAHRUDDIN BIN MD.
SALLEH [SRI GADING]**

SOALAN

DATUK DR. SHAHRUDDIN BIN MD. SALLEH minta **MENTERI KESIHATAN** menyatakan :-

- (a) bilangan doktor pergigian dan ahli farmasi yang bekerjasama dengan Kementerian Kesihatan serta berapa nisbah doktor dan penduduk Malaysia; dan
- (b) adakah Malaysia merancang untuk menambah bilangan doktor sesuai dengan saranan nisbah Pertubuhan Kesihatan Antarabangsa atau *World Health Organization* (WHO) yang menyarankan 1 doktor setiap 500 penduduk.

JAWAPAN

Tuan Yang di-Pertua,

1. Untuk makluman Ahli Yang Berhormat, Malaysia mempunyai 19,112 pegawai farmasi yang berdaftar, menjadikan nisbah 1 pegawai farmasi kepada 1,709 penduduk.
2. Berkennaan dengan nisbah doktor kepada penduduk Malaysia pula, pada tahun 2020, Malaysia mempunyai seramai 73,973 doktor berdaftar, menjadikan nisbah 1 doktor kepada 441 penduduk. Nisbah ini telah pun melebihi nisbah 1 kepada 500 seperti dinyatakan.
3. Selain daripada perkhidmatan rawatan di hospital, Kementerian Kesihatan Malaysia sentiasa berusaha mengukuhkan perkhidmatan kesihatan primer di klinik kesihatan dan perkhidmatan dalam komuniti dengan memberi penekanan kepada aktiviti pencegahan penyakit serta promosi kesihatan.
4. Terdapat juga keperluan untuk menambah bilangan doktor pakar bagi bidang-bidang seperti bedah am, bedah kardiotorasik, geriatrik dan perubatan keluarga.
5. Pada masa yang sama, Kementerian Kesihatan Malaysia juga sedang melihat keperluan bagi meningkatkan pekerja kesihatan masyarakat, kaunselor kesihatan mental, fisioterapi dan lain-lain jawatan kader. Selain itu, untuk memastikan polisi dan perancangan kesihatan adalah berasaskan sains dan fakta, keperluan data saintis, penganalisis data, penyelidik dan sebagainya juga akan diberi penekanan sewajarnya.
6. Dengan ini, penduduk akan mendapat akses kepada perkhidmatan kesihatan yang lebih baik dan perkhidmatan kesihatan dapat diberikan berhampiran dengan komuniti.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. DATUK DR. SHARUDDIN BIN MD SALLEH
[SRI GADING]

SOALAN :

DATUK DR. SHARUDDIN BIN MD SALLEH [SRI GADING] minta **PERDANA MENTERI** menyatakan berapa bilangan terkini pengundi berumur 18 tahun sehingga 25 tahun di Malaysia.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pilihan Raya Malaysia (SPR) telah **mewartakan Daftar Pemilih Tambahan Bulan Mei Tahun 2022 pada 16 Jun 2022**. Sehingga pewartaan tersebut, jumlah pemilih terkini ialah seramai **21,113,234 orang**. Jumlah pemilih mengikut kategori umur adalah seperti berikut:

Bil.	Kategori Umur	Jumlah Pemilih
a.	18 hingga 20 tahun	1,141,749
b.	21 hingga 29 tahun	4,609,417

NO SOALAN :444

Bil.	Kategori Umur	Jumlah Pemilih
c.	30 hingga 39 tahun	4,705,278
d.	40 hingga 49 tahun	3,683,131
e.	50 hingga 59 tahun	3,047,343
f.	60 hingga 69 tahun	2,314,465
g.	70 hingga 79 tahun	1,138,703
h.	80 hingga 89 tahun	379,464
i.	90 tahun dan ke atas	93,684
Jumlah		21,113,234

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB TUAN SIM CHEE KEONG (BUKIT MERTAJAM)

SOALAN

TUAN SIM CHEE KEONG (BUKIT MERTAJAM) minta **MENTERI DALAM NEGERI** menyatakan penyelesaian jika ada warga emas yang memohon sijil lahir tetapi tidak mampu mengemukakan 3 saksi akuan bersumpah berdasarkan Borang Akuan Am 80 kerana semua kenalan/keluarganya telah meninggal dunia.

JAWAPAN

Tuan Yang Di Pertua,

Pendaftaran lewat kelahiran adalah pendaftaran kelahiran yang melebihi 60 hari bagi kelahiran yang berlaku di Semenanjung dan 42 hari bagi kelahiran di Sabah dan Sarawak. Proses yang diperlukan bagi pendaftaran lewat kelahiran adalah tertakluk kepada syarat dan peraturan dokumentasi yang ditetapkan oleh Jabatan Pendaftaran Negara (JPN).

Permohonan daftar lewat kelahiran memerlukan dua (2) orang saksi kelahiran yang terdiri daripada saudara mara atau kenalan, atau sesiapa yang mengetahui dan boleh mengesahkan tentang kelahiran tersebut. Kedua-dua saksi perlu melengkapkan dan menandatangani borang saksi. Manakala borang akuan bersumpah AM80 diisi dan ditandatangani oleh dua (2) orang pengajur kelahiran, iaitu sesiapa yang berumur 18 tahun ke atas dan mempunyai dokumen pengenalan diri yang sah. Dokumen-dokumen ini merupakan antara perkara yang akan dipertimbangkan oleh JPN dalam kelulusan permohonan.

Kementerian Dalam Negeri (KDN) melalui JPN juga sentiasa mengkaji dari semasa ke semasa penambahbaikan yang boleh dilaksanakan bagi membantu memudahkan urusan pendaftaran kelahiran mengikut peraturan dan syarat-syarat yang telah ditetapkan. Sekiranya terdapat sebarang permasalahan berhubung permohonan daftar lewat kelahiran, orang awam dinasihatkan untuk berhubung terus dengan JPN bagi mendapatkan khidmat nasihat.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN SIM CHEE KEONG (BUKIT
MERTAJAM)**

SOALAN

TUAN SIM CHEE KEONG (BUKIT MERTAJAM) minta **MENTERI DALAM NEGERI menyatakan strategi yang dilaksanakan untuk memulihkan status Tier 3 dalam laporan Trafficking in Persons oleh Jabatan Negara Amerika Syarikat.**

JAWAPAN

Tuan Yang Di Pertua,

Kerajaan Amerika Syarikat melalui Jabatan Negara Amerika Syarikat (JNAS) mengeluarkan Laporan Tahunan mengenai Pemerdagangan Orang secara tahunan bagi menilai usaha dan inisiatif kerajaan dalam menangani pemerdagangan orang. Penilaian oleh JNAS dibuat terhadap 188 buah Negara termasuk Malaysia dan merangkumi aspek pencegahan, pendakwaan dan perlindungan. Penarafan Tahap 3 (*Tier 3*) ini dilihat sebagai suatu cabaran buat negara untuk memperkasakan usaha, menambah baik inisiatif, merancang strategi serta melaksanakan tindakan bagi membanteras jenayah pemerdagangan orang di Malaysia.

Dalam hal ini, Kementerian Dalam Negeri (KDN) selaku peneraju Majlis Antipemerdagangan Orang dan Antipenyeludupan Migran (MAPO) yang turut dianggotai 22 kementerian, agensi serta organisasi lain seperti badan bukan Kerajaan sentiasa komited dalam melaksanakan pelbagai bentuk tindakan bagi membanteras jenayah pemerdagangan orang. Selain itu, pindaan Akta Antipemerdagangan Orang dan Antipenyeludupan Migran 2007 (Akta 670) yang telah berkuat kuasa pada 22 Februari yang lalu dilihat sebagai pemangkin pelaksanaan usaha dan hala tuju Kerajaan seperti berikut:

(i) Penguatkuasaan dan pendakwaan

Pindaan terkini akta kepada tafsiran pemerdagangan orang iaitu dengan mengeluarkan definisi paksaan (*coercion*) membantu agensi penguatkuasaan membuat siasatan sekaligus meningkatkan peluang untuk pendakwaan dan sabitan kes. Untuk pengenalpastian mangsa, semua agensi penguatkuasaan telah dibekalkan dengan Garis Panduan Nasional Untuk Indikator Pemerdagangan Orang (NGHTI) yang sentiasa ditambah baik selaras dengan pindaan akta terkini.

(ii) Perlindungan

Dalam usaha meningkatkan perlindungan mangsa, Prosedur Operasi Standard (SOP) bagi Penjagaan dan Perlindungan Orang yang Diperdagangkan telah dibangunkan dan dikuatkuasakan. Selain itu, peningkatan bilangan *Victim Assistance Specialist* (VAS) daripada 2 orang kepada 6 orang juga merupakan antara inisiatif dilaksanakan Kerajaan untuk memberi perkhidmatan sokongan berterusan kepada mangsa pemerdagangan orang.

(iii) Pencegahan

Ratifikasi Protokol 29, Konvensyen Buruh Paksa pada 21 Mac 2022 dan pelancaran Pelan Tindakan Kebangsaan Berhubung Buruh Paksa (NAPFL) merupakan komitmen terbaharu negara untuk mencegah insiden buruh paksa dan juga pemerdagangan orang. Selain itu, pendedahan kepada golongan belia mengenai isu ini juga diberi perhatian dengan pembangunan Garis Panduan Dalam Membanteras Pemerdagangan Orang dan Penyeludupan Migran.

(iv) Kerjasama Strategik

Libat urus dan kerjasama berterusan dilakukan dengan pelbagai pihak seperti perwakilan diplomatik asing, organisasi antarabangsa, ahli akademik dan juga di peringkat serantau serta antarabangsa. Antaranya adalah dengan Kedutaan Besar Amerika Syarikat, Kedutaan Besar Indonesia, ASEAN-Australia Counter Trafficking (ASEAN-ACT) dan Responsible Business Alliance (RBA).

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN SIM CHEE KEONG (BUKIT
MERTAJAM)**

SOALAN

TUAN SIM CHEE KEONG (BUKIT MERTAJAM) minta MENTERI DALAM NEGERI menyatakan punca warga migran melolos diri dari depot tahanan imigresen di Bandar Bahru pada 19 April 2022 termasuk dakwaan pelanggaran hak asasi manusia terhadap tahanan dan apakah langkah untuk mengelakkan kejadian yang sama kelak

JAWAPAN

Tuan Yang Di Pertua,

Mohon izin supaya soalan daripada YB Bukit Mertajam ini dijawab bersekali dengan soalan bernombor L436, L479 dan L492 daripada YB Sungai Buloh, YB Cameron Highlands dan YB Batu Kawan memandangkan keempat-empat soalan yang diutarakan menyentuh isu yang sama iaitu mengenai insiden tahanan Depot Imigresen Sementara (DIS) Sg. Bakap yang meloloskan diri dan langkah-langkah bagi memastikan kejadian yang sama tidak berulang.

Untuk makluman Ahli Yang Berhormat, Jawatankuasa Teknikal Pengurusan Darurat Bil. 2/2021 dan Sidang Darurat Majlis Keselamatan Negara pada 19 Januari 2021 antara lain telah bersetuju supaya JIM membuat perolehan perkhidmatan tiga buah Kem Program Latihan Khidmat Negara (PLKN) termasuk Kem Sri Impian di Sg. Bakap sebagai Depot Imigresen Sementara. Langkah jangka sederhana tersebut dilaksanakan bagi mengurangkan kesesakan di depot imigresen sedia ada dan mengawal risiko penularan jangkitan COVID-19 dalam kalangan tahanan termasuklah tahanan baharu serta pegawai.

Semasa kejadian, DIS Sg. Bakap menempatkan 664 orang tahanan iaitu 95% daripada kapasiti sebenar. Hasil siasatan mendapati insiden pembolosan 528 orang tahanan tersebut berpunca daripada rusuhan tahanan di Depot Imigresen Sementara Sg. Bakap. Sehingga 10 Julai 2022, seramai 458 orang tahanan berjaya ditangkap semula dan 62 orang masih bebas. Manakala, lapan orang tahanan telah meninggal dunia akibat kemalangan dalam cubaan melintas lebuh raya.

Kementerian Dalam Negeri melalui Jabatan Imigresen Malaysia komited dalam memastikan kebijakan dan keselamatan semua tahanan depot imigresen terpelihara. Antara langkah-langkah yang diambil termasuklah:

- (i) menyediakan perkhidmatan kesihatan percuma melalui penempatan penolong pegawai perubatan Gred U29/32 di depot-depot Imigresen sementara;
- (ii) penyediaan makanan berkhasiat sebanyak empat kali sehari mengikut spesifikasi yang diluluskan oleh Bahagian Pemakanan, Kementerian Kesihatan Malaysia; dan
- (iii) menaiktaraf infrastruktur blok tahanan dari masa ke semasa agar tahap keselamatan sentiasa terjamin dan menyediakan fasiliti untuk blok wanita dan kanak-kanak serta menjalankan aktiviti pembelajaran asas serta aktiviti riadah ringan.

Manakala bagi memastikan kejadian tersebut tidak berulang, JIM telah mengambil langkah-langkah seperti berikut:

- (i) meningkatkan ciri-ciri keselamatan di depot imigresen dengan pemasangan pagar *anti-climb* dan pagar kawat besi;
- (ii) meningkatkan kawalan keselamatan dengan bantuan anggota RELA; dan
- (iii) mempergiat aktiviti pengusiran tahanan ke negara asal.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : YB TUAN SIM CHEE KEONG (BUKIT
MERTAJAM)**

SOALAN

TUAN SIM CHEE KEONG (BUKIT MERTAJAM) minta **MENTERI DALAM NEGERI** menyatakan pelaksanaan dasar pasport asing yang mandatori untuk permohonan kewarganegaraan Malaysia dalam kes seperti bayi terbuang ataupun kanak-kanak 'stateless' yang terputus hubungan dengan ibu bapa kandung dan kedutaan asing enggan mengeluarkan pasport kepada mereka.

JAWAPAN

Tuan Yang Di Pertua,

Untuk makluman Ahli Yang Berhormat, keperluan dokumen sokongan seperti pasport asing dan lain-lain dokumen adalah berbeza-beza bagi setiap kes. Keperluan ini bergantung kepada situasi sekiranya pemohon pernah memiliki pasport asing, maka ia perlu dikemukakan sebagai dokumen sokongan ketika permohonan. Sekiranya pemohon tidak pernah memegang pasport mana-mana negara, ia tidak wajib untuk disertakan. Setiap fakta dan dokumen bukti yang dikemukakan oleh setiap pemohon perlu diteliti untuk memastikan permohonan itu adalah lengkap dan dapat diproses mengikut syarat perundangan yang ditetapkan.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN

**DARIPADA : TUAN SIM CHEE KEONG
[BUKIT MERTAJAM]**

SOALAN

TUAN SIM CHEE KEONG [BUKIT MERTAJAM] minta **MENTERI BELIA DAN SUKAN** menyatakan maklumat lanjut, tarikh, kos, skop kerja serta syarikat yang terlibat bagi kerja-kerja naik taraf dan penyelenggaraan padang Stadium Nasional Bukit Jalil antara tahun 2020 sehingga kini.

JAWAPAN

Tan Sri Yang Di-Pertua,

Kos penyelenggaraan Padang Stadium Nasional dari tahun 2020 sehingga kini adalah sebanyak RM797,852.65. Tiada kerja-kerja naiktaraf dilaksanakan pada tahun 2020 dan 2021, sebaliknya hanya melibatkan kerja-kerja pembaikan dan penyelenggaraan padang mengikut skop kerja yang dibuat. Kos bagi kerja-kerja pembaikan telah termasuk di dalam kontrak penyelenggaraan tahunan padang.

Antara skop kerja-Kerja penyelenggaraan rumput padang di Stadium Nasional Kuala Lumpur Sports City (KLSC) untuk selama satu (1) tahun adalah seperti berikut :

- i. penyiraman rumput
- ii. pembajaan
- iii. merumpai dan meracun
- iv. kawalan penyakit dan serangga perosak
- v. memotong rumput
- vi. melakukan *hollowtining*
- vii. membuat *topdressing*
- viii. *rolling*
- ix. *detaching*
- x. analisa PH tanah
- xi. menggantikan/ menanam semula rumput yang rosak
- xii. membuat persediaan dan garisan padang bagi semua acara yang berlangsung; dan
- xiii. kerja-kerja luar jangka (pembaikan) bergantung kepada keadaan rumput.

Antara syarikat yang dilantik bagi menjalankan kerja-kerja penyelenggaraan padang Stadium Nasional pada tahun 2020 sehingga kini adalah seperti berikut:

- i. Nuaim Corporation (M) Sdn. Bhd.
Lantikan: 18 Mei 2018 hingga 17 Mei 2020
Kos: RM132,096.00 (bermula Januari 2020)
- ii. Nuaim Corporation (M) Sdn. Bhd.
Lantikan: 18 Mei 2020 hingga 17 September 2020
Kos: RM122,033.32
- iii. Satiri Sdn. Bhd .
Lantikan: 18 September 2020 hingga 17 September 2021
Kos: RM456,012.00
- iv. Satiri Sdn Bhd.
Lantikan: 18 September 2021 hingga 17 Mac 2022
Kos: 87,711.33 (sehingga Disember 2021)

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

DARIPADA : TUAN SIM TZE TZIN (BAYAN BARU)

SOALAN

TUAN SIM TZE TZIN (BAYAN BARU) minta **MENTERI PERTANIAN DAN INDUSTRI MAKANAN** menyatakan jumlah ayam yang dikeluarkan untuk 36 bulan yang lalu. Nyatakan mengikut bulan.

JAWAPAN

Tuan Yang di-Pertua,

Untuk makluman Ahli Yang Berhormat, jumlah pengeluaran ayam pedaging seperti berikut:

- (i) tahun 2019: 820.65 juta ekor (1,395,110.22 metrik tan);
- (ii) tahun 2020: 867.79 juta ekor (1,475,249.41 metrik tan); dan
- (iii) tahun 2021: 839.87 juta ekor (1,427,795.94 metrik tan).

Manakala bagi tahun 2022, sehingga 30 Jun 2022, jumlah pengeluaran ayam sebanyak 419.17 juta ekor (754,522.76 metrik tan).

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

DARIPADA : TUAN SIM TZE TZIN (BAYAN BARU)

SOALAN

TUAN SIM TZE TZIN (BAYAN BARU) minta **MENTERI PERTANIAN DAN INDUSTRI MAKANAN** menyatakan jumlah khinzir yang dikeluarkan untuk 36 bulan yang lalu. Nyatakan mengikut bulan.

JAWAPAN

Tuan Yang di-Pertua,

Untuk makluman Ahli Yang Berhormat, jumlah pengeluaran khinzir seperti berikut:

- (i) tahun 2019: 3.34 juta ekor (239,247.24 metrik tan);
- (ii) tahun 2020: 3.25 juta ekor (232,436.10 metrik tan); dan
- (iii) tahun 2021: 3.26 juta ekor (233,030.20 metrik tan).

Manakala bagi tahun 2022, sehingga 30 Jun 2022, jumlah pengeluaran khinzir adalah sebanyak 1.66 juta ekor (119,168.93 metrik tan).

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

DARIPADA : TUAN SIM TZE TZIN (BAYAN BARU)

SOALAN

TUAN SIM TZE TZIN (BAYAN BARU) minta MENTERI PERTANIAN DAN INDUSTRI MAKANAN menyatakan jumlah tangkapan ikan 36 bulan yang lalu. Nyatakan mengikut bulan.

JAWAPAN

Tuan Yang di-Pertua,

Untuk makluman Ahli Yang Berhormat, jumlah tangkapan ikan negara bagi laut pantai dan laut dalam dari Januari 2019 hingga Jun 2022 adalah seperti berikut:

Bil.	Bulan	Tahun (Tan metrik)			
		2019	2020	2021	2022
1	Januari	100,469.51	99,866.12	90,187.73	94,075.71
2	Februari	104,530.73	121,780.92	92,069.83	97,582.49
3	Mac	125,366.23	111,214.97	115,540.20	117,040.89
4	April	131,571.95	104,407.35	121,020.47	122,245.54
5	Mei	129,763.67	108,294.01	116,085.38	110,106.07
6	Jun	125,817.61	124,089.97	114,950.18	112,942.79
7	Julai	126,736.61	122,058.80	124,348.94	-
8	Ogos	125,675.23	126,610.83	125,233.12	-
9	September	132,725.10	123,311.27	116,721.53	-
10	Oktober	133,866.66	123,181.13	117,701.76	-
11	November	122,089.93	116,858.10	104,003.76	-
12	Disember	96,833.18	101,625.59	90,178.48	-
JUMLAH		1,455,446.41	1,383,299.06	1,328,041.38	653,993.49

Sekian,terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN
DARIPADA : TUAN SIM TZE TZIN (BAYAN BARU)

SOALAN

TUAN SIM TZE TZIN (BAYAN BARU) minta **MENTERI PERTANIAN DAN INDUSTRI MAKANAN** menyatakan jumlah gandum yang diimport untuk 36 bulan yang lalu. Nyatakan mengikut bulan.

JAWAPAN

Tuan Yang di-Pertua,

Untuk makluman Ahli Yang Berhormat, nilai import gandum bagi tahun 2019 adalah sebanyak 1,385,924 tan metrik dengan nilai RM 1,589,943,321, bagi tahun 2020 adalah sebanyak 1,390,609 tan metrik dengan nilai RM1,586,679,452 dan bagi tahun 2021 adalah sebanyak 1,318,059 tan metrik dengan nilai RM 1,669,263,331 dan bagi tahun 2022 untuk tempoh Januari sehingga Mei adalah sebanyak 610,154 dengan nilai RM1,037,203,744. Maklumat import gandum berdasarkan bulan adalah seperti berikut:

Tahun	Bulan	Kuantiti (Tan Metrik)	Nilai (RM)
2019	Januari	69,008	87,036,513
	Februari	116,393	143,972,807
	Mac	161,463	195,687,936
	April	140,095	169,250,402
	Mei	113,807	131,962,011
	Jun	127,416	151,845,470
	Julai	100,106	115,646,255
	Ogos	113,730	128,395,904
	September	80,026	84,079,825
	Oktober	141,872	146,987,316
	November	100,008	105,568,600
	Disember	122,000	129,510,282
2020	Januari	106,863	115,019,164
	Februari	144,858	164,086,539
	Mac	122,238	141,660,724
	April	168,437	203,468,408
	Mei	92,947	110,700,263
	Jun	88,063	104,467,938
	Julai	124,916	148,558,789

	Ogos	106,987	117,122,132
	September	144,382	150,799,474
	Oktober	83,112	90,659,016
	November	84,474	95,494,790
	Disember	123,331	144,642,215
2021	Januari	78,941	88,523,159
	Februari	136,191	58,353,611
	Mac	140,688	172,255,298
	April	183,434	232,935,690
	Mei	85,653	114,616,040
	Jun	66,011	91,684,087
	Julai	113,818	154,840,577
	Ogos	115,133	169,929,903
	September	185,566	273,274,325
	Oktober	75,733	105,923,125
	November	53,647	81,652,998
	Disember	83,244	125,274,518
2022	Januari	160,813	265,360,854
	Februari	120,170	197,107,901
	Mac	115,524	193,434,185
	April	93,784	153,827,235
	Mei	119,863	227,473,569

Sumber: Jabatan Perangkaan Malaysia

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

DARIPADA : TUAN SIM TZE TZIN (BAYAN BARU)

SOALAN

TUAN SIM TZE TZIN [BAYAN BARU] minta **MENTERI PERTANIAN DAN INDUSTRI MAKANAN** menyatakan jumlah beras yang dihasilkan dalam negeri dan diimport untuk 36 bulan yang lalu. Nyatakan mengikut bulan.

JAWAPAN

Tuan Yang di-Pertua,

Untuk makluman Ahli Yang Berhormat, pengeluaran padi negara bagi tempoh tiga puluh enam (36) bulan iaitu pada tahun 2019 adalah sebanyak 1,516,341 tan metrik manakala bagi tahun 2020 dan 2021, masing-masing adalah sebanyak 1,624,468 tan metrik dan 1,677,475 tan metrik.

Pada masa ini data mengenai pengeluaran beras hanya dikeluarkan secara tahunan. Data import beras mengikut bulanan untuk tempoh tiga puluh enam (36) bulan adalah seperti berikut:

TAHUN BULAN	2019	2020	2021	2022
	(tan metrik)			
Januari		58,877	51,549	89,644
Februari		102,152	71,907	110,282
Mac		101,778	116,453	110,204
April		102,240	126,792	68,232
Mei		166,346	88,480	123,574
Jun		134,348	72,101	79,482
Julai	57,919	92,271	76,221	
Ogos	78,815	65,766	83,313	
September	42,507	72,307	85,813	
Oktober	63,072	70,951	107,025	
November	83,718	76,860	84,753	
Disember	35,354	65,862	97,642	

SOALAN NO. 454

Maklumat mengenai jumlah pengeluaran beras mengikut negeri bagi tempoh 36 bulan adalah seperti berikut:

TAHUN NEGERI	2019	2020	2021
	(tan metrik)		
Johor	5,008	5,252	6,322
Kedah	558,362	639,940	634,953
Kelantan	174,740	213,972	233,680
Melaka	6,060	5,985	7,201
Negeri Sembilan	4,986	6,260	3,264
Pahang	20,302	24,867	26,472
Perak	167,444	162,706	171,078
Perlis	136,388	142,293	179,223
Pulau Pinang	83,282	85,116	95,843
Selangor	113,158	111,675	108,942
Terengganu	46,398	51,606	50,416
Sabah	70,919	74,243	70,739
Sarawak	129,294	100,553	89,342

Sekian,terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI KANAN PENDIDIKAN** menyatakan pelan tindakan Kementerian untuk mengekalkan guru-guru berpengalaman supaya mereka tidak bersara awal. Berapa jumlah guru berpengalaman yang telah bersara awal dalam tempoh 3 tahun yang lalu dan apakah puncanya.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memantau keperluan dan pengisian jawatan Pegawai Perkhidmatan Pendidikan (PPP) di sekolah bawah KPM.

Untuk makluman Ahli Yang Berhormat, berdasarkan rekod KPM, jumlah guru yang bersara awal pada tahun 2021 adalah seramai 4,389 orang atau 1.06 peratus daripada jumlah keseluruhan pengisian guru pada 1 Januari 2021. Bagi tahun 2019 dan 2020, jumlah guru yang bersara awal adalah masing-masing sebanyak 4,313 dan 4,212. Secara purata, peratusan guru yang bersara pilihan untuk tahun 2017 hingga 2021 adalah 0.99 peratus daripada jumlah keseluruhan pengisian guru pada 1 Januari tahun-tahun tersebut.

Dalam konteks pembangunan kerjaya, KPM menyediakan peluang pembangunan profesionalisme kepada guru bagi memastikan guru sentiasa bersedia serta bermotivasi dalam menjalankan tugas dan berusaha meningkatkan kualiti perkhidmatan masing-masing. Ini termasuk memberi pendedahan tentang deskripsi tugas guru akademik di sekolah serta latihan dan bimbingan yang berterusan kepada guru dalam mendukung pelaksanaan dasar pendidikan semasa, termasuk melengkapkan guru dengan kemahiran dalam aspek pendigitalan pendidikan bagi mendepani sistem pendidikan abad ke-21.

Di samping itu, KPM juga menyediakan latihan dalam meningkatkan kesejahteraan psikologi untuk memberikan kemahiran pengurusan emosi, kawalan diri dan amalan harian yang positif berdasarkan tahap kesejahteraan psikologi yang dinilai melalui Inventori Kesejahteraan Psikologi (IKPsi).

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

SOALAN

Minta **MENTERI PENGAJIAN TINGGI** menyatakan kadar keciciran pelajar-pelajar di IPTA dan IPTS dalam tempoh 5 tahun yang lalu. Apakah tindakan Kementerian untuk mencari punca keciciran tersebut dan langkah-langkah strategik untuk menanganinya.

JAWAPAN

Tan Sri Yang di-Pertua,

Berdasarkan semakan Kementerian Pengajian Tinggi (KPT), dalam tempoh lima (5) tahun yang lalu, peratus pelajar yang tidak tamat pengajian secara puratanya ialah 2.45%. Mengikut tahun, bilangan pelajar Universiti Awam yang tidak tamat pengajian adalah seperti yang berikut:

Tahun	Bilangan pelajar keseluruhan	Bilangan pelajar yang tidak tamat pengajian	Peratus (%)
2021	589,879	17,613	2.99
2020	584,576	13,291	2.27
2019	567,625	22,199	3.91
2018	552,702	19,926	3.61
2017	538,555	18,156	3.37

Sistem e-IPTS turut merekodkan bagi tahun 2021, seramai 28,519 (5.51%) pelajar tidak tamat pengajian di Institusi Pendidikan Tinggi

Swasta (IPTS), manakala pada tahun 2020 seramai 27,002 (5.02%) pelajar dan tahun 2019 seramai (3.91%) pelajar.

Antara faktor yang dikenal pasti menyumbang kepada perkara ini termasuklah masalah kesihatan, masalah peribadi, gagal peperiksaan dan gagal mendaftar. KPT amat prihatin dan sentiasa berusaha membantu mereka yang menghadapi masalah-masalah tersebut melalui inisiatif-inisiatif yang dilaksanakan di peringkat kementerian dan juga Institusi Pendidikan Tinggi (IPT).

Antara inisiatif yang dilaksanakan di peringkat KPT adalah menyediakan kemudahan biasiswa dan bantuan kewangan kepada pelajar-pelajar yang layak, terutamanya pelajar golongan B40.

KPT menerusi UA juga turut melaksanakan program intervensi akademik seperti sistem penasihat akademik (PA). Selain itu, program intervensi bukan akademik seperti perkhidmatan kaunseling individu dan berkelompok, *buddy system*, program-program motivasi, mentor-mentee dan pelbagai program lagi turut dijalankan dari semasa ke semasa untuk membantu para pelajar.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI KANAN PENDIDIKAN** menyatakan tentang usaha-usaha Kementerian untuk meluaskan fasiliti internet di sekolah-sekolah pedalaman supaya proses pengajaran dan pembelajaran dengan menggunakan peranti-peranti moden dan canggih dilaksanakan. Apa rancangan jangka pendek dan jangka panjang untuk meningkatkan kemudahan dan pencapaian sekolah-sekolah di kawasan luar bandar.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk melakukan yang terbaik supaya capaian internet berkelajuan tinggi, stabil dan terjamin dapat disediakan di institusi pendidikan bawah KPM termasuk sekolah luar bandar.

Buat masa ini, KPM telah menyediakan capaian jalur lebar internet dengan kelajuan 30Mbps hingga 100Mbps untuk 10,214 sekolah. Daripada jumlah tersebut, sebanyak 2,350 sekolah termasuk 3 sekolah luar bandar telah mendapat capaian internet melalui teknologi fiber optik. Sebagai pelaksanaan jangka pendek, KPM akan menambah bilangan sekolah yang akan disediakan dengan capaian internet melalui teknologi fiber optik kepada 5,031 sekolah termasuk 24 sekolah luar bandar bermula Ogos 2022.

Dalam usaha untuk memastikan capaian internet di sekolah KPM terus dipertingkatkan, KPM sedang bekerjasama dengan Unit Pemodenan Tadbiran dan Perancangan Pengurusan Malaysia (MAMPU) bagi mengenal pasti pendekatan terbaik. Dalam hal ini, KPM mengambil kira pendekatan naik taraf capaian internet yang mengutamakan teknologi fiber dengan kelajuan minimum 100Mbps sehingga 1,500Mbps bergantung kepada saiz dan populasi premis institusi pendidikan dan institusi lain bawah KPM. Pendekatan ini adalah selaras dengan pelaksanaan Inisiatif Jalinan Digital Negara (JENDELA) yang melibatkan pembangunan infrastruktur dan penaiktarafan rangkaian telekomunikasi di seluruh negara.

Projek naik taraf capaian internet yang akan dilaksanakan secara berfasa membabitkan semua premis institusi pendidikan dan institusi lain bawah KPM memerlukan perbelanjaan yang besar. Sehingga kini, anggaran perbelanjaan bagi projek ini masih belum dimuktamadkan. Walau bagaimanapun, KPM akan memastikan bahawa pelaksanaan ini akan bersesuaian dengan tujuan (*fit for purpose*), kalis masa hadapan (*future proof*), merupakan penyelesaian yang holistik (*holistic solution*) dan memberikan nilai yang terbaik (*value for money*).

Selain itu, KPM juga akan menaik taraf infrastruktur rangkaian dalaman yang membolehkan Internet dicapai dari semua lokasi dalam kawasan premis institusi bawah KPM. Oleh itu, aktiviti pengajaran dan pembelajaran (PdP) yang menggunakan bahan terkini yang memerlukan peranti moden dan canggih dapat dilaksanakan dengan mudah dan berkesan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN SIVAKUMAR VARATHARAJU NAIDU [BATU GAJAH]

TARIKH : JULAI – OGOS 2022

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI PENGANGKUTAN** menyatakan langkah-langkah Kerajaan bagi memastikan agar tambang percuma kenderaan awam yang diberikan oleh Kerajaan seperti LRT, MRT, bas dan komuter hanya dimanfaatkan khususnya oleh rakyat tempatan sahaja. Berapa ramai warga asing yang turut menikmati kemudahan percuma ini berbanding dengan warga tempatan.

JAWAPAN

Tuan Yang Di Pertua,

1. Fasa 1 MRT Laluan Putrajaya telah dilancarkan dan dibuka kepada orang ramai pada 16 Jun 2022 yang lepas. Jajaran Fasa 1 ini adalah sepanjang 17.5km dari Kwasa Damansara hingga ke Kampung Batu dan melibatkan 12 buah stesen. Seiring dengan pembukaan Fasa 1 MRT Laluan Putrajaya tersebut, Kerajaan telah mengumumkan pemberian tambang perkhidmatan percuma bagi semua pengangkutan awam di bawah kendalian RapidKL iaitu MRT, LRT, BRT, Monorel serta bas RapidKL dan komuter di bawah kendalian KTMB selama sebulan bermula pada 16 Jun 2022.

2. Pemberian tambang percuma ini akan dapat dimanfaatkan oleh pengguna pengangkutan awam khususnya di Lembah Klang dan untuk menggalakkan semula rakyat menggunakan semula pengangkutan awam pasca pandemik COVID-19. Berdasarkan data harian penumpang, secara purata seramai 735,052 pengguna memanfaatkan tambang percuma yang diberikan kepada penumpang LRT, Monorail, MRT, BRT dan juga bas Rapid KL dan KTM Komuter dari 16 Jun sehingga 4 Julai 2022. Daripada jumlah ini, dianggarkan 97 peratus adalah warga tempatan dan selebihnya merupakan warga asing. Anggaran ini adalah berdasarkan kepada maklum balas kepada soalan tinjauan yang diberikan oleh pengguna semasa menaiki pengangkutan awam Rapid KL dalam tempoh tersebut.
3. Untuk makluman Ahli Yang Berhormat juga, tiada sekatan atau caj tambang yang dikenakan kepada warga asing memandangkan pengumuman yang dibuat oleh YAB Perdana Menteri pada majlis pelancaran operasi MRT Laluan Putrajaya Fasa 1 pada 16 Jun 2022 sebelum ini hanya menyatakan tambang percuma kepada semua pengguna Rapid KL & KTM Komuter, tidak tertakluk kepada rakyat tempatan sahaja.
4. Selepas tempoh promosi percuma ini, Kerajaan mengenakan mekanisme kawalan untuk memastikan kemudahan tambang rendah ini dinikmati hanya oleh rakyat Malaysia melalui penggunaan pas My50. Pembelian My50 ini hanya boleh dibuat menggunakan MyKad sahaja. Oleh yang demikian, hanya warganegara Malaysia boleh menikmati subsidi pengangkutan awam berjumlah RM115 juta bagi tahun 2022.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KE-14**

PERTANYAAN : JAWAB BUKAN LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

SOALAN

Minta **MENTERI BELIA DAN SUKAN** menyatakan usaha-usaha yang telah diambil oleh Kementerian untuk menggiatkan dan memperkuatkan lagi seni mempertahan diri Karate yang banyak menyumbangkan pingat dan mengharumkan nama Malaysia di sukan-sukan peringkat antarabangsa. Sejauh manakah pengiktirafan Kementerian kepada atlet-atlet Karate semasa dan penyumbang-penyumbang veteran.

JAWAPAN

Tan Sri Yang di-Pertua,

Untuk makluman Ahli Yang Berhormat, sukan Karate merupakan salah satu sukan yang disenaraikan di bawah Sukan Teras, Majlis Sukan Negara (MSN). Sukan-sukan yang tersenarai dalam Sukan Teras secara langsung akan diberikan tumpuan pembangunan dari peringkat akar umbi sehingga ke peringkat antarabangsa.

Pelbagai usaha telah dilaksanakan bagi memperkuatkan sukan ini menerusi pelaksanaan Program Podium, Program Pelapis Kebangsaan, Program Pelapis Negeri dan Program Bakat. Program-program ini merupakan platform yang dirangka khusus untuk memastikan atlet-atlet dari sukan ini dapat memamerkan prestasi

terbaik sama ada di kejohanan peringkat tempatan mahupun antarabangsa.

Kementerian juga amat menghargai jasa-jasa atlet yang telah mengharumkan nama negara di peringkat antarabangsa termasuk sukan Karate. Antara pengiktirafan yang disediakan kepada atlet-atlet negara adalah seperti berikut:

- a) Skim Hadiah Kemenangan Sukan (SHAKAM)** kepada para atlet yang mempamerkan prestasi di peringkat antarabangsa, khususnya di temasya Sukan Olimpik, Sukan Komanwel, Sukan Asia dan Sukan SEA serta kejohanan-kejohanan individu di peringkat Asia, Komanwel dan Dunia;
- b) Anugerah Sukan Negara;** dan
- c) Pengurniaan Darjah Kebesaran, Bintang dan Pingat Persekutuan/Negeri.**

Bekas-bekas atlet karate juga turut mendapat keistimewaan yang sama seperti bekas-bekas atlet sukan lain apabila berdaftar dengan **Yayasan Kebajikan Atlet Kebangsaan (YAKEB)**. YAKEB menyediakan Skim Kemudahan Perubatan dan Kesihatan di mana atlet-atlet negara mendapatkan perkhidmatan perubatan percuma daripada hospital kerajaan serta Skim Bantuan Khas seperti bantuan tunai bencana, melangsungkan perkahwinan, bantuan alatan seperti alat tiruan atau alat sokongan perubatan, pampasan kematian untuk ahli, rawatan perubatan hospital (*inpatient* dan *outpatient*) serta bantuan melanjutkan pelajaran di peringkat sijil, diploma dan ijazah. Pemegang kad privilege YAKEB boleh mendapatkan diskaun daripada panel-panel yang telah dilantik seperti perhotelan, restoran, pelancongan dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN R. SIVARASA [SUNGAI BULOH]

SOALAN

TUAN R. SIVARASA [SUNGAI BULOH] minta **PERDANA MENTERI** menyatakan apakah asas untuk memberi kelulusan secara dasar untuk membina lebuh raya PJD-LINK walaupun tiada laporan-laporan impak kepada alam sekitar, kepada sosial dan trafik dikemukakan dan pada 2014, Kerajaan Negeri Selangor telah menolak cadangan lebuh raya KIDEX dari pemaju yang sama.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang Di Pertua,

1. Untuk makluman Ahli Yang Berhormat, Petaling Jaya Traffic Dispersal Elevated Highway (PJD Link) telah mendapat kelulusan prinsip pada 4 Ogos 2017. Selain itu, projek PJD Link telah dibentangkan di Mesyuarat Majlis Tindakan Ekonomi Negeri Selangor (MTES) pada 9 September 2020 dan seterusnya Majlis Mesyuarat Kerajaan Negeri ke-34 pada 30 September 2020 bersetuju secara dasar dengan cadangan pelaksanaan projek PJD Link tertakluk kepada beberapa syarat antara lain syarikat PJD Link (M) Sdn. Bhd. perlu melaksanakan Penilaian Impak Sosial (*Social Impact Assessment - SIA*) dan Laporan Penilaian Impak Alam Sekitar (*Environmental Impact Assessment - EIA*).

2. Sebagai makluman Ahli Yang Berhomat, kelulusan dasar bagi mana-mana projek lebuh raya yang telah diputuskan untuk dilaksanakan secara penswastaan termasuk projek PJD Link ini adalah berasaskan beberapa penilaian awal di peringkat Kementerian Kerja Raja dan juga Unit Kerjasama Awam Swasta (UKAS), Jabatan Perdana Menteri. Lazimnya selepas menerima mana-mana cadangan daripada pihak pemaju atas inisiatif swasta, Kementerian Kerja Raya akan terlebih dahulu meneliti cadangan daripada pemaju dari sudut teknikal dan juga keperluan lebuh raya berkenaan berdasarkan Pelan Pembangunan Rangkaian Jalan Raya (HNDP) 2030. Dalam hal ini, projek PJD Link telah terkandung dalam HNDP 2030. Perubahan pada jajaran dan juga rekabentuk telah dilaksanakan mengambil kira pandangan daripada semua pemegang taruh melalui bengkel pengurusan nilai.
3. Selanjutnya, perjanjian konsesi telah ditandatangani pada 5 April 2022 dengan penetapan syarat-syarat duluan dalam perjanjian konsesi yang mana antara lain, PJD Link (M) Sdn. Bhd. perlu mengemukakan Laporan SIA, EIA dan Laporan Penilaian Impak Trafik (Traffic Impact Assesment -TIA). Ini didapati masih selaras dengan syarat-syarat yang ditetapkan oleh Kerajaan Negeri Selangor berdasarkan Carta Alir Proses Perancangan Pembangunan Lebuh Raya Dan Infrastruktur Utama di Negeri Selangor. Dalam hubungan ini, projek PJD Link masih perlu dibentangkan di peringkat MTES. Sekiranya syarikat PJD Link (M) Sdn. Bhd. gagal untuk mematuhi syarat-syarat duluan, maka perjanjian konsesi tersebut akan terbatal dan menjadi tidak sah (null & void).

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN SIVARASA A/L K.RASIAH
[SUNGAI BULOH]

SOALAN :

TUAN SIVARASA A/L K.RASIAH [SUNGAI BULOH] minta **PERDANA MENTERI** menyatakan sebagai susulan daripada cadangan Kerajaan untuk memansuhkan hukuman mati mandatori, adakah Kerajaan sedia mengkaji semula 856 kes yang berada dalam proses rayuan kepada Lembaga Pengampunan Negeri untuk lembaga-lembaga tersebut menimbang semula sama ada hukuman mati mereka wajar ditukar kepada hukuman lain memandangkan fakta-fakta kes masing-masing.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Kerajaan telah bersetuju secara prinsip untuk memansuhkan hukuman mati mandatori dan digantikan dengan hukuman tertakluk budi bicara Mahkamah. Perkara ini diputuskan setelah mempertimbangkan laporan kajian Jawatankuasa Khas Kajian Hukuman Gantian Terhadap Hukuman Mati Mandatori pada 8 Jun 2022.

Pada masa yang sama, Kerajaan juga bersetuju supaya moratorium hukuman mati melibatkan seramai 1,342 orang banduan (statistik sehingga 10 Jun 2022) yang telah dijatuhkan oleh Mahkamah serta

rayuan-rayuan hukuman mati yang telah ditolak oleh Lembaga Pengampunan tidak dikuatkuasakan sehingga kajian hukuman gantian terhadap hukuman mati mandatori selesai dan diputuskan oleh Kerajaan.

Selaras dengan perkara ini juga, tiada halangan untuk mana-mana banduan mengemukakan petisyen rayuan pengampunan di bawah Peraturan 114, Peraturan-Peraturan Penjara 2000 kepada Lembaga Pengampunan untuk pertimbangan sewajarnya. Namun, selaras dengan keputusan Kerajaan untuk memansuhkan hukuman mati mandatori, beberapa tindakan susulan akan dilaksanakan, antaranya melibatkan hala tuju sistem keadilan jenayah negara. Oleh itu, mekanisme yang sesuai sedang diteliti oleh Kerajaan bagi 1,342 orang banduan ini.

Dalam hal ini, Kerajaan komited untuk memastikan kajian dan penelitian sewajarnya dari aspek perundangan dilaksanakan terhadap cadangan ini bagi memastikan kebolehlaksanaan tidak bercanggah dengan mana-mana perundangan sedia ada serta tidak dipertikaikan mana-mana pihak. Berdasarkan penjelasan ini, banduan-banduan berkenaan boleh mengemukakan petisyen pengampunan kepada Lembaga Pengampunan Negeri untuk pertimbangan sewajarnya.

Lembaga Pengampunan merupakan platform terakhir banduan mengemukakan rayuan (*beyond the ambit of law*) iaitu selepas melalui semua proses perundangan. Dalam konteks ini, Perkara 42 Perlembagaan Persekutuan memperuntukkan kuasa memberi ampuh, tunda hukum dan lega hukum adalah budi bicara Yang di-Pertuan Agong, Raja dan Yang di-Pertua Negeri.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN SIVARASA A/L K.RASIAH
[SUNGAI BULOH]

SOALAN :

TUAN SIVARASA A/L K.RASIAH [SUNGAI BULOH] minta **PERDANA MENTERI** menyatakan dalam kes siasatan Tan Sri Azam Baki berkenaan pemilikan saham bernilai beberapa juta ringgit oleh beliau, memandangkan Suruhanjaya Sekuriti Malaysia telah sahkan akaun saham dan dana yang digunakan memang adalah kepunyaan Tan Sri sendiri, adakah Peguam Negara akan mengarahkan PDRM menyiasat isu pokok sama ada pemilikan saham itu ada unsur rasuah.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Suruhanjaya Sekuriti Malaysia (SC) sebagai pengawal selia pasaran modal telah menjalankan siasatan terhadap pengendalian akaun dagangan Tan Sri Dato' Sri Haji Azam bin Baki di bawah Akta Perindustrian Sekuriti (Depositori Pusat) 1991 [Akta 453]. Pihak SC telah menjalankan siasatan di bawah subseksyen 25(4) Akta 453 yang memperuntukkan bahawa suatu akaun dagangan mesti dibuka atas nama pemilik benefisial atau penama yang diberi kuasa. Hasil siasatan pihak SC tidak menunjukkan berlakunya pelanggaran subseksyen 25(4) Akta 453 berkenaan dengan pengendalian dan pendaftaran akaun dagangan milik Tan Sri Dato' Sri Haji Azam bin Baki.

2. Buat masa ini, tidak wujudnya keterangan atau asas untuk mengesyaki bahawa pemilikan saham atau pengendalian akaun dagangan Tan Sri Dato' Sri Haji Azam bin Baki melibatkan unsur rasuah yang memerlukan siasatan PDRM. Pihak PDRM, dalam apa jua keadaan, menjalankan siasatan berdasarkan maklumat yang mendedahkan berlakunya suatu kesalahan dan bukannya berdasarkan arahan Peguam Negara atau mana-mana pihak.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN SU KEONG SIONG
[KAMPAR]**

SOALAN:

minta **PERDANA MENTERI** menyatakan :-

- a) statistik lantikan dan bilangan Jurubahasa (LA29) yang sedang berkhidmat di semua hierarki mahkamah; dan
- b) berapakah penjawat Jurubahasa LA29 yang dilantik daripada LA19 melalui pertukaran lantik Pekeliling Perkhidmatan Bilangan 1 Tahun 2016, Rasionalisasi Skim Perkhidmatan Bagi Perkhidmatan Awam Persekutuan di bawah Sistem Saraan Malaysia.

JAWAPAN

**DI JAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

1. Berdasarkan status pengisian perjawatan di dalam Sistem HRMIS Jabatan Perkhidmatan Awam sehingga 5 Julai 2022, statistik Jurubahasa Gred LA29 mengikut penempatan semasa pegawai adalah seperti berikut:

Agensi	Jumlah Jurubahasa (LA29)
Pejabat Ketua Pendaftar Mahkamah Persekutuan	259
Jabatan Tenaga Kerja Semenanjung Malaysia	14
Jabatan Tenaga Kerja Sabah	3
Jabatan Tenaga Kerja Sarawak	3
Mahkamah Perusahaan Malaysia	8
Kementerian Perumahan Dan Kerajaan Tempatan	4
Jabatan Kehakiman Syariah Negeri Kedah	1
Mahkamah Syariah Negeri Melaka	1
Kementerian Wilayah Persekutuan	1
	294

2. Bilangan Jurubahasa Gred LA29 yang dilantik daripada Gred LA19 melalui pertukaran pelantikan di bawah Pekeliling Perkhidmatan Bilangan 1 Tahun 2016 adalah seramai 241 orang.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN SU KEONG SIONG [KAMPAR]

SOALAN:

TUAN SU KEONG SIONG [KAMPAR] minta **PERDANA MENTERI** menyatakan adakah Kerajaan bercadang untuk mengkaji semula bayaran Insentif Khas Jabatan yang diberikan kepada penjawat awam Jabatan Perhilitan.

JAWAPAN

**DI JAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

1. Pada masa kini pegawai di Jabatan Perhilitan dibayar Bayaran Insentif Perkhidmatan Perhilitan berdasarkan tugas-tugas yang terlibat secara langsung dalam menguruskan dan menguatkuasakan undang-undang hidupan liar. Jabatan Perkhidmatan Awam (JPA) sentiasa mengkaji keperluan eluan secara keseluruhan yang diterima oleh penjawat awam di seluruh negara dari semasa ke semasa tertakluk kepada kedudukan kewangan negara.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN SU KEONG SIONG [KAMPAR]

SOALAN

TUAN SU KEONG SIONG minta **MENTERI KESIHATAN** menyatakan apakah rancangan Kementerian untuk memuktamadkan lokasi tapak untuk pembinaan Hospital Daerah Kampar yang telah lama tertangguh. Bilakah pembinaan Hospital Daerah Kampar yang baru tersebut akan bermula.

JAWAPAN

Tuan Yang di-Pertua,

1. Untuk makluman Yang Berhormat Kampar, sehingga kini Kementerian Kesihatan Malaysia (KKM) masih belum dapat memuktamadkan tapak cadangan bagi pembinaan Hospital Kampar yang baharu. Tapak-tapak yang dicadangkan sebelum ini tidak sesuai untuk dibangunkan projek berkenaan kerana merupakan bekas tanah lombong yang berpaya dan berpasir yang akan memberikan implikasi yang besar kepada kos pembinaan dan penyenggaraan kelak.
2. KKM telah memohon kerjasama Kerajaan Negeri Perak bagi membantu mengenal pasti tapak yang sesuai dan akan mengemukakan permohonan bagi pelaksanaan projek ini di bawah *Rolling Plan* akan datang selepas urusan pemilihan tapak dan pemilikan tanah selesai bergantung kepada keperluan pada masa tersebut.
3. Untuk makluman, Hospital Kampar sedia ada mempunyai kapasiti sebanyak 68 katil. *Bed Occupancy Rate* (BOR) di Hospital Kampar sedia

SOALAN NO. 466

ada bagi bulan Januari hingga Mac 2022 adalah rendah iaitu hanya 52.7%.

4. Hospital Kampar ini merupakan salah satu hospital atau komponen dalam Hospital Kluster Ipoh dengan Hospital Raja Permaisuri Bainun (Hospital Berpakar Major) sebagai *Lead Hospital*. Susulan penubuhan Hospital Kluster ini, liputan perkhidmatan kepakaran di Hospital Kampar telah dipertingkatkan secara berfasa melalui kehadiran pakar pesakit-pesakit wad dan di klinik pakar mengikut ketetapan jadual.

5. Sehubungan itu, keperluan pembinaan Hospital Kampar yang baharu akan diteliti semula. Dalam masa yang sama, KKM akan meneruskan usaha untuk mendapatkan tapak yang sesuai sebagai persediaan sekiranya terdapat keperluan untuk hospital baharu dibina.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN SU KEONG SIONG [KAMPAR]

SOALAN

TUAN SU KEONG SIONG [KAMPAR] minta **MENTERI PELANCONGAN, SENI DAN BUDAYA** menyatakan jumlah peruntukan yang disalurkan untuk mempromosi Lembah Kinta National Geopark yang berpotensi untuk menjadi satu produk pelancongan yang unik dan baharu.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa berusaha membuat perancangan dan melaksanakan inisiatif untuk merancakkan lagi industri pelancongan negara. Melalui Tourism Malaysia, pelbagai bentuk promosi dijalankan bagi terus mengetengahkan destinasi-destinasi serta produk-produk pelancongan yang ada di seluruh negara.
2. Bagi Lembah Kinta National Geopark, Tourism Malaysia sentiasa menjalinkan kerjasama rapat dengan badan pelancongan Negeri Perak iaitu Tourism Perak dalam mempromosikan produk tersebut di peringkat domestik mahupun antarabangsa. Pelbagai promosi telah dilaksanakan oleh Tourism Malaysia di peringkat domestik dalam usaha untuk mengetengahkan produk-produk pelancongan yang terdapat di dalam gugusan Lembah Kinta National Geopark. Antaranya ialah:
 - (i) bekerjasama dengan syarikat pengendalian pelancongan bagi membangunkan pakej produk-produk di bawah Lembah Kinta National Geopark seperti eksplorasi Gua Tempurung dan perkhemahan serta *water rafting* Jeram Sungai Kampar. Antaranya adalah Pakej Cuti Penjawat Awam dan Pesara Kerajaan sempena kempen Cuti-Cuti Malaysia;
 - (ii) penyertaan dalam pameran ‘MATTA Fair’ di mana Pavilion Tourism Malaysia dijadikan sebagai pusat penjualan pakej-pakej percutian domestik, termasuk Lembah Kinta National Park oleh agensi-agensi pelancongan tempatan;
 - (iii) menganjurkan program Jom Cuti-Cuti Malaysia dalam usaha meningkatkan penebusan diskau, baucar dan rebat di bawah Pelan Pemulihan Pelancongan 2022 yang merupakan kesinambungan daripada Pakej Rangsangan Ekonomi (PRE 1.0). Dalam program ini, penggiat-penggiat industri tempatan dijemput untuk mengambil bahagian bagi menawarkan pakej percutian, tambang dan tiket masuk pada harga menarik

SOALAN NO : 467

melibatkan pengusaha produk, agensi pelancongan, hotel, taman tema dan syarikat pengangkutan. Program sebanyak lapan (8) siri ini telah dilancarkan di AEON Mall Kinta Valley pada 27-29 Mei 2022 dan siri terakhir akan berlangsung pada 25-27 November 2022.

3. Di peringkat antarabangsa pula, Tourism Malaysia turut memberi peluang kepada Tourism Perak selaku badan pelancongan negeri bagi mempromosi dan mempakejkan produk-produk pelancongan di Perak termasuk Lembah Kinta National Geopark kepada operator pelancongan dan ejen pelancongan di peringkat antarabangsa melalui penyertaan di *Travel & Trade Show* peringkat antarabangsa seperti *World Travel Mart* (WTM) London, *International Tourismus Bourse* (ITB) Berlin, *Arabian Travel Mart* (ATM) Dubai, *Asean Tourism Forum* (ATF) dan sebagainya.
4. Tourism Malaysia turut bekerjasama dengan penggiat industri tempatan untuk membangunkan pakej pelancongan yang merangkumi aktiviti seperti eksplorasi gua, ekspedisi pendakian hutan dan gunung bagi menarik minat dan kehadiran penggemar aktiviti-aktiviti tersebut di kalangan warga negara mahupun antarabangsa.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN SU KEONG SIONG [KAMPAR]

TARIKH : JULAI-OGOS 2022

SOALAN

TUAN SU KEONG SIONG [KAMPAR] minta **MENTERI PENGANGKUTAN** menyatakan jumlah peruntukan disalurkan untuk memperkenalkan Sistem Nombor Giliran dan Temujanji Bersepadu JPJ (JPJeQ) sebagai penambah baik sistem penggiliran sedia ada. Apakah tahap keberkesanan dalam perlaksanaan sistem JPJeQ ini.

JAWAPAN

Tuan Yang Di Pertua,

1. Sistem Aplikasi Mudah Alih Temujanji dan Nombor Giliran JPJ (JPJeQ) merupakan sistem yang dibangunkan menggunakan kepakaran dalaman (*in-house*) Jabatan Pengangkutan Jalan Malaysia (JPJ).
2. JPJ telah memperuntukkan kos sebanyak RM391,476.72 bagi perolehan perkakasan bagi pelaksanaan sistem ini. Perolehan tersebut adalah bagi Perkhidmatan Sewa Beli Peralatan Paparan dan Peranti untuk Pengenalan dan Pelaksanaan Sistem JPJeQ Jabatan Pengangkutan Jalan Malaysia Secara Berfasa Untuk Tempoh 4 Tahun (Disember 2021 hingga November 2025).
3. Skop projek ini merangkumi pemasangan, konfigurasi, penyelenggaraan dan perkhidmatan sewaan peralatan paparan dan peranti JPJeQ bagi tempoh bagi tempoh tersebut.
4. Sebanyak 97 cawangan JPJ (JPJ Negeri, Cawangan dan UTC) di seluruh Malaysia akan menggunakan Sistem JPJeQ ini (Modul Nombor Giliran) sepenuhnya pada suku ketiga tahun 2023.
5. Aplikasi JPJeQ ini merupakan aplikasi mudah alih yang yang dapat memudahkan pelanggan bagi fungsi-fungsi berikut:
 - i. Membuat pilihan cawangan JPJ yang tidak ramai pelanggan;
 - ii. Menggunakan kod QR untuk mendapatkan nombor giliran;
 - iii. Mendapatkan nombor giliran secara manual bagi yang tidak mempunyai telefon pintar;
 - iv. Menerima notifikasi di telefon pintar mereka apabila masa giliran telah hampir tiba;

SOALAN NO: 468

- v. Mesra Orang Kelainan Upaya (OKU), warga emas, dan berkeperluan khas; dan
 - vi. Mengamalkan norma baharu COVID-19 yang berorientasikan pendigitalan bagi mengelakkan 3C's (*Crowded, Confined, Close*) iaitu mengelakkan kawasan sesak dan sempit serta bersempang atau bertutur dalam jarak yang dekat.
6. Dengan adanya Sistem JPJeQ ini, pelanggan JPJ yang mempunyai urus niaga di kaunter JPJ dapat merancang masa untuk berurus dengan lebih baik termasuk pelanggan boleh menyelesaikan urusan lain terlebih dahulu memandangkan notifikasi nombor giliran akan diterima melalui telefon pintar apabila giliran pelanggan akan tiba. Ini juga secara tidak langsung dapat mengelakkan kawasan sekitar kaunter JPJ menjadi sesak dengan orang ramai.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : TUAN SYED IBRAHIM BIN SYED NOH
(LEDANG)**

SOALAN

TUAN SYED IBRAHIM BIN SYED NOH (LEDANG) minta MENTERI PEMBANGUNAN WANITA, KELUARGA DAN MASYARAKAT menyatakan:

- (a) statistik jenayah gangguan seksual dalam kalangan pelajar bagi tahun 2021 hingga kini; dan
- (b) punca yang dikenal pasti dan langkah secara terus kepada pelajar-pelajar yang dilaksanakan oleh Kementerian bagi menangani isu ini.

JAWAPAN

Tuan Yang di-Pertua,

Merujuk kepada data yang telah dikongsikan oleh Polis Diraja Malaysia (PDRM), statistik jenayah gangguan seksual yang melibatkan individu berumur bawah 18 tahun bagi tahun 2021 sehingga Mac 2022 adalah berjumlah 72 kes. Kementerian Pengajian Tinggi (KPT) turut memaklumkan bagi tahun 2021, satu kes telah dilaporkan di bawah Seksyen 209 Kanun Keseksaan dan Seksyen 233 Akta Komunikasi Multimedia.

Perlakuan gangguan seksual tidak wajar dianggap kecil, remeh dan tidak penting kerana ia memberikan kesan negatif terutamanya kepada psikologi

mangsa seperti trauma, fobia, takut dan seterusnya menjelaskan rutin harian, produktiviti, kesejahteraan dan kehidupan mangsa secara keseluruhan.

Perkhidmatan Talian Kasih 15999 adalah platform penghubung antara kumpulan sasar dan Kementerian bagi tujuan pertanyaan, aduan dan permohonan bantuan yang turut merangkumi aspek seperti kaunseling, perlindungan dan kebajikan termasuk aduan gangguan seksual.

Pada masa yang sama, Jabatan Pembangunan Wanita (JPW) giat mengadakan program-program untuk meningkatkan kesedaran masyarakat tentang gangguan seksual supaya dapat mengelakkan perlakuan tersebut daripada terus berleluasa sama ada secara fizikal ataupun visual. Program-program tersebut adalah perkhidmatan kaunseling, psikopendidikan melalui *DeStress Clinic*, Klinik Undang-Undang, Wanita Anti Jenayah dan Sukarelawan Skuad Waja. Sebanyak 437 orang pelajar IPT yang telah menyertai Sukarelawan Skuad Waja.

Selain daripada itu, Kementerian Pendidikan Malaysia (KPM) juga giat menjalankan program-program pencegahan isu gangguan seksual di sekolah. KPM telah membangunkan Modul Intervensi Jenayah Seksual Kanak-Kanak di Sekolah (IHSAN) melalui perkhidmatan bimbingan dan kaunseling. Modul ini antara lain memberi pemahaman serta meningkatkan kesedaran murid berkaitan jenayah seksual.

Program kesedaran berterusan dilaksanakan oleh KPM dengan kerjasama agensi kerajaan atau bukan kerajaan dalam menyebarluaskan maklumat psiko-pendidikan, kesihatan reproduktif dan ancaman gangguan seksual. Selain itu, Pegawai Perhubungan Sekolah (PPS) dari Polis Diraja Malaysia (PDRM) yang ditempatkan di semua sekolah KPM, turut memainkan peranan untuk memastikan keselamatan murid. Ini termasuk salah laku jenayah seperti gangguan seksual dan masalah disiplin. PPS mengadakan lawatan ke sekolah sekurang-kurangnya dua (2) kali sebulan bagi memberi ceramah berkaitan pencegahan jenayah kepada murid dan juga sebaran maklumat di papan kenyataan PPS yang disediakan di semua sekolah.

SOALAN NO : 469

Berdasarkan peraturan sedia ada, murid hendaklah melaporkan gangguan seksual kepada Pengetua / Guru Besar (PGB) agar pihak sekolah dapat mengambil tindakan segera menangani isu tersebut. Laporan boleh dibuat terus kepada PGB atau melalui peti aduan murid atau guru yang dipercayai oleh murid. Pihak sekolah atau ibu bapa / penjaga boleh melaporkan kes gangguan seksual kepada pihak PDRM agar siasatan dan tindakan sewajarnya dapat diambil.

Kementerian Pengajian Tinggi juga telah mewujudkan langkah kawalan dan pencegahan di mana sekiranya pelaku adalah pelajar IPT, Seksyen 15D, Akta Universiti dan Kolej Universiti 1971 (Akta 30) atau AUKU akan dirujuk. Seksyen 15D ini memperuntukkan bahawa sekiranya seorang pelajar dituduh dengan kesalahan boleh daftar, maka dia boleh, mengikut budi bicara Naib Canselor digantung daripada menjadi seorang pelajar, dilarang berada dalam atau memasuki kampus selagi prosiding belum selesai, serta boleh dikenakan tindakan tatatertib.

Sekiranya kes gangguan seksual ini melibatkan kakitangan IPTA pula, tindakan tatatertib boleh dikenakan mengikut Peraturan 3(2)(d), Jadual Kedua, Akta Badan-badan Berkanun (Tatatertib dan Surcaj) 2000 (Akta 605). Peraturan ini antara lain menyebut bahawa seseorang pegawai tidak boleh berkelakuan dengan sedemikian cara sehingga memburukkan atau mencemarkan nama badan berkanun.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

SOALAN

TUAN SYED IBRAHIM BIN SYED NOH (LEDANG) minta MENTERI DALAM NEGERI menyatakan :-

- (a) jumlah kapasiti setiap penjara dan jumlah banduan serta tahanan yang dikurung setakat 30 Jun 2022; dan
 - (b) statistik kes-kes kematian dalam lokap polis dan penjara bagi tahun 2021 sehingga kini.

JAWAPAN

Tuan Yang Di Pertua,

- a. Untuk makluman Ahli Yang Berhormat, berdasarkan kepada statistik Jabatan Penjara Malaysia pada 5 Julai 2022, jumlah penghuni yang dihukum dan ditahan di seluruh institusi penjara Malaysia adalah seramai 73,100 orang berbanding kapasiti sebenar iaitu 61,682 orang. Jumlah ini melebihi kapasiti sebanyak 15.62%. Daripada jumlah keseluruhan tersebut seramai 60,417 (82.65%) adalah penghuni warganegara, manakala 12,683 (17.35%) lagi adalah penghuni warganegara asing.

- b. Untuk makluman, berdasarkan statistik Jabatan Penjara Malaysia bagi tahun 2021 sehingga 5 Julai 2022, seramai 693 orang penghuni penjara telah meninggal dunia di hospital semasa penghuni berkaitan menerima rawatan lanjut.

Sebanyak 663 (95.67%) kematian dilaporkan adalah disebabkan penyakit berkaitan jantung, darah tinggi, paru-paru, tibi, asma, kanser dan lain-lain. Manakala seramai 24 (3.46%) kematian pula adalah disebabkan jangkitan HIV. Enam (6) (0.87%) daripadanya pula telah dilaporkan mati disebabkan gantung diri dan kejadian luar biasa.

Manakala berdasarkan statistik Polis Diraja Malaysia (PDRM), sehingga 30 Jun 2022 kes kematian tahanan di dalam tahanan/lokap polis pula adalah seramai 65 orang.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

**DARIPADA : YB TUAN SYED IBRAHIM BIN SYED NOH
(LEDANG)**

SOALAN

TUAN SYED IBRAHIM BIN SYED NOH [LEDANG] minta **MENTERI KANAN KERJA RAYA** menyatakan langkah dan dasar yang digariskan oleh Kerajaan dalam menangani krisis harga barang binaan terutamanya bagi sektor perumahan dan infrastruktur awam.

JAWAPAN

Tuan Yang Di-Pertua,

Sememangnya sektor pembinaan mengalami masalah kenaikan harga bahan binaan terutamanya semenjak tahun 2021. Pihak Kementerian Kerja Raya (KKR) bersama agensi dibawahnya sememangnya melaksanakan pemantauan harga bahan binaan secara berterusan. Kenaikan harga bahan binaan ini merupakan isu global yang dialami di seluruh dunia. Pandemik yang melanda telah menjelaskan keseluruhan rantaian bekalan termasuk bekalan bagi sektor pembinaan dan ini telah menyumbang kepada kenaikan harga bahan binaan.

Tuan Yang Di-Pertua,

Berdasarkan pemantauan harga bahan binana utama seperti besi tetulang, harga bahan ini telah meningkat sehingga 48% pada Mei 2021 berbanding Oktober 2020 (RM2,440 kepada RM3,605 per tan). Pada Disember 2021, harga bahan ini turun sebanyak 9% kepada sekitar RM3,295 per tan. Rekod terkini menunjukkan harga besi tetulang kembali meningkat pada minggu pertama Julai 2022 sebanyak 2% kepada sekitar RM3,350 per tan.

Secara umumnya, harga purata bahan binaan lain bagi tempoh yang sama turut menunjukkan peningkatan. Harga simen meningkat sebanyak 26% (RM13.00 kepada RM16.35 per 50kg beg); harga bitumen gred 60/70 meningkat sebanyak 49% (RM1,730.00 kepada RM2,570.00 per tan); harga pasir sungai meningkat sebanyak 31% (RM30.00 kepada RM35.00 per tan); harga konkrit siap bancuh meningkat sebanyak 24% (RM206.00 kepada RM255.00 per m³); harga batu agregat meningkat sebanyak 14% (RM36.00 kepada RM41.00 per tan).

Antara **tindakan yang telah diambil** adalah seperti berikut:

1. KKR bersama-sama agensi di bawahnya sentiasa mengadakan kerjasama dengan agensi Kerajaan yang berkaitan dan pihak industri seperti pengeluar/ pengedar bahan binaan utama dan wakil kontraktor dalam memantau pergerakan harga bahan binaan. Beberapa sesi perbincangan dilaksanakan bagi mengenalpasti isu, punca dan cabaran yang dihadapi serta membincangkan penyelesaian ke atas cabaran berkenaan.
2. Daripada sesi perbincangan yang telah diadakan, secara umumnya, kenaikan harga bahan binaan dipengaruhi oleh harga global terutamanya bagi bahan besi tetulang; kekurangan dan kenaikan harga bahan mentah; kenaikan harga bahan api dan sumber tenaga asli; serta kos pengangkutan dan logistik. Selain daripada itu, kenaikan harga yang dialami oleh kontraktor kecil disebabkan oleh pembelian dalam kuantiti kecil serta terma kredit yang panjang.
3. Pihak KKR turut mengangkat isu, cabaran dan cadangan penyelesaian untuk dibincangkan bersama pakar dan badan penasihat berkaitan di peringkat lebih tinggi seperti di Majlis Tindakan Ekonomi (MTE) dan Majlis Pemulihan Negara (MPN).
4. Hasil daripada sesi-sesi bersama industri pembinaan, cadangan menguatkuaskan semula peruntukan Syarat Perubahan Harga (*Variation of Price – VOP*) telah dikemukakan kepada Kerajaan. Pelaksanaan Pekeliling Baharu PK2.4 Pelaksanaan Syarat Perubahan Harga (*Variation of Price – VOP*) di dalam kontrak kerja telah dilaksanakan pada 15 Julai 2021 dan berkuatkuasa mulai 1 Januari 2021 sehingga 31 Disember 2021. KKR beserta agensi di bawahnya telah memohon agar pekeliling ini ditambah baik agar capaian bantuan/ manfaat lebih banyak dirasai oleh pihak industri bagi meringankan beban pelaksanaan projek pembinaan. Pindaan terkini adalah pada 1 Mei 2022 menyatakan, penguatkuasaan pekeliling dilanjutkan sehingga 30 Jun 2022. Untuk meringankan lagi bebanan kewangan pemain industri binaan, Kerajaan sedang menimbang

untuk melanjutkan pelaksanaan VOP bagi kontrak kerja Kerajaan ke 30 Julai 2023.

5. KKR melalui CIDB sentiasa melaksanakan aktiviti pemantauan harga purata bulanan semenjak tahun 2002. Data harga diterbitkan melalui Portal National Construction Cost Centre (N3C) di alamat n3c.cidb.gov.my. Penerbitan ini membolehkan pemantauan dibuat terhadap trend harga. Harga bahan binaan ini dikumpulkan melalui kerjasama dengan beberapa persatuan berkaitan pembinaan yang diperolehi daripada kontraktor, pembekal dan peruncit.

Tuan Yang Di-Pertua,

Penetapan harga bahan juga adalah berdasarkan penawaran dan permintaan di pasaran terbuka. KKR tidak mempunyai kuasa dalam mengawal harga bahan binaan ini. Selain itu, tiada keperluan AP ditetapkan bagi mengimport bahan binaan besi sejak tahun 2008, tiada duti import dikenakan, selain prosedur import besi yang minima. Kerajaan akan mengambil tindakan undang-undang terhadap pemain industri yang melaksanakan urusniaga dengan tidak mengikuti etika atau mengambil keuntungan yang berlebihan dengan cara yang tidak betul sehingga menyebabkan kenaikan harga.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : YB TUAN SYED IBRAHIM BIN SYED
NOH [LEDANG]**

SOALAN:

Minta **PERDANA MENTERI** menyatakan secara terperinci impak positif yang wujud daripada pembentukan Kabinet yang besar dan pelantikan penasihat-penasihat Perdana Menteri dalam Kerajaan kini.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, Kerajaan pada masa ini sentiasa melaksanakan dasar-dasar yang memberikan impak positif kepada pembangunan negara serta kepentingan rakyat.
2. Kerajaan telah dan sedang melaksanakan dasar-dasar baharu serta penambahbaikan tindakan yang perlu disegerakan untuk memastikan keutamaan diberikan kepada rakyat. Antara lain tindakan yang menjadi agenda utama Kerajaan ialah menangani impak ekonomi global melalui kawalan terhadap kenaikan inflasi, harga barang serta komoditi.
3. Untuk makluman Ahli Yang Berhormat, Penasihat Khas bertanggungjawab untuk memberikan pandangan dan menasihati YAB Perdana Menteri dalam isu-isu berkaitan dalam menambah baik serta memperkasakan dasar-dasar sedia ada yang telah diperkenalkan oleh Kerajaan. Hasil kerja dan laporan oleh Penasihat-Penasihat Khas dilaporkan terus kepada YAB Perdana Menteri.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN

**DARIPADA : TUAN SYED IBRAHIM BIN SYED NOH
[LEDANG]**

SOALAN

Minta **MENTERI BELIA DAN SUKAN** menyatakan:-

- (a) jumlah peruntukan yang diguna pakai bagi menyelenggara dan membaik pulih infrastruktur sukan di bawah seliaan Kerajaan, dan
- (b) kesiapsiagaan infrastruktur sukan negara dalam mengendalikan acara dan kejohanan sukan bertaraf nasional dan antarabangsa.

JAWAPAN A

Tan Sri Yang Di-Pertua,

(a)

Untuk makluman Ahli Yang Berhormat, Kementerian Belia dan Sukan telah memperuntukkan sebanyak RM82.25 juta bagi kerja-kerja membaik pulih dan naik taraf infrastruktur sukan di bawah *Rolling Plan* Kedua (RP2) Tahun 2022 Rancangan Malaysia Kedua Belas (RMKe-12).

(b)

Berhubung dengan pertanyaan Yang Berhormat mengenai kesiapsiagaan infrastruktur sukan negara dalam mengendalikan acara dan kejohanan sukan bertaraf nasional dan antarabangsa, sukacita Kementerian ini memaklumkan bahawa semua infrastruktur dan fasiliti

sukan di bawah seliaan Perbadanan Stadium Malaysia (PSM) mematuhi standard piawaian penganjuran acara sukan yang telah ditetapkan oleh Badan Sukan Antarabangsa. Fasiliti dan kemudahan sukan di bawah seliaan PSM dan Majlis Sukan Negara (MSN) juga telah mendapat pengiktirafan daripada Badan Sukan Antarabangsa bagi memastikan acara sukan diperingkat antarabangsa dapat dianjurkan. Antara pengiktirafan yang diterima oleh Badan Sukan Antarabangsa adalah :

- i. IAAF Class 1 Athletics Facility Certificate bagi trek larian di Stadium Nasional Bukit Jalil;
- ii. FIH Quality Category 1 bagi artificial turf hoki di Stadium Hoki Nasional 1 dan 2;
- iii. ISAF Youth World Championship 2015 (Antarabangsa/Remaja), Optimisti World Championship 2011 (Antarabangsa), dan Langkawi International Regatta (Every Year/Antarabangsa) di Pusat Pelayaran Langkawi; dan
- iv. SEA Games 2017 (Asia Tenggara), dan Asian Track Cyling Championship 2018 (Asia) di Velodrom Nilai (Kategori 1 diiktiraf oleh UCI)

Selain itu, bagi kemudahan sukan lain, semua kemudahan menggunakan produk yang telah diiktiraf seperti *World Squash Federation (WSF)* untuk kemudahan sukan skuasy, *International Tennis Federation (ITF)* untuk sukan tenis, *Federation Internationale De Natation (FINA)* untuk sukan renang, *World Bowls* untuk sukan boling padang dan lain-lain lagi.

Sebagai pengurusan yang menguruskan fasiliti dan kemudahan sukan bertaraf antarabangsa, Perbadanan Stadium Malaysia juga akan memastikan setiap fasiliti dan kemudahan berada dalam tahap yang memuaskan, sentiasa tersedia untuk digunakan pada bila-bila, mematuhi piawaian dan mendapat pengiktirafan badan sukan antarabangsa.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
**DARIPADA : TUAN SYED SADDIQ BIN SYED ABDUL
RAHMAN [MUAR]**

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KEWANGAN** menyatakan berapa banyak rampasan rokok yang dijual kurang daripada harga yang ditetapkan yang dijalankan sepanjang tahun 2022. Ini memandangkan rokok haram semakin banyak di pasaran dan dianggarkan setiap 6 daripada 10 kotak rokok yang dijual adalah rokok haram.

JAWAPAN

Tuan Yang di-Pertua,

Untuk makluman Ahli Yang Berhormat, jumlah rampasan rokok tidak sah yang diperoleh Jabatan Kastam Diraja Malaysia (atau JKDM) bagi tahun 2022 sehingga Mei adalah sebanyak 1,408 kes yang keseluruhannya bernilai 7.27 juta ringgit dan melibatkan cukai sebanyak 61.43 juta ringgit. Rampasan ini hanya melibatkan rokok yang tidak mematuhi kaedah pengimportan atau rokok seludup yang tidak membayar cukai kepada JKDM. Penguatkuasaan harga jualan minimum 12 ringgit bagi sepaket rokok 20 batang adalah di bawah Peraturan-Peraturan Kawalan Hasil Tembakau (Pindaan) 2020 yang dilaksanakan oleh Kementerian Kesihatan Malaysia.

Kerajaan sentiasa memandang serius isu penyeludupan dan penjualan rokok tidak sah yang berleluasa di pasaran memandangkan kegiatan ini telah menyebabkan ketirisan hasil cukai yang tinggi setiap tahun. Dalam usaha membendung isu ini, Kerajaan melalui JKDM sentiasa mempergiatkan kawalan dan tindakan penguatkuasaan melalui pelbagai aktiviti serbuan, rondaan darat dan air, sekatan jalan raya, pemeriksaan kapal, bot atau kenderaan, di samping melakukan pelbagai Operasi Khas dan Operasi Outlet yang menjual rokok. JKDM juga melaksanakan operasi bersepadu melibatkan kerjasama dari pelbagai agensi penguatkuasaan dan keselamatan negara dalam membanteras aktiviti penyeludupan rokok.

Dari aspek percukaian, Kerajaan akan terus menjalankan kajian dari semasa ke semasa berhubung kadar cukai rokok dan produk tembakau, selaras dengan amalan di peringkat antarabangsa untuk tidak menggalakkan penggunaan produk yang mendatangkan kemudaratkan kepada pengguna. Produk tersebut perlu dikenakan cukai yang tinggi bagi mengurangkan kebolehdapatan di pasaran. Namun sebarang kajian ke atas kenaikan kadar cukai rokok perlu turut mengambil kira kesan perubahan harga rokok terhadap isu penyeludupan rokok tidak sah di pasaran yang masih sukar ditangani.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : TUAN SYED SADDIQ BIN SYED ABDUL RAHMAN [MUAR]

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KOMUNIKASI DAN MULTIMEDIA** menyatakan jangka masa yang diperlukan oleh Suruhanjaya Komunikasi dan Multimedia (SKMM) untuk menaik taraf liputan komunikasi di seluruh Muar bagi mendapatkan jaringan 4G dan 5G. Berapa nilai anggaran kos bagi setiap pencawang yang diperlukan dan jumlah kos keseluruhan bagi semua pencawang selain berapa pencawang yang diperlukan agar dapat menampung keperluan semua pengguna di Muar.

JAWAPAN

Tuan Yang di-Pertua,

Untuk makluman Ahli Yang Berhormat, bagi meningkatkan kualiti dan liputan jalur lebar mudah alih 4G di Johor dan Parlimen Muar melalui Pelan Jalinan Digital Negara (JENDELA) Fasa 1, setakat suku pertama 2022 adalah seperti berikut:

Inisiatif	Tapak Menara Baharu		Naik Taraf Stesen Pemancar	
	Negeri/ Parlimen	Siap	Dalam Pelaksanaan	Siap
Johor	114	115	3,884	210
Muar	1	2	92	4

Bagi Parlimen Muar, nilai anggaran kos bagi setiap tapak menara baharu adalah RM1.5 juta dan anggaran kos keseluruhan sebanyak RM4.5 juta. Manakala bagi menaik taraf stesen pemancar kepada 4G pula, sebanyak RM500 ribu bagi setiap stesen pemancar dengan anggaran kos keseluruhan sebanyak RM10.8 juta di Parlimen Muar.

Peratusan liputan 4G di kawasan berpenduduk di Parlimen Muar telah meningkat kepada 99.37% berbanding 94.36% sebelum pelaksanaan JENDELA. Kesemua projek ini masih dalam peringkat pelaksanaan dan dijangka akan siap secara berperingkat menjelang penghujung 2023.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN SYED SADDIQ BIN SYED ABDUL
RAHMAN [MUAR]**

SOALAN

YB TUAN SYED SADDIQ BIN SYED ABDUL [MUAR] minta **MENTERI PERUMAHAN DAN KERAJAAN TEMPATAN** menyatakan berapa banyak jumlah projek perumahan dan bilangan rumah yang masih kosong (vacant) dan tidak terjual di seluruh Malaysia. Laporan NAPIC membentangkan bahawa terdapat sebanyak 36,863 unit harta tanah perumahan (residential property) tidak terjual atau overhang pada tahun 2021. Apakah rancangan Kerajaan untuk menangani masalah jumlah dan bilangan rumah yang mahal dan tidak terjual, khususnya di negeri-negeri yang dirujuk dan membangunkan projek perumahan yang berpatutan memandangkan peratusan harta tanah yang tidak terjual adalah yang bernilai RM300,000 dan ke bawah pada tahun 2021.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan data dari Pusat Maklumat Harta Tanah Negara (NAPIC), bagi data awalan suku pertama tahun 2022 (Q1^P, 2022) terdapat sebanyak 35,592 unit rumah siap dibina tidak terjual yang bernilai RM22.45 billion. Ini menunjukkan terdapat sedikit penurunan berbanding suku keempat tahun 2021 (Q4, 2021) yang mencatatkan sebanyak 36,863 unit rumah siap dibina tidak terjual bernilai RM22.79 billion.

Untuk makluman Ahli Yang Berhormat juga, Kementerian Perumahan dan Kerajaan Tempatan (KPKT) memandang serius isu rumah kediaman yang tidak terjual. Isu ini telah dibincangkan dalam Mesyuarat Majlis Perumahan Mampu Milik Negara (MPMMN) yang dipengerusikan oleh YAB Perdana Menteri pada 10 Februari 2022. Mesyuarat ini turut dihadiri oleh Kerajaan Negeri dan wakil pihak pemaju. Antara punca lambakan rumah tidak terjual ini berlaku adalah ekoran daripada penawaran perumahan yang tidak sepadan dengan permintaan di sesebuah lokaliti, harga rumah yang tidak sepadan dengan pendapatan isi rumah, lokasi yang kurang menarik dan lain-lain lagi.

Dengan mengambil kira punca-punca lambakan ini, KP KT sedang melaksanakan beberapa tindakan untuk menangani isu ini. Antara langkah utama yang telah diambil oleh Kementerian adalah seperti berikut:

- (i) KP KT akan memperkenalkan Indeks Harga Rumah Mampu Milik berdasarkan lokaliti. Indeks ini akan dijadikan sebagai panduan oleh Pihak Berkuasa Tempatan (PBT) dan pemaju perumahan swasta

untuk membangunkan perumahan mengikut kemampuan pembeli. Indeks ini akan dipaparkan melalui Dashboard Maklumat Rumah Mampu Milik untuk memudahkan penyedia perumahan di peringkat Persekutuan, negeri dan pemaju swasta serta rakyat untuk melihat maklumat RMM yang dinamik di bawah program KPKT;

- (ii) Kementerian juga bercadang untuk memperkenalkan peraturan/garis panduan kepada para pemaju perumahan untuk mengemukakan Kajian Kebolehlaksanaan (Feasibility Study) semasa memohon Kebenaran Merancang (KM). Hasil kajian ini dapat membantu mengelak daripada berlakunya sebarang pembangunan perumahan yang tidak sesuai dengan permintaan pasaran; dan
- (iii) pembangunan sistem Analisis Data Raya (*Big Data Analytics*; BDA) Perumahan yang akan menghimpunkan data perumahan yang komprehensif dengan objektif seperti berikut:
 - (a) membantu untuk mengetahui kedudukan pasaran perumahan harta tanah yang lebih jelas dan tepat demi pembangunan sektor harta tanah yang lestari dan efisien;
 - (b) dijadikan input bagi pembangunan platform pusat pengumpulan data harta tanah yang meliputi permintaan dan penawaran; dan
 - (c) membantu pihak Kerajaan dalam membuat keputusan di peringkat Persekutuan dan Kerajaan Negeri dalam penyediaan dasar dan perancangan perumahan negara yang lebih komprehensif.

Sekian, terima kasih.

SOALAN NO: 476

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN (BERTULIS)

**DARIPADA : TUAN SYED SADDIQ BIN SYED ABDUL
RAHMAN (MUAR)**

SOALAN

TUAN SYED SADDIQ BIN SYED ABDUL RAHMAN (MUAR) minta **MENTERI PERTANIAN DAN INDUSTRI MAKANAN** menyatakan apakah rancangan Kerajaan untuk menangani krisis makanan negara serta menjadikan Malaysia sebuah negara mandiri bekalan dan pengeluaran makanannya. Dilaporkan bahawa Bank Negara hanya dapat menampung upaya pengimportan untuk tempoh 5.5 bulan. Pada masa sama, hanya 1 juta hektar tanah sahaja digunakan untuk pengeluaran makanan. Selain itu, daripada kos keseluruhan menternak ayam adalah daripada makanan ternak yang diimport. Jelaskan :-

- (a) tempoh Malaysia dapat bertahan daripada segi simpanan dan bekalan makanan sekiranya tiada pengimportan bahan makanan dari luar negara; dan
- (b) adakah Kerajaan akan memperuntukan lebih banyak Kawasan tanah untuk pengeluaran makanan berbanding untuk sektor pembinaan dan perumahan dan pertanian lain dan adakah Kerajaan bercadang untuk perkenalkan bahan mentah lain untuk makanan ternakan seperti *industrial hemp*.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) sentiasa memantau dan memastikan bekalan makanan negara, terutamanya komoditi strategik iaitu beras, memandangkan ianya adalah makanan ruji rakyat dalam apa jua keadaan. Menerusi pewujudan stok penimbang beras yang kini sedang digandakan secara berperingkat daripada 150,000 tan metrik kepada 290,000 tan metrik menjelang tahun 2023.

Bagi menampung keperluan beras negara, Kementerian sentiasa memastikan kedudukan stok beras sentiasa melebihi purata paras keperluan kira-kira 200,000 tan metrik sebulan. Kedudukan stok beras dalam negara di peringkat kilang, borong dan runcit sentiasa pada kadar konsisten setiap masa dengan purata 400,000 hingga 500,000 tan metrik. Kementerian sentiasa memantau kedudukan stok ini secara dekat dan membuat survei stock-taking berkala pada setiap bulan bagi memastikan kedudukan stok dan bekalan dalam negara sentiasa stabil. Jika diambilkira dengan jumlah stok dagangan (trading stock), bekalan beras negara adalah stabil dan mencukupi untuk menampung keperluan domestik untuk tempoh empat hingga lima bulan.

Selain itu, terdapat juga stok padi yang sedia diproses menjadi beras di kilang-kilang dengan purata 100,000 hingga 200,000 tan metrik setiap bulan iaitu mengambil kira pengeluaran padi negara yang sentiasa berterusan melalui kawasan jelapang dan luar jelapang negara. Bagi memastikan pengeluaran padi tempatan secara berterusan, jadual penanaman di seluruh negara adalah dirancang secara bersistematik iaitu melalui pusingan kitaran antara negeri-negeri.

Bagi menampung baki keperluan yang tidak dapat ditampung oleh pengeluaran beras tempatan pula, Kerajaan mengimport sebanyak 80,000 tan metrik beras secara purata setiap bulan. Berdasarkan kepada data-data tersebut, ianya jelas membuktikan bahawa kedudukan bekalan beras negara adalah kekal stabil sepanjang masa. Malah,

ketika pandemik COVID-19 melanda dunia, bekalan beras di seluruh negara juga kekal stabil dan tidak terputus.

Pada masa yang sama, Kerajaan juga sedang melaksanakan usaha-usaha untuk merancakkan produktiviti sektor padi dan beras, antaranya:

1. meningkatkan penggunaan mekanisasi dan automasi bagi memudahkan kesemua proses kerja di sepanjang rantaian nilai;
2. mewujudkan kerjasama strategik dengan agensi kerajaan lain seperti di bawah Kementerian Sains, Teknologi dan Inovasi (MOSTI) bagi memperkenalkan teknologi terkini dalam industri di lapangan;
3. menjalinkan kerjasama dengan syarikat-syarikat teknologi swasta bagi menghasilkan teknologi yang bersesuaian untuk diaplikasikan di kawasan petani;
4. menggalakkan inovasi pertanian di kalangan petani melalui khidmat pengembangan dan latihan pertanian bagi meningkatkan produktiviti;
5. mempergiat aktiviti penyelidikan, pembangunan, pengkomersialan dan inovasi (R&D&C&I) bagi menjamin kemampuan pengeluaran beras negara dengan menghasilkan varieti/ benih berhasil tinggi dan berdaya tahan terhadap perubahan iklim serta mesra alam; dan
6. memperkuuh serta menambah baik infrastruktur, kemudahan dan fasiliti di kawasan jelapang padi juga akan dilaksanakan, terutamanya pembangunan pusat aktiviti lepas tuai.

Penyelesaian isu bekalan makanan memerlukan pendekatan holistik yang merangkumi kesemua aspek-aspek dalam nilai rantaian pertanian bermula dari penggunaan teknologi, aktiviti pertanian, penghantaran dan pengumpulan hasil, penetapan harga, pemasaran, pengeksportan dan pengimportan. Isu tanah hanya merupakan salah satu elemen dalam aspek aktiviti pertanian di mana terdapat juga unsur-

SOALAN NO : 477

unsur lain seperti tenaga kerja, faktor petani, dan kos pengeluaran serta logistik, yang perlu dipertimbangkan semasa merangkakan satu polisi pertanian.

Di samping itu, pihak MAFI sentiasa bekerjasama dengan Kerajaan Pusat dan Kerajaan Negeri untuk mengenalpasti kawasan atau tanah yang sesuai untuk mewujudkan projek pertanian baru dan memajukan projek yang sedia ada.

Manakala mengenai *industrial hemp*, komoditi tanaman tersebut masih di bawah Seksyen 6B (2) Akta Dadah Berbahaya 1952 yang memerlukan kelulusan pihak Kerajaan untuk penyelidikan, penanaman dan pemprosesan. Buat masa ini, tumpuan Kerajaan adalah memajukan industri penanaman jagung bijirin di negara kita bagi mengurangkan kebergantungan kepada import. Pada masa yang sama, pihak MAFI juga menggalakkan penghasilan alternatif protein seperti sumber protein daripada serangga seperti *black soldier fly* (BSF), alga dan “*single cell protein*”.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN SYED SADDIQ BIN SYED ABDUL RAHMAN [MUAR]

TARIKH : JULAI-OGOS 2022

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI PENGANGKUTAN** menyatakan kadar kekerapan pengangkutan awam seperti bas dan tren yang rendah. Berikutan pembukaan semula ekonomi, lebih ramai pengguna yang menaiki pengangkutan awam tetapi terpaksa menunggu lebih lama. Apakah rancangan dan langkah Kerajaan untuk :-

- (a) meningkatkan kadar kekerapan tren dan bas dan mengurangkan waktu menunggu bagi bas dan tren pada *off-peak hour* dan *peak hour*; dan
- (b) memastikan kemudahan bas dan tren tiba pada masa yang ditetapkan dan menambah jumlah bas dan tren yang beroperasi dan meningkatkan peruntukan penyelenggaraan pengangkutan awam.

JAWAPAN

Tuan Yang Di Pertua,

1. Untuk makluman Ahli Yang Berhormat, kesesakan lalu lintas diluar jangkaan dan semakin teruk semenjak pembukaan semula ekonomi, kekurangan kemudahan lorong khas untuk bas (*dedicated bus lane*) dan kadar tukar ganti pemandu bas (*attrition rate*) yang tinggi adalah faktor yang menyebabkan pengguna bas awam terpaksa menunggu bas pada tempoh yang lama bagi menggunakan perkhidmatan tersebut.
2. Walau bagaimanapun, pihak operator iaitu Rapid Bus telah mengambil langkah proaktif untuk memastikan perkara ini dapat ditangani dengan baik. Ini termasuklah dengan memastikan *Bus On The Road (BOTR)* di Lembah Klang berada pada kadar purata antara 60% sehingga 80% sehari, bersamaan dengan 500 ke 700 bas bergantung kepada permintaan pada waktu tersebut.
3. Bagi memastikan kemudahan bas tiba pada masa yang ditetapkan, Rapid Bus juga telah merangka dan melaksana sistem penguatkuasaan ketepatan masa, di mana pada tahun 2021 menyaksikan lebih 95% kadar ketepatan masa berlepas. Di samping itu, para pengguna juga boleh mendapatkan informasi bas terkini (*real-time info*) melalui aplikasi digital seperti PULSE, Google Maps, Moovit serta melalui Rapid Bus Kiosk.
4. Rapid Bus juga telah memperkenalkan sistem kod “QR” di setiap hentian bas bagi memudahkan para pengguna mengimbas dan menyemak lokasi bas semasa. Melalui inisiatif ini, aduan dan pertanyaan berkaitan lokasi bas berkurangan sebanyak 43% pada tahun 2021.
5. Selain itu, Rapid Bus juga sedang menjalankan kolaborasi bersama pihak DBKL dan JPJ bagi melaksanakan inisiatif penguatkuasaan lorong dan laluan khas bas untuk 17 laluan. Ianya bagi memastikan bas dapat tiba ke destinasi mengikut waktu yang ditetapkan dan tidak perlu tersekat di dalam aliran trafik yang tinggi.

6. Bagi pengangkutan rel, jumlah penumpang pada masa kini masih belum mencapai sasaran jumlah penumpang sebelum pandemik. Pihak Rapid Rail sentiasa memantau jumlah *trend* penumpang yang menggunakan perkhidmatan rel dan bas dari semasa ke semasa.
7. Sistem pengangkutan awam seperti LRT Laluan Ampang dan Laluan Kelana Jaya telah beroperasi sejak 1998 lagi. Tren-tren di bawah kendalian Prasarana berusia di antara 6 hingga 24 tahun yang mana ada di antara tren-tren ini telah mencapai had penyelenggaraan yang tertentu. Bagi mengatasi masalah ini, Rapid Rail sedang menjalankan Program Khas untuk penambahbaikan jangka masa pendek dan turut melakukan “*mid-life refurbishment*” bagi jangka masa panjang.
8. Seperti yang telah dilaporkan dalam kenyataan media sebelum ini, terdapat beberapa insiden telah berlaku melibatkan tren 4 gerabak (model 818) yang berpunca daripada kerosakan angkup brek dan gangguan terhadap sistem kendalian pemanduan automatik tren (ATC) yang telah menyebabkan brek kecemasan tren diaktifkan. Bagi memastikan tren selamat untuk beroperasi, pihak Rapid Rail telah mengambil keputusan untuk tidak menggunakan tren-tren yang bermasalah dan ini telah menyebabkan bilangan tren untuk operasi berkurang dengan mendadak. Bilangan tren yang berkurangan telah menyebabkan tempoh menunggu tren di stesen-stesen telah bertambah berbanding tempoh yang lebih singkat sebelum ini.
9. Pihak Rapid Rail sedang bertungkus-lumus untuk mempercepatkan proses penggantian dan penyelenggaraan sistem-sistem tren tersebut dan dianggarkan kerja-kerja tersebut akan selesai menjelang bulan November 2022. Bilangan tren akan bertambah secara beransur-ansur dan dianggarkan tempoh menunggu juga akan dipendekkan menjelang Ogos 2022.
10. Buat masa kini, ketepatan tren tiba di platfrom adalah sama seperti yang dipaparkan pada panel informasi penumpang dan aplikasi PULSE. Aplikasi ini telah dibangunkan oleh Pihak Prasarana dalam memberi keselesaan dan meningkatkan tahap keyakinan penumpang

menggunakan perkhidmatan ini. Selain itu, aplikasi ini juga sedikit sebanyak dapat membantu penumpang merancang perjalanan mereka ketika menggunakan perkhidmatan yang disediakan.

11. Pihak Rapid Rail juga dalam proses menaik taraf tren 2 gerabak ke tren 4 gerabak untuk laluan Monorel bagi memberi keselesaan kepada penumpang.

12. Bagi perkhidmatan KTMB pula, pada masa ini KTMB menghadapi kekangan untuk meningkat kekerapan tren penumpang yang melalui lembah klang berikutan keperluan untuk memberi laluan kepada kerja-kerja menaiktaraf yang giat dijalankan di laluan ini. Walau bagaimanapun, KTMB telah mengambil langkah-langkah yang perlu untuk memastikan tren beroperasi dengan cekap menepati masa seperti berikut; -

- a) Infrastruktur kereta api berada dalam keadaan yang baik bagi mengurangkan berlakunya kegagalan dan kerosakan kepada sistem sedia ada; dan
- b) Memastikan semua stokereta disenggara mengikut jadual yang telah ditetapkan untuk mengelakkan berlakunya kerosakan atau kegagalan tren semasa beroperasi.

13. Di antara langkah-langkah yang diambil oleh KTMB bagi memastikan tren tiba pada waktunya adalah seperti berikut :

- a) Semua tren beroperasi mengikut jadual yang telah ditetapkan;
- b) Memastikan stokereta sentiasa berada dalam keadaan terbaik dan tidak mengalami sebarang kerosakan semasa tren beroperasi;
- c) Memastikan landasan berada dalam keadaan baik dan selamat; dan

SOALAN NO: 478

- d) Memastikan keadaan penumpang terkawal setiap masa terutama pada waktu puncak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

**DARIPADA : TUAN TAN KOK WAI
[CHERAS]**

TARIKH : JULAI – OGOS 2022

SOALAN

TUAN TAN KOK WAI [CHERAS] minta **MENTERI PENGANGKUTAN** menyatakan status perbelanjaan, pembinaan dan tarikh siap terkini projek KVDT2 serta dengan langkah-langkah untuk menambahkan kekerapan perkhidmatan KTM Komuter.

JAWAPAN

Tuan Yang Di Pertua,

Bagi Projek KVDT Fasa 2, Syarikat Dhaya Maju-LTAT Sdn. Bhd. (DM-LTAT) telah memfailkan tindakan undang-undang terhadap Kerajaan Malaysia susulan daripada keputusan penamatan Projek KVDT Fasa 2. Kerajaan sedang dalam proses untuk mendapatkan jalan penyelesaian di antara Kerajaan dan Syarikat DM-LTAT bagi pelaksanaan Projek KVDT Fasa 2. Jumlah kos dan tempoh masa terkini akan dimuktamadkan dalam proses tersebut.

Pelantikan ICC bagi Projek KVDT Fasa 2 akan dilaksanakan dengan segera bagi memastikan projek ini dapat berjalan dengan lancar dan disiapkan mengikut tempoh masa, kos, skop kerja dan spesifikasi yang telah ditetapkan.

KTMB telah mengambil langkah-langkah yang perlu untuk memastikan tren beroperasi dengan cekap dan menepati masa seperti berikut :

- a) Memastikan infrastruktur dan sistem kereta api berada dalam keadaan yang baik bagi mengelakkan berlakunya kegagalan yang akan mengganggu operasi tren;
- b) Memastikan semua stokereta, infrastruktur dan sistem kereta api disenggara mengikut jadual yang telah ditetapkan untuk mengelakkkan berlakunya kerosakan atau kegagalan tren semasa beroperasi.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATIN PADUKA DR. TAN YEE KEW
(WANGSA MAJU)**

SOALAN

DATIN PADUKA DR. TAN YEE KEW (WANGSA MAJU) minta **MENTERI WILAYAH PERSEKUTUAN** menyatakan jumlah kutipan kompaun atau saman pelbagai kesalahan yang diperoleh oleh Dewan Bandaraya Kuala Lumpur (DBKL) secara tahunan sejak 2019 dan bagaimanakah hasil kutipan ini dibelanjakan dan apakah manfaat yang diperoleh oleh rakyat Kuala Lumpur.

JAWAPAN

Tuan Yang di-Pertua,

Untuk makluman Ahli Yang Berhormat, jumlah kutipan kompaun atau saman Dewan Bandaraya Kuala Lumpur (DBKL) adalah seperti berikut :-

TAHUN	KUTIPAN (RM)
2019	13,653,642
2020	8,194,340
2021	3,350,436
2022 (Sehingga 30 Jun)	3,370,474

Kompaun terdiri daripada kompaun trafik dan kompaun am. Pengurangan kutipan kompaun daripada tahun 2020 sehingga 2021 adalah kesan daripada Perintah Kawalan Pergerakan (PKP).

Jumlah kutipan kompaun hanyalah kurang dari 1% dari keseluruhan hasil DBKL. Hasil daripada kutipan kompaun ini dimasukkan ke dalam kumpulan wang disatukan yang seterusnya digunakan untuk pelbagai perbelanjaan mengurus atau operasi seperti pengurusan trafik, penyelenggaraan jalan, pembersihan dan lain-lain.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATIN PADUKA DR. TAN YEE KEW
[WANGSA MAJU]**

SOALAN

YB DATIN PADUKA DR. TAN YEE KEW [WANGSA MAJU] minta **MENTERI PERUMAHAN DAN KERAJAAN TEMPATAN** menyatakan sebab-sebab sesebuah projek pembangunan perumahan swasta dikategorikan sebagai 'projek sakit' yang juga berpotensi menjadi projek terbengkalai dan bagaimana nasib pembeli yang terbabit dalam projek ini boleh dibela.

JAWAPAN

Tuan Yang di-Pertua,

Untuk makluman Ahli Yang Berhormat, antara faktor yang menyebabkan sesuatu projek perumahan menjadi sakit atau terbengkalai ialah kegagalan perancangan, skim pemajuan yang terlalu besar dan pemantauan pemajuan pembinaan yang tidak berkesan.

Kementerian Perumahan dan Kerajaan Tempatan (KPKT) telah mewujudkan Mesyuarat *War Room* Pemantauan Pemajuan Projek Perumahan Swasta yang dipengerusikan YB Menteri Perumahan dan Kerajaan Tempatan bagi menyelesaikan sebarang isu kelewatan projek perumahan. Mesyuarat ini berperanan sebagai;

- i. satu platform untuk melaporkan status projek perumahan swasta sakit dan terbengkalai serta mencadangkan langkah-langkah pemulihan bagi projek berkenaan; dan
- ii. membincangkan permasalahan, mengenal pasti kaedah penyelesaian, penyelarasan pelaksanaan dan pelan tindakan kepada isu berkaitan pemajuan perumahan swasta.

Bagi membantu meringankan beban para pembeli yang terlibat dalam projek perumahan swasta terbengkalai, Kementerian mengambil inisiatif seperti berikut:

- i. mengeluarkan surat pengesahan projek perumahan swasta terbengkalai kepada pemberia akhir (*end-financier*) bagi unit rumah berkaitan. Melalui surat pengesahan ini, para pembeli boleh mendapatkan pertimbangan daripada institusi perbankan bagi sebarang permohonan pengurangan kadar faedah dan penstrukturkan semula pinjaman perumahan;

- ii. memohon pertimbangan daripada Kumpulan Wang Simpanan Pekerja (KWSP) bagi permohonan pengeluaran kali kedua;
- iii. bagi pembeli yang membuat pinjaman perumahan, permohonan boleh dibuat bagi:
 - a. membatalkan pinjaman sedia ada dan diberi peluang untuk memohon pinjaman baharu iaitu pinjaman penuh seperti pinjaman pada kali pertama; atau
 - b. pengecualian pengenaan faedah pinjaman pada kadar 4% sepanjang tempoh projek dipulihkan atau selama lima (5) tahun (mana-mana yang terdahulu).

Walau bagaimanapun, semua perkara di atas adalah tertakluk kepada penilaian institusi pembiaya ke atas peminjam-peminjam berdasarkan merit setiap kes;

- iv. Kerajaan juga telah melanjutkan pengecualian duti setem ke atas perjanjian pinjaman dan surat cara pindah milik kepada pembeli asal projek perumahan swasta terbengkalai sehingga 31 Disember 2025. Inisiatif ini telah diperkenalkan sejak tahun 2013 bagi membantu meringankan bebanan para pembeli yang terlibat dengan projek perumahan swasta terbengkalai;
- v. Kerajaan melalui Lembaga Pembiayaan Perumahan Sektor Awam (LPPSA) telah memperkenalkan Skim Bantuan Khas iaitu penangguhan bayaran balik ansuran bulanan selama enam (6) bulan kepada peminjam LPPSA yang layak. Permohonan untuk mendapatkan Skim Bantuan Khas ini dibuka sehingga 31 Disember 2022 dan boleh dimohon melalui portal LPPSA;

- vi. KPKT telah membuat pindaan kepada Akta Pemajuan Perumahan (Kawalan dan Pelesenan) 1966 (Akta 118) yang telah dikuatkuasakan bersekali dengan Akta Pengurusan Strata 2013 (Akta 757) dan Akta Hak Milik Strata (Pindaan) 2013 (Akta 318) bermula 1 Jun 2015 untuk mengelakkan projek perumahan swasta daripada terbengkalai.

Pindaan kepada Akta 118 dan peraturan-peraturannya adalah seperti berikut:

1) Seksyen 6

Deposit lesen pemajuan perumahan dipinda dari RM200,000 kepada 3.0% daripada anggaran kos pembinaan termasuk kos yuran profesional tetapi tidak termasuk kos tanah.

2) Seksyen 8A

Pembeli boleh secara individu memohon untuk menamatkan perjanjian jual beli pada bila-bila masa sekiranya tiada kemajuan pembinaan secara berterusan di tapak pembinaan selama enam (6) bulan atau lebih selepas perjanjian ditandatangani dengan syarat perlu mendapat perakuan daripada Pengawal Perumahan dan mendapat persetujuan bertulis daripada pihak pembiaya.

3) Subseksyen 24(2)(g) [kuasa untuk membuat peraturan-peraturan]

Menaikkan kadar penalti maksimum terhadap pemaju bagi kesalahan di bawah peraturan daripada RM20,000 kepada RM50,000.

4) Seksyen 18A (Fasal Baharu)

Tindakan pendakwaan terhadap pemaju perumahan berlesen yang menyebabkan projek perumahan terbengkalai mulai Jun 2015.

Sekian, terima kasih.

SOALAN NO: 481

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN TEH KOK LIM [TAIPING]

SOALAN

YB TUAN TEH KOK LIM [TAIPING] minta **MENTERI PERUMAHAN DAN KERAJAAN TEMPATAN** menyatakan prestasi pengurusan sisa pepejal di bawah Akta 672 berbanding Pulau Pinang dan Perak termasuk kos pengurusan yang terlibat.

JAWAPAN

Tuan Yang di-Pertua,

Untuk makluman Ahli Yang Berhormat, prestasi pengurusan sisa pepejal boleh diukur melalui pelbagai aspek seperti pembangunan dasar dan polisi, tadbir urus dan perundangan, implikasi kewangan, penyampaian kualiti perkhidmatan, mekanisme pemantauan operasi syarikat konsesi dan operator serta penerimaan masyarakat terhadap pengurusan sisa.

Buat masa ini, terdapat tujuh (7) negeri yang telah menerima pakai Akta Pengurusan Sisa Pepejal dan Pembersihan Awam 2007 (Akta 672) iaitu negeri Johor, Melaka, Negeri Sembilan, Pahang, Wilayah Persekutuan Kuala Lumpur dan Putrajaya, Kedah dan Perlis. Negeri-negeri yang tidak menerima pakai Akta 672 pula ialah negeri Selangor, Pulau Pinang, Perak, Kelantan, Terengganu, Sabah dan Sarawak. Walaupun terdapat perbezaan prestasi pengurusan sisa pepejal di antara negeri yang menerima pakai Akta 672 berbanding negeri yang tidak menerima pakai Akta ini, KPKT telah mengambil tindakan proaktif dengan merancang hala tuju baharu pengurusan sisa pepejal untuk mempercepatkan peralihan ke arah ekonomi kitaran selaras dengan hasrat di bawah Rancangan Malaysia Ke-12 (RMKe-12).

Untuk makluman Ahli Yang Berhormat, prestasi pengurusan sisa pepejal dan pembersihan awam di negeri-negeri yang menerima pakai Akta 672 adalah teratur dari aspek pemantauan perkhidmatan syarikat konsesi dan operator tapak pelupusan yang dilantik. Perkhidmatan pengurusan sisa pepejal dan pembersihan awam ini dilaksanakan oleh tiga (3) syarikat konsesi yang telah dilantik oleh Kerajaan Persekutuan berdasarkan Perjanjian Konsesi yang telah ditandatangani. Pemantauan kerja-kerja perkhidmatan ini pula dilaksanakan oleh penguatkuasa SWCorp berdasarkan *Key Performance Indicator* (KPI) yang telah ditetapkan.

Dari aspek kos pengurusan sisa pepejal, tidak dinafikan Kerajaan memperuntukkan satu peruntukan yang besar, iaitu kira-kira RM1.9 billion setahun bagi kutipan sisa pepejal dan pembersihan awam di negeri-negeri yang menerima pakai Akta 672 supaya perkhidmatan ini dapat dilaksanakan secara optimum. Peruntukan tersebut merupakan komitmen Kerajaan yang memerlukan perbelanjaan khusus setiap tahun untuk melaksanakan perkhidmatan kutipan sisa pepejal, pembersihan awam, operasi tapak pelupusan dan fasiliti sisa pepejal di negeri-negeri yang menerima pakai Akta 672.

Untuk makluman Ahli Yang Berhormat, perkhidmatan pengurusan sisa pepejal di negeri Perak masih lagi diuruskan oleh Pihak Berkuasa Tempatan (PBT) seperti Majlis Daerah Lenggong, Majlis Daerah Selama dan Majlis Daerah Gerik. Namun, terdapat juga beberapa PBT yang melaksanakan perkhidmatan dengan melantik pihak kontraktor/ operator melalui perolehan tender atau sebutharga. Kerajaan negeri juga telah melaksanakan perkhidmatan kutipan sampah di kawasan luar bandar (luar kawasan pentadbiran PBT) secara berperingkat mulai 2021.

Kos pengurusan tapak sisa pepejal negeri Perak sahaja adalah sebanyak RM9,911,898.46 pada tahun 2021 melibatkan 15 PBT negeri Perak. Peruntukan sebanyak RM5.3 juta juga telah diluluskan oleh Kerajaan Negeri bagi menampung kos penyediaan tapak kutipan, kos pembelian tong sampah dan juga kos perkhidmatan operasi untuk 177 buah kampung di negeri Perak mulai tahun 2021 dan 2022.

Bagi negeri Pulau Pinang pula, pengurusan sisa pepejal di negeri tersebut meliputi proses kutipan, pemprosesan, pelencongan dan penghantaran ke tapak pelupusan. Kaedah pengurusan sisa pepejal di Pulau Pinang buat masa ini adalah secara *landfilling* (pelupusan kaedah kambus tanah) di satu-satunya tapak pelupusan di Pulau Pinang iaitu Tapak Pelupusan Sampah Pulau Burung (TPSPB). Pengurusan sisa pepejal di bahagian pulau dikawal selia oleh Majlis Bandaraya Pulau Pinang (MBPP), manakala Majlis Bandaraya

Seberang Perai (MBSP) mengawal selia pengurusan sisa di bahagian Seberang Perai. Di bawah kedua-dua PBT tersebut, kos perkhidmatan kutipan dianggarkan sebanyak RM33 juta setahun dan kos pelupusan di TPSPB dianggarkan sebanyak RM18 juta setahun.

Pihak Kerajaan Negeri Pulau Pinang pada masa kini sedang melaksanakan kajian bagi penyediaan sebuah Pelan Hala Tuju atau *Roadmap* Pengurusan Sisa Pepejal Negeri Pulau Pinang sehingga tahun 2050. Selain itu, Kerajaan Negeri Pulau Pinang juga sedang dalam perancangan untuk melaksanakan rawatan sisa pepejal termasuk pelaksanaan teknologi *Waste to Energy*.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN TEH KOK LIM (TAIPING)

SOALAN

YB TUAN TEH KOK LIM (TAIPIING) minta **MENTERI PERUMAHAN DAN KERAJAAN TEMPATAN** menyatakan status dan pencapaian Inisiatif Komuniti Sifar Sisa sejak pelancaran pada 2019. Berapa jumlah kos yang telah diperuntukkan program ini setakat ini dan apakah rancangan seterusnya.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui SWCorp telah mewujudkan program Inisiatif Komuniti Sifar Sisa (KOSIS) iaitu dengan melaksanakan transformasi rumah sampah sedia ada. Rumah sampah ini diubah suai sebagai sebuah pusat pengumpulan barang kitar semula dan sebagai pusat rujukan kepada komuniti berkaitan aktiviti kitar semula serta perawatan sisa makanan. Selain itu, program KOSIS juga dapat meningkatkan penyertaan serta penglibatan masyarakat setempat dalam aktiviti kesedaran terhadap kebersihan persekitaran serta amalan kitar semula. Program KOSIS menyokong usaha Kerajaan untuk membantu meningkatkan ekonomi keluarga B40, meningkatkan amalan menghargai sisa sebagai sumber dan mengurangkan penghantaran sisa pepejal ke tapak pelupusan.

Dari tahun 2019 sehingga 2021, sebanyak 54,344 orang penduduk Program Perumahan Rakyat (PPR) telah terlibat secara langsung dalam program KOSIS. Bagi menggalakkan penglibatan penduduk PPR menyertai program KOSIS, SWCorp telah menganjurkan Pertandingan KOSIS 2021 dan telah dilaksanakan di 17 buah PPR. Antara kategori yang telah dipertandingkan adalah Pengumpulan Barang Kitar Semula Tertinggi, Pengumpulan Sisa Makanan Tertinggi, Pengumpulan Sisa Kitar Semula dan Sisa Makanan Tertinggi Setiap PPR dan Penyertaan PPR Tertinggi KOSIS 2021. Tujuan utama pertandingan ini diadakan adalah untuk menghargai penglibatan, usaha dan komitmen yang telah diberikan oleh peserta yang paling aktif di samping menjadi pemangkin kepada peserta lain untuk turut serta dalam program KOSIS di PPR masing-masing.

Untuk makluman Ahli Yang Berhormat juga, SWCorp telah membelanjakan sebanyak RM355,458.60 dari tahun 2019 sehingga Jun 2022 bagi memastikan program yang bermanfaat ini berjalan dengan

SOALAN NO: 483

jayanya. Menjelang tahun 2025, SWCorp mensasarkan sebanyak 70% premis bersamaan 38,040 orang penduduk daripada 17 PPR sedia ada untuk menyertai program KOSIS yang merangkumi penglibatan masyarakat setempat pada aktiviti kesedaran terhadap kebersihan persekitaran serta amalan dan budaya kitar semula.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : TUAN TEH KOK LIM [TAIPING]

TARIKH : JULAI – OGOS 2022

SOALAN

TUAN TEH KOK LIM [TAIPING] minta **MENTERI PENGANGKUTAN** menyatakan jumlah dan nilai kompaun untuk kes melebihi muatan berat yang dikeluarkan kepada lori dan jumlah kutipan yang telah diterima. Apakah rancangan Kementerian untuk menambah baik dan mengatasi masalah lebihan muatan berat yang tidak pernah selesai.

JAWAPAN

Tuan Yang Di Pertua,

1. Kementerian Pengangkutan Malaysia (MOT) melalui Jabatan Pengangkutan Jalan Malaysia (JPJ) sentiasa mengambil tindakan terhadap kenderaan barang yang membawa lebih muatan.
2. Dari tahun **2019 sehingga 30 Jun 2022**, sebanyak **157,967 notis saman** telah dikeluarkan dengan jumlah kutipan sebanyak **RM26,606,205**.
3. Kementerian Pengangkutan melalui JPJ dengan kerjasama Kementerian Kerja Raya (KKR) sedang merancang untuk pemasangan *High Speed Weight In Motion* (HSWIM) iaitu alat pengesan terhadap kenderaan yang membawa lebih muatan secara automatik apabila kenderaan berat tersebut melalui sistem ini. Bagi fasa pertama, sebanyak 11 unit HSWIM dijangka untuk dipasang pada tahun 2023.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN TEH KOK LIM [TAIPING]

SOALAN

YB TUAN TEH KOK LIM [TAIPING] minta **MENTERI PERUMAHAN DAN KERAJAAN TEMPATAN** menyatakan status dan pelaksanaan pengasingan sisa pepejal di rumah yang melibatkan negeri-negeri yang menerima pakai Akta 672 dan apakah rancangan dan usaha Kerajaan untuk 10 tahun yang akan datang.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui SWCorp telah memperkenalkan Program Pengasingan Sisa di Punca (Separation at Source, SAS) di tujuh (7) buah negeri yang menerima pakai Akta Pengurusan Sisa Pepejal dan Pembersihan Awam 2007 (Akta 672) pada tahun 2015 sebagai salah satu langkah untuk mengurangkan jumlah sisa pepejal yang dilupuskan di tapak pelupusan. Pelaksanaan penguatkuasaan SAS telah bermula pada 1 Jun 2016 secara serentak dengan melibatkan 53 buah kawasan operasi Pihak Berkuasa Tempatan (PBT). Bilangan premis yang terlibat adalah sebanyak 3,455,203 premis bertanah.

Pelaksanaan penguatkuasaan SAS adalah untuk menerapkan budaya mengasingkan sisa pepejal mengikut kategori dalam kalangan masyarakat. Tindakan penguatkuasaan adalah langkah terakhir dan hanya akan diambil sekiranya masyarakat masih ingkar untuk melakukan SAS. Jumlah kompaun yang boleh dikenakan kepada isi rumah yang tidak mengasingkan sisa pepejal adalah seperti berikut:

Premis Bertanah:

- a. Kesalahan pertama : RM50.00
- b. Kesalahan kedua : RM100.00
- c. Kesalahan ketiga dan seterusnya : RM500.00

Sekiranya kompaun gagal dijelaskan dalam tempoh yang ditetapkan, maka KP KT akan membawa kes ini ke Mahkamah Seksyen untuk disabitkan kesalahan dan jika didapati bersalah boleh didenda sebanyak RM1,000.00 (maksimum).

Status Penguatkuasaan SAS bagi premis bertanah mulai tahun 2018 hingga 2022 adalah seperti berikut:

- a) sebanyak 17,942 operasi pemeriksaan telah dijalankan melibatkan 1,471,443 bilangan premis bertanah dan 26,769 taman. Selain itu, sebanyak 1,517,115 sesi libat urus telah

SOALAN NO: 485

dijalankan dengan mengedarkan risalah dan penerangan kepada isi rumah mengenai SAS; dan

- b) sebanyak 713 Notis Pemberitahuan Kesalahan (NPK) telah dikeluarkan kepada isi rumah yang gagal mengasingkan sisa pepejal. 385 NPK telah berjaya dikompaun atas izin Timbalan Pendakwa Raya KPKT dengan nilai kompaun yang telah terkumpul adalah sebanyak RM19,700.00. Sebanyak 328 NPK masih dalam siasatan oleh Pegawai Penyiasat.

Impak pelaksanaan SAS ini dapat dilihat daripada jumlah kutipan sisa kitar semula. Bermula 1 September 2015 sehingga 31 Mei 2022, jumlah keseluruhan kitar semula yang telah berjaya dikutip adalah sebanyak 18,052.48 tan. Ini menunjukkan program kitar semula yang dilaksanakan oleh kerajaan telah memberi impak positif kepada rakyat Malaysia di mana rakyat semakin sedar untuk mengamalkan kitar semula dalam kehidupan seharian. Namun, usaha-usaha menggalakkan amalan kitar semula masih giat dilaksanakan bagi memastikan Malaysia mencapai 40% Kadar Kitar Semula Kebangsaan menjelang tahun 2025.

Rancangan dan usaha kerajaan untuk 10 tahun akan datang adalah untuk memastikan semua premis bertanah menjalankan SAS. Selain itu, sesi libat urus dan operasi akan terus giat dijalankan untuk memastikan SAS ini terus dilaksanakan serta kompaun akan dikenakan kepada premis yang tidak mengasingkan sisa.

Bagi meningkatkan kesedaran masyarakat umum berkaitan amalan 3R (Reduce, Reuse, Recycle) dan SAS, SWCorp juga menjalankan program bagi mengubah sikap masyarakat melalui pendekatan komunikasi, pendidikan dan kesedaran awam atau Communication, Education and Public Awareness (CEPA). Antara kempen yang dilaksanakan di media sosial sehingga Mei 2022:

PELAKSANAAN KEMPEN-KEMPEN KESADARAN DI MEDIA SOSIAL				
BIL	KEMPEN			JUMLAH
1	KESEDARAN 3R			62
2	PELAKSANAAN PENGASINGAN SISA DI			23

SOALAN NO: 485

PELAKSANAAN KEMPEN-KEMPEN KESADARAN DI MEDIA SOSIAL		
BIL	KEMPEN	JUMLAH
	PUNCA	
3	HARGAI MAKANAN ELAK PEMBAZIRAN	94
4	BUANG SAMPAH KE DALAM TONG SAMPAH	34
5	JANGAN GUNALAH	17
6	BERANI TEGUR	19
JUMLAH KESELURUHAN		249

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN TEH KOK LIM [TAIPING]

SOALAN

TUAN TEH KOK LIM [TAIPING] minta **MENTERI KEWANGAN** menyatakan mengapa peruntukan khas RM3 juta yang diluluskan pada tahun 2019 kepada Majlis Perbandaran Taiping untuk kerja-kerja menaik taraf Pusat Peranginan Bukit Larut masih belum disalurkan. Bila akan disalurkan. Kalau tidak, kenapa.

JAWAPAN

Tuan Yang di-Pertua,

Kementerian Kewangan (MOF) melalui surat bertarikh 29 Januari 2020 telah bersetuju meluluskan peruntukan di bawah perbelanjaan mengurus (OE) sebanyak RM3 juta kepada Majlis Perbandaran Taiping (MPT) bagi menaik taraf pembangunan semula Bukit Larut, Taiping.

Walau bagaimanapun, projek tersebut tidak dapat dilaksanakan dalam tahun kewangan 2020 dan peruntukan OE yang berkaitan tidak dapat dibawa ke hadapan. MOF melalui surat bertarikh 7 April 2021 telah mencadangkan supaya pelaksanaan projek tersebut wajar ditangguhkan.

Sekiranya MPT berhasrat untuk melaksanakan semula projek tersebut, permohonan hendaklah dikemukakan kepada Kementerian Perumahan dan Kerajaan Tempatan (KPKT) untuk penyediaan peruntukan.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB PUAN TEO NIE CHING (KULAI)

SOALAN

PUAN TEO NIE CHING [KULAI] minta **MENTERI KANAN KERJA RAYA** menyatakan jumlah peruntukan penyelenggaran jalan JKR daerah Kulai bagi 2022, skop kerja dan perkembangan terkini tentang jalan pintas Senai-Kulai (Senai-Kulai Bypass).

JAWAPAN

Tuan Yang Di-Pertua,

Untuk makluman Ahli Yang Berhormat, bagi Daerah Kulai sehingga 30 Jun 2022, Kementerian ini telah meluluskan dan melaksana kerja penyenggaraan **rutin sehingga Jun 2022** dengan peruntukan berjumlah **RM1.079 juta**. Bagi pelaksanaan kerja di bawah **Program Penyenggaraan Berkala Pavemen dan Bukan Pavemen**, sebanyak **RM1.6 juta** dan **RM500 ribu**, telah diperuntukan dan kerja telah disiapkan sepenuhnya di tapak. Selain itu, terdapat juga pelaksanaan kerja yang telah diluluskan di bawah skop kerja Kecemasan dengan peruntukan sebanyak **RM7,700.00** selain peruntukan di bawah program kerja-kerja pemberian kawasan *Blackspot* sebanyak **RM700,000.00**.

Sehingga Jun 2022, jumlah keseluruhan peruntukan penyenggaran jalan persekutuan bagi Daerah Kulai adalah berjumlah **RM3,886,700.00**.

Pecahan jumlah agihan peruntukan yang telah disalurkan bagi Daerah Kulai sehingga 30 Jun 2022 adalah seperti berikut:-

Bil.	Skop Penyenggaraan	Nilai
1.	Rutin	RM 1,079,000.00
2.	Berkala Pavemen	RM 1,600,000.00
3.	Berkala Bukan Pavemen	RM 500,000.00
4.	Kecemasan (sehingga april)	RM 7,700.00
	Jumlah keseluruhan	RM 3,886,700.00

Pelaksanaan kerja-kerja tersebut adalah tertakluk kepada kelulusan

peruntukan oleh Kementerian Kewangan dan senarai keutamaan daripada pihak Jabatan Kerja Raya.

Untuk makluman Ahli Yang Berhormat, projek yang dimaksudkan adalah cadangan laluan alternatif kepada Laluan Persekutuan FT001 yang menghubungkan Bandar Senai dan Bandar Kulai yang bertujuan untuk menyuraikan lalu lintas di laluan tersebut.

Kementerian ini pernah menerima permohonan projek ini dengan tajuk **Cadangan Membina Jalan Pintas Bandar Kulai (Kulai Bypass) Dalam Daerah Kulai, Johor** bagi *Rolling Plan 1 (RP1)* Rancangan Malaysia Kedua Belas (RMke-12). Walau bagaimanapun, berdasarkan kedudukan keutamaan projek dan agihan siling peruntukan yang terhad untuk projek baharu, projek tersebut tidak dapat dipertimbangkan pada ketika itu.

Di dalam *Rolling Plan 3 (RP3)*, RMKe-12, Kementerian ini tidak menerima permohonan projek ini daripada Negeri Johor. Kementerian ini dimaklumkan oleh Jabatan Kerja Raya bahawa berdasarkan perbincangan di peringkat negeri, terdapat cadangan untuk projek ini diangkat melalui Pihak Berkuasa Wilayah Pembangunan Iskandar atau *Iskandar Regional Development Authority (IRDA)* di dalam Rolling Plan 3, RMKe-12.

Kementerian Kerja Raya melalui Jabatan Kerja Raya Malaysia sentiasa komited dalam memastikan jalan sentiasa dalam keadaan yang selamat dan selesa.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : PUAN TEO NIE CHING [KULAI]

SOALAN

PUAN TEO NIE CHING [KULAI] minta **MENTERI KANAN PENDIDIKAN** menyatakan status pembinaan SK Bandar Putra 2, Kulai dan SMK Kota Kemuning 2, Selangor.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) telah diluluskan projek pembinaan sekolah baharu iaitu Sekolah Kebangsaan Bandar Putra 2, Kulai, Johor dalam Rancangan Malaysia Kesebelas (RMKe-11), *Rolling Plan 4* (RP4) tahun 2019. Skop pembinaan mengandungi 36 bilik darjah, bangunan pentadbiran, akademik, bilik-bilik khas, pusat sumber, perabot dan peralatan serta lain-lain kemudahan dengan kos projek sebanyak RM54 juta. Sehingga 28 Julai 2022, status pelaksanaan projek adalah di peringkat pembinaan dengan kemajuan fizikal sebenar 6.83 peratus berbanding jadual 10.64 peratus. Projek dijangka siap pada Januari 2024.

Bagi pembinaan Sekolah Menengah Kebangsaan Kota Kemuning (2), Shah Alam, Selangor, projek telah diluluskan dalam RMKe-12, RP1 tahun 2021. Skop pembinaan projek adalah meliputi pembinaan 42 bilik darjah, bangunan pentadbiran, bilik-bilik khas, makmal, bengkel dan kemudahan lain. Status projek adalah di peringkat prabina.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : PUAN TEO NIE CHING [KULAI]

SOALAN

PUAN TEO NIE CHING [KULAI] minta **MENTERI KANAN PENDIDIKAN** menyatakan enrolmen pelajar program matrikulasi mengikut kaum bagi sesi 2021/2022 dalam bilangan dan peratusan.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan menetapkan dasar pengambilan pelajar ke Program Matrikulasi adalah tertakluk kepada kuota 90 peratus bagi pelajar Bumiputera dan 10 peratus bagi pelajar bukan Bumiputera. Bagi pengagihan kuota 10 peratus kepada pelajar bukan Bumiputera, Kerajaan telah memutuskan bahawa peratusan pengambilan pelajar adalah mengikut nisbah 5.43 peratus untuk kaum Cina, 3.72 peratus untuk kaum India dan 0.85 peratus untuk lain-lain. Oleh demikian, tawaran kemasukan ke Program Matrikulasi adalah mengikut komposisi yang telah ditetapkan.

Berdasarkan kuota pengambilan sedia ada, bagi sesi 2021, jumlah tawaran bagi pengambilan pelajar Program Matrikulasi KPM ialah 30,000 tempat. Daripada jumlah tersebut, 27,000 tempat adalah untuk pelajar Bumiputera dan 3,000 tempat lagi untuk pelajar bukan Bumiputera.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : PUAN TEO NIE CHING [KULAI]

SOALAN

PUAN TEO NIE CHING [KULAI] minta **MENTERI KEWANGAN** menyatakan senarai sekolah yang menerima RM11 juta peruntukan yang disebut dalam jawapan bertarikh 24 Mac 2022.

JAWAPAN

Tuan Yang di-Pertua,

Terima kasih Yang Berhormat Puan Teo Nie Ching [PH - DAP Kulai] di atas soalan yang telah dikemukakan.

Untuk makluman Ahli-Ahli Yang Berhormat, sekolah yang menerima peruntukan tersebut ialah SJK (C) Kuang Yu, Pulau Pinang, SJKC Poay Chai, Taman Bukit Indah, Johor Bahru, SJKC Kuek Ho Yao, Johor Bahru dan SJKC Sim Mow Yu, Pasir Gudang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : PUAN TEO NIE CHING [KULAI]

SOALAN

PUAN TEO NIE CHING minta **MENTERI KESIHATAN** menyatakan rancangan KKM untuk menambah doktor dan katil hospital memandangkan nisbah doktor kepada penduduk dan nisbah katil hospital kepada penduduk di daerah Kulai adalah jauh lebih rendah daripada nisbah negeri Johor.

JAWAPAN

Tuan Yang di-Pertua,

1. Penduduk di kawasan Kulai seramai 304,811 orang memperolehi perkhidmatan kesihatan dari tiga (3) buah hospital iaitu Hospital Temenggong Seri Maharaja Tun Ibrahim (HTSMTI), Hospital Pontian dan Hospital Sultanah Aminah Johor Bahru (HSAJB) melalui jaringan Kluster Johor Selatan di mana:

- a) Lokasi Kulai terletak dalam lingkungan 30 minit perjalanan dari HSAJB dan Hospital Pontian; dan
- b) Hospital-hospital sedia ada masih berupaya menampung keperluan penduduk Kulai.

2. Walaupun *bed population ratio* (BPR) bagi Kulai adalah 0.3 katil bagi setiap 1000 penduduk, akan tetapi Kluster Johor Selatan menikmati 2.9 katil bagi setiap 1000 penduduk, berbanding Negeri Johor iaitu 1.4

katil bagi setiap 1,000 penduduk.

3. Justeru, pembangunan sebuah hospital awam baharu di Kulai belum di perlukan buat masa ini. Sebaliknya, KKM akan memberi fokus untuk menaik taraf Hospital Kulai sedia ada bagi menyokong program kluster di mana Hospital Kulai termasuk dalam Kluster Johor Selatan.

4. Hospital Kulai merupakan salah satu Hospital *Non Lead* bagi Hospital Kluster Johor Selatan yang memulakan pembentukan Hospital Kluster pada tahun 2020. Hospital *Lead* bagi Kluster ini adalah Hospital Sultanah Aminah, Johor Bahru yang menyediakan perkhidmatan kepakaran dan Hospital *Non Lead* yang lain adalah Hospital Pontian. Hospital Kulai terletak 27km dari Hospital Sultanah Aminah, merangkumi perjalanan sekitar 30 minit. Melalui pembentukan Hospital Kluster, perkhidmatan kepakaran di Hospital Kluster Johor Selatan amnya dan Hospital Kulai khususnya dapat dipertingkatkan melalui perkongsian dan sumber-sumber yang dioptimumkan seperti sumber manusia, peralatan, fasiliti dan lain-lain.

5. Penyusunan pengurusan rawatan pesakit, latihan pegawai perubatan dan anggota paramedik serta penempatan perkhidmatan kepakaran yang bersesuaian di Hospital Kulai juga dapat ditambahbaik. Perkhidmatan kepakaran di Hospital Kulai diperolehi daripada Hospital Sultanah Aminah melalui integrasi dan koordinasi perkhidmatan serta kehadiran pakar bertugas secara tetap dan berkala merangkumi perkhidmatan-perkhidmatan; Perubatan Am, Kecemasan, Pediatrik, Obstetrik dan Ginekologi, Psikiatri, Ortopedik, Anestesiologi, Pembedahan Am dan Endokrinologi. Ini bagi memastikan akses kepada perkhidmatan kepakaran dapat dipertingkatkan. Melalui pelaksanaan ini, pengurusan rawatan pesakit dapat ditambah baik bagi manfaat pesakit-pesakit di daerah Kulai.

6. Berdasarkan rekod KKM, hingga 31 Mac 2022, jumlah Pegawai Perubatan adalah seramai 59,348 orang iaitu:

- a) 32,106 orang pegawai lantikan tetap yang merangkumi:
 - (i) 25,711 orang Pegawai Perubatan lantikan tetap; dan

- (ii) 6,395 orang Pakar Perubatan lantikan tetap.
- b) 27,242 orang pegawai lantikan kontrak yang merangkumi:
- (i) 27,218 orang pegawai Perubatan lantikan kontrak; dan
 - (ii) 24 orang Pakar Perubatan lantikan kontrak.
7. Daripada jumlah tersebut seramai 4,479 Pegawai Perubatan yang berkhidmat di Johor yang terdiri daripada 2,418 Pegawai Perubatan lantikan tetap dan 2,913 Pegawai Perubatan lantikan kontrak. Sehingga kini, seramai 90 pegawai perubatan sedang berkhidmat di fasiliti kesihatan di daerah Kulai terdiri daripada 60 pegawai perubatan lantikan tetap dan 30 pegawai perubatan lantikan kontrak.
8. Daripada keseluruhan jumlah pegawai perubatan (lantikan tetap dan kontrak) tersebut, seramai 39 pegawai perubatan sedang berkhidmat di Hospital Temenggong Seri Maharaja Tun Ibrahim manakala baki seramai 51 pegawai perubatan sedang berkhidmat di Pejabat Kesihatan Daerah, Klinik Kesihatan dan Klinik Komuniti di daerah tersebut.
9. Bagi meningkatkan bilangan doktor di negara ini, Kerajaan juga telah memperkenalkan pelbagai insentif bagi menarik minat doktor dan pakar perubatan untuk terus berkhidmat dengan kerajaan serta pengambilan doktor pakar swasta berkhidmat secara sessional dan pengambilan doktor pakar perubatan luar negara secara kontrak.
10. Kerajaan juga telah dan sedang melaksanakan pelbagai inisiatif untuk menambahkan bilangan Pegawai Perubatan. Antara langkah yang telah diambil adalah dengan mempercepatkan lantikan graduan perubatan tersebut dengan inisiatif seperti berikut:

- a) Mengadakan penambahbaikan terhadap proses lantikan graduan perubatan melalui pendekatan graduan dilantik terus secara kontrak tanpa perlu melalui proses temuduga oleh SPA mulai Julai 2017. Pelantikan hanya berdasarkan graduan perubatan berdaftar dengan Majlis Perubatan Malaysia (MMC) dan SPA; dan

SOALAN NO. 491

- b) Meningkatkan bilangan Hospital Latihan Siswazah (HLS) dari 38 HLS pada tahun 2009 kepada 47 buah HLS pada tahun 2018 dan tambahan bilangan penempatan alternatif daripada 5 penempatan kepada 9 penempatan di Klinik-klinik Kesihatan termasuk Kesihatan Primer dan Psikiatri bagi membolehkan PPS menjalani latihan siswazah. Melalui pendekatan ini, slot latihan siswazah di KKM dapat ditingkatkan daripada 10,835 pada tahun 2013 kepada 12,198 pada tahun 2021.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB PUAN TERESA KOK SUH SIM (SEPUTEH)

SOALAN

PUAN TERESA KOK SUH SIM (SEPUTEH) minta MENTERI DALAM NEGERI menyatakan :-

- (a) jumlah tahanan asing mengikut jantina dan negara asal di setiap depot imigresen; dan
- (b) jumlah tahanan warga asing yang jatuh meninggal dunia semasa dalam penahanan sejak tahun 2020.

JAWAPAN

Tuan Yang Di Pertua,

Mohon izin supaya soalan daripada YB Seputeh ini dijawab bersekali dengan soalan bernombor L478 daripada YB Ledang memandangkan kedua-dua soalan yang diutarakan menyentuh isu yang sama iaitu mengenai bilangan tahanan di depot-depot imigresen dan statistik kematian tahanan.

Untuk makluman Ahli Yang Berhormat, sehingga 12 Julai 2022, terdapat 17,703 orang PATI ditahan di semua depot imigresen seluruh negara yang terdiri daripada 12,722 orang lelaki, 3,217 orang wanita, 996 orang kanak-kanak lelaki dan 768 orang kanak-kanak perempuan. Warganegara Filipina merupakan tahanan paling ramai iaitu 7,022 orang (39.67%), diikuti warganegara Indonesia seramai 4,625 orang (26.13%) dan warganegara Myanmar seramai 1,390 orang (7.85%).

Bagi tempoh 2020 sehingga 12 Julai 2022, terdapat 298 kematian melibatkan 258 orang tahanan lelaki, 34 orang tahanan wanita dan 6 orang tahanan kanak-kanak lelaki. Antara sebab-sebab kematian yang dikenal pasti oleh pihak hospital adalah berpunca daripada jangkitan *COVID-19*, *Tuberculosis*, sakit jantung, sakit buah pinggang, kanser dan jangkitan paru-paru (*Pneumonia*).

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : PUAN TERESA KOK SUH SIM [SEPUTEH]

SOALAN

Minta **MENTERI PENGAJIAN TINGGI** menyatakan

- (a) universiti dan kolej awam yang mengiktiraf dan menerima pelajar yang mempunyai kelulusan peperiksaan *A Levels* dan *Unified Examination Certificate* (UEC); dan
- (b) bilangan pelajar warga asing di setiap universiti awam di Malaysia.

JAWAPAN

Tan Sri Yang Dipertua,

- (a) Dasar yang berkuat kuasa menetapkan bahawa kelayakan *General Certificate of Education (GCE) A-Level* dan *Unified Examination Certificate (UEC)* Senior Middle Three (SM3) membolehkan calon menyambung pengajian ke program pendidikan tinggi di Malaysia mengikut tahap pengajian yang bersesuaian.

Dalam hal ini, calon yang memiliki kelayakan *A-Level* boleh memohon kemasukan ke Universiti Awam (UA) dengan syarat calon memiliki Sijil Pelajaran Malaysia (SPM) dan mendapat kepujian dalam mata pelajaran Bahasa Malaysia/Bahasa Melayu serta lulus dalam mata pelajaran Sejarah mulai tahun 2013, di samping memenuhi syarat-syarat yang ditetapkan oleh pihak senat UA.

NO. SOALAN: 493

Selain itu, ketetapan syarat kelayakan masuk bagi kelayakan *Unified Examination Certificate* (UEC) ke program pendidikan tinggi di Institusi Pengajian Tinggi (IPT) Malaysia adalah berdasarkan kepada Surat Pekeliling Ketua Pendaftar Institusi Pendidikan Tinggi Swasta (IPTS), KPM Bil. 2/2004 bertarikh 19 Mac 2004 yang menyatakan bahawa “*kelulusan Sijil UEC diiktiraf sebagai kelayakan masuk ke Institusi Pendidikan Tinggi Swasta (IPTS) tetapi tidak boleh diterima untuk kemasukan ke Institusi Pendidikan Tinggi Awam (IPTA) termasuk Kolej Tuanku Abdul Rahman dan program-program IPTS yang difrancaiskan daripada IPTA*”. Oleh yang demikian, pemegang kelayakan UEC boleh memohon untuk menyambung pengajian di IPTS berdasarkan syarat kelayakan masuk yang ditetapkan.

- (b) Data bilangan pelajar bukan warganegara di setiap UA di Malaysia bagi tahun 2020 hingga 2021 adalah seperti yang berikut:

SINGKATAN INSTITUSI	2020	2021
UM	4,113	5,013
USM	3,051	5,287
UKM	2,042	2,872
UPM	4,884	5,761
UTM	4,658	4,967
UUM	2,227	2,410
UIAM	5,160	4,183
UNIMAS	472	505
UMS	569	790
UPSI	887	1,173
UiTM	558	1,238
UniSZA	946	856
UMT	501	620
USIM	809	756
UTHM	877	887
UTeM	799	719
UMP	525	436
UNIMAP	492	462
UMK	127	227
UPNM	8	10
Jumlah	33,705	39,172

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : PUAN TERESA KOK SUH SIM
(SEPUTEH)**

SOALAN

PUAN TERESA KOK SUH SIM (SEPUTEH) minta **MENTERI DALAM NEGERI** menyatakan senarai kategori kesalahan bagi banduan yang telah dijatuhkan hukuman mati di penjara Malaysia sejak tahun 2000. Berapa di antara mereka telah terima pengampunan daripada Raja-raja atau Kerajaan negeri sejak tahun 2000.

JAWAPAN

Tuan Yang Di Pertua,

Untuk makluman Ahli Yang Berhormat, rekod Jabatan Penjara Malaysia sehingga **5 Julai 2022** menunjukkan bahawa terdapat seramai **1,343** banduan yang telah disabitkan bersalah oleh Mahkamah dan dijatuhkan hukuman mati.

Kategori kesalahan yang telah dijatuhkan hukuman mati di penjara Malaysia adalah kesalahan di bawah Seksyen 39B ADB 1952 , Seksyen 121 KK , Seksyen 302 KK, Seksyen 396 KK, Seksyen 3 ASA (PLB) 1971, Seksyen 3A ASA (PLB) 1971, Seksyen 7(1) ASA (PLB) 1971 dan Seksyen 3 AC 1961 dan jumlah yang telah menerima pengampunan daripada Raja-raja atau Kerajaan negeri sejak tahun 2009 adalah **198** orang banduan.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : PUAN TERESA KOK SUH SIM
[SEPUTEH]

SOALAN

PUAN TERESA KOK SUH SIM [SEPUTEH] minta **MENTERI KEWANGAN** menyatakan apakah progres perlaksanaan uCUSTOMS di bawah Jabatan Kastam Diraja Malaysia. Apakah Kerajaan telah mengambil tindakan terhadap pihak yang bertanggungjawab dalam pembaziran dan ketirisan dalam projek ini seperti apa yang didedahkan dalam Laporan Ketua Audit Negara Tahun 2019 Siri 2.

JAWAPAN

Tuan Yang di-Pertua,

Untuk makluman Ahli Yang Berhormat, pembangunan sistem uCustoms mengambil masa selama 7 tahun 2 bulan bermula Oktober 2013. Walau bagaimanapun, sistem ini telah gagal disiapkan oleh kontraktor dan kontrak sistem uCustoms telah tamat pada 31 Disember 2020. Penggunaan sistem uCustoms ini kemudianya telah dihentikan oleh Jabatan Kastam Diraja Malaysia (JKDM) sejak 1 Januari 2021 dan urusan sistem perkastaman menggunakan pakai sistem sedia ada iaitu Sistem Maklumat Kastam (SMK).

JKDM telah mengenakan *Liquidated Ascertained Damages* (LAD) kepada kontraktor sebagai ganti rugi terhadap kegagalan menyempurnakan projek mengikut jadual yang ditetapkan. Tindakan ini adalah selaras dengan kontrak perjanjian yang telah ditandatangani oleh kedua-dua pihak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

DARIPADA : PUAN TERESA KOK SUH SIM [SEPUTEH]

TARIKH : JULAI – OGOS 2022

SOALAN

PUAN TERESA KOK SUH SIM [SEPUTEH] minta **MENTERI PENGANGKUTAN** menyatakan apakah kadar penggunaan (*ridership*) pengangkutan awam seperti LRT, MRT, KTM, dan lain-lain dalam bulan Jun di mana Kerajaan memperkenalkan pengangkutan percuma. Apakah yang akan dilakukan oleh Kementerian untuk menggalakkan penggunaan pengangkutan awam oleh penduduk di Lembah Klang dalam bulan-bulan yang akan datang.

JAWAPAN

Tuan Yang Di Pertua,

1. Berdasarkan data harian penumpang, secara purata seramai 714,000 pengguna memanfaatkan tambang percuma yang diberikan kepada penumpang LRT, Monorail, MRT, BRT dan juga bas Rapid KL dari 16 Jun sehingga 4 Julai 2022.
2. Pihak Prasarana telah menjalankan beberapa inisiatif secara berterusan untuk memastikan peningkatkan jumlah penumpang seperti menawarkan pelbagai jenis produk seperti Pas Keluarga Malaysia, Pas Bulanan Tanpa Had My50, Pas 1 hari dan Pas 3 hari dan Pas Konsesi (Warga Emas, OKU, pelajar) bagi memenuhi keperluan penumpang. Di samping itu, Prasarana juga telah membuat promosi secara atas talian dan fizikal dengan menyertai karnival berskala besar anjuran kementerian atau agensi kerajaan, contohnya Program Aspirasi Keluarga Malaysia di KLCC dan Karnival Jom Heboh Keluarga Malaysia di Putrajaya.
3. Di samping itu, Prasarana juga berkerjasama dengan pihak luar seperti syarikat-syarikat swasta, pihak berkuasa tempatan, persatuan-persatuan yang berdaftar untuk menjalankan program di stesen-stesen rel bagi menarik minat penumpang untuk datang dan menggunakan perkhidmatan rel.
4. Bagi perkhidmatan KTM Komuter, sebanyak 39,052 orang penumpang telah direkodkan menggunakan perkhidmatan tersebut dari 16 Jun 2022 sehingga 4 Julai 2022.
5. Beberapa insiatif bagi meningkatkan jualan penggunaan perkhidmatan KTM Komuter di Lembah Klang telah dan akan dilaksanakan iaitu menjalinkan kerjasama strategik bersama penyedia perkhidmatan e-hailing untuk keselesaan kepada penumpang melalui *First Mile Connectivity*, antaranya :

SOALAN NO: 496

- a) Mengadakan siri jelajah program ‘Jelajah Riuh Jerayawara’ (Jelajah Riuh Road Show) secara bulanan di lokasi-lokasi tumpuan orang ramai;
- b) Menyertai penyertaan di pameran MATTA Fair dan program promosi & pemasaran anjuran Tourism Malaysia yang bertujuan mempromosikan perkhidmatan dan produk;
- c) Menawarkan tambang percuma kepada golongan orang kurang upaya (OKU) yang menggunakan KTM komuter pada 16 September dan 3 Disember setiap tahun;
- d) Menawarkan pass perjalanan bulanan tanpa had MyRail5; dan
- e) Meningkatkan aktiviti promosi dan pemasaran perkhidmatan dan produk KTM Komuter melalui laman web rasmi KTM Berhad, media sosial rasmi KTM Berhad (Facebook, Twitter dan Instagram), hebahan melalui sistem siar raya dan bahan cetak di stesen.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : PUAN VIVIAN WONG SHIR YEE
[SANDAKAN]**

SOALAN

Minta **MENTERI PENGAJIAN TINGGI** menyatakan dengan secara terperinci:

- (a) jumlah pelajar sedia ada ketika ini yang belajar di Universiti Malaysia Sabah (UMS) Kampus Sandakan yang dikategorikan mengikut pelajar tempatan Sabah, bukan orang Sabah dan pelajar dari luar negara; dan
- (b) apakah rancangan pihak kementerian untuk menggunakan sepenuhnya kemudahan sedia ada di kampus Sungai Batang, Sandakan.

JAWAPAN

Tan Sri Yang di-Pertua,

- (a) Berdasarkan data Sistem MyMoheS Kementerian Pengajian Tinggi (KPT) tahun 2021, seramai 434 pelajar sedang melanjutkan pengajian di Universiti Malaysia Sabah (UMS), kampus Sandakan. Daripada jumlah tersebut 282 orang (65%) ialah pelajar kelahiran negeri Sabah manakala 150 orang (34.6%) pelajar bukan kelahiran negeri Sabah dan baki 2 orang (0.5%) ialah pelajar dari luar negara.
- (b) Kemudahan sedia ada di Fakulti Pertanian Lestari Kampus UMS cawangan Sandakan sememangnya digunakan secara optimum. Walau bagaimanapun, bilangan pelajar yang masih belum mencencah separuh daripada kapasiti penggunaan sebenar kampus menyebabkan beberapa kemudahan seperti asrama belum mencapai penggunaan sepenuhnya. Bagi mengatasi isu ini, UMS telah merancang untuk menawarkan dua tambahan program baharu, iaitu Program Pertanian Pintar (*Smart Precision Farming*) dan Pelancongan Tani (*Agri Tourism*) yang bukan sahaja dapat meningkatkan bilangan pelajar tetapi juga menawarkan kepakaran dalam bidang yang relevan dengan keperluan negara. Program Pertanian Pintar kini sedang dalam proses kelulusan penawaran, manakala Program Pelancongan Tani masih berada di peringkat penilaian dalaman. Selain itu, usaha promosi yang lebih giat telah dan sedang dilaksanakan seperti melalui Program Jom Masuk U yang bertujuan untuk menambah bilangan pelajar bagi program pengajian sedia ada.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : PUAN VIVIAN WONG SHIR YEE
[SANDAKAN]**

SOALAN

PUAN VIVIAN WONG SHIR YEE [SANDAKAN] minta **MENTERI PELANCONGAN, SENI DAN BUDAYA menyatakan secara terperinci :-**

- (a) jumlah permohonan yang diterima bagi Geran Padanan Pelancongan, Seni dan Budaya (GPPSB) dan berapa jumlah permohonan itu yang telah diluluskan ketika ini; dan
- (b) berapa banyak permohonan untuk GPPSB dari Sabah yang telah diluluskan.

JAWAPAN

Tuan Yang di-Pertua,

1. Kerajaan telah mengumumkan Geran Padanan Pelancongan, Seni dan Budaya (GPPSB) ketika sesi pembentangan Bajet 2022. Inisiatif di bawah Pelan Pemulihan Pelancongan Kementerian Pelancongan, Seni dan Budaya (MOTAC) ini bertujuan untuk membantu penggiat industri pelancongan dari pelbagai sektor dan latar belakang dalam menganjurkan program/acara pelancongan, seni dan budaya yang berimpak tinggi pada tahun 2022.
2. GPPSB berjumlah RM50juta terbahagi kepada dua (2) iaitu:
 - (i) Geran Sepadan Sektor Pelancongan (GSSP) dengan peruntukan sebanyak RM25juta; dan
 - (ii) Geran Sepadan Sektor Kebudayaan (GSSK) juga dengan peruntukan sebanyak RM25juta.
3. Sehingga 30 Jun 2022, sebanyak 583 permohonan telah diterima meliputi 260 permohonan GSSP dan 323 permohonan GSSK sejak permohonan GPPSB dibuka pada 1 April 2022 kepada penggiat industri,
4. Sehingga 7 Julai 2022, sebanyak 136 permohonan telah diluluskan dengan peruntukan berjumlah RM23.2 juta. Kelulusan ini adalah untuk 55 permohonan GSSP dan 81 permohonan GSSK. Daripada jumlah tersebut, sebanyak 5 permohonan meliputi 3 permohonan GSSP dan 2 permohonan GSSK berjumlah RM800,000 telah diluluskan kepada penggiat industri di Sabah.
5. Untuk makluman, daripada jumlah permohonan yang diterima, sejumlah 87 permohonan telah ditolak kerana tidak memenuhi syarat yang telah ditetapkan manakala 360 permohonan lagi sedang dinilai.

Sekian, terima kasih.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)
DARIPADA : PUAN VIVIAN WONG SHIR YEE
[SANDAKAN]

SOALAN

PUAN VIVIAN WONG SHIR YEE [SANDAKAN] minta **MENTERI LUAR NEGERI** menyatakan bagaimana Kementerian akan berhubung dengan pihak Kerajaan China bagi membantu ribuan pelajar dari Malaysia untuk kembali ke China bagi menyambung pengajian tinggi mereka di negara itu, yang mana ia telah ditangguhkan sejak tahun 2020 akibat pandemik.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Sandakan atas pertanyaan yang dikemukakan.

Tuan Yang di-Pertua,

2. Sepertimana Yang Berhormat sedia maklum, Kerajaan Malaysia sentiasa peka dan prihatin terhadap isu yang melibatkan ribuan pelajar dari Malaysia yang masih belum kembali ke Republik Rakyat China (RRC) bagi menyambung pengajian tinggi mereka di negara itu sejak tahun 2020 akibat penutupan sempadan yang dilaksanakan oleh Kerajaan RRC.

SOALAN NO: 499

3. Untuk makluman, YB Menteri Luar Negeri pada 4 Disember 2021 yang lalu telah mencapai kata sepakat bersama TYT Wang Yi, Menteri Luar Negeri merangkap Penasihat Negara RRC dan telah bersetuju untuk melaksanakan satu projek rintis yang membolehkan pelajar-pelajar Malaysia kembali ke RRC secara berperingkat. Projek ini akan dilaksanakan berdasarkan keutamaan situasi para pelajar terutama pelajar tahun akhir dan pelajar-pelajar yang memerlukan latihan amali yang tidak boleh dilakukan secara maya.
4. Beberapa siri perbincangan telah diadakan di antara Kementerian Luar Negeri, Kementerian Pengajian Tinggi (KPT) dan Kedutaan Besar RRC di Kuala Lumpur bagi pelaksanaan projek ini pada awal tahun 2022. Namun, usaha ini terpaksa ditangguhkan sementara oleh Kerajaan RRC kerana peningkatan kes-kes COVID-19 secara berterusan di RRC. Peningkatan ini telah menjaskan urusan kemasukan para pelajar asing ke RRC, terutamanya melalui pintu masuk Shanghai yang telah dikenalpasti sebagai pintu masuk ke RRC bagi pelajar dari Malaysia. Akibat peningkatan ini, Shanghai telah mengalami lockdown sepenuhnya.
5. Namun, keadaan di RRC kini semakin kembali pulih dan Shanghai telah memansuhkan lockdown sedia ada pada 1 Jun 2022. Oleh yang demikian, kedua-dua Kerajaan telah memulakan perbincangan urusan kepulangan pelajar-pelajar Malaysia ke RRC.
6. Semasa Lawatan Rasmi TYT Wang Yi ke Malaysia pada 12 Julai 2022, kedua-dua Menteri Luar telahpun mengulangi komitmen bahawa Malaysia dan China sedang berusaha untuk membantu pelajar-pelajar Malaysia dari kumpulan pertama projek rintis tersebut untuk kembali ke RRC bagi menyambung pengajian tinggi mereka dalam masa terdekat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

**DARIPADA : PUAN VIVIAN WONG SHIR YEE
[SANDAKAN]**

TARIKH : JULAI – OGOS 2022

SOALAN

PUAN VIVIAN WONG SHIR YEE [SANDAKAN] minta **MENTERI PENGANGKUTAN** menyatakan secara terperinci senarai syarikat bas yang telah menerima Dana Sokongan Sementara Bas Berhenti-henti (ISBSF) di daerah Sandakan sejak 2020.

JAWAPAN

Tuan Yang Di Pertua,

1. Kerajaan telah mewujudkan skim Dana Bantuan Sementara Bas Berhenti-henti (ISBSF) bermula pada tahun 2012 termasuk di Sabah dan Sarawak. Objektif asasnya adalah untuk memastikan perkhidmatan bas berhenti-henti terutama di laluan-laluan yang tidak menguntungkan dapat terus beroperasi. Program ISBSF diwujudkan bagi menangani kerugian di dalam operasi harian pengendali bas berhenti-henti bagi memastikan kesinambungan terhadap perkhidmatan berkenaan. Ia juga bertujuan bagi menggalakkan pengendali bas berhenti-henti memulihkan laluan yang telah ditamatkan perkhidmatan akibat kerugian yang dialami dan mendorong pengendali dalam meningkatkan mutu perkhidmatan dengan menambah kekerapan perjalanan dan membaiki keadaan bas sekaligus memperbaiki aksesibiliti rakyat.

2. Di Sandakan, sebanyak 14 syarikat bas yang telah menerima Dana Sokongan Sementara Bas Berhenti-henti (ISBSF). Syarikat tersebut adalah:
 - i. Labuk Road Bus Company Sdn. Bhd.
 - ii. Alif Jaya
 - iii. Syarikat Pengangkutan ZN
 - iv. Syarikat Pengangkutan Salem Enterprise
 - v. Syarikat Tutong Enterprise
 - vi. Syt Pengangkutan Ilham
 - vii. Syarikat Sheikh Bersaudara
 - viii. Sykt Pengangkutan RS
 - ix. Junaidah Enterprise
 - x. Syarikat Pengangkutan Nursaiful
 - xi. Syarikat Pengangkutan Zarif Zikri
 - xii. Unsin Tandong
 - xiii. Syarikat Pengangkutan Permata Ilham
 - xiv. Syarikat Pengangkutan Lie

Sekian, terima kasih

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : PUAN VIVIAN WONG SHIR YEE
[SANDAKAN]**

SOALAN

YB PUAN VIVIAN WONG SHIR YEE [SANDAKAN] minta **MENTERI PERUMAHAN DAN KERAJAAN TEMPATAN menyatakan:-**

- (a) bilakah PPR Batu Putih Sandakan akan dibuka untuk permohonan dan bilakah kumpulan pertama bagi pemohon yang berjaya boleh berpindah masuk ke PPR itu; dan
- (b) apakah cara penyelesaian bagi membantu baki pemohon yang tidak berjaya mendapat kelulusan permohonan PPR itu.

JAWAPAN

Tuan Yang di-Pertua,

(a) Untuk makluman Ahli Yang Berhormat, Program Perumahan Rakyat (PPR) Batu Putih, Sandakan, Sabah meliputi 900 buah unit rumah telah siap dibina pada 18 Oktober 2019 dan telah diserahkan kepada Kementerian Kerajaan Tempatan dan Perumahan Sabah (KKTP Sabah) pada 17 Mac 2020 bagi tujuan pengurusan dan pengisian.

Walau bagaimanapun, mulai 17 Mac 2020, PPR Batu Putih ini telah diwartakan sebagai Pusat Kuarantin dan Rawatan COVID-19 Berisiko Rendah (PKRC) bagi menempatkan pesakit yang disyaki positif dan mempunyai *direct contact* dengan pesakit COVID-19. PKRC ini telah ditutup pada 17 Mac 2022 dan kini dalam proses penilaian kerosakan sebelum kerja-kerja pembaikan dibuat.

Untuk makluman Yang Berhormat juga, permohonan penyewaan bagi PPR Batu Putih Sandakan ini telah dilaksanakan mulai 1 Januari 2020 secara dalam talian melalui laman sesawang Sistem Pengurusan Perumahan Negara, Kementerian Perumahan dan Kerajaan Tempatan (KPKT) manakala urusan semakan dan penawaran pula akan dikendalikan oleh Majlis Perbandaran Sandakan (MPS) selaku pengurus bangunan.

Sehingga 5 Julai 2022, sebanyak 801 pemohon telah disemak dan berstatus layak serta boleh ditawarkan ke PPR ini berdasarkan merit kelayakan. Proses penawaran dan pengisian penyewa dijangka akan dibuat bermula suku keempat tahun 2022.

(b) Sekiranya terdapat mana-mana pemohon yang layak tetapi tidak berjaya ditawarkan ke PPR ini, pihak Kementerian mencadangkan supaya

SOALAN NO: 501

pemohon mengemukakan permohonan bagi mana-mana PPR di Daerah Sandakan melalui Majlis Perbandaran Sandakan (MPS). Walau bagaimanapun, kelulusan permohonan adalah tertakluk kepada kekosongan unit serta memenuhi syarat yang telah ditetapkan.

Sekian, terima kasih.

**PEMBERITAHUAN PERTANYAAN JAWAB BUKAN LISAN DEWAN
RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : DATO' SERI DR. WAN AZIZAH WAN ISMAIL
[PANDAN]**

SOALAN

**DATO' SERI DR. WAN AZIZAH WAN ISMAIL [PANDAN] minta
MENTERI KANAN PENDIDIKAN menyatakan :-**

- (a) apakah statistik terkini kes buli yang telah dibuat aduan polis dan faktor utama yang menyebabkan berlakunya kes buli di sekolah-sekolah; dan
- (b) apakah langkah-langkah penyelesaian yang sewajarnya diambil oleh pihak Kementerian, sekolah dan ibu bapa.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memandang serius isu buli yang melibatkan murid sekolah bawah KPM dan melaksanakan pendekatan yang bersesuaian bagi membendung gejala buli.

Untuk makluman Ahli Yang Berhormat, statistik daripada Polis Diraja Malaysia (PDRM) merekodkan terdapat sebanyak 87 kes buli yang dibuat aduan polis pada Januari hingga Jun 2022. Antara faktor berlakunya salah laku buli dalam kalangan murid adalah disebabkan masalah keluarga dan pengaruh rakan sebaya.

Dalam hal ini, KPM telah melaksanakan pelbagai penambahbaikan berterusan bagi mengukuhkan pendekatan sedia ada dengan memberi tumpuan kepada empat aspek utama iaitu penyedaran, pelaporan, penghukuman dan pemantauan.

Untuk makluman Ahli Yang Berhormat, dalam konteks penyedaran, KPM telah memperkenalkan konsep Sekolahku SEJAHTERA. Pendekatan ini bertujuan memupuk dan menerapkan elemen dan nilai penting kehidupan dalam kalangan warga sekolah, termasuk murid. Elemen ini diterap dan dididik oleh guru secara langsung atau tidak langsung di dalam aktiviti kurikulum dan kokurikulum. Ini bagi memastikan murid dapat benar-benar menghayatinya seterusnya menjadi sebahagian daripada amalan dalam kehidupan mereka sama ada di sekolah atau di luar sekolah. Konsep ini memberi tumpuan kepada 14 elemen, iaitu:

- S - Selamat, Seronok & Sihat
- E - Etika & Empati
- J - Jati Diri
- A - Adab Sopan
- H - Harmoni
- T - Tekun, Teliti & Terampil
- E - Eksplorasi
- R - Rasional

A - Artikulasi

Penerapan elemen selamat, sihat, seronok, empati, jati diri, adab sopan, harmoni dan rasional dalam kalangan warga sekolah akan dapat membentuk keperibadian murid yang menyedari bahawa buli perlu dibanteras sepenuhnya.

Dalam aspek pelaporan, KPM telah menyediakan saluran pelaporan bagi membolehkan pihak sekolah melaporkan kes buli kepada KPM. Pada masa kini KPM juga sedang merangka sistem pelaporan yang akan membolehkan warga sekolah termasuk murid dan ibu bapa mereka membuat aduan terus kepada pihak KPM dan maklumat yang diterima akan dilindungi. KPM akan terus menambah baik sistem pelaporan kes buli bagi memastikan pendekatan yang terbaik dapat dibangunkan.

KPM juga telah menyediakan Garis Panduan Mencegah dan Menangani Perbuatan Buli Dalam Kalangan Murid di Sekolah dan Buku Panduan Pengurusan Menangani Buli Di Sekolah sebagai panduan kepada pihak sekolah.

Berhubung dengan penghukuman di peringkat sekolah, KPM telah mengeluarkan Surat Pekeliling Ikhtisas (SPI) Bil. 8/2010 yang menyentuh tentang hukuman terhadap pelaku buli di sekolah atau di asrama. KPM sedang meneliti hukuman ke atas murid yang melakukan perbuatan buli dengan membuat penambahbaikan kepada mana-mana hukuman yang tersenarai dalam SPI tersebut. Ini bagi memastikan hukuman yang dikenakan adalah setimpal dan menjadi pendekatan pencegahan yang berkesan.

Di samping itu, terdapat Peraturan-Peraturan Pendidikan (Disiplin Murid) 1959 [L.N.61] yang mengawal disiplin murid-murid sekolah. Peraturan sedia ada memperuntukkan bidang kuasa Pengetua atau Guru Besar untuk mengambil tindakan disiplin terhadap murid dan tertakluk kepada tahap keseriusan kes boleh mengakibatkan murid digantung atau dibuang sekolah sekiranya Pengetua atau Guru Besar berpuas hati perlu untuk melakukan sedemikian bagi tujuan mengawal disiplin murid di sekolah tersebut.

Untuk makluman Ahli Yang Berhormat, KPM mempunyai kuasa yang mencukupi untuk menangani kejadian buli di sekolah. Sekiranya kejadian buli berlaku, murid yang menjadi mangsa boleh melaporkan kepada pihak sekolah atau kepada pihak polis untuk siasatan lanjut. Berhubung cadangan berkenaan penggubalan Akta Anti Membuli, ianya adalah di luar bidang kuasa KPM kerana buli tidak terhad kepada murid sekolah sahaja. Setakat ini, kesalahan berkaitan buli secara lisan atau fizikal boleh mengguna pakai peruntukan sedia ada dalam Kanun Keseksaan [Akta 574] iaitu di bawah Seksyen 504, Seksyen 509, Seksyen 323, Seksyen 324, Seksyen 325 dan Seksyen 326.

Oleh itu, sekiranya perlakuan buli tersebut termasuk dalam salah satu kesalahan yang diperuntukan dalam mana-mana seksyen di atas, siasatan akan dilaksanakan oleh pihak polis.

Bagi aspek pemantauan pula, pada masa ini pemantauan di sekolah dilaksanakan oleh pentadbir, guru dan warden yang terdiri daripada kalangan guru. KPM juga sentiasa mengingatkan guru bimbingan dan kaunseling memberikan khidmat bimbingan dan kaunseling kepada pembuli dan mangsa buli serta murid yang cenderung untuk melakukan perbuatan membuli.

KPM sentiasa mengingatkan pihak sekolah agar berusaha mewujudkan persekitaran sekolah yang selamat menerusi Program Sekolah Selamat dengan kerjasama agensi kerajaan dan bukan kerajaan seperti Polis Diraja Malaysia (PDRM), Kumpulan Penggerak Ibu bapa Komuniti dan Swasta (PIBKS); *National Institute of Occupational Safety and Health* (NIOSH) serta Jabatan Sukarelawan Malaysia (RELA). KPM turut mengarahkan semua sekolah termasuk sekolah asrama untuk melaksanakan program kesedaran menangani isu buli bersama-sama Pegawai Perhubungan Sekolah (PPS) dari Polis Diraja Malaysia (PDRM) bermula Januari 2022 secara berterusan.

SOALAN NO : 502

Terkini, KPM telah mengambil inisiatif menubuhkan Jawatankuasa Khas Bagi Meneliti dan Menambahbaik Prosedur Pengendalian Kes Gangguan Seksual dan Buli di Institusi Pendidikan pada 12 Mei 2022. Ahli jawatankuasa khas ini terdiri daripada individu yang mempunyai kepakaran dalam bidang pendidikan, pengendalian kes jenayah, gangguan seksual, penelitian sistem, prosedur kerajaan dan kriminologi. Jawatankuasa ini sedang meneliti semua dokumen, kaedah dan prosedur sedia ada serta mengesyorkan tindakan dan penambahbaikan yang boleh dilaksanakan oleh KPM.

KPM yakin dengan pendekatan menyeluruh yang dilaksanakan dapat menangani isu buli di sekolah.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN [BERTULIS]

**DARIPADA : DATO' SERI DR. WAN AZIZAH WAN ISMAIL
[PANDAN]**

SOALAN

YB DATO' SERI DR. WAN AZIZAH WAN ISMAIL [PANDAN] minta **MENTERI PERUMAHAN DAN KERAJAAN TEMPATAN** menyatakan apakah strategi dan perancangan Kementerian untuk menambah baik sistem perparitan dan saliran longkang di kawasan PBT kerana sistem sedia ada tidak dapat menampung kapasiti aliran air tinggi.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) telah mewujudkan Jawatankuasa *Task Force Bagi Mengatasi Masalah Banjir Kilat* yang menyelaraskan penyelesaian antara kerajaan negeri, jabatan dan agensi teknikal bagi mengatasi masalah banjir kilat di kawasan Pihak Berkuasa Tempatan (PBT). Jawatankuasa ini telah mengambil kira faktor-faktor banjir kilat seperti sistem perparitan yang telah uzur, tidak berfungsi dan tidak sistematik.

Selain itu, Jawatankuasa ini telah menyediakan draf Pelan Tindakan Bagi Mengatasi Masalah Banjir di Kawasan PBT bagi tempoh lima (5) tahun (2021 – 2025) untuk dilaksanakan oleh Jabatan Kerajaan Tempatan (JKT), Jabatan Pengairan dan Saliran (JPS), Jabatan Kerja Raya (JKR), Setiausaha Kerajaan Negeri dan PBT. Pelan tindakan itu memberikan penekanan kepada perkara-perkara berikut:

- a) menaik taraf sistem saliran yang tidak sistematik/ tersumbat/ tidak berfungsi;
- b) mewujudkan penyenggaraan sistem saliran;
- c) mewujudkan kawalan hakisan dan enapan;
- d) menyediakan Pelan Induk Saliran Mesra Alam (PISMA); dan
- e) mempergiatkan kempen kesedaran awam dan *capacity building* kepada orang awam.

KPKT juga telah menyalurkan Peruntukan BP.1 bertujuan menaik taraf sistem perparitan dan longkang di kawasan PBT yang melibatkan peruntukan RM34.2 juta bagi tahun 2021 dan RM57.1 juta bagi tahun 2022.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

DARIPADA : DATO' SERI DR. WAN AZIZAH WAN ISMAIL (PANDAN)

SOALAN

DATO' SERI DR. WAN AZIZAH WAN ISMAIL (PANDAN) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah status terkini perancangan untuk mewujudkan TASKA di tempat kerja bagi agensi Kerajaan terutamanya untuk golongan barisan hadapan seperti doktor, jururawat, polis dan guru sekolah yang telah diperuntukkan sebanyak RM30 juta bagi Belanjawan tahun 2020 dan 2021.

JAWAPAN

Tuan Yang di-Pertua,

Ucapan Bajet 2019 telah mengumumkan bahawa peruntukan RM10 juta disediakan untuk menambah 50 buah TASKA di Tempat Kerja (TTKA) baharu di bangunan Kerajaan. Pada tahun 2020, Kerajaan meningkatkan peruntukan kepada RM30 juta bagi menyediakan lebih banyak TASKA terutamanya di hospital dan sekolah.

Belanjawan 2021 sekali lagi memperuntukkan RM30 juta untuk penubuhan TASKA di bangunan-bangunan Kerajaan, terutamanya di hospital.

Pada tahun 2020, 30 buah TTKA telah diluluskan dan daripada jumlah tersebut 25 buah TTKA ditubuhkan bagi manfaat petugas barisan hadapan iaitu 15 buah TTKA di Kementerian Kesihatan Malaysia (KKM), lapan (8) buah TTKA di bawah Kementerian Pendidikan Malaysia (KPM) dan dua (2) buah TTKA di Kementerian Pengajian Tinggi (KPT).

Pada tahun 2021 pula, sebanyak 72 TTKA telah diluluskan dan daripada jumlah tersebut, 29 TTKA ditubuhkan bagi manfaat petugas barisan hadapan iaitu sebanyak enam (6) buah TTKA di Kementerian Kesihatan Malaysia (KKM), 15 buah TTKA di bawah Kementerian Pendidikan Malaysia (KPM) dan lapan (8) buah TTKA di Kementerian Pengajian Tinggi (KPT) seperti pecahan berikut :

Kementerian	Negeri	Bil. TTKA (2020)	Negeri	Bil. TTKA (2021)
KKM	Kedah	2	Kedah	1
	Perak	3	Pulau Pinang	1
	Johor	2	Selangor	1
	Kelantan	5	Kuala Lumpur	1
	Sabah	1	Pahang	2
	Labuan	2		
		15		6

SOALAN NO. : 504

Kementerian	Negeri	Bil. TTKA (2020)	Negeri	Bil. TTKA (2021)
KPM	Perlis	1	Pulau Pinang	1
	Kedah	1	Kedah	1
	Perak	1	Perak	2
	Selangor	3	Selangor	1
	Sabah	2	Kuala Lumpur	2
			Negeri Sembilan	2
			Johor	3
			Pahang	1
			Sabah	1
			Sarawak	1
Jumlah		8		15
KPT	Kedah	1	Perlis	2
	Kelantan	1	Perak	1
			Selangor	3
			Kuala Lumpur	1
			Negeri Sembilan	1
Jumlah		2		8
Jumlah keseluruhan		27		29

Bagi tahun 2020 dan 2021, sebanyak 102 TTKA telah diluluskan dan 52% daripada bilangan keseluruhan TTKA iaitu 54 buah TTKA ditubuhkan untuk kepentingan petugas barisan hadapan seperti doktor, jururawat dan guru. Walau bagaimanapun, pada tahun 2020, negara amat terkesan dengan penularan wabak COVID-19 dan Perintah Kawalan Pergerakan bermula 17 Mac 2020 menyebabkan permohonan penubuhan TTKA ini berkurangan.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

DARIPADA : DATO' SERI DR. WAN AZIZAH WAN ISMAIL (PANDAN)

SOALAN

DATO' SERI DR. WAN AZIZAH WAN ISMAIL (PANDAN) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah perancangan dan strategi Kementerian dalam memenuhi keperluan warga emas memandangkan negara dijangka akan mencapai status negara tua menjelang tahun 2030.

JAWAPAN

Tuan Yang di-Pertua,

Malaysia dijangka mencapai status negara tua menjelang tahun 2030 apabila 15.3 peratus daripada populasi negara mencapai umur 60 tahun dan ke atas berdasarkan unjuran data Jabatan Perangkaan Malaysia. Sehubungan dengan itu, usaha bersepadu sedang diambil untuk mempertingkat penjagaan, perlindungan dan sokongan bagi membolehkan warga emas menjadi anggota masyarakat yang aktif. Justeru itu, kerajaan telah membuat perancangan dan mengambil langkah sewajarnya bagi menghadapi perkara ini.

Menyedari hakikat ini, Kerajaan telah mengambil langkah persediaan awal untuk menangani isu penuaan penduduk dengan penggubalan Dasar Warga Tua Negara pada tahun 1995 dan disusuli dengan Pelan Tindakan Warga Tua Negara pada tahun 1998. Seterusnya Dasar dan Pelan Tindakan ini telah dikaji semula dan digantikan dengan Dasar dan Pelan Tindakan Warga Emas Negara pada 5 Januari 2011. Selain itu, Kementerian Pembangunan Wanita, Keluarga dan Masyarakat (KPWKM) kini sedang dalam pengkajian semula Dasar dan Pelan Tindakan Warga Emas Negara dan juga telah melaksanakan satu kajian berkenaan pewujudan satu (1) akta khusus bagi warga emas iaitu “Kajian Kandungan, Pendekatan Dan Skop Bagi Pewujudan Satu Akta Khusus Untuk Warga Emas Di Malaysia” pada hujung tahun 2021. Hasil daripada kajian ini, satu (1) kerangka draf undang-undang telah dihasilkan dan sedang diteliti oleh KPWKM.

KPWKM juga telah melaksanakan beberapa kajian seperti “Kajian Diagnostik bagi Membentuk Model Penjagaan Warga Emas Jangka Masa Panjang yang Bersepadu dan Mampan di Malaysia” yang telah disiap pada tahun 2021 dan juga “Kajian Preparation Towards an Aged Nation by 2020 – Age-friendly City (Taiping)” yang baru sahaja berakhir pada Mei 2022. Hasil daripada semua kajian ini akan diteliti dan diambil kira dalam persediaan negara ke arah menjadi negara tua.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : DATO' SERI DR. WAN AZIZAH WAN ISMAIL (PANDAN)

SOALAN

DATO' SERI DR. WAN AZIZAH WAN ISMAIL (PANDAN) minta **MENTERI TENAGA DAN SUMBER ASLI** menyatakan apakah langkah yang telah dimulakan oleh pihak Kementerian untuk memastikan Malaysia dapat menjadi sebuah negara yang menjana Sumber Tenaga Diperbaharui (*Renewable Energy*) secara mampan untuk masa depan negara. Apakah keberhasilannya sehingga kini.

JAWAPAN

Tuan Yang di-Pertua,

1. Untuk makluman Ahli Yang Berhormat, bagi memastikan Malaysia dapat menjadi sebuah negara yang menjana Sumber Tenaga Boleh Baharu (TBB) dalam pembekalan elektrik secara mampan untuk masa depan negara, Kerajaan telah melancarkan Pelan Hala Tuju Tenaga Boleh Baharu Malaysia ataupun dengan izin, Malaysia Renewable Energy Roadmap (MyRER).
2. MyRER telah menetapkan sasaran kapasiti terpasang TBB dalam perbekalan elektrik negara sebanyak 31% pada tahun 2025 dan 40% menjelang tahun 2035. Pelan ini turut menggariskan kerangka strategik untuk mencapai visi pembangunan TBB negara iaitu “Ke arah Sistem Tenaga Rendah Karbon” melalui pelaksanaan empat (4) tonggak berasaskan teknologi iaitu solar, bio-tenaga, hidro dan sumber-sumber baharu.
3. Sehingga suku pertama tahun 2022, campuran kapasiti Tenaga Boleh Baharu Negara telah mencapai 9,381MW atau 23% daripada keseluruhan kapasiti terpasang bekalan elektrik negara.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN HAJI WAN HASSAN BIN MOHD
RAMLI [DUNGUN]

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI KEWANGAN** menyatakan berapa jumlah keuntungan syarikat berkaitan Kerajaan (GLC) telah disalurkan kepada Tanggungjawab Sosial Korporat (CSR) terutamanya melibatkan pemberian pendidikan.

JAWAPAN

Tuan yang di-Pertua,

Untuk makluman Yang Berhormat, syarikat-syarikat berkaitan Kerajaan (*Government Linked Companies* atau GLC) sememangnya aktif dalam pelbagai inisiatif Tanggungjawab Sosial Korporat (*Corporate Social Responsibility - CSR*) samada dalam program peringkat nasional ataupun program tersendiri yang dijalankan di peringkat syarikat masing-masing.

Sebagai contoh, bagi tahun 2021, syarikat Khazanah Nasional Berhad telah menyalurkan sejumlah RM216 juta untuk aktiviti CSR dan sebanyak RM162 juta daripada jumlah tersebut telah diagihkan untuk program pendidikan. Selain itu, syarikat-syarikat GLC lain seperti Permodalan Nasional Berhad, Bank Pembangunan Malaysia Berhad, Bank Simpanan Nasional, Perbadanan Nasional Berhad, Agrobank dan SME Bank telah menyalurkan sejumlah RM72 juta untuk tujuan CSR yang mana sebanyak RM39 juta daripadanya digunakan untuk membiayai sektor pendidikan.

NO SOALAN :507

Bagi memudahkan penyelarasan proses penyaluran bantuan, GLC/GLIC Disaster Response Network (GDRN) telah diwujudkan. Rangkaian Tindak Balas Bencana Berkaitan Kerajaan (GLC) dan Syarikat Pelaburan Berkaitan Kerajaan (GLIC) (GDRN) kini dikenali sebagai GLC Demi Rakyat dan Negara, dengan skop yang diperluaskan daripada Jalinan Kemanusiaan sedia ada kepada Jalinan Ilmu dan Jalinan Sejahtera.

Jalinan Ilmu merangkumi biasiswa, peluang dan akses pendidikan serta pembangunan kemahiran insan. Manakala, Jalinan Sejahtera pula mengutamakan pembinaan kehidupan dari segi menjana pendapatan, membina kemahiran vokasional dan ilmu pengurusan kewangan, serta memastikan kesejahteraan kesihatan dan alam sekitar.

Dengan skop baharu korporat ini ini, GDRN akan menerajui usaha Tanggungjawab Sosial Korporat (CSR) secara lebih selaras dan teratur bagi mengoptimumkan sumber terkumpul GLC dan GLIC, sekali gus memanfaatkan lebih ramai B40 dan golongan tumpuan tertentu.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : JAWAB BUKAN LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

SOALAN

Minta **PERDANA MENTERI** menyatakan apakah perancangan pihak Kerajaan dalam memberi kesedaran kepada orang ramai dalam isu pelaburan Forex yang ternyata haram mengikut keputusan Majlis Fatwa Kebangsaan.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Perdagangan Matawang (FOREX) mempunyai pelbagai gambaran dan bentuk. Bagi Perdagangan Pertukaran Matawang Asing oleh Individu Secara Lain (Individual Spot Forex) melalui platform elektronik telah difatwakan haram dalam Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia Kali Ke-98 yang bersidang pada 13-15 Februari 2012.
2. Oleh itu, pihak JAKIM sentiasa melaksanakan program seminar, diskusi dan muzakarah berkaitan kewangan Islam dalam memberi kesedaran dan pengetahuan kepada masyarakat. Antara program yang dilaksanakan adalah program Seminar Pendidikan Fatwa dan juga Diskusi Fikh Kotemporari: Isu Muamalat yang dilaksanakan di negeri-negeri dalam usaha memberikan pengetahuan kepada masyarakat tentang isu-isu muamalat yang berlaku termasuk isu berkaitan pelaburan Forex.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

**DARIPADA : YB TUAN HAJI WAN HASSAN BIN MOHD
RAMLI (DUNGUN)**

SOALAN

TUAN HAJI WAN HASSAN BIN MOHD RAMLI [DUNGUN] minta **MENTERI KANAN KERJA RAYA** menyatakan pendapatan syarikat konsesi melalui kutipan tol setiap lebuh raya, pampasan Kerajaan setakat ini dan tarikh tamat tempoh perjanjian konsensi.

JAWAPAN

Tuan Yang Di-Pertua,

Untuk makluman Ahli Yang Berhormat, jumlah hasil tol bagi 14 syarikat konsesi melibatkan 30 lebuh raya yang beroperasi sehingga tahun 2021 adalah sebanyak RM95.52 bilion. Jumlah pampasan yang telah dibayar oleh Kerajaan kerana penangguhan kenaikan kadar tol bagi lebuh raya yang terlibat sehingga tahun 2021 adalah sebanyak RM8.04 bilion.

Untuk makluman Ahli Yang Berhormat juga, berdasarkan Perjanjian Konsesi sedia ada yang berkuat kuasa, tempoh konsesi bagi lebuhraya yang beroperasi akan tamat di antara tahun 2028 – 2063. Walau bagaimanapun tempoh konsesi tersebut tertakluk kepada keputusan Kerajaan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN
**DARIPADA : TUAN HAJI WAN HASSAN BIN MOHD RAMLI
[DUNGUN]**

SOALAN

Minta **PERDANA MENTERI** menyatakan pencapaian yang telah dicapai oleh Jabatan Pendakwaan Syariah Wilayah Persekutuan (JAPENS WP) selaku agensi baru yang ditubuhkan tahun 2016.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Untuk makluman YB, penubuhan Jabatan Pendakwaan Syariah Wilayah Persekutuan (JAPENSWP) adalah merupakan inisiatif yang telah dilaksanakan oleh Jabatan Kemajuan Islam Malaysia (JAKIM) dan Jabatan Agama Islam Negeri (JAIN) dengan kerjasama beberapa agensi kerajaan yang berkaitan sejak 2007, secara prinsipnya bersetuju dengan cadangan memperkasakan perundungan Syariah melalui pengasingan Bahagian Pendakwaan daripada JAIN dan dinaik taraf kepada sebuah jabatan.
2. Langkah ini adalah selaras dengan agenda dalam Program Transformasi Kerajaan (GTP) yang mensasarkan objektifnya untuk mentransformasikan perkhidmatan awam ke arah yang lebih efektif dalam penyampaian perkhidmatan dan bertanggungjawab atas keberhasilan yang menjadi keutamaan kepada rakyat.

NO SOALAN : 510

3. Penubuhan Jabatan Pendakwaan Syariah Wilayah Persekutuan (JAPENSWP) di bawah Jabatan Perdana Menteri (JPM) adalah pada 1 November 2016 melalui Waran Perjawatan Bil. A227 Tahun 2016 secara rasminya Bahagian Pendakwaan, Jabatan Agama Islam Wilayah Persekutuan diasingkan dari Jabatan Agama Islam Wilayah Persekutuan (JAWI) dan mula bertindak sebagai suatu entiti sendiri dengan nama Jabatan Pendakwaan Syariah Wilayah Persekutuan (JAPENSWP).
4. Berdasarkan Waran Perjawatan Bil. A 195 Tahun 2018, bilangan keseluruhan perjawatan di JAPENSWP adalah seramai 36 orang yang terdiri daripada kumpulan pengurusan tertinggi, kumpulan pengurusan dan profesional dari gred 41 hingga 52 dan kumpulan pelaksana dari gred 14 hingga 29. Perjawatan di JAPENSWP adalah terdiri daripada skim perkhidmatan Pegawai Syariah dan Pembantu Syariah (LS) yang diuruskan oleh Jabatan Kehakiman Syariah Malaysia (JKSM) selaku Ketua Perkhidmatan. Manakala skim perkhidmatan yang lain iaitu skim N, FT dan H diuruskan oleh pihak Jabatan Perdana Menteri (JPM).
5. Sejak penubuhan, JAPENSWP telah mengendalikan sebanyak 4149 kes jenayah Syariah di mahkamah syariah dalam tempoh 2017 hingga Jun 2022. Manakala jumlah kes selesai adalah sebanyak 2961 kes.
6. Pecahan pengendalian kes jenayah syariah JAPENSWP dalam tempoh 2017 hingga Jun 2022, seperti jadual berikut;

TAHUN	JUMLAH KES YANG DIDAKWA	JUMLAH KES SELESAI
2017	338	278
2018	927	734
2019	1168	576
2020	730	455
2021	531	501
2022	455	417

7. Jadual di atas menunjukkan terdapat penurunan bilangan kes jenayah yang didakwa pada tahun 2020 iaitu sebanyak 730 kes dan 2021 sebanyak 531 kes, berbanding 1168 kes pada tahun 2019. Hal ini disebabkan penjadualan semula kes disebabkan pematuhan kepada

SOP kehadiran ke mahkamah yang ditetapkan berikutan pandemik Covid-19 yang melanda negara sejak pada tahun 2020.

8. Penganjuran buat julung kalinya Konvensyen Perundangan Jenayah Syariah, Pelancaran Kit Pendakwaan Siri 1 dan Webinar Perundangan Jenayah Syariah secara dalam talian ketika negara berhadapan dengan situasi pandemik Covid-19 pada tahun 2020 dan 2021 adalah antara contoh pencapaian bersifat perintis dengan penyertaan peserta dari seluruh negara boleh dijadikan sebagai penanda aras bagi kecemerlangan JAPENSWP di masa hadapan.

9. Pelancaran Kit Pendakwaan Siri 1 yang merupakan sebuah buku panduan yang dicetak khas untuk kegunaan semua pendakwa syarie yang membincangkan kaedah dan tatacara proses perbicaraan berkaitan kes jenayah syariah berdasarkan peruntukan sedia ada. Buku ini merupakan satu panduan lengkap kepada pendakwa syarie sedia ada dan pendakwa syarie baru sebagai asas kepada pembangunan kompetensi pendakwa syarie di JAPENSWP dalam memantapkan kualiti pendakwaan kes jenayah syariah agar lebih cekap dan berkesan.

10. Selain itu, JAPENSWP juga telah bekerjasama dengan jabatan pendakwaan dan bahagian pendakwaan syariah di Malaysia dalam menyemak semula Arahan Amalan Mahkamah Syariah berkenaan pengendalian kes jenayah syariah bagi penambahbaikan penyampaian perkhidmatan pendakwaan yang lebih baik dari semasa ke semasa.

11. Arahan Amalan No.7 Tahun 2020 berkenaan Garis Panduan Pakaian Ketua Pendakwa Syarie dan Pendakwa Syarie semasa mengendalikan prosiding di mahkamah Syariah adalah salah satu penambahbaikan yang dibuat bagi mewujudkan identiti tersendiri dan *haibah* pendakwa syarie.

12. Dalam mencapai Visi Jabatan untuk menjadi sebuah agensi pendakwaan syariah yang berwibawa pada tahun 2026, JAPENSWP juga telah membangunkan Pelan Stategik JAPENSWP bagi tahun 2022-2026 sebagai manifestasi ketersediaan warga JAPENSWP bagi tempoh lima tahun akan datang. Penyediaan pelan ini adalah mengambil kira konsep

Manhaj Rabbani dan berteraskan prinsip maqasid syariah dalam perancangan dasar, kaedah pelaksanaannya dan pendekatan bagi penyelesaian masalah.

13. JAPENSWP pada Februari 2022 telah membangunkan Prosedur Operasi Standard (SOP) Dilepaskan Tanpa Dibebaskan (DNAA) bagi memberi panduan dan menyelaraskan proses kerja pendakwa syarie bagi kes yang hendak dilepaskan tanpa dibebaskan (DNAA). SOP ini diwujudkan bagi menyelesaikan masalah tunggakan kes jenayah syariah yang dikendalikan di mahkamah syariah disebabkan ketidakhadiran dan kesukaran untuk mengesan kedudukan terkini Orang Kena Saman (OKS) terutama dalam kes matrimoni yang dimulakan dengan saman sebagaimana peruntukan Akta Undang-Undang Keluarga Islam (Wilayah-Wilayah Persekutuan) 1984 [Akta 303].

14. JAPENSWP juga telah menerbitkan laporan tahunan JAPENSWP buat pertama kalinya semenjak penubuhan JAPENSWP. Laporan tahunan 2019 dan 2020 ini merupakan laporan komprehensif yang boleh dijadikan sebagai sumber rujukan atau panduan terhadap salah satu cabang perkhidmatan dalam sistem perundangan syariah dari aspek pendakwaan bagi kesalahan jenayah syariah dan merakamkan imbasan aktiviti JAPENSWP sepanjang tahun 2019 dan 2020. Segala usaha ini adalah bukti kerjasama seluruh warga kerja JAPENSWP dalam melaksanakan transformasi dari segala aspek pengurusan agar visi, misi, objektif dan aspirasi JAPENSWP dapat direalisasikan.

15. JAPENSWP sentiasa berusaha melakukan penambahbaikan terhadap penyampaian perkhidmatan bagi meningkatkan lagi prestasi pada masa akan datang dengan perancangan aktiviti yang berterusan kepada warga kerja bagi melahirkan perkhidmatan yang adil, cekap dan efisien agar dapat memberi nilai tambah kepada sistem perundangan Syariah negara, selaras dengan misi melaksanakan pendakwaan Syariah yang bebas, berkualiti, berintegriti dan selaras dengan hukum Syarak dan juga peruntukan undang-undang.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : JAWAB BUKAN LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

SOALAN

Minta **PERDANA MENTERI** menyatakan adakah JAKIM pada hari ini terletak di bawah pentadbiran Majlis Raja-Raja selepas Majlis Kebangsaan Bagi Hal Ehwal Ugama Islam Kebangsaan (MKI) dipengerusikan oleh Tuanku Sultan atau ia masih kekal sebagai jabatan Kerajaan di bawah portfolio seorang Menteri.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Untuk makluman Ahli Yang Berhormat, Jabatan Kemajuan Islam Malaysia (JAKIM) kekal di bawah Jabatan Perdana Menteri (JPM) di bawah portfolio Menteri di Jabatan Perdana Menteri (Hal Ehwal Agama). Walau bagaimanapun, oleh kerana JAKIM berperanan sebagai sekretariat bagi Majlis Kebangsaan bagi Hal Ehwal Agama Islam Malaysia (MKI) di mana Ketua Pengarah JAKIM adalah Setiausaha bagi MKI, maka JAKIM bertanggungjawab merujuk kepada Majlis Raja-Raja dalam perkara melibatkan dasar hal ehwal Islam khususnya dalam hal ehwal perundangan Islam, pengurusan hal ehwal Islam dan pendidikan agama Islam.

2. Sebagaimana dimaklumi, Majlis Kebangsaan bagi Hal Ehwal Agama Islam Malaysia (MKI) adalah badan yang ditubuhkan oleh Majlis Raja-Raja dan ia berfungsi memberikan nasihat kepada Majlis Raja-Raja atas apa-apa perkara yang melibatkan perundangan, pengurusan dan pendidikan agama Islam.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

**DARIPADA : TUAN WILLIAM LEONG JEE KEEN
[SELAYANG]**

SOALAN

YB TUAN WILLIAM LEONG JEE KEEN [SELAYANG] minta **MENTERI PERUMAHAN DAN KERAJAAN TEMPATAN** menyatakan:-

- (a) bilangan projek, hak milik strata yang telah disampaikan kepada pemilikan kosong sejak Klaus 28 Perjanjian Jual Beli (Schedule H) diperkenalkan dan yang mana tidak; dan
- (b) bilangan pemaju projek yang gagal menyampaikan hak milik strata selepas lanjutan masa tamat dan tindakan yang diambil terhadap mereka.

JAWAPAN

Tuan Yang di-Pertua,

a) Untuk makluman Ahli Yang Berhormat, pengeluaran hak milik strata adalah dikendalikan oleh Pejabat Tanah dan Galian Negeri yang disampaikan kepada pemaju untuk dipindah milik kepada pembeli-pembeli. Oleh itu, Kementerian Perumahan dan Kerajaan Tempatan (KPKT) tiada maklumat berhubung perkara ini. Walau bagaimanapun, bagi penyerahan milikan kosong yang tidak disertakan dengan hak milik strata, sebanyak 638 permohonan telah diterima mulai dari tahun 2017 sehingga bulan Julai 2022. Daripada jumlah tersebut, sebanyak 488 permohonan adalah permohonan kali pertama manakala baki 150 permohonan adalah permohonan lanjutan. Perincian permohonan yang diluluskan adalah seperti berikut:

Permohonan		
Tahun	Pertama	Lanjutan
2017	8	2
2018	43	13
2019	124	19
2020	122	46
2021	127	49
2022	64	21
JUMLAH	488	150

b) Untuk makluman Ahli Yang Berhormat, Jabatan Perumahan Negara (JPN) tidak menyimpan sebarang rekod berkenaan dengan pemaju yang gagal mengemukakan hakmilik strata selepas tempoh pengecualian tamat. Ini adalah kerana di bawah Klausu 25(2), sekiranya pemaju tidak menyerahkan pemilikan kosong petak tersebut mengikut cara yang

SOALAN NO: 512

dinyatakan dalam fasal 27 dalam tempoh masa yang dinyatakan sepetimana subfasal (1), pemaju adalah bertanggungan untuk membayar kepada pembeli ganti rugi jumlah tertentu yang dikira dari hari ke hari pada kadar sepuluh peratus (10%) setahun daripada harga beli mulai habis tempoh yang dinyatakan dalam subfasal (1) hingga tarikh pembeli mengambil pemilikan kosong petak tersebut.

Sekian, terima kasih.

SOALAN NO: 512

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN WILLIAM LEONG JEE KEEN
[SELAYANG]

SOALAN :

TUAN WILLIAM LEONG JEE KEEN [SELAYANG] minta **PERDANA MENTERI** menyatakan status pelaksanaan Pelan Anti-Rasuah negara 2019 - 2023, pencapaian dan cabaran yang dihadapi.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. NACP telah bermula pelaksanaannya pada Januari 2019 yang dibahagikan kepada 6 bidang utama dan sehingga Disember 2019, sebanyak 29 inisiatif telah selesai dilaksanakan dengan pencapaian output. Susulan itu, Laporan Kemajuan NACP Bagi Tahun 2019 telah diterbit serta diedarkan di Parlimen pada November 2020.
2. Laporan Semakan Semula Separuh Penggal Pelan Antirasuah Nasional (NACP) 2019 – 2023 pula telah dikeluarkan pada Mei 2021 dengan menggariskan 82 inisiatif berdasarkan kepada keperluan penambahbaikan berterusan seiring dengan dasar semasa Kerajaan ke atas inisiatif-inisiatif yang digariskan dalam NACP dengan menggabung, menangguh dan menambah beberapa inisiatif lain.

3. Secara amnya, terdapat 13 inisiatif asal yang telah ditangguhkan pelaksanaannya melalui penerbitan Laporan Semakan Semula Separuh Penggal NACP berkenaan. Inisiatif yang ditangguhkan ini tidak bermaksud dihentikan malah telah diarah supaya kajian yang lebih mendalam dibuat sebelum sesuatu penambahbaikan dibuat ke atas inisiatif-inisiatif tersebut bagi merealisasikan pelaksanaannya. Hal ini kerana kebanyakannya memerlukan pindaan ke atas Perlembagaan Persekutuan dan pengenalan kepada beberapa perundangan baharu.

4. Sehingga Disember 2021 pula, 8 inisiatif lagi telah siap dilaksanakan menjadikan jumlah keseluruhan sebanyak 37 inisiatif NACP (33%) telah berjaya dilaksanakan dengan pencapaian output. Sehubungan itu, Laporan Kemajuan NACP Bagi Tahun 2020 dan 2021 telah diedarkan semasa persidangan Mesyuarat Pertama, Penggal Kelima, Parlimen Ke-14 Tahun 2022 yang lepas. Selain itu, terdapat lebih kurang 14 inisiatif lagi dijangka diselesaikan pelaksanaannya pada suku ketiga tahun 2022 yang menjadikan jumlah keseluruhan sebanyak 51 inisiatif bersamaan 44%.

5. Antara cabaran ketara yang dapat dikenal pasti adalah pelaksanaan inisiatif yang melibatkan pindaan kepada beberapa perundangan secara berangkai (berbangkit), pindaan ke atas Perlembagaan Persekutuan, kewujudan perundangan baharu serta implikasi kewangan dan perjawatan yang tinggi. Namun, sekiranya pelaksanaan inisiatif-inisiatif berkenaan melewati tahun 2023 seperti perancangan asal, GIACC akan menerapkan semula inisiatif-inisiatif tersebut ke dalam NACP versi baharu bagi tempoh pelaksanaan tahun 2024 hingga 2028 kelak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)

**DARIPADA : TUAN WILLIAM LEONG JEE KEEN
[SELAYANG]**

TARIKH : JULAI-OGOS 2022

SOALAN

TUAN WILLIAM LEONG JEE KEEN [SELAYANG] minta **MENTERI PENGANGKUTAN** menyatakan rancangan-rancangan dan jadual untuk penyediaan pengangkutan Mass Rapid Transit (MRT) untuk Kuala Lumpur dan Selangor dan bilakah MRT akan dibina untuk Selayang Baru dan Rawang.

JAWAPAN

Tuan Yang Di Pertua,

1. Projek *Klang Valley Mass Rapid Transit* (KVMRT) merupakan satu projek rangkaian rel bandar di Lembah Klang yang merangkumi tiga jajaran; MRT Laluan Kajang (MRT1), MRT Laluan Putrajaya (MRT2) dan MRT Laluan Lingkaran (MRT3). Projek MRT1 ataupun dikenali dengan nama MRT Laluan Kajang telah dimulakan pada 8 Julai 2011 dan telah siap serta memulakan operasinya pada Julai 2017. Laluan ini menghubungkan Sungai Buloh – Kajang dengan jajaran sepanjang 51 km dan mempunyai 31 buah stesen.
 2. Projek MRT2 ataupun MRT Laluan Putrajaya yang menghubungkan Sungai Buloh – Serdang - Putrajaya pula adalah sejauh 56.4 km dan terdiri daripada 36 buah stesen dan 4 stesen provisional. Projek ini telah dimulakan pada Oktober 2015 dan dijangka siap sepenuhnya menjelang Januari 2023.
 3. Fasa 1 laluan MRT2 yang menghubungkan Stesen Kwasa Damansara – Stesen Kg. Batu telah mula beroperasi pada 16 Jun 2022, manakala kerja-kerja pembinaan Fasa 2 (Stesen Kg. Batu – Putrajaya Sentral) pula berada pada tahap 98.4%.
 4. Projek MRT3 ataupun MRT Laluan Lingkaran adalah laluan lingkaran yang meliputi perimeter luar Bandaraya Kuala Lumpur di mana jajaran sepanjang 51km termasuk 2 depoh dan 33 stesen (termasuk 2 stesen sementara) di mana 10 daripadanya adalah stesen pertukaran yang menyambungkan MRT3 dengan stesen-stesen yang sedia ada termasuk KTM, LRT, Monorail, MRT Laluan Kajang dan MRT Laluan Putrajaya.
 5. Jajaran yang telah dikenalpasti bagi pembinaan MRT2 dan MRT3 tidak melalui Rawang dan Selayang, dan masih tiada sebarang perancangan untuk membina MRT di kawasan – kawasan tersebut pada masa kini. Kajian kebolehlaksanaan (*feasibility*) yang teperinci perlu dilaksanakan terlebih dahulu bagi mengenalpasti keperluan pembinaan MRT di kawasan – kawasan tersebut.
- Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA,
PARLIMEN KE-14**

PERTANYAAN : BUKAN LISAN (BERTULIS)
DARIPADA : Y.B. TUAN WILLIAM LEONG JEE KEEN
[SELAYANG]

SOALAN :

TUAN WILLIAM LEONG JEE KEEN [SELAYANG] minta **PERDANA MENTERI** menyatakan kriteria pelantikan Ketua Pesuruhjaya Pencegahan Rasuah Malaysia, tempoh pejabatnya, keperluan pendedahan aset dan kod etika di mana ketua sedang disiasat.

JAWAPAN

**YB DATO SERI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Seksyen 5(1) Akta Suruhanjaya Pencegahan Rasuah Malaysia 2009 [Akta 694] memperuntukkan bahawa Yang di-Pertuan Agong hendaklah, atas nasihat Perdana Menteri, melantik seorang Ketua Pesuruhjaya bagi Suruhanjaya Pencegahan Rasuah Malaysia, untuk selama apa-apa tempoh dan atas apa-apa terma dan syarat sebagaimana yang dinyatakan dalam surat cara pelantikannya.
2. Selain itu, Ketua Pesuruhjaya adalah disifatkan sebagai anggota perkhidmatan awam am Persekutuan bagi maksud tatatertib dan tertakluk kepada pematuhan terhadap Peraturan-peraturan Pegawai Awam (Kelakuan dan Tatatertib) 1993 termasuklah kewajipan mengisyiharkan harta. Ketua Pesuruhjaya SPRM juga tertakluk kepada Pekeliling Perkhidmatan Bilangan 3 tahun 2002 berkaitan Pemilikan dan Pengisyiharan Harta Pegawai Awam.
3. Selaras dengan itu, Ketua Pesuruhjaya SPRM telah membuat pengisyiharan harta beliau pada 2017 serta pada Jun 2022. Pengisyiharan beliau telah diambil maklum oleh Ketua Perkhidmatannya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : TUAN WILLIAM LEONG JEE KEEN
(SELAYANG)**

SOALAN

TUAN WILLIAM LEONG JEE KEEN (SELAYANG) minta **MENTERI PERTANIAN DAN INDUSTRI MAKANAN menyatakan :-**

- (a) punca harga tinggi ayam dan telur ayam; dan
- (b) syarikat dan perniagaan yang menerima subsidi penetapan harga ayam berjumlah RM729 juta dan kriteria memilih penerima tersebut.

JAWAPAN

Tuan Yang di-Pertua,

Untuk makluman Ahli Yang Berhormat, peningkatan harga ayam dan telur yang berlaku di pasaran tempatan sejak tahun lalu disebabkan oleh pelbagai faktor. Antara sebab utama yang menyumbang kepada senario tersebut adalah peningkatan kos operasi pengeluaran ayam di ladang yang mana sebahagian besarnya berpunca daripada peningkatan kos makanan ternakan (70%) di samping kos logistik, kos pekerja, kos utiliti dan kerugian kadar tukaran matawang asing.

Bagi membantu penternak yang terjejas, Kerajaan telah meluluskan pemberian subsidi ayam dan telur bermula dari 5 Februari 2022 sehingga 31 Ogos 2022 dengan peruntukan sebanyak RM1.1 bilion. Permohonan subsidi ini terbuka kepada penternak ayam pedaging dan penelur serta tertakluk kepada syarat-syarat yang telah ditetapkan oleh Jabatan perkhidmatan Veterinar seperti berikut:

- (i) penternak ayam pedaging dan ayam penelur di bawah kategori persendirian, integrator dan kontrak sahaja;
- (ii) penternak hendaklah mempunyai lesen menternak ayam yang sah mengikut Enakmen Perladangan Unggas negeri-negeri kecuali Negeri Pulau Pinang, Kelantan, Terengganu dan Wilayah Persekutuan Labuan;
- (iii) penternak hendaklah berdaftar dengan Jabatan Perkhidmatan Veterinar negeri bagi negeri Kelantan, Terengganu dan Wilayah Persekutuan Labuan; dan
- (iv) mengemukakan dokumen pembelian anak ayam dan invois jualan ayam hidup/ telur maklumat bank untuk tujuan pembayaran melalui Agrobank.

Setakat 29 Julai 2022, sebanyak 8,970 permohonan subsidi telah diluluskan berjumlah RM748 juta.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN WONG CHEN [SUBANG]

SOALAN

TUAN WONG CHEN [SUBANG] minta **MENTERI PELANCONGAN,
SENI DAN BUDAYA** menyatakan :-

- (a) usaha yang dilakukan untuk menyokong pemulihan senario seni pasca pandemik Malaysia ; dan
- (b) usaha yang dilakukan oleh Kementerian untuk mengetengahkan bakat kreatif tempatan kepada penduduk Malaysia.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) sentiasa berusaha sedaya upaya dalam membantu penggiat industri seni mendepani cabaran fasa pemulihan pasca pandemik. MOTAC melalui Jabatan dan Agensi di bawah seliaannya giat menjalankan pelbagai program serta inisiatif yang diumumkan Kerajaan kepada penggiat industri yang terjejas akibat pandemik.
2. Antara sokongan yang disediakan oleh MOTAC kepada industri boleh dikategorikan seperti berikut:-

Bantuan Kewangan

- (i) MOTAC melalui Jabatan Kebudayaan dan Kesenian Negara (JKKN) menyediakan Insentif Seni JKKN untuk penggiat dan NGO seni budaya serta universiti bagi menambah upaya mereka untuk melaksanakan program dan aktiviti seni budaya. Antara insentif yang disediakan adalah insentif kewangan sehingga RM15,000;
- (ii) Baucar Tunai Produk Kraf Tempatan di bawah inisiatif Pakej Perlindungan Rakyat dan Pemulihran Ekonomi (PEMULIH) ditawarkan bagi menggalakkan rakyat membeli produk kebudayaan dan seterusnya menyumbang kepada peningkatan pendapatan usahawan kraf. Sehingga 30 Jun 2022, sebanyak RM3,660,185 nilai baucar telah ditebus dengan nilai jualan melebihi RM17 juta;
- (iii) Penyaluran Bantuan Tunai sebanyak RM1,500 kepada Penggiat Industri Kebudayaan (Kraf) yang berdaftar dengan Kraftangan Malaysia bertujuan untuk membantu memulihkan perniagaan mereka. Sebanyak RM9juta diperuntukkan untuk disalurkan kepada 6,000 orang usahawan kraf;

- (iv) Menawarkan Geran Sepadan Sektor Kebudayaan (GSSK) kepada penggiat industri yang memenuhi syarat bertujuan untuk meringankan beban kewangan bagi melaksanakan program. Bantuan penawaran GSSK adalah sehingga RM500,000 bagi setiap penganjuran aktiviti/program yang akan dilaksanakan pada tahun 2022 ditawarkan kepada NGO dan syarikat yang berkemampuan untuk menggerakkan aktiviti kreatif berkaitan kebudayaan termasuk kraf. Sebanyak RM25 juta diperuntukkan untuk inisiatif ini; dan
- (v) Penawaran Baucar ‘*Buy Art Malaysia (BUY)*’ sebanyak RM1.2juta. Sehingga 30 Jun 2022, sejumlah RM776,000.00 tuntutan semula telah dibuat oleh 53 buah galeri seni awam dan swasta melibatkan nilai jualan keseluruhan karya seni melebihi RM2.18juta. Sejumlah 636 karya telah dibeli oleh peminat seni visual sepanjang program ini diperkenalkan. Selain itu, seramai 25 orang telah menerima bantuan melalui Tabung Bantuan Seni pada tahun 2022.

Penganjuran Program

- (i) Pelbagai program berdasarkan Pelancongan Budaya (*Culture Based Tourism*) telah diadakan bagi memastikan penggiat industri seni dapat terus berkarya dan menjana pendapatan. Program penyemarakan seni budaya yang dijalankan secara atas talian banyak membantu ketika pelaksanaan Perintah Kawalan Pergerakan pada tahun 2020 dan 2021, dan ia diteruskan bagi menyokong pemulihan seni pasca pandemik. Antara pengisian program yang dilaksanakan dengan kerjasama dan penglibatan pelbagai pihak serta NGO seni budaya ini adalah seperti demonstrasi produk, pameran maya, jualan secara dalam talian, pertandingan dan pencungkilan bakat;
- (ii) Bagi tahun 2022, acara-acara besar yang akan dianjurkan secara fizikal dijangka dapat menarik sebilangan pelancong dalam dan luar negara seperti Majlis Rumah Terbuka Malaysia, Festival *Magic of the Night* dan Pesta Floria;

- (iii) Program Pembangunan Keusahawanan Seni ASWARA 2022 telah dianjurkan secara percuma kepada graduan, para penggiat seni serta belia yang berminat. Selain itu, para peserta yang berjaya menamatkan kursus pada setiap siri (2 hari) akan diberikan bantuan pelan data secara percuma sebanyak RM150 setiap seorang. Program dilaksanakan secara dalam talian bagi menggalakkan penglibatan para peserta di seluruh Malaysia. Program ini memberi manfaat dengan melatih bakal usahawan seni di seluruh Malaysia mengenai asas pemasaran *online* dengan menawarkan pemantapan kefahaman berkenaan *business model* produk/ servis yang ingin ditawarkan dan pemasaran produk servis secara *online* dan *offline*;
- (iv) *Malaysia Art Ecosystem Festival* (MAEF) melibatkan 73 penyertaan yang terdiri daripada 20 buah galeri, di mana 10 syarikat yang menawarkan perkhidmatan berkaitan seni dan 37 penggiat seni dengan jumlah jualan karya seni melebihi RM180,000. Manakala Program *Art Decor* melibatkan 120 orang peserta dengan jumlah jualan karya seni sebanyak RM2,000,000;
- (v) Program Jejak Seni Malaysia merupakan program pemetaan ekosistem seni yang bermula pada tahun 2021 bertujuan memudahkan jaringan maklumat di atas talian yang menghubungkan peminat dan penggiat seni visual kepada ruang seni, program dan aktiviti serta komuniti; dan
- (vi) Program Young Art Entrepreneurs (YAE!) yang bermula pada tahun 2017 telah berjaya melahirkan seramai 110 orang usahawan seni dengan penjanaan pendapatan melebihi RM1.7juta sejak program ini dilaksanakan.
3. Selain dari sokongan semasa fasa pasca pandemik, MOTAC juga sentiasa merencana pelbagai program dan inisiatif bagi mengetengahkan bakat kreatif tempatan kepada penduduk Malaysia. Antara usaha tersebut termasuklah:

SOALAN NO : 517

- (i) Program Pencarian Bakat oleh JKKN bagi mencungkil bakat-bakat baru dalam bidang seni budaya seperti Bimbingan Seni Budaya, Festival Teater Negeri, Festival Teater Malaysia, Kejuaraan Tari Kanak-kanak Malaysia, Festival Tari Malaysia, Jaguh Pantun dan Seni Dalam Tarian;
- (ii) Pengajuran Program secara hybrid oleh Kraftangan Malaysia seperti Wacana Kraf iaitu perkongsian ilmu kraf dengan golongan sasar seperti pelajar Institut Pengajian Tinggi, pekerja sektor awam dan swasta, usahawan dan komuniti kraf serta orang awam;
- (iii) Pengajuran webinar tempatan mahupun antarabangsa oleh Kraftangan Malaysia seperti *Malaysia International Webinar: Sustainability in Crafts*;
- (iv) Pengajuran program oleh ASWARA bagi mengetengahkan pemuisi tempatan seperti “Malam Puisi Warisan Sempena Seminar 50 Tahun Kepenggarangan Anwar Ridhwan”;
- (v) Pengajuran teater tradisional seperti Teater Tradisional Mek Mulung oleh gabungan para pelajar ASWARA, alumni dan para penggiat bertajuk “Hikayat Puteri 12 Beradik” dan “Lakhon Dewa Muda” di Dewan Tunku Abdul Rahman, MaTiC Kuala Lumpur;
- (vi) Pengajuran Program “Bengkel Seni Lakon x Sekolah Seni Malaysia” bertempat di Dewan Auditorium Sekolah Seni Malaysia Kuala Lumpur;
- (vii) Mengajurkan program pendidikan dalam bentuk festival yang mementaskan ungkapan kreativiti dan imaginasi dalam seni visual, seni sastera dan gabungan seni persembahan (muzik, teater, tarian, filem dan animasi) merangkumi bidang seni tradisional dan kontemporari seperti ASWARA Wave 21 Festival (*World Arts Education & Culture Events 2021*);

SOALAN NO : 517

(viii) Melibatkan seni dalam *Community Base Tourism* (CBT) seperti Program Arca Dasar Laut di Langkawi yang melibatkan sembilan (9) penggiat seni tempatan dengan sembilan (9) buah karya yang dihasilkan. Program ini telah memberi peluang kepada komuniti setempat yang melibatkan artisan, operatus selam skuba dan komuniti nelayan.

4. Di samping itu, MOTAC turut mengiktiraf bakat kreatif tempatan dengan memberi pengiktirafan seperti *Malaysia Good Design Award* anjuran Majlis Rekabentuk Malaysia bertujuan memberi pengiktirafan kepada semua sektor industri tempatan yang cemerlang dalam mengeluarkan produk berkualiti yang mempunyai reka bentuk dan teknologi inovatif.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN WONG CHEN [SUBANG]

SOALAN

Tuan Wong Chen [Subang] minta **MENTERI ALAM SEKITAR DAN AIR** menyatakan:-

- a. kemas kini terkini mengenai cadangan platform dagangan karbon; dan
- b. kemas kini terkini mengenai garis panduan untuk mengakreditasi unit karbon daripada hutan Kerajaan negeri.

JAWAPAN

Tuan Yang Di-Pertua,

1. Untuk makluman Ahli Yang Berhormat, pada masa ini platform perdagangan karbon peringkat domestik masih lagi di dalam fasa pembangunan oleh pihak BURSA Malaysia dan dijangka akan disediakan menjelang hujung tahun 2022. Pada masa ini, pihak Kementerian Alam Sekitar dan Air sedang melaksanakan libat urus bersama BURSA Malaysia bagi memperhalusi aspek ketetapan dasar berkaitan pasaran karbon apabila platform ini beroperasi kelak.
2. Untuk makluman Ahli Yang Berhormat juga, proses bagi menjana kredit karbon daripada pelaksanaan projek karbon termasuk proses akreditasi dan verifikasi adalah bergantung kepada piawaian sesuatu pasaran karbon tersebut. Untuk makluman Ahli Yang Berhormat, piawaian bagi pasaran karbon pematuhan di bawah Perjanjian Paris adalah belum selesai masih lagi dirundingkan oleh semua negara ahli kepada UNFCCC. Ini bermaksud pasaran karbon di bawah Perjanjian Paris tidak dapat beroperasi selagi piawaian di bawahnya tidak dimuktamadkan. Manakala piawaian bagi pasaran karbon sukarela antarabangsa (*international voluntary carbon market - VCM*) pula adalah bergantung kepada pasaran-pasaran karbon sukarela yang sedia wujud di peringkat antarabangsa. KASA telah sedia membangunkan panduan pasaran karbon sukarela antarabangsa pada tahun 2021 sebagai panduan kepada mana-mana entiti dalam Malaysia termasuk kerajaan negeri yang ingin terlibat di dalam pasaran karbon sukarela.
3. Pada masa ini, KASA sedang merangka panduan tambahan bagi menjelaskan ketetapan dasar dan proses yang terlibat sekiranya entiti dalam negara ingin menyertai pasaran karbon sukarela. Bagi piawaian pasaran karbon domestik di bawah BURSA Malaysia pula, panduan dan prosedur bagi penyertaan entiti yang berminat akan ditentukan dan dibangunkan oleh pihak BURSA Malaysia sendiri.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : TUAN WONG CHEN (SUBANG)

SOALAN

TUAN WONG CHEN (SUBANG) minta **MENTERI DALAM NEGERI** menyatakan kos operasi:

- (a) setiap banduan untuk setiap hari di dalam penjara dan setiap tahanan untuk setiap hari di pusat tahanan imigresen ; dan
- (b) setiap individu untuk setiap hari yang ditempatkan di Pusat Latihan Khidmat Negara (PLKN) dan kos di bawah program Program Pembebasan Banduan Berlesen (PBSL).

JAWAPAN

Tuan Yang Di Pertua,

- (a) Untuk makluman Ahli Yang Berhormat, kos utiliti bagi seorang banduan untuk sehari adalah berjumlah RM50.00. Kos tersebut melibatkan kos untuk penyediaan makanan, kemudahan asas, latihan, perubatan, bahan api, perhubungan dan komunikasi. Manakala kos sehari untuk seorang tahanan imigresen adalah (Jabatan Imigresen)
- (b) Penggunaan bekas Pusat Latihan Khidmat Negara (PLKN) sebagai Penjara Satelit yang beroperasi sebagai pusat penerimaan banduan baru, saringan kesihatan dan kuarantin menggunakan konsep penyewaan perkhidmatan. Pengusaha PLKN bertanggungjawab meningkatkan keselamatan fizikal dengan menyediakan peralatan seperti makanan banduan, sistem televisyen litar tertutup (CCTV), komputer serta kemudahan asas untuk kegunaan banduan dan pegawai penjara. Berdasarkan rundingan yang dibuat bersama pengusaha, Jabatan Penjara membayar penyewaan perkhidmatan (dalam bentuk pakej) untuk seorang banduan yang berjumlah RM33.75 sehari.

Manakala banduan yang dipertimbangkan Pelepasan Banduan Secara Lesen (PBSL) tidak mempunyai apa-apa kos yang akan ditanggung oleh Jabatan Penjara Malaysia. Sekiranya banduan berkaitan bekerja, kemudahan tempat tinggal, keperluan dan peralatan bekerja disediakan oleh majikan. Banduan yang terlibat akan menikmati kadar gaji seperti mana pekerja lain.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : TUAN WONG CHEN (SUBANG)

SOALAN

TUAN WONG CHEN (SUBANG) minta **MENTERI DALAM NEGERI menyatakan:-**

- (a) peratusan banduan yang dibebaskan pada 2021 di bawah sistem parol, pembebasan diawasi, Program Pembebasan Banduan Secara Berlesen (PBSL), hukuman alternatif dan pembebasan terus; dan
- (b) kadar kesalahan semula bagi setiap kategori pembebasan di atas.

JAWAPAN

Tuan Yang Di Pertua,

Untuk makluman Ahli Yang Berhormat, dimaklumkan bahawa Jabatan Penjara Malaysia telah melaksanakan Program Pemulihan Dalam Komuniti (PDK) kepada banduan seperti berikut:

- a) Program Pelepasan Secara Perintah Parol;
- b) Program Pelepasan Banduan Secara Berlesen (PBSL);
- c) Program Pelepasan Banduan Secara Berlesen (PBSL) Sekolah Henry Gurney;
- d) Program Reintegrasi Penghuni (PRP);
- e) Program Reintegrasi Penghuni Industri (PRPi);
- f) Program Reintegrasi Penghuni Penjara (PRPP); dan
- g) Perintah Kehadiran Wajib (PKW).

Statistik penghuni yang mengikuti PDK pada 2021 adalah seramai 14,145 orang. Daripada jumlah tersebut, seramai 9,501 orang (67.2%) telah dibebaskan. Manakala kadar kesalahan semula bagi kategori-kategori pelepasan di atas secara keseluruhannya adalah 0.3% bagi tahun 2021.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN (BERTULIS)

**DARIPADA : YB TUAN WONG CHEN
[SUBANG]**

SOALAN:

Minta **PERDANA MENTERI** menyatakan pecahan jumlah penerima yang telah memohon, telah menerima dan masih belum menerima Bantuan Wang Ihsan (BWI) dan Bantuan Barang Keperluan Asas (BBKA) di dalam kawasan Parlimen Subang.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Sehingga 25 Julai 2022, jumlah Ketua Isi Rumah (KIR) yang memohon Bantuan Wang Ihsan (BWI) dan Bantuan Barang Keperluan Asas (BBKA) di dalam kawasan Parlimen Subang adalah sebanyak **924 KIR**.
2. Daripada jumlah tersebut, sebanyak **923 KIR** yang telah menerima Bantuan Wang Ihsan (BWI). Manakala, **1 KIR** sahaja yang masih belum menerima bantuan.
3. Bagi Bantuan Barang Keperluan Asas (BBKA), sebanyak **912 KIR** telah menerima bantuan. Manakala, **12 KIR** masih belum menerima bantuan.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN WONG HON WAI [BUKIT BENDERA]

SOALAN

TUAN WONG HON WAI [BUKIT BENDERA] minta **PERDANA MENTERI** menyatakan apakah apakah sasaran Program Pembasmian Kemiskinan Tegar Keluarga Malaysia (BMTKM) dan senaraikan 480 lokaliti rintis berkenaan mengikut negeri dan berapa lagi lokaliti seterusnya yang akan dijalankan di bawah program ini.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Mesyuarat Jawatankuasa Tertinggi Pemantauan RMKe-12 Bilangan 1 Tahun 2021 pada 6 Disember 2021 yang dipengerusikan oleh YAB Perdana Menteri telah bersetuju supaya Program Pembasmian Kemiskinan Tegar Keluarga Malaysia (BMTKM) dilaksanakan mulai tahun 2022. Unit Perancang Ekonomi (EPU) dan Unit Penyelaras Pelaksanaan (ICU), Jabatan Perdana Menteri (JPM) telah dipertanggungjawab untuk menyelaras dan memudahcara pelaksanaan program ini.
2. BMTKM adalah merupakan program yang dirangka khusus untuk KIR miskin tegar dalam usaha membasi kemiskinan tegar di seluruh negara pada akhir tahun 2025.

3. Program Pembasmian Kemiskinan Tegar Keluarga Malaysia atau BMTKM akan memberi tumpuan kepada pembasmian kemiskinan tegar di seluruh negara serta menjadi pelengkap kepada program sedia ada untuk menangani isu kemiskinan dalam kalangan B40. Kumpulan sasar miskin tegar ini merentasi pelbagai kumpulan etnik merangkumi Bumiputera, Cina, India, Anak Negeri Sabah, Bumiputera Sarawak dan masyarakat Orang Asli.
4. BMTKM akan dilaksanakan di 1,000 lokaliti dalam tempoh tiga tahun enam bulan. Fasa 1 telah mula dilaksanakan pada bulan Jun 2022 melibatkan 80 lokaliti secara rintis. Daripada 80 lokaliti, sebanyak 73 lokaliti terdiri daripada kampung atau gugusan kampung di luar bandar serta kawasan Program Perumahan Rakyat (PPR) atau gugusan perumahan di bandar dalam ses sebuah mukim atau kawasan Parlimen. Manakala, baki tujuh lokaliti pula adalah KOA. Senarai lokaliti bagi BMTKM Fasa 1 adalah seperti di **Lampiran I**.
5. EPU, JPM dengan kerjasama ICU, JPM telah mula mengenal pasti 80 lokaliti bagi pelaksanaan fasa kedua BMTKM seawal bulan Ogos 2022 diikuti Fasa 3 pada bulan Disember tahun 2022. Fasa 4 sehingga fasa 6 akan dilaksanakan pada tahun 2023.

Sekian, terima kasih.

LAMPIRAN I

**SENARAI 80 LOKALITI BMTKM FASA 1 DAN BILANGAN KETUA ISI
RUMAH (KIR) MISKIN TEGAR BERDASARKAN PEMUTIHAN DATA
SEHINGGA 30 JUN 2022**

Bil.	Negeri	Daerah	Lokaliti
1.	Johor	Johor Bahru	Flat Larkin
			KOA Teluk Jawa
		Kota Tinggi	Tanjung Sedili
			KOA Pasir Intan
		Batu Pahat	Kampung Lubok Darat
		Pontian	Kampung Sungai Durian
2.	Kedah	Sik	Kampung Betong
		Sik	Kampung Tanjung Belit
		Baling	Kampung Charok Kapas
		Baling	Kampung Teluk Teduri
		Kubang Pasu	Kampung Kuala Jerlun
		Kota Setar	Kampung Tepi Laut
		Kuala Muda	Kampung Sungai Layar
3.	Kelantan	Tumpat	Kampung Kelong
		Pasir Mas	Kampung Jejawi
		Jeli	Perkampungan Orang Asli Sungai Rual
		Bachok	Kampung Kubang Golok
		Kota Bharu	Kampung Pulau Kundor

NO SOALAN: 522

Bil.	Negeri	Daerah	Lokaliti
		Kuala Krai	Kampung Mengkebang
		Gua Musang	Perkampungan Orang Asli Kuala Lah
		Pasir Puteh	Kampung Rhu Muda
4.	Melaka	Jasin (Melaka Selatan)	Kampung Bukit Senggeh
		Alor Gajah (Melaka Utara)	Kampung Cherana Puteh
5.	Negeri Sembilan	Jempol	DUN Serting
		Jelebu	DUN Pertang
			Perkampungan Orang Asli Parit Gong
		Seremban	DUN Paroi
6.	Pahang	Bera	Kampung Bohor Baru
			Perkampungan Orang Asli Kuin/Lengut
		Kuala Lipis	Kampung Kechau Tui
		Jerantut	Kampung Lada
		Temerloh	Kampung Bolok
		Pekan	Kampung Pasir Panjang
		Cameron Highlands	Perkampungan Orang Asli Chenan Cerah
		Rompin	Perkampungan Orang Asli Langkap Lama

Bil.	Negeri	Daerah	Lokaliti
		Lipis	Perkampungan Orang Asli Tungau, Pos Lenjang
7.	Perak	Hulu Perak	Kampung Kuak Hulu
		Manjung	Kampung Batu 3 Segari
		Kerian	Kampung Batu 14
		Hulu Perak	Perkampungan Orang Asli Kabel, RPS Banun
		Batang Padang	Perkampungan Orang Asli Pos Musuh <i>Landing Zone</i> (LZ)
8.	Perlis	Padang Besar	Kampung Batu Bertangkup
		Arau	Kampung Sungai Berembang
		Kangar	Kampung Syed Omar
9.	Pulau Pinang	Timur Laut	Flat Kampung Melayu
		Seberang Perai Utara	Kampung Tepi Laut Penaga
		Seberang Perai Tengah	Kampung Pelet
10.	Sabah	Tongod	Kampung Penangah
		Tuaran	Kampung Penimbawan
		Pitas	Kampung Bongkol
		Kota Belud	Kampung Sembirai
		Kota Marudu	Kampung Tandek
		Sipatang	Kampung Pelakat

Bil.	Negeri	Daerah	Lokaliti
		Beaufort	Kampung Binsulok
		Beluran	Kampung Tetabuan
		Ranau	Kampung Kaingaran
		Nabawan	Kampung Lima
11.	Sarawak	Gedong	Gedong
		Sebuyau	Kampung Seberang Sebuyau
		Lingga	Kampung Bakong
		Betong	Kampung Spaoh
		Belaga	Long Kajang
		Beluru	Ulu Tinjar
		Pakan	Pakan
		Lawas	Lawas
		Daro	Daro
		Telang Usan	Telang Usan
12.	Selangor	Petaling	PPR Lembah Subang
		Sabak Bernam	Kampung Sungai Lias
		Gombak	Kampung Melayu Kundang
			Perkampungan Orang Asli Hulu Batu
		Kuala Selangor	Kampung Sungai Kajang

Bil.	Negeri	Daerah	Lokaliti
13.	Terengganu	Marang	Kampung Rhu Muda dan Kampung Pantai Seberang Marang
		Besut	Kampung Pengkalan Atap
		Setiu	Kampung Sungai Lerek
		Hulu Terengganu	Kampung Baong dan Kampung Payang Kayu
		Kuala Terengganu	Kampung Pulau Duyong
		Dungun	Kampung Rhu
14.	Wilayah Persekutuan	Setiawangsa	PA Desa Rejang
		Lembah Pantai	PPR Kerinchi
		Seputeh	PPR Kampung Muhibbah
		Bandar Tun Razak	PPR Taman Mulia
		Labuan	Patau-Patau 1 & 2
		Labuan	Taman Perumahan Sungai Berdaun
Jumlah KIR Miskin Tegar			

Nota:

Maklumat bilangan KIR adalah berdasarkan pemutihan data yang telah dibuat sehingga 30 Jun 2022.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB TUAN WONG HON WAI (BUKIT BENDERA)

SOALAN

TUAN WONG HON WAI (BUKIT BENDERA) minta **MENTERI DALAM NEGERI** menyatakan berapa bilangan permohonan dan kelulusan program MM2H (Malaysia My Second Home) dari tahun 2017-2022 mengikut tahun dan senaraikan negara-negara asal pemohon yang berjaya dari tahun 2017-2022 mengikut tahun.

JAWAPAN

Tuan Yang Di Pertua,

Untuk makluman Ahli Yang Berhormat, jumlah keseluruhan pengeluaran pas untuk peserta Program MM2H adalah sebanyak 77,800 pas bagi tempoh 2017 hingga Jun 2022.

Dalam tempoh yang sama, pengeluaran pas untuk peserta Program MM2H warganegara China merupakan yang tertinggi sebanyak 33,151 pas, diikuti warganegara Bangladesh sebanyak 7,503 pas dan warganegara Korea Selatan sebanyak 6,222 pas. Manakala, pas yang dikeluarkan bagi warganegara Jepun dan United Kingdom adalah masing-masing sebanyak 6,113 dan 2,609 pas.

**PEMBERITAHUAN PERTANYAAN BUKAN LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN WONG HON WAI [BUKIT BENDERA]

SOALAN

TUAN WONG HON WAI [BUKIT BENDERA] minta **MENTERI PERTANIAN DAN INDUSTRI MAKANAN** menyatakan senarai bahan makanan yang masih dikenakan "Approved Permit" (AP) dan berapa lesen AP dikeluarkan dan nama-nama pemegang AP untuk setiap bahan makanan tersebut dan apakah rasional pengeluaran AP tersebut.

JAWAPAN

Tuan Yang di-Pertua,

Untuk makluman Ahli Yang Berhormat, sebanyak empat (4) komoditi pertanian di bawah kawal selia Kementerian ini iaitu keratan ayam dan ayam bulat, susu cair, kobis bulat serta kelapa tua biji yang telah dimansuhkan kawalan import (*Approved Permit – AP*) berkuatkuasa mulai 18 Mei 2022. Namun begitu, hanya satu (1) komoditi iaitu beras masih memerlukan *Approved Permit (AP)* bagi tujuan pengimportan ke dalam negara.

Bagi komoditi beras, pemegang AP tunggal adalah Padiberas Nasional Berhad (BERNAS) yang diberi tanggungjawab untuk mengimpor beras ke dalam negara menerusi konsesi yang dilanjutkan selama 10 tahun bermula tahun 2020. Ini kerana terdapat sepuluh (10) obligasi sosial yang perlu dipatuhi BERNAS di dalam terma konsesi tersebut merangkumi tambahan jumlah simpanan stokpail beras negara bagi tujuan sekuriti makanan negara. Pemberian AP ini adalah penting dalam melindungi komoditi strategik makanan ruji rakyat Malaysia serta pesawah yang berkecimpung di dalam industri beras tempatan. Ia selaras dengan usaha Kerajaan untuk memartabatkan industri padi dan beras negara di samping mengurangkan implikasi kewangan yang besar kepada Kerajaan dalam mengurus industri. Setakat ini, Kerajaan melalui BERNAS telah memastikan bekalan beras dalam negara mencukupi pada setiap masa.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

DARIPADA : YB TUAN WONG HON WAI (BUKIT BENDERA)

SOALAN

TUAN WONG HON WAI (BUKIT BENDERA) minta **MENTERI DALAM NEGERI** menyatakan senarai nisbah anggota polis kepada penduduk untuk setiap balai polis di negeri Pulau Pinang dan sama ada nisbah ini memenuhi piawaian nasional dan antarabangsa.

JAWAPAN**Tuan Yang Di Pertua,**

Bilangan perjawatan Polis Diraja Malaysia (PDRM) peringkat Daerah di Pulau Pinang adalah sebanyak 5,095. Purata nisbah perjawatan anggota polis kepada penduduk mengikut daerah di negeri Pulau Pinang adalah seperti berikut:

Bil.	Ibu Pejabat Polis	Bilangan Perjawatan	Bilangan Penduduk	Nisbah
1.	Daerah Timur Laut	1,645	1,157,287	1:704
2.	Daerah Barat Daya	950	607,582	1:640
3.	Daerah Seberang Perai (Utara)	945	506,818	1:536
4.	Daerah Seberang Perai (Tengah)	857	422,829	1:493
5.	Daerah Seberang Perai (Selatan)	698	297,127	1:426
Jumlah		5,095	2,991,643	1:587

Kementerian Dalam Negeri bersama-sama PDRM sedang melaksanakan kajian pengoptimuman perjawatan PDRM secara menyeluruh melibatkan semua peringkat iaitu Ibu Pejabat Polis Bukit Aman, Kontinjen, Daerah hingga Balai Polis di seluruh negara. Menerusi kajian ini, jumlah perjawatan ideal di semua peringkat akan dikenal pasti bagi memastikan tiada masalah kekurangan perjawatan yang boleh mengganggu keberkesanan operasi PDRM. Kajian ini juga akan mengambil kira pelbagai faktor termasuk populasi penduduk, kompleksiti dan bebanan tugas serta kadar jenayah dan tahap kemajuan semasa sesuatu kawasan dalam penentuan bilangan perjawatan bagi sesebuah balai polis.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : TUAN WONG HON WAI [BUKIT BENDERA]

SOALAN

Tuan Wong Hon Wai [Bukit Bendera] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan :-

- (a) senarai kesemua nama Penyelaras Kepenggunaan Parlimen (PKP) yang dilantik, tarikh lantikan serta elauan dan imbuhan yang diterima serta sama ada peruntukan diberikan kepada PKP; dan
- (b) apakah bidang tugas PKP dan cara pemantauan Kementerian terhadap pencapaian PKP.

JAWAPAN

Yang di-Pertua,

KPDNHEP melantik seorang Penyelaras Kepenggunaan Parlimen (PKP) daripada setiap Parlimen bagi membantu Kementerian berkaitan isu semasa yang melibatkan pengguna dikalangan masyarakat setempat dan KPDNHEP juga sedang dalam tindakan penyelarasan bersama dengan Pejabat Parlimen untuk mengenal pasti calon yang bersesuaian sebelum pelantikan dibuat. Jemaah Menteri pada 12 Februari 2014 telah bersetuju dengan abyaran eluan PKP sebanyak RM700.00 sebulan.

Antara tugas PKP ialah merancang dan melaksanakan ceramah kepenggunaan kepada masyarakat di bawah Parlimen masing-masing dan memberi panduan serta membantu masyarakat membuat aduan berkaitan kepenggunaan. Kaedah pemantauan terhadap pencapaian PKP adalah melalui laporan bulanan yang dikemukakan oleh PKP kepada Pejabat KPDNHEP negeri masing-masing bagi memastikan pelaksanaan program mengikut perancangan.

Sekian, terima kasih.

Sekian, terima kasih.

SOALAN NO: 527

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : TUAN WONG KAH WOH
[IPOH TIMUR]**

SOALAN

YB TUAN WONG KAH WOH [IPOH TIMUR] minta MENTERI PERUMAHAN DAN KERAJAAN TEMPATAN menyatakan berapa jumlah rumah PR1MA yang telah dibina dan dijual sebelum bulan Mei 2018, dan berapa jumlah rumah PR1MA yang telah dibina dan dijual selepas bulan Mei 2018 mengikut pecahan tahun.

JAWAPAN

Tuan Yang di-Pertua,

Untuk makluman Ahli Yang Berhormat, Perbadanan PR1MA Malaysia (PR1MA) telah ditubuhkan pada 1 Januari 2013, di bawah Akta PR1MA 2012 untuk merancang, membangun, membina dan menawarkan kediaman pada harga yang berpatutan serta berkualiti tinggi berkonsepkan gaya hidup moden bagi rakyat Malaysia yang berpendapatan isi rumah antara RM2,500 hingga RM15,000 sebulan.

Sejak dari penubuhan PR1MA hingga kini (30 Jun 2022), PR1MA mempunyai 61 projek yang terdiri daripada 49,281 unit dan sebanyak 36,751 unit telah pun dijual. Berikut adalah jumlah rumah PR1MA yang telah dibina dan dijual mengikut tahun:

Tahun	Unit telah siap dibina	Unit telah dijual
Awal penubuhan PR1MA 2013 - Mei 2018	12,087	8,604
Jumlah	12,087	8,604
2018 (Jun – Disember)	0	2,298
2019	3,017	10,797
2020	5,931	7,512
2021	6,786	5,626
2022 (Sehingga 30 Jun 2022)	500	1,914
Jumlah	16,234	28,147
Jumlah keseluruhan	28,321	36,751

Setakat 30 Jun 2022, sebanyak 2,264 unit sedang dalam perancangan dan 18,696 unit sedang dalam pembinaan di seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)
DARIPADA : TUAN WONG KAH WOH [IPOH TIMUR]
TARIKH : JULAI-OGOS 2022

SOALAN

TUAN WONG KAH WOH [IPOH TIMUR] minta **MENTERI PENGANGKUTAN** menyatakan prestasi pelaksanaan polisi My50 dan My100 sejak tahun 2018. Berapa ramai yang dijangka telah menerima manfaat.

JAWAPAN

Tuan Yang Di Pertua,

1. Pas Perjalanan Tanpa Had My50 dan My100 menawarkan perjalanan tanpa had selama 30 hari di kesemua rangkaian Rapid KL. Produk ini mula diperkenalkan pada tahun 2018 yang melibatkan perkhidmatan tren dan bas di Lembah Klang dan perkhidmatan bas di Pulau Pinang.
2. Pada pertengahan bulan Jun tahun 2020, Pas Perjalanan Tanpa Had My100 dan My50 telah digantikan dengan produk baru yang diberi nama Pas Perjalanan Tanpa Had My30. Pas My30 diperkenalkan kepada rakyat Malaysia dengan tujuan untuk meringankan kos sara hidup rakyat sewaktu pandemik COVID-19.
3. Pas Perjalanan Tanpa Had My50, My100 dan My30 telah memberikan impak yang cukup besar kepada para pengguna pengangkutan awam negara dalam meringankan kos pengangkutan bulanan mereka. Pada tahun 2019, sebanyak **1,224,786** Pas Perjalanan My100 dan My50 telah terjual. Seterusnya pada tahun 2020, sebanyak **1,165,727** pas telah direkodkan manakala bagi tahun 2021, sebanyak **990,325** pas telah terjual. Jumlah pas yang terjual agak menurun berikutan pelaksanaan Perintah Kawalan Pergerakan (PKP) yang menyebabkan banyak sektor-sektor ekonomi dan sekolah ditutup bagi mengekang penularan COVID19.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : TUAN WONG KAH WHO [IPOH TIMUR]

SOALAN

TUAN WONG KAH WOH [IPOH TIMUR] minta **MENTERI KEWANGAN** menyatakan jumlah bersih kutipan cukai GST sejak hari pertama pelaksanaan sehingga 31 Mei 2018, dan kutipan cukai SST sejak pelaksanaan pada tahun 2018. Nyatakan kadar inflasi yang direkodkan dalam tahun-tahun berkenaan.

JAWAPAN

Tuan Yang di-Pertua,

Untuk makluman Ahli Yang Berhormat, jumlah kutipan bersih GST mulai 1 April 2015 sehingga 31 Mei 2018 adalah sebanyak RM132.7 billion. Manakala kutipan Cukai Jualan dan Cukai Perkhidmatan (SST) mulai 1 September 2018 sehingga 30 Jun 2022 adalah sebanyak RM98.7 billion.

Kadar inflasi yang direkodkan pada tahun 2018 ialah sebanyak 1.0%, manakala bagi tahun 2019 adalah sebanyak 0.7%. Kadar inflasi bagi tahun 2020 ialah -1.2%, manakala bagi tahun 2021 ialah sebanyak 2.5%. Kadar inflasi bagi tahun 2022 sehingga ke bulan Mei 2022 ialah sebanyak 2.4%.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN WONG KAH WOH [IPOH TIMUR]

SOALAN

TUAN WONG KAH WOH [IPOH TIMUR] minta **MENTERI ALAM SEKITAR DAN AIR** menyatakan berapa banyak kontena sisa pepejal plastik yang telah dihantar ke negara kita sehingga bulan Mei 2018, dan berapa banyak kontena sisa pepejal plastik yang telah dihantar pulang ke negara asal sejak bulan Mei 2018.

JAWAPAN

Tuan Yang Di-Pertua,

1. Jawatankuasa Induk Pengurusan dan Jawatankuasa Teknikal Pengurusan Sisa Plastik Import yang telah ditubuhkan berdasarkan keputusan Mesyuarat Jemaah Menteri pada 17 April 2019 telah menetapkan bahawa Jabatan Alam Sekitar (JAS) perlu mengambil tindakan penghantaran balik kontena ke negara pengeksport ke atas mana-mana kontena barang dagangan buangan plastik (HS Code 3915) yang tidak mematuhi perundangan negara. Sehubungan itu, JAS hanya mula menghantar balik kontena buangan plastik haram pada September 2019, selepas mengemukakan notifikasi kepada *Competent Authority* negara pengeksport. Dalam hal ini, tiada kontena sisa pepejal plastik yang telah dihantar oleh JAS sebelum Mei 2018.

2. Sejak September 2019 sehingga Jun 2022, sebanyak 286 kontena yang mengandungi buangan plastik telah berjaya dihantar pulang ke negara asal.

Sekian terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB TUAN WONG KAH WOH (IPOH TIMOR)

SOALAN

TUAN WONG KAH WOH [IPOH TIMOR] minta **MENTERI KANAN KERJA RAYA** menyatakan apakah usaha Kerajaan untuk menyelesaikan masalah penyelenggaran jalan dan lampu jalan bawah seliaan JKR di daerah Kinta, yang selalunya diberikan alasan “tidak mempunyai peruntukan yang mencukupi” untuk tujuan penyelenggaran.

JAWAPAN

Tuan Yang Di-Pertua,

Untuk makluman Ahli Yang Berhormat, penyenggaraan Jalan Persekutuan di dalam kawasan bandar Ipoh yang dimaksudkan adalah terletak di Daerah Kinta iaitu sepanjang **176 km**.

Secara keseluruhannya, peruntukan yang telah disalurkan bagi **kerja-kerja di bawah Program Penyenggaraan Berkala Pavemen dan Bukan Pavemen** di Jalan-jalan Persekutuan di dalam kawasan Daerah Kinta adalah berjumlah **RM12.58 juta** untuk tahun 2020 dan **RM12.4 juta** untuk tahun 2021. Sehingga Jun 2022, sebanyak **RM11.58 juta** telah diluluskan iaitu melibatkan kerja-kerja berkala pavemen (**RM7.8 juta**), berkala bukan pavemen (**RM1.44 juta**) dan penyenggaraan lampu jalan dan lampu isyarat (**RM 521 ribu**).

Untuk makluman Ahli Yang Berhormat, Kementerian Kerja Raya mengambil maklum berkenaan baki program kerja pembaikan yang belum dilaksanakan. Berdasarkan rekod terkini, jumlah kos penyenggaraan bagi kerja-kerja penyenggaraan Jalan dan kerja-kerja penyenggaraan lampu jalan dan lampu isyarat di Daerah Kinta, Perak adalah sebanyak **RM22.6 juta**. Pelaksanaan kerja-kerja tersebut akan dimulakan segera selepas menerima **kelulusan peruntukan dari Kementerian Kewangan**.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN WONG LING BIU [SARIKEI]

SOALAN

TUAN WONG LING BIU [SARIKEI] minta **MENTERI KEWANGAN** menyatakan jumlah kes penipuan wang dari akaun bank yang telah dilaporkan kepada Bank Negara tahun ini dan tahun lepas.

JAWAPAN

Tuan Yang di-Pertua,

Jenayah penipuan adalah satu kesalahan yang termaktub dalam Kanun Keseksaan dan siasatannya adalah dalam bidang kuasa pihak Polis Diraja Malaysia (PDRM). Sebarang insiden penipuan haruslah dilaporkan terus kepada pihak PDRM untuk siasatan lanjut.

Berdasarkan statistik PDRM, 20,701 kes jenayah atas talian telah dilaporkan pada tahun 2021 manakala setakat 30 Jun 2022, 10,468 kes telah dilaporkan.

Sekian, terima kasih.

**PEMBERITAHUAN PERTANYAAN BUKAN JAWAB LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : PUAN WONG SHU QI [KLUANG]

SOALAN

Minta **MENTERI PENGAJIAN TINGGI** menyatakan punca utama bagi pelajar dalam fakulti kejuruteraan gagal untuk memperoleh ijazah sarjana muda di universiti tempatan.

JAWAPAN

Tan Sri Yang di-Pertua,

Berdasarkan Sistem MyMoheS Kementerian Pengajian Tinggi (KPT), seramai 1,350 (0.23%) pelajar di peringkat Pengajian Ijazah Sarjana Muda (Bidang Kejuruteraan) daripada 589,879 pelajar Universiti Awam (UA) telah direkodkan sebagai tidak tamat pengajian pada tahun 2021. Antara faktor yang dikenal pasti menyumbang kepada pelajar tidak tamat pengajian adalah masalah kesihatan dan masalah peribadi.

Untuk makluman Ahli Yang Berhormat, KPT amat prihatin terhadap perkara ini dan sentiasa berusaha membantu pelajar yang menghadapi masalah-masalah tersebut. Dalam menangani isu ini, antara inisiatif di peringkat kementerian adalah menyediakan kemudahan biasiswa dan bantuan kewangan kepada pelajar-pelajar yang layak, terutamanya pelajar golongan B40.

Malah, KPT menerusi UA juga turut melaksanakan program intervensi akademik dan program intervensi bukan akademik seperti sistem penasihat akademik (PA), perkhidmatan kaunseling, *buddy system*, program-program motivasi, mentor-mentee dan pelbagai program lagi turut dijalankan dari semasa ke semasa untuk membantu para pelajar yang menghadapi masalah-masalah tersebut.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : PUAN WONG SHU QI
[KLUANG]**

SOALAN:

minta **PERDANA MENTERI** menyatakan jumlah Jelajah Aspirasi Keluarga Malaysia telah dijalankan serta kos setiap program di peringkat negeri dan kawasan Parlimen.

JAWAPAN

**DI JAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

1. Pelaksanaan Program Jelajah Aspirasi Keluarga Malaysia Tahun 2022 dilaksanakan mengikut 6 zon iaitu Zon Utara, Zon Tengah, Zon Selatan, Zon Pantai Timur, Zon Sarawak dan Zon Sabah. Setakat 3 Julai 2022, sebanyak lima siri jelajah iaitu di negeri Johor, Perlis, Sabah, Terengganu dan Perak telah dilaksanakan.

2. Walau bagaimanapun, hanya Zon Sabah sahaja setakat ini yang telah selesai sepenuhnya melaksanakan Program JAKM ini iaitu dengan kos sebanyak RM5,045,080.00. Kos pelaksanaan program adalah berbeza untuk setiap siri jelajah bergantung kepada lokasi penganjuran program berkenaan. Kerajaan sentiasa mengambil langkah penjimatan dan memastikan semua prosedur dan tatacara kewangan dipatuhi dalam melaksanakan program jelajah ini.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN

**DARIPADA : PUAN WONG SHU QI
[KLUANG]**

SOALAN:

Minta **PERDANA MENTERI** menyatakan senarai semua aplikasi telefon pintar yang dibangunkan oleh Kerajaan dan masih dalam penggunaan mengikut agensi, Kementerian.

JAWAPAN:

**YB DATUK DR ABD LATIFF AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Galeri Aplikasi Mudah Alih Kerajaan atau nama ringkasnya GAMMA merupakan gerbang capaian digital terus ke peranti pintar pengguna yang selamat, dipercayai dan sahih. GAMMA menawarkan perkhidmatan interaktif, cepat, mesra pengguna, percuma dan menyokong pelbagai jenis peranti pintar berasaskan Android dan iOS.
2. GAMMA dikawal selia dan ditadbir sepenuhnya oleh Unit Pemodenan Tadbiran dan Perancangan Pengurusan Malaysia (MAMPU) dan semua aplikasi mudah alih Kerajaan diselia melalui GAMMA diterbitkan di bawah satu akaun rasmi Kerajaan iaitu "Government of Malaysia".
3. Walau bagaimanapun, terdapat juga aplikasi mudah alih yang telah dibangunkan oleh agensi Kerajaan namun masih belum/tidak ditempatkan di GAMMA. Kebanyakan aplikasi mudah alih tersebut adalah untuk kegunaan dalaman agensi atau diterbitkan di gudang pasaran aplikasi melalui perkhidmatan *outsource* oleh *vendor* atau menggunakan akaun berdaftar agensi berkenaan.
4. Sehingga Julai 2022 terdapat 200 aplikasi mudah alih kerajaan yang dibangunkan oleh 93 agensi Kerajaan yang boleh dicapai melalui aplikasi tersebut.

**PEMBERITAHUAN PERTANYAAN BUKAN LISAN
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

DARIPADA : PUAN WONG SHU QI (KLUANG)

SOALAN

PUAN WONG SHU QI (KLUANG) minta **MENTERI SUMBER MANUSIA** menyatakan tempoh masa untuk menyatupadukan program TVET di bawah satu Kementerian serta memperbaharui format TVET supaya lebih cenderung kepada kemahiran yang diperlukan dalam pasaran tenaga kerja.

JAWAPAN

Program Pendidikan dan Latihan Teknikal dan Vokasional (TVET) pada masa ini dilaksanakan oleh 11 buah Kementerian, di mana setiap Kementerian mempunyai sejumlah institusi latihan yang menawarkan pelbagai program berteraskan TVET. Bagi tujuan penyelarasan dan koordinasi yang lebih berstruktur, Mesyuarat Jemaah Menteri pada 18 Disember 2020 bersetuju dengan penubuhan Majlis Pendidikan dan Latihan Teknikal dan Vokasional Negara sebagai satu Majlis tertinggi peringkat nasional merentas pelbagai Kementerian berkaitan TVET.

Majlis Pendidikan dan Latihan Teknikal dan Vokasional Negara berperanan menetapkan hala tuju TVET negara termasuk polisi, strategi dan inisiatif dalam memperkasa TVET negara disamping perlu memastikan semua keputusan peringkat dasar dapat dipertimbang secara holistik dan komprehensif. Buat masa ini, tiada sebarang cadangan dikemukakan kepada Kerajaan mahupun Majlis Pendidikan dan Latihan Teknikal dan Vokasional Negara untuk menyatupadukan program TVET di bawah satu Kementerian sahaja.

Bagi memastikan program TVET yang ditawarkan adalah bertepatan dengan keperuan industri, Kementerian Sumber Manusia melalui Jabatan Pembangunan Kemahiran telah melantik Badan Peneraju Industri merentasi pelbagai sektor industri bagi menyalurkan input-input konstruktif berkaitan keperluan sebenar pekerjaan di industri.

Antara peranan Badan Peneraju Industri ini adalah mengenalpasti kompetensi pekerjaan melalui pembangunan Standard kemahiran Pekerjaan Kebangsaan. Standard yang dibangunkan ini akan dijadikan rujukan kepada penyedia TVET dalam membangunkan kurikulum latihan untuk membangunkan modal insan berkemahiran negara.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

DARIPADA : PUAN WONG SHU QI [KLUANG]

SOALAN

PUAN WONG SHU QI minta **MENTERI KESIHATAN** menyatakan statistik pesakit yang menerima rawatan di klinik kesihatan setiap tahun bermula 2013 hingga 2022 serta kos purata setiap orang pesakit yang ditanggung oleh Kerajaan, termasuk gaji pegawai perubatan, ubat, fasiliti, dan bangunan.

JAWAPAN

Tuan Yang di-Pertua,

1. Statistik kedatangan pesakit yang menerima rawatan di klinik kesihatan telah dimuktamadkan sehingga tahun 2021. Berdasarkan rekod kedatangan pesakit di klinik kesihatan bagi tempoh 2013 sehingga 2021 seperti ditunjukkan dalam **Jadual 1**, trend didapati meningkat di mana jumlah yang tertinggi adalah pada 2019 iaitu sebanyak 45,750,286 bilangan kedatangan pesakit. Trend ini didapati mulai menurun bagi bilangan kedatangan pesakit di klinik kesihatan pada 2020 hingga 2021.

2. Manakala berdasarkan statistik perbelanjaan kesihatan yang diterbitkan oleh pihak KKM, kos perbelanjaan kesihatan di fasiliti klinik kesihatan yang ditanggung oleh pihak kerajaan adalah sebanyak RM2,487.07 juta pada tahun 2013 dan meningkat kepada RM4,666.26 juta (2020).

SOALAN NO. 537

3. Menurut kajian *Malaysia Health Systems Research Study* pada tahun 2016, median kos unit kedatangan pesakit luar mengikut jenis klinik kesihatan adalah di antara julat RM 54.56 hingga RM79.27. Perincian adalah seperti dalam **Jadual 2**.

Jadual 1 : Bilangan Kedatangan Pesakit Luar dan Perbelanjaan Kesihatan di Klinik Kesihatan

Tahun	Bilangan Kedatangan Pesakit ¹	Perbelanjaan Kesihatan KKM di fasiliti Klinik Kesihatan ² (RM Juta)
2013	33,379,603	2,487.07
2014	35,444,397	2,951.71
2015	37,666,439	3,047.86
2016	40,154,008	3,244.49
2017	42,882,285	3,529.56
2018	45,216,232	3,826.93
2019	45,750,286	4,290.84
2020	36,835,750	4,666.26
2021	33,849,826	-

Sumber: 1. Petunjuk Kesihatan 2013 - 2021

2. MNHA Database 1997-2020

SOALAN NO. 537

Jadual 2 : Kos Unit untuk Kedatangan Jabatan Pesakit Luar di Klinik Kesihatan mengikut Jenis Klinik

Jenis klinik	Bilangan kedatangan klinik sehari	Median Kos Unit (RM)
Jenis 1	Lebih dari 800	58.91
Jenis 2	500-800	62.29
Jenis 3	300-500	54.56
Jenis 4	150-300	70.36
Jenis 5	50-150	55.99
Jenis 6	Kurang dari 50	79.27

Sumber : *Malaysia Health Systems Research Study, 2016*

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB TUAN WONG TACK (BENTONG)

SOALAN

TUAN WONG TACK [BENTONG] minta **MENTERI KANAN KERJA RAYA** menyatakan pelan tindakan dan jangka masa untuk membaik pulih jalan/cerun yang runtuh semasa banjir Disember 2021 dan Mei tahun ini di kawasan Parlimen Bentong terutamanya di sepanjang Jalan Manchis, jalan lama Genting Sempah - Bentong dan Jalan Bentong - Raub.

JAWAPAN

Tuan Yang Di-Pertua,

Untuk makluman Ahli Yang Berhormat, bencana banjir pada Disember 2021 telah mengakibatkan kerosakan yang serius terhadap aset jalan dan cerun di kebanyakan tempat khususnya di Daerah Bentong. Bagi jalan persekutuan, Laluan FT9, Jalan Karak-Manchis yang terdapat di Daerah Bentong melibatkan laluan sepanjang 43.0 kilometer dan laluan FT68, Jalan Kuala Lumpur-Bentong (Jalan Lama Bentong) pula sepanjang 34.1 kilometer. Manakala FT218, Jalan Lama Bentong-Raub sepanjang 35.0 adalah di Daerah Raub.

Pada tahun 2021, pihak Kementerian telah melulus dan melaksanakan 11 bilangan kerja berkala pavemen bernilai RM11.23 juta dan 6 bilangan kerja berkala bukan pavemen bernilai RM1.33 juta.

Pada tahun 2022 pula, sebanyak 4 bilangan permohonan kerja berkala pavemen dengan jumlah RM3.9 juta telah diluluskan, manakala bagi kerja berkala bukan pavemen sebanyak 6 bilangan kerja bernilai RM2.94 juta telah diluluskan termasuk kerja-kerja pembaikan jalan akibat bencana. Jumlah keseluruhan yang telah diperuntukkan adalah sebanyak RM19.4 juta bagi tahun 2021 dan 2022.

Untuk makluman Ahli Yang Berhormat juga, pihak konsesi penyenggaraan jalan persekutuan juga telah melaksanakan kerja-kerja penyenggaraan rutin. Kerja-kerja ini akan dilaksanakan mengikut pusingan kerja yang ditetapkan dalam perjanjian konsesi. Sehingga Jun 2022 Kementerian telah memperuntukkan sebanyak RM 2.9 juta untuk kerja-kerja penyenggaraan rutin di daerah Bentong.

Antara kerja-kerja penyenggaraan rutin adalah seperti penampalan lubang jalan (*potholes*), menyenggara bahu jalan, pemotongan rumput, menyenggara perabot jalan, menyenggara jambatan dan pembetung,

mencuci sistem saliran dan perparitan serta pemeriksaan rutin.

Untuk makluman Ahli Yang Berhormat, kesan daripada bencana yang berlaku pada tahun 2021 juga telah mengakibatkan runtuhan cerun dan jalan raya di kawasan Bentong. Di kawasan Bentong sahaja, sebanyak 31 runtuhan telah berlaku. Kerja-kerja pembaikan telah dimulakan dengan empat (4) bilangan Arahan Kerja (AK) dengan kos RM8,463,000.00. Baki cerun yang runtuh akan dibaiki apabila menerima peruntukan tambahan kelak. Namun begitu, jalan yang mengalami runtuhan kritikal iaitu Laluan FT008 telah pun ditutup dan kerja-kerja perlindungan cerun dan *traffic management* telah pun dilaksanakan sebagai langkah keselamatan. Berikutnya penutupan jalan tersebut, pengguna boleh menggunakan Laluan FT218 dan jalan Central Spine (CSR) bagi menghubungkan Bentong ke Raub.

Kementerian Kerja Raya melalui Jabatan Kerja Raya Malaysia terus komited dalam memastikan jalan sentiasa dalam keadaan yang selamat dan selesa dengan menjalankan kerja-kerja penyenggaraan rutin sepanjang tahun.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN WONG TACK [BENTONG]

SOALAN :

Tuan Wong Tack [Bentong] minta **MENTERI PERUSAHAAN PERLADANGAN DAN KOMODITI** menyatakan adakah Kementerian bercadang untuk mewajibkan syarikat komoditi (sawit dan getah) yang memiliki kawasan tanah melebihi 1000 hektar untuk memperuntukkan sebahagian kecil daripada tanah mereka untuk penghasilan makanan sebagai satu langkah menjamin '*food security*' negara.

JAWAPAN :

Untuk makluman Ahli Yang Berhormat, buat masa ini Kementerian tiada cadangan untuk mewajibkan syarikat komoditi sawit dan getah yang memiliki kawasan tanah melebihi 1,000 hektar untuk memperuntukkan sebahagian kecil daripada tanah mereka untuk penghasilan makanan sebagai satu langkah menjamin *food security* negara.

Walau bagaimanapun, sekiranya terdapat keperluan untuk berbuat demikian, pihak Kementerian sentiasa terbuka untuk bekerjasama dengan pihak Kementerian Pertanian dan Industri Makanan (MAFI) dan kementerian serta Agensi lain yang berkaitan bagi membantu memastikan jaminan bekalan makanan negara terjamin.

Sekian, terima kasih.

**PEMBERITAHUAN PERTANYAAN BUKAN LISAN
DEWAN RAKYAT MESYUARAT KEDUA PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN WONG TACK [BENTONG]

SOALAN :

Tuan Wong Tack [Bentong] minta **MENTERI PERUSAHAAN PERLADANGAN DAN KOMODITI** menyatakan keluasan tanah yang telah digunakan untuk setiap jenis penanaman iaitu kelapa sawit, getah dan ladang hutan.

JAWAPAN :

Jumlah keluasan tanah yang digunakan bagi agrikomoditi adalah seperti berikut:

Komoditi	Keluasan Tanah yang digunakan sehingga Mac 2022 (Hektar)
Kelapa Sawit	5,691,962
Getah	1,136,136
Ladang Hutan ¹	118,490.26

Sumber : MPOB, LGM, MTIB

Nota:

¹. Dari 2007 hingga 31 Mac 2022, seluas 118,490.26 hektar telah siap dibangunkan/ditanam daripada jumlah keseluruhan kawasan diluluskan iaitu 129,575.99 hektar

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : TUAN WONG TACK (BENTONG)

SOALAN

TUAN WONG TACK (BENTONG) minta **MENTERI PEMBANGUNAN LUAR BANDAR** menyatakan berapa buah Kampung Orang Asli (KOA) telah siap diukur perimeter untuk penandaan sempadan penempatan bagi tujuan pewartaan tanah dan berapa yang dalam proses. Beri senarai KOA yang telah siap kerja-kerja ukur ini.

JAWAPAN

Untuk makluman Yang Berhormat, berdasarkan rekod JAKOA bermula RMKe-10 sehingga tahun 2021, sebanyak 368 Kampung Orang Asli (KOA) telah dilantik bagi kerja-kerja ukur perimeter, manakala sebanyak 277 KOA telah selesai diukur perimeter bagi tujuan permohonan pewartaan. Manakala sebanyak 91 KOA masih dalam proses kerja ukur perimeter.

JAKOA akan menyelesaikan baki KOA yang belum siap kerja-kerja ukur perimeter dalam RMKe-12 dengan anggaran keseluruhan peruntukan Projek Kerja Ukur bagi tujuan pewartaan tanah Orang Asli bernilai sebanyak RM42 juta dan akan meneruskan perancangan peruntukan projek tersebut di bawah RMKe-13.

Ringkasan Senarai KOA yang telah siap kerja ukur perimeter mengikut Negeri adalah seperti berikut:

NEGERI	BILANGAN KOA
Selangor	53
Kelantan	2
Terengganu	3
Perak	42
Negeri Sembilan	58
Melaka	6
Pahang	100
Johor	13
JUMLAH	277

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : TUAN WONG TACK [BENTONG]

SOALAN

TUAN WONG TACK [BENTONG] minta **PERDANA MENTERI** menyatakan bilakah projek pembinaan perumahan Generasi Kedua FELDA yang terbengkalai dalam kawasan Parlimen Bentong akan di sambung semula.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat, Projek Perumahan 1 FELDA (P1F) FELDA Lurah Bilut di Parlimen Bentong telah dihentikan sementara pada tahun 2018 kerana tanah perumahan tersebut dibawah Akta Penempatan Berkloppok (GSA) dan masih belum selesai. Selama ini pihak FELDA dan Pemaju telah berusaha untuk meneruskan perumahan tersebut secepat mungkin.
2. P1F adalah projek usahasama FELDA dengan pemaju luar yang berbentuk pembangunan komersial. Mesyuarat Lembaga Bil. 351 bertarikh 29 November 2016 bersetuju meluluskan pelaksanaan pembangunan ini yang mana ia mendatangkan keuntungan kepada FELDA.
3. Permohonan pembatalan GSA telah dikemukakan pada 5 Oktober 2017 dan ia diluluskan dengan siaran warta pada 27 Februari 2020. Seterusnya Permohonan Pemberihakmilikan tanah telah dikemukakan kepada Pejabat Tanah Daerah Bentong pada 7 April 2021. Kini permohonan tersebut masih dalam proses. Kebenaran Merancang dan Plan Bangunan juga telah diluluskan oleh Majlis Perbandaran Bentong. Kerja Pembinaan Fasa 1 sebanyak 24 unit rumah akan disambung semula sebaik sahaja Permohonan Pemberihakmilik selesai.
4. Bagi status kerja Projek Fasa 1 sebanyak 12 unit di tapak FELDA Lurah Bilut sedang dalam pembinaan dan sebanyak 12 unit lagi dijangkakan dibangunkan selepas 12 unit peringkat pertama siap sepenuhnya.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : BUKAN LISAN

DARIPADA : DATO' DR. XAVIER JAYAKUMAR A/L ARULANANDRAM (KUALA LANGAT)

SOALAN

DATO' DR. XAVIER JAYAKUMAR A/L ARULANANDRAM (KUALA LANGAT) minta **MENTERI PERTANIAN DAN INDUSTRI MAKANAN** menyatakan jumlah ayam dibekalkan serta diperlukan untuk pasaran tempatan pada setiap hari dan juga setiap tahun. Serta berapa jumlah subsidi dan apakah subsidi yang diberikan untuk industri ayam.

JAWAPAN

Tuan Yang di-Pertua,

Untuk makluman Ahli Yang Berhormat, jumlah purata bekalan ayam negara sebanyak 847.62 juta ekor setahun atau 70.36 juta ekor sebulan atau 2.35 juta ekor sehari. Manakala keperluan ayam diunjurkan sebanyak 832.56 juta ekor setahun atau 69.38 juta ekor sebulan atau 2.31 juta ekor sehari.

Bagi meringankan bebanan yang ditanggung oleh penternak ayam dan telur yang terbeban dengan peningkatan kos pengeluaran, Kerajaan bersetuju meluluskan pemberian subsidi ayam dan telur bermula dari 5 Februari 2022 sehingga 31 Ogos 2022 dengan peruntukan sebanyak RM1.1 bilion. Setakat 29 Julai 2022, sebanyak 8,970 permohonan subsidi telah diluluskan berjumlah RM748 juta.

Butiran subsidi yang diterima oleh penternak adalah seperti berikut:

a) Ayam Pedaging

Tempoh (Tahun 2022)	Subsidi Diberi (RM per kg)	Jumlah Subsidi (RM)(juta)
5 Februari hingga 30 Mac	0.60	301.36
1 April hingga 30 Jun	1.40	200.91
1 Julai hingga 31 Ogos	1.20	301.36

b) Ayam Penelur

Tempoh (tahun 2022)	Subsidi Diberi (RM per biji) (RM/biji)	Jumlah Subsidi (RM)
5 Februari hingga 30 Jun	0.05	227.16
1 Julai hingga 31 Ogos	0.03	68.14

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

DARIPADA : PUAN YEO BEE YIN [BAKRI]

SOALAN

Puan Yeo Bee Yin [Bakri] minta **MENTERI ALAM SEKITAR DAN AIR** menyatakan status terkini penghantaran kontena plastik haram kepada negara asal dan nyatakan negara yang terlibat.

JAWAPAN

Tuan Yang Di-Pertua,

1. Sejak September 2019 sehingga Jun 2022, sebanyak 286 kontena mengandungi buangan plastik melibatkan 23 negara telah berjaya dihantar pulang melalui tiga (3) pelabuhan iaitu Pelabuhan Klang, Selangor, Pelabuhan Senari, Kuching, Sarawak dan Pelabuhan Pulau Pinang.
2. Negara yang terlibat dan jumlah kontena yang telah berjaya dihantar pulang adalah seperti senarai berikut:
 - i. Amerika Syarikat (68);
 - ii. France (48);
 - iii. United Kingdom (47);
 - iv. Canada (37);
 - v. Hong Kong (27);
 - vi. Spain (10);
 - vii. Belgium (7);
 - viii. Australia (6);
 - ix. Singapura (6);
 - x. Jepun (5);
 - xi. Austria (4);
 - xii. China (3);
 - xiii. Korea Selatan (3);
 - xiv. Portugal (3);
 - xv. Dominican Republic (2);
 - xvi. German (2);
 - xvii. Vietnam (2);
 - xviii. Arab Saudi (1);
 - xix. Bangladesh (1);
 - xx. Lithuania (1);
 - xxi. Poland (1);
 - xxii. Sri Lanka (1); dan
 - xxiii. Taiwan (1).

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN

DARIPADA : PUAN YEO BEE YIN (BAKRI)

SOALAN

PUAN YEO BEE YIN (BAKRI) minta **MENTERI TENAGA DAN SUMBER ASLI** menyatakan skim tenaga solar yang digunakan di Taman Pusat Data Hijau YTL di Iskandar - Self-Consumption (SELCO), Net Energy Metering (NEM), ataupun skim khas yang lain.

JAWAPAN

Tuan Yang di-Pertua,

Untuk makluman Ahli Yang Berhormat, pelaksanaan Taman Pusat Data Hijau YTL di Iskandar merupakan suatu inisiatif swasta yang diterajui oleh YTL Data Centre Holdings. Sehingga kini, Suruhanjaya Tenaga selaku agensi kawal selia perbekalan elektrik masih belum menerima apa-apa permohonan daripada pihak syarikat berkenaan untuk membangunkan dan memasang sebarang pepasangan sistem bekalan elektrik daripada sumber Tenaga Boleh Baharu sebagaimana yang telah diumumkan.

Sekian, terima kasih.

SOALAN NO : 545

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BUKAN LISAN (BERTULIS)

DARIPADA : PUAN YEO BEE YIN [BAKRI]

SOALAN

Puan Yeo Bee Yin [Bakri] minta **MENTERI ALAM SEKITAR DAN AIR** menyatakan maklumat terperinci berkenaan aset-aset pengairan dan saliran di bawah pengendalian Kementerian di sekitar Kuala Lumpur serta langkah-langkah penyelarasan dengan Dewan Bandaraya Kuala Lumpur (DBKL) dalam mencegah/menangani banjir di ibu kota.

JAWAPAN

Tuan Yang Di-Pertua,

1. Untuk makluman YB terdapat dua puluh tujuh (27) unit kolam takungan banjir di kawasan Wilayah Persekutuan Kuala Lumpur, lima belas (15) unit kolam adalah milik Dewan Bandaraya Kuala Lumpur (DBKL) dan dua belas (12) unit kolam takungan banjir diselenggara oleh Jabatan Pengairan dan Saliran (JPS).

SOALAN NO: 546

2. Senarai kolam takungan yang diselenggara oleh JPS adalah seperti berikut:

BIL	NAMA KOLAM	KELUASAN (ha)	KOMPONEN
1	Kolam Takungan Banjir Berembang	10.00	Struktur kawalan banjir seperti pintu kawalan air banjir Klang <i>offtake gate</i> , pintu kawalan air banjir <i>tunnel intake weir gate</i> , <i>baffle wall</i> , <i>outlet</i> , <i>inlet</i> , <i>trash screen</i> <i>spillway</i> dan sebagainya
2	Kolam Takungan Banjir Taman Desa	22.00	Pintu kawalan banjir <i>tunnel outfall structure</i> , <i>pump air tunnel outfall</i> , pintu kawalan banjir <i>box culvert inlet gate</i> , pintu kawalan banjir Kerayong <i>outfall</i> dan sebagainya
3	Kolam Takungan Banjir Batu	71.6	Struktur kawalan banjir seperti <i>outlet</i> , <i>inlet</i> , <i>trash screen</i> , perangkap sampah dan sebagainya
4	Kolam Nanyang	20.1	Struktur kawalan banjir seperti <i>outlet</i> , <i>inlet</i> , <i>trash screen</i> , pintu air, <i>spillway</i> dan sebagainya
5	Kolam Delima	8.1	Struktur kawalan banjir seperti <i>outlet</i> , <i>inlet</i> , <i>trash screen</i> , pintu air, <i>spillway</i> dan sebagainya
6	Kolam Wahyu	25.4	Struktur kawalan banjir seperti <i>outlet</i> , <i>inlet</i> , <i>trash screen</i> , pintu air, <i>spillway</i> dan sebagainya
7	Kolam Takungan Banjir Midah	17.53	Struktur kawalan banjir seperti <i>outlet</i> , <i>inlet</i> , <i>trash screen</i> dan sebagainya
8	Kolam Takungan Banjir Batu 41/2	4.30	Struktur kawalan banjir seperti <i>outlet</i> , <i>inlet</i> , <i>trash screen</i> dan sebagainya

SOALAN NO: 546

9	Kolam Takungan Banjir Sri Johor	24.60	Struktur kawalan banjir seperti <i>inlet</i> , <i>outlet</i> , <i>walkway</i> , <i>solar erectors</i> dan sebagainya
10	Kolam Takungan Banjir Kg. Puah	2.27	Struktur kawalan banjir seperti <i>inlet</i> , <i>outlet</i> , <i>walkway</i> , <i>solar erectors</i> dan sebagainya
11	Kolam Takungan Banjir Kg. Benteng	6.60	Struktur kawalan banjir seperti <i>outlet</i> , <i>inlet</i> , <i>trash screen</i> dan sebagainya
12	Kolam Takungan Banjir Taman Sri Segambut	4.20	Struktur kawalan banjir seperti <i>outlet</i> , <i>inlet</i> , <i>trash screen</i> dan sebagainya

3. Beberapa langkah penyelarasan telah diambil oleh pihak JPS bersama-sama DBKL dalam mencegah dan menangani masalah banjir di Ibu Kota. Antaranya adalah:

- i. Menjadi Ahli Jawatankuasa Pengurusan Bencana Negeri dan Daerah yang masing-masing dipengerusikan oleh Ketua Setiausaha Kementerian Wilayah Persekutuan dan Datuk Bandar Kuala Lumpur;
- ii. JPS juga telah dijemput untuk menganggotai Mesyuarat Pusat Khidmat Setempat (OSC) bermula November 2020 untuk memberi input ulasan teknikal berkaitan dalam perancangan pembangunan; dan
- iii. Perkongsian data-data hidrologi secara *real time* - aras air sungai, taburan hujan, paparan *web camera* juga dilaksanakan di antara kedua-dua agensi.

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : BERTULIS

DARIPADA : YB PUAN YEO BEE YIN (BAKRI)

SOALAN

PUAN YEO BEE YIN [BAKRI] minta **MENTERI KANAN KERJA RAYA** menyatakan senarai projek-projek naik taraf atau penyelenggaraan Lebuhraya AMJ (Alor Gajah-Melaka-Jasin) yang telah dirancang oleh Kementerian dan langkah-langkah yang diambil untuk meningkatkan keselamatan jalan.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya sentiasa berusaha untuk memastikan Jalan Persekutuan di negara ini berada dalam keadaan selamat dan selesa. **Jalan Persekutuan Lebuh Raya AMJ** (Alor Gajah – Melaka - Jasin), **bermula dari Daerah Alor Gajah sehingga ke Daerah Jasin**, Melaka yang **merangkumi jalan sepanjang 68.5 km panjang jalan dan memasuki sempadan Daerah Muar, Johor sepanjang 400m.**

Sehingga Jun 2022, Kementerian ini telah meluluskan dan melaksanakan kerja penyenggaraan rutin dengan peruntukan sebanyak **RM691,823.33**. Manakala bagi pelaksanaan Kerja Penyenggaraan Berkala Pavemen dan Berkala Bukan Pavemen, peruntukan sebanyak **RM2.5 juta** dan **RM0.96 juta** telah diluluskan dengan nilai keseluruhan berjumlah sebanyak **RM4,151,823.33**. Pelaksanaan kerja di bawah program penyenggaraan berkala telah pun disiapkan sepenuhnya.

Manakala bagi laluan yang berada di Daerah Muar, peruntukan yang telah diluluskan melibatkan kerja-kerja penyenggaraan rutin sehingga 30 Jun 2022 adalah bernilai **RM4 ribu**.

Pecahan nilai peruntukan yang telah diluluskan bagi Jalan Persekutuan Lebuh AMJ sehingga 30 Jun 2022 adalah seperti berikut:

Bil.	Skop Penyenggaraan	Nilai
1.	Rutin Rutin di Muar	RM 691,823.33 RM 4016.39

2.	Berkala Pavemen	RM 2,500,000.00
3.	Berkala Bukan Pavemen	RM 960,000.00
	Jumlah keseluruhan	RM 4,155,839.72

Pelaksanaan kerja-kerja tersebut adalah tertakluk kepada kelulusan peruntukan oleh Kementerian Kewangan dan senarai keutamaan daripada pihak Jabatan Kerja Raya. Kementerian Kerja Raya melalui Jabatan Kerja Raya Malaysia sentiasa komited dalam memastikan jalan sentiasa dalam keadaan yang selamat dan selesa.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KE-EMPAT BELAS**

PERTANYAAN : BUKAN LISAN (BERTULIS)
DARIPADA : PUAN YEO BEE YIN [BAKRI]
TARIKH : JULAI-OGOS 2022

SOALAN

PUAN YEO BEE YIN [BAKRI] minta **MENTERI PENGANGKUTAN** menyatakan anggaran kos terkini (dengan cost breakdown) untuk projek Rapid Transit System Link (RTS), syarikat yang akan membinanya dan bila projek dijangka siap.

JAWAPAN

Tuan Yang Di Pertua,

1. Malaysia Rapid Transit System Sdn Bhd (MRTS), anak syarikat Mass Rapid Transit Corporation Sdn Bhd telah dilantik sebagai syarikat infrastruktur Malaysia (InfraCo) bagi Projek RTS Link pada Julai 2020. Kontraktor utama yang dilantik bagi projek ini adalah Adil Permata Sdn Bhd.
2. Pada masa ini, Kerajaan telah menetapkan anggaran kos terkini bagi projek RTS Link berjumlah RM3.856 billion. Kos ini terbahagi kepada lima komponen seperti berikut:

a.	Kos Kerja-Kerja Infrastruktur Rel	RM1.979 billion
b.	Kos Kerja-Kerja Tambahan Pembinaan dan Keperluan Agensi	RM200.0 juta
c.	Kos Kerja-Kerja Sistem:	RM754.5 juta
d.	Kos Pengambilan Tanah:	RM244.1 juta
e.	Kos Operasi InfraCo dan Jururunding:	RM678.6 juta

3. Untuk makluman Ahli Yang Berhormat, jumlah ini tidak termasuk kos pembinaan Kompleks ICQ serta Skim Penyuraian Trafik yang akan ditentukan kemudian.
4. Sebahagian besar daripada kos ini, khususnya yang melibatkan pembinaan infrastruktur telah disahkan oleh juruukur bahan bebas (*independent quantity surveyor*) dan mengambil kira kenaikan harga bahan binaan, peningkatan kos logistik, serta kekangan tenaga buruh akibat pandemik COVID-19.
5. Sehingga akhir bulan Jun 2022, kemajuan projek ini telah mencapai 17% bagi infrastruktur rel. Projek RTS Link ini dijangka siap pada 31 Disember 2026.

Sekian, terima kasih.

**PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022**

PERTANYAAN : BUKAN JAWAB LISAN

**DARIPADA : PUAN HANNAH YEOH TSEOW SUAN
(SEGAMBUT)**

SOALAN

PUAN HANNAH YEOH TSEOW SUAN (SEGAMBUT) minta **MENTERI DALAM NEGERI** menyatakan jumlah banduan atau tangkapan wanita yang melahirkan anak semasa menjalani hukuman penjara atau yang berada di depot tahanan imigresen bermula Jun 2018 hingga Jun 2022 dan langkah-langkah yang telah diambil oleh Kementerian untuk memastikan semua aspek anak tersebut terpelihara.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan kepada statistik Jabatan Penjara Malaysia pada tahun 2018 sehingga Jun 2022, jumlah banduan yang melahirkan anak adalah seramai 111 banduan. Daripada jumlah tersebut seramai 104 banduanita melahirkan anak semasa dipenjarakan di Penjara Wanita Kajang manakala seramai 7 banduanita pula dari Penjara Wanita Kota Kinabalu.

Sehingga kini, tiada data direkodkan di Jabatan Imigresen Malaysia bagi tangkapan wanita yang melahirkan anak semasa berada di depot tahanan imigresen.

Hal kebijakan anak-anak banduan yang baru dilahirkan dan ditempatkan di penjara sememangnya merupakan tanggungjawab Jabatan Penjara dan diberikan aspek penekanan yang utama. Oleh itu langkah-langkah

kawalan, pemeriksaan, pengasingan penempatan, pemantauan rapi, kemudahan kesihatan serta asuhan sentiasa diambil perhatian termasuk berhubung dengan Jabatan Pendaftaran Negara (JPN) untuk didaftarkan.

Untuk makluman Yang Berhormat, kedua-dua ibu dan anak itu akan ditempatkan di blok khas di dalam penjara yang bersinggan dan tidak bercampur dengan banduan yang lain. Mereka mempunyai kawasan khas yang dilengkapi dengan beberapa kelengkapan asas yang lain. Apabila anak tersebut semakin membesar, anak tersebut akan dihantar ke nurseri khas di dalam penjara.

Peraturan-Peraturan Penjara 2000 menetapkan bahawa mana-mana kanak-kanak yang dilahirkan di dalam penjara akan berada di bawah jagaan ibu mereka sehingga anak itu berumur tiga tahun.

**STATISTIK JUMLAH BANDUANITA MELAHIRKAN ANAK
DI INSTITUSI PENJARA
2018 – Jun 2022**

Institusi	Banduan Melahirkan Anak					
	2018	2019	2020	2021	2022 (JUN)	Jumlah
Penjara Wanita Kajang	20	23	32	20	9	104
Penjara Wanita Kota Kinabalu	1	3	2	0	1	7

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN [BERTULIS]

**DARIPADA : PUAN HANNAH YEOH TSEOW SUAN
[SEGAMBUT]**

SOALAN

YB PUAN HANNAH YEOH TSEOW SUAN [SEGAMBUT] minta **MENTERI PERUMAHAN DAN KERAJAAN TEMPATAN** menyatakan adakah merancang untuk mengadakan libat urus dengan pemegang taruh seperti golongan Arkitek dan Perancang Bandar bagi tujuan penyelarasan pengkhususan tugas dalam permohonan kebenaran merancang atau perintis pembangunan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui PLANMalaysia (Jabatan Perancangan Bandar dan Desa) telah mengadakan Mesyuarat Kumpulan Kerja Teknikal Urusan Mendapatkan Permit Pembinaan (TWGDCP) bagi membincangkan mengenai penyesaran pengkhususan tugas bersama Lembaga Profesional yang terlibat dalam urusan permit pembangunan. Perkara ini akan terus dibincangkan dari semasa ke semasa tertakluk kepada keperluan.

Untuk makluman Ahli Yang Berhormat juga, perenggan 58(2)(h), Akta Perancangan Bandar dan Desa 1976 (Akta 172) memperuntukkan punca kuasa kepada Pihak Berkuasa Negeri (PBN) untuk menetapkan bidang pengkhususan bagi tujuan permohonan Kebenaran Merancang (KM) dalam penyediaan dokumen dan pelan di Pihak Berkuasa Tempatan (PBT). Dalam hal ini, prinsip yang perlu dijadikan asas adalah orang yang berkelayakan (dari segi akademik) dan berpengalaman serta mahir (dari segi kompetensi) dipertanggungjawabkan untuk membuat tugas khusus yang berkaitan. Ini bagi memastikan urusan yang cekap dan cepat serta *outcome* cadangan pemajuan yang berkualiti, selamat dan berdaya huni dapat dicapai.

Sekian, terima kasih.

PEMBERITAHUAN PERTANYAAN BUKAN JAWAB LISAN DEWAN RAKYAT
MESYUARAT KE DUA, PENGGAL KE LIMA,
PARLIMEN KEEMPATBELAS 2022

PERTANYAAN : BUKAN JAWAB LISAN

**DARIPADA : YB PUAN HANNAH YEOH TSEOW SUAN
(SEGAMBUT)**

SOALAN

PUAN HANNAH YEOH TSEOW SUAN (SEGAMBUT) minta **MENTERI DALAM NEGERI** menyatakan jumlah permohonan kewarganegaraan yang telah diterima, sedang diproses dan ditolak termasuk bilangan permohonan sejak Jun 2018 hingga Jun 2022 oleh wanita yang masih menetap di luar negara dan semua permohonan yang melibatkan kanak-kanak berumur 18 tahun ke bawah.

JAWAPAN

Tuan Yang Di Pertua,

Berdasarkan rekod Jabatan Pendaftaran Negara (JPN), sebanyak **15,444 permohonan** kewarganegaraan yang diterima bagi individu yang berumur di bawah 18 tahun dari 1 Jun 2018 hingga 30 Jun 2022. Dari jumlah berkenaan, sebanyak **12,732 permohonan** yang masih diproses dan **1,899 permohonan** yang telah ditolak.

**PEMBERITAHUAN PERTANYAAN JAWAB BUKAN LISAN
DEWAN RAKYAT, MESYUARAT KEDUA, PENGGAL YANG KELIMA
PARLIMEN KEEMPAT BELAS TAHUN 2022**

PERTANYAAN : BUKAN LISAN

**DARIPADA : PUAN HANNAH YEOH TSEOW SUAN
(SEGAMBUT)**

SOALAN

PUAN HANNAH YEOH TSEOW SUAN (SEGAMBUT) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah status pelaksanaan Pelan Strategi Kebangsaan bagi menangani punca Perkahwinan Bawah umur di setiap negeri dan dengan setiap agensi, jumlah peserta yang terlibat serta tempoh masa untuk melaksanakan sepenuhnya program tersebut, terutamanya kepada komuniti B40 dan luar bandar.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) sentiasa komited melaksana dan memantau pelaksanaan program di bawah Pelan Strategi Kebangsaan Bagi Menangani Punca Perkahwinan Bawah Umur (Pelan). Melalui Pelan ini, Kerajaan mengambil pendekatan menyeluruh merangkumi bukan sahaja dari aspek penambahbaikan perundangan, malahan turut mengambil kira aspek pendidikan, jaringan sosial, pembasmian kemiskinan dan sistem sokongan dalam menangani punca perkahwinan bawah umur di peringkat akar umbi.

Berdasarkan pemantauan pelaksanaan keseluruhan 58 program di bawah Pelan, terdapat sebanyak 41 program telah mula dilaksanakan, manakala selebihnya 17 program sedang dalam peringkat perancangan. Program-program yang telah dilaksanakan ini adalah sama ada melalui program sedia ada ataupun dengan menambahbaik program sedia ada.

Tuan Yang Di-Pertua,

Tidak dapat dinafikan bahawa punca pendapatan rendah dan kemiskinan merupakan antara penyumbang utama kepada perkahwinan bawah umur. Melalui Pelan ini Kerajaan telah merangka pelbagai strategi dan program yang khusus untuk memperkuuh penyelaras dan penumpuan kepada sokongan sosioekonomi dan program jangkauan (*outreach*) sedia ada. Ini kerana program-program sebegini dijangka dapat memberi nilai tambah kepada pemberdayaan ekonomi keluarga terutamanya dalam kalangan kumpulan isi rumah B40.

Antara program yang sedang dilaksanakan adalah program peningkatan pendapatan atau keusahawanan, serta program latihan dan kemahiran kerjaya (TVET). Program-program ini melibatkan pelaksanaan bersepadu daripada pelbagai agensi yang berkaitan seperti Kementerian Belia dan Sukan (KBS); dan Kementerian Pembangunan Luar Bandar (KPLB) mulai tahun 2020 sehingga 2025.

Institut Latihan Kemahiran Belia dan Sukan (ILKBS) di bawah KBS telah menawarkan latihan kemahiran kepada belia. Seramai 6,567 orang (85 peratus) daripada enrolmen keseluruhan 7,756 orang pelajar ILKBS buat masa ini adalah di bawah kategori B40.

Selain itu, ILKBS juga menawarkan program TVETprenuer yang bertujuan untuk menggalakkan pembangunan modal insan yang berkualiti tinggi dan mempunyai pemikiran, atribut serta nilai keusahawanan dalam kalangan pelajar dan graduan ILKBS serta belia massa. Mulai tahun 2020 sehingga 2021, program Mybizhub@ILKBS juga telah berjaya melatih seramai 156 orang belia B40 dalam bidang keusahawanan dan perniagaan.

Dalam masa yang sama, KPLB menerusi Majlis Amanah Rakyat (MARA) juga menawarkan program pendidikan dan latihan yang memberi akses peluang kerjaya kepada para pelatih bawah umur 18 tahun dari komuniti B40. Bilangan keseluruhan pelatih bawah umur di bawah kategori B40 bermula tahun 2018 sehingga Jun 2022 adalah seramai 11,198 orang.

Manakala, KPWKM menerusi Jabatan Kebajikan Masyarakat (JKM) pula menawarkan bantuan kewangan mengikut kumpulan umur kanak-kanak. Buat masa ini, bantuan kewangan kanak-kanak yang ditawarkan adalah sebanyak RM150 sebulan bagi kanak-kanak yang berumur tujuh (7) sehingga 18 tahun; RM200 sebulan bagi kanak-kanak yang berumur di bawah umur enam (6) tahun; dan kadar maksimum RM1,000 per keluarga.

Tuan Yang Di-Pertua,

Di kesempatan ini, saya ingin mengucapkan syabas dan tahniah kepada semua pihak yang terlibat atas kerjasama dan komitmen yang diberikan dalam menangani punca perkahwinan bawah umur. Saya turut mengalukan saranan dan pandangan daripada semua pihak supaya Pelan ini sentiasa ditambah baik, komprehensif, dan relevan demi menjamin dan memastikan masa hadapan kanak-kanak terus cerah.

**PEMBERITAHUAN PERTANYAAN BUKAN LISAN
DEWAN RAKYAT, MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN
DARIPADA : PUAN HANNAH YEOH TSEOW SUAN
[SEGAMBUT]

SOALAN

YB PUAN HANNAH YEOH TSEOW SUAN [SEGAMBUT] minta **MENTERI PERUMAHAN DAN KERAJAAN TEMPATAN** menyatakan kronologi dan status tanah balai bomba di Hartamas dan sama ada terdapat usaha atau rancangan untuk menjual tapak tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Balai Bomba dan Penyelamat (BBP) Sri Hartamas merupakan balai bomba kategori ‘A’ yang telah siap dibina pada 11 November 2002 di atas tapak tanah milik Pesuruhjaya Tanah Persekutuan (PTP) seluas 2.47 ekar di Lot 53101, Mukim Kuala Lumpur. Pada tapak yang sama juga, turut dibina dua blok kuarters 10 tingkat yang menempatkan 76 unit kediaman.

Pada masa kini, balai tersebut dilengkapi dengan dua buah jentera bomba *Fire Rescue Tender*, sebuah jentera *Water Tanker* 20,000 liter, sebuah jentera *Arial Ladder Platform* (ALP) dan *Emergency Medical Rescue Services* (EMRS) dengan perjawatan 57 orang anggota. Balai bomba terdekat adalah BBP Taman Tun Dr. Ismail berjarak 8.6 kilometer dengan tempoh perjalanan 14 minit. Kedudukan BBP Sri Hartamas yang strategik menjadikannya satu aset yang sangat penting bagi membolehkan atur gerak anggota dan jentera bomba ke lokasi kejadian dalam tempoh *response time* 10 minit.

Berhubung pertanyaan sama ada terdapat rancangan untuk menjual tapak tersebut, Kementerian berpandangan kewujudan balai bomba di kawasan Sri Hartamas merupakan satu keperluan dan wajar dikekalkan. Jika terdapat sebarang permohonan dari mana-mana pihak untuk tujuan tukarguna (*landswap*), ia perlu diangkat kepada Unit Kerjasama Awam Swasta (UKAS), Jabatan Perdana Menteri untuk dipertimbangkan.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK ZAKARIA BIN
MOHD. EDRIS @ TUBAU [LIBARAN]**

SOALAN

DATUK ZAKARIA BIN MOHD. EDRIS @ TUBAU [LIBARAN] minta **MENTERI PELANCONGAN, SENI DAN BUDAYA** menyatakan statistik pertumbuhan sektor pelancongan negara semenjak pembukaan semula sempadan negara bermula 1 April 2022.

JAWAPAN

Tuan Yang di-Pertua,

1. Bagi suku pertama tahun 2022, Malaysia telah mencatatkan ketibaan seramai 98,053 orang pelancong asing dengan perbelanjaan pelancong asing sebanyak RM359.66 juta. Untuk makluman, Malaysia telah menerima kehadiran seramai 6,696,230 orang pelancong asing dalam tempoh yang sama pada tahun 2019, iaitu sebelum penularan COVID-19 di seluruh dunia.
2. Sebagai perbandingan, pada suku pertama tahun 2022, negara-negara di seluruh dunia telah mencatatkan peningkatan ketibaan pelancong antarabangsa dengan pergerakan seramai 76 juta orang pelancong antarabangsa, di mana 47 juta daripadanya dicatatkan pada bulan Mac 2022 sahaja. Walau bagaimanapun prestasi ini masih lagi pengurangan sebanyak 61% jika dibandingkan dengan prestasi paras pra-pandemik pada tahun 2019. Prestasi ini dijangka akan bertambah baik pada tahun hadapan berdasarkan laporan Pertubuhan Pelancongan Dunia (*United Nation World Tourism Organisation - UNWTO*) yang meramalkan bahawa industri pelancongan bagi negara-negara di rantau Asia Pasifik dijangka akan bertambah pulih pada tahun 2023.
3. Sejak Malaysia membuka semula pintu sempadan antarabangsanya bermula 1 April 2022 yang lalu, negara telah menerima kehadiran hampir 2 juta orang pengunjung antarabangsa.
4. Antara faktor tarikan pelancong ke Malaysia adalah kejayaan negara mengimbangi keperluan ekonomi dengan kesihatan, yang jelas dibuktikan apabila pembukaan semula sektor ekonomi dan pelancongan secara berfasa tidak menyumbang kepada penularan COVID-19 yang tidak terkawal. Kejayaan ini bukanlah sekadar kebetulan tetapi ia dicapai melalui pelaksanaan rancangan yang rapi. Antaranya ialah Projek Rintis Gelembung Pelancongan Antarabangsa Langkawi (LITB), yang dilancarkan oleh Kementerian Pelancongan, Seni dan Budaya (MOTAC), bermula November 2021 yang telah berjaya menjadi platform untuk semua pihak terbabit seperti agensi-agensi Kerajaan Persekutuan dan Negeri, penggiat industri serta rakyat tempatan dalam menyesuaikan diri

SOALAN NO : 554

dengan situasi norma baharu. Di samping itu, Kementerian Kesihatan Malaysia mengesahkan bahawa tiada kes atau kluster COVID-19 di Malaysia yang berpunca daripada kehadiran pelancong asing melalui LITB ini.

5. Menurut statistik oleh Malaysia Airports Holdings Bhd (MAHB), trafik antarabangsa di rangkaian lapangan terbang tempatan meningkat sebanyak 53% susulan pembukaan semula sempadan pada 1 April 2022. Lapangan Terbang Antarabangsa Kota Kinabalu, Lapangan Terbang Antarabangsa Pulau Pinang dan Lapangan Terbang Antarabangsa Langkawi menunjukkan peningkatan paling ketara, dengan masing-masing mencatatkan peningkatan lebih 200%. Sejumlah 2.78 juta penumpang direkodkan pada bulan April 2022, dengan 77% adalah pergerakan penumpang domestik. Di samping itu, lima syarikat penerbangan iaitu Vietjet Air, Scoot, AirAsia, Thai AirAsia dan AirAsia X telah menyambung semula 17 laluan antarabangsa ke Malaysia.

6. Sementara itu, Kajian Kadar Purata Penginapan Berbayar yang dijalankan oleh Tourism Malaysia melaporkan Kadar Purata Penginapan (AOR) bagi penginapan berbayar untuk sukuan pertama tahun 2022 juga menunjukkan peningkatan kepada 39.8% berbanding tahun lalu iaitu pada 23.8%. Peningkatan ini didorong oleh pemansuhan Perintah Kawalan Pergerakan (PKP) dan inisiatif kerajaan yang lain seperti LITB. Kadar Purata Penginapan (AOR) bagi penginapan berbayar dijangka akan terus menunjukkan trend peningkatan bagi bulan April dan seterusnya sejajar dengan pembukaan semula sempadan antarabangsa negara bermula 1 April 2022.

Sekian, terima kasih.

**PEMBERITAHUAN PERTANYAAN JAWAB BUKAN LISAN
DEWAN RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : BUKAN LISAN (BERTULIS)

**DARIPADA : DATUK ZAKARIA BIN MOHD
EDRIS@TUBAU (LIBARAN)**

SOALAN

DATUK ZAKARIA BIN MOHD EDRIS@TUBAU (LIBARAN) minta **MENTERI PEMBANGUNAN LUAR BANDAR** menyatakan bahawa, menyatakan langkah-langkah yang diambil oleh Kementerian untuk membantu masyarakat Orang Asli membudayakan keusahawanan dalam talian bagi mengetengahkan produk tempatan mereka.

JAWAPAN

Untuk makluman Yang Berhormat, Jabatan Kemajuan Orang Asli (JAKOA) pada tahun 2022 telah menyediakan Program Bantuan Bimbingan Usahawan *Quick Win* (Peralatan ICT). Seramai 18 usahawan dan koperasi yang telah diluluskan pemberian bantuan bimbingan peralatan ICT seperti laptop dan printer bagi tujuan pemasaran secara *online*.

Bantuan peralatan ICT ini diberi kepada usahawan yang melepas syarat dan lulus temuduga serta mempunyai potensi perniagaan atas talian dan kemudahan rangkaian internet yang baik.

Selain itu, seramai 60 orang usahawan JAKOA telah berdaftar dibawah Desamall@KPLB. Produk usahawan ini akan dipasarkan melalui platform niaga Desamall@KPLB. Platform ini dapat membantu usahawan yang mempunyai masalah kepada capaian internet dan yang kurang mahir dalam memasarkan produk atas talian.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : DATUK ZAKARIA BIN MOHD. EDRIS @
TUBAU [LIBARAN]**

SOALAN

DATUK ZAKARIA BIN MOHD. EDRIS @ TUBAU [LIBARAN] minta **MENTERI KOMUNIKASI DAN MULTIMEDIA** menyatakan status terkini pemasangan hab rangkaian gentian optik titik kehadiran atau Point of Presence (PoP) di 700 sekolah luar bandar Sabah.

JAWAPAN

Tuan Yang Dipertua,

Selain dari pembinaan menara-menara telekomunikasi dan satelit, Kerajaan turut akan melaksanakan penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hab untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya.

Untuk makluman Ahli Yang Berhormat, keseluruhan jumlah PoP di kawasan luar bandar Sabah adalah sebanyak 695 yang meliputi 59 di Fasa 1 dan bagi Fasa 2 pula adalah 636. Daripada jumlah tersebut sebanyak 14 adalah di Parlimen Libaran. Setakat 30 Jun 2022, sebanyak enam PoP kawasan berhampiran sekolah telah disiapkan di Sabah yang melibatkan beberapa buah sekolah seperti:

- (i) SK Kionsom Inanam
- (ii) SK Malangang Baru
- (iii) SK Kampung Libang
- (iv) SK Pekan Beaufort
- (v) SK Bombalai
- (vi) SMKA Tun Datu Mustapha

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : BERTULIS

**DARIPADA : DATUK ZAKARIA BIN MOHD. EDRIS
@ TUBAU [LIBARAN]**

SOALAN

DATUK ZAKARIA BIN MOHD. EDRIS @ TUBAU minta **MENTERI KESIHATAN** menyatakan status terkini masalah kekurangan fasiliti kesihatan dan pakar perubatan di Sabah.

JAWAPAN

Tuan Yang di-Pertua,

1. Kementerian Kesihatan Malaysia (KKM) komited bagi memastikan penyediaan fasiliti kesihatan yang optimum kepada rakyat termasuk di negeri Sabah.
2. Buat masa ini, KKM telah menyediakan 24 buah hospital di Sabah dengan kapasiti sebanyak 5,003 buah katil yang terdiri daripada hospital berpakar major, minor dan tanpa pakar. Nisbah katil kepada penduduk (*Bed Population Ratio, BPR*) bagi negeri Sabah ialah 1.40 (tahun 2021). Bagi perkhidmatan kesihatan primer pula, terdapat 327 klinik kesihatan yang menyediakan perkhidmatan pesakit luar, kesihatan ibu dan anak serta lain-lain sokongan klinikal yang turut dibina di kawasan pedalaman.
3. Bagi memastikan akses kepada perkhidmatan kepakaran dapat dipertingkatkan, KKM telah melaksanakan inisiatif Hospital Kluster melalui pembentukan enam Hospital Kluster mengikut lokasi geografi di Sabah. Pembentukan Hospital Kluster menggabungkan dua atau lebih hospital dengan sekurang-kurangnya satu Hospital berpakar sebagai satu Kluster untuk berfungsi sebagai satu entiti yang sama. Melalui pembentukan Hospital Kluster, sumber-sumber kesihatan merangkumi fasiliti, peralatan, kepakaran dan lain-lain dapat dioptimumkan dan dikongsi di antara hospital-hospital di dalam setiap Kluster. Penyusunan pengurusan rawatan pesakit, latihan pegawai perubatan dan anggota paramedik serta penempatan perkhidmatan kepakaran terutama di Hospital Tanpa Pakar juga dapat ditambah baik.
4. Namun begitu, tidak dapat disangkal sememangnya masih terdapat jurang dalam penyediaan fasiliti kesihatan di negeri Sabah. Antara pendekatan yang diambil oleh KKM untuk menangani isu ini adalah melalui:

SOALAN NO. 557

- (i) memberi fokus untuk menaik taraf hospital-hospital sedia ada bagi menyokong perluasan program kluster kepada lebih banyak hospital;
- (ii) mengkaji kesesuaian penggantian atau menaik taraf fasiliti klinik daif supaya dapat menyediakan persekitaran klinik yang selamat dan selesa; dan
- (iii) menyediakan klinik kesihatan dengan reka bentuk piawai yang lebih komprehensif dilengkapi dengan *sick bay*, *x-ray* dan bilik bersalin sebagai opsyen kepada pembinaan sebuah hospital di kawasan pedalaman.

5. Berdasarkan rekod KKM, hingga 31 Mac 2022, jumlah Pegawai Perubatan adalah seramai 59,348 orang iaitu:

- (a) 32,106 orang pegawai lantikan tetap yang merangkumi:
 - (i) 25,711 orang Pegawai Perubatan lantikan tetap; dan
 - (ii) 6,395 orang Pakar Perubatan lantikan tetap.
- (b) 27,242 orang pegawai lantikan kontrak yang merangkumi:
 - (i) 27,218 orang pegawai Perubatan lantikan kontrak; dan
 - (ii) 24 orang Pakar Perubatan lantikan kontrak.

6. Daripada jumlah tersebut seramai 3,326 Pegawai Perubatan yang berkhidmat di Sabah yang terdiri daripada 2,281 Pegawai Perubatan lantikan tetap dan 1,045 Pegawai Perubatan lantikan kontrak. Manakala, Pakar Perubatan yang berkhidmat di Sabah adalah seramai 428 orang.

Sekian, terima kasih.